

清  
實  
錄

高宗純皇帝實錄（一四）  
卷一〇四八至卷一一二一  
乾隆四十三年至四十五年

# 清實錄

第三冊

中華書局影印

**清 實 錄**

(第 二二 冊)

高 宗 實 錄 (一四)

\*

**中 華 書 局 出 版**

(北京王府井大街 36 號)

北京市中國書店發行

中國建築工業出版社印刷廠印刷

\*

787×1092 毫米 1/16 · 61 3/8 印張

1986 年 5 月第 1 版 1986 年 5 月北京第 1 次印刷

印數 0;001——1,500 冊

統一書號: 11018 · 1355—22 定價: 46.00 元

# 清實錄第二二冊目錄

## 高宗純皇帝實錄(一四)

卷一〇四八	乾隆四十三年正月上	一
卷一〇四九	乾隆四十三年正月下	一三
卷一〇五〇	乾隆四十三年二月上	二六
卷一〇五一	乾隆四十三年二月下	三九
卷一〇五二	乾隆四十三年三月上	五七
卷一〇五三	乾隆四十三年三月下	六七
卷一〇五四	乾隆四十三年四月上	七九
卷一〇五五	乾隆四十三年四月下	九二
卷一〇五六	乾隆四十三年五月上	一〇七
卷一〇五七	乾隆四十三年五月下	一二三
卷一〇五八	乾隆四十三年六月上	一三六
卷一〇五九	乾隆四十三年六月下	一五〇
卷一〇六〇	乾隆四十三年閏六月上	一六三
卷一〇六一	乾隆四十三年閏六月下	一七九
卷一〇六二	乾隆四十三年七月上	一九〇
卷一〇六三	乾隆四十三年七月下	二〇八
卷一〇六四	乾隆四十三年八月上	二二四
卷一〇六五	乾隆四十三年八月下	二三五
卷一〇六六	乾隆四十三年九月上	二四九
卷一〇六七	乾隆四十三年九月下	二六八
卷一〇六八	乾隆四十三年十月上	二九一
卷一〇六九	乾隆四十三年十月下	三二三
卷一〇七〇	乾隆四十三年十一月上	三三六
卷一〇七一	乾隆四十三年十一月下	三六一
卷一〇七二	乾隆四十三年十二月上	三八一
卷一〇七三	乾隆四十三年十二月下	四〇〇
卷一〇七四	乾隆四十四年正月上	四一四
卷一〇七五	乾隆四十四年正月下	四二四
卷一〇七六	乾隆四十四年二月上	四三七
卷一〇七七	乾隆四十四年二月下	四五五
卷一〇七八	乾隆四十四年三月上	四七七
卷一〇七九	乾隆四十四年三月下	四九五
卷一〇八〇	乾隆四十四年四月上	五〇七
卷一〇八一	乾隆四十四年四月下	五二三

卷一〇八二	乾隆四十四年五月上	五三五
卷一〇八三	乾隆四十四年五月下	五四八
卷一〇八四	乾隆四十四年六月上	五六一
卷一〇八五	乾隆四十四年六月下	五七一
卷一〇八六	乾隆四十四年七月上	五八七
卷一〇八七	乾隆四十四年七月下	五九六
卷一〇八八	乾隆四十四年八月上	六一
卷一〇八九	乾隆四十四年八月下	六二三
卷一〇九〇	乾隆四十四年九月上	六三八
卷一〇九一	乾隆四十四年九月下	六四七
卷一〇九二	乾隆四十四年十月上	六五八
卷一〇九三	乾隆四十四年十月下	六六七
卷一〇九四	乾隆四十四年十一月上	六七六
卷一〇九五	乾隆四十四年十一月下	六八四
卷一〇九六	乾隆四十四年十二月上	六九四
卷一〇九七	乾隆四十四年十二月下	七〇四
卷一〇九八	乾隆四十五年正月上	七一二
卷一〇九九	乾隆四十五年正月下	七二三
卷一一〇〇	乾隆四十五年二月上	七三九
卷一一〇一	乾隆四十五年二月下	七三六
卷一一〇二	乾隆四十五年三月上	七四七
卷一一〇三	乾隆四十五年三月下	七五九
卷一一〇四	乾隆四十五年四月上	七七四
卷一一〇五	乾隆四十五年四月下	七八四
卷一一〇六	乾隆四十五年五月上	七九四
卷一一〇七	乾隆四十五年五月下	八二〇
卷一一〇八	乾隆四十五年六月上	八二八
卷一一〇九	乾隆四十五年六月下	八二六
卷一一一〇	乾隆四十五年七月上	八三六
卷一一一一	乾隆四十五年七月下	八五〇
卷一一一二	乾隆四十五年八月上	八六三
卷一一一三	乾隆四十五年八月下	八七六
卷一一一四	乾隆四十五年九月上	八八六
卷一一一五	乾隆四十五年九月下	八九六
卷一一一六	乾隆四十五年十月上	九二一
卷一一一七	乾隆四十五年十月下	九三三
卷一一一八	乾隆四十五年十一月上	九三一
卷一一一九	乾隆四十五年十一月下	九四一

卷一一二〇 乾隆四十五年十二月上 九五三

卷一一二一 乾隆四十五年十二月下 九六三

大清高宗法天隆運至誠先覺體元立極敷文奮武孝慈神聖純皇帝實錄卷之一千四十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士文淵閣領閣事稽察欽奉 上諭事件處管理刑部戶部五庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌春正月壬戌朔

上詣

奉先殿行禮○詣

堂子行禮○詣

大高殿

壽皇殿行禮○遣官祭

太廟後殿○停止元旦朝賀○癸亥諭昨歲

甘肅省皋蘭等三十二廳州縣因夏間雨澤

愆期以致田畝被旱成災節經降旨令該督

等切實查勘賑卹兼施俾毋失所第念皋蘭

渭源安定會寧平番涇州平涼七州縣被旱

情形較重開春正賑既畢民食未免拮据著

加恩各展賑一月用數春澤其餘被災較輕

之金縣等二十五廳州縣雖亦經照例賑卹

如今春尚有缺乏籽種口糧之戶並著該督

隨時體察酌借以資接濟勒爾謹務董率所

屬實心料理俾得均霑實惠以副朕軫卹邊

氓之至意該部遵諭速行○又諭前經降旨

將直省軍流人犯內已過十年者查明省釋

回籍今自乾隆十一年查辦之後歷時已久

各省到配人犯所積漸多自應再沛恩施用

昭矜恤況近年以來屢命將秋朝讞緩決至

三次各犯概予減等而此項軍流之犯其從

前情罪本屬稍輕轉未得仰邀曠典亦殊可

憫著交各省督撫查明各該地方從前軍流

人犯內已過十年安分守法別無過犯者分

別咨部照十一年之例覈議奏請省釋其有

在配年久自能謀生不願回籍者仍聽其自

便。○命河南巡撫徐績來京候旨。以貴州布政使鄭大進為河南巡撫。甘肅按察使李本為貴州布政使。服闋前任廣東按察使譚尚忠為甘肅按察使。○甲子。諭朕於正月十八日啟鑒恭謁。

泰東陵行週年禮。○又諭昨歲山東省七八月間雨澤稀少。以致歷城。章邱。濟陽。鄒平。齊東。臨邑。堂邑。館陶。莘縣。冠縣。青城。商河。蒲臺。陽穀。壽張。朝城。觀城。臨清。邱縣等十九州縣。秋收歉少。嗣於九月底。得有雨澤。二麥半已補種。又降旨。停買十九州縣應補平糶倉穀。以平市價。並准於冬間。豫為出借倉穀。俾資接濟。第念各該處秋收既歉。民氣未舒。所有上年地丁尾欠。今春若照例催徵。問問力量。究恐不能寬裕。著加恩。將此十九州縣應徵錢糧。緩至麥熟後。再行徵收。俾歉區貧戶。得緩追呼。共安樂利。該部即遵諭行。○又諭上年河南省秋雨未能一律普霑。而汲縣。淇縣。臨

漳三處秋收。尤為歉薄。節經降旨。令該撫等將各該縣未完錢糧倉穀。緩至來春來後徵收。並令汲縣。臨漳二縣。無力購種之戶。撥借籽種銀兩。以紓民力。第念偏災窮戶。力量究未能寬裕。該處地丁錢糧。若至來後新舊並徵。貧農不無拮据。著加恩。將上年汲。淇。臨漳三縣。緩徵地丁銀四萬四千餘兩。蠲免十分之四。俾節正供之有餘。以資民食之不足。該部即遵諭行。○諭軍機大臣等。今日國泰有

六百里馳奏之摺。朕初以為必係拏獲鹽梟首犯孫二漢。及拆閱奏摺。則係奏報東省各屬得雪分寸。殊為不曉事體。山左冬雪短少。朕深用軫懷。若果普得深透之雪。由四五百里馳奏。尚屬相宜。然亦不應竟用六百里。駭人聽聞。今所奏之雪。惟登萊各屬。尚有八九寸。其濟南各府屬。僅得二三寸不等。而東昌臨清止有一寸。并不成其為雪。何足為慰。國泰何冒昧若此。著傳旨申飭。仍著董率所屬

虔誠祈禱。期於春前甘雪渥霑。慰民俟望。如雪少之處。續得厚雪。再行由驛馳奏。將此由四百里傳諭知之。○丁卯。享

太廟。遣誠親王弘暢恭代行禮。○遣官祭

太歲之神。○戊辰。

世祖章皇帝忌辰。遣官祭

孝陵。○諭曰。徐績現在來京候旨。河南巡撫已令鄭大進補授。其未到任之前。巡撫印務著榮柱暫行護理。○又諭上年豫省秋雨未能

普霑。二麥未能遍種。業經降旨將收成歉薄之汲。淇。臨漳等縣。蠲免緩徵地丁銀十分之四。俾貧民不致失所。第念該省當青黃不接之時。市集糧價未免昂貴。民食不無拮据。著照例將常平倉穀減價平糶。並將臨河三十六州縣存倉薊穀。各按州縣大小體察情形。儘數出借。以資接濟。並著加恩。自本年秋收為始。分作三年帶徵還倉。庶閭閻生計得以寬裕。榮柱現令護理撫篆。即著董率所屬實

心妥辦。以副朕軫念民依至意。該部即遵諭速行。○諭軍機大臣曰。徐績現今來京候旨。

鄭大進未到任之前。河南巡撫印務已諭交榮柱暫行護理。該省去歲秋麥未得遍種。冬雪又未優霑。現在尚未普被渥雪。市集糧價恐致漸昂。民食不無拮据。現已降旨將常平倉穀減價平糶。並令將存倉薊糧出借。以期閭閻生計充裕。著傳諭榮柱董率所屬實心妥辦。並體察民情。有應隨時經理者。宜即實

力籌畫。據實奏聞。毋存五日京兆之見。將此由五百里諭令知之。○是日立春。以恭遇

世祖章皇帝忌辰。順天府遵旨於次日黎明進土牛春山寶座。○是日起。

上以祈穀於

上帝。齋戒三日。○己巳。軍機大臣等議覆盛京將軍宗室弘昫奏稱廣寧一帶新開鵝鷹。二河上年十一月奉旨查勘。恐下流漫溢。酌籌挑濬。並查可開蕩田若干。橋路曾否歲修。今

查該二河無下流之患。新開已歷四年。鷄鷹已歷七年。應毋庸挑濬。附近蕩田。除已開墾升科外。仍可開蕩田三十八萬二千餘畝。惟地非甚腴。如有呈墾者。應請三年後升科。五年後丈量。至該處橋路。從前恃有生息一項。每年修補。嗣因此項歸入查收案內。橋路停修。歷無水患。惟四十一年。被巨流河漲衝。現據商販捐修等語。均應如所奏。其新開鷄鷹二河。或遇雨水過大。漲衝橋路。應飭該將軍等隨時妥辦。從之。○又議覆直隸總督周元理奏稱。新移密雲縣駐防官兵住房。勘有行宮旁隙地一百八十丈。坐落城外。可四圍另築堡牆。與易州等處營房相等。惟需用木植。不下七八萬件。請於熱河圍場山內。照數辦運。應如所請。從之。○又議覆成都將軍明亮等奏稱。前因雅州與南路打箭鑪木坪相近。奏請將省城提督移駐雅州。今覆查該處。既非沿邊扼要。又非適中控制。若將提督移駐。

遇有應會議番民等事。往返多有不便。如徑由省城辦理。提督竟不與議。又非慎重邊陲之道。臣等不敢拘泥前奏。徒事更張。請毋庸移駐。應如所請。從之。○庚午。

上詣

南郊齋宮齋宿。○辛未。祈穀於

上帝。

上親詣行禮。○命追復睿親王封爵。及復開國有功諸王原號。並予配享。諭睦親彰善王政

宜先。繼絕昭屈。聖經所重。朕自臨御以來。間

日恭閱

列祖

列宗實錄一冊。因得備知

祖宗創業艱難。及爾時懿親蓋臣。勤勞佐命。底定中原。偉伐殊功。實為從古所未有。而當時策勛錫爵。榮號崇封。所以酬答者。本從優厚。迨其後。或有及身緣事。旋被降削者。或有子孫承襲。更易封號者。迄今平情準理。若不為

之溯述闡揚。追復舊恩。於心實有所未愜。因念睿親王多爾袞。當開國時。首先統衆入關。掃蕩賊氛。肅清宮禁。分遣諸王追殲流寇。撫定疆陲。一切創制規模。皆所經畫。尋即奉迎世祖車駕入都。定國開基。以成一統之業。厥功最著。顧以攝政有年。威福不無專擅。諸王大臣未免畏而忌之。遂致歿後。為蘇克薩哈等所構。授款於其屬人首告。誣以謀逆。經諸王定罪除封。其時我

世祖章皇帝。實尚在沖齡。未嘗親政也。夫睿王果萌異志。則方兵權在握。何事不可為。且吳三桂之所迎。勝國舊臣之所奉。止知有攝政王耳。其勢更無難號召。即我滿洲大臣。心存忠篤者。自必不肯順從。然彼誠圖為不軌。無難潛鋤異已。以逞逆謀。乃不於彼時因利乘便。直至身後。以斂服僭用明黃龍袞。指為覬覦之證。有是情理乎。況英親王阿濟格。其同母兄也。於追捕流賊回京時。誣報李自成身

死。且不候

旨。班師。睿王即遣員斥責其非。並免王公等往迎之禮。又因阿濟格出征時。脅令巡撫李鑑。釋免逮問道員。及擅至鄂爾多斯。土默特取馬。令議其罪。降為郡王。平日辦理政務。秉公持正。若此。是果有叛志。無叛志乎。又

實錄載。睿王集諸王貝勒貝子公大臣等。遣人傳語曰。今觀諸王貝勒大臣。但知諂媚於予。未見有尊崇

皇上者。予豈能容此。昔

太宗升遐。嗣君未立。英王。豫王。跪請予即尊位。予曰。爾等若如此言。予當自刎。誓死不從。遂奉

皇上繼承大統。似此危疑之時。以予為君。予尚不可。今乃不敬

皇上而媚予。予何能容。自今以後。有盡忠

皇上者。予用之。愛之。其不盡忠。不敬事

皇上者。雖媚予。予不爾宥也。且云。

太宗恩育予躬。所以特異於諸子弟者。蓋深信諸子之成立。惟予能成立之。每覽

實錄至此。未嘗不為之墮淚。則王之立心行事。實能篤忠。蓋感

厚恩。深明君臣大義。尤為史冊所罕覩。使王彼時。如宋太宗之處心積慮。則豈肯復以死固辭。而不為邪說搖惑耶。乃令王之身後。久抱不白之冤於泉壤。心甚憫焉。假令當時王之逆跡。稍有左驗。削除之罪。果出於我

世祖聖裁。朕亦寧敢復翻成案。乃實由宵小奸謀。構成冤獄。而王之政績。載在

實錄者。皆有大功而無叛逆之跡。又豈可不為之昭雪乎。昨於乾隆三十八年。因其瑩域久荒。特勅量為繕葺。並准其近支以時祭掃。然以王之生平。盡心王室。尚不足以慰彼成勞。朕以為應加恩復還睿親王封號。追諡曰忠補入

玉牒。並令補繼襲封。照親王園寢制度。修其塋

墓。仍令太常寺春秋致祭。其原傳尚有未經詳叙者。並交國史館恭照

實錄所載。敬謹輯錄。添補宗室王公功績傳。用昭彰闡宗勛至意。又如豫親王多鐸。從睿親王入關。肅清京輦。即率師西平流寇。南定江浙。實為開國諸王戰功之最。乃以睿親王之誣獄株連。降其親王之爵。其後又改封信郡王。雖至今承襲罔替。但以王之勛績。超邁等倫。自應世祚原封。以彰殊眷。豈可以風影微

眚。輒加貶易乎。朕以為應復其原封。又諸王中披堅執銳。拓土開疆。共成一統之業者。如禮親王代善。後改封康親王。鄭親王濟爾哈朗。後改封簡親王。肅親王豪格。後改封顯親王。克勤郡王岳託。後改封平郡王。當時俱茂著壯猷。克昭駿烈。載在宗盟。今其子孫所襲。均非始封之名。外人不知。妄疑宗藩當國家締造時。有大勲勞。而後裔均不得長延帶礪。似為闕典。即其本支承家襲慶。以去祖漸遠。

幾忘其先世錫封之由。弗克顧名奮效。所係於宗室子孫者甚重。況功臣世封內。如揚古利之英誠公。費英東之信勇公。額亦都之果毅公。俱以本號相傳。其子孫承襲者。各能溯勛閥以宣偉績。不失故家喬木之遺。今以親賢世胄。竟改其初封嘉號。何以垂貽奕禩。示酬庸追本之義乎。朕以為應復其原號。著交軍機大臣。會同宗人府。悉心妥議具奏。其餘宗室諸王貝勒等。如有顯著功績。其封爵後

經降奪者。除本人身罹重愆。自不當復邀優典。若係承襲之子孫。獲咎議處者。僅當斥其本身。而不當追貶其祖宗世爵。方為平允。亦著一併會查議奏。再配享

太廟諸王。僅有通達武功。慧哲宣獻。四郡王。其

太祖。

世祖時。戮力行間。櫛風沐雨之親藩。如向所舉數人。皆未之及。蓋由當時議禮諸王。各懷私

意。遂爾沒其勛伐。不得同侑馨香。豈足以彰公道。所有睿親王。禮親王。鄭親王。豫親王。肅親王。克勤郡王。俱著補置牌位。配享

太廟。用以妥功宗而昭渥典。至通達郡王。係顯祖之子。武功慧哲宣獻。三郡王。係

景祖之子。當時雖身與配享。第以三郡王宗支。已在覺羅。宗室王公表傳內。亦未立通達郡王傳。國史傳又以屬在宗潢。今此四王無所附麗。亦覺缺典。著交內閣。國史館。補為立傳。

通達郡王。入於宗室。武功等三郡王。列於國史諸大臣傳之前。或當時紀載簡少。功績無由稽覈。不拘詳畧。各立一傳。以徵信實。○又諭曰。故超勇親王額駙策凌。朕曾施恩。令其配享

太廟。列入西廡。策凌係蒙古親王。固倫額駙。在軍營多立功績。著加恩將策凌牌位。移列東廡。怡賢親王之次。○又諭曰。信勇公費英東。當我朝創業時。首先率所部來歸。繼從

太祖征勦諸部。屢挫明兵。厥功最大。實與揚古利。額亦都。同為開國勲臣之冠。自應並錫上公。用彰渥報。乃揚古利原封一等公。額亦都僅得二等公。經朕晉封一等。而費英東子孫所襲。尚係三等公爵。不足以昭酬庸茂典。著加恩晉封為一等公。俾元勲世胄。永膺茂賞。至向來后族承恩世爵。俱係一等公。此等特因椒房至戚。恩澤加封。其與佐命功臣。櫛風沐雨。拓土開疆者。實難並論。況宗室王公之

以近支恩封者。尚以世次遞降。而外戚轉得以崇封延世。未免過優。著將所有承恩公爵。俱改為三等公。世襲罔替。著為令。○又諭本年繙譯鄉試。前經降旨。於八月舉行。但今秋起鑒前往盛京。先期舉行為便。著將繙譯鄉試。改為七月初旬。該部即遵諭行。○諭軍機大臣等。據郝碩奏。接奉部議。將署布政使周克開。按察使馮廷丞革職。委員分別管押。解交刑部治罪一摺。前已有旨。交部矣。逆犯王

錫侯。妄作字貫。於凡例內。敢於悖逆。該司道等。不能詳細檢查。罪有應得。但不至如海成之重耳。至該管府縣。於所屬地方。更為親切。乃任該犯肆行刊刷流傳。漫無稽察。其咎應較司道為重。前據高晉將知府郭聯奎。署知縣王賓王。附叅止。因伊等不能實心查繳違礙書籍。而於失察王錫侯妄刻字貫之處。未經辨及。著傳諭郝碩。即速確查王錫侯字貫。刻自何年。是否郭聯奎。王賓王。任內之事。如

該府縣到任在後。則當查明前任何員。分別覈定。據實叅奏治罪。以昭平允。將此由四百里諭令知之。仍即查明覆奏。○壬申。刑部奏。此次奉旨。查照乾隆十一年之例。省釋軍流人犯。查彼時西陲尚未平定。故原案內無新疆人犯條款。今逢恩旨。未便令其向隅。惟新疆正資民人耕作。又不便概令回籍。應請令該將軍等。於已過十年人犯內。查有年逾七八十及衰病不任耕作者。准令回籍。其年力

強壯者。留為該處種地民人。起除刺字。仍令該將軍等。照例造冊。送部覈辦從之。○癸酉。

上詣

雍和宮行禮。○直隸總督周元理遵旨奏。天津

靜海青縣。滄州。鹽山。灤州。遷安。樂亭。盧龍。撫

寧。昌黎。豐潤。寧河。十三州縣。係向有老少餘

鹽之處。從前原准日買場鹽四十觔。嗣因私

販藉圖影射。歷經奏准。每名日給制錢二十

四文。令商捐交各州縣發給。鹽觔均歸商賣

日久相安。毋庸另籌。報聞。○甲戌。

上詣

大高殿行禮。○諭曰。

皇祖第八子允禩。第九子允禔。居心險詐。結黨

妄行。罪皆自取。

皇考尚不忍重治其罪。僅令削除譜牒。更改其

名。以示媿辱。就兩人心術而論。其潛蓄覬覦

窺竊之謀。誠所不免及

皇考紹登大寶。伊等怨尤。誹謗亦屬情事。所有

蓋伊兩人。未嘗無隱然悖逆之心。特未有顯然悖逆之跡。是以

皇考雖明暴其罪狀。猶為曲示矜全。

聖心如日在天。固眾所共仰也。迨

皇考晚年。屢向朕諭及此事。輒愀然不樂。意頗

悔之。若將留以有待者。朕即位之初。深有念

於孔子三年無改之言。未敢遽易成案。今臨

御四十二年矣。近降旨復睿親王封爵。及仍

給還功績諸王原封爵號。因念宗藩遠派。既

為覈實。酬庸。而近屬本支。豈宜畧而不辨。此

事重大。朕若不言。後世子孫。亦無敢言者。所

有允禩。允禔。二人自不合還其原爵。仍當復

其原名。收入

玉牒。兩人子孫。亦當一併叙入。並著軍機大臣

會同宗人府。查明應入支派。列譜呈覽。朕此

舉。實仰體我

皇考當日仁心。以申未竟之緒。諒

皇祖

皇考在天之靈亦當愉慰也。又弘皙在乾隆初年曾獲罪戾。經承辦之莊親王等奏請削其原名。閱今亦三十餘年矣。念其所犯更非必不可原之罪。且其子姓現列宗圖。何必獨令其削名示貶。弘皙亦著於

玉牒內復其原名則

皇祖一派天潢。牒圖具列。益昭麟趾燕貽之盛。朕亦惟揆情度理。悉準以大公至正之心而已。將此通諭知之。○山東巡撫國泰奏東省

鹽場老少貧販。惟需化之永利場額設二十一名。日照之濤雄場額設一十三名。計每名日赴場領鹽。可獲利二三十文不等。今既議裁。應仿天津給錢裁販之例。日給制錢二十四文。商捐繳貯縣庫。地方官按月散給。其餘鹽飭商領運。下部議行。乙亥

上詣

壽康宮行禮。○諭朕覽

實錄。載英親王阿濟格秉心不純。往追流賊。謊

報已死。又擅至沿邊索馬。且向巡撫囑託公事。過跡昭著。雖前此亦有微功。究不足以抵其罪。黜爵實由自取。至其子孫。前俱降為庶人。削其宗籍。

皇祖御極之初。曾加恩將伊次子傅勒赫復還宗支。追封公爵。遞襲其餘諸子。仍行除籍。嗣於康熙五十二年復蒙

恩將伊第三子伯爾遜。第八子佟塞。第十子鄂拜。第十一子班進泰。各支賜給紅帶子。附入

玉牒。今思傅勒赫一支既已作為宗室襲爵。其有後之伯爾遜等各支。及無後之和度等。同係英親王之子孫。似毋庸復為區別。因推廣皇祖恩意。著交宗人府一體查明。復還黃帶子。列入宗譜。○又諭熱河地方。朕每歲木蘭秋獵。先期駐蹕數十年來。戶口日增。民生富庶。且農畊蕃殖。市肆殷闐。其秀民蒸蒸向化。誦相聞現已興建學宮。議定庠額。並命設立考棚。將來人文日盛。儼然成一大都會。而稱

名尚仍熱河之舊殊於體制未協。因思熱河從前曾稱為承德州。嗣後應改為承德府。即以熱河同知改設。其餘六廳如八溝較大。應改為知州。喀喇河屯等廳酌量改縣均隸新設之承德府管理。併隸熱河道考覈著交總督周元理將應行酌改事宜悉心籌畫妥議具奏。○丙子

上詣

奉先殿

壽皇殿行禮。○諭軍機大臣曰。周元理彙奏盜竊已未獲各案一摺。已於摺內批示。各省彙奏事件。其應於年內及正月具奏者。前經軍機大臣分別酌定期限。行知各省。該督撫等具摺時。自應將於何時陳奏之處叙明。庶可一目了然。今周元理所奏盜竊各案。係正月內應行具奏之件。而摺內轉叙列年底開單彙奏字樣。殊欠明晰。著傳諭周元理。嗣後彙奏各款。或應於年內具奏。或應於正月具奏。

之處俱於摺內聲明。毋致牽混。○又諭前因緬匪業經送出蘇爾相。其事已完。且有納貢還人之說。現更無可籌辦。惟當嚴查關隘。勿使奸民等出入偷漏等因。已屢諭李侍堯遵照。妥辦。昨李侍堯奏緬夷自惜較死後。內訌外釁。日無休息等語。緬酋贅角牙新襲父職。其親屬鄰疆。彼此構爭。或所不免。即果有其事。亦止可置之不問。蓋乘人之亂。理本不順。且緬甸氣候水土。並皆惡劣。實非可用武之

地。朕籌之已熟。斷不宜以我有用之將士。輕為嘗試。是以決計不復於緬甸加兵。即使蠻觸自鬪。竟至內潰外侵。有隙可抵。而其天時地利。並無改易。豈可因此輕舉妄動耶。且緬匪梗化多年。近既知送還蘇爾相。尚稍有悔罪之心。亦可藉以完從前之局。若此時并將楊重英送出。遣使納款進貢。固屬甚善。自應即行奏聞。加恩准其開關通市。設仍冥頑不悟。並不獻出楊重英。亦於事無關輕重。止須

付之不理賊匪自無從揣測惟緬境既有內亂之事或其頭人等有脫出來投者不妨概行收留一面具奏請旨彼既未獻楊重英等更不得怨我之納彼逋逃況並育兼容矜撫窮困乃天朝一視同仁之道理所宜辦李侍堯當隨時酌量妥為之至於嚴查關隘一節實為馭邊最要之事李侍堯惟當董飭所屬實力詰查勿使內地奸民及沿邊獮夷等一人出入致探洩事機偷漏貨物庶令緬匪稍知窘畏此事專責之李侍堯務須善體朕意始終如一不可任屬員日久玩懈有名無實諒李侍堯必不掉以輕心致負委任也將此由六百里傳諭知之仍將緬匪近日情形所謂內訌外釁者何事有無信息即行覆奏

李侍堯奏

奏

大清高宗法天隆運至誠先覺體元立極敷文奮武孝慈神聖純皇帝實錄卷之一千四十八

實錄卷一千四十八

吉

大清高宗法天隆運至誠先覺體元立極敷文  
奮武孝慈神聖純皇帝實錄卷之一千四十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總載官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣量諾內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌正月丁丑諭前據戶部

議駁富勒渾等題銷陝甘餘丁支給本色米石及滇黔湖廣三省綠營餘丁仍照長夫之例支給米石又自灌縣雇騾運送揪底米一萬四千五百餘石照商運開銷腳價均與例不符難以准銷二摺戶部所駁俱為得理因諭令富勒渾等將實在情形明白回奏茲據富勒渾等奏稱當日辦理軍需因餘丁有實帶未帶之異其口糧遂有本色折色之分有實丁者支給本色無實丁者即支折色其長

夫一項未經奏定折價以前西路兵丁業已照舊支給當時事勢實難裁徹乃軍營共見共聞之事至騾運一項實緣彼時軍糧孔急用騾協濟承辦各員均係實支實發皆臣等所深知各等語所言自屬實情並非託詞浮冒所有富勒渾等題銷軍需餘丁長夫及騾運各案俱著加恩准其開銷此後富勒渾等務須實力稽覈報銷不得因此次恩旨任聽各員違例冒銷致干咎戾也○諭軍機大臣

曰李侍堯奏把總李有貴在蠻墩卡盤獲進口之奸民番起雲訊供解京等因一摺所辦皆合機宜已於摺內批示矣番起雲既係騰越州民人乃敢潛赴緬地轉為賊匪進口探聽內地信息其情罪甚為可惡俟解到時嚴訊辦理看來奸匪進關探信習以為常前此雖有稽查關隘之名而彰寶圖恩德各任內皆未能實力整飭各員弁因遂視為具文漫無稽詰致奸民無所忌憚得以肆意出入今

該犯番起雲甫經進口。即被盤獲。可見李侍堯認真董率之效。果能常如此留心。自不致有偷越漏洩之事。至所稱緬匪現與暹羅打仗。木邦等處兵少。畏懼內地進剿。自屬實情。因令沿邊一帶各鎮協於駐劄處所。每日施演鎗礮。揚播軍威。並令騰越州採買糧石。豫備軍儲。俾該匪聞風隄防悚息。亦可迫其恐懼輸誠之意等語。所見亦是。兵法原貴虛實。實實。今虛張聲勢。實則靜鎮如常。使賊匪無

從揣測。未為不可。但緬匪業已送出蘇爾相。其事已完。所云納降進貢之說。原可置之不問。俟其遣人到關。再行隨機酌量辦理。現在緬境雖有與暹羅交兵之事。恐內地乘隙進攻。在匪衆自不得不為此慮。但天朝撫馭外夷。全以威信為主。昨歲該匪送還蘇爾相。其納貢之請。亦曾檄飭允許。今若聞其有隙可抵。無故加兵。實屬無名。朕必不為也。且緬地氣候水土惡劣。我兵從前到彼。多因病傷損。

實不值以有用之將士。輕擲瘍鄉。況軍士如或臨陣退縮。不難立寘重典。以申紀律。若疾病死亡。即本人亦非所願。朕又安能以法繩之。是緬地之不宜用兵。朕計之甚熟。屢降諭旨。極明。今雖聞緬地有內訌外釁之語。而該處天時地利。自當如故。斷不可輕舉妄動。昨亦諭知李侍堯矣。惟當嚴查關隘。時刻經心。勿以地廣而或疎。勿以日久而或懈。所責成於李侍堯者如此。該督務宜善體朕意。時時

董率所屬。嚴查勤詰。一切妥協為之。至此次盤獲番起雲之把總李有貴。甚屬出力。著交該督即以千總用。俾沿邊各員弁聞之。共知勉勵。將此由六百里傳諭知之。仍將詢問線甕團供詞。及緬匪近日有無信息之處。即行覆奏。○宗人府軍機大臣等。議奏睿親王等爵號事宜。一。睿親王多爾袞。本無子嗣。從前曾將豫親王之子多爾博。承繼為嗣。後因定議罪案。業令歸宗。今睿親王既復宗支。應仍

令多爾博一支繼嗣。所復睿親王爵。即令多爾博之四世孫淳穎承襲。世襲罔替。至淳穎承襲之公爵。毋庸另襲。其親王應設佐領。及護甲等項。並交該衙門照例議辦。其應補入玉牒之處。即查明補入。並交國史館將所著功績。於原傳添敘。其園寢。交該衙門照親王例勘估改葺。春秋致祭。一。豫親王多鐸。應遵旨追復親王。還號為豫。一體配享。

太廟。其豫親王爵。即令現襲信郡王之修齡承

襲。亦世襲罔替。其應添改護衛等項。交該衙門照親王例辦理。一。禮親王等原封爵號。應永紹嘉名。勿令改易。所有現襲之康親王。應復號為禮親王。簡親王。復號為鄭親王。顯親王。復號為肅親王。平郡王。復號為克勤郡王。至改復舊號之親王。郡王。止。就現在襲爵者為始。永遠遵循。其從前原襲已故之康親王等封號。俱無庸追改。一。通達武功。慧哲。宣獻。四郡王。應請交國史館查明事實。各補列傳。

一。睿親王追復原封。并令世襲。信郡王改復豫親王。均應照例另給冊寶。至康親王改復禮親王。簡親王。改復鄭親王。顯親王。改復肅親王。平郡王。改復克勤郡王。其原給寶文。印文。應交禮部改鑄。其冊內。止須將奉旨年月。及改復封號增鐫。毋庸另製。一。禮親王睿親王。鄭親王。豫親王。肅親王。克勤郡王。現俱配享。

太廟。所有東廡敘次。禮親王。應在宣獻郡王之

下。睿親王等五王。以次敘列。從之。○戊寅。諭軍機大臣等。據通政司奏。本月十三日。接收貴州巡撫圖思德題本一箱。咨明於十二月十五日拜發。及查驗本箱。係用河南巡撫封條。標明正月初六日期。開箱檢查。內仍係貴州原箱。所貯本章包封等項。俱各損壞。再將傳牌查看。係南陽縣遞至李崗橋地方。馬驚跌壞。另換套箱。至裕州。葉縣。襄城。縣許州。尉氏縣等處驛站。並無填注傳牌等語。本章關

係緊要不容沿途私拆閱看。因著軍機大臣將原箱檢閱。則隨本夾板黃繩俱已割斷。副本包封全行拆開。正本封套亦拆動一半。即云馬驚失跌止應擦損外層包裹不應繩斷封開。明係途中有偷拆情弊。復令細檢圖思德原題四件。係彙報常平社倉京鉛工價等三件。其一係題陞同知王雨溥知縣蔡五錫查係直隸浙江兩省人均非河南籍貫。既無與該省關涉之事。又無叅劾官員之本。何以

途中欲行拆看。其故殊不可解。而割繩拆封斷非跌磕所致。又難言無弊。未便顛項了事。著傳諭榮柱即速逐站挨查。嚴訊確情。據實覆奏。並將裕州等州縣相隔七日。因何未注傳牌。及另加套箱之站。因何不出結申報。該撫加貼封條。因何不咨報通政司之處。一併查明具奏。將此由五百里傳諭知之。仍著榮柱即速確查。毋致草率干咎。所有通政司原摺着鈔寄閱看。其拆動之夾板包封一併發

交查對審訊。○又諭據王廷贊奏甘肅安西涼州鞏昌平涼慶陽各府屬於十一月初八二十八及十二月十一等日得雪一二三寸等語。甘肅去冬得雪地方較少。且所得僅一二三寸。未為深透。雖該省不種宿麥。無藉滋培。但入春後土膏脈動之時。若得普被祥霽。於布種田禾更有裨益。現在京畿及山東河南山西等省均於正月初十十一得雪優渥。未識甘肅此時曾否均霑。著傳諭勒爾謹即

將該省有無續得春雪情形迅速由驛覆奏。以慰廑念。將此由五百里諭令知之。○軍機大臣等議覆協辦大學士尚書英廉奏稱各省營汛地方遇有僉兵護解差使其盤費及修補器械等費在所必需。而綠營中因無項可動。輒攤餉作費。累及衆兵。致月餉僅餘十之五六。請將各省朋馬扣銀分給各標營。置產生息。作為差費等語。查朋馬扣一項例作賞需。生息名目久經停徹。所請僉兵差費應交

各督撫於閒款及存公零項籌覈酌給奏明辦理從之○己卯

上啟鑒謁

泰陵

泰東陵○諭朕此次恭謁

泰陵

泰東陵及三月清明節恭詣祭謁所有沿途經過地方著加恩蠲免本年地丁錢糧十分之三○是日駐蹕黃新莊行宮○庚辰諭軍機

大臣等本日榮柱奏開封歸德等府許汝等州均於正月初十十一兩日普霑雨雪自六七寸至一尺不等處處優霑農民歡忭異常等語覽奏欣慰已於摺內批示矣該省上年冬雪未能普徧朕心深為軫念今既瑞雪普遍優霑於趕種春麥甚為有益第念汲淇臨漳等縣上年秋收歉薄曾降旨蠲免緩徵丁銀復令平糶常平倉穀以資接濟今該三縣亦均得透雪自可補種春麥著傳諭該護撫

速飭該地方官善為勸諭令此三縣農民及時多種春麥倘因歉收之後購種稍艱即查明酌借籽種俾資力作以示朕軫念窮黎至意將此由五百里傳諭知之○又諭曰徐恕奏拏獲嶧縣鹽梟夥犯小王二供稱上年九月十一日途遇孫大漢等各推私鹽小車同走至嶧縣地方聞在前鹽車被巡役攔住經宋四夸子令該犯前往探信聞孫大漢等搶回鹽車恐被追拏孫大漢同刁其三等俱各分路逃往沿海及河南山西潞安山等處躲避等語孫大漢等係此案鹽梟首犯膽敢拒捕傷差不法已極情罪甚為可惡必當拏獲到案審明正法以示懲儆今既據小王二供稱逃往豫省及晉省之潞安山等處著傳諭已延三榮柱密委委員並飭所屬各地方官上緊躡緝務期弋獲審明具奏不得視為鄰省尋常通緝之案僅成海捕空文以致重犯兔脫稍稽顯戮再嶧縣界與江南之安徽相

近聞安徽之六安州有六安山與潞安聲音相仿。小王二供內所稱之潞安山恐係六安山之訛。或孫大漢等就近潛竄該山希圖匿跡漏網亦未可定。著傳諭閔鷄元密委妥員前往留心訪緝毋任潛匿稽誅將此由五百里傳諭知之。○是日駐蹕半壁店行宮。○辛巳駐蹕秋瀾村行宮。○壬午諭曰尚書袁守侗派往四川迎會侍郎阿揚阿有查辦事件即著於行在馳驛前往其川省民人胡佑著

交沿途地方官迅速押解川省質訊。○諭軍機大臣等朕恭謁

泰陵本日於梁格莊途次有四川叩閭民人胡佑呈控瀘州局士聶倫等侵帑婪派一事自應特派大員前往秉公審訊務得實情因思上年川省大足縣民人黃玉芳控告軍需派累特派侍郎周煌阿揚阿前往審辦昨據奏稱審案事畢阿揚阿於正月初二日自川省起身回京等語計目下已在途次所有今日

胡佑呈詞及告示等件已派尚書袁守侗馳驛前往迎會阿揚阿同赴川省瀘州秉公審訊定擬具奏將此由六百里傳諭阿揚阿知之。○又諭曰楊景素奏准戶部咨駁粵海關徵收盈餘稅銀乾隆四十年分比較前三年銀數短少請旨交臣嚴行覈勘隨經選委道員前赴該關詳確查明實因是年洋船較上屆少到八隻貨物又粗多細少以致短絀其所少銀兩仍責令前任監督德魁賠補等語

海關稅項之盈絀自應視洋船之多寡若此次洋船較上三屆果俱少到則稅課自無從多收并當加恩免其賠補若到關洋船數目相同僅言貨物粗多細少究係辦理不善託詞迴護自應按數著賠著交戶部會同總管內務府大臣查明據實具奏。○又諭本日鐘音奏溫州鎮總兵孟兆熊來京陛見遴委副將張繼勳署理鎮篆一摺所奏甚屬遲緩已於另摺批飭矣孟兆熊於正月望間到京起

身回任。又已數日而該督奏委署篆及令起程。陛見之摺始行奏到。殊不可解。且據奏稱十一月十三日接准部咨。即委副將張繼勲前往署理。令孟兆熊交代起程。自應即於彼時一面檄委一面奏聞。豈有遲至月餘方行入告之理。必係忽不經意遺忘具奏。及查出始補此摺。率是以往。則於地方公務貽誤必多。尚安望其實心整飭乎。朕嘗謂滿洲進士出身之人。無一好者。鍾音平日似覺稍優。何以近來亦復如此。即此一節而論。其餘亦不足信矣。嗣後務須實力痛改。毋再踵仍惡習。姑息市恩邀譽。致干咎戾。並著傳旨申飭。○是日駐蹕梁格莊行宮。翼日如之。○癸未

上謁

泰陵

泰東陵俱未至碑亭。即降輿慟哭步入

隆恩門詣

寶城前行禮。躬奠哀慟。王以下文武大臣官員

隨行禮。○大學士于敏中等奏。本月二十三日。

孝聖憲皇后大事已屆

初週。諸皇子及王公大臣等持服期年。較從前以日易月之制已屬有加。一切悉應如常。其服色朝珠及穿用補褂蟒袍日期。並嫁娶宴會作樂之處亦俱應如舊。得旨本月二十三日。

聖母孝聖憲皇后大事業屆

初週。諸皇子及王公大臣等已滿期年。今既經查照舊例。一切自應如舊。其褂朝珠及穿補褂蟒袍之處。以言朝廷禮有常經。萬年體制所關。宜從此議。朕亦不能矯為過禮。至因尊敬朕躬而設。則朕於二十七月內尚係素服。而臣工服飾如常。朕心實有所不忍對之。所有王公大臣等如遇朕在宮內及諸臣有事進朝服色俱著照舊。如朕駐蹕圓明園。非正朝可比。隨往及奏事引見之大臣官員仍照

上年所議行統俟過二十七月後再行復舊庶為心安理得餘依議○甲申

上詣

泰東陵行暮年大祭禮○諭軍機大臣等前年補放鄂寶為漕運總督因其尚在川省辦理軍需奏銷未竣特令德保暫署總漕印務仍傳諭鄂寶將所辦北路軍糧事件自行稽覈清楚便可轉交劉秉恬等覈題伊即來京請訓前赴總漕之任今閱一載有餘鄂寶經手

事件自應辦有就緒德保原以福建巡撫暫署漕篆其閩撫本任係鐘音兼攝鐘音總督兩省浙江亦有應行巡查辦理之事未便令其久署撫篆致令不能前赴浙省著傳諭鄂寶速將經手軍需案件稽覈清楚造冊移交富勒渾等覈辦鄂寶即起程來京請訓速赴淮安辦理漕運事務替出德保迅赴福建巡撫之任將此由四百里傳諭鄂寶知之○是日迴鑾駐蹕秋濶村行宮○乙酉御前大臣

參奏御前侍衛護軍統領普爾普在行宮卡外遠處住宿請旨辦理得旨普爾普係御前侍衛護軍統領豈可如此遠處住宿甚屬不堪著摘去雙眼花翎不准在御前令其在外行走○改禮部左侍郎范時紀為副都統調工部左侍郎謝墉為禮部左侍郎以原任河南巡撫徐績為工部左侍郎○調直隸宣化鎮總兵興奎為山西大同鎮總兵○是日駐蹕半壁店行宮○丙戌軍機大臣等議覆烏

魯木齊都統索諾木策凌奏稱哈密地方命案與屯田事務請照奏銷之例徑由烏魯木齊都統覈奏毋庸另報總督等語查屯田與奏銷事同一例應如所請至命案不厭詳慎應令都統總督會題如緊要事件該都統一面奏聞仍一面知會總督覈辦從之○是日駐蹕黃新莊行宮○丁亥

上還宮○調正紅旗護軍統領靖海為鑲白旗護軍統領以內閣學士永信為正紅旗護軍

統領○戊子諭軍機大臣等據圖思德奏貴西道劉大猷現在患病懇恩准令解任回籍調理等語所奏非是向來道府遇有告病之事督撫等於奏請解任摺內附請應否准其回籍俱係發交部議該部以應否准其回籍兩請內閣俱票擬雙簽請旨朕無不准其回籍調理者圖思德何不照例辦理竟為專摺懇請回籍耶且以一道員告病之事而分作三摺陳奏亦過於瑣屑圖思德簡任封疆有

年何尚不曉事理若此著傳旨申飭○戶部議覆大學士管兩江總督高晉奏稱漕船需用緯夫前因雇夫間有盜竊經有漕各督撫遵旨議立夫頭管束至今率多窒礙必須變通此等緯夫當幫船未到之先勢須常川守候官無應給口糧必致乘間逃散而弁兵得藉口推諉轉於運務有誤請仍照乾隆二十四年諭旨聽運弁旗丁自行酌辦沿河文武各官嚴查匪類晚間督率兵役支更並令各

船派水手二名於本船擊柝巡邏如有怠惰疎防各予嚴叅應如所請得旨依議速行○大學士管雲貴總督李侍堯奏緬匪半載以來並無納款確信當嚴禁通市以杜偷越至連年出防不值每歲如此辦理今查有戶撒杉木籠蓋達三處水土既佳地形亦最扼要擬於戶撒設一大汛杉木籠蓋達各設一小汛與壤接緬匪之虎踞天馬鐵壁銅壁等關聲勢聯絡足資防守其兵祇須於南甸龍陵

兩處抽撥自後出防即可議裁惟此時緬匪尚在疑懼瞻顧俟從緩相機辦理得旨所辦俱合機宜餘俟來京時面諭○己丑諭前據通政司奏接收貴州省本箱係用河南巡撫封條本箱內原封俱經拆動因命軍機大臣檢閱則隨本之夾板黃繩俱已割斷包封亦俱拆開顯係中途有偷拆情弊隨降旨交榮柱確查嚴訊實情覆奏茲據榮柱奏稱此案先經南陽縣路釗稟報據馬夫曹萬義以馬

驚壞箱具稟。即請前撫加封遞送。但查包箱損破。繩索開斷。而該馬夫腿傷又不甚重。未可憑信。隨密加訪查。始知該馬夫因墜馬後。馬即驚逸。當將本箱解放。將馬趕回。至原路不見本箱。尋至小路。已被開視拋棄。該縣即差役嚴緝。拏獲賊犯馬海運。馬富寶二名。訊據供稱。上年十二月二十九日夜。同馬富珍在李崗橋地方。見有箱隻。起意偷竊。隨攜至小路坑邊。將箱隻擗鎖啟視。并將夾板繩索割斷。撕破封皮。見其中皆係紙張。即行拋棄。并自認是夜尚隨同馬富珍偷竊另案布疋等情。所起贓物。業據事主識認。正賊無疑。現在飭拏馬富珍務獲審結。請將南陽縣知縣路釗俟定案時。一併查明。應議職名。送部議處等語。所奏情節已明。並無疑義。至該縣路釗。以本箱關係緊要。先行稟請巡撫加封馳遞。又因馬夫所供情形。未足為據。隨究出追趕馬匹。遺失本箱。致為賊匪竊取。折看。並即

拏獲此案賊犯。訊得實情具報。所辦尚屬能事。自應免其交部。其餘應議職名。仍著榮柱查明。交該部分別議處。○又諭福建漳州鎮總兵員缺緊要。著孫猛調補。所遺汀州鎮總兵員缺。即著顏鳴臯調補。○諭軍機大臣等。昨漳州鎮總兵顏鳴臯來京。朕見朕見其精神顏情。詢知現在患病。今日召見。復細察之。仍未向愈。似非急切所能痊可者。且年力亦漸就衰。漳州要缺。豈可令其在彼貽誤。是以降旨。令汀州鎮總兵孫猛與之對調。顏鳴臯自乾隆三十八年陞見後。久未來京。朕無由知其近年精力奚似。前因鐘音將伊奏調臺灣。繼復因年滿調回內地。朕以其既能勝海外重鎮。漳州自必相宜。遂將伊調補。初不知其有病也。今觀其神情舉動。必係久患風痰。並非暫時感冒可比。顏鳴臯至漳州後。鐘音斷無不常時接見。自應將其病勢據實奏聞。或請調簡。或請勒休。方無忝督臣董察提鎮

之責。乃竟置之膜外。直待朕於召見時看出。鐘音在閩。所司何事。又如前日孟兆熊陞見。業令起程回任。而鐘音委署鎮篆及令交代起程之摺。始行奏到。可見鐘音於閩省營務。全不關心。總督雖係統轄文武。而董察武職。尤其專責。況閩省海疆重地。營伍操防最關緊要。今鐘音於所屬總兵。漫無考覈。是其平日。狃於滿洲科甲陋習。自號文人。惟注意地方文員簿書期會之事。而於綠旗官弁之孰

為優劣。營兵技藝之是否熟嫻。一切置之不問。安望其實力整飭。豈朕委任封疆之意乎。鐘音著傳旨嚴行申飭。至顏鳴臯所調之汀州鎮缺。較漳州雖覺稍簡。然亦非病軀所能卧理。著鐘音留心體察。如顏鳴臯調任後。尚能奮勉供職。或病漸痊愈。尚可徐觀後效。若衰病日增。事多廢弛。必不可復事姑容。鐘音即當據實奏請休致。毋稍袒徇。干咎。將此由四百里傳諭知之。○命倉場侍郎蔣賜棨仍

兼管順天府府尹事務。○以廣東按察使陳用敷為湖南布政使。調湖南按察使梁敦書為廣東按察使。以江西吉南贛寧道塔琦為湖南按察使。○庚寅吏部議覆。山西按察使李承鄴奏。稱定例吏部開列請簡道府。必係衝繁疲難四項。三項相兼之缺。而應行開列之員。其前任之繁簡到任之久暫。在所不計。殊無區別。請勅部臣分別辦理等語。應如所請。嗣後遇請旨缺出。查係曾任繁缺。及調繁

卓異。併從前原係保送繁缺者。准其開列。此外不得一例辦理。從之。○大學士管兩江總督高晉奏。乾隆四十一年八月內。經侍郎高樸奏。請將外省案犯畫押原供。一併送部。經部議准。惟查外省命盜等件。遇不肖州縣。因案涉疑難。或關承緝參處。往往刑逼無辜。甚且串供栽贓。以實其事。常有因其通報情節支離。另委員確究。及經上司提審。通案全翻者。是畫押原供。本不足據。更恐上司拘泥。因

此不加虛衷推鞠。轉有不能昭雪之處。請仍照舊例。毋庸送部得旨。所奏是。依議行。○辛卯。諭據郝碩奏。逆犯王錫侯。刊刻字貫。在吉安。南昌二處。將失察之歷任知縣伍魁孝等。知府盧崧等。請旨革職。交部治罪。一摺。所辦未免過當。王錫侯。妄刻字貫。為人首告。海成身任封疆。於書內大逆不法字樣。竟未檢閱。轉稱並無悖逆之詞。其罪自應較重。至藩臬兩司。隨同巡撫辦事。固有應得之罪。然較海

成。已可從輕。其歷任失察之知府。知縣。更非兩司可比。其中并有現經陞調離任者。若如郝碩所奏。將伊等悉行革職治罪。是因此一事。而通省罷斥多員。又非朕所謂不為己甚之意也。所有摺參各員。俱不必革職治罪。止須交部分別議處。此係朕格外加恩。各省地方官。當共加感惕。務須時刻留心查察。倘所屬內。或有不法書籍。刊布流傳。即行稟報。督撫嚴拏重治。若因此次寬宥。妄謂恩可屢邀。

漫不知儆。嗣後別經發覺。必當從重辦理。不能復為曲貸也。將此通諭知之。○諭軍機大臣等。據索諾木策凌奏。辦理河州逆匪案內。發遣家口。現將各項隻身。詳加查覈。其兵丁奮勉。戶民淳樸。及雲南各省發來人丁。誠實者。按其年數。先行注冊。酌定給配等語。自應如此辦理。至所稱此內回婦不少。除發來本處并舊有河州回民。不便給配等語。所辦尚未妥合。所謂知其一。不知其二。回民與百姓

均係赤子。自當一視同仁。無庸強生分別。使回衆聞知。妄生疑惑。祇須俟該犯婦等到時。將其原係回民婦女。即酌量配給屯兵。其原係回民。或可將漢婦配給。不動聲色。自行酌辦。不必明示其故。方為妥善。將此傳諭索諾木策凌知之。○調直隸正定鎮總兵嵩安為浙江黃巖鎮總兵。○是月。大學士管兩江總督高晉奏。海門廳漲定天南沙地九萬一千三百十三畝。前經紳士汪永和等。應募承買。

茲已繳完地價應准入額升科其價銀請留為江寧各處行宮修費下部知之○護理河南巡撫布政使榮柱奏豫省上年雨雪缺少二麥未能普種前奉旨令將常平倉穀薊糧糶借兼施今查開封彰德衛輝懷慶河南五府情形尤屬拮据應例外大加糶借惟常平倉穀出糶不宜過多薊糧未能一律敷用應請於漕穀項下一併酌量出借得旨實力妥為之又奏汲淇臨漳三縣積歉後購種艱難

實錄卷五十九

十一

現飭詳察情形於願領麥種者借給籽糧於願種雜糧而工本無出者折給銀兩并將儲備餘麥糶濟民食得旨嘉獎○陝甘總督勒爾謹奏甘省地土高燥有一分水利可開小民即沾一分水利之益茲查秦州城東南北三鄉共可開渠四道計灌田二十六頃餘畝小民情願自行開挖現已轉飭妥辦報聞○貴州巡撫覺羅圖思德奏大定府地方採有鉛礦約每年可得鉛五十餘萬觔當命名為

大興廠至松桃廳試採之大豐廠迄今一年僅獲鉛二十餘萬觔礦竭無成應及時封閉報聞

實錄卷五十九

三

大清高宗法天隆運至誠先覺體元立極敷文奮武孝慈神聖純皇帝實錄卷之一千四十九

大清高宗法天隆運至誠先覺體元立極敷文奮武孝慈神聖純皇帝實錄卷之一千五十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士大學士文淵閣領閣事稽察欽奉 上諭事件處管理刑部戶部五庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌二月壬辰朔諭曰

裕貴妃母妃侍奉

皇考誕育和親王淑慎素著朕御極之初即欽奉

聖母皇太后懿旨晉封貴妃以申敬禮之意四十餘年

慈寧隨侍

親愛尤深茲年屆九旬實為宮闈盛事宜崇位號以介蕃釐應晉封為

皇貴妃所有應行事宜各該衙門察例豫辦

屆期蠲吉舉行○又諭豫省開封彰德衛輝懷慶河南五府屬上年秋冬雨雪缺少種麥既遲收成不無稍減現已疊渥春膏農民自可及時播種但當青黃不接之時若將本年應徵錢糧照例開徵民力不無拮据著加恩將開封等五府屬州縣本年新徵錢糧緩至麥後徵收於農民生計更為有益著交榮桂妥協辦理俾窮黎均霑實惠該部遵諭速行○癸巳諭清明節

泰東陵應行添土大祭之禮朕於三月初四日啟鑾前往所有應行事宜各該衙門照例敬謹豫備○諭軍機大臣等據梁朝桂奏奉旨調任肅州鎮總兵懇請陞見等語該鎮於前歲秋間在熱河行在召見距今甫及年餘何必復請陞見且朕因該鎮曾在軍營出力是以調任肅州其缺雖屬緊要而所辦營伍事務則與興漢相同該鎮止須仍照前妥實辦理無可另行訓諭之處該鎮此奏乃沿襲綠

營習套並非出於至誠殊屬非是梁朝桂著傳旨申飭嗣後務宜諸事實心辦理毋再蹈綠營虛飾之習致干咎戾○兵部議覆護理河南巡撫榮柱奏稱豫省撫標暨南北兩鎮綠營兵操演烏鎗俱以金鼓為號令河北鎮總兵觀成到任後令掣去金鼓做在京火器營之例惟以中靶為優劣演放更較準速前撫臣徐績亦令撫標一體做習今查南鎮尚未議改一省營制未便兩歧請勅部議通飭遵辦應如所請並飭各督撫一體遵照從之

○甲午

上御乾清門聽政○遣官祭

先醫之神○諭今日內務府帶領引見人員有盛京將軍弘晌咨送承襲防禦之人聲明擬正之哈福納年未及歲不能來京僅將擬陪之人咨送此缺例應擬正之人承襲此次德禧所遺防禦員缺仍著哈福納承襲嗣後若擬正之人實未及歲并不必咨送擬陪之

人祇須將家譜進呈補放其願來者聽○又諭曰鍾音奏侯官縣知縣張潤於盜犯陳恒福等刦奪陳諭貨船一案因該犯將前次刦奪福清縣民楊伯科等船隻換與陳諭漂泊攏岸報縣查驗該縣遂疑楊伯科等為本案正盜輒用刑求以致畏刑誣認復捏報家丁獲犯希邀議敘更屬欺詐若非後任仲元鰲審出幾成冤獄請旨將張潤革審等語張潤著革職交該督嚴審究擬具奏至署縣仲元

鰲於前任將事主作盜犯刑求捏報之案並不瞻徇同官據實審出尚為能事此等改正之件若係後任有意挾嫌以曲作直故翻成案者督撫自當查叅今仲元鰲因虛心審鞫究出正兇俾冤民得以昭雪甚屬可嘉仲元鰲著送部引見○直隸總督周元理奏熱河地方更定事宜一熱河同知奉旨改為承德府其餘六廳擬改州縣名目如喀喇河屯廳擬名灤平縣八溝廳擬名平泉州四旗廳擬

名豐寧縣。塔子溝廳擬名建昌縣。烏蘭哈達廳擬名赤峯縣。三座塔廳擬名朝陽縣。一熱河同知向管地方刑錢事務。今改為承德府。毋庸添設附郭知縣。請如直隸州例刑錢俱自行辦理。其六州縣事由該府審轉考覈。一承德府現有監獄。請將熱河巡檢改為經歷。兼攝巡檢。並帶管司獄事。其六州縣監獄令各該處巡檢兼管。毋庸另設典史。一口外多係蒙古旗民交涉事務。請即以理事同知通判管知縣事。仍照原銜陞轉。其該府接見儀注行文體制俱如知縣例。一承德府及六州縣俱係口外要缺。請定為在外題補之缺。其銜繁疲難字樣按地定擬。一熱河道學教授請改為承德府教授。其學額於府增為六名。六州縣各增為四名。一承德府應另鑄給承德府印。其六州縣俱改鑄為理事同知通判管某州某縣事印。教授經歷等官印記一體改鑄。俱下部議行。○乙未吏部議奏直隸廣

平府知府謝洪恩於審轉威縣穆本現因姦謀毒姦婦本夫一案誤將不知情之姦婦賈氏擬絞。經部駁始行更定。應照例降調得旨依議。此本吏部議知府謝洪恩降調內閣票擬例不出名。該員從前頗能辦事。朕所素知。近因周元理奏其自陞任知府後漸不如前。是以照議降調。朕於每日奏進本章無不詳為披閱。此案謝洪恩應得處分乃就其人而酌覈行之。並非因簽內未經出名遂依部議也。○旌表守正捐軀四川馬邊廳民許某妻李氏。陝甘總督勒爾謹奏上年十一月。十二月間各屬報得雪一二三寸不等。嗣據通省報正月上中旬復得雪一二三寸不等。因未深透。率屬祈禱得旨知道了。今得雨雪否。尋奏蘭州及附近地方先於二月初旬得雪。嗣據鞏昌平涼涼州西寧西府及涇秦階三州俱同時得雪一二三寸不等。甘州及肅州各屬於二月中旬得雪自二寸至五寸不等。

省城又於下旬得雪。入土二寸。均各有資播種報聞。○是日起。

上以祭

社稷壇齋戒三日。○丙申。諭軍機大臣等。前據楊景素查奏粵海關徵收盈餘稅銀數目。比較前三年短少二萬餘兩。應責令前任監督德魁賠補一摺。現交戶部。內務府會同覈議。據奏稱前此洋船少到之年。亦有與此次相同者。而稅項較多。此次虧絀。自係辦理不善。不得以貨物粗多細少為詞。應請在德魁名下追賠等語。因屬照例覈議。第念德魁兩任粵海關監督。其平日辦事。較之他人尚為奮勉。人亦頗有良心。所有短少盈餘數目。朕信其斷無侵蝕情弊。況德魁現已身故。是以加恩免其賠補。但洋船少到數目。上屆亦有相同。何以稅課盈虧頓異。或因德魁查察未周。其家人長隨與該關胥役通同作弊。侵漁中飽。亦未可定。朕所欲加恩者。惟在德魁若果

有此等情弊。不可不切實究追。從重處治。李質穎本係兼管關務。圖明阿現係接任之員。知伊家人胥役輩果有情弊。無難察訪。況該關存有經徵底簿。更易覈查。著傳諭李質穎等。即行詳細稽覈。嚴密察訪。若查出弊端。即一面具奏。一面查拏究審。務使水落石出。不可顛預了事。若實無情弊。及因何盈餘缺少之故。亦即據實奏聞。將此由四百里諭令知之。尋奏該關乾隆四十年分洋船及本港經徵底簿。並原報底單。覈對相符。至洋船到口。向由行商將貨物開單呈報。本官遣書役家人與夷商通事等查驗其稅銀總以船之大。小貨之粗細為差。德魁胥役家人等實無侵漁情弊。報聞。○軍機大臣等遵旨覆奏。查允禩。允禔子孫現在園禁者。惟允禔長子弘晷。其餘兩家子孫俱係正藍旗官兵看守。不准出外行走。應將弘晷釋放。並徹看守官兵。至所有女孫女。年長者已嫁。未嫁者俱幼。報聞。

○丁酉祭

先師孔子。遣協辦大學士英廉行禮。○諭軍機大臣等曰。徐恕奏據泰安縣知縣張鳴鐸訪有民人王仲智。混稱修鍊成仙。形跡詭秘。搜查該犯家中有木劍。木牌。及萬法歸宗等書。訊據供稱。曾遇神仙。叫我閉門修養。可以脫離生死等情。隨同署臬司李燕親赴該縣。嚴查審辦等語。此等莠民邪說。最易煽惑鄉愚。自應嚴究根株。按法懲治。今國泰已經

起程計日即可回任。著交國泰親提該犯等。嚴審明確。定擬具奏。至徐恕因護理撫篆。一聞稟報。即帶同署臬司李燕親往查辦。固屬認真。但此等案件。尚非聚眾大案可比。該護撫或帶道員一人前往。或派署臬司前往。儘可完事。不值撫司同行。省會重地。不可無大員彈壓。今濟南止有署藩司陸燿一人。設或再有要事。未免無人商辦。且奸民伎倆。詭詐百出。或故擇一無用之人。稍露端倪。引動撫

司遠出乘機復有舉動。轉致照應不及。此亦不可不過慮豫防。且非獨山東一省為然。各省皆應如此。著傳諭各督撫。嗣後如遇地方報有不法逆犯。必須權其輕重緩急。如有急須勦捕。如昨歲甘肅河州叛逆之案。自應照勒爾謹之帶同司道督兵迅往撲滅。若案犯無多。止須於兩司內派一員往辦。或不同城之督撫親身前往。必須留兩司同在省城。方為妥協。將此遇各督撫奏事之便。一體傳諭

遵照。并諭令徐恕知之。○禮部題。朝鮮國王

李祘遣使恭進

萬壽冬至元旦三大節歲貢方物。暨琉球國中。山王尚穆遣使恭進歲貢方物。俱賞賚如例。停止筵宴。○命正白旗領侍衛內大臣特成額為叅贊大臣。赴烏什辦事。換烏什辦事大臣綽克托回京。○豁免遭風漂沒江西安福幫旗丁黃習良運米一千一百四十石有奇。○戊戌祭

大社。

大稷。

上親詣行禮。○諭曰。多羅順承郡王薨逝。著交該部照例辦理。仍加恩派散秩大臣一員。帶領侍衛十員。賞奠茶酒。○又諭。前因袁守侗出差。所有順天府府尹事務。特令蔣賜榮暫行兼管。今胡季堂現已回京。伊從前屢經管理順天府事。亦係熟手。蔣賜榮係倉場侍郎。例應駐劄通州。查辦漕務。勢難往來兼顧。所

有順天府事務。即著胡季堂管理。至府尹向係侍郎兼管。袁守侗現係尚書。即回京後。亦毋庸管理。○諭軍機大臣等。據寅著奏查勘淮北場竈情形。並酌擬巡防事宜一摺。所奏殊不明晰。已於摺內批示矣。前因山東擎獲鹽梟。供係在海贛交界之處。零星偷買老少鹽。舫裝車推賣。以老小之利源。變而為私梟之弊。朕意若將各鹽場所出餘鹽。官為收買。散給貧民。停止肩挑背負。自屬正本清源。

之道。第各地方場竈情形。未能深悉。是以令各督撫。會同各鹽政。斟酌妥善。據實覆奏。并諭令不得因朕有此旨。稍存遷就。所降諭旨。甚明。續經直隸總督等覆奏。長蘆向係散給錢文。其肩挑背負之例。久經停止。山東巡撫亦奏請照長蘆例行。是該二省均已通行無礙。即或兩淮老少餘鹽。有不便停止之勢。何妨將實在情形。詳悉直陳。朕豈肯因前旨稍為迴護。乃寅著摺內。惟稱巡防之嚴密。竈戶

之窮苦。隱躍其詞。言外似有老少餘鹽難於停止者。若果難於停止。何妨直陳。至所稱查點磚土鹽池。並無溢額。確訊場商竈丁。曬掃收買。素有成規。實不能額外私曬。賣給東省梟販。看來竟係寅著迴護東省私販一事。果如所言。則東省鹽梟所供。自海贛交界偷買餘鹽之語。衆口如一。豈轉不足信乎。抑買自何處乎。寅著此奏。甚屬糊塗不曉事。著傳旨申飭。看來此事。非伊一人所能辦理。著交高

晉薩載會同該鹽政悉心查勘據實在情形詳悉妥議具奏將此由四百里諭令知之○授宗室允禔長子弘晟為散秩大臣○己亥上詣

大高殿行禮○詣

恩慕寺

安佑宮行禮○幸圓明園○遣官祭

關帝廟諭曰馮廷丞周克開著加恩發往江南交與高晉以同知委用○庚子諭朕於

今秋恭謁

祖陵因至盛京時不陞殿不筵宴曾降旨令朝鮮國毋庸遣使朝賀今據禮部奏該國王以舉國臣民瞻依倍切欲仍照往例遣陪臣祇候陳請轉奏情詞懇切恭順可嘉著准其遣人至盛京請安毋庸進貢不必差遣多人亦不賜筵宴也該部咨該國王知之○又諭吏部奏據文選司檢舉署東平州州同許祖堯夏津縣主簿姚興鳳二員各前任加級之處

遺漏未經入冊以致因公降調照例開缺請將承辦司員交都察院察議等語該司員於議處降調之案不查明加級抵銷自屬疎漏但其事與刑部失入相似而實不同刑部失入重於失出者因罪犯一經失入已罹重辟所謂死者不可復生嚴其處分正以重民命也至失出因即遣放仍可審覈更正故其議處從輕若吏部辦理議處疎忽失入固有應得之咎但事後尚可自行檢舉或經被議之員控辯仍可查明改正不致終於枉屈其議處可以從輕至失出則以應行議降之人妄為擬抵安知非徇情受賄高下其手久之易滋流弊不可不重其處分俾知儆惕以刑部出入輕重反而用之方為平允著吏部會同都察院另行定例具奏此案即照新例行餘依議尋議吏部辦理議處司員如係徇情受賄將應議實降之人妄為議抵應另行參究其一時失檢重複抵銷者如係罰俸降級留

任之案。舊例罰俸一個月。今應改為罰俸一年。係應行降調之案。舊例亦祇罰俸一個月。今應改為降一級留任。至遺漏抵銷。致本員降調離任者。舊例降一級留任。今應改為罰俸一年。從之。○葉爾羌辦事大臣高樸等奏。甘省冰撥葉爾羌。駐防綠營兵。屆年滿換班之期。例有借支整裝銀兩。惟葉爾羌庫貯。往往不敷。須由內地調撥。未免煩瑣。查葉爾羌庫貯普爾錢。在本處每百抵銀一兩。現在貯錢充裕。請以錢抵銀支借。換班兵丁。得旨。好。依議行。○予木邦軍營殉節之原任雲南永北廳同知胡邦佑。廣南府經歷許景淹。祭葬如例。入祀昭忠祠。○辛丑。遣官祭昭忠祠。○諭軍機大臣等。昨日新放蘇松糧道盛保。謝恩。召見。看其人尚結實。而有體面。但初蒞外任。於理繁治劇。似非所長。蘇松等四府漕務殷繁。糧道員缺。最為緊要。恐與盛保不甚相宜。著傳諭高晉。楊魁。於通省巡道或事簡道

員內酌選一員。奏聞。題補。蘇松糧道其所遺之缺。即以盛保調補。○又諭曰。李侍堯覆奏緬匪情形一摺。已於摺內批示。緬地水土惡劣。實非可用武之地。且緬苗業經送還。蘇爾相其事已完。至送出楊重英與否。於事實無關輕重。不值勒兵向索。即或該處有可乘之隙。亦不肯兵出無名。興師涉遠。朕久有定見。屢降諭旨。甚明。今據奏稱將來該匪或因內訌。外釁。危亡立待。實有唾手可取之機。亦必備細陳奏。恭候睿算萬全。方可遵辦。此時斷不敢畧有輕率等語。所奏甚是。李侍堯在滇一載。已熟悉緬地情形。且其平日閱歷年久。遇事亦知慎重。自不肯稍涉喜事。輕舉妄動。若緬匪內訌。已成上下瓦解。其大頭目又紛紛投出。能深悉其底裏。實在唾手可取。則又機不可失。李侍堯自當酌量為之。惟須詳悉妥籌。確見兵出有益。不致延阻滋事。方可辦理。然亦不值遠派京兵。及他省調派。祇宜就

滇省防兵內擇其勇往者於瘴退時派大員統領前往兵至即可成功原不妨為因利乘便之圖自不宜坐失機會李侍堯即足身任其事如以為實在可行即一面籌辦一面奏聞若事機已形不宜稍緩並不必奏請指示徒致往返多延一月也至木邦舊土司線甕團久經投順安插大理猛密頭人線官猛亦同在大理猛拱土司渾覺前經歸順素有圖報之心如李侍堯遇應行辦理時或可遣線甕團線官猛各回故土并傳檄渾覺令其各收服所屬地方於本城守禦則緬匪近北一帶皆歸內地已可去其小半之勢但祇可令該土司等自護其疆界設法堵拒緬匪若該土司欲請內地發兵助守則又不可從也至現在尚無信息李侍堯惟當仍照前嚴飭各邊隘實力稽察勿致稍有疎懈靜以待之而已將此由六百里傳諭知之如緬匪有遣人納貢之信即速由驛馳奏○命副都統鄂蘭

赴喀什噶爾辦事換喀什噶爾辦事大臣雅德回京○壬寅  
孝康章皇后忌辰遣官祭  
孝陵○諭曰滿斗蘇爾德應得之罪尚不至死是以朕於上年秋讞俱施恩未勾海成雖擬重罪亦不至死海成滿斗蘇爾德俱著寬免釋放海成著交特成額帶往烏什令在章京上効力行走滿斗著交內務府蘇爾德著交步軍統領衙門俱令在章京上効力行走果能奮勉二三年後再以主事等官補用○諭軍機大臣等前據李侍堯奏滇省遷徙烏魯木齊土夷起解時照發遣礦徒之例將男丁概行上鎖續經顏希深咨稱頭二三起夷戶至境並無鎖鍊與滇省原行不符當即行查藩臬等詳覆實係按名上鎖且經署昆明令徐沅連鎖赴點交委員查收該委員私擅開放未便稍為寬貸現將委員陳英棟等咨部斤革一面飛咨前途截留解滇審明治罪一

摺當經降旨李侍堯。以此事自應查明辦理。至此等土夷。本屬無罪。是以傳諭沿途督撫。加恩免其補鎖。以示體恤。今土夷等。皆知感恩安靜。久經解到烏魯木齊矣。其查辦委員。一摺。於十月十六日奏到。距今已經數月。並未見其覆奏結案。殊不可解。或係起解時有鎖委員中途擅開。抑或起解時並未上鎖。而首縣妄報。均不可不徹底查訊。使咎有攸歸。此事並無難辦之處。何至久懸不結。亦不得

以土夷業已免鎖。並將此一節。免其追求。李侍堯向能辦事。豈偶爾忽畧耶。著傳諭李侍堯。即行查明據實覆奏。將此由四百里諭令知之。○兵部議覆。陝甘總督勒爾謹奏。稱。綠營難廕子弟。年未及歲。即例給馬糧一分。如發標學習候補。准支把總全俸。裁去馬糧。惟是陝甘兩省馬糧一分。額支銀二十四兩。把總全俸。額支銀十二兩四錢零。在實授之把總有新紅例馬等項。本較馬糧為優。如未經

得缺。但支全俸。是難廕子弟。一經當差候補。其得項。較少於年未及歲之幼丁。請嗣後將發標學習者。照馬兵例給馬糧馬乾。與兵丁一體差操。毋庸另行支俸。其未成丁者。仍賞馬糧一分。毋庸支給馬乾。應如所請。並通行各省。畫一從之。○署江南提督蘇松鎮總兵陳奎奏。提標六營。有接濟兵丁一項。而沿海之金山柘林。青村。南匯。川沙。劉河。六營。固屬提標。初以銀數不敷。未經議及接濟。今此項

計已充裕。應一體如數借給。報聞。○予故廣西思恩府屬興隆司土巡檢韋瓚子可法襲職。○癸卯。諭曰。德魁徵收粵海關課稅。短少盈餘。應著賠銀二萬餘兩。自應照部議。在伊名下追賠。第念德魁。兩任粵海關監督。較各任辦事。頗為實力奮勉。人亦尚有良心。其短收銀數。可信其必非自行侵蝕。且伊已經身故。著加恩免其賠補。惟所收關稅盈餘。既屬短少。則該年監督廉俸。豈宜照常支給。所有

德魁已支之一。年廉俸。應令其家屬照數繳出。○兵部議覆山東巡撫國泰奏稱。兗州鎮壽張營。轄壽張。陽穀。冠縣。莘縣。博平。張秋。六汛。其額設遊擊。駐壽張縣。有防守城池之責。守備駐張秋鎮。巡防一帶河汛。兼有催趲漕船。稽查緯夫等事。其地商旅輻輳。彈壓極為緊要。請將遊擊守備。俱改為題缺。應如所請從之。○甲辰遣官祭黑龍潭昭靈沛澤龍王之神。玉泉山。

惠濟慈佑龍王之神。○直隸總督周元理疏報。天津縣開墾恩賞官地一百九頃七十九畝。有奇。順天永平保定天津遵化五府州屬開墾民地一百七頃六十六畝。有奇。○乙巳諭軍機大臣等。昨歲楊景素奏請陞見。曾批令且不必來。原因前此暹羅頭目鄭昭屢次懇請封號。曾令軍機大臣代擬該督檄諭發交楊景素附洋船發往。嗣據楊景素奏。已於八月內附搭商船寄去。但海洋冬春之際。北

風居多。船隻未能迅速來粵等語。今已二月中。北風漸少。計三四月間。鄭昭處回稟。可以遞到。楊景素自應俟此事辦竣後。來京陞見。但朕於七月望後。即啟鑾巡幸盛京。楊景素約計如能於啟鑾前到京。即於辦理暹羅請封事畢。起程前來。如計到京時。已在七月以後。則竟俟九月朕迴鑾後。再行到京。將此由五百里傳諭知之。○吏部議覆湖北巡撫陳輝祖奏稱。武昌府同知向係簡缺。查該廳駐劉省會。專司隄工河務。並管火藥局。且時有委辦事件。請改為衝繁難要缺。漢川縣劉家隔巡檢。向係驛路通衢。定為調缺。今驛路改由應山縣行走。事務不繁。請改選缺。均應如所請。從之。○丙午諭學校人才之聚。郡縣戶口之系。古者教養並重。治化覃敷。至於荒畧之地。邊漠之區。恒有聲教所未及。而不隸版圖者。我朝定鼎以來。光宅函夏。幅員日廓。中外一家。京畿東北四百里熱河地方。在古北

口以北。其境於禹貢。為冀州邊末。而虞及殷周。幽州之盡境也。秦漢以來。越在絕徼。未入版圖。北魏建安。營二州。唐時有營州都督府。然不過僑治於內地。遼金及元。始薊其名。而厯服未久。故址旋荒。明棄大寧。視為外域。我國家撫臨寰宇。薄海內外。咸登版籍。况熱河密邇畿輔。自

皇祖康熙四十二年。肇建山莊。秋獮經行。往還駐蹕。

### 皇考率修

前典。設立熱河廳。尋改承德州。朕臨御之七年。地方大吏建議。此地究為關外。仍設為廳。八溝等六處。悉如之。蓋以其時士民稀少。風俗椎魯。立學建郡之制。有未遑焉。嗣後獮獵木蘭。每歲駐蹕於茲。日見黎庶殷闐。戶口繁富。里巷絃誦。人文漸起。此實國家積洽累仁。休養生息。涵濡百餘年之久。方克臻斯。夫士為四民之首。土著與僑居者。久於其化。子弟不

乏秀良。而學校未興。師承無自。其何以甄陶而鼓勵之。况今西域如烏魯木齊等處。率皆立學校。置郡縣。以此較彼。地既遠近懸殊。風土人物。亦皆過之。按諸古者。廣立學校之意。其地其時。正相協焉。爰於丙申秋。命冬官量度規模。鳩工庀材。興建

文廟。朕親釋奠而落成之。每年來巡幸斯土。必先展拜。

廟貌秋仲丁祭。遣大學士行禮。率以為常。所

有酌定庠額。分年取士。並創設書院義學。延師訓課。悉令督臣與學臣議立章程以行。近歲士氓深被教澤。既富方穀。益見蕃昌。閭閻安堵。沐浴太平。四方商賈之民。駢集輻輳。儼然成一都會。計其地千餘里。而戶口或逾十萬。可以見耕桑日闢。版籍日繁。成都成邑之盛。有明徵焉。近者既創立學校。樂育人材。而其地猶仍熱河廳之舊。準諸體制。未為允協。因思向曾設承德州。今宜升為承德府。即以

同知改設其餘六廳如喀喇河屯廳改為灤平縣四旗廳改為豐寧縣八溝廳其地較廣改為平泉州烏蘭哈達廳改為赤峯縣塔子溝廳改為建昌縣三座塔廳改為朝陽縣賦稅戶籍之數悉隸於知府轄於熱河道以重考覈官斯土者宜悉心經畫措置協宜副朕嘉惠邊氓教養兼施之意至於考訂舊聞蒐羅掌故輯成熱河全志已命儒臣博採旁徵區分事類纂訂成書仍於山莊內肇建文津閣庋貯四庫全書琅籤秘笈炳耀典樞以示朕崇師博典一道同文至意

大清高宗法天隆運至誠先覺體元立極敷文奮武孝慈神聖純皇帝實錄卷之一十五十

大清高宗法天隆運至誠先覺體元立極敷文奮武孝慈神聖純皇帝實錄卷之一千五十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部正庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌二月丁未諭軍機大臣

曰鍾音奏承緝盜竊已未拏獲各案將文職武職分繕兩摺殊覺煩瑣同係彙奏承緝盜案文武各員並非兩事祇須一摺內分別敘明另立清單以便觀覽方為妥合朕非懶於批閱然章奏亦自有體鍾音何不憚煩耶鍾音久任封疆豈宜不曉事若此著傳旨申飭○兩廣總督楊景素廣東巡撫李質穎奏粵東地窄人稠向藉粵西米糧接濟上年兩粵收成俱歉接濟維艱查湖南江西係產米之

鄉今招有商民願赴買運十餘萬石由臣等給發印照並咨該二省督撫轉飭地方官驗照放行仍諭各商赴米多價平之區分途告糴其中急公多運者酌給花紅扁額鼓勵得旨嘉獎諭軍機大臣等據楊景素等奏招商前赴湖南江西採買米石以籌民食一摺所辦尚好已於摺內批示矣至所稱由豫至粵一語殊未明晰向惟河南稱為豫省因其地本豫州故相沿用之至江西雖有豫章之名從未有單稱為豫者况係籌辦湖南江西兩省之米若專舉豫而言又何以該括湖南耶此等乃外省俗幕行文陋習省字以圖簡便殊屬無謂不如直敘某省之為明妥也著傳諭楊景素等嗣後於此等字面亦宜留心檢閱○戊申吏部議奏大學士管雲貴總督李侍堯雲南巡撫裴宗錫奏請酌定銅廠議敘議處條例查滇省大小各廠原定有按月勒交之數請嗣後缺額限三月內補足其不能

補足者月計分數查叅如欠不及一分者罰俸六個月一分以上者罰俸一年二分三分者降一級留任四分五分者降一級調用六分以上者以次遞降至八分以上者革職其餘額外多獲者亦按分數議敘如多獲一分以上者紀錄一次亦以次遞加至四分以上者加一級五分以上者以次倍之著為例從之○命戶部尚書梁國治閱辦金川方畧○旌表守正捐軀河南鄧州民曾挪兒妻周氏

○已酉諭曰禮部奏儀制司員外郎員缺主事內別無合例擬陪之員請以李漱芳題補帶領引見等語其謬妄實出情理之外李漱芳在給事中任內當山東逆賊王倫倡亂之初即奏稱係飢民聚處滋事朕以所言如果有據則地方官之諱災釀亂罪難輕追因諭大學士舒赫德於勦捕賊匪時留心體訪嗣據舒赫德覆奏細查壽張等縣收成俱八九分且逆賊初時搶掠各鄉米豆糧食所在多

有是飢民釀釁之說實係荒唐及賊匪要犯就獲解京命軍機大臣會同九卿科道在刑部公鞠各犯並無供有因災起事者朕集衆親鞠復令李漱芳自向各犯訊問亦無以災對者是李漱芳前奏之妄衆皆曉然伊又曾奏直省亦有飢民地方官在盧溝橋攔截不令他往而給事中范宜賓尋襲其說入告因派侍郎高樸袁守侗帶同李漱芳范宜賓前往良鄉及黃村東壩各處並未見成羣乞食流民皆李漱芳等所目擊實無人為之隱飾也是李漱芳肆意妄言悉屬毫無風影而造作無稽轉欲為賊捏詞却過更不知其是何肺腸即治以袒賊惑衆之罪亦所應得但朕從不肯因言民隱事加罪科道然李漱芳心術如此豈宜復居言路為世道人心之害至范宜賓係漢軍世僕乃敢妄言干譽其風斷不可長因將范宜賓革職發往新疆辦事効力而李漱芳則從寬以主事改用已屬朕格外

外加恩。且其事曾經明降諭旨。中外共曉。永貴豈轉未聞。知李淑芳現為主事。已邀寬典。止宜令其黽勉自効。以贖前愆。豈宜曲為袒徇。復予陞用。昨永貴等奏。將李淑芳充會試副提調。朕以其不過禮部應辦之差。遂行點派。孰意永貴等竟以此試探。見朕前日允其所請。今即請將李淑芳陞補員外郎。並云無合例擬陪之員。冀李淑芳之必得。是永貴全不思李淑芳前此之罪。由自取一味心存偏

護。必欲令其遷官。員外之不己。勢必復以郎中保題。郎中之不己。勢必復行保送御史。此乃明季士大夫惡習。黨援朋比之風。固結不解。馴致國事日壞。底於滅亡。覆轍可鑑。朕惟以

皇祖

皇考之心為心。之政為政。勤思前除積弊。力為整飭。內外臣工。亦頗知奉法無明末惡習。乃永貴竟敢以此等伎倆。巧為嘗試。其視朕為

何如主乎。朕披閱禮部奏摺。召見軍機大臣。以其事必係永貴主意。及召侍郎阿肅面見。不待詢而伊即稱為永貴所誤。朕因永貴歷任年久。是以用為尚書。乃伊見朕屢沛渥恩。漸無忌憚。惟以沽名取悅為事前。因阿桂養病在家。即請將京察被叅人員改補閒職者。其降革罰俸之案。不令隨帶。已屬違例。邀譽因交都察院嚴加議處。議以革任。朕從寬令其留任。永貴自揣伊革任註冊之案甚多。即

再有處分。亦不過如是而止。不復心存敬畏。茲復敢以此巧售。其居心尚可問乎。朕於大小臣工革職革任之案。俱就其事之輕重。斟酌而行。或事由公錯。或情節稍輕者。原皆量予寬免。若其獲咎較重。及有心弊混者。並未嘗濫邀原宥。永貴此次之罪。非無心錯謬可比。豈可復照尋常議處。永貴深負朕恩。著將所有職任悉行革退。並拔去花翎。加恩賞給三品頂戴。自備資斧。前往烏什辦事。換綽克

托回京。永貴至烏什後。若仍不痛改前非。實心任事。必將伊在彼正法。以示炯戒。所有隨同列銜具奏之禮部堂官。並著交該部嚴加議處。李淑芳不准帶領引見。其吏部尚書員缺。著綽克托調補。工部尚書員缺。著富勒渾調補。禮部尚書員缺。著特成額補授。毋庸前往烏什。朕於大小臣工。罪犯惟視其人之自取。本不肯有意從嚴。亦不肯廢法寬縱。悉準以大公至正。從不稍存成見。內外諸臣。皆所

深知。各宜敬體朕心。永副恩遇。毋稍徇私干戾。著將此通諭中外知之。○又諭。滿洲舊風。惟知奮勉。差使臨陣。當先從無係戀家室之意。前因駐劄伊犁等處。滿兵俱攜眷口。因並准辦事大臣等攜眷前往。如遣往回疆。則仍不准。今新疆辦事大臣等。竟視攜眷為例。甚非急公之道。嗣後除額定省城將軍。副都統外。其伊犁各回城辦事大臣。官員俱不准攜眷前往。將此通行曉諭。○又諭。曰。鐘音將侯

官縣烈婦黃致中側室鄭氏。題請旌表一疏。所辦非是。夫亡殉節。事近輕生。曾經

皇考降旨。停止旌表。朕念其究屬節烈。故令該部仍照例。雙請數十年。亦無不仍准旌者。至於側室捐軀。更非正室可比。豈宜概予闡揚。即如我滿洲舊制。凡側室雖生有子女者。尚不得與本夫合葬。蓋以名分所在。不可踰越。況此等殉節者。安知非由平昔嫡庶不睦。恐日後受正妻凌虐。遂以身殉。未必盡出於義

烈。何能細為分別。此等即多旌數人。又何裨於風化耶。又疏內稱。備小星之位。常抱衾裯。措詞尤為失當。小星見於召南。係屬諸侯之事。豈可妄施於民間。鐘音係科甲出身。夙以文墨自負。乃於此等詞句。不知檢點。別白冒昧。引用殊乖。入告之體。鐘音著吏部嚴加議處。餘仍著該部議奏。尋奏。側室非正室可比。名分本屬相懸。且有未盡出於義烈之處。該督所題鄭氏旌表。應無庸議。報聞。○吏部刑

部議覆盛京刑部侍郎穆精阿奏稱奉天州縣解部命盜及徒罪以上各案如有由刑部及盛京刑部駁審者必須詳細研究請於定限兩月外展限一個月審結解部等語查各省案件惟刑部駁審之案始准另行展限其由該管督撫駁查者向無此例盛京刑部係奉天等屬該管衙門未便一例加展請嗣後遇有由在京刑部駁審者即如所請照直省之例展限一個月其由盛京刑部駁審者仍

照向例至所稱盛京刑部有於州縣應提應解之案向例俱由奉天府轉行請并定奉天府以十日之限亦應如所請從之○工部議准盛京將軍宗室弘昫疏稱寧遠所屬茨兒堡原採煤窖創挖無效請嚴行封閉從之○庚戌諭昨禮部奏將李淑芳指名請補員外郎缺一摺其謬妄實出情理之外朕披閱時以為必係永貴之意即向軍機大臣明降諭旨及召見阿肅不待朕詢及即奏稱為永貴

所誤是永貴之罪萬無可逭不得不大示懲創矣李淑芳在給事中任內當山東逆匪王倫倡亂時妄稱係飢民聚眾滋事因交大學士舒赫德訪查則壽張等縣均有八九分收成及九卿科道會鞠解京各要犯並令李淑芳自向訊問並無供及因災起事者李淑芳之奏竟屬荒唐身為言官而造作無稽之談為亂民飾詞却過其心實不可問即治以袒賊惑眾之罪亦非過當至所奏直隸流民之

事范宜賓亦襲其說朕派高樸袁守侗帶同李淑芳范宜賓前往所指各處細查並未見一飢民皆李淑芳等所目擊使高樸袁守侗稍有徇飾李淑芳等何難據實劾奏朕必治周元理之罪而所言既虛則無可復辯矣至朕臨御四十三年無時不心周民隱於各省暘雨情形每先期詢問不容督撫等稍存諱匿即如去歲河南汲淇臨漳等縣秋雨缺少經朕節次諭詢徐績始不能隱諱則徐績實

為玩視民瘼。豈復宜封疆之任。即降旨將伊徹回。至榮柱為藩司。中明白能事之員。其才具實堪勝巡撫。因災務係藩司專責。榮柱既未先為奏及。其咎亦無可辭。是以河南巡撫不用榮柱。而用鄭大進。此近日之事。眾所共知者。而謂朕於督撫等之膜視民生休戚。肯稍為寬假乎。即以此問之李漱芳。伊亦當無可置喙。朕前此將李漱芳改用主事。已屬量從寬典。而其在部。朕豈不復記憶。使其果

應陞用。亦俟朕特旨加恩。豈堂官等所當設法保奏。巧為嘗試乎。若云為缺起見。則禮部司員除李漱芳外。豈無應陞員外之人。與其違例保奏李漱芳。何如將現出倉差之主事。揀選一人。專摺陳請。即斷無可題之員。亦何妨咨明吏部改歸銓選。尚何所藉口乎。我朝綱紀肅清。

皇祖

皇考至朕躬百餘年來。皆親攬庶務。大權在握。

威福之柄。皆不下移。實無大臣敢於操竊。即或瞻徇情面。於小事偏護。一二人亦所不免。從未有似永貴之逞其私智。於用人大端公然擅干者。永貴之意。不過以李漱芳因言事獲譴。伊為保題。陞用。眾必以彼為正人。此乃明季黨援惡習。朕仰體

皇祖

皇考之心力。為整飭臣工等。漸知奉公守法。不敢輕蹈覆轍。永貴何人。朕何如主。而欲妄施此等伎倆。能乎不能。永貴此舉。其是非曲直。顯而易見。若欲因此邀譽。眾即予以正直之名。能乎不能。從前孫嘉淦在

皇考時。因管國子監。必欲保一屬員。妄行爭執。皇考立將伊拏問治罪。今朕僅將永貴革退職任。仍賞三品職銜。自備資斧。往烏什辦事。尚屬朕格外施恩。外間即有無識之徒。妄肆議論。權其輕重。朕不懼也。即令永貴撫心自責。能不感激愧懼乎。昔趙普補牘之事。亦因其

與宋太宗同謀竊取神器。故敢徑情直遂。宋太宗亦遂勉強曲從。永貴係滿洲世僕。由司員經朕屢加拔擢。豈得自比於趙普。而朕勵精圖治。事悉親裁。實不肯自比於宋太宗。若大臣欲干政務。惟所欲為。此前明庸懦之君。則然。我大清

列聖相承。朕敬承

先志。方以振綱飭紀為務。豈容大臣等之行私。藐法乎。昨懲治永貴之故。及朕不肯令督撫

等諱災之故。恐眾尚未能共悉。著再明白曉示。通諭知之。○戶部議駁。山東巡撫國泰奏。稱社倉穀石。其春借秋收。俱交地方官經理。並於歲底。令州縣赴四鄉盤查等語。查社倉出納支收。例應社長典司其事。若由地方官經理盤查。難保無累於民。所奏應毋庸議。得旨。部駁甚是。依議。國泰此奏。似是而非。若如國泰所言。收支出納。俱歸有司經理。是在官又添一常平倉矣。從來有治人。無治法。即如

朱子立法之始。因所居崇安有社倉。與本鄉士人。司其斂發。由朱子人本公正。且行之一鄉。故有利無弊。使朱子為郡守。未必能令各縣悉皆實力奉行。况推而行之天下乎。如國泰所陳。社長瞻徇。侵漁諸弊。原不能免。然因此而官為經管。則胥役地保之藉端勒索。煩擾更甚。是欲除一弊。而又滋一弊也。惟當仍照舊定章程。各督撫飭屬實心稽覈。勿使里社侵虧中飽。期得實濟。何必輕事更張。耶。將

此通諭知之。○以吏部尚書綽克托為鑲黃旗漢軍都統。○貸湖北監利縣乾隆四十二年。被水災。民籽種口糧如例。○豁雲南省金江沉溺之署雲南永善縣知縣李發源運銅三萬三千觔。○辛亥

上還宮。○吏部議駁。直隸總督周元理奏。稱河南南陽府知府莊鈞。在直年久。請與大名府知府永寧對調。陝西朝邑縣知縣金嘉言。請與新城縣知縣王垣對調等語。查莊鈞等隔

省對調與例不符應毋庸議得旨吏部題駁周元理請將直隸人員與河南陝西對調一疏例所應駁但細覈疏內情節莊鈞久任直隸州縣前因迴避調任豫省今仍調回以資駕輕就熟之益其事尚屬可行至請將新城縣知縣王垣與陝西朝邑縣知縣金嘉言對調則無可解說矣直隸知縣甚多斷無必需此一人辦差之理恐此端一開各省效尤滋甚上司或存遷譽之見屬員即多僥倖之私

此風斷不可長朕於各員調任悉視人地以為權衡所有直隸大名府知府永寧與河南南陽府知府莊鈞對調之處著照該督所請行餘依議○壬子諭昨已降旨將富勒渾調補工部尚書其未到京之前工部事務仍著邁拉遜兼署又諭曰鐘音著來京補授禮部尚書楊景素著調補閩浙總督其兩廣總督員缺著桂林補授即赴新任特成額著補授成都將軍所有四川提督員缺即著明亮

補授楊景素接奉此旨即赴新任其總督印務交李質穎暫行署理鐘音俟楊景素到閩即行起程其未到京以前禮部尚書事務著德福兼署○諭軍機大臣曰鐘音初任總督時尚知實心任事邇年來辦事疎懈漸不如前伊在外任年久閩浙要缺未便聽其因循貽誤但滿洲翰林出身之人鐘音科分最深其辦理部務亦較阿肅等稍勝是以令其來京補授禮部尚書鐘音俟楊景素到閩即將

總督印信交代其撫篆亦交楊景素兼署鐘音即行起程回京將此由四百里傳諭知之○又諭閩浙總督較兩廣尤為緊要楊景素從前在閩年久於該省風土人情皆所熟悉是以將伊調補閩浙楊景素接奉此旨將總督印交李質穎署理即就近赴福建接印任事令鐘音即行回京仍俟德保到閩將撫篆交代並令兼署督篆楊景素再行來京陛見桂林已補授兩廣總督奉旨後將四川提

督印交明亮接辦桂林即起程前赴粵東不必來京請訓將此由四百里一併傳諭知之○刑部議駁江蘇按察使孔傳炯奏稱州縣接遞人犯請另文移會前途以防竄逸等語查各省僉發遞解人犯原有豫行知照經過州縣加差轉遞彼此關覆之例祇須實力遵辦不必另立科條所奏應毋庸議得旨著照部議行至孔傳炯身為臬司於本分承辦之事所有舊定章程全未寓目轉作為己意條

奏可見外省辦事凡一切應行成例徒以具文了事並不實力奉行甚且置之高閣是吏治之廢弛殆不可問蓋不獨此一事為然亦不獨江蘇一省為然也此皆各督撫不能實心整飭之故著傳旨通行申飭嗣後務須查明舊例嚴飭所屬一體遵行如復仍前懈怠惟該督撫是問○癸丑春分朝

日於東郊

上親詣行禮○詣

雍和宮行禮○辛圓明園○甲寅諭本日刑部議覆郝碩所奏定南廳逆倫重犯胡震泰案內同謀加功之葉觀長受等擬以絞決已依議行矣向來外省蔑倫之犯舊係立斃杖下從不具奏立案朕以此等逆犯實為覆載所不容自當明示誅磔以快人心而申國法因令於審明時即請王命正法仍一面奏聞定例以來每歲所奏間有一二案朕閱畢俱不批發蓋逆犯性同梟獍固天地間戾氣所鍾

乃竟至於悖理蔑倫實非世間所宜有故不欲復汚丹毫然究係教化未周致惡類不能盡絕我君臣皆當引以為愧從來道政齊刑不如德禮明刑即所以弼教辟以止辟原屬不得已而用之各督撫以至州縣誠能於人心風俗之原詳加化導未嘗不可以感發天良潛消乖戾然亦貴乎誠意相孚非徒為條教具文虛言塞責而已至於旌獎節義不過王政之一端非即藉此遂足以維持世道如

上年高晉等請旌山陽縣守義之程允元夫婦亦僅為衆所樂道。近日鍾音請旌侯官縣民黃致中側室鄭氏殉節尤不值概予闡揚。又前此召見曹秀先奏。近日各省題旌節婦較少於前。其意若有未慊者。所謂知其一未知其二。守節本閨門庸行。多出於殷實之家。足衣食而惜顏面。自不肯輕於改適。雖多亦無足為異。且節婦即多千餘亦不抵偶有一逆倫之犯。若以節婦多為風化之美。則逆倫

者寧不當有所歸咎。曷亦權其輕重而計之乎。夫化民成俗乃有司之專責。而董率整飭尤大吏之職。司乃近來督撫諸事廢弛。吏治幾有不可問者。即如刑部議駁孔傳炯奏請州縣接應人犯另文移會前途以防竄逸一摺。以舊有之章程全未寓目。轉作為己意條奏。即此類推外省於一切成例並不實力奉行。可知又如山西遺失馬遞公文止一馬夫齎送。經朕降旨詢問各督撫及覆奏。僉稱向

係撥馬夫二人同行。果爾則河南遺失本箱一案又因何止有一人馳遞乎。凡用馬馳齎之事派撥二人同送。原以備驚跌失誤。本章關係緊要。獨不當照馬遞公文例乎。看來外省諸事因循成習。督撫惟於每事初奉諭旨時稍為經意。數年後視若具文。久即置之高閣。積習相沿。恬不為怪。豈國家倚任封疆之意。督撫等不可不痛自湔滌。致干咎戾也。至於府州縣各官胥司牧之寄。自應以民事為重。於地方利弊民生休戚風俗澆漓留心講求。方為無忝厥職。若辦差不過庶務中之一節。果優於撫民而拙於差務。並不失為循良。設視辦差為殿最。則所謂惴惴無華。歲計有餘者。又何以稱焉。且如裴宗錫李湖鄭大進皆非直隸能辦差之人。朕以其盡心民事皆擢用至巡撫。尤直隸地方官所共知者。而謂朕之所取在辦差乎。不在辦差乎。况朕每年巡幸熱河進哨秋獮。乃遵循

祖制習勞肆武而臨幸盛京則因展謁

祖陵即前此屢舉南巡之典亦因閱視河工海塘及入疆觀風問俗藉以察吏阜民並非因遊觀山水寄情吟咏也且一應供頓皆發公帑絲毫不擾閭閻所至惟令掃除不許侈陳華麗又有何辦差之可言顧欲以此藉口可乎昨周元理奏請將河南南陽府知府莊鈞與直隸大名府知府永寧對調及陝西朝邑縣知縣金嘉言與直隸新城縣知縣王垣對

調皆以辦差為名經吏部以違例議駁朕因莊鈞原係直隸知州因迴避別用故照該督所請而金嘉言之隔省對調實屬非宜則從部議朕惟視事之當行與否酌為准駁並不以辦差為權衡恐各省不知轉相效尤實有關於吏治且亦不成政體又周元理所奏屬員賢否單於按察使達爾吉善稱其雖不能辦差人尚小心謹飭是該督竟以差務為重而以地方公事為次是何言耶周元理著飭

行朕臨御以來無日不心周民隱並嚴飭廢弛之習每於各督撫奏事隨時訓誡何尚不能深體朕意實力奉行耶嗣後務宜各加省改毋忽教養斯民正務以副朕諄切訓諭之意將此通行宣諭知之○又諭曰國泰奏審辦泰安縣民王仲智潛居修煉收藏不法書籍將王仲智比照大逆律問擬殊屬過當王仲智收藏不法書籍固有應得之罪但各書並非該犯自造較江西逆犯王錫侯之罪輕

重懸殊即照左道異端邪術律擬罪已足蔽辜乃該撫率將王仲智比照謀反大逆擬以寸磔且波及緣坐之人未為允協若是則前此臨清之逆匪王倫昨歲甘肅河州之逆匪王伏林等又將援何律定擬乎執法貴得其平固不可心存姑息失之寬縱亦不可漫無區別有意從嚴國泰所辦非是著交部察議此摺交刑部另行定擬具奏○又諭據明亮等奏查訊小阿樹土司丹志據稱我地方所

管人戶從不敢去做夾壩。歷來也沒犯過案。上年我跟著三郭羅克三阿樹土目們查捕拉布坦回來。纔知青海把我打牲的加科等五人。在我地方拿去。旋即送回。均在途病故。後又拏去七人。至訊之班珠爾。堅稱並不敢說報讐的話等語。阿樹土司平日頗屬小心。恭順似不應有放夾壩之事。或係青海地方。因不能將郭羅克賊番緝獲。捏造班珠爾報讐之語。致將小阿樹之人。屢次拿送塞責。亦

未可知。但究係丹怎及班珠爾一面之詞。非對質難成信讞。而其事亦非叅將李天貴所能查辦。著派侍郎博清額。馳驛前往青海會同法福里審辦。其應行帶往質訊之班珠爾等。即著李天貴押送前往。聽候查訊。○命刑部右侍郎錢汝誠。閱辦大清一統志。○乙卯。命國史館以明季貳臣傳分甲乙二編。諭我國家開創之初。明季諸臣望風歸附者多。雖皆臣事興朝。究有虧於大節。自不當與范文

程諸人畧無區別。因命國史館以明臣之降順者另立貳臣傳。據實直書。用彰公是。茲念諸人立朝事蹟既不相同。而品之賢否邪正亦判然各異。豈可不為之分辨。淄澠如洪承疇在明代身膺閭寄。李永芳曾乘障守邊。一旦力屈倖降。歷躋顯要。律以有死無貳之義。固不能為之諱。然其後洪承疇宣力東南。頗樹勞伐。李永芳亦屢立戰功。勲績並為昭著。雖不免終於勝國。實能效忠於本朝。昔戰國

豫讓初事范中行。後事智伯。卒伸國士之報。後之人無不諒其心而稱其義。則於洪承疇等又何深譏焉。至如錢謙益。行素不端。及明祚既移。率先歸命。乃敢於詩文陰行詆毀。是為進退無據。非復人類。又如龔鼎孳。曾降闖賊。受其偽職。旋更投順本朝。並為清流所不齒。而其再仕以後。惟務覲顏持祿。毫無事蹟足稱。若與洪承疇等同列貳臣傳。不示等差。又何以昭彰瘴。著交國史館總裁於應入貳

臣傳諸人詳加考覈分為甲乙二編俾優者瑕瑜不掩劣者斧鉞凜然於以傳信簡編而待天下後世之公論庶有合於春秋之義焉然朕所以為此言者非獨為臣子勵名教而植綱常實欲為君者當念苞桑而保宗社蓋此諸人未嘗無有用之才誠使明之守成者能慎持神器而弗失則若而人皆足任心膺股肱祖業於是延人才即於是萃故有善守之主必無二姓之臣所以致有二姓之臣者

非其臣之過皆其君之過也崇禎臨終之言不亦舛乎○又諭朕前降旨將英親王阿濟格子孫均復還黃帶子敘入宗譜乃推廣皇祖恩意俾其子孫得列天潢今據吏部奏稱復入宗室之現任人員俱應一體出缺以宗人府職官對品改補固屬遵照定例但念伊等向列仕籍原在未復黃帶子之前若因此而令將現缺全出候補無期是朕此次施恩惟使其宗支奕世蒙庥而現在職官轉不得

同時被澤矣著加恩將此項改歸宗室之現任京外人員其本身均留原職仍與滿洲人員一體陞轉毋庸出缺改補其現在候補候敘人員亦仍以滿洲員缺照舊銓用其未經出仕之子孫自當仍照宗人府舊例行至官學生係向未出仕之人俱即改歸宗學○諭軍機大臣等前日據榮柱奏豫省歸德汝寧等屬均被雨澤惟開封彰德衛輝三府屬未能一律普霑現在飭屬設壇虔禱等語今日

侍郎周煌自川省差竣回京召見時詢以沿途雨水據稱經過河南地方亦覺雨澤較稀農望頗切是豫省雨雪自昨冬至今春終覺較少本月望日京師僅得微雨嗣據周元理奏保定一帶十五日得雨寸許順德廣平二屬得雨二三寸不等朕意迤南雨勢較大齊豫兩省自應普霑昨國泰奏報濟南一帶於十五日自朝至夜膏雨連綿得雨已為深透而河南尚未據奏到昨二十二日京師得雪

連融化及積地約計五寸。今日據周元理奏。二十二、二十三兩日。省城得雪六寸。豫省曾否亦得沾渥。甚為軫念。著傳諭榮柱。如河南省此兩次得有雨澤。需足。即迅速由驛覆奏。將此由五百里傳諭知之。○吏部議覆。河東河道總督姚立德等奏稱。沂州府河工通判上年經部議准。改為海鹽通判。管理緝私。仍兼本任河務。復恐不能兼顧。行令詳查。今查該廳河務事不甚繁。儘可兼管緝私。並請即

定為沂州海鹽河防鹽務通判。仍隸河臣揀調。應如所請。從之。○兵部議覆大理寺少卿江蘭奏稱。各省緣營拔補千把總。向祇以人才壯健。弓馬嫻熟。註考。並不論及烏鎗。請嗣後將考拔把總。外委之例。酌於五缺後。選拔精習烏鎗一人。其步兵拔補馬兵亦如之等語。查定例額兵一千。設烏鎗兵三百。沿邊沿海者四百。今既請准選拔。應請於別項人員補用三缺後。即選拔一人。註考報部。其步兵

拔補馬兵亦如之。此項獎拔把總。外委。仍令其訓練烏鎗兵。兼習騎射。俟陞至千總後。再比較弓馬。一律保題守備。從之。○丙辰。遣官祭賢良祠。○諭軍機大臣等。據理藩院奏喀爾沁王等呈稱。本旗所屬七鄉約地方。向係八溝同知管理。今烏蘭哈達通判差人查取田土民戶數目。欲行分管。當經行查直隸總督去後。至今未見咨覆。今又據喀爾沁王呈稱。現在總督行文八溝巡檢。令其將七鄉約所屬田土戶口。造冊送烏蘭哈達通判管轄。是一旗屬於兩處。諸事實難應付。請仍照舊例辦理等語。已交該院依議行矣。烏蘭哈達自添設通判以來。專轄翁牛特。巴林等處。並未專轄喀爾沁王地方。該通判因何忽欲分管。即或有應行更易之處。該督亦應奏明辦理。何以徑行八溝巡檢。令其將七鄉約地造冊改轄。周元理所辦非是。著傳旨申飭。並著將因何如此辦理緣由。據實奏覆。尋奏喀爾

沁王等旗七鄉原應歸八溝管理上年烏蘭哈達通判及八溝同知均以該七鄉久經烏蘭哈達巡檢管理且去八溝甚遠詳請仍隸該巡檢就近經管以所議事屬因公復飭申送村莊道里細冊覈辦未竟准其改隸今蒙諭申飭自應仍歸八溝同知督率八溝巡檢經理即令分別界址不使再生異議報聞○丁巳

孝昭仁皇后忌辰遣官祭

景陵○戊午諭軍機大臣等昨召見山東布政使徐恕因其在浙歷任司道最久詢以該處水利情形據稱湖州一郡地近太湖上承安吉孝豐天目諸山之水為杭州之下游全藉宣洩得宜以衛田廬而安民業向有淺港七十二道不特湖州一郡水利攸關即毗連杭屬各縣亦藉宣洩之利並據口奏將來若蒙親臨指示實為民生攸賴且由杭州白雲橋而進至江南平望歸於官塘路程亦不甚紆

折等語湖州既有應修水利關係杭湖兩郡農桑自應取便前往閱視但湖郡向未經臨該處河道是否寬廣水營緯路有無妨礙民田不甚費事著王亶望悉心籌酌是否可行據實具奏○誠親王弘暢奏玉田縣監生郭天玉控告伊弟貝子弘旰莊頭盧密有倚勢訛占地畝等情請旨辦理得旨軍機大臣會同刑部查審具奏○以誠親王弘暢為正白旗領侍衛內大臣○予故順承郡王恒昌謚

曰慎○己未

上御勤政殿聽政○諭向曾令翰林院於輪班日期帶領編檢十人引見以備甄識近年來久未舉行著於三月內朕謁

陵回鑾後仍照舊例將現在編檢按班通行輪帶嗣後每閱五年即請旨辦理一次○又諭曰八旗官員向有侍班帶領引見之例數年來並未舉行著各該旗將伊等與應行引見人員於值日一併帶領以備記名錄用屆引

見一週。即暫行停止。俟過五年後。再奏聞帶領。著為例。○大學士阿桂等奏。木邦夷目漢奸番起雲。今已解到。訊有為賊目種地。及催辦門戶夫馬等情。今復至內地。探聽用兵信息。不法已極。請交刑部。按律定擬。速辦。尋部臣擬依大逆律定罪。請旨。得旨。番起雲著從寬改為斬決。○吏部議覆。護理山東巡撫署布政使徐恕奏。稱。佐雜人員內。司獄吏目。典史。均有監獄之責。向遇赴省候驗。不另委員

接署。查監獄重地。未便一日缺員。請嗣後。責令該知府。直隸州。於所屬首領佐雜內。委員代理。其分駐地方。及兼管隄工者。遇俸滿考驗。亦一例行。應如所請。從之。○以巴里坤總兵喬照為烏魯木齊提督。甘肅河州協副將西德布為巴里坤總兵。○庚申。諭曰。原任布政使王太岳。在四庫全書處行走。已屆一年。著加恩授為翰林院檢討。○又諭。朕數年來。未閱侍衛步射。恐不無生疎。著領侍衛內大

臣等。嚴加教導。朕於四五月間。即行親閱。伊等清語。亦應一併學習。○四庫館總裁質郡王永瑤等。帶領行走。已屆五年。應量加優敘。之提調纂修各員。引見。得旨。夢吉。王仲愚。章寶傳。黃軒。平恕。鄒炳泰。陳昌。齊莊。通敏。王嘉曾。吳壽昌。陳初哲。郭長發。俱著以應陞之缺。列名在前。陞用。庶吉士汪如藻。著即授為編修。毋庸散館。勵守謙。著加恩授為編修。至陸費墀。陸錫熊。紀昀。雖均已加恩擢用。但纂辦

各書。均為出力。著賞給緞匹。荷包。筆墨。紙硯。以示獎勵。其現在引見之提調纂修各員。亦著一體分別賞給。○吏部。戶部。議覆。直隸總督周元理疏。稱。天津府。薊永通判。專司秤掣。巡查。其一應覈轉。亦歸運同管理。請改為薊永分司。運判。管越支。濟民。石碑。歸化。四場。灘坨。竈課。錢糧等事。作為題缺。應如所請。從之。○禮部奏。朝鮮國護送遭風民人回籍之齋咨官役。應照例賞給。得旨。依議。本內稱。商民

趙永禮等七十五名。漂至朝鮮。船隻破壞。經該國王逐一詢明。情由專差金鴻結等管護前去等語。該國咨稱。前去理所宜然。其後則為該部出語。既由朝鮮送至中國。自應稱為前來方合。乃復沿該國原咨。亦云差官管護前去。依樣葫蘆。豈去來字義。亦不能解乎。阿爾景福。俱係滿洲翰林。何以於此等文義。尚不能看出。朕所以謂滿洲進士出身之人。最為無用。至禮部漢堂司官。俱係科甲人員。乃

於行文不通若此。又安用是科甲為耶。著飭行○刑部議覆。御史李孔揚奏。稱直省秋審情實人犯病故。向例但題咨到部。於都察院大理寺。並無該省報案。誠恐無從查覈。請嗣後令各督撫一體知照。法司衙門。應如所請。從之。○閩浙總督鍾音。遵旨奏。閩省鹽場。初奉貧民例准賣鹽之始。慮及梟販滋弊。經前督臣郝玉麟奏定。每名日給制錢十文。不令挑鹽。如福清赤杞。洪白。江陰莆田下里。潯美。

七處。均於場園錢價盈餘項下。動支按戶散給。嗣羅源寧德二縣。兩洲惠安浯洲三場。相繼倣行。至省會貧戶稍多。歲令商人帶銷餘鹽四千五十擔。其利交閩縣侯官兩縣貯庫。確查貧戶散給。行之已久。實有成效。現飭各該場縣實支實給。按月冊報。責成鹽法道稽查。轉報督撫考覈。下部議行。○山西巡撫巴延三。河東鹽政瑞齡。遵旨奏。河東鹽法向係場商澆曬畦鹽。無餘鹽卹貧之例。大小鹽池。

防範周密。不致偷越滋弊。蒙古鹽觔亦不能越境私售。引地民食。經久相安。毋庸另籌下部知之。○是月大學士管兩江總督高晉。河東河道總督姚立德奏。山東蜀山等湖。近年收水較小。臣高晉陞見後。奉命會同臣姚立德前往查勘。現已存水一丈零二寸。數本年重運之用。查蜀山一湖。總以收蓄汶水為良策。而汶水發於伏秋。勢驟退速。迨汶水較小。即不及多收。實由各斗門較窄之故。應於最

窄之永安永泰二斗門各添磯心改為二孔每孔寬一丈八尺落低七寸與永定斗門相同并將引渠挑寬俾汶水隨長隨收復恐伏秋水性渾濁入湖淤墊查金線閘後至徐家莊湖坡之上舊有攔水停淤土埂年久風浪撞刷僅存基址應塔築高厚并於引渠臨湖處各建斗門一座於收蓄汶水時先關攔臨湖斗門俾水收入灘上低窪處所一俟澄清再將斗門全啟引水入湖其所澄淤土仍隨時挑挖疏治至沿湖圈隄有孫村吳家坑觀音嘴等處草工四段計長三百五十丈應改砌碎石坦坡於汎水未發之前妥速辦竣以備乘時收蓄得旨是即當速行妥辦○高晉會同江南河道總督薩載奏中河廳屬楊家莊運口適當陶莊新河回溜每易淤淺而鹽閘又與相近未免吸溜倒灌請將楊家莊運口移於下游李家莊地方並於舊鹽壩以東四十丈處估挑河身一道長一千一百九十

餘丈直至李家莊出口築頭二三草壩以為收束其挑土築兩岸緯隄至東岸鹽河石閘一座於新挑河七百八十丈處斜挑倒勾引河長二百一十丈以達鹽河於引河上口築鉗口草壩下口建設石閘即將舊閘拆移以免多費得旨諸凡皆妥欣慰覽之河口既改大王廟或移或新建何未言及○調任兩廣總督楊景素奏廣省各營子母礮位式樣參差施放不盡得力經前督臣李侍堯奏准將銹蝕者銷變改造督標礮式今查應改造者東省共六百七十一位西省共一百四十九位此外或因地適用或完好可存毋庸概行銷變報聞

大清高宗法天隆運至誠先覺體元立極敷文  
奮武孝慈神聖純皇帝實錄卷之一千五十一

書

書

十

大清高宗法天隆運至誠先覺體元立極敷文  
奮武孝慈神聖純皇帝實錄卷之一千五十二

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌三月辛酉朔鑲白旗漢

軍都統王進泰奏已故尚書楊廷璋妻梁氏  
呈控家奴朱麟侵用物件銀兩請旨辦理得  
旨軍機大臣會同刑部查審具奏○壬戌諭  
朕因我朝開國時宗室懿親勤勞佐命其殊  
勲茂績實為史冊罕有如睿親王多爾袞受  
誣黜爵豫親王多鐸緣事降封朕為覈其生  
平事蹟昭雪加恩復還原封世襲又禮親王  
代善鄭親王濟爾哈朗肅親王豪格克勤郡  
王岳託等並令稱其原號用昭惇敘酬庸渥

典其餘諸王貝勒內。或有顯著功績。而封爵後。經降奪者。除本人身罹重愆。不當復邀優典外。若係承襲之子孫。獲咎議處。竟將初封褫革。未為平允。因令軍機大臣。會同宗人府。查明具奏。今據開列清單進呈。朕詳加閱覈。如饒餘親王阿巴泰。及其子安親王岳洛俱。屢著功績。其子孫內。止有奉恩將軍一人。不足以酬勞伐。著加恩賞封輔國公一人。又敬謹親王尼堪。功勳頗顯。且以力戰捐軀。其子

孫內。現在止有一輔國公。亦著加恩晉封鎮國公。至謙郡王瓦克達。異親王滿達海。鎮國公屯齊。從前亦均著有功績。現無承襲之人。並著加恩。瓦克達子孫。賞給一等鎮國將軍。滿達海子孫。賞給一等輔國將軍。屯齊子孫。賞給一等奉國將軍。此次加賞之公爵世職。俱著世襲罔替。所有應襲之子孫。均著宗人府。照例揀選數人。帶領引見。○又諭。甘省收捐監糧。前經戶部定議。俟數年後。令該督報

明動存實數。請派大臣盤驗。今據勒爾謹奏。請簡派查驗。著尚書袁守侗。侍郎阿揚阿。於四川查辦事件完竣時。由陝西便道馳驛前往甘省。將各州縣監糧。按其收發存貯實數。通行盤驗具奏。○又諭。據王亶望參奏。湖州協副將白成龍。於嘉湖衛守備柳俊賢。欲圖調繁。應允代為謀幹。並告知墊用千金。業已辦妥。後柳俊賢知其指撞。仍屢次逼索。要將柳俊賢赴京挑選時。匿喪情事發覺。以致該

員自縊身死。請將白成龍革審等語。白成龍著革職。交該撫提集案內人犯。一併嚴審究擬具奏。○諭軍機大臣等。本日王亶望奏。湖州協副將白成龍。指官誣騙。守備柳俊賢銀兩。致逼該員自盡一摺。已降旨將白成龍革職。交該撫嚴審究擬矣。至摺內稱。柳俊賢之弟柳俊傑。原報稱伊兄染患風寒。變成痰症。自縊身死等語。柳俊賢既因意圖調繁。為白成龍等誣騙銀兩。屢次逼索。又慮匿喪事發。

情急自戕。柳俊傑乃敢捏稱伊兄因病變症自縊。殊屬欺飾。自當予以應得之罪。著傳諭王亶望於此案審結時。將柳俊傑一併定擬具奏。將此諭令知之。○軍機大臣等奏查各處纂輯應進各書共十四種。自上年五月按卯呈進。如臨清紀畧。蒙古源流。通鑑輯覽三書已於限內辦竣。明史及明紀綱目。國子監志。日下舊聞考等書。約可如限進完。至金川方畧。大清一統志。元史。遼史。西域圖志。音韻

述微。熱河志等書。卷帙較多。請展限趕辦。得旨各處應進之書。止須按卯分進。轉不必立定期限。如屆期遲誤。即奏明叅處。此次謁

陵及秋間恭詣盛京謁

陵途次。仍著隨報按卯進閱。○軍機大臣等議覆盛京將軍宗室弘昫奏稱。前因盛京丈得間田。議請移駐閑散宗室一百餘戶。分為四屯。給屋一千八間。地四百四十三頃。每屯駐宗室章京一員。閑散三十戶。建屋木料由遼

陽。寧遠等處運買。輒瓦缺少。戶給瓦屋三間。餘蓋平棚。墾田一犂三牛。兵為耕種。一切需費先由盛京戶部支領。又每屯設貼寫傳事馬甲各四名。並另給蕩田一頃。取租作為公用。此外餘地招墾。俱應如所請。得旨此事暫行停止。辦理著存記。○吏部議覆御史孟生蕙奏稱。上年山東巡撫國泰奏請將分發知州捐陞郎中藍嘉瓚留東差委。補人地相宜之缺。如照郎中截取知府例補用。似覺太優。

若仍補知州。所捐郎中又未註銷。兩途未免牽混。請勅部議定等語。查郎中與同知直隸州知州品級相同。藍嘉瓚祇准指補同知。直隸隸州知州二項從之。○廣西巡撫吳虎炳奏。南寧府屬之宣化隆安橫州永淳新寧太平府屬之崇善左州永康寧明柳州府屬之馬平來賓思恩府屬之遷江共十二州縣。或兵民雜處。或水陸通衢。或僻處邊境。向遇青黃不接。皆資官倉糶借。上年收成歉薄。即以各

該州縣倉穀糶借民食尚恐拮据擬於附近豐收各屬乘此春水長發酌撥接濟應撥平樂昭平岑溪蒼梧藤縣容縣穀三萬一千石運赴橫州宣化新寧永淳隆安撥蒼梧藤縣平南穀一萬七千石運赴崇善永康寧明左州撥永福柳城融縣穀一萬四千石運赴來賓馬平撥象州穀四千石運赴遷江各備平糶事竣糶價解司秋後買補報聞○予故雲南新興州屬土州判王鈞子雨民襲職○癸

亥諭軍機大臣等本日戶部奏駁瑞齡查覆從前舉報更換疲商之富戶情形一摺所駁甚是已依議行矣朕於摺內各情節詳加披閱如所稱原任知府裴志濂業已具有本人情願充商甘結送部因何復行赴部呈控又杜楫李希綱侯希武等亦係三萬餘兩與裴志濂家資相同乃稱並非殷實不能充商則地方官於舉報開除之間似有任意軒輊之情又郭愈博家資二萬餘兩現任湖南知府

與裴志濂事同一轍乃該員任所尚未奉查出結而地方官先稱伊有借欠他姓二萬餘兩代請邀免又如該鹽政所稱各乏商舉報富戶時或因田地廣厚或因房屋華美及曾經捐職辦銅向有富名者始行開列是各戶富名久為衆所共知地方官何由決其並非殷實且舉報後僅止一年而遽指為或係先富後貧或係祖業凋零尤屬強為之辭各等語其情節實屬可疑朕俱一一為之折出看

來此事皆由地方官於所屬富民之查覆開除未免意存徇徇曲為開脫即或州縣官不敢公然受賄而吏胥等藉端肥橐朦報本官有司復不能認真查辦為所欺蔽致前後情節參差種種弊病皆所不免以本地富民承辦本地鹽課分所當然即因河東鹽務非兩淮各處可比亦止獲利稍微且近經借帑修浚鹽池產鹽已旺更不至多有賠累乃伊等皆樂於辦銅而憚於辦鹽尤非情理此皆地

方官以鹽務非其切已意分畛域不肯實力查辦所致。在巴延三則不可如此存心也。著傳諭巴延三。照戶部指駁情由切實覈辦。詳悉覆奏。勿再聽憑地方官高下其手。致乖平允。干咎。戶部摺著鈔寄。並照朕折角處折令閱看。尋奏裴志濂本係殷實。其赴部呈控。不過吝惜推諉。現已情甘赴運接充。至杜楫。李希綱。侯希武。家道較裴志濂不及十分之五。委難充商。至所舉富戶。一年後遽指為先富

後貧者。以此次本係乏商舉報。未經地方官確查。迨詳悉詢訪。實有本人物故。而家久分析者。亦有乏商未舉。而尚堪接充者。此次乏商。祇以急思更替。未暇細檢。業委雁平道方應清逐一親查。尚無徇隱賄飾情事。又部駁舉報裴桂一家何以地方官稱並無其人。查晉省土音。桂國相同。所舉本係裴忠國。誤開裴桂。又部駁郭愈博家資既厚。現任湖南知府。何以地方官未據該員任所出結。輒稱有

借欠。查該員家資借項。俱已闕查有案。又部駁送到各結。其聲明家資數目。及本人隣族甘結。何以俱各參差。查晉省人多係出外貿易。具結本難盡一。且係各該州縣舉報。詳畧亦自不同。誠恐往返駁換。耽延滋擾。是以將原結送部。並非別有情弊。下部知之。○吏部議覆。大學士管雲貴總督李侍堯奏稱。雲南昆陽州海口州同專司疏濬。並不管轄村莊雇夫辦料。本多掣肘。且海口距州城僅三十

五里。該州事務本簡。無難兼司。請裁海口州同。河務歸知州管理。應如所請。從之。○兵部議奏。四川總督文綬等咨。改阜和泰寧營制事宜。一阜和改營為協。泰寧改協為營。應將原設泰寧協副將。改為阜和協副將。泰寧協左營都司。改為阜和協左營都司。俱移駐打箭鑪。其原設阜和營千把外委及額兵七百名。悉歸協標。再於原設泰寧協左營額兵內。撥給阜和協左營十七名。原駐清溪之泰寧

協右營都司。改為阜和協右營都司。仍額兵三百名。阜和左右兩營。定額兵共一千十七名。至泰寧改協為營。應將原駐鑪城之阜和營遊擊。改為泰寧營遊擊。原設阜和營守備。改為泰寧營中軍守備。同移駐化林坪。隸阜和協。定額兵共六百八十三名。各營千把外。委等分駐汎地。各仍其舊等語。均應如所咨辦理。一。阜和泰寧副將遊擊都司守備。俱係邊地要缺。今營制雖改。而地仍邊要。應仍在

遊擊同城。應由司換給鈐記。未便由部鑄給條記。再原設泰寧協副將傳勅。應令繳銷。另給餘均如所請行。一。副將遊擊都司守備等官衙署。宜照舊移駐毋庸另建。應如所咨辦理。從之。○甲子。上自圓明園啟鑒謁泰陵。泰東陵。遣官祭歷代帝王廟。○諭直隸廣平。大名二府屬。與河南接壤。上年秋間雨澤短少。所種秋麥無多。冬雪春膏。亦未深透。不能趕種春麥。農民祇可盡力大田。但春夏之間。尚不能即資接濟。所有該二府屬上年應徵緩徵錢糧。均著加恩。概行緩至本年秋收後徵收。俾民力不致拮据。該部遵諭速行。○諭軍機大臣等。前因豫省開封衛輝二府屬雨澤未能一律普霑。曾降旨詢問。昨據鄭大進覆奏。日內惟彰德府所屬之安陽。臨漳。武安。涉林。各縣二月

中下二旬。各得雨雪二三寸至五寸不等。其  
開封。衛輝。二府屬。均未得有雨雪。現在設壇  
祈禱等語。是開封。衛輝等處。盼澤甚殷。朕心  
深為廕念。今日啟鑒。駐蹕黃新莊。得雪甚大。  
現在勢尚未止。且雲氣濃厚。所被自應廣遠。  
未知豫省曾否亦得霑渥春膏。著傳諭鄭大  
進。如河南省。此次得有渥雪。或雨澤霑足。即  
迅速由驛覆奏。若復未得有雨雪。則一應糶  
借撫恤之事。即當豫為綢繆。將此由五百里

傳諭知之。○是日。駐蹕黃新莊行宮。○乙丑。  
諭軍機大臣等。昨據王進泰奏。原任尚書楊  
廷璋之妻梁氏。控告家奴朱麟。侵蝕寄存物  
件一案。當令軍機大臣。會同刑部查審。茲據  
訊明。朱麟供稱。侵用宋英王。王述曾抵賂物  
件銀三百九十兩。自認不諱等語。朱麟以旗  
下家奴。竟敢慫恿主母。以取討寄存物件為  
名。向直隸地方官藉端詐銀。又復侵隱不交。  
情節可惡。著阿桂。英廉。即告知王進泰。將朱

麟家產。親往盡數查抄。毋使絲毫隱匿。寄頓  
至梁氏。係已故前任總督之妻。理應安分自  
守。顧惜顏面。即有前此寄存粗笨物件在直。  
亦不值遣人索取。乃竟私令家人前往。復與  
外官寄字往還。即伊夫在日。係該員上司。豈  
伊亦係該員等上司乎。實屬不成事體。並著  
阿桂。英廉。傳諭王進泰。前往伊家。傳旨將梁  
氏嚴行申飭。并著罰銀五千兩。以示懲儆。至  
伊子楊長桂等。於伊家事務。全不照管。一任

家人出外滋事。殊屬不堪。著一併嚴行申飭。  
其朱麟一犯。已交刑部解京監禁。俟直屬州  
縣等具覆到時。詳悉研鞫。按律定擬具奏。將  
此諭令知之。○是日。駐蹕半壁店行宮。○丙  
寅。以禮部左侍郎謝墉。為會試知貢舉。以大  
學士于敏中。為正考官。吏部右侍郎王杰。內  
閣學士嵩貴。為副考官。○是日。駐蹕秋瀾村  
行宮。○丁卯。駐蹕梁格莊行宮。翼日如之。○  
戊辰。

上謁

泰陵

泰東陵俱未至碑亭。即降輿慟哭步入

隆恩門詣

寶城前行禮躬奠哀慟。王以下文武大臣官員

隨行禮。○己巳清明節

上躬祭

泰東陵。○遣官祭

永陵

福陵

昭陵

昭西陵

孝陵

孝東陵

景陵

泰陵。○遣官祭

孝賢皇后陵。○

命

皇十五子 ~~端慧~~ 祭

端慧皇太子園寢。○祭

先蠶之神。遣妃行禮。○大學士于敏中奏。同

考官評閱硃卷。乾隆三十六年。部議改用紫

筆。查紫與硃其色相近。易滋弊混。請仍改用

藍筆。其內收掌及書吏並一體更正。至內簾

監試。應仍用紫筆從之。○是日。迴鑾駐蹕秋

瀾村行宮。○庚午駐蹕半壁店行宮。○辛未

孝賢皇后忌辰

上命

皇十五子 ~~端慧~~ 祭

孝賢皇后陵。○河東河道總督姚立德奏。黃河

南岸近隄處向有順隄河形。自儀封至考城。

綿長百里。河頭舊有土壩攔截。上年漫塌入

水。致河流分入。今須改築草土夾壩。方可經

久。無虞。現已酌撥稽料。上緊鑲築。至現查曹

單商虞儀考三廳。河勢工料情形。俱各穩固。

得旨。覽奏俱悉。○陝甘總督勒爾謹奏。甘省

連城紅山二土司地方因上年疊被災傷口食維艱籽種缺乏請照乾隆二十四二十九等年例賞借口糧籽種每糧一石折銀一兩於麥熟後分作三年扣還得旨允行○是日駐蹕黃新莊行宮○壬申諭上年河南省雨雪短少開封彰德衛輝懷慶河南五府屬收成較薄業經降旨加恩緩徵入春以來尤殷望澤屢經傳諭詢問據報得雨分寸尚未一律深透春麥既未及期播種現在節過清明

麥苗難望秀實農民祇可盡力大田但春夏之間尚不能即資接濟未免艱於口食著加恩將實在麥地被旱之貧民酌借一月口糧并每畝借給籽種銀六分以資耕種其開封等五府屬本年應徵錢糧著再加恩緩至本年秋收後徵收又該五府屬上年出借倉穀尚有常平民欠七萬二千五百八十二石零社倉民欠七萬二千二百一十一石零均著緩至來年麥收後還倉以紓民力其存倉社

穀並著隨時借糶俾市糧充裕該撫務須董率所屬妥協辦理副朕軫念窮黎至意該部遵諭速行○又諭曰鄭大進奏三月初五六日據開封等處報稱各得雨三四五寸雖衛輝府屬未據報到而天慳已破種秋無慮失時等語措詞甚為失當已於摺內批諭矣雨澤偶有愆期我君臣惟當動色相戒以冀感召天和而封圻大吏為民請命尤宜返躬思咎懇籲

天恩一切將以寅畏庶得仰邀渥澤至天慳已破一語迹涉遊戲在詩人拈弄筆墨或偶一用之何得於奏牘內妄為引用殊乖敬謹之道且即臣下有所求請一時未即加恩尚不得謂君為慳吝豈有於設壇虔籲天恩之時而漫為此言其能邀福佑乎鄭大進一任庸劣幕賓率意撫拾不知檢點若此著傳旨申飭并著傳諭各督撫等知之○是日駐蹕潭柘岫雲寺○癸酉

上臨禮烈親王代善園寢賜奠。○軍機大臣等奏恭查乾隆十九年

皇上詣盛京恭謁

祖陵謁

陵之日。用素服行禮。大祭之日。朝服行禮。盛京陪祀及執事大臣官員有朝服者俱朝服。扈從王大臣等俱穿蟒袍補褂。此次雖在二十七月之內。臣等前擬御用服色亦係謁

陵用素服大祭用朝服。與儀注符合。至陪祀大

臣執事官員及扈從王大臣等。應請如十九年之例。報聞。○兵部議准署漕運總督德保奏稱。江安揚州衛三幫事務紛繁。浙江杭嚴衛頭幫二幫丁伍凋疲。請改為繁缺。宿州頭幫。蘇松鎮海衛前幫。浙江台州衛後幫。丁裕事易。請改為簡缺。從之。○旌表守正捐軀直隸吳橋縣民高淑洛妻于氏。守正被戕。山西樂平縣民王端大妻竇氏。○是日。駐蹕靜宜園。至乙亥皆如之。○甲戌。諭向來江省淮徐

淮揚兩道因兼管河務。一切差委。俱不調派。所有河南之開歸陳許道。彰懷衛道。山東之兗沂曹道。三缺亦係分管黃河南北兩岸工程。修防緊要。必須該道往來工次。董率妥辦。未便遠離。嗣後著照江南之例。各該撫不得調派科場執事。及委署別缺。以重河防。而專責守。○兵部議覆本部侍郎金輝奏稱。定例一等二等漢侍衛行走。三年期滿。以叅將遊擊用。叅將遊擊並出。先用叅將三等漢侍衛。四年期滿。以遊擊都司用。遊擊都司並出。先用遊擊藍翎侍衛。四年期滿。以都司守備用。都司守備並出。先用都司。查叅將遊擊都司守備並用。一人既有兩途。即易啟趨避之端。請將漢侍衛年滿者。由該管大臣分別保送。其應用何官註冊之處。由部帶領引見候旨。等語。應如所請。至其銓選章程。請嗣後遇應用侍衛月分。如記名叅將人員。俸深即以叅將擬用。如俸淺於記名遊擊者。即將記名遊

擊者擬用。如本月祇有叅將而無遊擊。仍以叅將擬用。祇有遊擊而無叅將。仍以遊擊擬用。倘二項俱無。即行過班。其三等及藍翎侍衛記名者。俱照此辦理。從之。○乙亥。

上御演武廳。閱健銳營兵。

實錄卷之五

十

大清高宗法天隆運至誠先覺體元立極敷文奮武孝慈神聖純皇帝實錄卷之一千五十二

大清高宗法天隆運至誠先覺體元立極敷文奮武孝慈神聖純皇帝實錄卷之一千五十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌三月丙子。

上還圓明園。○丁丑。諭曰。李侍堯奏臨元鎮總兵吳萬年墜馬受傷。難望痊愈。請解任回籍調理等語。著照所請。吳萬年准其解任回籍調理。其臨元鎮總兵員缺。著陳大用補授。○又諭。據李侍堯覆奏。土夷改遷烏魯木齊。私開鎖鍊一案。查據貴州護貴東道吳光庭稟稱。與湖南辰沅道王鳴正。江縣知縣吳鑽。同在交界處所點收。均有鎖鍊。隨移咨楚省。據該撫顏希深覆稱。以楚黔二省。各執一詞。已

咨明烏嚕木齊辦事大臣。飭查夷人鎖鍊究係何處私開。訊供咨覆等語。外省彼此推諉。惡習最為可惡。可笑。已於李侍堯摺內批示矣。此案楚黔兩道。果經當面點交驗明。有無鎖鍊。何至日後更生枝節。乃因叅奏查詢。彼此推諉。延擱數月之久。外省陋習至此。不可不亟為整飭。此案除貴東道吳光庭。宸沅道王鳴芷。江縣知縣吳鏞。均著解任。管解來京。交軍機大臣審明具奏。至顏希深原咨。稱入

楚首站。并無鎖鍊。及接滇省移咨。不符。自應查訊屬員。據實辦理。即干涉隣省道員。亦無難奏明調往質訊。乃欲向無知土夷。取供定案。尤屬不成政體。身任封疆者。豈應如是。顏希深著交部嚴加議處。○戊寅

上詣

安佑宮行禮。諭軍機大臣等。據楊景素奏。遣羅國鄭昭。如於五月前。遣使齎票到廣。趕辦事竣。尚可於七月間赴闕。若回票到遲。當遵

旨。於九月間回鑒。後到京等語。楊景素已於二月二十一日。調補閩浙總督。并諭令將總督印務。交李質穎署理。即赴福建新任。令鍾音。即行回京。俟德保到閩後。將撫印交代。并令兼署督篆。楊景素再行來京。陛見。均著遵照前旨行。所有廣東省辦理暹羅請封一事。著即面向李質穎。詳悉告知。令其妥辦。將此由四百里傳諭。楊景素知之。○又諭。昨據李侍堯奏。臨元鎮總兵吳萬年。墜馬受傷。難望痊愈。請解任回籍等語。現已降旨。令吳萬年回籍調理。其所遺員缺。著陳大用補授矣。臨元鎮雖非邊防要缺。但界接交趾。與尋常內地不同。若傳諭李侍堯。俟該鎮到任後。留心察看。是否尚能勝任。如或員缺不甚相宜。即於內地總兵內。酌量奏明調補。○又諭。昨據李侍堯奏。土夷改遷烏嚕木齊。私開鎖鍊一案。業經降旨。將吳光庭。王鳴。吳鏞等。解任。管押來京。交軍機大臣審訊。并將顏希深。交部

嚴加議處矣。此案顏希深接據屬員所稟入楚首站。並無鎖鍊。及接滇省移咨不符。自應據實查辦。即干涉隣省道員。何難奏明調往。質訊。並不妨親往黔楚交界處所。面加查詢。即可得其實情。乃僅以文移行查。任其彼此推諉。及見兩省道員。互相諉卸。轉欲向無知土夷。取供定案。更復成何政體。土夷經由內地州縣地名。既不能悉知。委員亦不能識認。乃令其事後追憶。所供又豈足為據。此不過欲事歸烏有耳。顏希深辦理此事。何至糊塗取巧若此。著傳旨嚴行申飭。所有楚省道員王鳴。知縣吳璜。并著迅速先行隔別解京。倘稍有延緩。或令與貴州護道吳光庭見面。以致彼此串供。則顏希深不是更大。該撫不能當其咎也。將此由四百里傳諭知之。○己卯諭各省保送補放佐領等官。但送擬正一人。惟察哈爾旗。將擬正擬陪並送。自防禦以上等官。職分較大。若一缺僅送一員。甚不合宜。

著兵部行文各將軍都統嗣後補放協領佐領防禦其擬正擬陪之人。俱著送京引見。朕補放擬正時其擬陪記名與否。一併降旨。至伊犁烏魯木齊等處俱係邊疆遠方。可仍照舊例辦理。○庚辰諭軍機大臣等據索興阿奏開原縣倉現貯米穀豆五萬九千餘石。盤查大數雖屬無虧。但該縣倉廩共一百四間。內三十六間全行倒塌。其餘牆壁亦多歪斜。木植腐朽。所貯米石率多色變霉爛。詢據該縣稱歷任詳請重修。經府尹委勘駁查。以致辦理遲緩。請勅該府尹等趕緊修建其霉爛米石即著落富察善等分賠等語。所奏甚是。已於摺內批示矣。開原縣倉廩既多倒塌。自應據詳題請趕緊修葺。乃因委勘駁查之故延擱累年。以致米多霉爛。富察善銘通實不能辭其咎。所有此項米石即行查明數目。著落富察善名下賠完。仍將辦理怠緩緣由據實明白回奏。至該縣存貯米穀豆石全數實

有若干是否俱係額徵向來作何支用滿貯廩座若干據奏每廩貯穀八九百石至十餘石不等合計五萬餘石之糧不過數十間已數存貯何至一百餘間之多與其空廩不用一任倒塌何如按照存糧實數酌留數十間趕緊歸併修葺俾歸實濟且省物料開原一縣如此其餘各州縣是否亦有似此者著傳諭富察善銘通即行逐細查明覈實存糧數目應留倉廩間數酌量上緊修蓋以節糜費而歸實用○又諭本日順天府奏報十七日京師得有微雨不成分寸良鄉房山二縣得雨二寸等語現屆春作方興農民望澤甚殷良鄉等縣既得有雨澤未稔保定一帶曾否得雨何以未見周元理奏及朕心深為廕念著傳諭周元理即將保定一帶近日有無雨澤并麥田是否盼雨之處即行據實覆奏尋奏順天保定正定河間定州深州順德廣平大名宣化冀州趙州所屬州縣俱於十七日

得雨一二三寸不等麥田已資霑潤惟尚未透足現在設壇祈禱並飭閭屬一體虔求得旨知道了○又諭據色爾布奏稱拏獲鬪毆人犯馮八即郎成子究出伊曾隨同白靛等在密雲縣九松山地方持械謀刦逸解回籍之商河縣民白孝將解役打倒一人餘五人奔散白孝及另案解犯李二等均扭鎖逃走當經關查八溝密雲等處據覆解案相符現在行查訊明等語已將此案交刑部嚴審定擬矣此等毆差奪犯之案情罪最為重大該犯等竟敢糾約多人執持器械中途邀刦并致另案竊犯亦乘間脫逃實為不法之尤該督自當上緊嚴緝審辦乃自四十年正月該犯等滋事之後迄今三載有餘並未見該督查訊具奏豈該督於此等案件全不以為事耶周元理著傳旨嚴行申飭并將辦理緣由據實回奏該御史等摺并鈔寄閱看尋奏查歷年並無密雲縣詳

報毆差奪犯之案。亦無八溝同知具報解犯脫逃之事。惟本年二月間。八溝同知四旗通判。報有准東城兵馬司關查一案。內有白二。白孝等名。并有在密雲縣石匣持械奪犯之語。亦未將白孝從前竊案詳敘。現將御史色爾布所奏各情節。飭霸昌熱河兩道確查。得旨。覽。可謂疎忽之至。地方官所司何事。當嚴叅示警。○辛巳。諭軍機大臣曰。周元理奏覆原任尚書楊廷璋之妻梁氏。控告家奴朱麟。

侵蝕寄存物件一案。將通永道宋英玉等送到親供。鈔錄進呈。已將原摺及供單交軍機大臣會同該部。併案覈辦矣。梁氏以已故尚書之妻。不安本分。私令家奴與外官寄字往來。實屬不成事體。周元理身為總督。於此等近在省城之事。既有見聞。自應將朱麟立即押令回旗。其宋英玉等代為輾轉查辦。亦應嚴為申飭。并寄信楊廷璋之妻。毋再遣人前往。仍將辦理緣由奏聞。方與舊時僚屬之誼。

有合且亦不涉於徇隱。乃一任屬員等與之往還交涉。致令朱麟在外滋事。甚屬不合。況已故總督屬員等尚為周旋。若此。則周元理之現任總督。其迎合又當何如耶。此於吏治官方大有關係。周元理著傳旨嚴行申飭。○戶部議准。直隸總督周元理疏稱。

秦東陵歲收漕糧二萬二千石。今本年添截七千餘石。又添鎮國公綿德護軍藍甲一年米一千餘石。暨泰寧鎮加增兵丁米五百餘

石。舊有廩座。不敷存貯。請添建倉廩二十間。從之。○以正紅旗蒙古副都統永慶鑲紅旗蒙古副都統朋素克拉什對調。○壬午。諭。據留保住奏。輔國公珠爾默特旺扎勒病故。其原給勅書。並無世襲罔替字樣。今可否仍令伊子諾爾布朋蘇克承襲。請旨遵行等語。珠爾默特旺扎勒之父車布騰。原係鎮國公。因被伊弟珠爾默特那木扎勒無故戕害。是以特加恩將伊子珠爾默特旺扎勒賞給輔國

公今珠爾默特旺扎勒病故。著加恩仍令伊子諾爾布朋蘇克承襲輔國公爵。○豁免遭風漂沒之臺灣船戶鄭時春等撥運內地兵米三百六十石。○癸未。吏部議准。廣西巡撫吳虎炳疏稱。恩恩軍民府印信。經奏請刪去軍民二字。該府儒學經歷司獄印內軍民二字。亦應一體刪除改鑄。從之。○旌表守正捐軀河南夏邑縣民任永喜妹任氏。○甲申。上御勤政殿聽政。○諭曰。刑部議覆。李侍堯奏

審建水令孫鐸短價派買倉穀一案。據稱。孫鐸因買補倉穀。每石發銀五錢。交倉書王萬年轉派縣民鄒浩等分買。因彼時市價較昂。孫鐸諭令將原價繳回。王萬年乘機舞弊。勒貼銀兩。以致鄒浩無力措繳。情急自縊。該督將孫鐸擬以杖流。其承審此案。故出孫鐸短價派買罪名之柳元煜。擬以杖六十。徒一年。刑部照擬奏覆。尚未允協。此案孫鐸既短價派買於前。復縱役索詐於後。致令無辜鄉民

畏累縊斃。至審供時。又復匿情混供。情罪較重。柳元煜承審此案。回護同官。併以採買囚糧並無短價派勒情事。曲為開脫。尤為外省官官相護惡習。朕臨御以來。飭紀整綱。歷久勿懈。凡內外告發案件。無不徹底清查。從不肯顛預了事。即如前年李承訥在大學士舒赫德前。控告伊子舒寧夥占煤窰一案。當經舒赫德奏明。派王大臣嚴審。按律辦理。近日郭天玉在誠親王弘暢前。控告伊弟弘峙莊

頭盧密訛占地畝一案。經弘暢奏明。交軍機大臣會同刑部審辦。以王大臣子弟事發到官。尚不能稍為瞻顧。容隱內外官吏。自應更加儆惕。凡查審案件。俱各秉公據實。不敢絲毫瞻徇。乃孫鐸隱匿真情。希圖朦混。柳元煜復袒護同官。故出短價派買之罪。所擬杖流杖徒均未足蔽其辜。孫鐸著從重改發伊犁。充當苦差。柳元煜著即照原擬孫鐸罪名。改為杖一百。流三千里。不准納贖。李侍堯等審

擬此案原定罪名未免輕縱本應交部議處因係該督等自行查出叅奏此次姑加恩寬免該督等當益知戒懼也此等縱役斃命又兼袒護同官之案於吏治官方大有關係不可不力為整頓明白宣示將此通諭中外知之○乙酉旌表守正被戕河南睢州民徐煥章女徐氏丙戌諭曰管理旗務宗人府王公等遇有應行罰俸事件私事罰王公俸因公罰本任俸至辦理

陵務貝子公等雖無兼任亦係辦理大臣之事自應與管理旗務者一例辦理嗣後除私事仍罰該貝子公俸外如因公即照都統任俸由本俸內扣罰著為例○丁亥遣官祭先農之神○諭前派八阿哥十一阿哥校勘四庫全書向來總裁校書經朕指出錯誤者例有處分阿哥等所校之書如有錯誤亦應一體查覈處分以昭公當其應罰之俸著照尚書例議罰即於應得分例內坐扣○禮部

以會試中額請得旨這會試滿洲蒙古取中三名漢軍取中一名直隸取中十五名奉天取中一名山東取中十二名山西取中九名河南取中十名陝西取中五名江南取中二十八名浙江取中二十四名江西取中十八名湖北取中四名湖南取中三名福建取中九名廣東取中四名廣西取中二名四川取中三名貴州取中三名雲南取中二名○戊子諭前因河南省開封彰德衛輝懷慶河南

五府春雨愆期麥田被旱節經降旨酌借口糧籽種俾得及時耕作又將本年應徵錢糧緩至秋收後徵收常平社倉民欠穀石緩至麥收後徵收並令將存倉社穀隨時借糶俾市糧充裕民力寬紓第念該五府屬極貧下戶口食更為拮据著再加恩於社穀內酌給月糧以資餬口該撫即飭令地方官確查妥辦務令窮黎均需實惠毋致吏胥中飽至本年社穀出借較多如屬不敷著於漕穀項下

借動撥給。該部即遵諭行。○已丑。諭曰。蔣元  
鼐年逾七旬。精力就衰。著以原品休致回籍。  
所遺兵部侍郎員缺。著顏希深補授。湖南巡  
撫員缺。著李湖補授。川省軍需銷算事務。將  
次告竣。且現在辦理有人。李湖著即由川取  
道。速赴湖南新任。○諭軍機大臣等。戶部奏  
駁富勒渾等奏銷運送軍糧軍裝人夫回空  
口糧一摺。所駁甚是。已依議行矣。該省運糧  
人夫係於乾隆三十七年九月。加給回空口

糧。其運送軍裝人夫。於三十九年十一月。始  
行奏准加給。該大臣等此次所題各案。均在  
未經奏准以前。先後年分。難以牽混。且細閱  
該大臣等所稱經軍需局詳請。將西南中北  
各路站夫。無論輓運糧石。皆送軍裝。一律折  
給回空口糧等語。如果二項均在恩旨內。一  
體應給。則軍需局何必有此一請。其為明知  
非旨內所有。已屬顯然。部駁此語。實非苛求。  
即朕亦難為伊等答辨也。至該大臣等當時

接閱詳文。自應查照原奉諭旨駁飭。何以竟  
自批准支放。直至兩年後。始行咨部。殊不可  
解。總之。此項如果應一例給發。則該省接到  
諭旨時。祇須遵照奉行。局員不必議詳請准。  
三十九年間。亦毋庸有此一咨。是該省辦理  
錯誤。無可置喙。又何怪該部之逐層指駁也。  
其錯誤處。朕俱經折出。著傳諭富勒渾等。將  
各情節逐一登覆。明白回奏。若此外更有隱  
情。亦不妨直奏。將此由四百里傳諭知之。戶

部摺著鈔寄。并照朕折角處。折令閱看。○知  
貢舉侍郎謝墉奏。填榜之日。外簾自知貢舉。  
監試提調。俱集聚奎堂。各項書吏匠役。一擁  
而入。向未設有彈壓之員。請飭令原派之副  
都統二員。於填榜日。赴至公堂。會同外簾御  
史。將應入內簾人役。查驗確實。同入內龍門。  
仍分兩翼彈壓巡查。內龍門外。即責令所屬  
將備二員。巡邏放榜時。並令將備等護送張  
掛得旨所辦好。依議。○戶部議准。四川總督

文綬疏稱。捷為縣竈民胡坤等。開淘鹽井十八眼。匡仲朋等。開淘鹽井十六眼。均請照下井鍋例。配引權課。共定稅銀一千八百七十二兩有奇。自乾隆四十二年徵收造報。從之。○刑部議覆。廣西巡撫吳虎炳奏稱。泗城。思恩。鎮安。太平。四府。地處極邊。所屬州縣。解犯至省。一二十里不等。且住宿之處。不盡有城池監獄。塘汛墩臺。難保無虞。請照雲南永昌等府之例。免其解省。專責不由審轉之該道員。於冬季巡閱時。親加研鞫。應如所請。從之。

○工部議覆。大學士管雲貴總督李侍堯疏稱。滇省各標營需用硝磺。向係營員自行採辦。應覈定章程。以杜偷漏。請將附近緬彝之騰越。龍陵。順寧。緬寧等處礦硐。嚴行封閉。其餘出產硝磺處所。自乾隆四十三年正月起。設廠募工採煎。解貯省局。定限五年封閉。俟將屆用完之二三年前。再行題開。合計五年內需用硝四十萬觔。磺十五萬觔。其工本。先

於藩庫借發。俟一年後。於該營公糧內覈扣。以原裁督標後營守備衙署。作為局房。至各營現有存貯火藥。請挨次新陳易。用概以五年定額。均應如所請。從之。○庚寅。諭曰。從前宗室王公等。往往遣屬下官員。及太監等。向外官說事。自

皇考臨御。整飭肅清。今貝子弘晳。因莊頭事。遣護軍校劉成泰。請託通永道宋英玉。此皆朕過寬之故。若不嚴行整飭。則漸積成風。久之阿哥等。亦相率效尤。可乎。前因綿德。向禮部郎中秦雄。賔相餽書籍等物。革伊王爵。弘晳豈竟不知。今敢遣人向地方官請託。此事斷難寬貸。著將弘晳。貝子都統。全行革退。仍交軍機大臣。會同宗人府議處。將此旨通行曉諭。嗣後務各凜遵。若似此濫行。斷不寬貸。○又諭曰。三法司題覆。直隸獲鹿縣民李三。邦年。因姦殺死伊妻李氏。並砍死伊嫂戎氏一案。按律定擬斬候。已依擬行矣。李三。邦年。因

伊妻李氏與人通姦懷孕。用刀砍死。復妄生猜疑。至伊兄李大邦年屋內。乘伊嫂戎氏卧炕立時砍斃。此等兇犯。地方官自應迅速審辦定擬。俾克頑知所懲創。乃此案該省自四十二年正月呈報。直至十月二十七日。始行審擬具題。雖本內聲明封印。及承審公出。監犯患病。各日期。而細覈案情。並非難辦。其為藉詞延玩。實屬顯然。向來審案定有展限日期。原因地方或有緊要公務。或案涉疑難。人

證不齊。未能速結者。准其於本內聲明免議。乃相沿日久。地方官恃有此例。既扣公出日期。又扣監犯病限。重疊聲請。冀圖延緩。該上司亦任其託故。不加督責。州縣公出尚有文報。日月可稽。至監犯患病。多有勒取醫生出結。隨詳具報。尤屬無憑稽覈。陋習如此。尚復成何治體。朕臨御四十餘年。於鉅細政務。勵精圖治。未嘗片刻自安。此中外大小臣工。皆所共悉。自應仰體朕意。各加整頓。何至任意

延擱。竟置公事於不問耶。外省此等積習。直隸如此。即各省皆所不免。著傳諭各督撫。嗣後辦理案件。務須督率屬員。振刷精神。一切案件。速行完結。毋得藉有扣限。託故稽延。將此通行飭諭。各督撫知之。至此案非尋常兇犯。又非難辦之案。乃恃限遲延。不可不示以懲儆。著將周元理。并承辦此案各官。一併交部議處。○諭軍機大臣等。誠親王弘暢奏。郭天玉控告伊弟貝子弘旰。昨莊頭盧密訛占旗地一案。交軍機大臣。會同刑部查審。究出弘旰差遣劉成泰。將盧密呈詞。送通永道衙門。該道宋英玉接收。隨批遵化州轉行玉田縣辦理。該縣金之忠。隨將盧密釋放等情具奏。披閱之下。深為駭異。直省為三輔近畿。所有王公大臣旗莊地畝。均坐落各該州縣地方。周元理身任總督。自應持正秉公。毫無瞻顧。遇有案件。董率屬員。據實審辦。其屬員內如有瞻徇私情。審辦不公。亦應據實查明。叅奏。

方無忝察吏之任。今宋英玉於盧密一案。竟敢公然受弘。昨囑託批准辦理。且以外省道員。公然與乾清門行走之貝子等。執手問好。周元理不可諉為不知。自當早行誠飭。俾屬員知所畏憚。乃竟毫無整飭。所謂察吏者。若何。若明知不辦。則其居心更不可問。直隸吏治廢弛。若此。周元理實難辭咎。著傳旨嚴行申飭。此案宋英玉已經革職治罪。周元理姑從寬免其深求。仍照例交部議處。嗣後如再

有似此案。件恐周元理不能當其咎也。將此傳諭知之。○又諭據姚立德奏河南祥符陳留蘭陽儀封考城等五汛隄工卑矮。應豫為籌辦。及早加高。約需土方價銀四萬兩。請於藩庫內撥用。勻作兩年。於河銀內照數扣還。歸款等語。自應如此辦理。著即於該省藩庫內撥銀四萬兩。督率河員。趕緊實力妥辦。但黃河水溜沙重。必須河底刷深。湍流暢駛。方不致沙停水緩。若僅將隄岸加高。不為疏刷。

深通。以致沙底停淤。日漸加長。則隄愈加。而河底亦隨之愈高。設遇盛漲陡發。稍有潰決。沿河一帶。為患轉甚。不可不豫為之計。著傳諭姚立德。一面將祥符等汛各隄。酌量加高。仍一面將河身淤淺處所。設法疏挑。務使大溜暢刷。一律深通。不致稍有淤墊。以為久遠安瀾之策。將此由四百里傳諭知之。仍將如何設法辦理情形。迅速覆奏。尋奏祥符等五汛隄工。因上年長水漫灘。灘地停淤。故較他

汛卑矮。自竭力疏濬以來。復築順隄河頭。革土夾壩。河流順軌。其淺處溜勢湍激。日漸寬深。無虞停滯。至加培隄工。當逐處履勘。期歸實用。報聞。○吏部議覆調任兩廣總督楊景素等奏稱。上林縣地方遼濶。徭徭錯居。請改為繁難苗疆調缺。該縣南境思隴驛地方。為解犯解餉。必經之地。請添設巡檢一員。裁事簡之。該縣甘蔗司巡檢移駐。作為苗疆調缺。其甘蔗原管地方。就近撥歸土田州州同兼

管俱應如所請從之。○五經博士周景濬病休。以其子附生邦泰襲職。○是月。湖南巡撫陳輝祖奏寶武局於乾隆三十七年以前。因修城建隄需項。節經加鑄充用。嗣因滇銅減買。遞壓卯期。復暫停加鑄。查該局額鑄二十座。今專辦正鑄。請減留十鑪。歸併辦理。至其配用鉛觔。向係黑白各半。而鑄錢未能如式。并請全用白鉛。其所餘黑鉛。楚省現有應補軍需鉛彈。即以此撥買補額。均有裨益。下部

書奏事

十一

知之。○河南巡撫鄭大進奏。三月初五六日。通省具報得雨。有二寸至五寸者。有至八九寸者。惟衛輝彰德開封及懷慶屬之修武原武武陟各縣尚未並霑。渥澤大勢山澤氣通。可望甘霖大沛。得旨。尚未得霑渥澤。為之塵念益切耳。○四川總督文綬提督明亮奏。兩金川辦理屯務。應撥雜谷兵戶赴屯墾種。其素有產業者。不免安土重遷。今查願往兵戶共一百五十戶。計男婦大小三百六十五名。現

擬分地安插。如小金川之大板昭丹札寨各五十戶。金川之卡卡角沈角溝各二十戶。卡爾金十戶。責成分駐員弁管轄。並給口糧籽種牛具。如例報聞。

書奏事

十一

大清高宗法天隆運至誠先覺體元立極敷文奮武孝慈神聖純皇帝實錄卷之一千五十三

大清高宗法天隆運至誠先覺體元立極敷文奮武孝慈神聖純皇帝實錄卷之一千五十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌夏四月辛卯朔享

實錄卷一千五百四

太廟遣誠親王弘暢恭代行禮○諭河南省開

封彭德衛輝懷慶河南五府屬今春雨澤愆

期節經降旨酌借口糧籽種并將本年地丁

錢糧及上年出借未完倉穀概予停緩又令

查明該五府極貧下戶加恩酌給月糧俾窮

黎不致失所現在該省設壇祈禱尚未據報

得有透雨朕心深為廕念因思清理庶獄亦

感召

天和之一端著該撫將開封等五府屬所有軍

流以下人犯查明分別減等發落其因事牽

連拘繫者亦即審明省釋至尋常案件並著

速為完結毋得稍有稽延以冀甘膏早沛該

部遵諭速行○又諭昨以兵部侍郎蔣元益

年已衰老降旨休致伊上年尚在江西學政

之任其年力如何該撫豈未深悉乃海成始

終並未據實陳明又如已故廣東學政湯先

甲從前未據該督撫奏及衰病情形直至伊

任滿進京慮其召對時經朕看出楊景素李

質穎始以一奏塞責可見外省督撫率以沽

名為念但知將該學政保奏堪用道府而於

其年老有疾不能勝任之處不肯秉公陳奏

殊屬非是海成楊景素李質穎俱著交部議

處○調正白旗蒙古都統邁拉遜為鑲藍旗

滿洲都統以宗人府右宗正豫親王修齡為

正白旗蒙古都統○壬辰諭軍機大臣等今

日福建漳州鎮總兵孫猛到京陛見朕因其

取道山東赴京於召對時詢以東省雨水情

形據稱。經過兗州各屬。至德州一帶。途次目擊麥苗待澤尚殷。大田亦未經播種等語。看來東省雨澤。究未霑足。國泰節次奏報得雨。不無粉飾。或雖經獲雨。而所報分寸。不盡確實。國泰身任封疆。當以民事為重。地方果有旱潦。自當據實陳告。豈可稍為隱飾。著傳諭國泰。即將該省各屬。現在曾否復得透雨。及大田曾否一律播種情形。均即據實詳悉覆奏。將此由四百里傳諭知之。○宗人府等衙門議奏。已故誠恪親王允祕。於盧密與郭天玉爭地涉訟一案。輒收受銀兩。地畝應照例追奪王爵。並將收受謝銀。差人囑託外官之已革貝子弘旰。照例圈禁。得旨。誠恪親王。已經薨逝。所議追奪王爵之處。著寬免。至誠親王弘暢。於郭天玉呈控盧密時。若不據實陳奏。或經他處告發。自應治以應得之罪。今弘暢據情入告。與兄弟不睦。本不相涉。且此案弘暢業有應賠之項。著加恩免其處分。弘旰

已經革去貝子。亦著加恩免其圈禁。○以浙江紹興協副將弓斯發為黃巖鎮總兵。○癸巳。

上還宮。○諭現在將屆夏令。京師尚未得有透雨。市間糧價。恐未免稍昂。自宜豫為籌畫。俾民食益加充裕。著照向例。於五城設廠酌撥米麥平糶。所有應辦事宜。著該部即速妥議具奏。○諭軍機大臣等。昨鄭大進來京。陛見召對時。詢問榮柱居官辦事如何。據奏。榮柱才具本優。操守亦謹。但恐少年時露高興。伊每加裁抑。望其成就等語。鄭大進據實陳奏。頗得大臣之體。朕深為嘉許。榮柱才具原可造就。所以不即用為巡撫者。原望其歷練成材。再加擢用。從前徐績在河南時。伊實未免高興。徐績亦意存遷就。不能董率訓誡。是以將伊改用侍郎。至榮柱係德福之子。伊見文綬之子。國泰擢任巡撫。未免心存希冀。豈知朕於用人之際。權衡高下一秉至公。不肯絲

毫假借。即國泰之用巡撫。亦因其近年辦事克勤。並非因有文綬顏面。至德福以資深年久。用為尚書。又豈肯因德福遂加恩其子乎。鄭大進此奏。實於榮柱有益。伊若能虛心受善。愈加勉勵。諸事謹飭。自能長受朕恩。若因此稍生嫌隙。則是自取咎戾。朕不能為榮柱寬也。將此傳諭榮柱。至鄭大進現在京師。並將此旨。交伊閱看。○又諭。向來京師市肆麥石。大半由豫東二省。商販前來。以資民食。今年河南山東二省。春膏未渥。麥收未免歉薄。恐北來販運。不能源源接濟。將來京師麥價。未免漸昂。自應豫為籌辦。因思盛京各府屬。本年雨水調勻。麥收自必豐稔。且彼處糧價。本視他省較賤。著傳諭弘晌等。酌量情形。採買二三十萬石。即由海道運至天津。屆期接運至京。以供平糶。俾市糧充裕。於民食更為有裨。再此項麥石。如現在該處時價。較往年採買定值畧昂。即不妨酌量稍增。不必用官

價抑買。此事即交弘晌喀爾宗義富察善三人。飭屬妥辦。毋致吏胥等從中滋弊。並將籌辦事宜。迅速覆奏。將此由四百里諭令知之。○旌表守正捐軀河南儀封縣民邱某妻高氏。○甲午。諭軍機大臣等。昨因京畿一帶麥苗望澤。糧價稍昂。降旨於五城設廠酌撥米麥平糶。並傳諭弘晌等於盛京各屬。採買麥石二三十萬。由海道運至天津。再行接運至京。以供平糶之用。但思奉天地方。雖素係市糧充裕。而現在新麥尚未登場。若一時採買過多。恐該處糧價漸次加昂。於閭閻口食。無妨礙。著再傳諭弘晌等。祇須採買十萬石。如該處市麥無多。著採買五萬石。如該處情形實有難辦。即不足五萬石。亦可務期迅速。由海道運至天津。交周元理接運至京。以供平糶。弘晌等即行督率妥辦。仍將如何籌辦緣由。先行迅速覆奏。併一面知會周元理豫備接運。將此由四百里諭令知之。○又諭前

因顏希深移咨滇省。以發往烏魯木齊土夷頭二三起。並無鎖鍊。滇楚二省各執一詞。現咨烏魯木齊辦事大臣。詢問該夷究係何處私開。咨覆辦理等語。經李侍堯據實具奏。已降旨將顏希深交部議處矣。昨鄭大進來京。陛見。伊前曾任黔省藩司。詢以滇楚彼此推諉緣由。據稱土夷前數起過黔時。因在場內監臨。未經目見。至第十一一起過省。業已出場。親往犒賞。目擊該土夷等俱係鎖項。惟婦女幼孩未鎖等語。滇省解送土夷。後起已加鎖鍊。則頭二三起之上鎖似非捏飾。顏希深果何所憑信。遽聽該道縣等一面之詞。遂以為夷人至境。並無鎖鍊耶。著再傳諭顏希深。即將當日如何查辦情形。據實覆奏。毋得稍有迴護掩飾。致干咎戾。○又諭前據李侍堯奏。滇省遷徙烏魯木齊土夷。沿途曾否上鎖緣由。經顏希深咨覆。以滇楚二省各執一詞。難於憑信。已咨烏魯木齊大臣。飭訊頭二三起

夷人究係何處私開鎖鍊。咨覆究辦等語。此案楚黔二省。果係該道縣等當面點交。其有無鎖鍊。無難立辨。何至日久更生枝節。彼此推諉。復經降旨將護貴東道吳光庭。辰沅道王鳴。及芷江縣知縣吳鏞。解任來京。交軍機大臣查審矣。至顏希深不能迅速查明。轉欲向無知土夷取供定案。尤屬不成政體。并令交部嚴加議處。索諾木策凌。接到楚省咨行。如已詢問該夷。即行據實覆奏。如尚未詢問。則該夷等本屬無庸鎖鍊之人。不必再行查詢。轉致驚疑。將此傳諭索諾木策凌知之。○又諭本年河南省。因春雨短少。恐麥收不無歉薄。業經疊降恩旨。倍加撫卹。因思直隸山東兩省。春膏亦未深透。未必能接濟河南。而陝西省。昨據畢沅奏稱。自二月至三月。屢得透雨。遠近普霑。是該處麥收。自必豐稔。陝西與河南接壤。且有黃河一水可通。若令陝省採買麥石。運赴河南。以濟民食。則市糧即可

充裕。且該省殷實之戶。自不致囤積居奇。勢必爭先出糶。豫省市價。自可漸平。此事著交畢沅。鄭大進。彼此會商妥辦。如果能以陝省之有餘。補河南之不足。於民間生計。大有裨益。將此由四百里傳諭畢沅等知之。并將如何會辦情形。一面辦理。一面迅速覆奏。○陝甘總督勒爾謹奏。甘省附近莊浪之連城。紅山。二土司。上年夏禾被旱。晚秋被霜。請照往年成例。借給籽種口糧。每糧一石。折銀一兩。於司庫建曠項下動支。於來年麥熟後分三年扣還。得旨允行。○是日起

天於

上以常雩祀

園丘齋戒三日。○乙未諭前以遼金元三史內人名字義多未妥協。因命編纂諸臣遵照同文韻統所載。詳加更正。蓋緣遼金元入主中國時。其人未盡通曉漢文。以致音同誤用。而後之為史者。既非本國人。更借不雅之字。以

寓其詆毀之私。是三史人名不可不亟為釐定。而昭大公之本意也。至本朝發祥定鼎以來。文武兼資。所有王公大臣。載在史冊。昭著耳目。人所共知。其命名之初。原係斟酌文義。清漢合宜。若必拘同文韻統所載。與遼金元史一體更改。將令前此諸臣傳之奕禩。莫辨誰何。而現在諸臣之名字。又斷不能盡改。若有改有不改。前後參差互異。轉不足以示來茲。著傳諭各館總裁等。嗣後所辦各書。如遇

本朝人名。第當詳考

實錄為準。不必另行譯改。其從前已經辦過各書。亦著一併更正。以昭畫一。○丙申

上詣

南郊齋宮齋宿。○陝甘總督勒爾謹奏。甘省出產官鹽。止有寧夏府屬之花馬小池。及鞏昌府屬之漳縣西和縣。每年出產。僅敷商人配引行銷。並無餘鹽。亦無肩挑背負貧民販賣餘鹽之事。其額銷官引者。止平涼慶陽寧夏

鞏昌秦州階州等屬其餘各屬民間所食多係土鹽間有買食夷鹽者皆因地處邊陲間閭貧苦兼之山路崎嶇若運銷官引脚費既重鹽價倍昂是以定例聽從民便積久遵行並無奸商販囤之事應仍循舊毋庸另為籌議下部知之○丁酉常雩祀天於

圜丘

上親詣行禮○幸圓明園○戊戌諭據巴延三

等奏訪獲舉人王爾揚所作李範墓誌於考字上擅用皇字實屬悖逆現派李永鄴等馳赴各犯家內逐細搜查即將該犯等押解來省嚴審定擬等語此係迂儒用古並非叛逆已於摺內批示矣皇考之字見於禮經屈原離騷及歐陽修瀧岡阡表俱曾用之在臣子尊君敬上之義固應迴避但迂腐無知泥於用古不得謂之叛逆至趙曠代為書寫厥咎更輕若本科會試中式亦不過於榜上扣除

今既未經取中下科仍可令其會試其李掄元更無論矣朕理事務得其平如王錫侯之實係叛逆斷不肯稍為寬縱若此事並非叛逆亦不肯漫無區別率予嚴懲此事竟可毋庸查辦將此通諭知之○諭軍機大臣曰王亶望奏三月分海塘沙水情形一摺并繪圖同進朕細加披閱現在潮勢逼近北岸塘外已不復有漲沙其自普兒兜以東俱係石塘斷不能下橋砌石朕南巡時屢經親臨閱視實非石塘所宜不得已築建柴塘保護然柴塘究不及石塘堅鞏倘有疎虞所係匪細不可不早為籌畫但潮信久不經由中壘其陰沙積久堅硬恐非急切所能衝刷閱圖中相近蜀山一帶陰沙潮退始見似其處漲沙尚嫩因用硃筆點誌兩處若照硃點起訖自東南至西北寬開引河一道似可令潮勢改趨久之或可冀漸刷老沙雖不能復中壘之舊而令潮漸南趨冀可北漲亦未可知自屬補

偏救弊之一法。但係就圖指示。難於懸定。著傳諭高晉。速赴浙江。會同該撫王亶望。親往相度。若果可行。即一面奏聞。一面施工趕辦。以待秋時大潮通行。即或工程稍大。需費較多。朕亦斷不靳惜。况柴塘終不足恃。倘有衝損。必致侵礙田廬。所費當更不止此。且民生利病所關。其輕重尤較然可見。又豈得不為權度乎。此旨著由五百里發往。諭令高晉及王亶望知之。仍即將查勘可否辦理情形。迅速由驛覆奏。尋奏。欽奉硃筆。點誌處所。自東南至西北。計長三千四百二十丈。挑挖試驗。漲沙嫩軟浮膩。難以施工。且海潮大溜。趨向西北。南邊漲沙。形勢不定。並無河頭。可以吸流導引。縱使開寬。潮過即淤。雖多費帑金。亦難見功效。批。既無法。祇可盡力保護柴塘耳。又奏。章家巷一帶老沙。海潮至此。為江流遶激。迴溜逼刷。老沙日就刷低。今於章字號至號字號。已新築柴工五百丈。尚未建簔。又潮

神廟前。自號字號至騰字號。長三百丈。漸次臨水。應趕築柴塘。以禦大汛。此八百丈。均應一律添建竹簔。并於柴塘西首。接盤柴裏頭一座。挑溜南趨。至安設竹簔。向以石塊擺砌。並無橋木關欄。承辦之員。有捐添橋木者。甚為有益。但橋木不能深釘。難望堅實。請於竹簔外。排列兩層橋木。簽釘到底。則簔不動搖。可保不致塌卸。得旨。此議是。應速行。○又諭。據王亶望覆奏。湖州府水利情形。必須疏濬。宣暢。若蒙親蒞指授。實該郡萬世之福。等語。前者南巡四次。俱未臨蒞湖州。今該郡水利。既關係兩郡農桑。疏導最為緊要。且據稱童叟就瞻情切。朕自當親臨閱視。以慰輿情。所有經由道路。即可照該撫所奏。辦理。其舟行緯道。止須畧為修整。沿途更不得稍事點綴。所有古蹟名勝。止須就其舊有規模。量加葺治。斷不可絲毫繁費。致涉浮華。該撫務須善體朕意。妥協經理。將此諭令王亶望知之。○

已亥。諭向來步軍統領衙門。設有協理刑名部臣一人。叅酌刑律。原以步軍統領。或從武職簡放。恐於一切刑名律例。未及周知。是以酌設協理大臣。以資叅覈。今步軍統領。均係朕簡用。部院內親信大臣。遇有刑名事件。皆能自辨。無所庸其叅酌。且協理所辨刑名。不過杖罪以下之稿。又大抵隨同畫諾。初未嘗置可否於其間。殊屬有名無實。嗣後步軍統領。有由都統。副都統等官簡放者。該部聲明。請旨簡派。其由尚書侍郎簡放者。即不必復派協理之員。所有原派之侍郎阿揚阿。即毋庸協理。著為令。○又諭據綽克托等奏。拜城回人呢雅斯。控告阿奇木伯克阿布都里提布。常與伊尋隙。并恃強索伊地畝。審明係呢雅斯挾嫌誣控。請將呢雅斯發往烟瘴地方充軍等語。回人呢雅斯。因該管阿奇木伯克催納正賦。輒敢捏詞控告。情殊可惡。著即發往廣東烟瘴地方充軍。交勒爾謹。小心遞解。

毋使脫逃。從前準部各城伯克。常有擾累屬下回衆之事。自準部投誠。朕即加恩。賞給伯克等養廉。倘伯克等不改舊習。一經告發。自應從重治罪。而屬下回衆挾嫌妄控。更不可不示以嚴懲。呢雅斯一案。因係初犯。如此完結。嗣後如再有似此者。該大臣審實。即擬死罪。請旨。在該處正法示衆。將此交綽克托等遵辦外。并通諭各城回衆知之。○庚子。諭京師及畿輔春膏未渥。昨雖有微雨。不成分寸。現在已交夏令。高下田畝。待澤維殷。朕心益增盼望。因思清理底獄。亦足感召天和。著刑部堂官。查明軍流以下等罪情節。分別減等發落。其因事牽涉。拘繫質訊者。亦速行訊明。省釋。至尋常案件。並著即為完結。毋得稽延留滯。直隸省並交周元理一體遵照查辦。該部即遵諭行。○又諭曰。國子監助教吳省蘭。助教銜張義年。學問尚優。且在四庫館校刊羣書。頗為得力。俱著加恩。准其與本

科中式舉人一體殿試。○又諭本年會試多士雲集觀光。其中龐眉皓首頗不乏人。且有齒躋耄耄。挾策偕來者。實為昇平人瑞。宜敷渥澤。用廣鴻庥。所有本年會試舉子內。九十以上之郭毓麟。著加恩賞給國子監司業職銜。其八十以上之魯道傳。鄭兆球。俱著加恩賞給翰林院檢討職銜。七十以上之石震。趙彥美。張廷謨。萬邦憲。朱鏡。俱著加恩賞給國子監學政職銜。俾耆儒膺秩。咸遂夙願。以慰其寒窗績學之志。○又諭據三寶奏請嗣後各直省士子有欲刊刻書籍者。先錄正副二本送本籍教官轉呈學政覈定。其書果無紕繆有裨世學者。方准刊行。倘不呈官覈定私行刊刻者。即無違礙字句。亦令地方官嚴行禁燬。如有誕妄不經之詞。即從重究治等語。所見非是不法書籍。有關世道人心。固應禁燬。然亦全在各督撫留心體察。嚴飭地方官實力訪查。無難淨盡。其有悖逆不法如蔡顯

王錫侯諸人有犯必懲。狂誕之徒。自亦稍知做畏。即或愍不畏死。妄刻流傳。而此等狂悖之人。為

天地所不容。斷無不自行敗露。原不必多為厲禁也。至海內操觚之士。著書立說。以抒夙學者。本不乏人。若如三寶所奏。必呈送教官轉呈學政覈定。始准刊行。竟似欲杜天下人刊書傳世之路。無此政體。且以其事責成教官。若輩未必果能勝任。兼恐不肖者藉端需索。轉滋紛擾。弊更無所底止。三寶此奏斷不可行。將此通諭知之。○江蘇巡撫楊魁奏。臣標左。右。二營及蘇州城守中。左。右。三營額設馬步守兵。遇有僉差。並無賞項。每於月餉內攤扣。未免拮据。查江陰縣官灘內有圍築成田者。三百二十三畝。水草灘二千六百九十五畝。零請給兵丁承領。召佃墾種。按例陞科。俾得藉需餘息。報聞。○辛丑訓正文體定制義七百字之限。諭曰。文以明道。自當以清真雅

正為宗。朕曾諄諄訓諭。而文風總未能醇。蓋非一朝一夕之故。本年會試。闈中進呈前十名卷。朕詳加披閱。文體較為純正。尚不失制義之本。發榜後。詢之大學士于敏中。據奏。近年風氣。喜為長篇。又多沿用墨卷。膚詞爛調。遂爾冗蔓浮華。即能文者。亦不免為趨向所累。等語。士子平日。當覃心經術。探討古文。及時文諸大家。以立其體。作文尤須體會儒先傳說。以闡發聖賢精蘊。獨出心裁。屏除習見。語其文自然合度。何必動輒千言。因陳不察耶。昔陸機云。要辭達而理舉。固無取乎冗長。韓愈云。惟陳言之務去。二語實文章之正鵠。士子宜深味乎其言。嗣後鄉會兩試。及學臣取士。每篇俱以七百字為率。違者不錄。其庸熟墨派。悉行剔除。又或過為新奇。墮入牛鬼蛇神惡道。尤在所澄汰。操觚者慎毋掉以輕心。司衡者各宜示以正軌。務期風會蒸蒸日上。以副朕崇雅黜浮之至意。將此通諭中外。

知之。○諭本日召見貴州布政使李本。據奏與總督李侍堯係屬叔姪。應否迴避等語。李侍堯係朕深知之人。辦事公正。斷不至因親族而有所瞻徇。且二人已出五服之外。李本著不必迴避。該部知道。○諭軍機大臣等前曾恭送

五朝實錄並

玉牒至盛京尊藏。向於正殿後建有敬典崇謨二閣。原為留都金匱石室之儲。頃詢之德保知

實錄尊藏鳳凰閣

玉牒則在敬典閣陳貯。而崇謨閣現在空閒。與建閣命名之義。殊未相稱。著傳諭弘晌。將崇謨閣上。悉心相度。如制尚寬廣。可容書厨排列。即敬移

五朝實錄。至彼尊藏。方為允協。或同藏或分代恭貯。皆可。至

玉牒。每十年一次修葺。告成即應續送。將來積

久愈多。或敬典閣不敷存貯。即於鳳凰閣均勻收藏。亦無不可。再敬典崇謨二閣及頤和迪光等殿。係乾隆幾年創建。盛京自有檔冊可稽。并著弘昉。即行查明。一併覆奏。將此由四百里諭令知之。○旌表守正捐軀直隸安肅縣民王某妻史氏。○壬寅。諭豫省自去秋至今雨澤稀少。現在已交夏令。即甘霖早晚霑濡。止可趕種秋稼。二麥已難望有收。業經疊沛恩施。令該撫等加意撫卹。但被旱畧久。民食未免稍艱。其開封等五府。應徵本年錢糧。雖經降旨停緩。但秋後仍須輸納。民力究不免拮据。莫若將該省乾隆四十五年輪免錢糧。即於本年先行蠲免。其迤南各府州。現已徵收者。即作為明年正供。在被旱之五府屬。貧黎既得免追呼。即有收之各府屬。亦可以其有餘。供款區糴買。以資接濟。該撫務董率所屬實心經理。毋使吏胥從中滋弊。以副朕軫念民生之至意。該部即遵諭行。○又諭

河南城守尉官兵月糧。向係粟米粳米。半本半折兼放。現在開封各府。尚未得雨。米價自必稍昂。所有粟米折價。恐兵丁不敷買食。著加恩將城守尉官兵。應得半年折色粟米。自本年五月為始。按月支給本色粟米。即於開封府所屬州縣常漕穀石內。勻派碾運支放。俾兵食益為充裕。以示體卹。該部遵諭即行。○諭軍機大臣曰。德保奏三月二十四日起連日東北暴風。水勢兜阻。致彭家馬頭。清黃交匯處所。長有嫩淤一道。斜亘河中。幫船淺阻。臣馳赴河干查看。該處水深僅八九寸。糧船難以挽渡。迤上之高家馬頭。水深一尺七八寸。至二尺一二寸不等。水流平緩。現經河臣派員趕做柴枕夾壩。兜水逼溜。以刷淤沙。并派兵夫。儘力撈挖。今糧船即由高家馬頭渡黃等語。自應如此辦理。彭家馬頭。係新移之清黃交匯處。今忽長有嫩淤。其迤上之高家馬頭。自與清口相近。該處水亦不深。恐於

清口及新開引河有礙。深為厯念。著傳諭薩載。即速查明該處現在情形。迅速由驛據實覆奏。如有應隨時經理者。尤須上緊籌辦。毋稍遲誤。將此由五百里傳諭薩載。并諭高晉德保。知之。○又諭本日據國泰奏。山東於初八日。省城得有透雨。又古北口提督長清。亦報得雨深透。昨鄭大進奏。初九日行至柏鄉。遇雨。勢頗霑足。各等情。看來近省得雨處多。氣已通透。河南與山東并直隸之柏鄉相距不遠。初八。九日。是否一律得雨之處。未據該撫等奏聞。著傳旨詢問鄭大進。榮柱。迅速據實覆奏。以慰厯念。將此由五百里傳諭知之。○癸卯。予故和碩肅親王蘊著祭葬。如例。謚曰勤。○甲辰。諭軍機大臣等。昨據德保奏。彭家馬頭清黃交匯處。長有嫩沙。其迤上之高家馬頭。水亦止有二尺許等語。清黃交匯處。長有嫩沙。其迤上河水亦淺。恐於清口及新開引河有礙。已傳諭訊問薩載。令其速行查

明奏聞。今薩載奏到之摺。大概與德保所奏相同。但據稱上下測探。至惠濟祠下。清水現在不能暢出。恐有此一阻。黃水又復入運。深為厯念。至所奏已將清口東壩接築三丈。使清水出口有力。藉以攻沙。自應如此辦理。其高家馬頭淺處。築做柴枕土壩。逼溜刷沙之處。做法如何。未能深悉。著薩載。即速繪圖呈覽。至高家馬頭一帶。疏挑曾否深通。及清水曾否暢出。所長嫩淤。曾否刷淨。並著薩載。即將實在情形。迅速由驛覆奏。此旨著由五百里傳諭薩載。並令高晉知之。○軍機大臣等奏會試試卷。卷紙澆薄。及將試卷送給親朋。未經取價。其辦理不善之提調郎中陳其煨。主事李漱芳。請交部察議。得旨。知道了。其請將提調陳其煨。李漱芳。交部察議之處。固屬應得處分。但禮部官曹閒冷。三年辦理會試一次。員役人等。藉此稍露餘潤。亦情理所有。况每科會試。動用官帑甚多。宜在此些微卷

價斤斤計較耶。陳其煥李淑芳著加恩免其處分。○軍機大臣等議覆。荆州將軍興兆。湖廣總督三寶奏稱。向來荆州滿營馬匹倒斃。例無報銷。惟准借公項銀。令本兵自行買補。分月扣還。現在遵照乾隆三十五年戶部酌定之例。每馬一匹。借銀八兩。定為二十四個月扣還。合之此時馬價。實屬不敷。至修理兵房。製辦軍器等事。每因庫存銀少。不能動借。請於藩庫內撥銀存旗。並將原定借過三次。未經扣完。不准再借之例。稍為變通等語。應如所請。准其於湖北藩庫內撥銀二萬四千兩。解交荆州將軍。除官兵引見出差。修理兵房。製造軍器等事。仍照舊例借給外。其買補馬匹銀兩。每匹借銀十二兩。分作三十個月扣還。并於借過三次後。如有扣還過三分之一者。仍准再行酌借。從之。○又議覆。興兆三寶奏稱。荆州產馬甚少。價值昂貴。兵丁每年借項買補。銀數不敷。日形支絀。且楚省並非

產馬之區。間有孳畜。身小力單。僅可供農莊任載。於營伍乘騎。究屬非宜。請嗣後除於本地選骨格壯大者。酌量採買。仍間一年。借動公項。派員赴部領票。出口購買。應如所請。從之。○又議覆。知貢舉禮部左侍郎謝墉所奏。科場分卷事宜。及禮部堂官議駁之處。臣等公同酌議。謝墉場內所造之冊。至字幾號。公字幾號。止載某省若干卷。原非細註各卷紅號。並無錯誤。惟欲裁去內收掌一節。必不可行。應照禮部所議辦理。其各省均勻配搭。及各房迴避卷。由至公堂。分為十八束。送內簾掣簽分閱。上年奏准有案。自應遵照奉行。再順天鄉試。人數較多。向止一人收掌。未免竭蹶。請嗣後照會試例。添設收掌一員。從之。乙巳。

上詣黑龍潭祈雨。○諭軍機大臣等。京師於本月十三日酉刻。得有陣雨。約計二寸。雖未優霈。但此時雲勢頗濃。近畿似亦應一律霑潤。

前初九日京師得雨。不成分寸。周元理。即於初十日奏到得雨一寸。何以此次未見奏報。朕心深為廕念。著傳諭周元理。將省城及各屬。曾否得雨之處。迅速奏聞。以慰懸注。旌表守正捐軀山東荷澤縣民王某女王氏。

實錄卷一〇五五

一

大清高宗法天隆運至誠先覺體元立極敷文奮武孝慈神聖純皇帝實錄卷之一千五十四

大清高宗法天隆運至誠先覺體元立極敷文奮武孝慈神聖純皇帝實錄卷之一千五十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉  
敕修

乾隆四十三年戊戌四月丙午諭向來旗丁

餘米准在通州變賣以資日用現在糧艘已陸續抵通旗丁於兌足正供之外尚有多餘米石其有情愿出售者仍著加恩准其在通糶賣在旗丁等既所樂從而近畿地方糧石益充於市價民食均為有益該部即遵諭行  
又諭曰高樸等奏報阿奇木伯克貝勒職銜鄂對於三月二十一日病故鄂對於平定回疆之前即來投降又曾隨將軍大臣等在軍前出力茲聞溘逝朕心深為憫惻著加恩

由該處賞給銀三百兩。其貝勒職銜。即令伊子鄂斯瑞承襲。所遺葉爾羌阿奇木伯克員缺。著色提巴爾第調補。喀什噶爾阿奇木伯克員缺。著鄂斯瑞調補。阿克蘇阿奇木伯克員缺。著交綽克托等。另行選人。奏請補放。再色提巴爾第移往葉爾羌。鄂斯瑞移往喀什噶爾。不無費用。著加恩由該處各賞銀一百兩。○諭軍機大臣等。前據索興阿奏開原縣倉廩內有三十五間。全行倒塌。所貯米石。率

多霉爛一案。已諭令將米石數目查明。著落富察善名下賠完。並令將辦理怠緩緣由。據實明白回奏。今據富察善等奏稱。此項倉廩。係三十六年間坍塌。該縣詳請修建。經前任兼管府尹雅德等委勘。分別緩急。因所估工料浮多。駁飭覈減。未及興修。四十一年。該縣明亮。又同元字一號等倉。詳請修建。富察善復經駁飭減估等語。是該處初報應修倉廩。尚係雅德任內之事。雅德既延緩於前。富察

善復遲誤於後。均難辭咎。所有徵變米石。自應著落雅德、富察善二人。照數分賠。方為允當。其明通所請一同賠補之處。可以不必。至該縣詳請應修廩座六十八間。今據奏明併修二十間。則所餘四十八間物料。即添補修理。所餘諒復不少。自應將現修廩座。添用舊料若干。酌量取用外。其餘木植磚瓦等項。逐一查明細數。交該地方官收貯。以備將來或有添建工程之用。倘不詳細查覈。致任意散

失。舊料無存。惟於富察善、明通是問。恐伊等不能當其咎也。將此諭令富察善、明通。并諭雅德知之。○又諭據西平奏。南糧頭進幫船。已於四月初九日。全過濟寧天井開北上等語。開內之水。上下啟閉節宣。自足資浮送。至出開以後。向有古淺數處。每多梗阻。昨據巡漕給事中陳鴻寶奏稱。河南、山東本年水勢微弱。東省糧艘經由之地。如張家窩、王家淺、狐仙莊、朱家園及甲馬營、爛泥淺、頭望等處。

俱有淺阻。現經管轄河道大員。親詣查勘。董率辦理等語。是現在水淺。必須妥辦。可知著姚立德。即速督率河員。上緊挑挖。勿使漕船稍有阻滯。其有應派用夫役幫挑之處。並著國泰嚴飭沿河各員。實力協辦。毋得稍存歧視。再臨清以北運河。全藉衛河之水。豫省自去秋至今缺雨。衛河上源。本不能充足。該處向有閒座。閒之即留為灌田。啟之即可以濟。運前歲運河水淺。曾經辦及。今正當望雨之

時。灌溉民田。自屬緊要。但運河或果淺涸。亦不可不稍為接濟。此時如即得透雨。水泉自當旺盛。即可毋庸再辦。設或運河尚未能充。不可不速為熟籌。使兩無妨礙。著姚立德。鄭大進。迅即會商妥辦。期於轉漕溉田。均有利益。將此由六百里一併傳諭知之。仍即將查辦情形。迅速覆奏。尋姚立德奏。臣昨在豫。委員分赴百門泉。九道堰。高平閒。各處。將渠道淤淺。及草根盤結處所。多集人夫。撈挖芟除。

水勢旋長尺餘。又委運河道章務。赴張家窪等處。趲築草壩。束水逼溜。頗見功效。至衛河建閘築渠。漕農交賴。定例二日濟運。一日灌田。互相啟閉。現在彰衛懷一帶。久旱之際。民間需水灌田甚亟。臣已札會河南撫臣鄭大進。轉飭河北道陳錫鉞。親督廳汛。在山泉淺溢阻礙處。加意挖挑。俾泉水源源不竭。以資接濟。其民間灌田日期。悉仍其舊。批。此舉甚當。實力為之。又奏。南漕幫船。截至四月初三

日。共入東境三十一幫。已催過濟寧者二十九幫。自初四以後。無船入東境。臣現飛咨漕臣。及江南河臣。嚴行催趲。開河水勢。因汶泗泉源微細。開壩時。即宣放湖水接濟。第風多雨少。不免日有消耗。向係一幫到齊。即啟板放行。今酌將船少之幫。或二幫。或三幫。併塘啟放。約以一百隻上下為度。撙節水勢。俾全漕足資浮送。得旨。甚是。具見留心。又鄭大進奏。前准河臣姚立德咨稱。委員赴百門泉等

處查勘等語。臣現在復飭河北道陳錫鉞。馳赴各該處。督率員弁。上緊疏導。其民堰民渠。并加意宣洩。勿令顧此失彼。得旨。覽。○又諭曰。鄭大進奏彰德。衛輝。懷慶。三府。得雨最渥。現俱趕種棉花高粱。其衛輝。懷慶。二屬窪地。亦十種二三等語。窪地僅種十之二三。其未能霑足可知。至所稱麥田自得雨之後。已在改觀。尤為未確。豫省自去秋缺雨。種麥本自無多。間有得雨之處。趕種者亦少。現在之

雨。又未深透。焉得即能改觀。鄭大進斷不可因此稍存自滿。務須上緊虔誠祈禱。以期膏澤渥霑。庶於大田有益。看來豫省被災較重。鄭大進務當實力籌辦。俾貧民不致失所。昨因開封等五屬。上年歉收。今又短雨。間閭口食。未免拮据。即緩徵亦不足以紓民力。曾降旨將河南省輪免錢糧。移於本年全行蠲免。使歉區得免追呼。即有收者。亦得分其有餘糶售。接濟本省。於災後民情。自有裨益。該撫

於奉到時。即速騰黃曉諭。俾百姓聞知。皆各歡欣鼓舞。亦可感召和甘。該撫即當董率所屬實力奉行。仍將曾否得雨情形。迅速覆奏。以慰懸注。將此由六百里傳諭知之。○又諭據國泰續奏。四月初八。初九兩日。濟東泰武。兗沂曹青等府屬。濟寧臨清。二州屬。共六十三州縣。又據續報七州縣。各得雨二寸至八寸不等。其餘雖未據報齊。查雨勢自南而北。為時頗久。省西各屬。均可普被等語。覽奏稍

為欣慰。已於摺內批示。東省雖得此雨澤。但所報分寸。尚未能一律深透。國泰此時。切不可存絲毫滿足之念。仍須督率各屬。虔誠祈禱。以期續沛甘霖。通省霑足。庶於秋禾有益。至得雨分寸較少之各屬。如有應緩應借。設法辦理之處。亦即悉心籌畫。務使窮黎口食。不至拮据。以副朕軫念之意。仍將各屬得雨後情形。并如何設法辦理緣由。詳悉速奏。將此由六百里傳諭知之。○又諭據李侍堯奏。

查審原任劍川州知州嵇承豫將應找加增腳價銀兩代逃亡運戶買米補運應照收支挪移律問擬杖流。照雜犯總徒一摺已批該部議奏矣。細閱案情此項腳價嵇承豫因糧石業經運竣所領銀兩尚存未發適遇尹天喜等誤運各戶逃亡無著因即將扣存之項挪墊買米雇腳補運是嵇承豫並未侵欺入己且以公辦公尚能用心籌畫如嵇承豫於未發覺之先即如此辦理自未便以挪移科

罪。若此項銀兩嵇承豫先已扣留入己後聞有人告發始借挪墊買米雇腳補運名色以掩其侵隱短發之弊是即先侵後吐其罪又不止總徒此等緊要情節自應詳悉查覈李侍堯平日辦事尚屬公正自不肯稍存遷就了事之見但摺內案情未經逐細聲明難以遽成信讞著傳諭李侍堯即將指出之處逐一據實覆奏此摺交軍機處暫存俟李侍堯覆奏到日再降諭旨交部。○戶部議覆湖廣

總督三寶奏稱遠安等十三州縣買貯穀七萬二百七十五石零無倉存貯請添建倉廩七十四間應如所請從之。○旌表守正捐軀湖北孝感縣民徐相朝妻劉氏。○丁未孝端文皇后忌辰遣官祭

昭陵。○諭軍機大臣等據畢沅覆奏先於附近水次州縣常平倉內酌撥麥十萬石由渭入河運往河南惟所經之陝州境內有三門山為舟行最險之地重運難通一面飛移河南

撫臣鄭大進即速酌定應於何處交兌另派接運之員豫備車輛船隻齊集水次隨到隨運以免稽遲等語所辦甚為詳妥已於摺內批示矣京師自三月至今未得透雨二麥難望有收市中麵價漸次昂貴是以四月初即降旨將倉貯麥石於五城設廠平糶以裕民食每日需麥較多各倉現有之麥尚不敷用今畢沅既稱如豫省尚須接濟俟鄭大進移會再需撥運若干即酌籌陸續運往是陝省

常平倉所貯麥石尚屬有餘。著傳諭畢沅。於此項麥石內酌撥五萬石。由河南水程轉運京城。以備平糶之用。如不能五萬石。即三二萬石亦可。其三門山避險接運。及由河南水程派員運送進京之處。並著鄭大進妥協籌辦。至畢沅籌撥運京麥石。尚需時日。其所撥豫省麥石。現已派員起運。到豫自速。而豫省歉區所需之麥。本係陸續接濟。並非一時全用十萬石之多。著傳諭鄭大進。於運豫已到

麥石內先撥一萬石。派員由水程運京。俟陝省運京麥石到豫後。如數扣還。仍將所餘應行運京之麥。即速陸續運送來京備用。此旨著由五百里發往。傳諭知之。並著畢沅鄭大進。一面妥辦。一面迅速覆奏。○戊申。

上御演武廳閱火器營操。○己酉。

上御勤政殿聽政。○諭京師春膏未渥。入夏以來。雖曾得雨。尚未霑濡。現在農田待澤甚殷。朕心益深廕念。宜申虔禱。以迓甘霖。著禮部

即速查照定例敬謹舉行。○又諭據雅德奏。色提巴爾第報稱。回人向例每年應納普爾。俱按月交納。如遇閏月。即不呈交。請將本年閏六月分應納普爾。仍行交納等語。喀什噶爾回人等向來按月交納普爾。閏月亦仍應呈交。歷任阿奇木伯克等並未報明。私行侵蝕。色提巴爾第甫至喀什噶爾。即能查出。據實呈報。甚屬可嘉。著加恩賞緞四匹。即在該處存貯緞內賞給。從前未曾報明之伯克等。

本應治其侵蝕之罪。但事屬既往。姑從寬免。喀什噶爾既有此弊。恐他處亦然。著傳諭綽克托。將葉爾羌和闐阿克蘇烏什等城。有無此等情弊。查明妥辦。昨已派永貴前往更換綽克托。永貴初至該處。諸事不能深知。著將此旨速即行知。綽克托伊若尚未起程。即行遵辦。如已起程。在路接奉此旨。仍即回烏什。將此事辦完後。再起程來京。○諭軍機大臣等。據薩載奏。彭家馬頭一帶嫩淤。與陶莊新

河及清口。並無妨礙情形。一摺覽奏稍為慰懷。已於摺內批示。閱進到河圖順黃壩內。現在雖已填土。但所填止就河形寬窄而止。尚餘壩身一段。未經填實。仍恐不免單薄。因用硃筆畫記一道。自界壩斜抵順黃壩尾。若於此內一律填土。庶更為穩固。著高晉薩載。即悉心妥辦覆奏。至彭家馬頭一帶嫩淤。雖與新河清口無礙。但清黃交匯之處。河身兩旁俱有新淤。每行實多阻滯。而目下清水勢又不壯。不能即資其衝刷。且所挑新泓尚未寬深。現在正當重運北上之時。渡河最關緊要。因於兩邊嫩淤。用硃筆點誌四處。薩載務須董率廳營各員。多集兵夫。上緊撈挖。將硃點處所有嫩淤。速行挖淨。俾河流仍前疏通。方為妥協。其挖出之土。即可用小船裝載。就近於河內運抵界壩。以為順黃壩內應添填土之用。薩載務須迅速實力妥辦。以慰注念。將此由六百里傳諭薩載。即將作何籌辦之處。

及現在河淤曾否刷動。糧船能否無阻。各情形。即速由驛覆奏。並諭令高晉知之。尋薩載奏老灘上土隄。僅寬三丈。誠如聖諭。不免單薄。臣欽遵硃筆畫記處。自界壩斜抵順黃壩尾。添築撐隄一道。即遇異漲。有此重門保障。更可放心。再高家馬頭。河泓寬十七八丈。至二十餘丈。深三尺二三寸至四五尺不等。漕船量為起剝。即可挽渡。自十八日至二十二日。渡黃船又有二百六十五隻。過行無阻。目下糧船北上。關係緊要。臣惟有督率道將營弁。實力撈挖。以冀逐漸刷動。報聞。○命武英殿大學士阿桂。協辦大學士吏部尚書程景伊。內閣學士胡高望。署吏部左侍郎董誥。戶部尚書梁國治。兵部尚書蔡新。工部尚書嵇璜。都察院左副都御史覺羅巴彥學。為殿試讀卷官。○庚戌。諭據嵩椿等奏。駐防隨印筆帖式存住。告假在報恩寺養病。旋即私逃等語。報恩寺在江寧城外。距城甚遠。駐防兵丁。

偶因有事出城。原不禁止。然豈有離城住寺之理。今存住告假出城。住報恩寺。輒爾私逃。該管將軍。副都統等。漫無管束。所司何事。除將存住。交各處嚴拏辦理外。其嵩椿圖桑阿。及該管各官。俱交部分別察議。江寧既有此事。別省亦恐不免。著交各處將軍大臣等。不時嚴查禁止。倘敢視為具文。一經發覺。必將該將軍大臣官員等。一併治罪。○辛亥。策試天下貢士。繆祖培等一百五十五人於太和殿前。制曰。朕祇承鴻緒。兢兢業業。不遑康寧。深維元后之責。思所以會歸皇極。敷錫黎庶。以承

天庥。夙夜寅畏。日慎一日。四十三年於茲矣。凜茲保泰。佇爾嘉謨。其敬聆諮問。治法莫盛於唐虞。史叙堯勲。時雍於變。舜命司徒。敬敷五教。夫教民以實。不以名。惟在督撫大吏。董率屬員。實力化導。使百姓遠善遠罪。以無忝父母斯民之任。今欲使士敦廉讓。民知禮教。愚

蒙者咸識綱常。頑悍者潛消獷戾。以庶幾一道同風之盛。其何道之從歟。且士者。民之望也。化民者。先訓士。士之學問。純繆。學臣得以文黜之行止。頗僻。有司得以法糾之。至於聚徒講學。漸成門戶。始於驚虛名。終於受實害。如東漢唐宋黨禁。以及明之東林。其已事也。今將使學者。篤潛修而杜私黨。其何以勸迪之歟。今政治昌明。士風丕變。自愛者未必至此。然杜弊者。先於未萌。識微者。防其漸致。其

又何以豫絕之歟。前言往行。悉載於書。自周有柱下史。漢魏有石渠東觀。以至甲乙丙丁之部。七畧七錄之遺。代有藏書。孰孰傳。孰優孰劣。可約畧指數歟。乃者。命儒臣輯四庫全書。搜訪校讐。亦云勤矣。而網羅猶有放失。魯魚猶有譌舛。何歟。國家重熙累洽。都邑蕃昌。人民和樂。由儉入奢。勢固然也。會典通禮。所以別貴賤。辨等威。防奢僭。顧服食之違制。得以法繩之。人工物力之糜費。不能以法繩

也賓祭之過侈。得以禮節之。飲食器用之瑣屑。不能以禮節也。使事事為之厲禁。則擾聽其紛華。以耗本業。又豈藏富之道乎。其何以還淳返樸。用有節而民不煩。事有制而法可久歟。爾多士稽古力學。於學問之要。政治之本。講求熟矣。其籌之策之。引之伸之。推之古昔。證之當今。悉言無隱。朕將親覽焉。○諭前因河南開封等五府屬雨澤愆期。麥田被旱。曾降旨將該五府屬軍流以下人犯分別減等發落。以冀仰邀

天澤。但思歸德陳州等府。雖先後據報得雨。其餘各府州屬。尚未普霑。且同在一省之中。思宜徧逮。著該撫查明河南通省軍流以下等罪一體分別減等發落。其因事牽涉拘繫質訊者。亦速行訊明省釋。至尋常案件。並著即為完結。俾庶獄無滯。速召和甘。該部遵諭即行。○諭軍機大臣等。本日戶部查奏鑑海呈控直隸昌黎縣監生李維昭拖欠租銀。偷典

地畝一案。據稱提訊李維昭等供明拖欠租銀。前在直隸委員知州王述曾會審時。供認屬實。偷典地畝一節。亦當經各地戶將偷典實情供明。並呈出典契。經該州等將典契收去。并將據實供出之地戶張佩紳掌嘴等語。此等情節。既據地戶供明。該委員正當從此據實根究。徹底查辦。何以轉將典契收去。并將張佩紳掌責。殊不可解。其為有心袒庇李維昭已屬顯然。業經降旨將王述曾革職。交

刑部治罪矣。王述曾於此等部駁案件。任情袒庇。該督何以率行轉咨。並不查明參奏。看來直隸吏治廢弛已久。身任封疆者。自應隨時隨事。痛加整飭。力挽頹風。不意聽屬員等朦混。若此。周元理所司何事。著傳旨申飭。所有戶部奏摺。并著鈔錄。照朕折角處折出。寄令閱看。○又諭據鄭大進奏。此次雨澤通省已有數十州縣。同日並被。過此當邀甘霖之需等語。現在盼雨正殷。而豫省為尤甚。朕宵

肝焦勞日甚一日該撫斷不可因種秋為時尚遠遽存自寬之心已於摺內批示矣現又因該撫奏報陳州府屬之西華等四縣並許汝二州均未得有透雨已明降諭旨將河南全省軍流以下人犯一體分別減等著傳諭鄭大進務即實力妥辦俾庶獄無滯以期感召和甘仍率屬誠心祈禱並將現在該省雨澤曾否普遍霑透之處迅速由驛覆奏○壬子諭山東省歷城章邱等十九州縣因上年

雨澤稀少秋收款簿已降旨將該州縣應徵錢糧緩至麥熟後徵收第念歉收各處口食稍艱若於麥收後即令輸將未免尚形踟躕又范縣夏津二縣現在尚未得有透雨著加恩將歷城等十九州縣及范縣夏津二縣所有應徵新舊錢糧俱緩至本年秋後啟徵以紓民力該撫務董率所屬悉心經理以副朕軫念貧民至意該部即遵諭行○又諭前因福建漳州鎮總兵顏鳴臯來京陛見朕見其

精神頹惰兼有衰病情形恐於漳州要鎮不宜因令汀州鎮總兵孫猛與之對調並諭鐘音留心體察如該鎮調任後衰病日增即據實奏請勒休今據鐘音奏稱該鎮回閩到省見其精神舉動較前迴殊聽其言語聲音亦不能清亮實係染患風痰所致請旨勒休等語顏鳴臯春間來京陛見時朕細加體察其衰病情形似非一時染患該督若早經據實奏聞自可信其秉公辦理今鐘音此招不過

因傳旨詢問始以一奏塞責轉屬未可憑信顏鳴臯著解任其汀州鎮總兵員缺著武隆阿補授如該鎮尚不服老即令來京赴兵部具呈帶領引見再降諭旨○諭軍機大臣等前因京畿一帶麥苗待澤糧價稍昂降旨令五城設廠平糶并傳諭弘昫等於各屬酌量採買麥石由海道運至天津接運到京以供平糶之用茲據弘昫等奏盛京本城止可採買七千餘石其餘各屬俟查覆到日再酌定

採買數目具奏等語。盛京地方市糧雖素稱饒足。而種麥者較少於各種米糧。恐一時採買過多。麥價或漸至騰貴。且今年秋間尚須巡幸該處。其間閭口食不可不令較為充裕。至京城平糶之用。昨已諭令畢沅於常平餘麥內酌撥五萬石。由河南水路轉運到京。是各廠備糶麥石可無需盛京多撥。著傳諭弘昫等。如採買不甚費力。價值不致驟昂。即購辦一二萬石運京。若辦理稍覺竭蹶。止將現在採買之七千餘石。即派員由海船運送。一面知會周元理。委員接運送京。將此由四百里傳諭弘昫等。并令周元理知之。○又諭據薩載奏。黃河改從陶莊繞北下注。向東直趨距清口東西壩已遠。是以此番雖遇連日東北大風。黃水不過抵至柳園頭而止。不但未曾入運。亦未漾至惠濟祠地方等語。覽奏稍為慰懷。若非前年諭令疏挑新河。俾黃水正溜繞北東注。此番東北大風。黃水不但倒漾。

且必致入運。是先事豫籌。已有成效矣。至所稱目下出口之水尚未暢達。僅能刷出河泓所長嫩沙。未能即時刷淨。須俟淮水長發。暢流下注。自可全行刷除等語。淮水長發。難以豫期。時日恐不足恃。現在正當重運北上。不宜稍有阻滯。且高家馬頭一帶所長之淤。及其尚嫩時。加工挑挖。亦易於為力。著傳諭薩載。即遵前次發去圖內。硃筆點誌四處。董率廳營各員。多集兵夫。將嫩淤速行挖淨。俾河流疏暢。并可將挖出之土。由河內船運至順黃壩根。以為壩內填土之用。即或用帑稍多。亦不致如前歲開挑引河之費。并可令無業貧民藉資餬口。亦以工代賑之意。將此由五百里發往。並諭高晉知之。○又諭據國泰奏。臨清以北向多古淺。本年河水更覺淺弱。先已檄飭地方官。各將境內古淺爬挖浮沙。使中泓足以行船。又飭多雇民夫。並豫備起剝視古淺之長短。路長者多備剝船。路短者間

用小車。俾船輕可以涉淺等語。自應如此辦理。今年豫省雨少。衛河水勢稍弱。前雖諭令姚立德。鄭大進。會同妥商。於上源啟閘接濟。尚恐閘內之水。正藉灌田。未必果能分以濟運。而臨清以北。古淺甚多。不可不設法儘力挑挖。且隨挖隨淺之處。幫船重滯。起剝勢所不免。國泰因路之長短。分用剝船小車。所辦固好。但輾轉剝運。尚恐照料未周。致有拋撒。該撫務須派委妥員。於起剝處。留心經理。勿

致損耗米糧。方為妥善。將此由四百里傳諭國泰。並令鄂寶。姚立德。知之。○又諭曰。王亶望奏。嶧縣民人王開經等。拖欠錢糧。因典史何光曙帶同書役。前往查催。該犯輒將差役毆打。知縣吳士映。聞信親往查拏。王開經復敢糾集多人。將該縣毆辱。現在將已獲各犯供出之人。按名拏獲等語。同日并據李杰龍奏報。帶同遊守等。星往協拏。將陸續拏獲各犯。交司道查辦各等語。李杰龍聞有糾眾毆

官之事。即帶同兵弁。前往協拏。甚屬可嘉。已於摺內批示矣。至該犯王開經。於應徵錢糧。抗不完納。及該縣親往查辦。復敢糾集至五十餘人之多。肆行毆辱。實屬不法。已極。不可不大為懲創。以警悍俗。而遏刁風。著傳諭王亶望。即速率同司道等。詳悉嚴訊。將該犯等。如何起意糾眾拒捕。及何人同謀助惡。並現獲各犯外。尚有無未獲之犯。各情節。徹底根究。毋致有一人漏網。並著於定案時。從重多

辦數人。毋得稍存姑息之見。將此諭令該撫。并令李杰龍知之。○刑部議覆。湖北巡撫陳輝祖奏。已經秋審。緩決人犯。情罪無可更定者。下屆即叙由詳報。停其再解等語。查緩決一次之犯。不復入於情實。與臣部三十四年奏准九卿朝審會鞠一次。下屆不復提審之例相符。應如所請。從之。○旌表守正捐軀山西定襄縣民梁君賜妻崔氏。○癸丑。諭。向例戶部三庫官員缺出。俱由六部各衙門保送

人員帶領引見候朕簡放乃近年來遇有缺出該管大臣等往往指名特保與例不符嗣後仍著照例由各衙門保送帶領引見毋得指名特保 甲寅

上還宮 御養心殿召讀卷官入親閱定進呈十卷甲第 乙卯

上御太和殿傳臚賜一甲戴衢亨蔡廷衡孫希旦三人進士及第二甲邵自昌等五十一人進士出身三甲李鼎元等一百三人同進士

出身 辛圓明園 丙辰直隸總督周元理疏報民人曹丙照認採廟兒梁官山煤窰曹高義認採大吉口北溝官山煤窰現俱煤旺窰成請准其認充給帖納稅開採下部知之 丁巳諭軍機大臣等據熱河副都統多羅等奏木商劉思遠欠交變價木植銀三萬六千餘兩向伊查追據稱湖南瀏陽縣捐納候缺吏目周濤欠伊銀六千餘兩懇請追出以完官帑現已行文該處催追還項等語所辦

非是此項木植既經官商劉思遠認領所欠銀兩自應向該商催追至伊領出木植轉售他人有無欠項亦應聽該商自行索取斷無官為查追之理多羅等聽信商人之語率爾行文殊屬不諳事體此案已交軍機大臣另行查辦著傳諭顏希深接到多羅等咨文毋庸辦理如李湖已經到任即諭李湖知之 戊午諭軍機大臣曰九江關監督全德現在有應行質訊之事著解任諭令郝碩派委妥員押送來京其員缺已著穆騰額補授該員未到任之前著贛南道蘇凌阿前往署理至全德前以熱河總管陞任九江關監督何至向人挪借至二萬兩之多而到任未久何以即能歸楚恐伊在監督任內或有侵帑婪贓情弊並著郝碩密行體訪蘇凌阿到彼亦就近嚴切訪查如有確據即著蘇凌阿將全德任所貲財查封毋使隱匿寄頓倘查無他弊即無庸辦理再全德署中有金大簪即金標

亦係應行審訊之犯。並著郝碩派員先行拏解來京。途中與全德隔別。小心管押。毋致疎虞。將此由五百里發往傳諭郝碩。并令蘇凌阿知之。○己未內閣翰林院帶領乙未科散館修撰編修庶吉士引見得旨。此次翰林散館之修撰金榜。編修汪鏞。孫辰東。業經授職。其清書庶吉士戴心亨。繆晉章。宗瀛。戴聯奎。陳崇本。邱庭澄。俱著授為編修。孫玉庭著授為檢討。漢書庶吉士吳錫麒。許煥。嚴福。范來

實錄卷一百一十五

十一

宗。羅修源。徐立綱。戴均元。錢樾。于鼎。盧遂。徐如澍。崔槐。曹錫齡。周宗岐。張能照。周璣。俱著授為編修。德昌。饒慶捷。谷際岐。王允中。瑞保。五泰。俱著授為檢討。其庶吉士梁上國。陳鏞。楊昌霖。張慎和。陳文樞。倉聖脉。李廷敬。曾廷標。胡敏。胡必達。何思鈞。俱著以部屬用。至此次改部各員內。其原在四庫館辦書者。仍令其兼館行走。○諭昨歲曾諭督撫等。不許進呈貢品。今年尚在二十七月之內。本不以端

節為事。而各處頗有紛紛進貢者。此在織造鹽政。稍備緞紗等物。以循常例。猶不為過。乃督撫等亦相率效尤。實所不取。是以仍行發還。恐伊等不能仰體朕意。於今歲萬壽復行呈進。更屬非禮。況秋間正值朕詣盛京。恭謁祖陵。若於途次馳進貢物。尤為煩瀆。而先期進貢。更屬當差。斷乎不可。且督撫等。惟當盡心職事。副朕委任。更何必以貢獻見長耶。將此再行宣諭知之。○以正藍旗蒙古都統和隆

實錄卷一百一十五

十一

武。為寧夏將軍。○以禮部尚書鐘音。為正藍旗蒙古都統。刑部侍郎喀寧阿。為鑲黃旗漢軍副都統。○刑部等衙門議准。江蘇巡撫楊魁。疏稱。江浦縣典史萬士磨。婢李秋桂。被充當水火夫之廠。犯陳全信。調姦不從。羞忿自盡。陳全信。依例擬絞立決。李秋桂。守正捐軀。但係婢女。請照例附請旌表。墓前建坊。停其設位入祠。從之。○是月。直隸總督周元理。奏大名。廣平。二府。二麥歉收。現又未續霽雨澤。

秋成尚遠貧民餬口維艱擬將該處義社倉儘數借出外倘有不敷即將未經買補常平穀價及旗租銀兩酌撥照例每穀一斗以銀六分折色借給查明極貧之戶大口月給穀三斗小口月給穀一斗五升自五月起借給兩個月口糧其鰥寡孤獨困苦無依者大口日給穀五合小口三合再順德屬之邢臺任縣沙河內邱四縣情形亦屬相同請一律酌辦得旨如所請行該部知道又奏泰寧鎮

屬之涑水房山二營每營額設守備把總經制外委各一員其經制外委已派往半壁店秋濶二處看守行宮外圍該營僅餘把總一員不敷巡查差委請於每營添設額外外委一員仍支食本身馬糧不過給予頂帶俾資彈壓巡防報聞湖廣總督三寶奏湖北各營原定惠濟銀兩向有贏餘偶因軍興以後致有不敷銀七千三百餘兩未經發給現在兵丁遇有事故難免拮据今查藩庫存貯恩

賞兵差銀一萬二百餘兩現無動用之處請將此項暫借動用即在惠濟本款餘剩銀兩逐年按數歸還報聞○暫護河南巡撫布政使榮柱奏豫省綠營每年青黃不接之時准於常平倉內借給穀石分月扣餉今開封等屬二麥歉收仰蒙恩旨糶借倉糧以裕民食伏思體恤兵民事同一例請照二十三二十七等年辦理成規每馬兵一名借穀二石守兵一名借穀一石五斗統於應得餉銀內按

五個月扣繳責令地方官於秋成時買補還倉報聞○陝西巡撫畢沅奏現當青黃不接之時民間糴糧需錢較多目下錢價每銀一兩換制錢八百九十文較之往年增昂查寶陝局存貯錢文截至今年二月共存錢八萬三百餘串請酌動三萬串即在局內設廠出易以平市價報聞

大清高宗法天隆運至誠先覺體元立極敷文奮武孝慈神聖純皇帝實錄卷之一千五十五

實錄卷之一千五十五

三十一

大清高宗法天隆運至誠先覺體元立極敷文奮武孝慈神聖純皇帝實錄卷之一千五十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事稽

世襲騎都尉軍功加十九級隨帶加二級又加二級臣查誥內大臣戶部尚書鎮邊將軍滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌五月庚申朔諭本年山

東濟東武曹臨清濟寧等六府州及泰兗二府屬北境春間種麥較少前已降旨令該撫加意撫卹并令將濟南等屬新舊錢糧恩予停緩但秋後仍須輸納在麥收歉薄之區民力不免拮据即其餘二麥有收各屬亦當留其有餘以供本省糴買俾資接濟著再加恩將山東乾隆四十五年輪免錢糧即於本年普行蠲免其各府州屬現已徵收者即作為明年正供該撫其董率屬員實力經理毋任

吏胥中飽。俾閭閻均霑實惠。以副朕軫念民生之至意。該部遵諭速行。○諭軍機大臣曰。弘昫等奏奉天各屬查出麥石數目。約計可敷採買五萬石之用。錦州現有麥一萬九千石。所屬螞蟻屯海口運豆船隻。可以裝載。先行運津。並雇商船。一同裝運。其寧遠州屬。俟查出麥石數目到時。亦令該處豆船運送。至承德遼陽等各州縣。各有海口。每年俱有天津買賣船隻。現派員確查船數。約可裝載二萬餘石。倘有不敷。另行籌辦等語。此項麥石。既據弘昫等辦有端緒。自可期陸續抵津。著傳諭周元理。即派妥幹之員。前往接收運到麥石。務宜留心經理。以期妥協。○又諭曰。寅著奏據鹽城縣稟報。四月十九日。有南來鹽船二三十隻。蜂擁往西門。及知縣守備前往查拏。衆犯登岸持械。放火燒橋。截斃營兵一人。截傷衙役三人。經官兵施放烏鎗。衆始退逃。當拏獲鹽船十六隻。獲犯張信元等男婦

十四人。鎗斃鹽犯三人。現在寅著已親往該處查拏首夥各犯。並飭隣境州縣。并力協緝。一面移知督撫等語。鹽梟敢於持械拒捕。放火燒橋。傷斃兵役。不法已極。其船多至二十隻。匪徒必聚至百人以外。似此糾衆肆行。實為可惡。不可不速拏務獲。嚴加審訊。盡法多治數人。以示懲儆。今高晉現往浙江會看海塘。薩載又有督辦挑濬河淤等事。均難分身。兼顧。著傳諭楊魁星速馳赴該處。將已獲各犯嚴加刑訊。根究為首要犯。及黨夥各犯。立即董飭各員弁上緊擒拏。毋使一名漏網。其就獲之犯。審得確情有應決不待時者。一面奏聞。一面即在該處正法梟示。其同惡相濟之犯。必當從重多辦數人。不可稍存姑息。即未減者。亦應發往伊犁為奴。楊魁星務須實力妥辦。仍將查拏審辦情形。迅即覆奏。去歲冬間。山東省私鹽拒捕之案。情罪重大。曾諭兩省督撫。各駐境上。會緝要犯。盡法懲治。匪

徒應稍知斂戢。何以為時未久。鹽城又有匪眾販私之事。且較前案更大。其故殊不可解。昨冬經國泰等。訊明私鹽來歷。係得自老少餘鹽。因思為正本清源之計。諭令各督撫鹽政。酌籌官買餘鹽。即以其價散給貧民。俾資養贍。以期杜遏流弊。或匪徒聞有此信。轉欲逞其伎倆。妄思軼於禁令之外。果爾。則其情罪尤堪髮指。楊魁務嚴訊起事緣由。據實具奏。不可稍有匿飾。至如各督撫鹽政。會議老

少餘鹽一事。直隸山東等省。俱照朕旨。酌量議行。惟江南則請設立官垣。收買餘鹽。令肩挑背負貧民。赴官垣買取挑賣。但不許多觔越境。其法未為妥善。現經該部議駁。在寅著所見者小。不知通盤籌畫。尚無足怪。高晉久任封疆。深悉地方情形。且今春在京時。朕亦經詳晰面諭。理應實力籌辦。何亦與寅著率為此奏。著高晉即行據實明白回奏。此旨著由六百里發往。諭令楊魁速辦。寅著摺並著

鈔寄閱看。楊魁到鹽城時。先將獲犯嚴訊情形。速即由驛覆奏。并諭高晉知之。○辛酉。諭豫省自春夏以來。雨澤稀少。二麥難望有收。業經傳諭該撫。將開封等五府。加意撫綏。并酌借貧民口糧籽種。以資接濟。但念歸德陳州二府。許汝二州。待澤情形。畧與開封等府相同。自宜一體撫卹。以紓民力。著再加恩。將歸德府屬九州縣。及陳州府屬之沈邱等三縣。並許汝二州。照開封五府之例。凡無力貧

民。酌借一月口糧。每畝借給籽種銀兩。以資力作。并將陳州府屬之扶溝。沈邱。項城。三縣。社倉民欠米石。均緩至來年麥後徵還。俾小民得盡力農田。該撫務督率所屬。悉心經理。以稱朕軫念民生有加無已之至意。該部遵諭速行。○又諭據吳虎炳奏。宣化縣知縣萬廷莘查獲安南國人陳廷暄。阮文富二名。莊髮改裝。稱係貢使胡仕棟家人。該縣即帶與該貢使認明屬實。覆訊稟報等語。陳廷暄等

私自薙髮。改換服飾。偷越隘口。安知非另有別情。該縣既因其形跡可疑。盤獲自應徹底根究。務得實情稟報。乃因其稱係貢使胡仕棟家人。輒帶與該貢使自行識認。辦理殊為錯謬。安南土語。該縣無由通曉。或此二人詭捏。而胡仕棟為之掩飾。俱未可定。何得信為實據。即此一節之錯謬。其諸事糊塗。可以概見。豈宜膺民社之寄。萬廷莘著革職。該部知道。○諭軍機大臣等。據吳虎炳奏。宣化縣知

縣萬廷莘查獲安南國貢使胡仕棟家人陳廷暄。阮文富。薙髮改裝。形跡可疑。即帶犯與該貢使認明屬實。覆訊稟報。現在親提研訊等語。該縣萬廷莘所辦殊屬非是。陳廷暄等既私自剃頭。改換服飾。潛越隘口。安知非外夷奸細。該縣盤獲之後。自應徹底根究。務得實情。通行稟報。乃即帶與該貢使識認。信以為實。安南土語。該縣無由通曉。或此二人詭捏。而該貢使為之匿飾。俱未可定。若非吳虎

炳親提查訊。不幾為其所愚耶。萬廷莘不曉事若此。其諸事糊塗。已可概見。豈堪勝縣令之任。已降旨革職矣。至該撫一聞稟報。即飭令委員解省。親提嚴訊。所辦尚是。著將該二犯薙髮改裝。偷越關隘。各實情。迅速審明。即無他故。亦當留於內地。治以應得之罪。仍飭諭該國王知悉。著吳虎炳即行訊明具奏。將此傳諭知之。○又諭戶部議駁。高晉等會議老少鹽觔一摺。所駁甚是。肩挑背負之鹽。向

為私販影射滋弊。不可不清其源。而高晉等議請設立官垣。收買餘鹽。即令貧民赴官垣領買挑販。第不許多觔越境。所辦實未允協。昨已有旨。令高晉明白回奏矣。現今鹽城縣復有鹽梟糾眾販私。持械拒捕。傷斃兵役之案。可見各鹽場積弊甚多。不可不及早釐剔。豈宜因循貽誤。昨諭楊魁馳赴鹽城。查審私梟一案。計日可以到彼。寅著亦先期馳赴該處。現在薩載承辦清口以下黃河嫩淤業將

就緒且派有道將等上緊經理毋庸親身督辦著傳諭薩載即行前往會同楊魁寅著將老少餘鹽一事另行詳悉妥議具奏所有原摺並著鈔寄照折角處折令閱看高晉前往浙省查勘海塘如已竣事回程亦著到該處一併入議若實有不能行亦應將實在情形奏聞並議何以除弊之法不應勉強牽就若高晉等前議非明官立私鹽之廠而招人販私乎此旨著由六百里發往傳諭薩載楊魁

即速妥辦並諭高晉知之○壬戌

孝誠仁皇后忌辰遣官祭

景陵○以告退奉恩將軍慶善子顯齡襲職○

癸亥諭據德保奏四月二十一日未時淮安地方陡起暴風雷雨交作勢甚猛烈所有渡黃漕船安慶前安慶後鎮海後揚州頭泗州後太倉前江淮頭蘇州白糧興武五太倉後杭嚴二杭嚴四湖州白糧海寧所等十四幫內共沈溺船三十四隻沈溺剝船二十六隻

碰損風艖天蓬等項折損頭桅大桅船二百十一隻淹斃男婦八名口等語漕船陡遇暴風致遭沉溺所有淹斃人口著查明照例撫卹其沉溺米石雖例應買補但暴風傷損船隻實屬人力難施若再令賠償情殊可憫著即查明確數據實具奏加恩豁免餘著照該署督所議行○諭軍機大臣等鹽城縣私梟拒捕燒橋傷斃兵役一案前據寅著奏報已諭令楊魁星速馳赴該處查拏審辦茲據楊

魁奏接據該縣稟報即日起程馳赴鹽城督率道府及地方文武上緊跟拏要犯務獲據實審辦等語自應如此認真速辦此案鹽梟敢於糾集多人裝船二三十隻肆行私販且敢持械拒捕放火燒橋並將官兵傷斃實屬目無法紀不可不及早全行弋獲嚴加刑訊多辦數人並於該處即行正法以示懲儆現在曾否將要犯全獲訊得實情勿稍延緩致令遠颺漏網至各犯所裝鹽船但云自南而

來並不言及來自何處。其前往西門亦不言其去欲何往。殊未明晰。薩載等務須逐一查明。以便易於根究。至鹽船二三十隻。已獲十六隻。其未獲者尚餘一半。船行非單身逸犯。可比更易追拏。今各船自應悉行就獲。即棄船逃竄之犯。亦當上緊追捕。勿使遠逸。俾免再昨歲山東私鹽案內。尚有首犯孫大漢。脫逃未獲。或該犯仍在此案鹽梟內。糾聚多人。故行抗拒。亦未可定。果爾其情罪尤為可惡。

薩載等即將已獲各犯。切實嚴訊。務得實情。如果孫大漢在內。更須即速嚴緝。就獲加重治罪。薩載楊魁審辦此案。務須實力嚴懲。多辦數人。即應行末減者。亦當發伊犁等處為奴。不可稍存姑息。至鹽城距淮安甚近。德保駐劄淮城。自應早得信息。何以遲至五六日後始行具奏。至此事雖非總漕專責。而地方既有鹽梟拒捕大案。德保亦不得諉為無過。並著薩載等於訊明此案後。一并查議具奏。

其鹽城縣知縣康杰。守備周光中。一聞鹽梟拒捕。即帶兵役前往查拏。並即開鎗擊斃梟徒。立擒首夥各犯。並獲多船。尚屬能事。並著薩載等於結案後。將該二員送部引見。此旨著由六百里發往。薩載等即將現在獲犯訊辦情形。迅速由驛覆奏。并諭高晉德保知之。○甲子。諭直隸順德廣平大名三府屬。與河南接壤。因上年雨澤稀少。所種秋麥無多。本年春膏亦未深透。雖直隸本年輪蠲錢糧。閭閻可免追呼。但該府屬上年尚有應徵緩徵錢糧。前已降旨。緩至秋收後徵收。第念歉收各處口食稍艱。若於秋收後即令輸將。未免尚形竭蹶。著再加恩。將三府屬所有帶徵錢糧。概行緩至來歲麥熟後徵收。以紓民力。該部即遵諭行。○乙丑。

上御勤政殿聽政。○諭本年散館清書庶吉士梁上國。漢書庶吉士倉聖脉。何思鈞。前已有旨。以部屬用。著加恩俱留館。再教習三年。同

新科庶吉士一體散館。又諭前戶部奏駁富勒渾等奏銷運送軍糧軍裝人夫回空口糧。先後牽混一摺。當經傳旨令其逐一登覆。明白回奏。茲據奏稱在站人夫同係負重執役。而所運軍糧軍裝軍火等項均屬急需。並無差別。且查十二三年金川成案。軍裝等項。背夫回空口糧一律全支。現有當時辦過案卷。此次原係循照前例辦理。第因彼時軍務緊急。諸事紛繁。是以至三十九年始行咨部

立案。斷不敢絲毫牽混等語。此項回空口糧。既係一律折給。且為伊等往來糧站目擊身親之事。自屬實在情形。俱著加恩准其開銷。丙寅諭軍機大臣等。據步軍統領衙門奏貴州遵義府仁懷縣民人楊政呈控民人謝希廷等霸占伊家祖遺地畝。又將伊子楊玉安。楊奉安用箭射死。地方官並未質審。率行擬杖完結等情一摺。李侍堯現已起程來京。陛見。路過黔省。此案即交李侍堯秉公查審。

具奏。即或該督現已過黔。或在湖南等處。接奉此旨。仍著回至貴州審辦。俟定案完結。再行起程來京。其原告楊政已交該部飭發沿途地方官迅速解往質訊。原摺并著鈔寄閱看。將此由四百里諭令知之。丁卯命山西巡撫兼理鹽政。諭向來河東鹽政與山西巡撫因各有專司。未免意存畛域。於辦理鹽務。每多掣肘。即如近日查覆舉報更換疲商一事。屢經部駁。該撫等覆奏意見始能畫一。此

即其明徵也。河東鹽政事務本簡。非兩淮長蘆可比。況直省中如浙江福建兩廣俱係督撫兼理鹽政。較為妥協。河東鹽政竟不如令山西巡撫兼管。瑞齡現在丁憂。其員缺毋庸另行簡放。河東鹽政即著該撫巴延三兼管。至一切鹽務原有運使專辦。今得該撫統轄。俾事權歸一。呼應更靈。於商民均屬有益。並著為令。所有巡撫兼管鹽政各事宜。著巴延三悉心酌擬具奏。到日交部覈議奏聞。又

諭曰桑齋多爾濟奏稱。拏獲俄羅斯斐岳托爾。私行進口賣馬。章京巴達爾呼遣人知會瑪玉爾。令其前來會審。瑪玉爾自謂銜大。不肯同章京辦事。僅遣其屬人頗羅楚克前來。章京巴達爾呼。飭令回歸等語。俄羅斯邊界有事。向係內也。章京會同該處瑪玉爾辦理。今新任瑪玉爾。自謂銜大。遣屬人頗羅楚克前來。甚屬非是。巴達爾呼飭令回歸。令瑪玉爾自來。甚是。但瑪玉爾既未來。即不應見其來使。巴達爾呼於此節未免姑息。桑齋多爾濟暫停其貿易。咨示固畢爾納托爾。所辦甚是。看來瑪玉爾不來會審。蓋知其屬人私行進口。非是。難以同內地之人辦理。恐固畢爾納托爾治罪。意存迴護。桑齋多爾濟行文時。即應將此事添入。則雖欲迴護。亦不能矣。再索琳欲親自前往辦理。此事甚善。但伊至彼處。瑪玉爾若欲求見。斷不可見。一切事宜。俱通知巴達爾呼。令其會同瑪玉爾辦理。著傳

諭桑齋多爾濟等遵辦。○諭軍機大臣等。據寅著奏。拏獲鹽梟首犯李光祖。王三。夥犯沈自洪。并現在嚴拏逸犯等因。一摺。此案鹽梟聚集多船。持械拒捕。傷斃兵役。情節甚屬可惡。寅著既將首犯拏獲。自應嚴加審訊。起意拒捕。及私鹽由何處販來。欲往何處私賣。各情節。先行具奏。乃寅著僅奏獲犯。及查驗船隻橋梁情形。並未訊取該犯等供詞。同奏。足見其糊塗不曉事。寅著著傳旨申飭。此案已交薩載。楊魁。前往查拏審辦。並據高晉奏明。亦已馳赴鹽城查辦。著傳諭該督等。將現獲各犯。嚴訊私販原委。及拒捕各確情。即行具奏。並訊明夥犯上緊嚴拏。務獲從重究治。毋使一名漏網。並多辦數人。以示懲儆。將此由五百里諭令知之。○戊辰。諭軍機大臣等。前據步軍統領衙門奏。貴州仁懷縣民人楊玖。呈控謝希廷等霸占地畝等一案。已降旨將該犯解往。令李侍堯於路過黔省時。將此案

秉公查審。如已過點。或在湖南等處。著仍回至貴州。審辦完結。再行來京。本日據李侍堯奏。已於四月初七日。自滇起身赴京。迄今已將一月。計其行程。離黔已遠。若再回赴貴州。審辦此案。未免徒勞往返。著傳諭李侍堯。接奉此旨。仍即來京。陛見。俟回任時。路過黔省。再行審辦。其解往之楊玖一犯。途次遇見時。即令該處州縣。嚴行監禁。俟李侍堯回程至彼。再行帶赴黔省審辦。此旨著由五百里發往沿途探聽。傳諭李侍堯知之。○又諭。前據王亶望李杰龍奏。嶮縣民人王開經等。糾集多人。抗糧毆官一案。已傳諭王亶望等將所獲首夥各犯。詳悉嚴訊。徹底根究。並令於定案時。從重多辦數人。以示懲創矣。此案起事時。提督李杰龍聞信。即帶同遊擊。守備等官。星往查拏。而該撫所委之司道。及該府知府。亦即踵至。陸續將首夥各要犯。全行拏獲。頗為迅速。可嘉其擒拏要犯時。在事各員。何人

最為出力。何人獲犯最多。前奏均未詳敘。著傳諭王亶望會同李杰龍。即行確查。據實覆奏。如有應送部引見者。候朕酌量降旨。至此案人犯解省時。該撫自即遵照前旨。逐一嚴訊。從重多辦數人。並著該撫。迅速審明覆奏。將此由。由四百里傳諭王亶望并李杰龍知之。又諭。緬匪進貢還人之說。又無信息。因屬賊匪反覆不常。亦由贅角牙新襲。不克自主。而其辦事之人。又皆懷私自用。意見紛歧。故不能照前稟行事。亦無足怪。且緬匪業將蘇爾相送出。其事已完。至楊重英等之送還與否。本無關輕重。惟有嚴防邊隘。不與交易。并嚴切稽查各口。不許一人私越偷漏。乃現在應辦之要務。李侍堯在滇。自必實力董率。所屬員弁。亦不敢稍有懈怠。今李侍堯已來京。陛見。恐各關隘員弁。不免心存玩怠。所關甚鉅。著傳諭裴宗錫。務照李侍堯所定章程。與海祿實心董察。不可存五日京兆之見。或至

疎誤至海祿。到滇後。從未專奏一摺。固因無可陳奏。但提督原有奏事之責。如遇有邊關應奏事件。不妨酌量輕重。由驛馳奏。將此由五百里傳諭知之。○又諭。據伊勒圖奏。准勒爾謹咨。哈密備用馬匹不敷。將巴里坤肅州綠營馬匹。調往應用。此項缺額馬匹。由伊犁撥補。但查現今伊犁並無多餘馬匹。除將另廠牧放兒馬。撥給三百匹補額外。尚缺馬三百匹。既經勒爾謹將巴里坤牧廠所出驕馬。照數撥補綠營。似毋庸由伊犁撥送。已行文勒爾謹等語。哈密巴里坤等處。歷來需用馬匹。未經平定伊犁與哈薩克易換馬匹之前。彼處應需馬匹。係由何處撥用。今伊犁馬匹。既不敷撥送巴里坤等處缺額之數。勒爾謹自應查照從前辦過成例。籌撥備用。著傳諭勒爾謹。將未經平定伊犁與哈薩克易換馬匹之前。哈密巴里坤等處。應用馬匹。向係如何辦理。現今伊犁馬匹不敷。其哈密巴里坤

等處。應作何撥備之處。查明辦理具奏。尋勒爾謹奏。伊犁不敷馬匹。請照舊於巴里坤鎮標及附近之安西靖逆沙州等營撥解。其巴里坤鎮及各營缺額之數。請在司庫照依營中過五馬匹之例。領價買補。報聞。○軍機大臣等議覆。伊犁將軍伊勒圖奏。伊犁屯田綠營兵俱由陝甘各營派往。五年一換。徒滋繁擾。查伊犁滿洲蒙古兵。俱係眷兵。請將綠營兵。亦改為眷兵。其管理之官員等。合兵數出。派應如所請。從之。○吏部議覆。山西巡撫覺羅巴延三奏。太谷縣范村。係該縣巨鎮。請設主簿一員。給予鈐記。查左雲縣所轄之高山城。巡檢一缺。堪以裁汰。即以俸廉役食。撥給范村主簿。應如所請。從之。○予故和碩怡親王弘曉祭葬。如例。謚曰僖。○旌表守正捐軀河南臨漳縣民孫義成妻吳氏。○己巳諭曰。伊勒圖等奏。協領明善。六年期滿。伊行走不過稱職。不勝選用。請停止引見等語。各省協

領等六年期滿送京引見者。原因此中如有能員即可加恩擢用。倘遇衰老不勝任者亦立予罷斥。今伊犁地方雖遠。然協領大員竟不送京引見。與例不符。嗣後伊犁協領內雖有不勝選用之員。惟將初滿六年者停止送京。其二次已滿六年者。著該將軍出具考語。送部引見。著為令。諭軍機大臣等。昨據鄭大進奏。河南通省得雨者已有數十州縣。惟開封府屬及河北三郡尚未一律普霑。又山東

省自四月二十日據國泰奏報。濟南等屬得有雨澤。迄今已閱兩旬。未據續報。似亦不免稍乾。豫東二省大田曾否全行播種。日內曾否續得雨澤。朕心深為廕念。著傳諭鄭大進國泰迅速查明。據實由驛覆奏。將此由五百里傳諭知之。○命吏部郎中呂光亨提督雲南學政。○庚午授一甲一名進士戴衡亨為翰林院修撰。一甲二名進士蔡廷衡。一甲三名進士孫希旦為翰林院編修。○辛未諭軍

機大臣等。昨湖南省將接解滇省土夷之道員王鳴押解到京。交軍機大臣訊問。據該道稱土夷過境時親行點驗。並未上鎖。且有河南巡撫徐績回書為據等語。隨詢之徐績。據稱楚省將頭二三起土夷解到豫境均未鎖鍊。即飭令各屬俱照楚省辦理。後又接到滇省咨文。應將年力精壯者俱行鎖鍊。其時頭二三起土夷已行抵滎陽偃師澠池等處。始令補鎖等語。果爾則該解員陳英棟等在滇

省所供夷人至河南時鎖鍊未動。尚係昆明縣舊封之語。實為狡飾。不可不徹底嚴究。著傳諭裴宗錫即將原解土夷之已革委員陳英棟等三名。遴委妥員分起押解。迅速到京。以憑質審。仍嚴飭委員小心管押。毋致稍有疎虞。干咎。將此由五百里傳諭裴宗錫知之。又諭曰。勒爾謹奏甘省鞏昌平涼等府州屬於四月初八日得雨寸餘。其餘各屬俱未見有報雨之處。現在率屬虔禱等語。甘肅春

夏缺雨事所常有。但該處地氣早寒。若得雨稍遲。大田即難趕種。現在將交夏至。此時如即霑透雨。尚可乘時布種。但恐貧民或乏籽種。以致觀望遲誤。地方官不可不及早籌辦。著傳諭勒爾謹。即確查各屬。是否得有雨澤。如已得雨澤。可種大田。即速酌借籽種。俾資耕作。該督務宜董率各屬。實心妥辦。副朕軫念。仍將曾否得雨情形。迅速由驛覆奏。將此由五百里傳諭知之。○又諭曰。楊魁等奏。拏

獲鹽梟首夥要犯。并現在查辦情形一摺。覽奏已悉。此時高晉亦已前赴鹽城。著即會同嚴審各犯起事情由。並將逸犯上緊緝拏。從重究治。毋任一人漏網。至高晉回奏前議。籌辦老少餘鹽一摺。據稱兩淮地方情形。與山東直隸不同。附近場窰州縣。向不行銷官引。海濱村莊零落。全仗肩挑背負零賣。以為食鹽。而海濱之民。亦藉此以資餬口。又稱向來私鹽多由場窰透漏。並非盡屬老少餘鹽各

等語。現據楊魁奏訊鹽城一案。私梟供詞。即稱各向窰戶。及老少鹽擔。買得私鹽二三百觔。至四五百觔不等。分貯小船等語。是老少鹽擔。實為私販弊源。可見高晉等前奏設立官垣。收買餘鹽。令貧民赴垣交價挑賣之法。不能杜弊。而轉致藉口濟私也。至稱附近場窰州縣。向不行銷官引。全仗買食肩挑背負之鹽。果爾是向來立法未為盡善。近場州縣。不令行銷官引。或係鹽法章程。別有防微杜漸之道。然竟明目張膽。買食老少餘鹽。則是以官地而聽私鹽交易。實屬不成事體。如有可以另籌妥善之法。即著高晉等會同妥議具奏。設或實有難於更改之處。轉不妨將實在不能改辦情形。詳晰奏聞。斷不可含糊其說。仍至有名無實。至現在正當議辦老少鹽觔之時。鹽城縣即有梟徒糾眾夥販之案。焉知非奸民知官辦此事。於彼不利。故為鋌而走險之計。或係去年山東逸犯孫大漢逃匿

在彼煽誘。盡惑亦未可定。並著高晉等將各犯悉心嚴訊。務得實情。一併覆奏。將此由五百里傳諭知之。仍將曾否全行獲犯及訊辦情形。即速由驛具奏。○又諭曰。勒爾謹奏。緝拏伊犁脫逃。遣犯裴老五。劉三魁一案。據隆德縣舒攀桂稟稱。本年二月二十七日。縣役蔣効武等訪聞裴老五同子裴根學在陳家窪地方。空窰內潛匿。當同營兵前往捕拏。裴老五等拒捕。致傷兵役。旋經營兵用鐵鉤鈎

倒拴縛。正欲送官。該犯是夜因傷殞命。現已驗明。應毋庸置議。現在嚴緝劉三魁。並請將地方各官分別議處等語。裴老五係應發新疆要犯。脫逃潛匿。及至兵役追捕。尚敢公然抗拒。甚為不法。自應從嚴治罪。但既因傷斃命。自無從再加刑戮。惟伊子裴根學同匿陳家窪窰內。當裴老五拒捕時。自必在場助力。亦應逐細根究。審明治以應得之罪。著傳諭勒爾謹。即飭訊明。另行定擬具奏。至該管之

分防縣丞及縣府各官。漫無覺察。分別議處。自屬咎所應得。並著查明。咨部辦理。○軍機大臣等議奏。盛京宗室覺羅。向立官學。原為肄習漢文而設。但宗室覺羅子弟。自當以熟練弓馬及學習繙譯為先務。至欲兼習漢文。則該處之舉貢生員等。自為師承。留心講貫。亦無難於通曉。應請將盛京額設宗室覺羅教習之例停止。報聞。○旌表守正捐軀河南鞏縣民丁太花妻王氏。○壬申。遣官祭

關帝廟。

上還宮。諭軍機大臣等。據喀寧阿奏。經過荏平。恩縣高唐等處。以至東阿一路。雖所見麥苗甚少。而秋禾則佈種齊全。詢之土人。據稱三月十七日。得雨多寡不等。已間有播種之處。至四月初八日。各得雨五六寸。民間上緊趕種。是以並無曠土等語。所奏頗為詳悉。看來山東大田情形。遠勝於豫省。即直隸各屬。秋禾亦恐未能趕種齊全。現在盼雨甚殷。朕

心深為廛念。著將喀寧阿摺鈔寄周元理。鄭大進各閱看。做照其式。即將該省各屬現在曾否普得透雨。及大田曾否一律播種情形。迅速查明。據實由驛覆奏。以慰懸注。將此由五百里諭令知之。又諭。昨據鄭大進奏。豫省麥收。除被旱州縣外。通計六分有餘。現在實屬歉薄。因交戶部查豫省自乾隆三十九年至四十二年。二麥收成。俱係九分有餘。是該省連歲豐稔。民間豈竟全無蓋藏。何至一遇歉收。輒爾待哺孔亟。該撫等甚至欲截南漕。以資接濟。則耕三餘一之謂何。地方官平時。豈漫無教導。籌畫以儲民食。而備災荒。直至成災以後。始蒿目無策。措置張皇。亦已晚矣。鄭大進尚到任未久。榮柱在豫已經數載。屢遇豐年。何竟全未籌及。著明白回奏。此旨並著該撫司存記。此後再遇豐收。必須多方籌備。俾閭閻各有耕餘。以資口食。至望雨各屬。目下曾否普霑渥澤。大田曾否播種。著鄭

大進。即速查明。據實由驛覆奏。此旨著由五百里發往。諭知鄭大進。並傳諭榮柱知之。○旌表守正捐軀河南寧陵縣民華永寧妻王氏。○癸酉。諭軍機大臣曰。國泰奏。體察地方民情。酌籌辦理一摺。所見非是。已於摺內批示矣。地方遇有災荒。巡撫等自當董率屬員。實心籌辦。然亦宜處以鎮靜。不可稍涉張皇。所謂民可使由之。不可使知之也。如所云東省民情刁悍。若非曲為撫循。恐別生枝節等語。尤屬不知事體。良善百姓。有司平日當為愛養。及偶因災歉乏食。自為撫卹所必加。若藉災為名。擅行搶刦。則係犯法克徒。惟當繩之以法。不可稍存姑息。并非能設法豫防也。國泰此奏。若稍露風聲。轉是教之生事。無此政體。若因曹縣白晝行刦之案。欲藉此一奏。自圖立腳。並以見諸事留心。則更屬取巧。奸民搶刦。有犯必懲。不能保其必無。更不必問及年歲豐歉。惟當按律嚴治。強橫者聞之。自

知斂戢不敢效尤并無庸如此鯁鯁過慮若  
槍案尚多擇其重大者奏辦其餘則隱為消  
弭不以上聞則更涉於欺罔取戾尤重矣看  
來國泰此奏不過欲朕見其留心民事并未  
必果如此辦理且國泰昨冬及今春於災旱  
情形不免諱飾今又跡涉矜張是其辦事非  
太過即不及率此以往轉令朕不能為之不  
繫心矣且據稱臣等多方籌辦及與藩司商  
酌之語似係向兩司商定始有此奏徐恕乃

曉事之人無難自行立稿即陸燿係軍機司  
員出身章奏亦所諳習國泰欲奏此等事件  
應喚兩司到署公商即令其繕摺密封呈奏  
此外勿使他人與聞方為正理今國泰此摺  
仍係假手幕賓焉能保若輩之必無漏洩輾  
轉傳布百姓豈無所聞因各生心滋事益長  
刁風是未收籌辦之效而轉致流弊國泰豈  
竟不能見及此乎又如另摺所奏白晝行劫  
一案看語內斂及此等兇頑之徒偶遇歉歲

最易藉茲生事云云一段竟是為各犯開脫  
莠民聞之益復毫無忌憚此與李淑芳之條  
陳何異何以戢暴懲兇國泰又何以漫無識  
見若此已交軍機大臣刪去此一段交部國  
泰所存底稿並著刪除其未獲之梁信一犯  
仍著上緊緝獲治罪勿使漏網國泰著傳旨  
嚴行申飭并著令徐恕陸燿閱看將此由四  
百里傳諭知之○內閣翰林院帶領新進士  
引見得旨新科進士一甲三名戴衢亨蔡廷

衡孫希旦已經授職邵自昌馮培吳省蘭吳  
璫潘庭筠吳紹浣彭翼蒙汪注吳舒惟王天  
祿徐文幹張九鐔錢棫吳裕德祖之望何西  
泰楊煒顏崇為吳鼎震馮敏昌王汝泰祁韻  
士賈汝翼李鼎元汪景公春張位德生洪其  
紳錢世錫許霖薛紹清俱著改為翰林院庶  
吉士李威徐冕南莫允宣鄧昶吳一驥管世  
銘盛時杰王城邵自悅吾祖望王錕那林保  
包承祚沙重輪韓湯衡江濬源閻曾履廣厚

范三綱。慈國璋。陳詩。李伯龍。俱著分部學習。  
蔡必昌。張維祺。周榮。王嵩齡。黃奕瑞。俱著以  
知縣即用。餘俱著歸班銓選。○吏部議准。葉  
蘭羌辦事大臣高樸等奏。和闐所屬六大城  
回子等。戶口甚衆。應交錢糧。併來往公文。事  
務繁多。止有委署筆帖式二員承辦。請照新  
疆各城例。添設經制筆帖式一員。從之。○以  
故廣西陽萬土州判岑宜榘子熙襲職。○甲  
戌。宗人府進呈新修

玉牒

上詣乾清宮東暖閣。恭閱行禮。送

皇史宬尊藏。賜總裁纂修以下等官銀幣有差。

○詣

大高殿行禮。○幸圓明園。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千五十六

大清高宗法天隆運至誠先覺體元立極敷文奮武孝慈神聖純皇帝實錄卷之一千五十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌五月乙亥諭軍機大臣

等緬匪進貢還人之說至今尚無信息必係緬酋辦事之人各懷私見故不能照前稟行事亦無足怪且緬匪業將蘇爾相送出其事已完即或送還楊重英亦無關輕重且彼若果進貢還人轉須開關弛禁不能保無漢奸逸出如從前李萬全尹士賓皆係內地之人潛往可見開關之不能保無流弊轉不若嚴查關隘不許一人出入之為愈也李侍堯在滇省年餘辦理此事極為認真今來京陛見

裴宗錫海祿務須遵照李侍堯所定章程董率員弁實力稽查體察並當比李侍堯在彼

更加嚴緊方為妥協如裴宗錫海祿漫不經

意致所屬員弁心生懈怠稍有疎忽或經李

侍堯回任查叅或經朕別有訪聞惟裴宗錫

海祿是問恐伊等不能當其咎也將此由五

百里傳諭裴宗錫海祿遵照辦理并諭李侍

堯知之○丙子諭軍機大臣等京師於十四

日得雨二寸續據周元理奏到近畿一帶得

雨分寸亦同至十五日申時起亥時止京師

復得澍雨五寸餘入土深透且雲勢頗濃所

被自應廣遠若保定省城是日亦得透雨則

周元理今早即應奏到乃至此刻尚未奏至

豈十五日之雨保定一帶未能霑被耶朕心

甚為廛念著傳諭周元理迅速查明將曾否

得雨緣由即行具奏再本日國泰奏於十三

日抵臨清於是日亥刻至十四日巳刻天氣

濃陰已降細雨鄭大進亦奏於五月初一二

等日內鄉等縣各得雨三四寸不等看來該二省尚未得霑渥澤盼望甚殷十五日之雨曾否一律普被大田曾否播種齊全著傳諭國泰鄭大進迅速查明據實奏覆以慰懸注將此由五百里諭令知之 旌表守正捐軀河南正陽縣民童連毛妻王氏王四妻童氏丁丑諭朕前詣盛京恭謁

永陵

福陵

昭陵於七月二十日啟鑾所有一切應行事宜各該衙門照例敬謹豫備 旌表守正捐軀福建長汀縣民王祿陞妻廖氏 戊寅諭今日閱看侍衛等步射伊等所用箭翎太曲竟成綠營體制又有弓力軟而箭長翎大者其意不過欲令人美觀步射之道必須合弓力造箭平時練習步射原以備行圍出師我滿洲肇起興京底定天下全賴弓箭朕臨御四十餘年惟恐廢弛丁寧訓誡乃日久漸生玩

忽所關甚鉅著將朕御用之箭發出一枝令領侍衛內大臣等給各處看視俱著以此為制合各人所用之弓製造諸大臣其時體朕意留心教導各該管侍衛官員兵丁等阿哥等亦著謹記朕旨 諭軍機大臣等鹽城縣私梟拒捕一案朕前以知縣康杰守備周光中聞信即親往查拏立擒首夥要犯尚屬能事因令該督等於結案後查明送部引見茲據高晉等奏現獲之季光祖於上年十一月間業經駕船私販因巡役王三得錢賣放未即破案今年該犯等又斂錢賄囑王三緣說合未允被巡役喝阻以致登岸拒捕是該縣營等漫無約束稽查均難辭咎業將康杰周光中交部嚴加議處毋庸再行送部引見至季光祖等私販鹽觔據供買自場竈可見寅著前奏向來設役巡緝場竈之語不過有名無實而高晉等前議設立官垣盡數收買場竈餘鹽之處又豈能零收淨盡耶現交該督

等另行定議。不可不徹底查辦。以杜弊端。著高晉等悉心會同妥議具奏。將此由四百里傳諭高晉等知之。○旌表守正捐軀直隸開州民馬貞妻宋氏。○已卯。諭軍機大臣等。安插遷徙烏魯木齊土夷開鎖一事。黔楚兩省互相推諉。前已諭令將湖南道員王鳴。芷江知縣吳鏞。及貴州署道吳光庭解京訊問。業據湖南將王鳴。吳鏞解到。經軍機大臣訊明。其事與湖南無涉。確有可據。茲復據索諾木策凌奏稱。夷戶召猛齋等。僉供自雲南起解時。本俱上鎖。至貴州鎮遠府地方。解官陳吏目因伊等行走安靜。將鎖暫開。遇有差點。仍舊帶上。二起則係百姓營員。三起則係何典史所開等語。是開鎖之弊。在貴州而不在湖南。已無疑義。前已傳諭裴宗錫將長解官陳英棟等三員解京質訊。諒更無從支飾。蓋由長解各員懼干處分。捏詞覆稟。而吳光庭亦從而附和之。是以李侍堯無從查其確實底

裏。今已水落石出。更無可推諉矣。將此諭令李侍堯知之。索諾木策凌摺並鈔寄閱看。又另摺奏五月初十日行抵河南之南陽府地方。接到廷寄。即馳回貴州。審辦楊玫呈控謝希廷一案。未免太遲。旨矣。前諭李侍堯於過黔時查訊此案。原以李侍堯或離黔不遠。仍可回黔查辦。及接其奏報。四月初七日起身。日期計程已早過貴州。復諭令先行來京。陛見。俟回黔時再行審辦。想李侍堯接奉後發之旨。自必遵辦。著再傳諭李侍堯仍即速行赴京。其楊玫呈控一案。俟回程便道辦理。此旨著由五百里發往。諭令知之。○刑部議覆雲南按察使汪圻奏稱。遣犯脫逃。本省有年終彙奏之例。至各省通緝未獲之數。從前並無按年總卷可查。請照本省彙奏例。由臬司彙造清冊。詳送督撫具奏等語。臣等酌議。請嗣後本省應緝外遣逃犯。分晰年分名數。登註事由。及已未就獲。為一冊。外省通緝者。於

每年彙造尋常軍流逃犯冊內另立一冊年終由臬司彙報各省督撫開印後咨部并分摺具奏從之旌表守正捐軀湖南藍山縣民龍加柱妻陳氏四川江州民周某妻江氏庚辰諭軍機大臣等本月十五日京城得有透雨近京東北一帶亦俱霑足隨即諭詢周元理據奏保定省城是日並未得雨昨十九日夜此間又得雨四寸而周元理今日尚未奏到其未能均霑可知本日鄭大進奏豫省東北各屬尚未普霑渥澤且傳諭問其齋奏之人據稱自十六日在開封起身一路到京並未遇雨是豫省及直隸西南各屬盼澤尤為亟切朕心益深廑念周元理鄭大進雖稱現俱虔誠祈禱諒不過照例於城隍廟龍神廟各處致禱日久禮煩所謂再三瀆瀆則不告轉恐未必有益因思豫省嵩山向有龍潭何不令榮柱前往潔誠禱祀請水或可期靈應即直隸如房山恒山各處亦有龍潭並

著周元理派委司道大員前往虔祈請水以冀速霑甘露庶可使趕種晚禾以甦民困周元理鄭大進務各誠心速辦仰副朕懷將此由五百里傳諭知之仍各將得雨情形迅速覆奏又諭曰文綬等奏土守備阿忠強奪屯番地畝復任性喜怒責斃三人並侵蝕卹賞銀兩至一千餘兩之多請照例擬斬監候等語所辦殊屬非是金川蕩平以後安立耕屯設官分守遇有屯弁等不法之事即應照西域新疆之例繩以重法庶可懲一儆百今阿忠敢於貪酷妄行若此自應一面將其家產查抄一面奏聞將阿忠於該處即行正法以昭炯戒乃文綬等僅照內地律例擬以監候此時既無足以示儆戒將來勾到時將伊處決業已時過事忘愚番且不解其何故豈足以肅法紀而示勸懲文綬等何不曉事體若此況阿忠貪酷各款跡俱係明亮將軍任內之事土司係其專管乃竟漫無覺察所司

何事文綬明亮均著傳旨嚴行申飭並令文綬等即將阿忠在該處正法并選派明幹可信大員前赴該處將阿忠家產查抄入官即行據實具奏仍曉諭各番俾知儆懼守法以示辟以止辟之義將此由五百里傳諭知之

山西巡撫覺羅巴延三續報寧遠廳墾熟荒地九十四頃四十六畝有奇旌表守正捐軀陝西保安縣民白仁妻徐氏辛巳命禮部尚書鐘音充三通館副總裁旌表守正

正捐軀陝西大荔縣民樊應召妻李氏壬午

孝恭仁皇后忌辰遣官祭

景陵諭曰福建按察使奇寵格年力衰邁著來京以對品補用其福建按察使員缺著楊廷樺補授又諭刑部彙題竇通等與覺羅赫蘭泰竇興爭毆一案將赫蘭泰竇興擬仗照例折罰養贍錢糧復因事在清理庶獄期內將所擬之罪寬免未為允協前經降旨減

刑自軍流以下至於笞杖第就例應的決者而言若已擬折罰錢糧其人已無鞭扑之苦與職官犯笞杖輕罪改擬罰俸者相同罰俸例不援免則折罰錢糧豈宜寬免乎此本著交該部另行改擬具題又諭昨閱寅著奏到三摺敘次不明因令軍機大臣檢查寅著揚州赴儀所掣鹽二十三日到儀城縣稟報十九日私梟拒捕一案遂由儀徵馳往鹽

城查辦並據伊奏獲首犯摺內稱於四月二十六日行至劉莊場境季先祖自行投到各等語是其前次所奏尚有次敘又據高晉等會奏定議鹽梟之摺查係五月十四日拜發是五月初間寅著尚在鹽城乃此次寅著所奏各摺其掣運新綱摺內既云於四月二十一日赴儀而奏謝申飭摺內復云二十三日在儀所掣鹽至恭報麥收摺內又止稱自儀掣鹽馳赴鹽城其敘次殊未明晰寅著辦事

糊塗。即此可見。著傳諭申飭。諭軍機大臣曰。顏希深奏有安化縣民劉翺稟呈供狀書一本。見其形蹤詭異。當即率同司道訊供。據稱乾隆十年。曾在蔣撫院前繳過蒙逐件指駁。今聞各處呈繳遺書。故來呈繳。隨飭委長沙府知府蔣曾忻等。馳赴該犯原籍家中。搜查有無悖逆字跡。另行從重定擬等語。顏希深所辦。未為得當。此等狂誕之徒。敢於妄談朝政。即此外別無不法字跡。亦當予以外遣。不可復留內地滋事。從前蔣溥任內。於該犯呈遞此書時。不即究治。轉為逐條批駁。本屬錯誤。但蔣溥業經身故。毋庸追究。已往至顏希深派員往該犯家內。搜查有無不法字跡。亦以為蔣溥前此辦理之非。自應選派別籍不同姓大員。馳往查辦。湖南通屬九府。豈無可派之員。乃令長沙府知府蔣曾忻前往。該府係蘇州吳縣人。與蔣溥同府同姓。安知其不為迴護。亦豈可不避嫌疑。顏希深辦事。何

不精細。若此。顏希深著傳旨申飭。仍將查辦定擬緣由。即行覆奏。并諭三寶知之。鑄給盛京戶部管莊六品官圖記。從侍郎喀爾崇義請也。直隸總督周元理疏報民人景安民認採潘家口汛土窯子山場內煤窯。煤旺窯成。請准其認充給帖。納稅開採。下部知之。旌表守正捐軀陝西南鄭縣民王洪德妻蔡氏。癸未。

上還宮。諭軍機大臣等。兩淮現有查辦場竈餘鹽事宜。必須鹽政悉心妥定章程。方能有益。而寅著人甚糊塗。斷非伊所能經理。因念伊齡阿尚屬能事。已降旨仍調兩淮鹽政矣。伊齡阿前在鹽政任內。屢派商人多辦貢物。伊出名呈進討好。頗露高興。朕所不取。又恐其日久累商。因將伊調任淮關。俾知改悔。伊在淮關兩年。關務漸有起色。而寅著調任鹽政以來。每歲所進。仍與伊齡阿無異。是鹽政辦貢。惟取給於商人。而本任所得養廉。大率

存留不動所謂煉他人之慨誰則不能且惟以誇多鬪靡為事日甚一日長此安窮商人行鹽固有自然之利然亦當令其稍留餘潤俾之自贍身家若辦貢一事過於苦累必致漸形竭蹶既非所以卹商即辦公亦恐不能無誤為鹽政者可不知計及乎伊齡阿仍調鹽政務宜仰體朕教誨成全之恩痛改前非勿萌故智仍蹈前轍又如庚子春朕南巡江浙亦有上四次成例可循伊齡阿勿因此欲自見長任意糜費致干咎戾且伊前此即因濫費商賁獲譴今更當引為切戒若再不知悛改斷難逃朕之鑒察必將伊從重治罪不僅改調監督而已至現在查辦老少餘鹽一事實為鹽務緊要關鍵全在鹽政辦理得法則弊源自可肅清昨據高晉等會議覆奏之摺已交該部定議伊齡阿即將應辦事宜實力妥辦酌定章程俟接到部覆後先將籌辦情形專摺具奏將此由四百里傳諭知之

是日起

上以夏至祭

地於

方澤齋戒三日○甲申諭前據李侍堯奏查審前任劍川州知州嵇承豫將應找加增腳價銀兩代逃亡運戶買米補運照收支挪移雜犯之例擬以總徒一摺經朕詳閱案情以此項銀兩如係嵇承豫先已扣留後聞有人告發始借挪墊補運之名以掩其侵隱短發是即先侵後吐其罪不止總徒若嵇承豫於未發覺之先將扣存腳價銀兩買米補運是以公辦公並未侵隱入己自未便以挪移科罪諭令該督撫等據實覆奏茲據裴宗錫奏稱嵇承豫挪墊補運在先被叅在後告發更在離任之後是嵇承豫於此案實無侵隱情弊業已革職著加恩免其治罪所有裴宗錫此摺及李侍堯等查訊原摺一併交該部議奏諭軍機大臣等山東河南兩省現俱未得

透雨朕心盼望甚殷然山東大田俱已種齊而河南尚有未種之地是盼雨情形豫省為尤甚昨已傳諭鄭大進令榮柱前往嵩山龍潭請水虔禱以冀靈應未識曾否普被甘霖山左日內亦曾否遍霑渥澤深為廕念至現在正當糧艘北上之時久未得雨運河水必漸減不但臨清以上古淺易於阻滯即開內向資湖水灌輸亦恐不免稍欠前經傳諭該督撫設法籌辦雖據姚立德鄭大進奏稱派員疏導泉源并據國泰奏派委專員沿途督率挑挖起剝亦不過補偏救弊之法而近日漕船尚多脫幫者不可不盡心籌畫因思衛輝之百泉為衛河上源必須竭力疏濬盡人事以待天時即懷慶之濟源乃濟水上游其流入運亦當一併疏治至山東汶水為南北濟運關鍵其源有五並當擇其最切要者盡力疏通以資接濟即泉河通判所管之各泉春間原藉挑濬此時亦當疏令旺盛俾益漕

渠況疏導泉脈並可使山澤通氣以助出雲降雨之功至各泉源所在自有靈祇司事均宜潔誠禱祀以期感應朕為民盼澤宵旰焦勞無時或釋凡有可以稍資利益者無不籌度及之國泰鄭大進各有司牧之責姚立德職在督河俱當仰體朕心實力妥辦以期有濟將此由五百里傳諭知之仍著將籌辦情形及曾否得有透雨迅速覆奏尋姚立德奏上冬及今春委員各處挑濬泉流不致枯竭泰安一帶得有雨澤汶河水長尺許流至分水口尚有八寸泗河亦長水八寸可暫供南北分濟行漕之用仍將湖水暫閉以歸撙節至衛輝之百泉懷慶之小丹河彰德之洹河俱為衛河來源缺雨以來源流日細現飭道廳疏挖不使稍懈并委員赴百泉虔禱冀沛時雨得旨覽奏稍慰竭力疏濬以待時行大雨諒亦即沛甘霖矣○乙酉諭雍正元年曾奉

皇考諭旨太監等見諸王大臣進內必須起立行走必須讓路以存恭敬令總管太監等不時嚴傳與衆太監如有違犯必不輕恕本日朕在乾清宮西煖閣於牕內望見西廊下有穿補服者二人向北行走又有一不穿補服者南行相遇並不讓路因思補服者必係職官其不穿補服者必係太監既已相遇自宜在旁避讓乃竟交臂不顧全無恭敬之心皆總管太監等日久視為具文不能管教之故

今經朕目睹不可不防其漸著嚴行傳諭總管太監務須隨時教飭約束毋許肆慢無禮此後如再不凜遵定將該總管首領太監等一併治罪又諭朕博蒐載籍特命諸臣纂輯四庫全書弄藏三閣又擇其尤精者為薈要分儲大內及御園用昭美備所以多選謄錄寬予限期以期校成善本嘉惠藝林昨辦書期屆五年將校對謄錄諸人優予議敘用示勸揚惟是進呈各書朕信手抽閱即有訛

舛其未經指出者尚不知凡幾既有校對專員復有總校總裁重重覆勘一書經數人手眼不為不詳何竟漫不經意必待朕之遍覽乎若朕不加檢閱將聽其謬誤乎朕因四庫全書應繕寫者統計十六萬八千冊卷帙浩繁既成大事不妨畧其小節自開館以來無不曲予加恩多方鼓舞所以體恤之者倍至若如此任意疎忽屢訓不改長此安窮是徒以四庫書館開倖進之階為終南捷徑又豈

可不防微杜漸耶前定總裁總校分校等按次記過三月查覈交部議處原不過薄示懲儆使之愧勵乃各總裁僅請每部抽看十之一二以圖卸責身為大臣即不宜如此存心乃既經抽看而仍聽其魯魚亥豕累牘連篇其又何辭以自解飾耶嗣後務宜痛加猛省悉心校勘其於去取謄錄分校之際更不宜左袒屢乞恩准以無負朕稽古右文之意毋再因循干咎將此再行嚴飭在館諸臣知之

又諭據福州將軍永德等奏請將協領兼佐領之處照京城叅領不准管本甲喇另調別甲喇之例遷調兼攝等語所奏是著照所請行并通行各駐防省城嗣後協領兼佐領必須兩翼調兼再八旗叅領內如有管本甲喇佐領者亦應改辦著交八旗將現在管本甲喇者即行調管別甲喇著為令○又諭據兵部等衙門叅奏發往寧夏給將軍為奴之格圖肯前任將軍傅良由寧夏調任西安時將伊帶往西安今又攜帶來京以致格圖肯攜妻脫逃等語格圖肯一戶因強欲贖身發給駐防為奴並非賞給功臣之人本應給該處官員兵丁且格圖肯係京師人傅良帶伊各處行走復帶至京師該犯轉得藉回本籍殊屬非是此次部旗所奏應行察議官員俱著交部察議嗣後為奴人犯除例應賞給功臣外其發往駐防各省者俱賞給該處官兵為奴其賞給將軍副都統之處永行禁止著

為令 諭軍機大臣等前經各省將查出應燬違礙各書陸續送京經該館大臣派員查辦分別開單進呈請旨銷燬所有應燬各書著該館開單行知各督撫一併實力查辦其中有浙江寧波周乃祺所撰歷志一本冊面題曰第二十一卷尚非完書此外存留卷帙恐復不少著傳諭王亶望即行加意訪查勿使私藏干戾至此書或有流傳他省者並諭各督撫一體查察隨時送京銷燬毋得視為具文○刑部議奏八旗家奴酗酒行兇送部發遣者交與該營鎮協在兵丁內揀選力能管束之人賞給為奴嚴加約束並請嗣後無論新疆內地遇有為奴之厄魯特酗酒滋事即照此辦理載入例冊遵行從之○命禮部尚書鐘音充四庫全書館副總裁○丙戌夏至祭地於方澤

上親詣行禮○詣

恩慕寺行禮○幸圓明園○諭軍機大臣等前據顏希深奏安化縣民劉翺稟呈供狀書本現在查辦一摺因其委員未妥已傳旨申飭矣此等狂誕之徒妄生議論其平日之不能安分可知即查無不法字跡亦當予以外遣不可復留內地滋事計李湖此時應莅湖南新任顏希深自即交代進京所有劉翺一案即應李湖接辦著傳諭李湖審擬此案時如

查其家別無悖逆書籍即將該犯發遣烏魯木齊等處以示懲儆不得因其年已八旬稍為姑息將此由四百里傳諭知之○丁亥諭

朕恭閱

太宗文皇帝實錄天聰四年二月

上諭羣臣曰昨攻取永平城大臣阿山葉臣與猛士二十四人冒火奮力登城乃我國第一等驍勇人也其二十四人蒙

上天眷佑幸俱無恙次日召伊等進見朕心愴

然幾不能忍此等猛士與巴圖魯薩木哈圖及他處先登驍勇出衆之人前已有旨後遇攻城勿令再登及攻昌黎縣薩木哈圖又復與焉以後此等捐軀建功之人勿得再令攻城但當令在諸貝勒固山額真左右遇衆對敵之時與之同進若彼欲自攻城亦當止之即或廝卒中有一二次率先登城立功者亦不可再令攻城以示朕愛惜材勇之意仰見我

祖宗開創艱難於戰勝攻取時

仁恩恤下無微不至是以人思感勵敵愾效忠所向克捷

開疆定業

肇造鴻圖詒謀垂裕之道實在於是朕臨御以來平定準部回部及蕩平兩金川我旗營勁旅中鼓勇先登攻堅拔柵者固不乏人即綠營中亦間有出衆奮勉者一經將軍等具奏即賞以巴圖魯號用示獎勵而伊等倍加感

奮凡遇攻奪碉寨仍復超衆爭先以圖報効其間屢建功績者固多而因冒險傷殞者亦復不少朕每為矜憫盡然於懷茲綏繹

祖訓驍勇立功之人毋令再登益敬服

大聖人之用心非孫臣所能見及也今武功告歲函夏謐寧繼此不願復有用兵之事但兵可百年不用不可一日不備而

謨訓昭垂法良意美亦不可一日或忘用是敬錄

聖諭明白宣示我君臣當共恪守以垂久遠且使我世世子孫懋繼

前規勉思善述以鞏億萬載丕基其欽承毋忽○又諭今日正黃旗滿洲都統奏據黑龍江咨送墨爾根城之索倫公中佐領員缺將原任佐領雅啟岱之曾孫驍騎校坤都保擬正呈進家譜引見等語此缺原因查打牲索倫達呼爾貧苦而設并非雅啟岱世襲之缺今遇缺出理應照公中佐領之例分別揀選

補放何以照世襲例將雅啟岱一支之人擬正進呈家譜傳玉等所辦甚屬糊塗但今日引見時驍騎校坤都保人尚去得是以加恩補放然不可竟令坤都保即授此缺著該將軍等由彼處公中佐領內酌選一名與坤都保對調嗣後此等缺出即照公中佐領之例分別揀選補授將此由該部通行八旗及東三省一體遵辦○以湖北施南協副將保泰為直隸秦寧鎮總兵○戊子諭自西安移駐

實錄卷千五

書

伊犁惠寧城滿洲官兵支給半分鹽菜銀兩定限三年今年五月已屆期滿即應停止但念此項銀兩關係伊犁等生計今若驟停未免拮据著加恩將移駐伊犁之步甲養育兵匠役等四百餘名照從前自涼州莊浪熱河移駐之步甲養育兵一體添給糧石以裕伊等生計○是月湖北巡撫陳輝祖奏潛江縣護田隄每年按田徵錢七百六十千文為歲修之用近多積欠請停徵查荊門州之沙洋隄

有籌備銀兩生息請於此項銀內每年撥七  
百五十兩辦理得旨允行 山東巡撫國泰  
奏運河各古淺處雖勤加撈挖究屬水淺均  
雇備剥船漕運遄行無滯惟直隸半壁店水  
淺六處上下游屬山東所管飭令委員無分  
疆界將剥船送過半壁店至夏津受載祇多  
送十七里可免兩處盤剥之煩而回轉仍可  
應付無誤得旨所辦皆合機宜知道了 貴  
州巡撫覺羅圖思德奏黔省黎平府屬之下  
江地方額貯倉米三千八百七十餘石今戶  
口日增每屆青黃不接之時倉糧不敷糶濟  
查古州現貯倉穀三萬三千有零每年平糶  
恒有寬裕請將古州倉穀分撥八千石為下  
江備貯在古州尚存二萬五千餘石下江通  
判連米合計共得貯穀一萬五千七百石即  
以此數永作兩處定額得旨如所議行

實錄卷一千七

七

大清高宗法天隆運至誠先覺體元立極敷文  
奮武孝慈神聖純皇帝實錄卷之一千五十七

實錄卷一千七

七

大清高宗法天隆運至誠先覺體元立極敷文奮武孝慈神聖純皇帝實錄卷之一千五十八

監修總裁官經筵講官太子太傅文淵閣大學士文淵閣領閣事領銜內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履程

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌六月己丑朔軍機大臣

議准山東學政姚梁奏稱別省民人充商其子弟不能回籍應考者准在行鹽地方入籍本省商人即領有鹽引者均令歸入本州縣原籍應試至本非行商之家假借親友鹽引冒認為商人子弟除本人及網保廩保照例治罪外其借與鹽引之商應一併分別治罪從之○庚寅諭軍機大臣曰鄭大進奏陝西辦運麥石於五月十八日覈計已運到五萬餘石此後踵至者當復不少現在酌議分撥

應行協濟之各州縣並將運到之麥先撥三萬石解京派員分作首次兩運押底通州其後運二萬石作為第三運押送等語所辦甚好此項先運之麥三萬石自應即行解京以供平糶之用著傳諭周元理即速派員於交解處經理照料同豫省委員迅速押送通州其自通州運京業據倉場侍郎奏請照向例由通會河轉運著該侍郎等於麥石運抵通州時即行運解京倉以期妥速至前諭陝西辦麥五萬石盛京辦麥五萬石運京供糶通計共有麥十萬石以之分撥京城各廠尚可無須如許之多因思畿輔各屬今年麥收大率歉薄而順德廣平大名三府尤甚亦應撥與麥石以資接濟著傳諭周元理悉心籌畫於此十萬麥石內酌撥二三萬石協濟各屬於貧民口食更為有益其順德等府與豫省接壤者即可截留後運麥石分撥尤為近便其餘各屬有應協濟者即可將盛京運到天

津麥石。覈計水次遠近酌撥。周元理於酌定時。一面具奏。一面飛咨鄭大進照辦。此旨著由五百里發往。令該督等上緊籌辦。至豫省各屬。雖均報陸續得雨。似尚未能普遍深透。而保定等處。近日曾否普得透雨。亦未據奏及。深為廕念。著周元理。鄭大進。將日內曾否普霑渥澤之處。迅速具奏。並諭令倉場侍郎知之。○以正黃旗漢軍都統德保。鑲白旗漢軍都統王進泰對調。○辛卯。諭據袁守侗等

奏。遵旨前赴甘肅。將各州縣監糧。按其收發存貯實數。通行盤驗。俱係實貯在倉。委無虧短。並覈對節年動用數目。亦屬符合等語。甘省自收捐監糧以來。停止採買經費。且節年動用之外。現在倉貯尚有餘糧百餘萬石。辦理甚為妥協。著將該督勒爾謹。交部議敘。其自藩司以至各州縣。承辦監糧各員。自開捐至今。辦理著有成效者。並著勒爾謹查明具奏。交部一併議敘。○諭軍機大臣等。據孫士

毅奏。藩庫錢糧有正項寄庫之分。正項收支皆分款開載。其寄庫一項。如軍需工程撥出待領。及俸工養廉存庫未支等銀。每月止將銀數彙冊開呈。而於一切收放存貯。並不將應撥應領分款備造。其中有無舛錯。難以稽查。恐滋弊竇。請將寄庫銀兩俱分別款項。按月呈送督撫存覈。並請飭各直省一體查辦等語。孫士毅所辦頗為周妥。滇粵二省既係相同。各省藩庫情形自亦大概相似。著傳諭各省督撫轉飭各該藩司。通行確查該省庫貯情形。如有與滇省相仿者。均照孫士毅所辦呈報督撫存覈。如該省並無寄庫。及撥領未清之款。或實有不能照辦之處。並酌量據實奏聞。將此遇各督撫奏事之便。通行寄諭。令其轉飭各該藩司查照覈辦。孫士毅摺並著鈔寄閱看。○又諭上年秋間。蘇爾相到京。朕念其在緬羈留日久。加恩陞用游擊。並令回原籍看視。嗣因其與得魯蘊相熟。恐得魯

蘊到關進貢。應令前往接受。伴送來京。是以令其俟事畢回籍。今當盛夏。邊地瘴發。現無可辦之事。著傳諭裴宗錫。即令蘇爾相乘此閒暇之時。酌給假期。回籍看視。於冬間再行赴滇。將此由五百里傳諭知之。○內閣學士塘古泰病休。以大理寺卿達椿為內閣學士。兼禮部侍郎。○以雲南開化鎮總兵許世亨。騰越鎮總兵劉國樑對調。○壬辰

上御勤政殿聽政。○諭軍機大臣等。據國泰奏。

抽查聊城縣知縣范汝載庫項內短少應存穀價銀五千兩。據稱發易錢文及墊燒臨清磚柴窰動用。隨行藩司確查。並無案據等語。已將范汝載革職。交該撫嚴審定擬矣。聊城係東昌府首邑。知府赫申泰近在同城。何以漫無覺察。直待該撫國泰出其不意。抽查各屬。始經發覺。該府所司何事。赫申泰原不過循分供職之員。今乃於同城首邑虧缺糶穀價銀。並不先行揭報。則該府於地方公事全

不留心。或並有徇庇情弊。亦未可定。著傳諭國泰。即速查明。赫申泰因何並不及早查明稟揭。如居官本屬平常。即據實奏。至山東省城。已得透雨。其餘各屬之雨。止二三寸。尚未為優渥。現在曾否普遍深霑。並著即行具奏。將此由五百里傳諭知之。○又諭前因甘省本年春夏缺雨。曾傳旨詢問勒爾謹。各屬是否得有透雨。如可趕種大田。即速酌借籽種。以資耕作。茲據勒爾謹奏稱甘省春夏雖未得透雨。但近河下隰。俱堪播種。即高阜山田。頗得微雨。亦無礙種植。惟因屢被偏災。小民缺乏籽種口糧者。十居五六。隨飭酌動官糧借給。俱已播種齊全。又通查各屬內有被災被雹之正寧。崇信。涇州。鎮原。靈臺。永昌。六州縣。又皋蘭等二十二州縣。得雨較少。麥禾受傷。已成旱象。並飭勸令一律芟鋤。俟得有雨澤。即乘時改種秋禾。查明缺乏籽種之戶。再行酌量借給。俾資耕作等語。自應如此辦

理現在曾否得有透雨。甚為軫念。如已成旱災。該督卽飭屬實力查辦。務使貧黎俱各安所。將此由五百里傳諭知之。仍將曾否得雨及如何籌辦情形。迅速覆奏。○刑部宗人府奏。民人賈通高二毆傷覺羅赫蘭泰寶興。照例擬以杖徒。赫蘭泰寶興照例擬杖折罰一摺。得旨此案刑部宗人府會審。將賈通高二照毆傷覺羅律擬以杖徒。覺羅赫蘭泰寶興照不應重律擬杖折罰。所辦尚未允協。常人

毆辱宗室覺羅律有專條者。固欲使齊民之不敢輕褻天潢。亦隱示宗室之各當律身自重也。若宗室覺羅並不與人爭較。而常人輒敢毆及。自當照律科罪。若宗室覺羅先已尋釁毆人。其人因而還手。則是宗室覺羅不知愛惜。自取其辱。卽當以鬪毆論。彼此同科。不應更為區別。且宗室覺羅各有養贍錢糧。尤宜在家安分。若輕入茶坊酒肆。已自失其尊貴體面。本為不足惜之人。倘復滋事召侮。行

同無賴。又豈可曲加優異乎。至向以曾否拴繫黃紅腰帶為分。雖亦別嫌明微之意。但恐宗室覺羅因有此例。轉恃黃紅腰帶為護符。動輒毆人肆橫。毫無顧忌。所謂愛之適以害之也。況宗室覺羅犯該笞杖者。例當准以折罰錢糧。已存議親之典。更何必多其條例導之犯法乎。嗣後審擬此等案件。如宗室覺羅並未生事。常人擅行毆及者。自當照例杖徒。問擬。若係宗室覺羅先行動手者。卽照尋常鬪毆論。其曾繫黃紅腰帶與否。竟不必論。庶共知儆畏。各以禮義自閑。期無負朕教誨成全之意。著交刑部會同宗人府另行妥議條例具奏。此案卽照新例行。尋議宗室覺羅輕入茶坊酒肆。滋事召侮。或與人鬪毆。不論曾否腰繫黃紅帶子。其相毆之人。照尋常鬪毆一體定擬。其宗室覺羅應得罪名。亦按例定擬。賈興赫蘭泰寶通高二卽照新例更正從之。○以通政司副使陳孝泳為光祿寺卿。

以故奉恩將軍八十六子仙聰襲職。○癸巳吏部議奏告病人員令督撫等詳慎註考。如有告病時出具應補考語及病痊補用後或犯有貪酷劣蹟並才力不及者將從前出考之督撫及該上司照保薦不實例分別議處並移咨兵部一體辦理從之。○甲午諭上年因山東拏獲鹽梟訊係在海贛交界偷買老少鹽觔販賣是場竈餘鹽竟成弊藪不可不通盤籌辦因諭各督撫會同各鹽政就該處情形斟酌妥議據實覆奏并諭令不得因朕有此旨稍存遷就續經直隸總督等覆奏長蘆向係散給錢文山東巡撫亦奏請照長蘆例行是該二省均已通行無礙其餘各省有本無老少鹽觔毋庸定議者亦有遵照朕旨酌量議行者惟江南則請設立官垣收賣餘鹽令肩挑背負貧民赴官垣領賣挑販但不許多觔越境立法未為妥善經部臣議駁因復諭令高晉等另行會同詳悉妥議具奏續

據高晉等議設餘引招商開店並清釐場竈情形會摺覆奏朕復批交部議尚未議覆今思若兩淮老少餘鹽勢實難於停止高晉等何妨將實在情形詳悉直陳而另籌防杜私梟之法乃始欲設立官垣及經駁飭又欲定老少額數不許續補仍屬有名無實而非經久覈實之計豈伊等恐朕迴護前旨故為此勉強遷就耶朕方切戒諸大臣不得意存迴護豈肯躬自蹈之况前降諭旨甚明高晉等更不宜如此過慮現在李侍堯來京陛見在軍機處行走伊於外省鹽務情形素所熟悉所有兩淮老少餘鹽一摺著交軍機大臣會同該部詳悉妥議具奏。○命協辦大學士英廉內閣學士錢載教習庶吉士。○乙未諭據郝碩蘇凌阿奏查辦全德在九江關監督任內任意浮收於定例加增四分之外又復加收合計七分有餘是否全德一人獨得抑係與家人書役按股分肥尚須徹底根究又將

存庫積平銀四千七百餘兩。藉口找給丁役。解部添平。以致庫項虛懸。顯有隱射侵漁情弊等語。全德著革職。俟押解到京。交軍機大臣嚴審定擬。至該關浮收情弊。有應在該處查辦者。並著郝碩督同蘇凌阿嚴查審辦具奏。○又諭據郝碩蘇凌阿奏。查出全德在九江關任內。浮收平耗銀兩。并以多報少一案。業經降旨。將全德革職。交軍機大臣嚴審具奏矣。此案蘇凌阿能將全德任內各情弊。逐

一據實查出。並不稍存徇隱。所辦甚好。且九江關侵貪之弊。舒善及全德已經兩見。不可不加整頓。蘇凌阿著調補饒九南道。即兼管九江關事務。所有新授監督穆騰額著回京供職。其吉南贛道員缺。亦有管理贛關事務。如孫廷槐尚能勝任。即令其調補吉南贛道。如人地不甚相宜。即於通省道員內選員調補。遺缺令孫廷槐補授。著該撫即行酌量辦理具奏。○又諭本日據大學士于敏中面奏

伊塔任嘉春捐納分發主事。嚴掣戶部。雖例不迴避。但誼屬至戚。理應避嫌。請交部另掣等語。任嘉春著分發刑部學習行走。至在京各部院堂司等官。雖非外任上司屬員可比。亦有管轄考覈之責。而外姻親屬中。如翁婿甥舅之類。戚誼最為親近。向例概不迴避。究未妥協。著該部另行定議具奏。尋議各部院滿漢堂司各官。外姻親屬中。母之父及兄弟妻之父及兄弟已之女婿嫡甥在同衙門。令

官小者迴避。同官者。令後進者迴避。至筆帖式雖無辦事之責。然祖孫父子兄弟伯叔情誼至篤。如在同衙門。難免瞻顧。向例無迴避明文。今請司官筆帖式如有祖孫父子伯叔兄弟同衙門者。亦令官小者迴避。同官者。令後進者迴避。若同係筆帖式。仍毋庸迴避。從之。○諭軍機大臣等據周元理奏。正定縣伏城驛接收湖南遞到本箱。轉交馬夫李興遞送。馬夫輒將本箱置放號門。進內備馬。致被

賊竊去。旋於北關外尋獲。箱鎖扭斷。封袋破損。查對傳牌。失去公文十一角。除飛提驛書馬夫人等。嚴審究擬。並緝拏竊賊外。請將正定縣代拆行之典史曹士鳳革職。因公出外之正定縣知縣趙廷寀。交部議處等語。已批交該部知道矣。本章關係緊要。沿途驛站自宜加意護送。何得置之門外。致被偷竊。怠玩已極。著傳諭周元理。即將驛書馬夫人等嚴訊有無別情。並飭上緊緝獲賊犯。從重究治。以示懲儆。至郵遞本箱。理宜慎重。似此漫不經心。設遇箱內貯有叅官本章。而所劾之員。間知信息。密遣人中途竊去。以冀耽延消弭。尚復成何事體。雖箱內本章。未曾遺失。但今歲河南省已有本箱被竊之事。半年之內。犯案疊出。可見外省吏治廢弛。於遞送本箱要事。視同泛常。不可不實力整飭。著傳諭各省督撫。嚴飭所屬。於驛站事宜。務須實心妥辦。無致疎虞。如再玩忽從事。一經發覺。除將

該員斥革究治外。並將該督撫及該管上司從重議處。將此遇各督撫奏事之便。諭令知之。又諭。前因京師及近畿一帶。雨澤久愆。曾派德保。胡季堂。前往密雲縣之石匣龍神廟。虔心祈禱。即經獲有甘霖。並據胡季堂面奏。龍神殿宇窄狹。現與周元理相商。酌量捐貲。另建以答神庥。並請俟工竣時。頒賜扁聯等語。已允所請。今思既已改建。廟工不宜從簡。恐伊等所捐有限。尚不敷用。現降旨。發圓明園庫銀一萬兩。以資工作。著交周元理會同胡季堂。速委妥員。前往該處。確勘數估。敬謹修葺。俾廟貌崇闕。以昭靈貺。除就近諭知胡季堂外。將此傳諭周元理知之。又諭。據榮柱奏。於六月初一日。至嵩山告祭。薰壇虔禱。即於六月初二日。甘霖大霽。入土深透。四野均霑等語。覽奏欣慰。

神明賜佑。朕敬成詩一章。應勒石紀恩。至榮柱摺內稱。

嵩嶽効靈。雖屬相沿引用。但以施澤濟民之事。目為効靈。於心深切不安。嗣後凡遇此等措詞。究宜斟酌為是。

嶽神廟宇。從前曾遭回祿。後雖經重建。恐未必能如前閎壯。茲

嶽祇靈應。澍雨優霑。以救通省數百萬生民之命。

靈貺莫大乎此。自宜敬修廟貌。以答

神庥。所有工程經費。著交鄭大進確實查覈。並令榮柱親往逐一估勘。妥為經理。務使廟貌巍煥。悉復舊觀。以妥

神靈。而昭秩祀。俟工竣奏聞。再將御製詩發往勒碑以紀。

靈貺。將此諭令知之。

御製詩。自去歲秋逮今夏。河南北旱甚。燕齊降神。維嶽應虔禱。申命往祈。遂霈禋。二麥已知。

未登廩。大田可望。普興犁。配天峻極。敷天澤。謝以為慙。額手稽。○旌表守正捐軀直隸深

州民王庭傑女王氏。○丁酉。諭軍機大臣等。

據通政司奏。直隸地方。遞送湖南巡撫本箱。

在伏城驛被賊竊去。旋於北關外尋獲。查對

傳牌。失去公文一摺。此案前據周元理奏聞。

已諭令上緊緝獲賊犯。重加究治。並將驛書

馬夫人等。嚴訊有無別情矣。賊匪既將本箱

竊去。開看知係本章。即應拋棄。何以又有短

少公文。及扯破封套之事。著再傳諭周元理。

迅速查拏賊犯。務獲。將此情節。嚴訊明確。據

實具奏。至所失湖南巡撫公文十一角。並著

諭令該撫查明原發稿案。補送各衙門覈辦。

將此併諭湖南巡撫知之。通政司摺。併著鈔

寄閱看。○又諭據鄭大進奏。各屬得雨情形。

一摺。內有

嶽瀆効靈之語。不應為此言。以施澤濟民之事。目為効靈。朕閱之心甚不安。昨榮柱摺中

用此語。曾傳諭訓示。今鄭大進復如此措詞。何皆心存慢忽。不知敬奉。

神明乎。又據稱輝縣獲嘉修武新鄭武陟林縣得雨尚未霑足。甘霖之續霈。旦暮可以豫期等語。尤為失當。已於摺內批示。豫省雨澤久愆。朕宵旰焦勞。幾於無策。茲命虔禱。

獄祇。幸即渥霑甘澍。救百萬蒼生之命。朕感謝之餘。倍深寅畏。鄭大進身為巡撫。亦當常體此心。以邀

靈貺。豈宜意存滿足。且謂旦暮可期。數月來伊等非不設壇祈雨。而屢求不應。未必非此等輕忽之心所致也。所有未經霑足之輝縣等六縣。仍宜籲邀優澍。並令各該縣一體設法誠求。務期普渥甘膏。及時趕種秋稼。以冀有收。豈可因他處均霑。置此六縣於膜外。聽其向隅乎。至於章奏自有體裁。措詞尤宜明順。屢見該撫奏摺。多有妄用文調。及辭不達意之處。該撫素能實心辦事。奏牘本非所長。

亦當慎選幕賓。妥為繕稿。該撫惟當於通體大意。悉心覈定。轉不必於字句之間。率意推敲。致令文氣晦窒。亦不得圖省修金。延請庸劣不通之人。輕畧從事也。將此傳諭知之。仍將輝縣等六縣。曾否得雨。普徧之處。即行覆奏。○廣西巡撫吳虎炳。續報天保。歸順。奉議。三州縣。墾熟水旱田一項九十一畝。水田一百八埤有奇。○戊戌。諭軍機大臣等。據周元理奏。通州查出客商積麥約有二十萬石。請將此項客販麥石。酌撥十萬石。運京供糴。已屬充裕。其河南轉運陝西之麥五萬石。請一併留於直隸備用等語。此項麥石。昨據順天府奏聞。已派金簡。胡季堂前往通州。確實查辦矣。此項麥石。如果係販戶囤積圖利。觀望居奇。自應查明入官。以示懲儆。若係外來商販。陸續運通。止宜令其比市價稍平。速行出糴。又未便入官。交販平糴。致商販聞風裹足。金簡等現在通州查辦。自可得其實情。如此

項麥石。應行入官。即將十萬石運京平糶。所有河南轉運之麥五萬石。即可全留直隸備用。若實係眾商之麥。湊集在通售賣。並非囤積居奇。止須諭令平價速糶。毋庸入官運京。即應仍遵朕前旨。將河南所運之麥二萬石。及奉天海運麥內。酌存一萬石。留於直隸備用。其餘七萬石。全行運京平糶。著傳諭金蘭胡季堂。即速查明。分別妥辦。一面具奏。一面飛咨周元理。查照辦理。周元理摺。著鈔寄閱。

看。此旨並諭令周元理知之。○己亥。諭。昨經降旨。補放各省協領。佐領。防禦時。俱著將擬正擬陪之人。送京引見。其補放擬正時。擬陪之人。記名與否。臨期再降諭旨。今既定例辦理。嗣後此等擬陪之人。記名與否。著該旗於帶領引見時。即照補放外省驍騎校之例。摺內聲明。具奏請旨。○諭軍機大臣等。王亶望奏。海塘工程沙水情形一摺。據稱鎮海汛歲規二字號內。魚鱗石工塘外。請建築坦水二

層等語。坦水保護塘工。最為有益。從前塔山等處坦水。俱用竹簍。頗覺得力。此處添築坦水。似應亦用竹簍。自更足資捍衛。著該撫妥協辦理。仍一面據實奏聞。至又據稱岔口外面陰沙。漸見刷塌。而七里廟一帶。新漲陰沙。此係極好機會。從此日漸南趨。亦未可定。向來海塘情形。每兩月奏報一次。現當緊要轉關之時。朕心甚為厯念。著該撫於下月。繪圖再奏一次。以慰懸注。又披閱該撫進到之圖。

未為清晰。該撫從前節次進呈之圖。塘內用深綠。中泓用深藍。陰沙用水墨。各色繪畫分明。今此次所進之圖。僅用淡色勾描。不分深淺。未能一目了然。著并諭該撫。嗣後進圖。仍照舊式。分別顏色繪畫。將此由四百里傳諭知之。○軍機大臣等議覆。哈密辦事大臣佛德奏。稱派往新疆之布政使。按察使。應得分例。從前出征例內。並未定有專條。礙難辦理等語。兩司派往新疆者。非曾經獲咎。即不能

勝任之員。且素得俸廉本厚。理宜自備資斧。報効。請嗣後派往各員。所有分例一概不准支給從之。○又議覆大學士管雲貴總督李侍堯奏稱。永昌普洱等府。界連緬匪。每歲派兵五千五百名防守。兵數過多。徒滋繁費。今擬於杉木籠設一大汛。駐兵五百名。於干崖設一小汛。駐兵二百名。至查禁關隘。最為緊要。擬於杉木籠汛內。撥兵二百五十名。分布虎踞等關。及隴川等處。於干崖汛內。撥兵一百名。分布銅壁等關。及蓋達等處。嚴查出入。又聲息相通。必資塘遞。查南甸至沙冲口。二十里。為東西總匯。應增設一塘。安兵十名。沙冲口以東至隴川。舊有四塘。應增一塘。沙冲口以西。舊有一塘。應於干崖一路。增設兩塘。戶撒一路。增設兩塘。各安兵五名。一切文報。在隴川等處。以內令塘汛馳遞。以外令土練馳遞。龍陵以南之三台山地方。最為扼要。擬於此處設一小汛。駐兵一百名。又於此內撥

兵五十名。分布戛中。弄臭。遮帽。猛戛等處。率同土練。嚴查出入。令總兵。副將。每年春秋巡查二次。提臣查察一次。臣亦於每年冬。親赴邊外。巡查一次。以防玩愒。至普洱重鎮。駐兵二千。思茅。駐兵五百。又增築新城垣。墉益加壯固。每年責令該鎮親赴該處。查閱二次。無庸出防。以省冗費。順寧一路。每年出防時。亦派兵四百名。駐守緬寧。查緬寧本有兵三百名。常駐今擬於順寧營。再撥兵一百名。添駐可免每歲派撥之煩。均應如所請。從之。○庚子。諭軍機大臣等。前據順天府奏。通州城關有堆貯客麥二十萬石。恐係囤積。因命金簡。胡季堂前往查辦。尋據周元理亦奏此事。並請多留麥石。於直隸備用。並交金簡等查覈妥辦。今據金簡。胡季堂奏。訊問現在客民八十餘人。僉稱此項麥石。實係眾商自各處運到。節次耀賣。除已賣三十餘萬。現存二十萬有零。正在陸續出售。並非囤積。觀望等供。現

將各商賬目逐細確查分別查辦。至官辦麥石應仍遵前旨將河南後運之二萬石并奉天海運麥內酌存一萬石留於直隸備用。其餘七萬石全行運京以資平糶並可為明春接濟等語。所奏甚是。自應如此辦理。直隸迤南各屬今年雖二麥歉收然鄉村人衆粗糲自甘尚可魚食雜糧以資餬口。今既普得透雨趕種大田秋收後即可贍給饗食無事多需麥石而京師百萬戶食麥者多即市肆日

實錄卷一百一十八

五

售餅餌亦取資麥麪自應多運多糶以平市價。况京城之麥全藉山東河南商販運售今歲豫東兩省麥竟無收尤不可不多留有餘以備來歲青黃不接時之接濟。所有河南奉天轉運麥石自應仍遵前旨以七萬石運京留三萬石於直隸備用方為妥協。將此傳諭周元理遵照辦理。金簡等摺並鈔寄閱看並諭金簡胡季堂知之。又諭據畢沅奏太白山神夙昭靈應司率在省各官赴廟禱雨復

委員親詣靈湫取水六月初一日甫經到山雷雨立需初四日水方到省是夜大獲甘霖連三晝夜入土十分深透並據附近各屬稟報同日普潤均霑等語覽奏欣慰並親製詩致謝。

神明賜佑靈應聿昭我君臣當益申虔敬乃摺內稱

山祇効順雖屬相沿引用但以施澤濟民之事目為効順未免褻慢於心深切不安已於

實錄卷一百一十八

五

摺內批示嗣後凡遇此等措詞理宜斟酌妥協為是並著該撫於祠內酌建碑亭刊勒御詩其碑身高寬尺寸即開明遇便具奏候朕親書發往將此傳諭知之。

御製詩麥前暘雨各乘時麥後甘餘日待滋為禱靈山立垂佑遂施甘露果昭奇樹碑鑄鐵傳福地取水凝湫自皓池粒我蒸民布天澤蠲誠致謝此摺詞。兵部議准烏魯木齊都統索諾木策凌奏滿城城守營設駐眷兵專

管員弁。未便僅以內地派赴聽差之員管轄。以致屢易生手。請將鞏寧城聽差都司一。千把總各一。俱改為經制實缺。即將內地營制較簡之陝西鳳翔城守營都司。甘肅永固協千總。河州協右營把總三缺。裁汰移往。其原派聽差之清水營都司。興漢鎮標千總。延綏鎮標中營把總。俱改為鞏寧城守營實缺。所遺內地各缺。將現議裁汰各員調補。從之。

賈李李

李

氏。河南南陽縣民邱二妻許氏。○辛丑。諭。據王亶望奏。嶧縣知縣吳士映。年力衰邁。辦事每多遲誤。近則益復灰頽。請勒令休致等語。吳士映著革職。該員年力衰頽。必非一日。王亶望蒞任。已將一載。豈無見聞。何不早為糾劾。至今始具奏耶。必係聞楊景素抵閩後。即有叅劾知府徐元等之事。恐伊到浙江時。察出吳士映衰老情形。必然劾辦。故該撫豫為此奏耳。且因嶧縣有抗糧毆官之事。而即

叅縣官。亦非政體。王亶望著交部嚴加議處。守令為親民之官。責任綦重。有劣蹟者。自應立掛彈章。即衰庸者。亦宜隨時劾退。若任意姑容。戀棧必致貽誤地方。豈整飭吏治之道。此等惡習。恐不獨浙閩為然。各宜實力整頓。將此通諭各省督撫知之。○諭軍機大臣等。昨金簡等奏。查明通州城關堆貯麥石。實係眾商自各處運來。陸續出售。並非囤積。當為分別辦理等語。所辦甚為公當。已諭知周元理矣。京畿種麥本少。即遇二麥豐收之歲。亦藉商販流通。客麥愈多。則市值愈減。乃一定之理。目今麥價較昂。如果有奸商囤積居奇。自當從重懲治。如係隨時糶售。正當聽其源源接濟。以利市廛。此項通州麥石。若非朕派令金簡。胡季堂往查。地方官必不能如此細詢妥辦。倘據劉我初報。不為分別查覈。概行入官。既以苦累眾商。且致此後。商販聞風。裹足於京城民食。亦多未便。劉我稟報時。祇知

以稽查為盡職。未免近於孟浪。而周元理間有商麥囤積。惟圖直隸多留麥石。於通商利民之道。豈竟未曾計及耶。將此諭令知之。○以安徽寧池太廣道劉墀。為陝西按察使。○壬寅。諭據周元理奏。奉天運麥海船陸續進口者。已有二十隻。約計共裝麥二萬餘石。現已開兌過載。星速挽運抵通。其委員珠凌阿等。自願照運豆之例。前赴通州。眼同交兌等語。此項麥石。從海運進口。甚屬迅速。所有奉

實錄卷一百一十五

十一

天押運委員。俟差竣時。交該部帶領引見。○兵部議覆甘肅提督法靈阿奏。烏鎗為軍中利器。請責成總兵。於每年遵例巡查時。閱驗每兵十名。打靶三十鎗全著。並進步連環精熟者。為頭等。備弁分別記功。兵丁重加獎賞。著靶在二十五鎗以上。並進步連環平順者。為二等。十把記功。兵丁量加獎賞。其著靶在二十鎗以上。並進步連環合式者。為三等。毋庸給賞。如著靶不及二十鎗。及進步連環生

疎者。營伍將弁。分別議處。兵丁責革。提督本標烏鎗兵丁打靶分數。亦照此例辦理。年底造冊送部查覈。倘提鎮等不認真查辦。將打靶分數。以少報多。以生為熟者。一經察出。將該提鎮。照捏飾具報例辦理。應如所請。從之。○旌表守正被戕河南濟源縣民丁某妻李氏。○癸卯。諭據傅玉奏。稱本年巡幸盛京。請於黑龍江撥馬二千匹。入於盛京更換馬匹數內。以備更換等語。朕此次前往盛京。沿途應換馬匹。俱足敷用。昨福康安奏。請撥吉林馬三千匹。備用。朕已降旨。毋庸備辦。黑龍江較吉林更遠。此項馬匹。亦毋庸備辦。○江西巡撫郝碩。疏報豐城分宜萍鄉新喻吉水金谿上饒廣豐鉛山南康興國等十一縣。勸墾老荒。續荒及額外新生田地山塘共七頃七十六畝有奇。

實錄卷一百一十六

十二

大清高宗法天隆運至誠先覺體元立極敷文  
奮武孝慈神聖純皇帝實錄卷之一千五十八

實錄卷之一千五十八

一

大清高宗法天隆運至誠先覺體元立極敷文  
奮武孝慈神聖純皇帝實錄卷之一千五十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌六月甲辰

上御勤政殿聽政○以詹事哈福納為通政使

太常寺卿德爾泰為大理寺卿○乙巳諭曰

桑齋多爾濟奏稱據總管通阿岱咨稱巴爾

虎馬甲吉木丕勒哈勒章扣偷竊俄羅斯馬

十一匹經俄羅斯呈報即行拏獲查例載凡

偷盜俄羅斯牲畜者押赴邊界斬決將所偷

牲畜以一罰十仍給俄羅斯等語但如此辦

理不但俄羅斯徼倖愈肆猖狂且現已暫停

貿易固卑爾納托爾尚無回文所罰牲畜似

亦不便發給。現已行知黑龍江將軍等語。內地民人與俄羅斯互相偷盜。既有定例。凡遇盜案。即應照例辦理。且此案是內地民人偷盜。若不照例辦理。倘將來俄羅斯有偷盜內地之案。又何以責其遵例乎。桑齋多爾濟所見甚小。況停止貿易。另係一事。與此無涉。著傳諭傅玉將偷盜馬匹之巴爾虎馬甲吉木丕勒等。即解至俄羅斯邊界。正法示衆。其應賠應罰牲畜。仍照定例。如數追給。俄羅斯仍

傳諭桑齋多爾濟。令其移咨固畢爾納托爾云。今雖停止貿易。然內地人民偶有偷盜。一經呈報。即行拏獲。照例押赴邊界正法。並將所盜馬匹。如數罰十賠給。爾等應知天朝於一切事。俱秉公辦理。並未因從前瑪玉爾妄自尊大。致傷和好。即不為爾等辦理。其停止貿易一事。俟爾等回文。再行查辦。并不以此遂廢定例也。將此傳諭俄羅斯固畢爾納托爾知之。○諭軍機大臣等。據鄂寶戴第元奏

黃河南岸水勢淺澀。江廣幫船艱於渡黃。情形一摺。已傳諭薩載。上緊挑濬。迅即覆奏。其摺內又稱。總緣天氣久晴。上游湖水不能充暢。淮安一帶。近日雖已得雨。奈多東北頂風。以致清水日縮。一面虔誠祈禱。俾水長船行等語。是淮安一帶。雨澤未能優沛。高晉楊魁何以未經奏及。著傳諭高晉等。即查明淮安等處。缺雨景象。若何。該地方官是否設壇祈禱。並查明江寧。蘇州一帶。曾否被旱。各情形。

迅速覆奏。如仍有應行誠祈。及或有偏災之處。即行實力籌辦。此旨。著由五百里發往。仍著據實由驛速奏。○又諭。據鄂寶等奏。現今彭家馬頭水深一尺。高家馬頭水深亦僅一尺三四寸。緣湖水不能充暢。近日又多東北頂風。在在淤淺。而江廣糧艘。體質本重。空船尚須水二尺三四寸。今水勢淺澀。江廣各幫未渡黃船。尚有七百三十二隻。河臣薩載。督令河員。集夫疏挑。今已深有一尺八寸。仍竭

力挑挖以期迅渡等語。覽奏深為厯念。薩載何以未經奏及。今年三月下旬。高家馬頭一帶。因東北風兜阻。長有嫩淤。糧船艱於渡黃。曾諭令薩載。上緊設法挑濬。俾漕船迅速通行。嗣據薩載奏。業經多集人夫。竭力挑濬。河水漸充。漕船陸續渡黃無阻。至河內漸淤。必得清水刷衝。方能盡濬。自該總河奏辦以來。又經數月。糧艘陸續北上無滯。今江廣幫船尚有七百餘隻。未能渡黃。而高家馬頭等處。

河水僅有一尺許。河身淤阻可知。自由今歲豫省缺雨日久。淮源微弱。致洪澤湖水不充。未能暢出清口。以資刷黃之用。但河身現既淤淺。不可不盡心設法。多集兵夫挑濬。使糧船通行無阻。今河南已普得透雨。淮水必增。洪湖亦可漸次加長。清水出口。應較前畧盛。但薩載不可因此稍為坐待。必當竭盡人力。以期裨益河漕。至薩載初二日奏摺。僅稱江廣船身喫水較重。現已多備小船。量為起剥。

陸續挽渡。而於高家馬頭一帶水勢。止云時消時長。其阻滯之故。未經奏聞。豈尚有諱飾耶。著傳諭薩載。即速上緊疏濬。使江廣幫船及早渡黃。毋致遲誤。此旨著由五百里發往。諭令薩載。速為籌辦。仍著將挑濬淤淺。及近日清水出口多少。并幫船曾否銜尾徑渡各情形。迅速由驛奏覆。以慰懸注。并諭鄂寶等。及高晉知之。又諭據裴宗錫奏。彌渡軍犯張振奇。謀財害命案內。所有李枝健。尚氏。張陞。

莊爾功等四犯。業已接准部覆。即應處斬。但有同案待質之田老大等。尚未解到。請將李枝健等四犯。暫為監禁等語。所辦太覺拘泥。已於摺內批諭。此等兇惡夥黨。均當立寘典刑。且經接准部覆。何得復以田老大等。尚須質對為詞。致令兇惡之徒。得稽顯戮耶。至所稱恐兇惡夥黨。恃無活口對質。轉得狡供漏網。該犯等已經部覆定案。問擬斬決。何慮狡供漏網。況張順旺等各犯。近據鄭大進奏。即於豫省正。

法以免押解疎虞。裴宗錫豈轉未見及此耶。又滇省解送土夷開鎖一事。業經將湖南道員王鳴。知縣吳鏞。貴州護道吳光庭。三員解京。令軍機大臣訊明。該夷等解至湖南。並未上鎖。且據索諾木策凌奏到。詢之土夷。面供在鎮遠上船後。經長解官開鎖。情詞確鑿。已無所疑。乃裴宗錫於催令解員陳英棟等赴京。質訊摺內。又稱。據豫省開造夷人清冊。於頭二三起名下。現註有鎖項字樣。而於開鎖補鎖

之處。轉未填註。情節亦屬未明等語。尚欲為陳英棟開脫。豫占地步。更屬非是。裴宗錫平日辦事。不無意存姑息。今於決不待時之犯。希為苟延數日。圖積陰功。而於屬員狡飾之處。轉復委婉其詞。曲為迴護。是其舊時積習。仍屬未能悔改。裴宗錫著傳旨嚴行申飭。嗣後務須痛自湔洗。毋再怙終干咎。吏部議准。廣西按察使哈靖阿奏。佐雜因擅受而釀人命者。斥革後。別無餘罪。向例仍准捐復。但思該員

即不貪酷。其違例擅受。致令蠹役滋累。即不應令其復登仕途。應照永不敘用之例。概不准其捐復。載入例冊通行。從之。○旌表守正捐軀河南舞陽縣民安珩妻李氏。○丙午。諭軍機大臣等。昨據鄂寶等奏。高家馬頭一帶。河水僅有尺許。江廣重船阻滯。不能渡黃。及現在祈禱大雨等因。摺已傳諭。詢問高晉。薩載。楊魁。令其查辦覆奏矣。茲據陶易奏。海州。及所屬沭陽。贛榆。二縣。雨澤稀少。高阜二麥黃萎。

已成一隅偏災。現在覈實照例查辦。其餘各屬。麥收後。即漸翻犁栽種。六月初二。初六。兩次得雨。尚未霑足。日內再得透雨。高下田疇。方可插時。齊全等語。是各屬實有望雨之意。陶易何為隱躍其詞。已於摺內批示矣。海州。沭陽。贛榆。既有偏災。淮安一帶。雨澤又復短少。高晉。楊魁。何以未經奏聞。該處現在曾否得有透雨。及揚州。徐州。各屬。是否亦有望澤情形。及近日曾否普徧得雨。並著高晉。楊魁。即速查明。據

實覆奏。又薩載前奏。僅稱高家馬頭等處之淤。時長時消。江廣重船。止須起剝。即可挽渡。與鄂寶等昨所奏河水淤淺。糧艘阻滯。各情節不符。薩載前奏。又何以不及早詳悉奏聞耶。至河身南岸長淤。薩載前奏。以為因清水出口不暢。未能衝刷所致。固係今歲豫省缺雨。淮源微弱。是以洪澤湖水不能充足。現在河南已普得透雨。洪湖自可以漸加增。近日清水出口。曾否較暢。於刷淤稍有益否。並現在

疏濬淤淺若何。著薩載。即速據實覆奏。又前此每年清口至夏秋時。惟慮倒漾。並未聞有河身淤淺之事。今歲何以屢次停淤。是否因開引河。清黃交匯之處。未能經理妥協。抑或另有別情。並著高晉薩載。即查明實在情形具奏。此旨著由五百里發往。仍著高晉等迅速由驛覆奏。丁未諭。據伊勒圖奏稱。領隊大臣納旺。巡查布魯特邊界回程。據有頂帶之布魯特瑪木伯特。訴稱情願於邊內特穆爾

圖諾爾等處游牧。與哈薩克一體進貢。查布魯特性情較哈薩克奸詐。若前來伊犁懇求。察其情狀。出於誠心。指與卡座遠處。令其游牧。納貢。試看一二年。若以進貢為名。別求僥倖之處。即行逐回等語。哈薩克地方雪大。隆冬牲畜多傷。故准其於雪大時。移居邊內。所牧牲畜。百中貢一。交春雪化。仍各回游牧。布魯特非此可比。伊等平時。即私行進邊耕種。今若准所請。伊等必至春種秋收。至冬又稱

避冷。終年居住。其所進牲畜。尚屬細事。若居住日久。別生事端。彼時再行逐回。轉恐更生缺望。況布魯特等。時常潛往哈薩克。肆行擄掠。今若令其進邊游牧。相離甚近。必易滋事。尤為不妥。不若於來求內徙之時。即不准行。著傳諭伊勒圖。布魯特不來懇求。則已。若前至伊犁。即曉示伊等云。布魯特非哈薩克可比。哈薩克因游牧處雪大。故准其於隆冬進邊暫住。春季仍回游牧。爾等欲於邊內終年

居住斷然不可。亦不敢奏聞大皇帝。並將此事曉諭哈薩克阿布賚知之。令其和好隣封。毋相侵擾。以無負朕矜卹至意。○吏部議奏各省更改繁簡各缺。應令各該督撫分別缺之大小。如丞倅牧令之缺。應請改繁者。即於丞倅牧令缺內。改簡互換。佐雜之缺。即以佐雜內酌改。不准仍以州縣以上之缺。與佐雜互易。從之。○戊申。諭軍機大臣等。據李湖奏。臨湘縣民婦黎李氏。呈控監生黎大本。私刻

資孝集。語多僭越。又查出所作得失圖。刊載墳山圖形碑記。現飭提集有名各犯。親押赴省。徹底根究。從重定擬等語。並將圖集進呈。朕詳加披閱。資孝集中。衆人所作詩文。將伊母比之姬姜太姒。文母皆係迂謬不通之人。妄行用古。與今年已延三所奏舉人王爾揚代人作墓碑。率用皇考字樣者。彷彿相似。並非狂悖不法。如王錫侯之顯肆悖逆者可比。本可無庸深究。尤不宜概行提問。株累多人。

但須訊明黎大本。平日武斷滋事各款。如果屬實。亦止須照現辦劉翹之案。問擬外遣。已足蔽辜。所有該犯親屬及集內有名之人。俱不必提究。仍將朕旨。出示宣諭。俾衆各曉。且令庸陋無識之徒。此後行文。各知檢點。毋再故犯干咎。將此由四百里傳諭李湖。並令三寶知之。○軍機大臣等。奏。朝考拔貢。向例禮部奏請簡派御史二員。點名給卷。稽查彈壓。恐耳目難周。請再添派御史四員。俾於至公。

聚奎兩堂及大門。分頭照料。得旨。是。○旌表守正捐軀河南羅山縣民李某妻黃氏。○已酉。諭軍機大臣等。據薩載奏。高家馬頭一帶。黃河又復淤淺。江廣重運船隻。未能挽渡。及現在祈雨情形一摺。所奏甚遲。已於摺內批示。此事於本月十七日。即據鄂寶等具奏。當經降旨傳詢薩載。次日。又因陶易具奏。各屬均有望雨之意。又經降旨詢問該督撫等。並令薩載據實覆奏。薩載身任總河。河工是其

專責既有淤淺阻運情形。即應一面上緊挑挖。一面奏聞。何以所奏轉在鄂寶等之後。且遲至兩日。殊不可解。著傳諭薩載。即將高家馬頭一帶淤淺處所。曾否挑濬寬深。江廣糧船是否足資挽渡。湖水現在有無增長。出口能否較暢於前。并該處如何祈禱。曾否得有大雨。各情形迅速具奏。此旨著由五百里發往。傳諭薩載知之。庚戌諭前因查辦木商劉思遠虧缺官項一案。究出前任總管全德。

福海監督老格。有借用劉思遠銀兩之事。當經降旨將全德等分別革職解任。送京審訊。並將各任所及京中貲財房屋。暫行查封。原因伊等各有經管關稅。恐有侵蝕錢糧。以便按數抵扣。今據軍機大臣等節次審明。伊等尚無侵蝕虧短各項錢糧情事。且全德所借劉思遠銀二萬兩。福海所借劉思遠銀一萬七千兩。均於此案未經發覺以前。陸續歸楚。老格所用劉思遠銀七百餘兩。亦因代替該

商催辦木植用去。是全德等之咎。實在於所管任內向運木商人借用銀兩。祇須照此科斷。其罪尚不至抄沒家產。所有全德福海老格三人借用劉思遠銀兩。均照數著追入官。其從前查封任所及京中財產。俱著加恩發還。朕辦理庶務。一秉至公。從不肯畸輕畸重。設全德等果有侵短錢糧之事。自當按律嚴懲。不容稍為寬貸。若訊無重大情弊。又豈肯過事苛求耶。至明德繼德將伊弟全德名下銀一千三百兩。私行寄頓。亦自有應得之罪。祇須將明德革職。同繼德一併按律定擬。將寄出銀兩照數追出入官。所有查封財產。並著發還收領。辛亥遣官祭

火神廟。諭曰。曹文植著仍在南書房行走。其未得缺以前。並加恩令其食俸。又諭。今日覽鑲紅旗滿洲世襲佐領呈進家譜。將一支父子之名。其首一字俱用齊字。又一支數人之名。首一字俱用杜字。齊杜二字。見之漢

姓。以此命名。必致數傳而後。竟成伊家之姓。沾染漢習。莫此為甚。嗣後滿洲命名。斷不可數代俱用一字起頭。我滿洲原有滿洲姓氏。豈可忘舊。將此通行宣諭八旗。及各省城將軍副都統等遵行。○諭軍機大臣等。前據勒爾謹奏。甘肅各屬多有缺雨之處。業經屢次傳諭詢問該督。本日勒爾謹奏到各摺。俱係尋常日行事件。而於該省曾否得有透雨之處。未經奏及。尤為厯念。著傳諭勒爾謹。即將

甘省近日曾否普遍得雨情形。迅速覆奏。如有被旱成災之處。該督即飭屬實力查辦。務使貧黎俱各得所。將此由五百里傳諭知之。○又諭前據鄂寶等奏。黃河高家馬頭一帶。水僅尺餘。江廣重船。尚多阻滯。現在虔求大雨。以期增益河流。並據陶易奏。贛榆沐陽被旱。及淮安各處缺雨情形。已節次馳諭薩載。高晉詢問。朕心深為厯念。今據高晉奏。六月初六。初九等日。江寧大雨霽霈。第為時未久。

土性本乾。得此僅能滋潤。而連日陰雲四合。遠處似亦均霑。幸遇閏節候較晚。六月內得雨。尚不為遲等語。是各屬並皆望澤。南省夏至以後。正當插秧之時。畏旱而不畏潦。與北省情形不同。六月需雨甚急。不得以遇閏節遲為解。未知近日。曾否普霈渥膏。得以及時蒔插否。尤為懸注。又據稱。上下運河水勢尚屬深通。江廣重運漕船。出清口後。量為起剝。即可渡黃等語。所奏不實。已於摺內批示。高

家馬頭一帶。存水僅至尺餘。為向來所未有。固由淮源微弱。清水不能暢出所致。但淤淺處。不可不盡力疏挑。以利挽運。又豫省已得透雨。淮水必當加長。近日洪湖曾稍增長否。該處虔誠祈禱。曾得透雨利運否。著傳諭高晉薩載。即速將近日清水出口。能否稍暢。及黃河內淤阻之處。疏挑若何。糧艘曾否過渡。各情節。迅速據實覆奏。此旨著由六百里發往。仍著由驛覆奏。並諭令楊魁知之。將通省

曾否得雨情形一并由六百里速奏。旌表守正捐軀廣東南海縣民郭以文妻劉氏。○壬子。

上還宮。○癸丑。

上御太和殿視朝。文武陞轉各官謝恩。○幸圓明園。○諭軍機大臣等。據薩載奏高家馬頭一帶淤淺。因河面寬濶。水勢渙散。施工較難。現於該處紮枕築壩。收束水勢。一面分段派員。率領兵夫。上緊撈挖。竭力趕辦等語。已於

摺內批示矣。薩載此摺。於六月二十一日拜發。距初四日糧船阻滯未渡之期。已逾半月。尚未得挽運通行。雖今年遇閏。亦不宜過於稽緩。致誤程期。薩載務須董飭所屬。多集人夫。設法上緊挑浚。使江廣重運及早渡黃北上。銜尾遞行。方為妥善。至所稱淮河內陸續長水三尺三寸。洪澤湖內長水五寸。自係初長水時情形。未知近日湖水復得逐漸加增否。再據稱湖內連前存水七尺。較上年此時

尚少四尺六寸。似上年湖水尺寸。即係最小之時。若盛漲亦不過如此。無藉高堰五壩之減水。及酌量水誌。展拓清口矣。是否如此情形。著薩載查明覆奏。又清水不能暢出。固係湖水淺少之故。抑或因改開新河。未能經理妥協所致。然清黃交匯處。較前移下數里。清水尚不能敵黃暢流。若似從前未改時。黃河形勢。則今年必致倒漾侵運。不可問矣。著薩載將實在情形。詳悉具奏。又該處自祈雨以來。曾否得有透雨。河淤挑挖若何。糧艘曾否陸續挽渡。並著薩載迅速具奏。此旨。著由六百里發往。並著薩載亦由驛速奏。并諭令高晉。楊魁。鄂寶。知之。○甲寅。以前任詹事曹文植。為左副都御史。○乙卯。諭軍機大臣等。前因甘省本年春夏雨澤稍稀。業經屢降諭旨。傳諭該督。如已成災。即飭屬實力查辦。今據奏到。蘭州省城已於六月十七。十八日。得雨六七寸。及深透不等。看來陰雲密布。勢甚寬

廣等語。覽奏稍慰廛念。但各屬是否一律均需於秋禾足資長發。其未種地畝。是否可以補植。即著該督。逐一查明。迅速由驛覆奏。至各州縣內。如尚有未得透雨。不能補種之處。並著傳諭該督。勒爾謹。確查實在情形。遵照前旨。督率所屬。實心經理。務使貧黎得所。毋稍諱飾。將此由五百里傳諭知之。○丙辰。諭軍機大臣等。據高晉奏。五月至今。各屬未嘗無雨。而多寡不等。未能一律普遍。江寧鎮江。

揚州通州。海州等屬。山鄉田地。因雨水不足。尚未種齊。各州縣均在祈雨。幸遇閏節氣較遲。若六月內得有透雨。仍可補種等語。是該處田禾。望澤甚殷。倘或遲至閏月。始得透雨。秧田尚可補插否。抑堪改種別項糧食。若各該處間或成有偏災。即應照例查辦。毋稍諱飾。仍將缺雨各屬。曾否得雨。普遍情形。迅速奏聞。以慰廛念。又據奏。高家馬頭一帶。復有淺溢。業經籌酌疏治。而通湖引河。亦應一體

疏濬。并將惠濟等三閘。暫行下板。使湖水全出清口。并力刷沙等語。亦屬補偏救弊之一法。而薩載昨日覆奏之摺。未經提及。或因糧船尚未全出運河之故。若此時糧船已全過閘。則暫閉惠濟等三閘。以助清水之勢。自屬有益。著薩載即速妥辦。覆奏。至前據鄂寶等奏。江廣重船。尚有七百餘隻。未能渡黃。因諭令薩載等上緊疏浚。以利漕船。昨薩載已經奏到。而鄂寶尚未覆奏。著將現在漕船能否

設法挽渡之處。迅即奏聞。此旨著由六百里發往。仍各將應行覆奏之事。迅速由驛覆奏。並諭楊魁知之。○丁巳。諭軍機大臣曰。楊魁奏。江寧蘇州一帶。自六月上旬得雨後。半月以來。連日晴霽。高阜田地。待雨栽插。農民望澤甚殷。並據常州鎮江揚州淮安各屬。亦稟報缺雨。現在設壇祈禱等語。深為廛念。江南六月。正當秧田栽插之時。尤須雨水滋灌。若得雨過遲。於田禾不免有礙。同日據巡漕御

史西平奏濟寧等處於六月二十二日自申至亥雷雨大作入土深厚陰雲濃密勢甚廣遠似迤南亦應普遍而楊魁於二十三日拜發此摺時尚未奏及得雨是此次山東大雨江南竟未均霑尤為懸注前因河南山東及直隸各屬缺雨日久大吏等屢祈不應因諭各督撫於名山靈澤有龍潭處專遣大員前往虔誠請水悉皆應禱而得甘霽霽霽闔省均得霑足頗著靈應江蘇各屬自亦必有龍

潭可以請水祈澤著傳諭高晉楊魁若此時尚未得透雨即於各屬名山靈澤專派司道大員前往虔祈請水自可望膏霽優霑期於農田有益該督撫務即誠心妥辦仍即速行奏聞至此時黃河南岸淤淺曾否疏濬稍深糧船能否陸續挽渡並著薩載即據實覆奏此旨著由六百里發往仍各將應行覆奏情形亦即由驛迅奏並諭鄂寶知之○又諭九江關監督事務向來俱派內務府司員管理

是以設有協造二員幫辦審務亦由內務府派往今九江關事務已令蘇凌阿管理則以道員而兼司關稅所屬州縣等官均可差委似無須并派協造之員著傳諭蘇凌阿酌量情形如仍須該員等在彼幫辦則自可照舊留用倘就近之州縣等官內可以揀員兼理即著將協造二員一併裁撤將此諭令蘇凌阿妥協籌酌據實覆奏尋奏州縣有刑錢案件不能長往工所協造似應存留報聞○旌

表守正捐軀江蘇桃源縣民王二聘妻彭氏○戊午諭軍機大臣等據高晉等覆奏高家馬頭一帶挑挖淤淺及清水未能暢出各情形深為廛念高晉等以該處河面寬濶水勢散漫因築壩束水紮筏挑溜俾其冲出河泓再加挑濬固屬因勢利導之計然總不若盼得大雨使清水暢流方能迅速此時如已得透雨自屬甚善若甘霽未能即霽清水必不能驟通而糧艘渡河稽阻於漕務甚有關礙

乃日久株守無策不可不為變通之計。因思黃河毛城鋪峯山閘皆與洪澤湖相為委輸。若暫令糧船經由洪澤湖而行或出毛城鋪或出峯山閘入黃河可避清黃交匯處之淤淺自較迅便但不知糧船過閘入河是否妥協可行不可行朕實不能遙定高晉薩載熟悉河務知之必真著速為籌畫如事屬可行即一面辦理一面奏聞不但於目前有益且以備將來或有淤阻亦可為豫防之一法如

不可行亦即據實奏聞不得因朕有此諭稍為遷就之見著將此旨由六百里發往高晉薩載即速查明由驛覆奏并著將各屬曾否得有透雨及挑濬淤淺各情形一併覆奏并諭鄂寶楊魁知之尋高晉等奏峯山閘實止丈許勢若建瓴漕船難於出閘且徑由洪澤湖而行或出該閘或出毛城鋪仍走黃河由陶莊繞至楊家莊入運北上計紆程一千四百五里似不可行現在高家馬頭一帶河流

漸深漕船已可挽行日內得需甘霖尾船自能迅渡得旨知道了想邇來亦得優渥雨澤矣。旌表守正捐軀山西榆次縣民許吉榮女許氏。是月山東巡撫國泰奏昌邑縣海隄久廢估需銀三萬五千餘兩即可修成不慮潮患隄內陂廢地一千三百二十八頃隄成即可耕種現在居民已認墾一千二百二十七頃雖係旱田實可照水田例六年陞科其修隄銀先於藩庫借發分年按地徵還得

旨所辦好知道了。河南巡撫鄭大進奏豫省望雨各屬均於五月下旬及本月初一二初三五六等日得雨普徧深透得旨覽奏稍慰。既得普霑則及時補種之事應妥速為之勿怠勿緩更不可自滿。陝甘總督勒爾謹奏。現在臣衙門譯漢事少滿洲筆帖式一員請裁下部知之。甘肅布政使王廷贊奏通省惟寧夏等五屬夏禾有收其得雨較遲各府州已成偏災得旨凡有成災者盡心查辦俾

窮黎均霑實惠勉之。署雲貴總督雲南巡撫裴宗錫奏據蘇爾相稟稱緬匪進貢還人之說尚在觀望恐有信到關伊與得魯蘊熟識易於交言集事請仍留職守俟邊事辦畢再回籍省視得旨好如所請留用。又秦普洱境外磨黑汎為各路赴普洱總路應派員弁駐守其盤查分別賞罰照潞江等處例至思茅以外惟九龍江為鎖鑰地有烟瘴刁士完已復土職責令專司查緝又倚邦茶山一帶商民採販之所嚴飭思茅同知加意查覈得旨知道了。

大清高宗法天隆運至誠先覺體元立極敷文奮武孝慈神聖純皇帝實錄卷之一千五十九

大清高宗法天隆運至誠先覺體元立極敷文  
奮武孝慈神聖純皇帝實錄卷之一千六十

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆四十三年戊戌夏閏六月己未朔四川

總督文綬成都將軍特成額奏成都軍標副  
將承辦新疆屯防及邊外土司事務現無衙  
署辦公請添建報聞○庚申諭軍機大臣曰  
勒爾謹奏蘭州府屬金縣之濱臨黃河旱地  
岸高河低難資引灌請設水車十五具引水  
溉田計需銀三千兩懇借項興修分作六年  
徵還等因一摺所辦未為妥協甘省山高土  
厚水利最宜加意講求今既查明什川堡等  
處可以成造水車引河灌溉實係地方急應

興舉之事至所稱動借帑銀令民間按年扣  
繳殊屬非是製車引灌利民自宜官為經理  
豈可復以所費累及閭閻府縣官各有養廉  
理應捐辦以盡牧民之責即或守令力難獨  
辦而總督歲入俸廉豐厚尤宜捐貲濟公方  
無忝封疆重寄乃勒爾謹既知事屬應辦復  
請借項應用令民繳還各已貲而罔卹民隱  
實屬見小若費至數萬之事朕即賞給矣此  
項工費銀不過三千兩即著勒爾謹於養廉

內全行捐出上緊成造以利民用不得復令  
小民扣繳滋累將此傳諭知之仍著將捐辦  
完竣情形即行覆奏○辛酉

上御勤政殿聽政○諭軍機大臣等前因兩淮  
老少鹽觔一事高晉等所定章程未能妥協  
已令軍機大臣會同戶部議交該督撫會同  
薩載伊齡阿就該處實在情形另行確籌妥  
議矣昨因桂林奏請裁廣東老少鹽觔名目  
惟嚴禁私鹽以杜弊源所見頗為近理已敕

部叢議並令查兩淮現在情形若何。茲據查稱兩淮惟附近場竈之通州等十州縣並無官引。准令貧難小民背負鹽觔。易米度日。毋許過四十觔。例不禁捕。亦不納課。乾隆元年經直隸總督李衛奏。老少鹽觔。定以年歲給予腰牌。經部覆准通行。嗣據兩淮鹽政尹會一等題請。無庸分別年歲給牌。止許貧難老幼殘疾。於不銷官引地方。負鹽四十觔。易米度日。均係現行成例等語。是此項貧難老幼

所負鹽觔。止在附近場竈。不行官引地方。售賣便民。原可無庸禁止。第恐愚民貪利。挑負鄰境。有引州縣售賣。即屬私鹽。而鄰近州縣奸民。其鹽價較官鹽為賤。私相售賣。遂致流弊相沿。不能禁戢。若酌令將近場十州縣之鄰境。行引地方。現定鹽價。酌減數文。則鄰境之民。無利可圖。自不復趨之如鶩。而鄰境居民。計鹽價官私相仿。必不敢違禁售私。自亦防杜之一法。第恐商人見小。以減價恐虧成

本未必樂從。不知私鹽既禁。則商引自必暢銷。零計得價似少。而通計獲利定多。又不可不通盤籌畫也。但其事是否可行。朕亦難以懸定。著高晉等會同伊齡阿。悉心熟籌妥議。即行據實奏聞。至貧民挑負。及場竈零剩鹽觔。向來多有奸民。隱載車船偷買。轉售他處。實為私梟弊藪。如果地方文武。及鹽場各官。實力嚴行查禁。庶可使奸徒斂迹。此尤宜安定章程者也。此旨著由五百里發往。一併諭

令知之。仍著將作何定擬之處。即速行覆奏。又諭曰。楊魁奏江寧揚州通州三屬。並淮屬之山陽鹽城種秧地畝。久晴缺雨。高阜之區。未能插時。早象已成。又蘇州常州鎮江太湖各屬。近水之處。均已種植。山鄉高地。未得趕種。其已種之田。亦望澤甚殷。俱各設壇祈禱。目下節屆大暑。即續經得雨。未種之田。止可補種雜糧。現在飛飭行查。如有已成偏災之處。惟當實力籌辦等語。深為廛念。未知此

時曾否得雨。未種地畝。趕種雜糧。其中或有已成偏災者。務須率屬確查妥辦。勿稍諱飾。至楊魁於六月二十八日。拜發此摺時。各屬尚未得雨。清水自未能加長。刷沙敵黃。江廣重船共七百餘隻。未能渡河北上。現在挑濬淤淺。既未能迅速見功。而洪湖待雨增流。又難期以時日。徒爾株守河干。殊為非計。且每歲江廣重運。俱應於八月二十左右。抵通收兌。回空方可不致貽誤。若閏月十五以前。甘

膏滂沛。清水暢出。滌淤糧船得以及時挽運。沿途上緊催趲。自可不誤抵通之期。即或遲至閏月底。全數渡黃。亦尚可設法趲辦。若交七月後。始能挽渡。則各幫抵通太遲。回空之船。必致凍阻稽延。有誤明年漕務。所關甚鉅。不可不豫為籌畫。俾免守滯誤時。著傳諭高晉。薩載。鄂寶等。就現在情形。悉心籌畫。如約計閏月以內。糧船尚不能全數渡黃北上。或令各幫船仍回運河。將所載之米。酌量分貯

淮揚各屬府縣倉內。即令各船回空。俾無誤開兌期日。其米或酌令分年搭運。亦屬通融辦理之道。且該省今歲現有偏災。併可留備賑恤之用。但如此辦理。與糧石漕艘。是否兩便。旗丁等。是否樂從。並著高晉等。會同鄂寶。妥為籌辦。據實覆奏。務期於事有濟。不得稍涉含糊。此旨。著由六百里發往。仍將如何籌辦情形。及曾否得雨。清水能否暢出。刷淤迅速。仍由六百里馳奏。並諭楊魁知之。○又諭

據姚立德奏。自濟寧前赴河南。沿途經過東省之金鄉。單縣。曹縣。豫省之商虞。儀考等屬。於六月二十二。至二十七等日。連遇大雨等語。豫省今年五六月以前。缺雨日久。朕心時為廑念。屢經傳旨詢問。該撫亦節次覆奏。今自前月十九。二十四等日。奏報通省普得透雨。以後各屬。曾否續又得雨。秋禾是否趕種齊全。其各處莊稼長發情形如何。自應陸續奏報。以慰朕懷。乃至今並未續行奏聞。殊深

懸注著傳諭鄭大進。即速查明。近日各屬。是否續得甘霖。其莊稼是否一律補種。并禾苗長發情形若何。據實由驛覆奏。將此由四百里傳諭知之。○以洗馬夢吉為詹事。太常寺少卿德明為太常寺卿。○壬戌。諭軍機大臣曰。署藩司塔琦奏湖南岳州。常德。澧州。等府州五月得雨較少。長沙省城自五月二十一日以後天氣屢晴。沿山田畝地處高阜。土脈易燥。現在隨同撫臣虔禱。至各屬雨少處。并飭竭誠禱祀等語。署臬司楊開鼎所奏亦同。是湖南省城及岳常各屬。盼雨甚切。李湖惟於到任時。奏報情形摺內。稱月來天氣炎蒸。地土漸覺乾燥。必需再需甘霖。庶於禾苗更為有濟。現在飛查各屬。並率屬虔誠步禱等語。至通查各屬雨水若何。及曾否獲霑。渥霽。並未續行專摺馳奏。殊不可解。李湖平日頗知留心民事。今莅任伊始。正當農田待澤之時。自應以此為先務。且李湖豈不知朕宵旰

勤求。惟以愛民重稼為念。顧可不隨時據實入告乎。著傳諭詢問李湖。該省曾否得有透雨。並缺雨各處田禾有無干礙情形。即行據實覆奏。不得稍有諱飾。此旨著由四百里發往。仍著由驛馳奏。○癸亥。諭曰。姚立德奏陝州萬錦灘黃河水長六尺。沁河亦長水七尺餘寸。匯注於黃開封一帶。河水接續增長。時值北風大作。祥符下汛時和驛地居南岸。大隄兜灣迎浪。風勢擁激。子堰隨築隨塌。人力不能施展。二十九日。隄工平漫三十餘丈。除將疎防之文武各員另疏題叅外。並自請交部嚴行議處等語。河隄平漫過水。該管各員均有疎防之咎。自應照例題叅。至該處隄工平漫。並未掣動大溜。且係黃沁驟漲。風勢激撲所致。非人力所能豫防。而姚立德一聞稟報。隨即馳赴工所督辦。著加恩免其交部。○諭軍機大臣等。據鄂寶等奏。六月二十八。九。三十等日。黃水漸長。漕船渡黃者三十九隻。

皆係起空之船。兼資人力。始能挽渡等語。今年江廣重船。因河水淺阻。自六月初四日以來。未渡黃者。計七百餘隻。旗丁等守候日久。且起剝漕米。不免需費。殊堪軫念。著鄂寶即行查明。起剝渡黃各船。酌量給賞。俾其各知鼓舞。以示朕優卹旗丁之至意。至旗丁等向俱隨帶土物在船。亦應起剝。但係伊等自帶圖利。非漕運米石可比。自不應官為辦理。著傳諭鄂寶。於查賞時。止就各船起剝米數多

少量為給賞。其起剝之貨物。毋庸議入。即行分別妥辦具奏。至近日糧艘過黃。又有若干。並著一併由驛奏聞。○又諭。據高晉薩載奏。現駐河干。督率道將。廳營集夫。儘力撈挖。水勢漸有二尺七八寸。湖南幫船。於二十八。九。三十等日。已渡黃三十九隻。現在陸續挽渡。可期無阻等因。一摺。覽奏。畧為慰懷。但據稱二十九日。河口得雨數陣。為時未久。仍虔誠祈禱。冀得甘霖大沛等語。實深厪念。前因江

蘇各屬。間有求雨之處。曾諭該督。撫於所在名山。及有龍潭處。派委大員。虔祈請水。以期誠感。未識曾否應禱得雨。今復思

惠濟龍王廟。近在河干。素稱靈應。該督等曾否親詣禱祀。如尚未辦。及著高晉薩載。即詣廟內。潔誠祈禱。或可冀甘霖沛施。俾清水得以驟長。暢出。刷黃利漕。此旨著由六百里發往。仍著將該處曾否得有大雨。糧船於初一以後。續行渡黃若干。及通省有無得雨之處。

迅速由驛六百里覆奏。並諭令鄂寶。楊魁。知之。○甲子。諭軍機大臣會同禮部。議駁曹學閔條奏。會試舉人。徑由州縣出具印結。親齎投部。一摺。已依議行矣。舉人會試。由州縣申詳院司。給咨送部。體制本應如此。况給咨時。書吏並不見面。何從向其勒索。設果有不法書吏。該管上司。自無難據實查究。於士子並無所累。且其事遵行已久。無甚關係。何必輕議更張。曹學閔。前在御史任內。以此事條奏。

曾經部駁。猶屬科道言事之常。今久已陞任太僕寺少卿。既非官守。又無言責。乃復申理前說。期於必行。殊屬非是。明季科道。往往各執一見。紛爭不休。甚至多人附和。門戶分持。其積弊最為可惡。我國家自

祖宗以來。屢經整飭。朕復力為申禁。諸臣漸知前改。今曹學閔此奏。復欲蹈明季言官陋習。其風斷不可長。曹學閔著交部嚴加議處。○諭軍機大臣曰。高晉等奏。上下兩江盼雨各

州縣。六月內均未得有透雨。若閏六月得雨。尚可補種雜糧。但已種秋禾。仍需雨澤霑溉。倘再愆期。亦恐有礙等語。覽奏更切憂望。已於摺內批示矣。高晉等務須率屬竭誠祈禱。以期大霽甘霖。其或已成偏災之處。尤當飭屬實力查覈。照例辦理。勿稍諱飾。至渡黃糧船。昨日奏到。二十八日至三十日。已有三十九隻。今日摺內。僅稱陸續挽渡。其初一日續渡若干。並未聲明。未識現在已能進行無阻。

否。又昨據姚立德奏。河南祥符之時和驛大隄。因黃沁並漲。風勢湧激。於六月二十九日。平漫三十餘丈。由賈魯河入淮等語。幸未掣動大溜。堵築尚易施工。至其漫出之水。既已入淮。則洪澤湖之水。必應增長。清水或可暢出。以資刷黃濟運之用。亦未可定。著高晉等即將近日清水出口情形。若何及糧船每日挽渡多少。並各屬於何日得有透雨之處。迅速具奏。以慰廛念。此旨。著由六百里發往。仍

由驛即行覆奏。并諭楊魁知之。○又諭。據高晉奏。廬鳳道勒保。現在丁憂。請給假治喪。仍令在任守制等語。外官在任守制。久無其事。且可用之人固有。何必破此例。已於摺內批示。其廬鳳道員缺。降旨令基厚補授。并令毋庸迴避。其江寧織造員缺。已將穆騰額補放矣。基厚雖任江寧織造數年。其於道員職任。未能諳習。而鳳陽關之事。亦較龍江關難辦。高晉當留心教導。俾無貽誤。至穆騰額人頗

老實且初膺外任諸多未諳其織造事宜或能循例承辦至兼管關務必須實力稽覈妥協經理方不至誤課累商高晉當就近詳悉指示期於公事有益著傳諭高晉并諭令基厚穆騰額知之旌表守正捐軀山西代州民崔某女崔氏乙丑諭軍機大臣曰鄭大進奏豫省自六月初旬普得透雨之後所種晚禾耘鋤甫畢茲自二十一二十二至二十七八等日各屬得雨一二次或三四次並極透足田禾更易透發等語豫省現在雨澤應時大田自可期豐稔但該省全以麥收為重必須普種秋麥方與明歲夏收有益惟是今年豫省二麥未收貧民缺乏籽種恐於秋間得雨時不能及期耩種以致誤時失業不可不豫為籌畫著傳諭鄭大進於陝西省運到麥十萬石內酌留若干以備秋間借給籽種臨時勸令多種秋麥俾農民得資生計庶災區元氣可以漸復仍著該撫將如何籌辦之

處即行奏聞至山東今歲麥收亦歉並當於秋間酌借籽種令其遍種秋麥其動用何項麥石酌借之處著國泰一體籌辦覆奏將此由四百里一併諭令知之丙寅諭據正白旗滿洲都統奏稱原任遊擊英琳前在四川軍營節次借支整製衣服銀四百二十兩請於伊子佐領保泰名下每季應領半俸內坐扣一半陸續完項等語此事四川辦理本屬非是軍營內官兵服飾皆應崇尚樸素既可節省糜費又能耐久不敝況派往軍營人員起程時既有應得整裝銀兩到後又有鹽菜口糧等項果能樽節用度何至又借用修整衣裝銀兩即如由京派出之侍衛章京等到營後向無支借之例伊等亦無從借領然從未聞有窘迫襁褓之事事竣回京亦無紛紛扣餉之煩綠營官員因有准借之例遂致任意支用竟有借至數百金者回京後不能完繳不惟已身受累甚至累及子孫皆綠該督

撫等心存示惠。反至貽害。辦理不善之所致。所有英琳此項未完銀四百二十兩。毋庸令其扣賠。即著落該督文綬代賠還項。至嗣後自斷不至再煩軍旅。而辦理章程。不可不詳為覈定。倘萬一有應派官兵之事。其起程時。應支給整裝銀兩。及例支鹽菜口糧。仍當准其照舊支給。到營後所有借項修整衣服之例。著永行禁止。如該上司仍有濫行借給者。即照此例。著落該上司代賠。仍交部議處。著交戶部通諭遵行。軍機大臣等會議。兩淮鹽政伊齡阿奏。籌備老少餘鹽。酌定章程。一。各場竈盤鏹。原有定數。設遇增減。必須冊報。應飭各分司場員。徹底清查。分晰盤鏹原額。及增添各數。按季造報。並於年底。將一年產鹽總數報查。至火伏與盤鏹相為表裏。每場每歲俱有定額。一火伏出鹽若干。亦有定數。應將稽查之竈頭。竈長。甄別揀選充當。由運使給發循環印簿。令場官將煎出鹽數。按日

登記。分上下半月送覈。則火伏日期與盤鏹冊數。可以層層比較。永杜私煎。一。淮北海州分司所屬三場。俱係曬鹽。向來鹽池所鋪池磚及地面大小。俱有塊數丈尺。因奸丁展寬池面。時增磚塊。且偷挖土池。私曬漁利。以致淮北之鹽漫無稽考。現在嚴飭分司等。逐一履勘造冊報查。並照淮南之例。發給循環簿。按月具報。即遇旺產之年。其鹽飭亦儘數飭商收買。一。巡緝私販。應將各處所設卡巡。責成牧令及佐雜之銜帶鹽務者。分段管理。某縣之引不銷。即某卡之私不絕。俱可按籍而稽。分上下半年查報。其銷引如額。及有增添者。予以獎賞。議敘。銷不如額。及積引過多者。官則記過。叅處役則責革。嚴懲各等語。均應如所奏辦理。一。淮南北附近場竈州縣。向食餘鹽。未行片引。請將淮南之通州。泰州。東臺。興化。如皋。阜寧。鹽城。淮北之海州。安東等九州縣。俱改為食鹽口岸。量為酌增引額。查該

鹽政所奏仍屬收買餘鹽轉而售賣民間豈即能不致食貴應仍交高晉等會同伊齡阿就通州等各州縣地方情形籌畫定議至所稱淮北邳州山陽等八州縣向係食鹽口岸請將各場窰所有餘鹽量為增引之處查前因邳州等州縣食引壅滯經鹽政尤拔世奏請將一半融綱一半運食今雖地廣民稠較前繁盛但驟為增引豈遂能一律暢銷不至復虞壅積應請一併交與高晉等會同伊齡阿將該處實在情形確加體察再為妥議具奏一海濱窮窰俯仰之資惟賴於鹽因停運之時綱商未能隨時收買不若肩挑背負之衆晨夕往來可以任意交易故以為便今飭商收買餘鹽應確查工本之數按依時價源源收買在窰戶自可不致妄想售私而商人照挑負買鹽之價收買即令照本轉輸亦不得過於擡價查私梟匪悉由影射餘鹽若但令該商等按依時價源源收買而窮窰之

賣給商人與賣給挑負之民究無以異仍恐未能盡杜私售之弊所有江省現在情形可否照兩廣之例將老少鹽名目永遠革除之處應令妥協籌議從之○丁卯諭朕此次前往盛京恭謁

祖陵已降旨於七月二十日啟鑾著誠親王理郡王大學士公阿桂協辦大學士尚書英廉留京辦事其月選之文員內通判州縣等官武員內八旗護軍校驍騎校及外省送到之

驍騎校並年滿千總等官弁俱著王大臣照例驗放其東三省補放水手等官即就近於行在引見至外省督撫提鎮等奏摺俱著齎摺人前赴行在奏遞該部通行傳諭知之○諭軍機大臣等前因清口每經黃水倒漾是以酌開陶莊引河使黃水迤北而行不近清口而移清黃交匯處向下數里以避其患自引河開成以後黃水不復有倒漾之事第因豫省自去秋至今夏缺雨淮源微弱清水不

不能暢出刷黃致高家馬頭一帶屢長嫩淤糧艘亦為阻滯恐係新開引河未善之故曾諭詢高晉等據實直陳及覆奏則稱向年若遇此情形不但清口內外多有淤淺而黃水倒灌當直達於淮揚運河今年只在清黃交匯處蕩漾停淤不致倒灌入運皆賴上年開挑陶莊新河離清口較遠之明效等語所奏雖屬實情然現在既有淤阻不可不為之籌計且凡事有一利必有一害今既令黃河遠

避清口不慮倒灌其為利賴固大但黃河迤北直下駛流暢行其旁即不免有停淤之處又值清水力微不能衝刷遂致淤滯難疏亦屬一定之理但既知有此病自宜設法早治之向來清口出水原係蓄其勢使敵黃有力今清黃交匯處移下數里清水出口後其流漸緩則力微且昨據薩載奏高家馬頭一帶水勢散漫挑挖未能有效先於灘上築壩束水并紮木筏挑溜等語是清黃交匯處河身

太寬以致溜平波緩不能衝出源泓豈能復資禦黃刷淤之力其病似在於此與其事後築壩紮筏補救而無速效何如豫為籌辦使清水至此束流有力之為盡善乎著傳諭高晉薩載就該處情形悉心籌度將如何妥辦之法繪圖具奏此時且不必急辦俟秋汛過後再行擇期興工妥協經理以期日久無弊此旨著俟高晉等郵函奏事之便傳諭知之

戊辰諭軍機大臣等據勒爾謹奏甘省入

夏以來節次得雨未能深透普遍所有阜蘭等三十六廳州縣高阜地方間被旱災雖現在得有雨澤於秋禾足資長發而於夏禾已屬無濟等語甘肅係積歉之區今阜蘭等處高阜夏禾被旱已成偏災不可不速籌撫卹著傳諭勒爾謹即督率所屬實力查勘妥協辦理務使窮黎均霑實惠不致失所再該督摺內稱蘭州鞏昌涇州各府州屬具報於十七八二十三等日各得雨二三四寸及深

透不等。其何處係二三寸。何處深透。殊未明晰。該省盼澤甚殷。朕心深為廕念。今既續得甘霖。自應將各屬報雨分寸。另開一單。隨摺呈奏。方可一目了然。豈宜含混若此。嗣後奏報雨水情形。務須詳晰聲敘。並列單具奏。將此由四百里諭令知之。○已已。諭軍機大臣曰。鄂寶等奏。江西幫船。兩日來又陸續渡黃三十八隻。務期於閏六月二十外。全渡北上等語。前因旗丁守候日久。且起剝需費。已諭令鄂寶查明酌賞。想旗丁聞此恩旨。自必益加感奮。出力挽運。此後渡黃之船。可望漸多。薩載等亦更易於籌辦。但漕船自渡黃至抵通。程途尚遠。愈早愈佳。薩載務須督率所屬上緊挑淤。鄂寶亦須設法催督。使漕船陸續渡黃。及早竣事。不致稽誤期限。方為妥善。將此由六百里傳諭知之。仍著將挑淤渡黃各情形。迅速具奏。又諭今日鄂寶薩載等覆奏漕船渡黃情形。其摺係閏六月初七日拜

發。據稱尚未得有透雨。深為廕念。今歲江南地方。自五月下旬。至六月。缺雨之處較多。高晉楊魁並未先行奏及。直至朕披閱鄂寶等奏報糧船阻滯摺內。有淮安盼得大雨。現在虔誠祈報之語。傳旨詢問。始據高晉楊魁將江蘇各屬缺雨情形具奏。可見伊等平日。並不以民事為重。即所謂設壇祈雨。亦不過具文塞責。無怪其久禱不應也。若朕早知該省盼雨迫切。傳諭詢問。令各竭力誠求。則督撫及各屬。自必稍盡實心。不敢玩忽從事。且朕心周民隱。無時不以地方水旱豐歉為念。每日叩求天佑。若聞各省有望雨之處。必為默禱。蒼穹為民請命。朕惟以誠心感格。或可冀速召和甘。此朕敬天愛民之心。朕臨御四十三年。如一日。高晉等豈尚不知。而遇地方水旱。不即入告。必待朕傳旨切詢。始行覆奏。高晉楊魁甚屬非是。著

傳旨嚴行申飭。此旨著由六百里發往。仍著將各屬曾否得有透雨情形。迅速具奏。○又諭據三寶等會叅互行稟揭之均州知州宋鏡。守備李文宣。叅將巴達馬圖一摺。已降旨將該員等一併革職。交該督等秉公嚴審究擬矣。此等互揭之案。惟當據事劾叅。不可豫存成見。尤不宜稍有偏徇。致審結時。不能覈實持平。今據奏李文宣揭稱宋鏡因查繳私鑄小錢。勒詐銀二千餘兩。并有孫正成等數人赴守備首報其事。各有證據。非李文宣所能捏造。乃三寶摺內稱宋鏡即欲挪借營餉。自必私往營員衙門商懇。斷無在衆人屬目之地。向有嫌隙之守備公然稱貸之理。恐非實情等語。顯係偏向宋鏡。豫為開脫地步。殊屬非是。外省督撫。遇文武交涉之事。往往偏袒文員。最為惡習。三寶何亦蹈此轍耶。但此案不值專派欽差前往查辦。著傳諭三寶等將所揭各情節。秉公嚴訊。徹底根究。務得確

情。按律定擬具奏。毋得稍涉瞻徇。及顛預了事。致干咎戾。再該督另摺奏稱江夏武昌等十二州縣。六月內兼旬不雨。現皆設壇祈禱。前此湖南省兩司所奏。亦有盼澤之處。今該督亦復奏及。是該二省俱各盼望甘霖。以資優溉。刻下曾否得有透雨。其缺雨之處。田禾有無妨礙情節。著該督即行據實覆奏。將此由四百里發往。諭令知之。○庚午。諭湖南江西各幫糧船。因清黃交匯處。間有淤淺。守候日久。迄今始得渡黃北上。且起剝需費。丁力未免拮据。前已降旨。令鄂寶查明酌賞。至各漕船。向有餘米。例隨正米交倉。折價收買。今年江廣各幫旗丁挽運。為日較多。其餘米須留充食用。所有應交餘米。著加恩暫緩交倉。俟下運照數搭解。以示體卹。幫丁至意。該部即遵諭行。○諭軍機大臣等。據高晉奏江寧地方。於初七日自申至戌。始則雷雨霽霽。繼則密雨優滋。入土約五六寸。又自亥時起。密

雨竟夜。至初八日辰時未止。現已深透。且雲氣甚廣。遠近各屬。似應一體均霑等語。覽奏稍慰。高晉此摺。於閏六月初八日拜發。若果初七八之雨。遠近普霑。淮安距京較江寧尤近。薩載等報雨之摺。應先奏到。今並未奏。及則淮安等一帶之未得透雨可知。著傳諭薩載。鄂寶將淮安一帶。曾否得有大雨。清水有無增長。糧船日來渡黃多少。若何迅速覆奏。至初七八之雨。江南各屬。何處已透。何處未

霑。並著高晉楊魁。即速查明。據實覆奏。此旨著由六百里發往。其應行覆奏之摺。仍著由驛速遞。○辛未。諭據軍機大臣會同刑部奏。將前任熱河總管全德。問擬杖流。折枷鞭責。自屬按律辦理。全德福海。前經降旨解任革職。分別解京。原恐其有別項營私。及經管關務。另有侵蝕虧短情弊。是以將伊等任所京中貨產。暫行查封。嗣據浙江。江西。各該撫。先後查明。並無侵虧情節。業經加恩。將伊等同

老格貨產。均行發還。伊等之罪。專在借用所部木商銀兩。今審明全德。福海。所借銀兩。均於劉思遠虧短官項。未經發覺以前。照數清還。而老格所用劉思遠銀數。僅七百餘兩。且係代替該商催辦木植用去。與尋常勒借所部者。尚屬有間。業經著令賠罰。已足蔽辜。念伊等向來遇事。尚知急公奮勉。著加恩。全德。福海。老格。均免其枷責。交總管內務府大臣。差遣委用。○又諭曰。徐恕著調署浙江布政

使。仍俟服闋後。再行實授。其山東布政使員缺。著陸燿補授。所遺按察使員缺。著于易簡補授。○又諭曰。徐恕現已調任浙江布政使。該員在浙省年久。土俗民情。皆所熟悉。且今歲甫經來京請訓。此時無可訓諭之處。著傳諭徐恕。即將藩司事務交代後。速赴新任。不必來京請訓。○諭軍機大臣等。今日薩載。鄂寶等。由驛馳奏摺至。朕先披閱其會奏高家馬頭水勢及漕船渡黃情形一摺。據稱淮揚

一帶各得兩三四寸。但久晴之後。尚未深透。清水亦未見增流等語。朕心甚為屢念。即於摺內批示。及閱薩載專奏之摺。據稱閏六月初九日申刻。河口一帶得雨六七寸。勢頗廣遠。糧船又渡黃一十七隻等語。朕心始為稍慰。但河口一帶。雖得透雨。其遠近各屬。是否一律普霑。初九以後。曾否續經得雨。清水是否增流。足資敵黃。所有江西各幫船。連日渡黃。較前能否益加迅便。著傳諭薩載等。仍即

由驛覆奏。將此由六百里傳諭知之。○又諭曰。國泰奏請將豫省解京第三運麥二萬石。截留山東水次各州縣。以備借給農民籽種等語。此項麥石。已撥給直隸應用。其所屬之順。廣。大。各府今歲二麥亦屬歉少。秋間自亦需借籽種之事。前項撥定之麥。似難再行改撥。但山東省種麥尤關緊要。自不可不早為籌畫。因思陝西運赴河南之麥。共十萬石。豫省借種所需。諒不過三四萬石。餘麥尚多。

此時大田俱已趕種。可望秋成。無庸再行平糶麥石。況民間口食。麥不及米之便。該省昨歲秋收。本屬歉薄。米糧不能充裕。現在江西各幫未經渡黃之船尚多。其尾運幫船。渡黃既遲。抵通更稽時日。誠恐有誤回窖。及冬春開兌之期。莫若將尾幫之米。截留十萬石。與豫省以為接濟民食之用。則糧艘最後之幫。回空既速。而豫省儲備亦得有資。自為兩便。著傳諭國泰鄭大進。即速悉心會商。將豫省

何處水次存貯之麥。撥運二萬石。與山東備借籽種。並將如何委員領運之處。詳悉妥議具奏。並著鄭大進。將截留漕米十萬石。應於何處水次兌收。不使漕船紆途稽緩。妥為籌議。迅即覆奏。以便明降諭旨。將此由五百里發往。仍著迅速具奏。並先行諭令鄂寶知之。尋鄭大進奏彰德衛輝二府與東省舟楫可通。應將所撥麥二萬石。分二起。委府佐運交。截留漕米。於臨清州水次交兌。漕船不致紆

緩報聞。壬申諭軍機大臣曰。閔鶚元奏。安徽雨水情形一摺。據稱安徽二府雨澤最溼。潁州等五府州雨澤亦優。禾苗俱全。裁插惟鳳陽太平廣德泗州和州滁州等屬雨水未能一律普透。自六月初十以後。兼旬未雨。農民望澤甚殷。現在率屬祈禱等語。是安徽省亦有盼雨之處。與江蘇相仿。前因江蘇所屬六月間缺雨。諭令該督撫等於名山靈澤請水虔求。昨據高晉奏。江寧於閏六月初七至

初八日得雨透足。薩載亦奏。清口一帶。初九日得雨六七寸。且俱稱雲氣甚濃。所及必廣。各等語。冀通省或當以次優霑。未知安徽此時曾霑渥霽否。如尚未得透雨。該撫即當董飭各屬上緊誠求。或請水祈禱。以期速沛。和甘倘高阜地畝間有偏災。務須飭屬確查。照例妥辦。毋得匿飾。將此由五百里諭令知之。仍著將曾否得雨情形。由驛覆奏。尋奏臣率屬禱雨。本月初三至十四日。各屬已報得雨。

惟鳳陽太平二府及泗和滁三州。即有得雨之處。不過二三寸。高阜地畝未能深透。現已遴員查辦。得旨覽奏俱悉。其已成災者。妥加撫卹。毋致失所。○癸酉諭軍機大臣等。京師本月十三四日連日陰雨。勢甚霧霏。且雲氣甚濃。又恐有過多之患。幸昨日傍晚時已得晴霽。現在正當伏汛之際。永定河水勢若何。雨後增長若何。隄防是否安鞏。該督現在長安城防汛知之尤悉。著傳諭周元理即將現

在情形迅速覆奏。○又諭曰。楊魁覆奏各屬得雨情形。自二三寸至五六寸不等。且有未據報齊之處等語。同日高晉奏到之摺。亦大畧相同。是江蘇得雨。尚未能一律普徧。其僅止二三寸者。更恐於農田無益。未識此後曾續沛甘霖否。深為廛念。著該督撫即行據實奏聞。其或得雨較遲。不能趕種雜糧。及高阜地畝有間被偏災之處。並著該督撫飭屬確查。照例妥辦。毋稍諱飾。又昨據閔鶚元奏安

徽省所屬州縣內亦有盼雨者。近日曾否普  
渥甘膏。並著高晉查明具奏。將此由六百里  
傳諭知之。仍著由驛覆奏。尋奏江蘇安徽兩  
省均續得雨澤。低田可冀有收。其高田旱歉  
者。飭屬確勘覈題。得旨。看來偏災已成。督率  
屬員。盡心妥辦可也。○又諭曰。鄭大進奏。平  
糶陝麥一摺。固因接濟民食起見。至所稱如  
有未糶之麥。留備明春借糶等語。尚未妥協。  
豫省以秋麥為重。今歲秋間。惟當勸諭農民。

廣種二麥。第恐本年夏麥歉收。百姓缺乏籽  
種。不能耕種。前已諭令該撫。即於陝麥內。籌  
備今秋麥種。多為出借。以裕窮簷生計。若明  
春。則更無須借麥也。昨又因國泰奏。籌借麥  
種一摺。諭令該撫等會商妥酌。將豫省所有  
陝麥。酌撥二萬石。與山東為備。借麥種之用。  
至豫省雨後。早晚禾稼俱已發榮滋長。可望  
西成。然距收穫之期尚遠。現在青黃不接。糧  
價尚昂。自應官為出糶。以平市價。而資民食。

但小民餬口所需。米較麥尤為得濟。昨因江  
西各幫糧船。渡黃稍遲。諭將尾幫糧船內。酌  
留米十萬石。令豫省於運河就近水次。兌運  
回豫。以備平糶。自更於貧民口食有益。該撫  
拜發此摺時。似尚未接奉兩次諭旨。著再傳  
諭鄭大進。即遵照前旨。妥為籌辦。一面知照  
國泰。一面迅速奏聞。將此由五百里諭令知  
之。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千六十

大清高宗法天隆運至誠先覺體元立極敷文奮武孝慈神聖純皇帝實錄卷之一千六十一

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次並屢經

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級並重誥內大臣戶部尚書鑲藍旗滿洲都統軍功紀錄五次

尋常紀錄十四次並經筵講官太子少保工部尚書紀錄六次並曾休養等奉

敕修

乾隆四十三年戊戌閏六月甲戌

上御勤政殿聽政。諭軍機大臣等。據吳虎炳奏審擬薙髮改裝。私越隘口之安南夷人陳廷暄阮文富等一摺。已批交該部議奏矣。至周貴。以內地民人久竄夷地。住家開鋪。本非安分之人。今又受賄引路。且代為薙髮改裝。及拏獲陳廷暄等。該犯復行逃竄。其情罪甚屬可惡。自應上緊嚴緝。務獲正法。但該犯現既在逃未獲。該撫摺內止應云獲日另結。今乃遽以絞決問擬。形之奏牘。外省辦事。豈能

周密。該犯聞知身罹重辟。藏匿愈深。更難剋期弋獲。此即該撫不解事處。但既已漏洩端倪。尤不宜稍涉懈緩。務須嚴飭所屬。設法躡緝。即行正法。勿使久稽顯戮。其陳廷暄阮文富二人既訊明不過貪圖獲利起見。其罪尚可不至於死。該撫所擬亦覺過重。朕初意本欲將此二人發回安南。令該國王自行治罪。以示天朝寬大之恩。今吳虎炳竟以奸細取供定案。若復施恩遣回。該國王聞知內地訊問情由。必至心生疑畏。於辦理轉多不便。只可俟該部覈議覆奏。另行酌量降旨矣。安南素稱恭順。本無奸細之可疑。而天朝於該國厚示懷柔。且並不興軍旅。更無事情之可探。吳虎炳所訊實屬多此一疑。該撫欲因此見其辦事細心。而不知適形其昧於事理也。各省與外夷交涉事件。全在權其輕重。庶不至於過當失體。沿邊各督撫中。惟李侍堯尚能通達事體。其餘亦恐未必悉能理會。著諭令

各該督撫嗣後如遇有外夷交涉之事務須斟酌得宜毋稍舛誤將此傳諭吳虎炳并沿途各督撫知之○乙亥諭軍機大臣等據巴延三奏查獲六柳堂集二本係明人袁繼咸所著張自烈編輯語多悖逆查袁繼咸原籍宜春係江西省所轄現在飛咨該省及各省查繳等語袁繼咸既籍隸江西則其所刊書集本省必有留存著傳諭郝碩留心訪覓務將其書本及版片悉行查出解京銷燬至六柳堂集一書既久經刊刻流播山西其餘各省自必有流傳之本而江南浙江尤書籍所匯聚更宜訪查著傳諭江浙兩省督撫實力查繳毋稍疎漏并令各省督撫一體確查均勿以具文塞責將此傳諭郝碩及各督撫知之○又諭據吳虎炳奏審擬雜髮改裝私越隘口之安南夷人陳廷暄阮文富等一摺已批交該部議奏並將該撫辦理未妥之處傳諭吳虎炳及各督撫矣此案在逃未獲之周

貴以內地民人久竄夷境住家開鋪本非安分之人今又受賄引路且代為雜髮改裝及拏獲陳廷暄等該犯復行逃竄情罪甚為可惡自應上緊嚴緝務獲正法該犯係廣東三水縣人自必潛回原籍匿跡或竄藏附近之處亦未可知著傳諭桂林李質穎即速嚴飭所屬派委妥幹兵役設法躡緝務獲審明正法勿使久稽顯戮並將如何查緝曾否就獲之處即行具奏○山西巡撫兼管鹽政覺羅巴延三奏河東鹽政令臣兼管臣現得巡撫養廉優厚用度有盈無絀所有河東鹽政每年額設養廉銀八千兩請全行裁汰得旨覽○丙子諭軍機大臣等據伊齡阿奏湖廣口岸鹽觔未能暢銷四十二年較四十一年少銷鹽觔十萬一千三百餘引今自四十三年五月比較四十一年五月止少銷鹽七萬一千四百餘引年復一年辦理維艱等語鹽觔銷滯關係引課至湖廣口岸向俱暢銷何以

四十二年少銷鹽十萬一千餘引。四十三年亦少銷鹽七萬餘引。自係該鹽法道辦理不善。及地方官不為實力緝私。致川廣私鹽充斥。官引因而壅滯。著傳諭三寶。陳輝祖。嚴飭地方文武員弁。督率兵捕。實力查緝私販。以疏積引。並將湖廣口岸。因何不能暢銷鹽引之故。查明具奏。再楚省鹽飭。上年既少銷至十萬餘引。寅著在鹽政任內。何以不行具奏。著寅著一併明白回奏。將此傳諭三寶。陳輝

祖。寅著。並諭伊齡阿知之。○丁丑。諭曰。周元理奏。良鄉縣接收山西遞到本箱。當交馬夫高三遞送。馬夫輒將本箱。放在錢六車後。四更天走到大井地方。本箱被賊竊去。現在嚴緝務獲究擬。請將良鄉縣知縣陸燿。革職等語。本章關係緊要。沿途驛站。自應撥派馬夫二名。背負馳遞。乃止交高三一人齎送。又於中途。擅搭放錢六車後。致被賊竊去。高三又復匿不回號。甚為可惡。著該督即飭查拿到

案。重加究治。仍嚴緝賊犯務獲。并追出本箱。審明嚴辦。以示懲儆。至郵遞本箱。理宜慎重。今春河南。先有本箱被竊之案。曾傳旨通飭各省實力整頓。而六月初。直隸正定縣復有遺失本箱之事。今甫及月餘。良鄉又有此案。看來直隸驛站。尤屬廢弛。所有良鄉縣知縣陸燿。即著革職。直隸驛站。係按察使專管。達爾古善著交部嚴加議處。該督周元理。並著交部議處。諭軍機大臣等。屢經降旨各省

督撫。查繳違礙書籍。送京銷燬。各該省陸續查出應燬之書。雖紛紛呈繳。但恐此等違礙書籍。外間尚有存留。而僻壤窮鄉。未必能家喻戶曉。此時續行繳出。仍可遵前旨不加究治。若匿不呈出。後經發覺。即難以輕宥。不可不將此意明白諭示。令其查繳。剔釐淨盡。以正人心。而厚風俗。著再傳諭各省督撫。務須實力查辦。不可稍有疎漏。並須通飭所屬。派委妥員。細訪詳查。毋使不肖吏胥。藉端需索。

滋擾。將此遇各督撫奏事之便傳諭知之。○戊寅。諭軍機大臣等。據陶易奏稱閏六月初七、八兩日。共得雨五寸。入土深透。其各屬內。如有膏澤未遍。補種失時。已成偏災者。照例詳辦等語。江省望雨情形。該司前此雖經奏及。但尚係隱躍其詞。經朕察及。詢問高晉等。始據陸續奏稱。各屬雖得微雨。未能一律深透。是陶易於被災之處。具奏究屬稍遲。現飭高晉等。如各屬被有偏災者。飭屬確查妥辦。陶易身係藩司。地方豐歉情形。乃其專責。務須詳悉查勘。各屬被有偏災者。通計十分之幾。確覈妥為辦理。不可稍有粉飾。致干咎戾。將此傳諭知之。○己卯。諭曰。檢討季學錦。中書田尹衡。助教金學詩。俱著以應陞之缺。列名在前陞用。祥慶著加恩仍授為編修。郭祚熾著加恩以典簿等官用。○又諭。兵部議。吉林將軍福康安奏。阿勒楚喀副都統衙門失火。焚燒檔案盈甲。將副都統協領等議處一

摺。已依議行矣。將軍。副都統。同居一城。遇事自應將軍首先列名具奏。今阿勒楚喀副都統獨處一城。且火又起自本衙門。托雲理宜一面具奏。一面呈報將軍。豈可止詳將軍。輒謂了事耶。況托雲係御前侍衛。赴任後。理應一年一次。差人奏請朕安。伊並未一次差人奏及。而於此事。又諉之將軍。隱忍了事。大屬委靡不振。托雲著革去御前侍衛。在乾清門行走。并著嚴行申飭。○諭軍機大臣曰。高晉奏。江寧自閏六月初八日得雨後。又連晴數日。茲於十三、四日。復得雨一二寸。未種之田。現可補種雜糧。但節已立秋。如有不及補種。已成偏災之處。當率屬實力妥辦。又據稱各屬先後得雨。日期不同。入土分寸。亦多寡不等。各等語。看此光景。竟成旱象。朕深為軫念。已於摺內批示。江南上年秋成豐稔。今夏二麥有收。民情或尚不至窘迫。但既被有偏災。口食未免拮据。該督撫務須董飭所屬。實力

確查。照例妥為辦理。不可稍存粉飾。并查通省被旱州縣。約十分之幾。每處所被偏災。約十分之幾。據實分晰具奏。其江蘇各屬。近日得雨多寡若何。並著楊魁一併覆奏。至糧船渡黃情形。薩載等於閏六月初九日具奏後。至今十餘日。未據續奏。現今高家馬頭一帶。淤淺處所。曾否深通。糧船能否陸續迅渡。本月二十日以前。已渡若干。未渡若干。統計何時可以挽渡完竣。著薩載。鄂寶。即行據實具奏。此旨。著由六百里發往。仍著迅速由驛覆奏。○又諭。今日戶部議。伊齡阿奏增戊戌綱湖廣。江西二省鹽價。請交兩江。湖廣。江西各督撫。會同該鹽政。就各省情形。秉公酌定。務使兩得其平等。因一摺。已依議行矣。昨據伊齡阿奏。湖廣口岸鹽觔。四十二年少銷十萬餘引。四十三年五月前。少銷七萬餘引。是楚省引鹽未能暢銷。已可概見。此數年中。楚省鹽價如前。尚且行銷不暢。今轉欲每包增價。

必更致壅滯難銷。豈伊齡阿竟未計及此耶。著傳諭伊齡阿。令其據實覆奏。又上年七月。曾據寅著奏稱。丙申額鹽已竣。丁酉綱亦運過六十餘萬引。新綱開運之期尚遠。江廣民食。應豫籌接濟。請提戊戌綱引二十萬道。豫派各商領運等語。楚省上年既未銷十萬餘引。何以寅著又請提綱。雖每年商課。現俱無虧。而配引過多。必更致鹽觔積滯。寅著前奏。更不可解。並著諭令寅著。據實具奏。○以鑲

紅旗蒙古都統永福。鑲黃旗蒙古都統積福。對調。○庚辰。諭曰。桑齋多爾濟奏稱。俄羅斯固畢爾納托爾來文。並未將瑪玉爾妄自尊大之事。明白回答。更翻舊事。措詞不遜。請交該院。一面咨行俄羅斯薩納特衙門。一面將貿易撤回庫倫之處。請旨等語。前因俄羅斯瑪玉爾。不同章京辦事。妄自尊大。桑齋多爾濟行文固畢爾納托爾。今接其回文。並未提及此事。及更翻舊事。特因伊等無理。不肯認

錯復因伊之女主已死伊子生牀已有亂形故措詞狂悖現已交理藩院令行文薩納特衙門繕妥呈覽著傳諭桑齋多爾濟照伊等所請令索琳前往將貿易暫停并察看固畢爾納托爾如何情形再相機辦理○諭軍機大臣等今日據高晉奏覆閏六月初七八日各屬雨水已未霑足情形並高家馬頭一帶水勢漸深漕船現在源源挽渡等語又據楊魁薩載等同日奏到各屬雨水及渡黃船數情形已於摺內批示江蘇各屬大田夏間雨澤稀少此時節過立秋通省所被尚未深透且即使續沛甘霖亦斷不能一律補種看來該省偏災在所不免高晉楊魁等務宜董率所屬實力查辦照例賑恤毋得稍存諱飾之見至漕船現據薩載等奏稱又過一百四十餘隻合計已渡之船共三百五十餘隻業已過半日內自必陸續迅渡現在曾否完竣並著傳諭薩載鄂寶等即速查明奏覆將此由

五百里傳諭知之○以鑲白旗滿洲都統理郡王弘曉正藍旗滿洲都統誠親王弘暢對調○辛巳諭軍機大臣等據明善奏正月間由科布多派在屯之宣化中營馬兵何澤洪隨同筆帖式三陽泰進京公幹該員行至宣化地方何澤洪即託病潛逃請旨飭下宣化鎮嚴行查拏俟拏獲時由驛解至科布多治罪示衆等語綠營兵丁派往新疆換班耕種乃因奉差進京經由原籍輒敢託病潛逃情節甚為可惡雖不至如軍營征兵脫逃拏獲即行正法然亦當按律重擬候朕酌量定奪若如明善所奏仍解至科布多治罪不足以示懲儆而僅交該鎮總兵查緝亦恐未能迅獲宣化係直隸所屬其地與晉省毗連著傳諭周元理已延三嚴飭所屬於宣化張家口一帶地方將該犯何澤洪設法躡緝務獲解交刑部嚴審究擬具奏再新疆各處耕屯日聞綠營兵在彼駐防者甚多脫逃之事諒亦

不免著各該管大臣將此旨嚴切曉諭如該兵等再有脫逃者即照此例辦理俾各知凜遵毋致輕蹈法網將此一併傳諭知之併交刑部存記○壬午諭據索諾木策凌等奏巴里坤鎮標右營遊擊何廷臣推陞廣西全州營叅將應即給咨送部引見惟查該員先後辦理屯田十有餘載於新疆墾種事宜甚為熟諳懇以叅將銜仍留原任俟有陝甘相當缺出照例題補等語前據俞金鰲面奏請將

何廷臣發往江南明係因該員起見欲避廣西邊遠之地圖得江南近缺是以未經准行並傳旨將俞金鰲申飭今索諾木策凌等請將何廷臣留於甘省雖亦不免有圖避遠缺之意但新疆屯務應資熟手其事尚屬可行何廷臣著照該都統等所請准其以叅將銜仍留巴里坤鎮標右營遊擊之任俟有陝甘省相當缺出照例題補仍留辦屯田事務不得竟調回內地所得之缺朕辦理庶務一秉

至公即一奏調武職而或准或不准亦必權其至當著將此通諭知之○諭軍機大臣等據李湖奏閏六月初七日長沙省城得沛甘霖其長沙衡州寶慶永州郴州桂等府州亦於閏六月初旬得雨甚渥辰沅永靖等府州亦有泉源引注惟長沙府屬之湘陰縣暨岳常澧所屬之十餘州縣雨水未透但南方氣暖若月內得霑透雨秋菽雜糧俱可補種而湖地肥腴尚可長發稻稂其是否成災或僅歉

收已派委妥員逐一查勘覈辦等語湖南一省得雨之處已多覽奏稍慰至所稱長沙省城閏六月初七日得雨之摺尚未奏到自係差人齎奏故不及十四日奏摺由驛馳遞之速今湘陰及岳常澧所屬各州縣若月內續得透雨自可補種雜糧即或竟至缺雨亦不過一隅偏災為數有限但不可因災地無多置之不問令窮民或至向隅著傳諭李湖即董飭所屬實力勘查並照向例妥協辦理仍

即具摺奏聞。勿稍諱飾。將此由四百里諭令知之。○陝甘總督勒爾謹奏。張掖武威平番鎮番肅州靖遠等州縣無業貧民。聞新疆樂土。咸願攜眷前往。請照上年辦送戶民之例。賞給一半盤費。令其前往報聞。○癸未。諭軍機大臣等。據薩載等覆奏。清水已陸續增長。從此日盛一日。即可暢出敵黃。江廣漕船。閏月十九日以前。已渡黃四百三十七隻。尚存幫船二百九十五隻。現在督催務期剋日渡

竣等語。薩載等務須上緊董催。令皆迅渡北上。愈速愈佳。又據奏清水束流之法。俟高晉防汛到工時。會同確勘。妥籌覆奏等語。是薩載此時尚無定見。因檢閱該處河圖。清水出口以後。經過惠濟祠下。其對面舊黃河尚存。清水至此不免散漫減力。因用硃筆標記。若於此築隄一道。逼令清水直注。庶可資刷黃之力。又黃河至周家莊以下。形勢稍曲。且中河口所出之水。橫衝抵溜。河水易於迴漾生

淤。亦是其受病之處。高晉等前此議移中河口。向下自屬有益。但彭家馬頭一帶。河形彎曲。清水不能直注禦黃。因於圖內。用硃筆標識。而所入記之處。尤為扼要。若就硃筆起訖處。切去灘岸。將河身開寬。使清水直出有力。黃水亦可暢行無阻。於交匯方為有益。著將此圖發交高晉薩載。令其悉心查勘。熟籌妥議。即行繪圖貼說具奏。將旨著由五百里發往。諭令知之。○又諭軍機大臣會同戶部議

駁裴宗錫奏。請由永昌府給發印照。商貨准過潞江之處。毋庸議一摺。所駁是。已依議行矣。滇省騰越以外。在在與緬地毗連。防範難於周密。從前雖有查禁商販偷越之條。率皆具文塞責。沿邊奸民。罔知懲儆。私越販賣之弊。實所不免。自上年議定於潞江緬寧二處。專派員弁。嚴行稽察。毋許江楚游民。擅行出口。並將緬夷所需之黃絲等貨。嚴禁外出。尚得扼要之法。今甫及一載。地方官即以商販

裹足不前為言。即此可見近日文武員弁。切實稽查之明效。豈可轉因此而弛其禁防。況勝越地止一隅。十餘年來。商稅悉皆缺額。並未聞邊民絀於生計。又何必為此鰓鰓過慮乎。裴宗錫平日辦事。未免近於好名。然此等見識。於內地行之。意在為民。尚無不可。若邊關要隘。自當權事理輕重。期於禁防有益。豈宜率就一偏之見。計其小而忽其大。若如所奏。給照放行。不過有名無實。而流弊無窮。則

年餘之邊禁。不幾虛擲乎。著傳諭李侍堯。仍照上年奏定章程。於潞江。緬寧等處。將一切違禁貨物。概行嚴禁。毋許稍有透漏。並嚴飭地方文武員弁。實力奉行。勿致久而生懈。將此由四百里傳諭李侍堯。並令裴宗錫知之。○旌表守正捐軀直隸獻縣民陳某女陳氏。甲申諭。豫省昨歲秋成歉薄。今年夏麥亦復缺收。閭閻未免拮据。業經疊降恩旨。加意撫卹蠲緩。俾令得所。幸各屬於六月中。普得

透雨。大田俱已趕種。可望秋成。第今距秋收之期尚早。現在糧食。恐未必即能充裕。著將江西省尾後數幫之米。截留十萬石。於臨清水次。令鄭大進。委員接運回豫。以資儲備。接濟。該總漕即速酌定幫數。船隻。飭知押運各員。妥協辦理。該撫亦即派委幹員。照例妥辦。該部即遵諭行。○諭軍機大臣等。據鄭大進奏。接奉諭旨。酌留漕米十萬石。請在山東之臨清州水次交兌。由衛河接運回豫。需用船

隻。由豫省雇往。所費較多。若委員赴東省雇覓。誠恐呼應不靈。懇勅下山東撫臣國泰。令東省沿河州縣。代為雇備。其價值由豫省委員發給等語。此項截留漕米。由臨清水次接運至豫。所需船隻。隔省艱於雇覓。自應東省地方官。就近代為雇備。令豫省委員給價。較為妥便。著傳諭國泰。即飭令臨清一帶沿河州縣。早為雇備舟船。齊集水次。以資豫省接運。並通飭所屬。妥協經理。毋令吏胥從中需

索滋擾將此遇國泰鄭大進奏事之便一併諭令知之。豁除江蘇常熟婁縣嘉定三縣坍沒公占田地七十九畝有奇額賦。乙酉諭軍機大臣等戶部議江蘇巡撫楊魁奏查封原任知州王葆元家產抵追鑪欠銀兩不及十分之二恐尚有不實不盡之處請交高晉楊魁再行確訊嚴追據實查辦一摺已依議行矣王葆元應追鑪欠為數至二萬三千四百餘兩該員在任八月並不嚴追致鑪戶逃亡無著其怠玩之咎實無可辭乃始則希冀分限以便拖延繼則呈請停追以圖豁免種種情節均屬詐偽是以部議令將王葆元家產查封今該撫所查王葆元家貲儘數估計僅估銀四千九百餘兩安知非王葆元將家財豫為寄頓隱匿且王葆元原為捐復在京自攜有厚貲備用何以一旦回籍委員搜查又屬全無所有足見外省所謂委員查封不過虛應故事未必能切實搜查其何以懲

玩延而清帑項著傳諭高晉楊魁即速派委妥幹大員前赴王葆元原籍將有無寄頓隱匿情弊逐一詳訊嚴訪務得確情據實覆奏毋得稍有瞻徇將此由四百里諭令知之戶部摺並鈔寄閱看兵部等部議四川總督文綬咨覆建武營遊擊守備移駐潼綿營潼綿營都司改為建武營都司案內查建武營移駐都司除養廉公費較前多實兵十三名潼綿營移駐遊守除養廉公費較前少實兵十三名請於建武營額內撥添潼綿營實兵十三名換給四川潼綿營遊擊建武營都司關防各一顆其建武營守備並兩營千把外委由司換給鈐記所有衙署即將建武營遊擊潼綿營都司彼此改給其潼綿營守備衙署亦將建武營守備舊署變價改造均應如所請從之。丙戌軍機大臣等議據戶部咨稱各省勸農賞賚銀兩直隸山東湖北福建浙江廣東雲南七省向例俱在耗羨備公各

項下動用。湖南在耗羨項下動用。其餘奉天等省俱無報銷。勸農一項。原係地方官應辦之事。各省辦理參差不齊。數目亦多寡不等。請交部行知各省。嗣後勸農賞銀。俱令各衙門自行辦給。毋庸動支公項。報聞。○丁亥。

上還宮。是月。江蘇巡撫楊魁奏。本月初四。至初五日。省城得雨三寸。四郊均霑。批。可惜欠透。不可矜張滿志。又奏。倘雨澤後時。即據實辦理。又批。是妥為之。又奏。各屬續得霑霈。隨

時馳奏。得旨。覽三寸之澤。不足為慰也。○江

西巡撫郝碩奏。九江關監督全德。浮收平餘一案。提訊家人及書役。據供並無多收。少報情弊。得旨。此事汝所辦過當。何必如此。朕從來有心犯罪者。恕亦不肯屈人。汝尚不知乎。大錯矣。○浙江巡撫王亶望奏。柴塘竹篾工程。向未定有保固年限。請嗣後承修柴塘竹篾。應以勘驗收工日算起。經春伏秋三大汛。方准限滿。如三汛內有姓陷潑損。即著賠

修。得旨。是知道了。○陝甘總督勒爾謹奏。安西肅州。西和大通。徽縣。五州縣。請建貯糧倉。殿二百二十五間。共需銀二萬四千九百餘兩。即於捐監項內動支。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之一千六十一

大清高宗法天隆運至誠先覺體元立極敷文奮武孝慈神聖純皇帝實錄卷之一千六十二

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌秋七月戊子朔享

太廟遣誠親王弘暢恭代行禮○

上詣

奉先殿行禮○詣

恩慕寺行禮○幸圓明園○己丑諭前因豫省

今年麥收歉薄降旨將江西尾後數幫之米

截留十萬石於臨清水次令豫省接運以裕

民食因念山東濟南東昌各屬及直隸大名

廣平順德等各府均有缺雨之處二麥大半

歉收市糧未能充裕雖不至如豫省之甚民

食究不免拮据著再將江西尾後數幫之米

於山東直隸各截留五萬石以資接濟其應

截何幫船隻即著鄂寶酌量分撥檄知押運

各員迅速妥辦至兩省應於何處水次截留

運貯之處著周元理國泰酌量妥協籌辦仍

即一面辦理一面具摺覆奏該部即遵諭行

○又諭據鄭大進奏估勘修建

嵩嶽廟工程及圍牆內外各廟宇一併葺治

其所需經費該撫及前撫徐績併現在之藩

臬道府共捐銀三萬八千兩又各州縣呈請

公捐養廉共銀八萬兩通計共十一萬八千

兩派委專員經管辦理等語該省敬修

嶽廟仰報

神庥撫藩大吏及前任撫臣自應首先出資

修葺其現任知府以上身為方面大員所得

養廉亦厚自可聽其捐資以襄盛舉至各州

縣請分別缺分大小攤捐之處既非政體且

牧令非大員可比每歲所得廉俸本屬無多

若因公扣捐。所餘不敷贍給。必致藉端擾累閭閻。與其整飭於事後。毋寧防之於未然。所有州縣公捐之請。不准行。其捐款外所需銀八萬兩。著用內務府庫銀。令鄭大進、榮柱等覈實辦理。造報內務府覈銷。至此項銀兩。即著該撫於應解戶部正項內扣用。咨部備覈。仍令內務府照數撥還戶部。以省解送之煩。該撫等務須實力查察。妥為經理。俾廟貌巍我工作鞏固。以昭靈佑。○諭軍機大臣等。今

實錄卷二十六

三

日李湖奏。湖南各屬於閏六月十三四日均得透雨。惟湘陰、澧州、安鄉、永定、安福等五州縣。雨尚未透。現飭勸種苡麥粟糧。並查有無被旱成災。分析辦理等語。看來湖南今歲被旱不過數處。其偏災亦止一隅中之一隅。該撫務速飭屬確查。如有實成偏災者。即照例酌量借種。以資接濟。將此諭令知之。○庚寅諭軍機大臣曰。楊魁奏。江寧、蘇州、松江、常州、鎮江、淮安、揚州、太倉等府州屬。於閏六月二

十及二十一等日。得雨三四五六寸。至八寸不等。遠近均霑。其徐州、海州所屬之豐、沛、沭、贛等縣。亦於閏六月十三四五六等日。得雨三四五寸。至七寸不等。蘇州省城復於二十五日。自申至亥。雷雨滂沱。入土九寸。勢甚廣遠。低田已種之禾。無不長發暢茂。其山鄉高阜。業已補種雜糧者。均足以資培養等語。前聞江蘇缺雨。月餘以來。深切廛念。今覽奏始為慰懷。至所稱原報被旱之處。蘇州藩司所

實錄卷二十六

四

屬共十一縣。江寧藩司所屬共二十五州縣。節次得雨。雖先後不同。業已一律霑濡。且一州一縣之中。低田得雨。秋禾仍極芄茂。即未種之高地。亦多寡不等。尚屬一隅偏災等語。江蘇前歲昨歲俱極豐稔。今夏二麥亦復有收。民間蓋藏自裕。且今年又值輪免正供。并無催科之擾。民食自不致拮据。但其中已成偏災者。不可因其僅係一隅。意存輕忽。著傳諭高晉、楊魁。即董飭所屬。確切勘查。照例實

力妥辦。俾各得所。毋得稍有粉飾。○戶部議覆。山西布政使黃檢奏稱。各官寄庫未領等項。請勒限三年。分別完結等語。查各官廉俸。均屬應領之款。應於奏銷後。勒限一年領楚。逾期不領。仍歸原款。報部聽撥。其軍需工程等項。俟本案准銷後。以該員奉文日起。勒限二年領楚。陞遷他省者。由該員本任。文移接任官。加結請領。逾限不領。報部充餉。從之。○命理藩院左侍郎博清額。往庫掄辦事。更換索琳回京。○調江南提督俞金鰲。為福建陸路提督。以江南蘇松鎮總兵陳奎。為江南提督。○鑄給直隸承德府理事同知管平泉州事。理事通判管赤峯縣事。理事通判管建昌縣事。理事通判管朝陽縣事。理事通判管豐寧縣事。理事通判管灤平縣事。承德府教授。承德府經歷兼管巡檢司獄。平泉州巡檢兼管吏目。朝陽縣巡檢兼管典史。豐寧縣巡檢兼管典史。灤平縣巡檢兼管典史。建昌縣巡

檢兼管典史。赤峯縣巡檢兼管典史等印記。從總督周元理請也。○辛卯。諭。向來繙譯鄉會試墨卷。亦用謄錄對讀。再送內簾校閱。雖照科場條例辦理。但滿洲字與漢字不同。筆跡難於識認。本無弊之可防。原不必循文場易書之例。况謄錄之領催。於繙譯文義。不能盡通。謄寫易於訛舛。且致多延時日。殊屬無謂。現屆繙譯鄉試。所有試卷。止須彌封。交送內簾校閱。無庸另行謄錄對讀。著為令。該部即速通行遵照。○又諭。前據明善奏。在科布多之宣化馬兵何澤洪。隨同筆帖式三陽泰。進京公幹。託病潛逃。當經降旨。令周元理等。飭屬查拏治罪。今該督奏。據宣化鎮總兵官達色。查明該兵。實係因病落後。即在該處守備衙門。稟明調理。月餘稍愈。即隨科布多換班之宗章京前往。行至馬家營。病又復發。即扶回在伊塔家調治痊愈。適有科布多把總郭明德之便。即令其帶回。且查該兵派在北

路換防。業屆五年期滿。應行撤回。該兵情願告留。科布多等語。何澤洪。若係托病潛逃。避匿原籍。自應重治其罪。今既查明該兵。前當期滿應換時。自願告留不撤。所有養病情由。業經稟明該管官。及病愈後。又已隨郭明德前往防所。其非逃匿可知。尚無大過。著傳諭明善。俟該兵回至科布多時。酌量責懲。不必嚴行辦理。著交刑部銷案。并諭令周元理。已延三。知之。○以廣東龍門協副將藍元枚。為

江南蘇松鎮總兵。○豁貴州沉溺。乾隆四十年分。解京鉛三千八百觔有奇。○壬辰。諭軍機大臣曰。薩載奏。黃河水勢盛長。各工穩固。情形一摺。據稱。洪澤湖交秋後。陸續增長。高堰誌。連前存水八尺五寸。因黃水有長無消。是以清水仍未能暢出等語。現在黃強清弱。清水不能暢出。但存水僅八尺有餘。較每年水誌。尚覺過少。究恐刷黃未能得力。所有清黃交匯之處。不可不加意經理。前曾諭令

高晉。薩載。赴該處詳加查勘。妥為酌辦。伊等自必悉心籌議。至高家馬頭一帶之淺。自係黃水蕩漾。致岸旁停積淤沙。又值東北風頂掣。清水愈不能暢出。而積淤驟難滌除。幸而昨歲新挑陶莊引河。將交匯處移遠清口數里。故受病不過如此。若如向年清口逼近黃流。值今歲黃水過強。其倒灌不但侵運。勢必致將洪澤湖出水支河亦淤。則疏治更難措手矣。但不可因此遂以為可恃。而置束清敵

黃之法於不講。昨召見楊景素。詢及所經河道情形。據奏。運河現在深通。但其半水色稍渾等語。恐即係黃水微有漾入之故。高晉薩載。務須詳悉勘察。竭力上緊妥辦。以滌積淤而防後患。不可稍存諱飾。養癰貽誤。將此傳諭知之。仍即將如何籌辦情形。迅速由驛覆奏。○予廣東出洋遭風淹斃崖州營外委王仕寧。兵丁周純章等十六名。卹賞如例。○癸巳。諭豫省儀封。考城二汛內河隄。現在漫口

急需堵築。而被水災民。並需撫卹。應用之項較多。豫省藩庫所存銀兩。恐不敷用。著於兩淮鹽課項下。撥銀五十萬兩。伊齡阿。即日派委妥員。迅速解豫。以資接濟。該部即遵諭行。○又諭。據姚立德。鄭大進奏。河水驟漲。儀封汎漫水六處。考城汎漫水三處。其儀封之十六堡一處。尤屬緊要。現在趕辦堵築。請分別嚴加治罪。議處等語。河工猝逢異漲。以致隄工衝決。非人力所能豫防。本欲將該總河等免其議處。但姚立德等摺內稱。儀封之十六堡一處。逼近大河。掣溜湍急。刷寬七十餘丈。是該處河隄。竟係開口奪溜。而該督等摺前所摘事由。僅稱平漫。殊屬含糊粉飾。姚立德。鄭大進。均著交部嚴加議處。其餘文武疎防各員。並著查明叅奏。○又諭。前因豫省去歲秋收歉薄。本年夏麥又復缺收。閭閻未免拮据。業將江西省後幫之米。截留十萬石。於臨清水次。令鄭大進。委員接運回豫。以資儲備。

今據姚立德等奏稱。儀封考城。汎內河隄漫口。其被水災民。現需撫卹。應用米糧必多。著再將江西尾幫漕米。截留十萬石。與豫省備用。著鄂寶。即速查酌。應截何幫之米。飛檄押運各員。遵照妥辦。並著鄭大進。即行酌量。於就近災所之運河水次。派委妥員接運。一面飛咨鄂寶查照。一面具奏。該部即遵諭行。○諭軍機大臣等。據姚立德等奏。閏六月內。黃河及沁洛諸河。同時漲發。二十七八兩日。連宵大雨。風勢狂烈。儀封汎內漫水六處。考城汎內漫水三處。每處約寬三十餘丈。至六七丈不等。內惟儀封十六堡一處。逼近大河。掣溜湍急。已刷寬七十餘丈。尚未塌定。是該處竟係開口奪溜。甚關緊要。已諭令姚立德等。即速董飭所屬員弁。上緊堵築。以期速竣。但恐姚立德。於堵築事宜。不及高晉之明練。而豫省文武工員內。亦無諳習下埽搶築之人。未能施工安速。高晉想已赴清江防汎。如

該處現有險要工程。必須該督在彼會同薩載商辦。則江南河工尤關緊要。自難分身他往。但黃河上流現已開口。則江南之黃河水勢必平。隄工可期穩固。其防護事宜薩載一人儘可籌辦。毋庸高晉董助。即著高晉於奉到此旨後。帶領熟諳下埽之副將等官數員。星馳赴豫。幫同姚立德等將漫口迅速堵築。以慰軫念。著傳諭高晉自行籌度。如能前往豫省。即一面起程。一面具奏。若實在不能分身。亦不必勉強從事。亦即據實奏聞。又據姚立德等奏。漫水由賈魯河故道。自豫省考城。睢州。寧陵。永城。入安省之亳州。達淮等語。淮河必歸洪澤湖。今黃河漫水既已入淮。則下游之清水自應加長。高家堰一帶亦應留心。再清口壩今年未拆。此時亦應留心也。著薩載將清水有無增長情形。即行查明具奏。仍著高晉迅速由驛覆奏。并諭姚立德等知之。○又諭曰。姚立德等奏河水異漲。隄工漫水

情形一摺。朕初閱該督等奏摺事由內。係隄工平漫。以為不過尋常漫口。尚欲將該督撫應得處分。加恩寬免。及閱至大河掣溜之語。是該處河隄竟係開口奪溜。不止平漫。該督等摺前所摘事由。殊屬含糊粉飾。是以降旨將姚立德。鄭大進。交部嚴加議處。該督等當益加實力奮勉。悉心調度。速行董飭所屬員弁。上緊堵築。毋稍延緩。至所需稽草柴樑。該工既向無存貯。該督撫應即會同飛調。趕運應用。並據稱考城縣適當漫口之下。一時未能堵禦。居民俱遷移大隄棲止。已委員確查撫卹。不使失所等語。此尤最要之事。該撫務須率屬妥速查辦。撫卹得宜。俾災黎均霑實惠。至豫省庫貯銀款有限。現在需用較多。已降旨撥兩淮鹽課銀五十萬兩。迅速解送豫省備用。又前已降旨截撥江西漕糧十萬石。與豫省領運。以裕民食。今該省復有被水災民急需賑卹。恐所截之米尚屬不敷。現復諭

令再截江西漕糧十萬石。以備賑借之用。並著鄭大進酌議於災所相近之運河水次。接運應用。一面飛咨總漕照辦。一面奏聞。仍著將堵築情形若何。迅速覆奏。○福建布政使錢琦年老。命來京以京堂用。調山西布政使黃檢為福建布政使。○甲午。諭各省年滿送京引見協領。及城守尉總管等。經朕記名。遇有副都統缺出。即令伊等補授。但一時未能用盡。恐致年力就衰。不能辦事。著傳諭各省將軍。都統。詢問伊等。如願引見。即令前來。倘實係年力衰邁。不願來京。並不勝協領之任。該將軍等。即據實具奏。令以原品休致。○以甘肅按察使譚尚忠為山西布政使。○乙未。諭河南儀封考城一帶。黃河漫隄。掣溜亟應督率堵築。該處被水災民。並宜迅速加意賑卹。俾各得所。著派尚書袁守侗。即行馳驛前往。會同總河。巡撫上緊查辦。其隨帶司員。並著一體馳驛。○諭軍機大臣等。京城初六初

七。兩夜雨勢綿密。現尚未止。恐不免有過多之患。今歲大田未稼。似可期望有秋。此次雨水稍多。低窪地畝。不致妨礙否。至永定河水勢。雖已據該督以時過處暑。奏報安瀾。但連日之雨較大。永定河水。恐不免增長。是否順軌安流。隄工足資鞏護。朕心深為廕念。周元理。不可因已過防汛之期。稍存大意。致有疎虞。著傳諭該督。即速查明。據實迅速覆奏。尋奏。保定省城。初七八兩日。得雨旋霽。惟天津靜海武清三屬窪地。間有積水。現設法疏消。於秋成大局無礙。永定河於初四日。長水一尺八九寸。亦即消退。隄工穩固。得旨。覽奏欣慰。○又諭曰。薩載奏各工水勢長落情形。一摺。據稱。閏六月二十八日。黃河水勢加長。至一丈四尺九寸。黃山壩潘家屯周家莊等處。俱有平漫之水。現在搶護。自二十九日至初三日。黃水共消四尺九寸。各漫工俱已化險為平等語。覽奏以手加額。昨據姚立德等

奏儀封十六堡漫口七十餘丈。掣動大溜。是豫省漫口。黃河盛漲已洩。江南河工自可冀平穩。但儀封漫口甚關緊要。昨已諭令高晉自行酌量。如可分身前往。即速帶領諮習椿埽之將備等。馳往督助。今高晉諒已至清江防汛。務即自行審度。如江南現無險要之工。薩載在彼足資防護。高晉可迅速帶領將備等。即馳驛兼程。前赴豫省。上緊堵築。期早合龍。以慰注念。至儀封漫口之水。據姚立德等

奏。由賈魯河至亳州達淮。其水必歸洪澤湖。恐清水驟然加長。昨已諭令高堰一帶亦應留心。再清口壩今年未拆。亦應留心。該督等接奉前旨。自必悉心辦理。但今歲清水甚弱。五壩並未過水。恐上游之水驟至。湖水陡增。高堰應行減放之水。一時未能宣洩。甚或水誌已逾。而清口不及展拆。所關甚鉅。著薩載加意妥為籌備。宣節得宜。勿致臨時措手不及。稍有貽誤。著由六百里加緊傳諭知之。

又諭曰。鄭大進奏儀封考城二縣被水情形。一摺。儀封十六堡漫口至七十丈。且已掣動大溜。其勢較甚。朕心甚為軫念。不可不上緊堵築。至被水之州縣。考城最重。其漫口之儀封及黃水經過之寧陵。睢州。永城等處村落田廬。恐亦不免淹損。該撫所奏。飛委榮柱。齎銀馳赴各縣。速為撫卹。並委員雇備舟筏。隨帶炒米炒麵。分路濟渡窮民。及搭蓋蓬廠。以供棲止等語。所辦尚好。其餘凡屬被災之地。

均宜切實查勘撫卹。毋使一夫失所。昨又截留江西漕米十萬石。令豫省接運備用。以資災民口食。但恐各處被災人戶。並應賑卹需未較多。現已派尚書袁守侗。馳驛前往會同查辦。並面諭袁守侗。如約計兩次所截米二十萬石。尚不敷用。即再截留米十萬石。一面飛札鄂寶迅速派撥。一面奏聞。其儀封之十六堡漫口奪溜。尤宜上緊堵築。昨已傳諭高晉令其自行酌量。帶領諮習椿埽之將備。迅

赴豫省。督同調度堵築。高晉能否前往。尚難遽定。姚立德等務須即速上緊趕辦。毋稍懈緩。其所需稽束穀料等項。鄭大進尤須星速調運。以濟急工。今又派袁守伺馳驛赴工。會同該督撫。迅速籌辦。務使剋期合龍。以慰懸注。將此傳諭知之。仍將堵築漫口情形。若何迅速。由驛覆奏。○又諭據鄭大進奏。藩庫章程一摺。已批該部知道。但鄭大進此奏。殊屬未協。前因孫士毅條奏。藩司寄庫銀兩。分別款項。呈送督撫存覈一事。朕以各省藩庫情形。自亦大概相似。因諭令各省督撫轉飭各該藩司。查照覈辦。節據各省藩司。自行專摺覆奏者甚多。今鄭大進將榮柱詳報庫貯月冊。及應撥領各款。覆加檢覈。代為奏聞。而不令榮柱自行奏覆。實屬過當。前因該撫面奏榮柱時。露高興。朕恐其自恃有才。目無巡撫。或於公事不免撓越。是以傳旨訓飭。俾其自知謹飭。並非令該撫概行抑置。不許藩司自

達奏章也。藩臬兩司。均有奏事之責。藩司總理錢穀。臬司專管刑名。其本職之事。原可直陳。朕亦得觀其識見何如也。如藩庫款項。乃藩司職掌。巡撫覆覈。則與題本何異。鄭大進豈可因朕曾經飭諭榮柱。遂抑之過甚乎。即榮柱遵朕飭諭。亦止須遇事收斂。不侵巡撫之分。今乃於職所應奏事件。亦詳報巡撫轉達。竟不免畏懼巡撫。更誤會朕教戒本意矣。兩司幫助督撫。辦理地方公事。平日各當盡其分所應為。不稍侵與。亦不宜緘默不言。惟督撫之命是從也。設或督撫有贓私不法之事。兩司原可據實密陳。若皆畏懼督撫。不敢一言。豈大吏劣蹟。必待科道糾劾。及朕親為訪聞。則又何必有兩司奏事之例。而兩司瞻徇緘默之咎。又豈能輕逭乎。此風各省皆然。而直隸、湖廣、廣東、福建。為尤甚。今鄭大進又欲效為之於河南也。若兩司覲覲督撫之缺。妄思媒孽其短。原難逃朕之洞鑒。其取戾自

不小。而今之兩司內。則實無其人。朕整飭庶僚。一秉大公至正。不使稍有過不及之弊。督撫等各當善體朕意。為兩司者。亦當各盡職守。將此傳諭鄭大進。并過便諭令各督撫知之。○又諭曰。鄭大進奏報。陝省銅鉛過境被水情形一摺。所奏殊未明晰。荆紫關下及史家店等處。既撈獲沉溺銅船四隻。且獲銅六十槩。何以並無船戶水手。是否溺斃。理應敘明。至白亭地方。查獲銅八十一槩。尖角地方。查獲銅八十七槩。據稱亦無船戶水手。并不言有無沉溺之船。更不可曉。該撫既據浙川縣稟報。即應確查。因何並無船戶水手。及有銅無船之故。明白聲敘入奏。並應挨查此數項沉溺之銅。係何員領運。於何處被水衝溺。運員何往。其船戶水手有無下落。移咨陝省查明辦理。乃僅將撈獲之銅。付便員崔象豫管解。餘皆置之不問。鄭大進何不曉事。若此著傳諭鄭大進。即速詳悉查明。據實覆奏。毋

再含糊塞責。尋奏。查據浙川縣報稱。史家店。白亭等地方。撈獲銅船。均係商南縣衝下頭二幫內船銅。並無船戶水手。適運員崔象豫親押四幫銅船到浙川。隨將撈獲銅船。交收解陝報聞。○又諭曰。國泰奏。續獲鹽梟案內夥犯耀復義。即姚復義。擬發伊犁給厄魯特為奴一摺。已批交該部議奏矣。姚復義係鹽梟夥犯。固應拏獲治罪。而首犯孫大漢。至今已半載有餘。何以尚未弋獲。自係所屬文武不能實心緝捕所致。且據姚復義供。因事隔日久。回家看視。則孫大漢此時。或潛回避匿。亦未可定。著傳諭國泰。務宜嚴飭所屬。實力嚴密訪緝。務使要犯迅速就獲。早正刑誅。毋得怠玩從事。致令久稽顯戮。○丙申。上御勤政殿聽政。○諭軍機大臣曰。高晉奏。黃河水勢加長情形一摺。據稱。廣籌去路。以洩異漲之潘家屯。蘇家山等處。昨據薩載奏。業已漫水。並據稱。二十九日至初三日。河水陡

消四尺九寸。各漫水處俱已掛淤。工皆化險為平等語。高晉拜發此摺時。自尚未聞有消水之信。今上游之河南儀封。現已開口。掣動大溜。所以江南河水頓消。各工可保無恙。惟是河南之儀封漫口。甚關緊要。該省河工之將備兵丁。於下埽等事。素未習練。即姚立德於堵築大工。亦未曾閱歷。恐其過於驚惶。不得主意。是以諭令高晉自行酌量。如南河無甚險要工程。薩載在彼。足資防護。即速帶領諳習埽埽之將備等。馳赴豫省。督助堵築。儀封十六堡漫口。以期迅速合龍。今據奏。已於初四日自江寧起程。遙赴河工防汛。此時諒已到清江。著再傳諭高晉。即速酌量南河各工。有無險要之處。權其輕重。如可以分身。即將兩江總督印務。交薩載署理。高晉迅速帶領諳習埽工之將備等。馳驛遙赴河南。悉心調度。幫助堵築漫口。俾得剋期竣事。以慰廑念。高晉即一面起程。一面奏聞。至河南漫水。

由賈魯河達淮。其水必歸洪澤湖。今歲清水微弱。五壩並未過水。清口東西兩壩尚未展拆。恐清水驟長。清口兩壩開展不及。所關匪細。著薩載留心籌酌。如或清水陡增。務使宣洩得宜。勿致貽誤。此朕所深為懸注者。高晉如已赴河南。薩載尤當時刻留心。毋稍疎懈。著由六百里加緊傳諭知之。仍將黃水清水現在情形。及高晉能否赴豫之處。迅速由驛覆奏。○軍機大臣等會同戶部議覆。閩浙總督楊景素奏稱。酌籌疲商調劑事宜。一閩省商力微薄。不能養竈。又收買遲滯。均需自備資本。致有拋棄鹽埕。鬻私圖價諸弊。請照粵省例。於該道溢額盈餘項下。撥銀十三萬餘兩。分貯該道及各府庫。令各場員詳領。責令養竈收鹽。配商轉運。一鹽觔價雖屢增。而近來錢價日減。經費日增。成本仍有不敷。應照粵省奏准例。遇陰雨過多。場鹽少產。年分總埽量增。鹽價一二釐。子埽分別量增。一寧德。

縣屬漳灣場霞浦縣屬淳管場羅源縣屬鑑江場行銷細鹽二萬五千餘擔較曬鹽多費而柴本較前增逾兩倍請每擔量加錢一百文其行銷細鹽之寧德霞浦羅源三縣賣價每觔酌增一文均應如所奏從之○吏部議准江西巡撫郝碩疏稱江省舊有捉殺磨刀平頭等寨巡檢名目均不雅馴查捉殺寨巡檢駐石城縣城西赤江橋應改為赤江司贛縣磨刀寨巡檢轄長興等地方應改為長興司○雲都縣平頭寨巡檢管長興安仁等鄉應改為興仁司從之○三等男梁秉暘緣事革職以其弟秉春承襲○命禮部尚書鍾音充經筵講官○寧夏副都統德爾賽年老休致調黑龍江副都統永鐸為寧夏副都統以頭等侍衛慶霖為黑龍江副都統○調直隸按察使達爾吉善為甘肅按察使以刑部郎中文祿為直隸按察使○予福建出洋遭風淹斃閩安水師左營兵林季賞卹如例○丁酉

孝懿仁皇后忌辰遣官祭

景陵○諭軍機大臣等據保寧奏石門地方有神祠俗名將軍廟祀漢靈帝時中郎將孟溢至明嘉靖萬厯間重修立碑其文內多有妨礙本朝之字隨將此碑掩埋等語明季碑碣既有觸礙字樣自不應復留但掩埋仍在土中久或經掘出其字尚在不如將碑字盡行磨去另擬碑文刊刻敘述其神之事蹟及土人立祠之意既不使湮沒無傳且不令字有違礙方為兩得將此傳諭知之○又諭據保寧奏馬蘭鎮所屬石門地方有神祠一所俗稱將軍廟查係漢中郎將孟溢之祠明嘉靖萬厯年間重修其碑文多有干礙之字即將碑碣掩埋等語已諭將碑文磨去另行擬文改刻矣直隸山西一帶沿邊地方或建有列朝邊將祠碑或刻有邊防碑記其中觸礙字面自所不免著周元理已延三派委曉事之員悉心查勘如神祠門堡隘口所存門扁碑

碣等項。如有違礙字樣。應磨毀者。即行磨毀。應改刻者。即行改刻。務須實心妥辦。勿以空言塞責。○戊戌。諭前據倉場衙門奏。大河前幫淮安三幫過津脫幫。請交漕運總督查明。奏。茲據鄂寶查奏。該處漕船。因河流淺涸。起剝待開。以致脫幫等語。糧船脫幫。運員等例有處分。第本年淮安各幫船脫幫之故。實由河流淺阻所致。尚非催趲不力。所有領運總運各員。均著加恩免其議處。該部知道。○諭軍機大臣曰。姚立德等奏。河工漫口情形。一摺。據稱。儀封十六堡漫工。口門已刷寬至一百五十餘丈。溜勢漸平。先將上水裏頭鑲做。其下水裏頭。俟上水鑲竣。即相機趕辦等語。儀封十六堡。現已掣溜。漫口至一百五十餘丈。工程較大。恐姚立德等不得主見。必須高晉前往董助。方能妥速。前已屢諭高晉自行酌量。如可分身。即速帶領熟練將備。馳驛赴豫督辦。南河現在似無緊要工程。該督接

奉前數次諭旨。自能權其輕重。仰副朕懷。著再傳諭高晉。如已經起身。務須星夜造程。早赴儀封工次。調度辦理。以冀尅期合龍。慰朕懸注。又據稱。擬將已斷流之漫口七處。上緊辦竣。以通下游運料之路等語。料物為堵築急需。若俟七處漫口辦竣。方能通路運料。未免稍需時日。從前南河張家馬路漫工。需料曾令豫東二省辦料幫助。甚得其力。此次或可令山東省量力幫辦。著姚立德、鄭大進。悉心籌酌。將應用之楷榦、草柳、椿樑等項。有可在東省幫辦者。即開明物料數目。飛咨國泰幫辦。仍即一面奏聞。國泰接到豫省咨文。亦即上緊購辦。運赴該處應用。以期大工速竣。不可稍存畛域之見。素守侗如。已到豫。並著與該總河等會同妥酌辦理。其豫省現辦之料。或有可由他路運工者。並著姚立德、鄭大進會商妥辦。期於迅速濟用。將此一併傳諭知之。仍著將漫口情形。即速由驛覆奏。○又

諭曰。鄂寶奏。糧船渡黃情形一摺。據稱。七月初四初五兩日。河水漸次減耗。高家馬頭。存水不及二尺。尚有船五十四隻。未能渡黃。計米五萬一千八百餘石。存貯淮揚各屬等語。自應如此辦理。淮揚各屬。今夏亦有被旱偏災之處。自不免需米接濟。此項糧米。即留為該處賑糶之用。無庸附明歲新漕搭運。著將應留船隻糧數。行知該地方官照料。並飭該督撫。檄飭所屬。妥為經理。勿稍稽緩。又據奏。今歲各船。至閏六月始行渡黃。至九月內方能到壩。恐回空不免凍阻。請令各船。即於楊村起剥。運弁同正丁。即督押剥船。抵通交兌。其未剥之漕米。暫交天津北倉。陸續運通交納等語。鄂寶等此奏。尚止係按奉截留十萬石之旨。嗣復節次諭令截留十萬石。與直隸山東兩省備用。又諭令截留十萬石。為豫省賑卹之用。通計共截留米三十萬石。所餘船隻無多。且前已諭令鄂寶。酌將最後幫船截

留。其在前渡黃各船。尚不甚遲。況業經姚立德奏。糧船進開後。即令通槽趲運。而衛河以北。近日水亦寬深。均可上緊催趲。自不致有誤回空。毋庸如鄂寶等此奏。另為籌辦。至所稱。鄂寶辦理臨清交米。即督押北上。戴第元催趲前抵臺莊。即馳赴行在復命等語。已批令汝二人皆不必來。伊等此奏。尚係循照向例。今歲糧船較每歲渡黃已遲。催趲不容稍緩。鄂寶可即將未經截留各幫船。督押速行抵通。不必前赴行在。仍即督促各船。迅速回空。勿使沿途稽緩。鄂寶回至淮安。又可籌辦明歲新漕諸務。至戴第元抵臺莊後。亦不必即行復命。現有截留各船。著戴第元。於催趲令抵臺莊。即速赴臨清水次。董率截留各船。押運員弁。督飭旗丁。妥速交兌。俟截留米石全行兌運完竣。戴第元再赴行在復命。至高家馬頭水復耗減。自係上游儀封開口奪溜之故。但漫流入淮之水。必當歸於洪澤湖。現

在清水曾否加長。及高家馬頭淺阻。作何等辦情形。著薩載。一併覆奏。並諭楊魁知之。○又諭。據三寶等覆奏。湖北省自六月十二三日得雨後。晴霽幾及一月。嗣於閏六月初六。七。及十三。二十一等日。陸續得雨。一切晚禾雜糧。頗資潤澤。但現在立秋已過。如處暑之前。連得透雨。未經枯槁之禾。尚可減收。即被旱之處。情形輕重不一。所有武昌等府屬之四十六州縣。現在分委妥員。逐一履勘。分別辦理等語。該省本年雨水未能透足。目下節過處暑。恐收成不無歉薄。糧價未免稍增。朕心深為廕念。著即傳諭三寶等。董飭道府大員。據實確查。缺雨各州縣。如有已成偏災之處。即量其輕重。分別照例妥辦。務俾閭閻不致失所。勿稍存諱飾之見。至湖南省。前據李湖奏稱。各屬均得透雨。惟湘陰等五州縣。雨尚未透。已諭令確查酌辦。今據三寶奏。岳。常。澧。三府州屬。雨亦未足。田禾均有就槁之勢。

現在委員查勘。是否成災。分別辦理等語。似尚未悉湖南續行得雨情形。著李湖詳悉查勘。如有已成偏災者。仍遵前旨。照例妥協經理。並各據實覆奏。將此傳諭三寶。陳輝祖。並諭李湖知之。○已亥。諭。據鄭大進奏。豫省儀封考城。二汎漫口。急須購料堵築。被水窮民。俱宜賑卹。懇發銀一百萬兩。解豫備用等語。前因儀。考。兩汎漫口。工程較大。災黎並需撫卹。恐豫省庫貯銀兩不敷。未待該撫奏請。已降旨撥發兩淮鹽課銀五十萬兩。速解豫省。以資接濟。著再於兩淮鹽課項內。撥銀五十萬兩。令伊齡阿。即速派委妥員。解赴豫省備用。該部即遵諭行。○又諭。據勒爾謹奏。伊犁議設總兵。內地八旗。難以裁改。似應將西安提督。及提標五營裁汰。改設伊犁。其提督事務。歸併巡撫兼管等語。殊屬非是。武職或有應裁改之處。止可及於都司以下。及千把微員。至提督膺專閫之寄。統轄通省。職任綦重。

何得輕率議裁。即提標官兵。亦不宜裁汰。況陝省地方遼濶。與四川等處番夷接壤。尤需提督大員彈壓。豈容遽議更張。該督此奏。不知事理輕重。斷不可行。餘著該部妥議具奏。

○諭軍機大臣曰。勒爾謹奏。甘省雨水情形一摺。覽奏已悉。甘省皋蘭等州縣。被旱成有偏災。業據該督勘辦題報。今寧夏所屬三縣。又因河水泛漲被淹。而秦州。秦安縣。亦因山水暴發。田禾間有衝淤之處。自應飭屬實力勘查。照例分別妥辦。使被災邊氓。不致失所。毋稍粉飾。至黃河未入龍門以前。向無泛溢。何以前歲陝西之朝邑縣。及今歲甘肅之寧夏等縣。俱有黃河泛漲為災之事。其故安在。並著該督查明具奏。尋奏。本年蘭州等府秋雨過多。山水匯入黃流。宣洩不及。致寧夏等縣瀕河地畝。間被淹浸。其前歲朝邑縣。因黃河由龍門徑行朝邑。直注潼關。兼因彼時渭洛二河。同時並漲。匯入黃河。淹及民田。非盡

由黃河泛溢。報聞。○庚子。諭軍機大臣等。據姚立德奏。擬辦儀封十六堡漫口堵築事宜一摺。並繪圖呈進。朕詳加閱看。所有擬築南北壩臺。及接築圈隄之處。自係就現在情形籌覈。今據高晉奏。擬即遣赴儀封。幫同姚立德等。迅速堵築漫口等語。高晉到豫後。可即將該處漫工情形。悉心體勘。及姚立德所擬施工之處。是否有合機宜。詳加斟酌調度。會同妥速籌辦。以期及早合龍。至姚立德所擬挑挖引河之處。尚覺揚頭。恐引溜不甚得力。因用硃筆於圖內標記。自當就硃筆畫處及入處。開挑引河。使大溜引歸舊河。更為直捷。著將原圖發去。交高晉一併妥速籌辦。又據高晉奏。洪湖清水尚未暢出。實由引河不通。支河受淤。正須上緊疏治等語。今歲清水雖弱。何致引河不通。其支河更何以有受淤之處。自應速為挑治。勿致清水驟增。措手不及。且高晉現稱。據正陽關馳報。淮水於初二。初

三。兩日。陡長六尺四寸。仍在加長未定。此即儀封。考城等處漫下之水。由賈魯河入淮者。今漫口未經堵閉。則續長之水尚多。恐洪澤湖一時容納不及。所關匪細。自應豫行籌備。展拓清口機宜。若清水增長過甚。即按原定水誌。將清口東西兩壩。速行展拆。俾得暢流無滯。以免旁溢。并可資刷淤敵黃之益。今高晉已赴豫省。此事即交薩載。實力妥辦。勿稍稽緩貽誤。至薩載前赴徐州。原因河水驟長之故。今豫省黃河已漫口奪溜。江南河水陡消。徐城現無應辦之事。薩載可即回至清口。籌辦宣洩清水要務。且可令高晉早赴豫省。督同趕築漫工。高晉一至豫省。即將籌辦情形。先行由驛覆奏。○辛丑。諭曰。鍾音奏。現派隨往盛京。所有禮部印鑰。請交曹秀先帶管。一摺。係屬照例奏請。前日兵部。請將印鑰交蔡新帶管亦然。漢尚書固可帶管印鑰。但曹秀先。蔡新。俱在外城居住。該部早晚請鑰用

印。諸多不便。嗣後各部滿尚書。遇有隨駕出差之事。其漢尚書。若在內城居住者。即令其帶管印鑰。亦不必奏聞。若漢尚書在外城居住者。著奏請派員兼署滿尚書。並帶印鑰。著為令。此次兵部尚書事務。即著阿桂兼署。禮部尚書事務。著德福兼署。○又諭。此次繙譯取中之舉人第一名陶光。第十三名郭布亨。俱與漢姓相同。已令將陶字改為崧字。郭字改為國字矣。從前大學士公傳恒。曾將傳字姓其諸子。經朕令改福字。又如大學士公阿桂父阿克敦。伊子有名阿迪斯。及阿彌達者。雖俱係清語。究屬三代沿用。恐其家遂以阿為姓。因令自伊孫始。名首不必沿用阿字。蓋滿洲原有姓氏。而通行乃其名字。今妄效漢姓。不特遺忘根本。觀之亦甚不雅。著交八旗各省將軍。都統。副都統等。通諭各官兵。令各遵奉。如有效尤者。定行治罪。該管大臣等一併議處。並將此諭令阿哥等閱看。○旌表守

正捐軀安徽亳州民王之普女王氏○壬寅中元節

上詣

恩慕寺行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○諭前因豫省上年秋成歉薄今夏二麥缺收民食不無拮据即降旨截留江西尾幫漕糧十萬石令豫省於就近水次運回備用嗣以儀封考城二汛漫口復

截留漕糧十萬石於豫以資賑卹併先後撥

給兩淮鹽課銀一百萬兩俾銀穀兼賑災民

不致稍有失所今復思該省秋禾雖可望有

收而儀考兩汛現有要工料物並須各屬辦

運恐於冬間兌漕諸務不免兼顧為勞著再

加恩將豫省本年應行起運漕糧內酌留粟

米十萬石留貯該省以省輓運之費並可備

賑糶之用該撫務董率所屬實心經理俾閭

閭均霑實惠以副朕軫念災黎之至意該部

實錄卷五十三

五

即遵諭行○諭軍機大臣等據鄭大進奏請

將續撥之漕米十萬石毋庸截留懇以豫省

本年漕米酌留十萬石以省往返周折等語

所奏亦未嘗不是但截留江西尾幫漕米固

為豫省賑卹之用亦因今歲漕艘北上較遲

恐其來回稽誤是以截留在後之幫船於臨

清交兌俾得趕早回空不誤新運所謂一舉

而兩得也若以豫省新糧抵撥該省雖似調

劑得宜而於漕運之法未為妥協但該省現

有漫口工程。被災較重。又不如將新漕酌留十萬石於該省。以免輓運之勞。且令糧食充裕。於賑糶諸務。亦為便易。現已明降諭旨。勅部速行。至所留專係粟米。其黑豆一項。為每歲京城飼馬所必需。即麥石亦有應用定額。自未便一體停運也。將此諭令鄭大進知之。

○旌表守正被戕山東莒州民劉某妻李氏。

實錄卷一〇六三

奏

大清高宗法天隆運至誠先覺體元立極敷文奮武孝慈神聖純皇帝實錄卷之一千六十二

大清高宗法天隆運至誠先覺體元立極敷文奮武孝慈神聖純皇帝實錄卷之一千六十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉  
敕修

實錄卷一〇六三

一

乾隆四十三年戊戌七月癸卯諭軍機大臣

曰鄭大進奏儀封十六堡漫水由考城匯入商邱之北沙河下游宣洩不及漫溢兩岸隄堰隨處塌陷低窪村莊水深五六尺至丈餘廬舍田禾被淹現在設法接濟並令藩司崇柱就近確查加意撫卹等語覽奏為之矜憫豫省自去秋至今夏被旱成災民多窘乏雖節次施恩蠲借尚恐口食未能盡充幸而伏雨渥霑秋禾趕種可望西成豐獲庶元氣漸復藉慰廛懷不意儀封考城竟有漫口奪溜

之事。前閱鄭大進所奏。考城被水情形。已為軫惻。今商邱復因沙河漫溢。淹沒田廬。豫民何辜。疊遭災沴。更覺可哀。我君臣實當引以為過。已屢降諭旨。截留漕米二十萬石。又留豫省粟米十萬石。又撥兩淮鹽課銀一百萬兩。解豫備用。通計銀米。為數不少。足敷賑卹之需。該撫務須督同藩司。榮柱董率所屬。實力勘查。加意撫卹賑濟。俾無艱食之嗟。而免蕩析之苦。勿致一夫失所。以副朕軫念窮黎

之意。若該撫。藩尚不盡心經理。致災民或有向隅。甚或胥吏侵肥。閭閻不能普霑實惠。惟於該撫。藩是問。并諭袁守伺知之。○戶部議覆甘肅布政使王廷贊奏。稱武職應修衙署。副將。叅將。借銀八百兩。分六年扣還。遊擊。借銀六百兩。分七年扣還。應如所奏。至都司。照佐雜例。借銀二百兩。守備。照防禦例。借銀一百六十兩。分八年扣還。如係委署人員。不准借給。千總。把總。俸廉較少。應動用空缺留半

養廉從之。○又議准陝西布政使富綱奏。稱陝省每年奏銷冊造。涇陽等縣額解鞏昌布按二司俸薪等項。嗣後改為蘭州布按二司從之。○甲辰

上詣

大高殿

壽皇殿行禮。○還宮。○刑部等衙門議覆。步軍統領衙門咨稱。護軍文元。被雇夫趙大。扎傷身死。依律擬斬立決。得旨。此案三法司議將

趙大。依雇工人毆家長至死律。擬以斬決。固屬照例。問擬朕詳閱案情。該犯之母徐氏。雖經立契典與文元家。得過身價。而典限滿後。契已給還。嗣伊母子仍在文元家。月得工錢服役。又經辭出。在外居住。究與現在雇工者有間。且起釁之由。係文元因趙大積有餘貲。屢次尋鬧。既搬取其皮箱。又復扭住毆打。致趙大情急扎傷。尚非該犯逞兇干犯。趙大著從寬改為應斬監候。秋後處決。至八旗家奴。

及雇工人等。經本主放出。及辭出之後。或積有餘貲。感念舊恩。助其家長。亦屬情理。所有而為家長者。受之已覺有愧。若因主僕舊時名分。冀其僕資助。多方需索。尤屬無恥。如此案趙大母子。雖曾在文元家服役。業已辭出另居。即典置房屋。亦係其能節省經營所致。與舊時雇主何涉。乃文元屢次尋釁。並因其母子外出。踢門掀取箱籠。行同無賴。更不足齒矣。但恐旗人內似此者。難保其必無著將。此曉諭八旗人等。各自顧惜顏面。無蹈覆轍。○乙巳。諭本年選拔貢生。除引見分別錄用外。其餘已經考試各生。如有情願自備資斧。在四庫全書館効力者。准其呈明。充當謄錄。即以到館寫書之日為始。扣足五年期滿。照例覈辦。○諭軍機大臣等。據姚立德奏。現在豫省購辦料物。分運工次。并移咨山東。幫辦稽糴應用等因。一摺。覽奏已悉。料物為堵築所急需。自應上緊辦齊。以濟工作。高晉已於

本月十三日。自清口起程。想到豫甚速。即可調度會同妥辦矣。至黃河偶遇盛漲。漫開隄堰。原非人力所能豫防。若止於漫口一處。亦屬事所常有。朕從不以此責之河臣。今豫省儀封。考城。兩汛內。漫口至九處之多。必係隄工本未堅固所致。設云因去秋至今夏。缺雨日久。風日燥烈。隄工浮鬆。則是豫省亢旱之年。一遇黃河盛漲。即不免漫溢。又何藉設立隄防。以資鞏護乎。著傳諭高晉。袁守侗。於堵口合龍事竣。會同姚立德。鄭大進。將該處隄工。因何漫水過多緣由。確切勘查。據實覆奏。仍著高晉等。將何日興工堵築情形。即行具奏。○又諭戶部。議駁文綬題報打箭鑪關稅數目。比較上三屆。均屬短絀。應令該督作何分賠之數。查明具奏等語。所駁甚是。已依議行矣。打箭鑪關稅。前於乾隆四十一年六月。猝被山水。是以徵收短缺。至四十二年四月。該處已經修葺。商販往來。即應照舊。或當較

盛於前。何得仍比上屆被水之額。所增無幾。自應查明正署經管月分。按數令其賠補。但署任係四川地方官。而此案又係文綬題報。未便專令該督查辦。著傳諭富勒渾。劉秉恬。會同文綬。將此案秉公確查。分別何員任內應賠若干。據實具奏。候朕再降諭旨。○禮部議覆陝西巡撫畢沅疏稱。咸陽縣周公祠墓。雖向有奉祀生。與齊民無異。請添設翰林院五經博士一員。給與世襲。得旨。咸陽縣周公祠墓。准添設翰林院五經博士一員。餘依議。○賑卹甘肅皋蘭。紅水縣丞。金縣。渭源。循化。隴西。寧遠。安定。會寧。通渭。漳縣。平涼。靜寧。隆德。固原。合水。武威。鎮番。平番。靈州。花馬池州。同。涇州。鎮原。靈臺。清水。肅州。高臺。安西。玉門。敦煌。狄道。河州。靖遠。沙泥州。判。岷州。洮州。中衛。等三十七廳。州。縣。本年旱災飢民。○丙午諭軍機大臣曰。薩載奏。勘籌清水黃水各情形。繪圖呈進一摺。據奏。舊時楊莊口門中河。

之水。積衝抵溜。致交匯處蕩漾停淤。今擬將中河口。改在下游之李家莊。定於回空未到以前。堵舊開新。使清黃三道。並行東注。可期清水暢流無阻等語。自應如此迅速辦理。其清口東壩。先折七大。豫為宣洩之計。所辦甚好。薩載仍當時刻留心察勘。如洪澤湖水續有增長。務照舊定水誌尺寸。展拓清口兩壩。使清水暢出無礙。至通湖引河。朕早經慮及。或因黃流倒漾。運河亦畧有淤遏。今據奏。太平。天然。兩引河。水深各二三尺。果不出朕所料。薩載等何以從未奏及。嗣後如遇此等緊要機宜。務須隨時奏聞籌辦。勿稍諱飾。所奏現撥兵夫。撈浚兩引河之處。應派委妥幹員。弁。上緊集衆。挑挖深通。薩載仍須親往察勘。以資實濟。其運河內半邊微渾之故。據稱亦因黃水蕩漾日久。不免串入。此時湖水源源暢出。即運河間有浮沙。自可滌除淨盡等語。理固如此。但湖水暢出之後。薩載仍須將運

河確切查勘。如尚有餘淤未淨。亦應據實奏聞。妥為疏濬。勿致稍積淤沙為患。至惠濟祠下對面舊黃河一段。朕前次披閱原圖。恐清水至此不免散漫。且因其河尾距順黃壩不遠。留之究屬非宜。是以於圖內將硃筆標記。令於其處酌量築隄截斷。使其水自行耗乾。以資鞏固。今據奏若於此處築隄。兩面皆水。轉恐風浪汕刷。擬於西壩下老灘之上接築土隄一百七丈。直至水邊。使清水順流東下。免致散漫減力等語。其實在情形若何。難於懸揣。且照薩載所奏辦理。俟庚子春南巡時。朕親臨閱視。再為定奪。又據稱彭家馬頭迤上兩岸淤出新灘。毋庸挑切。擬於新河南岸裹頭處。再接隄一百五十丈。俾黃水直連下注等語。并閱圖內點記之處。所擬自屬有益。即可照此辦理。今高晉現赴豫省。所有南河事宜。薩載務須時刻留心。妥為籌辦。慰朕懸注。如清水續有加長情形。仍即由驛迅奏。

並將此遇便諭令高晉知之。○又諭據伊勒圖奏。土爾扈特汗策凌納木扎勒之母及貝子恭坦。扎薩克頭等台吉伯爾哈什哈等先後控告。觀音保管理游牧諸事。任意妄行各款。已用言撫慰。俟親往查辦等語。土爾扈特新來歸降。或因觀音保平時管束過嚴。挾嫌訐告。亦未可定。伊勒圖前往該處。應將觀音保舒通阿暫行解任。齊集應訊人等。逐一鞫審。如係實情。即傳旨將觀音保革職。拏送阿克蘇。不可少存偏護。俟審辦具奏到日。另候降旨。現在土爾扈特和碩特辦事乏人。著惠齡速由伊犁前往。暫理游牧事務。將此傳諭伊勒圖。惠齡并諭拉旺多爾濟知之。○戶部議准。大學士管兩江總督高晉。江蘇巡撫楊魁。兩淮鹽政伊齡阿。會奏稱。附近場竈不行官引之通州。泰州。海州。東臺。興化。鹽城。阜寧。如皋。安東各州縣濱海貧民。請仍照例官給號籌。赴場買鹽挑賣。舊有老少鹽名目。概行

革除。至山清等八州縣。向係食鹽口岸。臣伊齡阿前奏。令將通州等處銷剩鹽觔。通融銷售。今既歸民挑負。無庸給銷。至不能挑負鹽觔殘廢之人。該州縣自有孤貧口糧。亦無庸商給養贍。又各場煎曬鹽觔。除額銷及本境挑負。如尚有餘。應盡歸商買。俾裕提綱撥補。從之。○禮部等部議准。署雲貴總督裴宗錫疏稱。五槽通判。前經改為州判。屬廣西州管轄。應將原撥五槽通判學額二名。歸入廣西州學。仍取進文生二十名。武生二十名。作為定額。與五槽合取。從之。○以故雲南定遠縣土主簿李膺洲子毓英襲職。○丁未。

上啟鑒。詣盛京謁

陵。○諭。朕此次前往盛京。恭謁

祖陵。所有經過直隸。奉天。州縣地方。著加恩蠲免本年應徵地丁錢糧十分之三。該部即遵諭行。○諭軍機大臣等。前據索琳奏。請將內地商人所欠俄羅斯貨物。先行給還。經朕諭

令彼此同時交給。方為得體。茲復據奏稱。已將貨物盡數交還。俄羅斯託詞尚未查檔。反不收納等語。顯係伊等有心訛賴。內地商貨所辦實屬不成事體。索琳本屬庸材。桑齋多爾濟亦不曉事。致令伊等輕視。均不可信任。昨已遣博清額前往。俟其到時。著桑齋多爾濟會同商辦。將此諭令博清額知之。○是日。駐蹕烟郊行宮。○戊申。諭軍機大臣曰。三寶等奏。湖北省雨水田禾各情形一摺。據稱。通

省氣候遲早不一。樹藝亦先後不齊。前此缺雨。各州縣近皆溽淫甘霖。早禾已經收割者。不過十分中之一。至高阪平陸。被旱之後。未能秀實。且已屆處暑。其土性冷薄處所。播種無益者。難冀秋成。惟低窪近水之地。中禾。雜糧。晚禾。俱漸轉青。葱茏勃。而被旱高阜之處。又可乘時翻犁。補種蕎麥雜糧等語。看來湖北得雨。究覺稍遲。偏災自所不免。該督撫務須董飭所屬。實力確查。如已經成有偏災者。

即照例妥辦。勿稍諱飾。又據奏各屬米價漸長。現飭地方官。曉諭有穀之家。乘時出糶。並令酌量該地蓋藏。詳請糶濟等語。自應如此辦理。至所稱。遇有川米過境。催趲運售之處。非遏糶而何。該督等所謂。知其一。未知其二。為楚省民食計。則得矣。殊不知江南向每仰給川楚之米。今歲湖北既有被旱偏災之處。該省米糧。自不能販運出境。若復將川米截住。不令估舶運載。順流而下。則江南何所取資。况江南今歲亦有偏災。若川米不至。糧價必昂。民食或致拮据。甚有關係。該督撫止知為湖北調劑。並未就他省情形籌覈。所見殊小。朕則視天下百姓。皆吾赤子。並無厚薄之分。豈肯顧此而忽彼乎。著傳諭三寶陳輝祖。凡川省米船到楚。如有願在楚省售賣者。自可各從其便。若欲運赴江南各處販售。即當聽其通行。勿稍抑勒阻遏。俾為下游接濟。該督撫即速遵旨妥辦。仍具摺覆奏。○是日。駐

蹕白澗行宮。○己酉。諭。此次詣盛京。恭謁祖陵。經過地方。所有沿途辦差。綠營兵丁。著查明賞給一月錢糧。以昭恩賚。○又諭。朕此次詣盛京。恭謁

祖陵。經過直隸地方。該督等於行營搭蓋涼篷。既非炎熱之時。本可不必。但詢知按程均已齊辦。難以令其撤去。又夷齊廟。文殊菴。兩處該督亦有豫備房間。更不免於多費。著加恩賞銀三萬兩。即於長蘆鹽款。應解內務府銀兩內撥給。○諭軍機大臣曰。鄭大進奏。豫省現在早禾收穫。晚禾秀實。除開歸屬被水州縣外。其餘各屬。收成俱好。現屆白露。仰蒙籌給麥種。普雨之餘。地土正潤。均可及時播種等語。覽奏稍慰。豫省去秋收成。歉薄。今夏麥又缺收。民食實多拮据。幸而六月中普得透雨。均已趕種秋禾。且近來雨水調勻。西成可期。大稔。若再能廣種秋麥。以待豐收。元氣自當漸復。畧紓朕年餘縈注之懷。惟儀封考城。

黃河漫工。瀕河經水州縣。被災較重。雖已撥帑截漕。令該撫率屬善為撫卹。但此等州縣。同係上年被歛之區。乃弗克收補種晚田之利。突遭水患。蕩析哀嗷。災黎其何以堪此。朕心實為廕念。著傳諭鄭大進。率同藩司榮桂。督飭所屬。實力確查。加意賑卹。俾不致一夫失所。并查明被水州縣若干。以通省覈計。約居十分之幾。其各處成災分數。有無多少。輕重之別。據實覆奏。至所稱現屆白露。均可及時種麥。此實最要之事。或有云北方伏雨霑足。秋間有雨無雨。皆可播種秋麥。不知豫省情形若何。種麥時是否尚需雨澤。及現在曾否續得秋霖。並著一併確查覆奏。并諭袁守侗知之。尋奏。被水州縣內。儀封。考城。最重。次商邱。寧陵。睢州。其祥符。陳留。杞縣。柘城。鹿邑。永城。村莊尚多有收。以全豫而論。被災不及十分之一。現在各處雨水俱足。月內可乘時種麥。得旨覽奏俱悉。○是日。駐蹕興家樓西。

大營。○庚戌。諭軍機大臣等。滇省辦運銅觔。事關鼓鑄。不可不從長籌畫。上年經李侍堯等會議。奏請酌減鑪座各條。經該部議覆准行。今年李侍堯陞見在京。曾將銅廠每年所獲。不敷應用情形。奏及。亦無善策。近裴宗錫又因額短運遲。急籌調劑。具摺陳奏。已交部覈議。然亦不過補偏救弊之計。未必果有益也。在滇省產銅。歲逾千萬觔。本不為少。第因生齒日繁。需錢日衆。自京局以至各省。逐漸加鑪加卯。致銅額日漸增多。每歲所需。幾倍於昔。相沿既久。自難輕議改弦。該省現在廣開子廠。另覓新礮。如果銅苗旺盛。採獲漸豐。可供各省之用。固屬美事。萬一仍不充裕。自難為無米之炊。與其貽誤於將來。莫若豫籌於先事。因思減鑪減卯。自屬撙節銅觔之一法。但京局及諸大省。市闌殷庶。錢文宜廣流通。倘或議及減鑪。恐錢價加昂。有礙民用。自不便輕事更張。若邊遠省分。量為減省。尚不

至有病民之處。即如滇省。因錢多價賤。每銀一兩。可易制錢一千一百餘文。搭放餉錢。兵丁頗以為苦。或竟從滇省先行減鑪。次及貴州。廣西。諸小省。期於每歲銅勛供用無缺。得免採辦竭蹶。則是通盤籌計。實該省之急務也。若因滇省鑄錢餘息。抵補從前廠欠。不肯議減。是又不然。餘息抵欠。本非正辦。且不值以公中之有餘。抵積欠之不足。雖新舊廠欠。為數較多。亦當覈實清釐。分別辦理。如原領之廠戶尚存。及廠戶雖無。而原經手支放之員尚在者。自當勒限追繳。若原領之廠戶逃亡無著。自不應累及現在之廠戶代賠。且廠戶那新補舊。仍歸欠缺。即原支放之員。產絕人亡。亦不應累及後任之員代補。甚至令各屬攤賠。坐扣養廉。轉致藉口婪索。更於吏治有關。著李侍堯。詳悉確查。舊欠有著者若干。即行勒限追繳。其無著者若干。據實奏聞。朕不難加恩寬免。第當令此後年清年款。勿再

使逋欠誤公。方為正本清源之道。李侍堯素能辦事。而又非沽名市惠之人。此事可擔當辦得。著將減鑪廠欠二節。悉心籌畫。據實具奏。候朕酌量定奪。勿稍涉游移。致日後棘手難措。李侍堯自能善體朕意也。將此傳諭知之。仍即由驛覆奏。尋奏滇省各廠產銅扣去一分通商。實止九百數十萬勛。僅可資京局。及本省鼓鑄應用。而於各省採買。缺數甚多。自應先從本省及貴州。廣西等省。酌減鑪座。計每年可省銅一百一二十萬勛。俟採獲漸豐。再奏明復額。至廠欠工本。多至累萬。現飭藩司確查在官在民。據實嚴辦。得旨。該部議奏。○是日。駐蹕琪樹莊大營。○辛亥。駐蹕興隆山大營。○壬子。諭軍機大臣等。據袁守侗奏。豫省自十二日至二十日。陰雨不絕。秋禾尚未收竣。工次亟須運料。望晴甚切等語。其摺於二十一日拜發。自十二日計之。業已陰雨經旬。雖另摺有二十日天氣稍覺開霽之

語亦尚非晴定之詞。甚為紫注。秋禾正屆成熟之時。雨水過多。不致有礙否。或止係收割稍遲。或并致畧減分數否。著鄭大進。即行查明。據實覆奏。至所稱久雨泥濘。運料車輛行走甚遲。銅瓦廂等處。現有備貯舊料。將來興工時。如新料一時不能接濟。即將所存舊料借用。俟新料運到。再行歸還等語。自應如此通融辦理。又據奏儀考各州縣被水。及地方官分路帶銀。加意撫卹情形。鄭大進等所辦

尚屬認真。此次被水地面較寬。現已節次撥帑一百萬兩。截漕三十餘萬。賑卹不患不敷。該撫等務須實力經理。即偏僻村莊。畸單戶口。亦當詳悉查勘。勿稍遺漏。俾窮黎均霑實惠。不使一夫失所。以副朕軫念災民之意。至漫水經過之處。有淹浸過甚者。如考城縣城內水深丈餘。雖云居民俱已遷避上隄。然其中豈竟一無傷損者。即他處突遭水患。人口被漂。亦恐不免。水退後。並須逐一確查。如有

淹斃者。即照例辦理。勿使暴露。此事非人力所能豫為救護。斷不可稍存粉飾之見也。至儀封十六堡漫口。計一百五十餘丈。今據奏稱。水勢趨下。已將口門刷深。溜勢較平。但舊河近已淤淺。斷流。全河之水。盡由漫口而出等語。所關甚為緊要。不可不亟行堵築。據稱高晉一二日內。即可到工。高晉到彼。自即籌畫調度。擇日興工。鄭大進等。務即速催運料物。以濟工作。前者姚立德等奏。此次漫口。止

及楊橋之半。從前楊橋漫工。於十一月內合龍。通計不過四閱月。今較彼既僅及半。施工自更可期迅捷。著高晉將該處漫口形勢。酌量籌度。計每日可下幾埽。每埽有若干丈尺。約計何日可以合龍。即速查勘覆奏。以慰廑懷。朕惟遙祈

神佑。從此天霽波平。俾工成妥速。以冀鞏金隄而安億兆耳。將此傳諭知之。仍將應奏事宜。即行覆奏。○兵部議覆河南巡撫鄭大進

奏。河南駐防蒙古兩翼。每翼止設佐領。防禦驍騎校。各一員。遇有佐領缺出。本翼不敷正陪二員。照例無庸擬陪。從之。○又議。復廣州將軍宗室永瑋等奏稱。駐防應送丁冊。嗣後即令廣州提塘轉送在京提塘。投交戶部。其派領催披甲馳驛遞送例。永停。應如所奏。至西路新疆。如伊犁駐防丁冊。仍隨同該處摺便驛遞。從之。○以故廣西太平府屬佶倫土知州馮凌明堂叔時昇襲職。○旌表守正捐

軀江蘇桃源縣民薛有魁妻蔣氏。守正被戕。貴州正安州民羅宗得妻康氏。○是日。駐蹕夷齊廟行宮。○癸丑。諭軍機大臣等。戶部奏駁富勒渾等題銷長運滾運人夫折給口糧一摺。所駁甚是。已依議行矣。朕詳閱戶部奏摺。其指駁之處。俱甚得理。朕亦不能代富勒渾等為之分辯。著將戶部原摺寄交富勒渾等。令其於朕折角處。詳悉閱看。逐一明白覆奏。或伊等另有隱情。題疏內未經敘及。亦令

其據實奏聞。候朕酌奪。再軍需奏銷。前據富勒渾等奏明。展限至今年八月內。全行辦竣。但現在猶有二十餘萬兩。未經題銷。是各案應需覈算者尚多。而經部議駁。應行查覆者。更復不少。未知富勒渾等。作何清結。是否。可以依期告竣。並著據實覆奏。尋奏。川省辦運軍糧。長運滾運。本不相同。此次長運人夫。因係軍興之初。里民自相津貼。是以未給口糧。至滾運站夫。常川背運。向例俱於工價外。各

給口糧米一升。由站員照例支給。實用實銷。得旨。這所奏情節。該部議奏。○是日。駐蹕天台山大營。○甲寅。諭軍機大臣等。據陳輝祖奏。疎縱失囚。捏飾詳報一案。請將署穀城縣邱德孚革職。鍾祥縣知縣彭悅桂交部嚴加議處。典史韓盤革職。拏問等因。一摺。已著分別革審矣。王長係行竊擲傷事主。問擬斬候。秋審情實重犯。乃解役喬清輒敢開放鎖鑰。雇給驢騎。致令杳無蹤跡。且始則云一同

失足落水。差役得救。犯則沉溺無獲。繼復云王長乘間下驢跳河。僅係喬清一人隨行。未經躡獲等語。前後支離矛盾。甚屬可疑。況據該府查其地係洄流環抱。並非漩渦急溜。屍身不應漂沒無蹤。覈此各種情節。悉屬裝點。顯係喬清將王長賄縱脫逃。不可不徹底根究。現在各犯已經解省。著傳諭三寶陳輝祖。即提喬清嚴切審訊。務得賄縱實情。按律究擬。並選派妥幹員弁。躡訪王長蹤跡。嚴緝務獲。審明正法。毋使遠颺漏網。設或該犯果係溺斃。亦當撈獲屍身。識認明確。不得僅以疑詞完案。○是日。駐蹕深河村西大營。○乙卯。諭軍機大臣曰。高晉等奏查勘漫口情形。及奏報開工日期一摺。覽奏俱悉。高晉現已到工。相度地勢高下。所擬東西兩壩施工堵築。及開挑引河一千一百餘丈。自屬因地制宜。應即妥為趨辦。惟閱進到之圖。所擬切灘處。似覺太少。且距漫口處太近。今年辦理雖若

稍易。設或明歲河流又復漲盛。仍不能保其穩固。因於圖內。用硃筆標記。若就標記處挑切。既距漫口較遠。且形勢取直。引溜亦更為迅捷。雖比所擬引河稍長。工作不無多費。亦不可稍有靳惜。總以此次所辦工程。長資輩固為妥。著將原圖發往。高晉等可即妥速籌辦。並即催趨運料到工。以便上緊堵築。及早合龍。用慰廑念。將此傳諭知之。至興工以後。挑河下埽。能否應手各情形。仍即隨時由驛覆奏。○是日。駐蹕文殊菴行宮。○丙辰。諭前據將軍弘昫奏。請將義州等三處兵額酌裁三百六十名。分添鐵嶺九路。經兵部議裁一半。已准行矣。今思鐵嶺等處。頂衝孔道。差務較多。該兵等更番差遣。休息無時。於耕種生計。究屬無益。所有義州等處額兵。無庸裁汰。著加恩添兵缺一百八十名。分給鐵嶺處九路。於餘丁內挑充。○諭軍機大臣曰。國泰奏籌辦續撥運豫漕米一摺。自應如此辦理。據

奏請將先撥之十萬石。交兌東省幫船。趲運赴豫。其續撥之十萬石。若專雇民船。恐難如數。查臨清等六幫船。尚可勻出五六十隻。并徐州衛前後二幫船九十七隻。應赴豫兌運新漕。現泊臨清。亦請照東省幫船帶運米石等語。亦因時調劑之一法。且令江西後到之糧船。不致有誤回空。而豫省續撥之漕米。並可如期接濟。自屬兩便。鄭大進前此尚未知兩次截留之船。何時可以抵通。是以未經籌及。今國泰既已奏明。著傳諭鄭大進。即照國泰所奏。迅速派員。妥為接運。又據稱徐州衛非東省所轄。現咨漕臣商辦等語。籌辦地方公務。惟期於事有益。原不必稍分畛域。況徐州衛前後二幫糧船。原需赴豫交兌。今量為通融。於漕法不致有礙。著鄂寶即飭該幫員弁。實力辦理。勿稍推諉貽誤。又據另摺奏稱。截留各幫船。八月初旬。方能行抵臨清。若如豫省原議。上水挽運。多稽時日。恐不足以應

賑卹急需。似宜急就該處附近倉儲撥用。再將此項漕米歸還。或撥為加賑之用。已飛咨河南撫臣商辦等語。亦酌量權宜之道。並著鄭大進。與國泰迅速會商。妥為經理。將此一併傳諭知之。國泰摺。並著鈔寄鄂寶。鄭大進閱看。仍將辦理情形。即行覆奏。尋鄂寶奏。先經臣查徐州衛前後二幫。係應赴豫兌糧之船。現泊臨清。並可順載截漕赴豫。當飭該守備。速赴該處候兌。報聞。鄭大進奏。前據各州縣報被水災。急須撫卹。即於該處附近常社各倉酌借。現撥江西截漕米。應留為大賑。及來春借糶之用。并擬將開歸二屬不被災各州縣。及衛輝陳州所屬倉粟。豫撥災區。俟開賑放給。即將截漕米石歸還。得旨嘉獎。○又諭據桑齋多爾濟奏。俄羅斯固畢爾納托爾文稱。有內地數千人入彼邊境。並未往尋等語。此不過俄羅斯狡賴之詞。或章京巴達爾呼等畏罪。匿不呈報。而桑齋多爾濟索琳等

亦遂扶同徇隱。不可不嚴行查辦。著傳諭博清額。將入彼境內究有若干。並桑齋多爾濟等。因何未奏之處。詳查具奏。至巴達爾呼。因辦理瑪玉爾之事。未能妥協。業經獲罪。若仍留該處。必致諱飾其非。即著撤回。勒保現屆服闋。著賞給戶部銀庫郎中銜。無庸來京請訓。即由彼前赴該處辦事。○是日。駐蹕中前所大營。○丁巳。喀喇沁郡王喇特納錫第等迎駕。

上御行殿召見。賜茶。並賞緞匹有差。○諭軍機大臣等。前據伊齡阿奏。湖廣口岸鹽觔。未能暢銷。四十二年。少銷鹽十萬一千餘引。四十三年。亦少銷鹽七萬餘引。年復一年。辦理維艱一摺。恐係鹽法道辦理不善。及地方官不實力緝私所致。因傳諭三寶。陳輝祖。令將湖廣口岸。因何不能暢銷鹽引之故。查明具奏。今據三寶等奏稱。湖北。湖南二省。向為淮鹽暢銷口岸。查自乾隆三十一年起。四十二年

止。惟三十二年。三十八年。銷引至一百餘萬。其餘九年內。亦有銷引八十餘萬者。四十二年。銷至九十一萬三千餘道。並未短少。四十一年。雖少銷鹽七萬一千餘道。而較之三十三四等年。亦屬相同。若將最旺之年。一律比較。實有不能一致之勢等語。所奏自屬實在情形。是楚省口岸。並未短銷。伊齡阿止就暢銷之年比較。故覺其少。其意不過欲因此以形寅著之短。此即其取巧高興之一端。試問

伊齡阿到任後。能保湖廣口岸。年年暢銷鹽引。皆多至一百餘萬道乎。伊齡阿辦事尚能認真。惟性喜見長。是其受病處。昨將其調任鹽政時。曾降旨訓飭。令勿復蹈舊轍。乃甫經到任。即有此奏。恐其故智復萌。不可不痛自痛改。伊齡阿著傳旨申飭。仍令其明白回奏。○吏部等部議覆。山西巡撫兼管鹽政巴延三奏稱。河東鹽務事宜。一。鹽政舊有印信。應照浙江巡撫兼管鹽政例。凡屬鹽務。仍用鹽

政印無庸改鑄。遇有商民交涉事件。地方官會鹽員公議。詳報巡撫覈實辦理。一。鹽政既經裁汰。仍留衙署。作巡撫每歲巡察駐劄公所。一。運城距省十餘站。盤查運庫錢糧。該撫或因公事。未能剋期親往。嗣後運司交代。及奏銷時。先委道員代盤結報。該撫每年不拘何時。親赴運城盤驗一二次。餘委道員盤驗。一。鹽池隄堰禁牆歲修工程。先委運司及河東道代驗結報。該撫仍每歲親往查勘。一。乏商退出引地。應募商充補。若令赴省掣籤。多稽時日。應令運司先將引地搭配。詳報覈定。仍飭新商赴運司衙門掣定辦公。一。鹽政額設書吏。照舊存留。其承差及上號吏。輪流赴省供役。舍人阜隸等項人役。按數酌量裁存。一。該撫請將河東鹽政歲支養廉銀八千兩全裁。應令造報戶部查覈從之。○吏部議奏庫掄辦事大臣革職留任。藩院右侍郎索琳。於俄羅斯與商人貿易事宜。辦理未協。應

請革任。得旨。索琳著革任。○是日。駐蹕周家村西大營。○是月。直隸總督周元理奏。直屬本年麥收歉薄。請將撥運供糶京麥三萬石。留為秋間借給麥種之用。得旨嘉獎。○又奏。密雲縣龍潭舊建

龍神祠宇窄狹。該處山石迴抱。地盤不能寬展。現擬寬砌臺基。開鑿後面山石。改建

龍神廟。並於龍泉寺旁向南處臨流添建

聖駕臨幸座落房間。報聞。○河南巡撫鄭大進

奏報。儀封漫水情形。得旨。河南之民實可哀。

此皆我君臣之過。若再不盡心撫卹災黎。是

無人心者矣。勉為之。○山東巡撫國泰奏。豫

省儀封漫工。急需料物。當派附近儀封之荷

澤。曹單定陶。四縣採辦秫稻六十萬束。並於

兗州。泰安。曹州。東昌。濟寧。五府州。備辦秫

五十萬觔。仍於稍近豫省縣分。添辦秫稻六

十萬束。俟河臣來咨。即運往濟用。得旨嘉獎。

○湖廣總督三寶等奏。楚北被旱。江夏等四

十六州縣。於閏六月內。及本月初三。四九等日。節據報得雨二三寸。及四五寸不等。雖景象較前稍勝。但現屆白露。缺雨之區。早稻刈獲。不過十之一二。中稻未能充實。晚禾得雨復甦者。均難再熟。俟委員履勘成災分數。題報妥辦。得旨覽奏俱悉。其成災處。加意撫卹。○湖南巡撫李湖奏。先經臣將湘陰等十六州縣。衛。早禾被旱情形具奏。嗣據勘報沅。沔。慈利。石門。三縣。屢得透雨。並不成災。其餘十

實錄卷千六十三

三

三州縣衛中。即有偏災。亦止一隅中之一隅。俟委員履勘。分別籌辦。報聞。○廣西巡撫吳虎炳奏。崇善縣恩城縣丞地方。戶口日增。原貯社穀二千石不敷。應如該縣所請。再分貯常平倉穀四千石。又桂林。平樂。梧州。潯州。南寧。太平。柳州。慶遠。思恩。泗城。鬱林等府州所屬各州縣。均有穀石分貯佐雜衙門。臣恐佐雜等官。或因部中無案。有虧那徽泥等弊。隨嚴檄該佐雜等。照例交代結報。仍歸額貯之

州縣倉內造報。并責成道府親盤。以歸畫一。報聞。

實錄卷千六十三

三

大清高宗法天隆運至誠先覺體元立極敷文奮武孝慈神聖純皇帝實錄卷之一千六十三

大清高宗法天隆運至誠先覺體元立極敷文奮武孝慈神聖純皇帝實錄卷之一千六十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌八月戊午朔祭

大社

大稷遣理郡王弘曉恭代行禮○諭軍機大臣等上次遞到本報刑部覈擬斬決之本共有十餘件此次報到刑部本內並無斬決之件此等情罪重大之案自應酌量勾開分報呈遞不應忽多忽無著將此傳諭英廉等嗣後刑部進本務須均勻分遞○又諭據明善奏稱何澤洪托病偕住伊塔家內以及病愈前往科布多行至中途病發仍回伊塔家中顯

係捏造甚屬可惡將何澤洪鎖拏送交刑部治罪等語明善自尚未奉到前旨故有此奏但所辦未免錯誤閱所奏何澤洪供詞有令其子誑報已經前往科布多之處止須就此予以應得罪名但恐此供亦係明善等回護前奏欲加之罪似未必果係實情今何澤洪既已解部著傳諭刑部堂官俟該兵解到時詳訊確情分別覈擬具奏並將此諭令明善知之○又諭據文綬奏川省辦理軍需奏銷新舊正案計於八月內定可完竣其收支結總於兩三月內亦可辦畢諸事竣後即馳赴闕廷請訓等語同日並據富勒渾等奏川省奏銷八月內限期屆滿現飭局員趕造銀米收支總冊並將攤賠各款酌議條例及奉部駁查各案分別答覆竣後即率同李世傑等進京請訓等語富勒渾文綬等俱係辦理軍需奏銷經手之人必應俟諸事通行完竣方可來京陛見現在限期雖已屆滿而未經題

到者。尚有三分之一。且從前題銷各案。經部駁查者甚多。並未登覆清楚。其事實未完竣。此後自尚有駁查之案。若經手原辦大員。俱行進京。又令何人查覆耶。富勒渾等。亦不必因前定期限。展至今年八月。必欲如期竣事。不妨再予展限數月。詳悉妥辦。俾各案通行清結。著傳諭富勒渾等。將新舊部駁各案。通盤覈計。約再需幾月。可以全完。據實奏聞。候朕酌量降旨。文綬等。通俟登答全完後。再行

奏請來京陛見。○又諭據文綬奏。布政使錢鑒。年近七旬。兩耳重聽。從前於一切應辦事件。尚能辦理裕如。今歲自入夏以來。時復患病。雖調理就痊。察其精神較減。重聽亦甚於前等語。錢鑒年力就衰。朕久聞其老顏。文綬所奏已遲。但川省軍需。係伊一人經手。現在辦理奏銷。尚未完竣。自難驟易生手。應俟報銷完結之後。即著該督據實奏明。予以原品休致可也。將此諭令知之。○是日駐蹕沙河。

所東大營。翼日如之。○己未。諭海為衆水朝宗。最昭靈應。乃各處

海神。咸有廟祀。惟

北海。自山海關至盛京一帶。向未專建廟宇。以隆禋祀。尚屬闕典。朕此次前詣盛京。恭謁祖陵。蹕途循海而行。瞻望甚近。宜先申虔祭。以迓靈庥。著該部。於濱海地方。擇地望祭。派莊親王永瑞。行禮。所有應行事宜。各該衙門。即速照例備辦。並著周元理。於山海關澄海樓相近處所。度地建立北海神廟。即行繪圖呈覽。候朕降旨發帑興工。俾廟貌崇闋。以妥

神祐。○諭軍機大臣曰。薩載奏清水加長。宣洩各情形一摺。據稱清水現已暢流。迅出東西兩壩。口門已展至三十丈。天然太平兩河。俱一律深通。淮揚運河兩腮浮沙。經清水暢出。即可刷除。不致停積。設洪澤湖水過盛。再將五壩封土。酌啟一兩壩。以資分洩。各等語。

自宜如此留心。隨時妥辦。惟所稱清水出口。直達黃河中泓。會黃東注之語。不解其故。黃河自儀封十六堡漫口奪溜。舊河現已斷流。安得復有東注之水。或豫省以下。另有他水匯入黃河。仍由江南入海。亦未可定。著薩載即將此等情形。即行查明覆奏。至於黃河必挾泥沙。非有蕩漾之處。不能清澈。驗之毛城鋪減下之水。其故可見。彼減水且然。況大溜乎。今儀封漫水。由賈魯河達淮。由淮以達洪澤湖。雖經行之路甚長。而河流濁勢。不能驟改。中間又不聞有蕩漾之所。是賈魯及淮必有受淤者。若更淤及於湖。則所係甚大。著高晉悉心籌勘。無論何處受淤。急宜酌量疏濬。以為善後之計。斷不可稍事因循。致滋貽誤。前據高晉奏。儀封堵築漫口。已於七月二十四日興工。並據鄭大進奏。二十一日以來。天已晴霽。連日施工情形若何。每日可下幾埽。約計何時可以合龍。或在十月初。或在九月

內。愈速愈佳。著高晉等即行據實覈計。迅速奏聞。以慰廑念。至豫省既已天晴。道路自漸乾燥。運料更當迅便。著鄭大進。即速催趲料物。赴工應用。勿稍遲誤。將此傳諭知之。仍各將應奏事宜。迅速由驛覆奏。尋奏。江南地處下游。兩岸河灘盛漲後。積水甚多。繼以七月中旬久雨。坡水加增。豫東境內。由順隄河澄清下注之水。先經督臣高晉放入微山湖內收蓄。其餘兩岸外灘坡水。復經臣飭廳營在灘上抽溝宣洩。是以悉注黃河。其豫省漫下之水。由淮以達洪澤湖。查係水色純清。洪澤湖內不致受淤。得旨覽奏俱悉。○庚申秋分夕。月於西郊。遣貝子弘閑。恭代行禮。○是日。駐蹕五里河村大營。○辛酉。遣官祭關帝廟。○教漢貝子羅布藏錫喇布。及奈曼巴林。阿魯科爾沁。翁牛特。喀爾喀。土默特。扎魯特。各部落王公台吉等迎駕。

上御行殿召見。賜茶。並賞緞匹有差。○諭軍機大臣等。據文綬奏籌濟楚省民食。現在飛札咨詢湖北。如果需米孔殷。請於川省水次州縣存貯倉穀內撥穀二三十萬石碾米運往楚省酌撥應用等語。所奏未免有意。川省素稱產米之區。各處民食該督止須飭令夔關速行驗放。不至遏糴阻商。自可絡繹接濟。毋庸官為籌辦。設或川米價值稍昂。商人惟利是圖。必不肯費貴價以虧本。更不值官為過計。今文綬欲於官貯倉穀內酌撥二三十萬石碾米運往。是名為籌濟楚省。而實則以此數十萬石倉穀官為辦運塞責。實意欲禁商糴也。殊非通商恤鄰之道。況該督止知湖北偶被旱災。早稻歉收。糧價昂貴。不知江南向亦仰給川米。今夏缺雨。復有一隅偏災。其望上游米船更切。前因三寶等欲將川米截住。不令估舶運行。所見殊小。曾降諭旨飭令不許阻遏。今文綬僅撥官穀為湖北調劑。並欲

禁使商販赴楚之川米。不令流通。與三寶之禁楚民流通之意同。非特湖北民食有礙。江南更何所取資。豈朕一視同仁之意乎。爾等封疆大吏。或分疆界。朕亦如爾等分疆界乎。著傳諭文綬。將所奏碾米運往之處不必行。仍飭產米各屬聽外省商民照常販運。源源接濟。夔關驗放勿稍留難。俾江楚間閭口食無虞缺乏。副朕軫念。將此傳諭文綬。並諭三寶。陳輝祖知之。○吏部議覆甘肅布政使王廷贊奏。各省調署人員。遇有薦舉等項。或因本任道府一時盡易。其接任道府又未經接見。遽難出考。應即責令署任之該管道府出考。由司轉詳。仍令該督撫嚴行察覈從之。○豁雲南沉溺。乾隆三十五年分。解京銅九萬六千五百觔有奇。○是日。駐蹕杏山東大營。○壬戌。遣官祭昭忠祠。○諭豫省儀封考城一帶。黃河漫口奪溜。被災較重。朕心深為軫惻。已命大學士高晉。選帶諳習河工將備弁

兵星馳赴工。速籌堵築。復降旨截留漕糧二十萬石。併留豫省新漕十萬石。又先後撥運兩淮鹽課銀一百萬兩。並命尚書袁守侗。前往查辦。董飭有司。實心撫卹。俾災民不致失所。現在要工需用料物甚急。雖令未被災之各州縣辦運。但念該省昨秋今夏。俱係歉收。幸六月得雨後。補種秋禾。而七月內陰雨連綿。收成又不免稍減。若照定例給價購辦。尚恐不敷。著再加恩。將所辦料物。無論道路遠近。於正價之外。每百觔加價銀五分。小民自必踴躍趨事。可期迅速。該撫務須督率所屬。實力妥辦。期民間均霑實惠。毋致吏胥侵肥中飽。副朕軫念窮黎之意。該部即遵諭行。○又諭曰。錢鑒奏。川省軍需報銷。現已完竣。其一切收支細數。現在會同各司道。加緊趕辦。俟辦竣另摺具奏等語。自應如此辦理。但朕早聞錢鑒年已老顏。昨文綬亦奏其近復多病。重聽亦甚。朕以該省軍需。係伊一手

辦理。現在奏銷正案。及部駁各款。尚未辦竣。不便遽易生手。是以諭令文綬。俟各案完竣。再行奏聞。准予休致。但念錢鑒自辦理軍需以來。尚有出力之處。若事竣後。竟令以原銜休致。不足以獎其勞。著傳諭錢鑒。令其自行審度。如自量精力尚可支持。俟奏銷全竣。奏請來京陛見。候朕量加改擢。如自揣實係衰頹。雖清閒京秩。亦難勉強供職。著俟奏銷駁案全行辦完後。據實奏聞。當加恩賞給侍郎職銜。令其回籍。以示優卹。○諭軍機大臣曰。高晉等奏。儀封漫口。興工進埽。分路運料。及約計合龍日期等因。一摺。據稱二十五、二十九等日。雨復連宵達旦。且時當秋汛。上游水勢疊長。黃河兩次長水一丈。沁河亦長水丈餘。漫口東壩。復有墊塌。計寬二百二十七丈。水深二丈。至三丈五尺等語。深為厯念。然亦惟有加緊堵築。此外別無良策。今節氣秋分已過。水勢自可不至再長。高晉等務須董飭

將弁等。儘力下埽。以期迅速合龍。慰朕懸注。所有應行添備之稽糴糧木等件。應即速行購辦。並已明降諭旨。加價購料。自更易於集事。至所擬分路運料之處。亦當速為妥辦。鄭大進當選派妥幹員弁。沿途分路催押。並於水路多備船隻。陸路修治車道。俾無阻滯。其有能如期運工應用者。官則酌予記功。人夫則量為獎賞。必更踴躍趨事。至高晉等拜摺以後。連日天氣曾否晴霽。自開工至今。共已下得幾埽。實計何日可以合龍。即速奏開。以紓朕宵旰縈念。至於辦工辦災。兩者並重。豫省去秋至今夏。久成旱災。民多艱食。自六月得雨以後。幸皆補種秋禾。方冀閭閻元氣。可以漸復。乃不意秋雨連綿。晚禾分數又減。豫民何不幸若此。為之嗟憫。現已發帑截漕。鄭大進當率同藩司榮柱。嚴飭有司。實心查辦。凡被災地方。分別極重次重。據實賑卹。毋致稍有遺漏。俾皆得所。袁守侗。仍不時留心查

察。以防不肖官吏。侵漁粉飾。將此傳諭知之。仍將應行覆奏事宜。由六百里馳奏。○又諭。據高晉等奏。豫省漫口九處。惟儀封一處。奪溜口門寬深。需料較多。所辦稽料。雖於未被災之各州縣採辦。但時值陰雨連綿。運送既覺艱難。而本年麥收歉薄。秋成亦未十分豐稔。民力尚欠紓徐。若照定例。每百觔給價九分。似覺不敷。懇恩於正價之外。每百觔加價銀五分。小民益必踴躍。大工可期。速成等語。此即寓賑於工之意。已明降諭旨。加恩增價矣。至所稱增給料價。即著落河臣。撫臣。及藩司。并有漫口之道廳等官名下。均攤賠補。工竣覈實。按限追繳還款等語。此則河撫諸臣。當自發天良。而非朕應降旨者。今儀封一處。漫口至二百二十餘丈。被災既重。需料又多。姚立德身任河臣。鄭大進職司守土。即榮柱及該道員等。亦均有地方之責。伊等目擊情形。撫心自問。能稍安乎。著傳諭姚立德。鄭大

進等自行籌度。應如何著落辦理之處。就伊等所見。具摺奏聞。候朕另降諭旨。○是日。駐蹕興隆屯大營。○癸亥。科爾沁親王旺扎勒多爾濟等迎駕。

上御行殿召見。賜茶。並賞緞匹有差。○是日。駐蹕金剛屯大營。○甲子。諭軍機大臣等。據李質穎奏。拏獲結盟匪犯馮亞根等。嚴審究擬一摺。已批交該部覈擬矣。此案起意糾約結盟。律應緣首之馮亞根。在監病斃。已屬倖逃顯戮。何以為從擬軍之馬上彩等五人。均因病監斃。非禁卒等多方凌虐。以致痰斃多人。即係該犯等恐得重罪。乘間自戕。二者必居一於此。如獄卒等虐囚致死。其罪甚重。即囚自輕生。必係鎖鑰不嚴。亦難追疎玩之咎。若地方官規避處分。捏報病故。其欺飾亦當從重叅處。均不可不徹底根究。著傳諭桂林。李質穎。即連嚴切查訊。務得實情。分別擬議具奏。勿稍徇飾。○是日。駐蹕廣寧城南大營。翼

日如之。○乙丑。

上詣

北鎮廟行禮。○諭盛京為本朝

王迹肇基之地。朕恭謁

祖陵。道出山海關。經過各處城垣。多有坍塌。殊

不足以壯觀瞻。而資捍衛。著軍機大臣。會同

將軍弘昫。查明何處最為緊要。應行修築。妥

議具奏。候朕發帑興工。併派員稽查督辦。○

又諭曰。桂林奏。廣東碣石鎮總兵許時中。赴

京陛見。順道過省接見。據稱。年已七十七歲。

自揣難勝專閫。第念受恩深重。不敢遽求閒

退。意欲面奏懇恩。至其員缺緊要。未便久懸。

請旨即行簡員補放等語。廣東碣石鎮水師

總兵員缺。著陳國泰補授。許時中。俟到京陛

見時。看其精力若何。再降諭旨。○以休致甘

肅平番縣土司副千戶魯烈子宗禹襲職。○

旌表守正捐軀河南汝州民王進禮妻楊氏。

○丙寅。

太宗文皇帝忌辰遣官祭

昭陵○諭前據三寶陳輝祖奏。今夏湖北得雨稍遲。米價漸長。遇有川米過境。催截運售等語。此非遏糴而何。朕以該督等為楚省民食計。則得矣。不知江南向每仰給川楚之米。今歲亦間有偏災。更不能不待上游之接濟。且楚米既不能販運出境。若復將川米截住。不令估舶運載。順流而下。則江南何所取資。該督撫止就本省籌覈。所見殊小。豈朕一視同仁之意。隨即傳諭訓飭。如川省米船到楚。聽其或在該省發賣。或運赴江南通行販售。總聽商便。勿稍抑遏。嗣又據文綬因楚省有買川米之咨。奏稱川西川南。雖獲豐收。恐商賈紛集爭糴。或致米價騰踊。擬將水次州縣各倉內。撥穀二三十萬石。碾米運楚。應用等語。名為設法調劑。實欲藉此塞責。禁止商糴也。所見與三寶等相同。隨即飭令不必將倉穀碾米運楚。聽商販源源糴運。變關驗放。不得

稍有留難。在該督撫僅就一省起見。或分疆界。朕視天下百姓。皆吾赤子。豈亦如伊等之分疆界乎。且伊等皆國家大臣。自當以朕之心為心。豈宜意存畛域。若徒知各子其民。囿於私見。不亦可鄙乎。如川省米船運載疏通。固屬甚善。但恐川船到楚。僅敷該省之用。不能分運。則江南糧價。或致增長。深為厯念。著諭文綬將擬撥楚省之倉穀二三十萬石。即速就各水次碾米。運赴江南備用。並諭薩載等酌於何處接運。分撥需米之各地方。隨時出糴。以平市值。而裕民食。一面知照文綬辦理。一面奏聞。至川省動撥倉穀。俟明歲穀賤時。再行買補。該督撫速為遵辦。妥辦。該部即遵諭行。○諭軍機大臣等。據薩載奏洪澤湖清水續長。飭將清口東壩陸續展拆至五十丈。並將山盱智字一壩封土。豫為開放。以備分洩水勢等語。所辦甚好。淮水雖增長未已。而洪澤湖面甚寬。足資容納。又已將清口展

拆宣洩得宜。且高家馬頭一帶嫩灘。更可藉以刷盡。其智字一壩減下之水。高寶諸湖。今年底水尚淺。亦足資儲蓄。均極妥協。至另摺奏稱。近因河南黃河漫口。水勢泛溢。上江之亳州等六州縣。河水驟漲。宣洩不及。低窪田地。被淹。房屋間有倒塌等語。亳州等六州縣接壤豫省。因黃水漫溢。致田廬被淹。雖據奏稱。查明人口並無傷損。但現屆秋穫之時。猝遭水浸。均已成災。恐被水貧民。不免失業。甚為可憫。著傳諭薩載。迅委委員。會同各該州縣。確勘被災情形。其有應行撫卹之處。即照例董率各屬。實力妥辦。不使一夫失所。副朕軫卹災黎至意。並諭閔鶚元知之。○是日駐蹕常家屯大營。○丁卯。祭先師孔子。遣協辦大學士英廉行禮。○是日。駐蹕蔣家店大營。○戊辰。太祖高皇帝忌辰。遣官祭福陵。○諭軍機大臣曰。高晉等覆奏。改擬引河。

並將攔河壩移上等。因一摺所辦甚好。並據稱八月初一日後。晴霽多日。料物得以源源到工等語。稍為慰懷。引河既分段陸續挑挖。成功自可望迅速。而攔河壩移上。挑溜亦更為得力。至東西兩壩。現在趕做壩臺。一俟壩臺辦成。料物應手。自即上緊下埽。惟日盼高晉等將進埽情形奏到。以慰懸念耳。至初下埽時。貼近東西壩臺。且兩旁底水亦淺。施工自尚省力。若進埽既多。口門日漸收小。溜勢更急。河底更深。下埽較為不易。前者楊橋漫工。遣大學士劉統勳。兆惠前往堵築。袁曰修亦同差往。聞其回京時。曾向人言下埽漸近中泓頗難著力。因思埽在水內。其質輕浮。遂設法每埽繫以船上大鐵錨八支。使得直墜到底。自此下一埽。即得一埽之益。不復有漂走者。其說似為近理。但楊橋之事。距今已十八年。未必有能記憶者。著傳諭高晉等下埽至口門收小時。水深溜緊。或可以其法試之。

所需鐵錨。若僅買之大船。尚恐不能敷用。即可仿其式成造。所費有限。而所全實多。高晉等當妥酌為之。今天氣既晴。節令將屆寒露。水力漸緩。可望施工穩妥。迅速合龍。惟額手以祈。

神佑耳。仍將運料能否迅速。每日下埽若干。迅速由驛覆奏。○又諭。前因福州府知府缺出。曾降旨令該督撫於通省知府內。揀員調補。遺缺將鄔維肅補授。今據德保奏請將漳州府知府姚茶調補福州府。以汀州府知府景昌調補漳州府。所辦非是。福州府雖閩省首郡。事務較繁。但督撫皆駐省會。又有兩司各道同城。即或遇有要務。首府就近稟承。易於辦理。至漳州一郡。濱臨海疆。民俗刁悍。最為難治。其緊要數倍於福州。朕因素知姚茶能事。前此漳州缺出。特從湖北調任該郡。實係因地擇人。豈可輕於更調。雖據稱漳州近年以來。風氣漸淳。究亦未足深恃。萬一地方

有事。又豈德保之所能豫料乎。今德保請以姚茶調補首郡。而以景昌調任漳州。最劇之郡。實不能仰體朕意。其見識亦甚不通。且景昌既可由汀州調補漳州。何不即將伊調補福州乎。著傳諭德保。如姚茶等尚未調定。即將景昌調補福州府。其汀州府員缺。即著鄔維肅補授。如彼此業經更調。自難復行改易。著德保將景昌留心試看。如景昌到漳州後。不能如姚茶之經理得宜。即一面仍將姚茶調回漳州。將景昌調補福州。不得稍有回護。楊景素回閩後。並當加意體察。據實辦理。勿稍瞻顧。將此一併傳諭知之。○又諭。曰。伊勒圖奏。據和碩特德勒克烏巴什稟稱。伊等屯田數年。業經諸習。請照別處游牧例。自行耕種。又稱所收糧石。經觀音保每月差人分放等語。回疆各游牧。均無辦事大臣。其和碩特一處游牧。亦可無庸派人管理。遇有事件。即著各盟長。呈報烏什叅贊大臣。及伊犁將軍

等辦理。觀音保前經貝子恭坦等列款控告。今又經德勒克烏巴什訴控差人分放糧石。是觀音保不獨措置失宜。且有擾累伊等之處。著革職。令惠齡暫住該處辦理。回人事務。其土爾扈特和碩特游牧。無庸兼管。○詔雲南沉溺乾隆三十八年分解京銅八萬八千七百觔有奇。○是日。駐蹕黃旗堡大營。○已巳。諭昨因盛京各處城垣多有坍塌。令軍機大臣會同將軍弘昉。將應行修築事宜詳查妥議具奏。今據議稱各屬城垣必應修築。共有十八處。分為三次修葺。並請簡派大員稽查督辦等語。已依議行矣。此項工程著派邁拉遜、德成督辦。伊等接奉諭旨。即馳驛前行在。候朕面降諭旨。即可會同將軍、府尹赴各屬勘估。以便發帑興工。所有工部尚書事務著金簡暫行署理。○是日。駐蹕佛柵子大營。○庚午。萬壽節。遣官祭

太廟後殿。○遣官祭福陵。昭陵。昭西陵。孝陵。孝東陵。景陵。泰陵。泰東陵。○遣官祭孝賢皇后陵。○遣官祭顯佑宮。東嶽廟。城隍廟。○是日。駐蹕大臺大營。○辛未。諭遼河雙源遙引。合而為巨流河。襟帶神皋。恬波涵潤。實為陪都境內大川。朕恭謁祖陵。蹕路所經。舟梁利涉。緬念河神之功甚溥。顧該處向無祠祀。典尚闕焉。著邁拉遜、德成會同將軍、府尹於勘估城工

之便。在瀕河高阜處所。度地計工。奏聞請帑。專建。

河神廟。以昭妥侑。○是日。駐蹕噶布該大營。○壬申。駐蹕蓮花套大營。

大清高宗法天隆運至誠先覺體元立極敷文奮武孝慈神聖純皇帝實錄卷之一千六十四

實錄卷之六十四

三

大清高宗法天隆運至誠先覺體元立極敷文奮武孝慈神聖純皇帝實錄卷之一千六十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理  
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務  
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次  
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌八月癸酉諭軍機大臣

曰高晉等覆奏堵築漫工情形一摺據奏東西壩臺現已築成且自初一以來天氣連晴料物源源趲運俟各料可敷接手之用即晝夜進埽跟鑲以一日四丈計之應需五十二日若無雨雪耽阻計期九月內外即可完竣并派州縣十員分段挑挖引河及築攔河壩以期及早完工各等語如此甚好務即勉力妥辦迅速合龍以慰懸注又高晉另摺覆奏儀封漫水由淮入湖並無淤墊之處據稱黃

河自漫口下注經由數州縣。普面四散。泥沙隨處停積。而自賈魯河入淮。所經之路甚長。迨由淮河達洪澤湖。已非濁流等語。果爾。則淮湖均可無虞。淤積貽患。自屬最善。至所稱漫水經由之數州縣境內。凡有關水利之支港溝洫。難免淤墊。現委員查勘。詳晰繪圖。如有阻礙水勢處。立即委員疏導。倘無阻礙。不過漫水淤墊。俟工竣歸入歲修水利河道案內。照例妥辦等語。朕意以為其事當分別為之。若果有礙水道之停淤。自應覈實勘估。即籌疏濬。俾各通流宣滯。以期利民。其並無阻礙地方。水過沙存。小民轉得資一水一麥之利。且瀕河之地。淤沙高積。亦足為河隄外護。於河防似覺有益。竟可毋庸照歲修之例辦理。高晉等以朕所見為何如。將此傳諭知之。仍著將下埽挑挖引河各情形。隨時由驛具奏。○又諭曰。薩載奏。八月初間。據亳州蒙城二州縣。續報連日風雨。平地水深二三四尺。

以致城腳淹浸。間有損壞。亳州城牆並有鼓裂塌卸之處。被水災民。現在撥船濟渡。高阜處所安插。又壽州鳳臺二州縣。高田已被旱災。因豫省黃水漫溢。淮流驟漲。致灣地秋糧被淹。又盱眙五河二縣。亦係先被旱災。近因淮流下注。河水陡漲。低田復被水淹。現在分別安置。平糶煮賑。照例撫卹等語。安徽之鳳陽潁州等屬。適當豫省漫口下流。被災較重。各處賑糶諸務。需用糧石必多。前據文綬奏。擬將川省水次州縣各倉。撥穀二三十萬石。碾米運楚。朕因江南每年仰資川米。今歲又有偏災州縣。曾明降諭旨。令該督即將此項碾米運赴江南備用。並諭薩載酌量地方分撥。隨時出糶。今安徽省亳壽等州縣。早災之後。繼以水災。貧黎自皆嗷嗷待哺。恐該處常平不敷應用。莫若即將川省碾運之米。酌撥以資調劑。著傳諭薩載。豫行覈計各州縣災分輕重。豫為撥定。一俟川米運到。即便接運安

省以供賑糶而裕民食。並諭閔鶚元董飭各屬實力經理。務令災黎均霑實惠。勿使一夫失所。若川米到遲。目下需米孔亟。則所留江西漕米。亦可先行動用。仍各將作何辦理情形。先行由驛奏覆。○朝鮮國王李祘遣陪臣恭迎表進方物。得旨。王恪守藩封。因朕恭謁祖陵。遣使遠來。具表進獻方物。具見悃忱。知道了。該部知道。○實授復興。為理藩院右侍郎。○命革任侍郎索琳。在理藩院郎中上行走。○以故雲南永昌府屬鎮康土知州刀悶鼎子悶鑑襲職。○是日。駐蹕尚家河西大營。○甲戌。上謁永陵。未至碑亭。即降輿慟哭。步入啟運門。詣寶城前行禮。躬奠哀慟。王以下文武大臣官員隨行禮。○是日。駐蹕夏園大營。翼日如之。○乙亥。

上詣

永陵。行大饗禮。○詣

顯佑宮行禮。○遣官致祭附葬之武功郡王。恪恭貝勒墓。暨附近之覺羅等祖塋。○閱興京城。○諭軍機大臣曰。桂林等奏。暹羅鄭昭附到回稟。請寬貢期。前後情節矛盾。擬稿嚴飭等因。一摺。所見亦是。但措詞稍覺過嚴。鄭昭屢次所稟。其誠偽固不足信。但彼既知尊奉天朝。不妨畧示含容。轉不必疾之太甚。惟斥其前次遣使具稟。今乃率附商船轉寄。殊不知禮。以此飭之足矣。至其稟內所稱。緬賊恃獲天赦。愈行猖獗。攻逼邊界甚急。乃指緬甸與暹羅交兵之詞。今檄稿內稱。賊氛永息。有何愈行猖獗之處。實誤會其來稟本意。竟可毋庸提及。即緬匪懇求開關納貢之語。亦不值與言。至鄭昭謂詔氏子姓無存。原未必盡確。從前何仙鎮莫士麟。曾稟稱詔氏現尚有人。且暹羅舊臣尚有不附鄭昭者。是鄭昭

之意。未嘗不欲藉中國冊封。以為鎮壓。但究係逆詐億不信。莫若概置不論為妥。已命軍機大臣代桂林等擬作檄稿。諭以接閱來稟。據稱。現禦緬賊。乞寬貢期等語。與所稟情事未合。爾於上年遣使前來請貢。並據丕雅遜吞亞排哪突稟稱。已豫備象隻等物。未敢帶來。懇求轉奏大皇帝恩准。方敢納貢。前任楊總督。念爾出自誠心。仰體大皇帝一視同仁之盛意。不忍拒絕。因覆檄諭爾。俟貢物到境。當為轉奏。並無立定貢期之語。且無必欲令爾入貢之心。前任楊總督。調任閩浙。所有檔案。俱移交本部堂存覈。且將前次覆檄諭爾之意。面告本部堂查照。歷歷可稽。爾何忽有此請寬貢期之語耶。至爾現禦緬賊。尚未暇即備貢禮。自屬實情。但止須據實稟明。不應妄有寬期之請。幸爾前稟情節。楊總督尚未據情入告。是以本部堂尚可為爾明白開示。爾如果誠心恭順。虔修貢禮。遣使恭進。並將

國人推戴情殷。詔氏子孫已無的派。明晰聲敘請封。本部堂亦必據稟代奏。恭候加恩。若此等游移無定之詞。徒屬虛談無益。且爾之入貢與不入貢。係爾之受封與不受封。於天朝何關輕重。本部堂亦何必望爾之修貢耶。至爾前次求貢。遣使齎呈。殊覺非禮。念爾久居外邦。不諳禮制。姑置勿問。嗣後務益知恪謹。毋稍疎懈。干咎。著軍機大臣將改定檄稿。發交該督等。仍付便船齎回。如鄭昭果能誠心恭順。遣使進貢請封。原可據情入奏。候朕酌量降旨。若仍游移無定。亦不過摘其小疵申飭。畧寓羈縻。不必過嚴其詞。與彼斤斤較量也。將此傳諭知之。嗣後如遇鄭昭投稟。無論其詞意若何。俱著由驛馳奏。○丙子。諭軍機大臣等。前據勒爾謹奏。因伊犁議請額設總兵。陝甘所屬八旗。均難移改。擬將西安提督裁汰。並提標五營。改設伊犁等因一摺。所奏不知事理輕重。斷不可行。曾明降諭旨。令

兵部另行妥議。嗣據兵部議奏。提督一缺。自不應裁汰。至所奏伊犁移兵三千。令該督於陝甘兩省各標營內。酌量何營應移兵若干。及何營何員。應汰應留之處。妥協酌議具奏。到日再議。已依議行矣。今思伊犁屯田舊有總兵經理。從前俞金鰲。喬照。皆曾為之。即欲將此總兵。作為額缺。伊勒圖原可據實奏明。候朕簡授一員。不過添一總兵。而於營制無庸酌調。較伊等所辦。實為簡易直捷。何必輕議更張乎。至屯田兵衆。本屬不少。縱欲添設。亦何需三千之多。但按所請。移撥一半足矣。其應移之兵。并不必裁。甘肅之缺。即陝西綠營兵。亦不必抽調裁汰。莫若將西安所駐之漢軍一千五百名。俱令改歸陝西綠營。該督即會同巡撫。提督。酌量何營可移兵若干。即以移駐所出之缺。令西安漢軍。陸續頂補。在漢軍各官兵。自皆樂從。而陝西綠營兵缺。并不至裁減。最為兩便。至西安所有改歸綠營

之漢軍額缺。並可於京城滿洲兵內。挑選一千名。往彼駐防。所有漢軍原住之房屋。仍可留與滿洲兵居住。如此籌辦。既省移駐更調之煩。而於京城滿洲生計。亦甚有益。尤屬一舉兩得。並著伍彌泰。伊勒圖。勒爾謹等。迅速妥議具奏。到日。候朕再降諭旨。此旨著一併傳諭知之。仍各將覈議情由。即行覆奏。○是日。駐蹕尚家河西大營。○丁丑。諭曰。閔鶚元奏。查勘得亳州。因豫省黃水漫衍。直注該州。將城門堵築。水未入城。其城外坊廂民房。半多倒塌。該州被水地方。居十分之九。又蒙城。居亳州下游。因水勢漫漲。不能容納。以致四鄉田廬。淹浸居十分之八。至下游之懷遠。宿州。鳳陽。靈璧。五河等州縣。瀕河窪地。亦被淹及。現在飭委各員查勘等語。亳州等州縣。接壤豫省。因黃水漫溢。致田廬淹浸。被災較重。前據薩載奏到。已傳諭該督撫。令將川省水次倉穀二三十萬石。碾運之米。酌撥安省被

災地方。以備賑糶之用。今據該撫勘明亳州、蒙城等處被災較重。著即動支倉穀設廠平糶。並照例先行撫卹。給予一月口糧。以資接濟。至懷遠、宿州、鳳陽、靈璧、五河等處。先已被旱。今又猝然被水。並著即派妥員會同該地方官勘明成災輕重。照例撫卹。該督撫即董率各屬實心經理。毋任吏胥中飽。俾災黎均霑實惠。該部即遵諭行。○是日駐蹕蓮花套大營。○戊寅諭軍機大臣等。戶部議駁西寧奏請將本年應完引課銀四十萬兩分限五年完交之處。毋庸議。一摺。據稱乾隆四十二年鹽引已據該鹽政於本年五月內奏銷全完。引藉鹽銷課從鹽出。既無未銷之引。安得有未銷之鹽。計該年應完引課應俟本年十一月內始行奏銷。鹽引已銷完半年之久。不應藉詞請緩。況該處現有帶徵節年舊欠。若復議停緩。將來新舊並納。必更形竭蹶等語。所駁殊為近理。長蘆上年之引既已於本年

五月奏銷全完。則該年應完之課自應於今年十一月奏銷時全行完納。西寧何以如此奏請。著傳旨詢問西寧。令其將實在情形明白覆奏。○吏部議准。陝甘總督勒爾謹疏稱。瑪納斯自移駐春兵。商民日聚。事務漸繁。請將原設縣丞改為知縣。添設典史一員。岷州設有學正訓導二員。應令訓導一員移駐均歸迪化直隸州管轄。從之。尋定縣名曰綏來縣。○吏部等部議覆。廣西布政使朱椿奏稱。南寧、太平、鎮安、泗城等府向募客民充當書役。或藉端滋事。遠颺異地。無從訪拏。現飭所屬另募土著具結充當。其隻身流寓者概限退役回籍。應如所奏。至嗣後召募書辦如非確有戶籍。朦混報充。本犯杖一百。遞回原籍。濫保人同罪。本管官並不知情。照失察例。罰俸一年。如明知並非土著。准投充者。照濫收例降一級調用。從之。○添建湖北、山東、湖枝、江、應城、保康、來鳳等六縣倉廩三十九間。

從巡撫陳輝祖請也。旌表守正捐軀江西進賢縣民胡某妻熊氏。胡受俚妻吳氏。周孔受妻熊氏。○是日。駐蹕噶布該西大營。○己卯。

上謁

福陵。未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員隨行禮。○諭。朕自乾隆十九年再莅盛京。迄

今二十四年矣。遼瀋為我朝

鴻業肇基之地。風俗敦龐。人心淳厚。緬惟

祖澤留貽。食舊德而服先疇者。久而彌篤。比戶

恬熙之象。時繫於懷。茲由山海關至陪京。恭

謁

祖陵。時當秋穫豐登。蹕路所經。村村殷阜。而老

幼歡迎。扶攜恐後。尤見忠愛惻忱。嘉慰之餘。

恩施宜渥。啟鑒日業。經降旨免所過地方錢

糧十分之三。著再加恩。將奉天所屬府州縣。

乾隆四十四年地丁正項錢糧通行蠲免。俾我留都士庶連年不事輸將。益享盈寧之福。該部即遵諭行。○諭軍機大臣曰。陳輝祖奏。南漳縣解役王永升。管解應行斬決之盜首田三。在途賄縱。請將知縣馬世崧等分別革職。等因。一摺。田三係刦盜首犯。問擬斬決。情罪重大。解役理宜嚴行管押。遵例籠鎖。毋致疎脫。乃差役王永升。係僉押田三之人。膽敢於途次。向該犯借用錢文。竟將鎖鑰鑰匙。交付本犯自帶。又不管押同行。致該犯乘間開鎖脫逃。情節甚為可惡。解役得賄。故縱。例應照囚罪同科。即他人獲犯。亦不准減免。今王永升之借用重犯錢文。付給鎖鑰。其賄縱已屬顯然。即應照例問擬。該撫摺內。僅稱並提兵役。研究實情。嚴辦。而於王永升之應問何罪。並未聲明。殊屬疎漏。陳輝祖著傳旨申飭。並著該督撫。即速飭屬。將逃盜田三。嚴緝務獲。即行正法。其賄縱之解役王永升。

亦即訊明。從重究擬。速奏。並將托病倩人代替之解役王鼎。及頂替管解中途潛回之郭保。一併嚴訊確情。定擬具奏。○是日。駐蹕馬關橋大營。○庚辰。

世宗憲皇帝忌辰。遣官祭

泰陵。○

上詣

福陵。行大饗禮。禮成。即往謁

昭陵。未至碑亭。即降輿。慟哭。步入

隆恩門。詣

寶城前行禮。躬奠哀慟。王以下文武大臣官員

隨行禮。○是日。駐蹕瓦子峪大營。○辛巳。

上詣

昭陵。行大饗禮。○遣官致祭

福陵

昭陵之

壽康太妃。

宸妃。

懿靖大貴妃。

康惠淑妃。并公主園寢。○遣官致祭。克勤郡

王岳託。武勲王揚古利。宏毅公額亦都直義

公費英東墓。暨賢王祠。

遼太祖陵。○遣官祭

長白山。

遼河。

渾河。

松花江諸神。○諭盛京等處俗厚風淳。獄訟

衰息。惟因五方雜處。良莠不齊。其無知而蹈

法網者。亦復不免。朕恭謁

祖陵。禮成行慶。業經疊沛恩膏。並宜式措祥刑。

益敷愷澤。所有奉天。吉林。黑龍江等屬軍民

人等。除十惡死罪。及秋審情實各犯外。其餘

已結未結。一應死罪。俱著減等發落。軍流以

下。悉予寬免。用昭肆眚。施惠至意。○又諭盛

京為本朝根本重地。兵丁皆知恪守舊風。嫻

騎射。以裕武備。現亦校閱。分別賞賚。其讀書

之士亦漸摩文化。蒸蒸日上。盛堪與畿甸比隆。朕鑒輅所臨。青衿獻詩趨逐。絃誦彬彬。具見膠庠樂育。自宜一體加恩。用彰作人盛典。著將盛京滿合二號及奉天所屬各學科考廣額一次。其向取進六名以上者。增額三名。四五名者。增額二名。二三名者。增額一名。該府丞其悉心校錄。甄拔殊尤。副朕嘉惠士林至意。○又諭朕恭謁

祖陵禮成。現降旨將奉天所屬府州縣。乾隆四

十四年地丁正項錢糧。通行蠲免。所有各莊頭及旗地。應納糧石草束等項。自應一體加恩。以敷渥澤。著將盛京戶部各莊頭。本年應交倉糧一萬餘石。免其交納。所有各處匠役應需口糧。著於舊存倉糧內撥給。其盛京興京遼陽牛莊蓋州熊岳復州金州岫巖鳳凰城開原錦州寧遠廣寧義州等十五處旗地。本年應納米豆草束。亦著免徵一半。俾旗莊均霑嘉惠。該部即遵諭行。○又諭豫省儀封。

考城一帶。黃河漫口。被災較重。朕心深為軫惻。業經降旨。截留漕糧二十萬石。併留豫省新漕十萬石。又先後撥運兩淮鹽課銀一百萬兩。並命尚書袁守侗前往查辦。董飭有司。實心賑卹。俾災民不致失所。第念被災州縣。尚有應徵米豆等項。若今冬仍令輸將。貧民未免拮据。著再加恩。將儀封考城商邱寧陵睢州祥符陳留杞縣本年共應徵粟米三萬一百八十七石零。豆五千九百一十三石零。又祥符等六州縣。應徵麥一千六百五十六石零。一并緩至次年秋後徵還。以紓民力。該部即遵諭行。○諭軍機大臣等。據吳虎炳奏。拏獲受賄帶路之要犯周貴。俟解到審訊。一摺。周貴以內地民人。久竄夷地。住家開鋪。本非安分之人。又復受陳廷暄等之賄。代為引路。難髮其情罪甚屬可惡。既經拏獲。著傳諭吳虎炳。於該犯解到時。即嚴訊確情。從重定擬。一面奏聞。一面即將該犯正法。勿使久稽。

顯戮。至摺內稱。周貴竄入安南之坵黎地方。差役躡訪得實。當即拏獲。投明該國夷目。即派差協同看守。現在夷目奉到該國王諭。飭令一同護送進口等語。該國王聞知內地緝獲要犯。即派夷目協同看守。護送進關。甚屬恭順可嘉。有此一節。應即將陳廷暄。阮文富二人。發回安南。令該國王自行治罪。著吳虎炳接奉此旨。即將陳廷暄。阮文富提出。派委明幹大員一人。押至安南邊境。喚其看管。關界官員至關。傳朕諭旨。以陳廷暄。阮文富二人。假充使臣。跟役入邊。又復私自雜髮。妄希混冒內地民人。罪難輕宥。該撫將二犯嚴禁司監。本應按律處治。今大皇帝因爾國王。聞中國在安南境內。拏獲要犯周貴。即派員協同解送入關。甚屬奉法知禮。誠悃可嘉。特加恩將該二犯釋放回國。聽該國王自行懲治。以示天朝寬大之恩。並俟該國使臣到京時。另有加賞該國王之物。付其齎回。用昭優獎。

諭訖。即將二犯。付安南管關人員領回。轉交該國王辦理。將此諭令吳虎炳知之。仍將如何派員宣諭。及遣回夷人日期。具摺覆奏。並諭令刑部堂官知之。○是日。駐蹕盛京舊宮。至丁亥。皆如之。○壬午。上御崇政殿。扈從王公大臣。並盛京宗室覺羅將軍。官員及朝鮮使臣。行禮。賜茶。○諭朕詣盛京恭謁

祖陵。所有直隸。奉天。等處辦差文武官員。俱著

加恩各加一級。其現有降級之案者。准以所加之級抵銷。○又諭。朝鮮列在外藩。世篤忠貞。謹守侯度。乾隆八年。及十九年。臨幸盛京。朝鮮並修朝貢之禮。本年以尚在二十七月之內。停止宴禮。曾豫勅朝鮮。毋庸遣使朝賀。而該國王情殷感戴。遣陪臣齎表修貢。迎駕請安。藉抒忱悃。恭順可嘉。並照上兩次之例。加恩賞賚。并御書扁額以賜。用昭優眷。其陪臣。亦著一併照例加賞。

御書扁曰東藩濟美○又諭朕恭謁

祖陵禮成。所有隨駕之王公。俱著紀錄一次。文武大臣官員。俱著各加一級。○又諭向來鑾輅時巡。每優賜高年粟帛。以昭行慶。況盛京諸處。乃

祖宗德澤培貽。

累洽重熙。引恬引養。尤徵仁壽之休。茲蹕路經行。多有年踰耄耄。龐眉皓首。扶杖歡迎者。宜沛恩膏。以彰盛美。所有奉天等處旗民男婦

平定縣志卷之三

三

及官兵母妻。七十以上者。各給布一匹。米五斗。八十以上者。給絹一匹。米一石。九十以上者。倍之。百歲者。加賞大緞一匹。彭緞二匹。用示優老。引年至意。○又諭。向凡巡幸所至。一應經行橋道。俱令報部覈銷。以寓體卹官民之意。惟盛京一帶。止計橋梁。不計道路。未為畫一。且非所以廣惠也。所有此次。自山海關以外。至興京。往來道路。並著加恩。照關內之例。一體報銷。○兵部尚書公福隆安等奏。恭

查

東陵。

西陵。凡距紅橋數十里外。尚有青橋。此外方非禁地。應請將盛京

三陵周圍。就各地勢。酌定里數。量增青橋一層。青橋內。禁止樵牧行走。如有違越。將該管官弁。從重治罪。應請勅交該將軍。會同府尹等。詳查定議。得旨。是。尋於

永陵正門外。展添柵木三百四十四架。增設紅

平定縣志卷之三

三

橋三十六。白橋六十四。青橋三十六。福陵添柵木一千五百十四架。移展紅橋二百六十一。外酌增白橋二百六十一。青橋四十。昭陵前門外。增添柵木四百四十二架。移展紅橋一百二十八。白橋九十。青橋四十。○予睿忠親王多爾袞。豫通親王多鐸。肅武親王豪格。克勤郡王岳託。入祀盛京賢王祠。○癸未。上臨武。勲王揚古利。宏毅公額亦都。直義公費

英東墓各賜奠。○諭軍機大臣等。據劉墉奏。如臯縣民人童志璘。投遞呈詞。繳出泰州徐述夔詩一本。沈德潛所撰徐述夔傳一本。其徐述夔詩內。語多憤激。現移督撫搜查辦理等語。徐述夔身係舉人。而所作詩詞。語多憤激。使其人尚在。必應重治其罪。今徐述夔雖已身故。現據童志璘呈其所作之一柱樓詩。已有怨憤之語。其未經查出之詩文。悖逆詞句。自必尚多。不可不嚴切查究。搜燬淨盡。以

平定本二六三

一

正人心而厚風俗。且正當查繳違礙書籍之時。而其子不將伊父詩文呈出。亦當治以應得之罪。至沈德潛為此等人作傳贊揚。亦屬非是。念其已經身故。姑免深究。閱其所作傳內。有伊弟安罹大辟。閱十七月而冤雪之語。徐述夔之弟。係屬何人。曾犯何罪。作何完結。並著查明原案。詳悉覆奏。又另摺奏稱。有丹徒生員殷寶山。當堂投遞狂悖呈詞。並於其家中。搜出詩文二本。語多荒謬等語。殷寶山

所呈芻蕘之獻。深詆士習民風吏弊。竟以為耳聞目見。無一而可。其人必非安分守法之徒。但所言猥瑣。轉可置之不問。至閱其岫亭草內。記夢一篇。有云。若姓氏物之紅色者。是夫物之紅。非即姓之紅也。紅乃朱也等語。顯係指稱勝國之姓。故為翁子徽國之語。以混之。尤屬狡詭。該犯自高曾以來。即為本朝臣民。食毛踐土。乃敢繫懷故國。其心實屬叛逆。罪不容誅。著將書本。發交薩載。即提該犯到

平定本二六三

一

案。就此條嚴加刑訊。詰其是何肺腑。取具切實供詞。勿任展飾。按律從重問擬具奏。其徐述夔詩。並著查明。據實辦理。至昨歲因王錫侯大逆之書。曾諭督撫等。飭屬實心查察。遇有不法詩文。隨時查辦。今殷寶山悖逆之詞。經劉墉搜查而得。即行具奏。該地方官。平日竟置若罔聞。高晉。薩載。楊魁。所司何事。應得何罪乎。著傳諭高晉等。即行明白回奏。並查明該管之縣府司道各官。一併叅處。并諭劉

墉知之。○以湖北鄖陽協副將范宜恒為福建福寧鎮總兵。○乙酉。

上詣

文廟行禮。○御大政殿閱盛京官員射獎賞有差。○遣官祭賢良祠。○諭軍機大臣等昨據劉墉奏於殷寶山家內搜出詩文二本內有記夢一篇應行究訊現在移咨督撫辦理等因一摺。已諭薩載楊魁嚴訊該犯確供從重定擬具奏矣。今復思該犯情罪重大外間審訊恐不能得其實供著傳諭薩載楊魁查殷寶山現在解交何處審辦即由該處派委妥幹員弁管押該犯嚴行解京審訊沿途小心防範毋致疎虞昨日發去之書仍著繳回所有該犯家屬並著楊魁就近查拏監禁聽候辦理將此傳諭知之。○吏部等部議覆大學士管兩江總督高晉江蘇巡撫楊魁兩淮鹽政伊齡阿會奏酌定查緝私鹽處分一定例拏獲私鹽承審官不能究出來歷按犯罪

平定縣志卷之三

三

一

平定縣志卷之三

三

一

輕重分別罰俸處分較輕應如所奏嗣後承審官不究明來歷及運往何處率混具詳照故縱例革職一鹽引未完舊例八分以上者革職其自一分至七分者僅令戴罪督銷叅處究屬具文亦應如所奏除未完四分以上仍照例辦理五分以上例降職降俸者改降二級調用六分以上例降三級者改降三級調用七分以上例降四級者改降四級調用不准融銷開復其墮銷鹽引議以降級調用之員如有軍功加級紀錄者准抵銷別項級紀不准議抵一私鹽要隘應委候補千總巡緝半年更換獲私四千觔以上者准留巡一次半年期內能緝積慣大夥在萬觔以上者遇缺先補兵役倍賞如漏私至四千觔者降一級留任四千觔以上者降一級調用萬觔以上者革職兵役嚴處并令該督於標弁巡滿時積算漏私觔數咨報兵部分別查議一嗣後倘有大夥梟徒如嶧縣鹽城拒捕傷差

之案。將包庇之兵役。從重問擬斬候。私售竈丁。及窩頓匪犯。概發伊犁烏魯木齊等處為奴。從之。○貸湖南湘陰。巴陵。臨湘。華容。平江。武陵。桃源。龍陽。沅江。澧州。安鄉。慈利。石門。安福。永定等十五州縣。并岳州衛。本年旱災。飢民口糧。○旌表守正捐軀陝西澄城縣民金體胖。聘妻李氏。○丙戌。

上御大政殿。閱吉林官員射。獎賞有差。○命重修盛京。

天壇。

地壇。移建。

太廟於大清門東。○是月。倉場總督舒常等奏。節交寒露。查有湖南二三等幫。及江西七幫。應行到通之船。至今未抵關口。隨令坐糧廳前往楊村。會同天津道。將已到船隻。即在楊村起卸。如未到楊村。在天津交兌。或隨路迎剥起卸。飭令糧船回空。速歸水次。接兌新漕。得旨嘉獎。○欽差大學士管兩江總督高晉。

等奏。東西兩壩臺築成。因西壩水勢較緩。先軟鑲十九丈。嗣東壩因無大溜。亦經軟鑲四丈。臣高晉前在楊橋。協同堵築。祇有軟鑲用船用錨。並未見下埽有用錨之處。此次應無庸另用大錨。仍照歷次成式。多用蔴繩。以柴土追壓到底。可資穩固。再該工下游之大壩引河。缺口溝槽。現委員趕築頭壩。鑲以防風。其二三壩。只須夯礮堅實。原隄衝成坑塘。俟水涸補築者。先於外灘築堰攔禦。計合龍後。節逾霜降。水勢歸槽。無虞串漫。得旨覽奏。諸凡悉心妥辦。深慰朕懷。惟俟早報合龍之佳信耳。○署兩江總督薩載奏。本年上下江地方。均有偏災。需米接濟。現咨四川督臣文綬。飭水次州縣。碾米來江。俟到時。撥給上江十萬石。委安徽藩司。在安慶地方接運。以五萬石分派江常鎮等三府。如川米不能如數。另行酌派。得旨嘉獎。○江南壽春鎮總兵李奉堯奏。查勘亳州濱臨渦河。因豫省漫水下衝。

城垣間被浸損。州境東西北三鄉。被災甚重。南鄉地高畧減。得旨。地方官所辦賑務如何。災民皆受實惠否。據實奏來。○山東巡撫國泰奏。准豫省咨稱。儀封漫口。所需進埽料物緊要。現貯北岸廠內。稽蘇若必俟豫省委員轉運。不免稽遲。臣行抵曹郡時。即將運送協濟料物。委員徑抵東壩工所交收。並於辦稽一百五十萬束原數外。多備稽四十萬束。運至曹單廳貯備。得旨。所辦可嘉。

實錄卷之六十五

六十五

大清高宗法天隆運至誠先覺體元立極敷文奮武孝慈神聖純皇帝實錄卷之一千六十五

大清高宗法天隆運至誠先覺體元立極敷文奮武孝慈神聖純皇帝實錄卷之一千六十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄次臣曹振鏞等奉

教修

乾隆四十三年戊戌九月丁亥朔

上詣

清寧宮祭

神○諭朕此次詣盛京恭謁

祖陵蹕路出山海關而行憑覽關城形勢屹然

雄鎮明季於此置大員設重兵拒守以防我

朝而大軍每從沿邊諸隘口直入如踐無人

之境可見險固不足恃也然以當時盛京而

論有此關控扼其中內外氣脈不能貫注即

由他路入邊而彼終得撓我之後所以天聰

三年。

太宗文皇帝親統大軍征明。進圍燕京。仍復釋之而去。

聖謨深遠。未嘗不籌慮及此。迨後攻克永平灤州。遵化。皆留將督兵駐守。或欲藉以為內外夾攻山海關之策。乃代鎮之貝勒阿敏。乖張怯懦。竟棄已得之各城而歸。

太宗憤甚。數其罪而責之。雖貸其死而全親親之誼。遂不復。

躬總六師入邊。亦深以山海關中隔為難也。泊乎闖賊陷關。明社遂墟。吳三桂乃開關迎請王師。為之復仇。戡亂。於是我睿親王。即率勁旅入關。一戰而殲賊衆。追逐李自感至京城而遁。克集大勲。恭奉我

世祖章皇帝定鼎燕京。統壹寰宇。用奠我萬世丕丕基。夫同此山海關也。前則屢圍之而不得其機。後則直入焉而無所於阻。蓋

上天眷佑我國家。誠非意計所能豫及。而所謂

在德不在險者。於此益見。迄今追思。更不禁感。

鴻貺而凜。

景命矣。且自出關後。途中所經。城郭則寧遠錦州。廣寧等處。山川則松山。杏山。大凌河。薩爾。澗。尚。間。崖。渾。河。等處。悉我

太祖

太宗艱辛百戰之地。歷歷在目。溯自興京。

肇迹。遼瀋。

遷都。

業基於勤。而

謀成於斷。皆世世子孫所當深念者。朕自臨御以來。每間日恭閱

列祖實錄一冊。周而復始。於

創業垂統之蹟。敬識之弗敢忘。前此癸亥。甲戌。再臨陪都。展謁

陵寢。所歷川原形勝。因見徵聞。並為詩篇以紀。而薩爾。澗。一戰。破明四路之兵二十餘萬。遠

近承風震。尤為

締造鴻規。向曾親製書事長篇。昭示來許。昨歲為全韻詩於

太祖

太宗大烈。耿光。咸誌述成什。端委畢該。洪纖具備。實足以垂法守。非僅托為吟咏而已。茲戊戌秋。三莅斯土。境之履者。益以習蹟之著者。益以析。其或地名。今昔傳訛。介於疑似。顯晦間者。復周諏而深考之。乃得曉然於心。而無所惑。夫以朕之景仰

前型。懃懃若是。必三至乃得曉然於心。凡我子子孫孫。紹登大統者。可不體朕志。以為志。瞻懷遼瀋舊疆。再三周歷。斬於

祖宗遺緒。身親而目覩哉。至於朕叩謁

永陵

福陵

昭陵。每至必淚隨聲湧。瞻戀不忍去。此非可以強致也。夫

太宗為朕之

高祖。而自

太祖以上至

肇祖。雖遞推遞遠。然追溯水源木本。一脈相承。則固甚親而甚近。且奕禩之昇平景運。皆昔日艱難開創之所留貽。永言思之。豈能不痛理也。亦情也。我後世子孫。誠能遵朕此旨。處尊位而常緬

前勞。覽當年原獸而興思。拜舊里

松楸。而感愴。自必凜然於

天眷之何以久膺。憬然於

先澤之何以善繼。知守成之難。兢兢業業。永保勿墜。則我大清

累洽重熙之盛。洵可綿延於億萬斯年矣。非然者。或輕視故都。而憚於遠涉。或偶詣

祖陵。視同延攬古蹟。而漠不動心。是則忘本而泯良。設有其人。即為國家之不幸。實不願我後嗣之若此也。子若孫可不恪奉朕訓。而知

做懼乎。歷代事蹟湮遠。姑不具論。即如勝國。洪武草昧初開。未嘗不得之艱苦。而中葉以後。罔念厥祖。若正德之荒淫蕩佚。恬不為怪。嘉靖萬曆。天啓之昏庸逸樂。阿柄下移。以致權臣奸宦。相繼而擅威福。亂政害良。此數君惟知蒙業而安。於國事懵然罔覺。雖未及身而喪。不數傳而馴至滅亡。使有能奮然振興。追念洪武之舊圖。勵精求治。未必不可挽回於未造。而晏安酖毒。終於不可救藥。自覆厥宗。殷鑒甚近。尤足為炯戒耳。或我子孫尚知遵朕此旨。欲莅陪京。而其時無識之臣工。妄以為人主當端處法宮。綜理庶政。不宜輕出關外。此即我朝之亂臣賊子。當律以悖命之罪。誅之母赦。蓋盛京為根本重地。發祥所自。後世不可不躬親閱歷。昔我皇祖曾三舉斯典。朕今亦三次矣。如升殿祀神。閱射行賞之類。仍循成例。而於三陵之察紅橋。移近居。及葺盛京舊有之

壇

廟。以至沿途之繕城垣。檢覈各庫諸事。則皆前兩巡所未及。而今悉舉而行之。益可見臨幸之有益矣。十數年後。朕躬若尚如今日之康彊。仍當再修上

陵之禮。然尚須有待。嗣後每閱三年。即派皇子二三人。恭謁

祖陵。每次於秋冬間啟行。途間既不煩修治橋道之勞。而儻從無多。更可不豫安營頓俾之

歷覽舊京風土。自皆惕然動念。感

天佑而仰

祖功。無負朕諄切垂訓之意。欽承母后將此通諭中外。並錄一通。交尚書房存記。其三年一次簡派皇子之事。屆期著軍機大臣請旨。○又諭渾河發源遙遠。自東北來入英莪邊門。西流幾及千里。會遼入海。紫護

三陵。滋演萬年

靈脈。長川襟帶。兼衛陪都。厥功甚鉅。自宜虔崇

廟祀以答

神庥著交邁拉遜德成會同將軍府尹於盛京城東度地鳩工奏聞請帑興建

河神廟以昭妥侑○諭軍機大臣曰德福等

奏據該典簿呈稱東廡添設禮親王等六案

請每案酌添廚役五名共添三十名臣等公

同商酌今於各項廚役內通融派撥惟裕祭

及孟春時享日如額設廚役不敷再行奏請

酌添數名以供祀事等語所奏非是東廡添

設各案所需牲牢遵豆為數有限何至每案

請添廚役五名明係承辦各員希圖混冒該

堂官既知可以通融派撥即應將所呈駁飭

何以復為此奏并稱如或額設不敷再行酌

添數名顯係豫為將來加增地步頃令軍機

大臣就近詢之鐘音亦以為不應如此辦理

看來此事斷非德福之意至吳玉綸係漢堂

官亦未能辦理及此必係扎郎阿一人主見

伊係贊禮郎出身與太常寺官員及典簿等

素相熟識故爾心存照顧而德福等不加體

察遂率行扶同入奏耳著傳諭德福等即將

此事因何如此奏辦情形據實明白回奏勿

稍徇飾干咎○又諭據正黃旗滿洲都統奏

雲南鎮雄營參將達福病故所有應分賠掩

埋陣亡瘡故骸骨銀兩一千一百五十九兩

零並無產業請將伊子永海馬甲餉銀按季

坐扣一半完項等語達福不過一參將並非

武職大員且係掩埋骸骨之項為數自屬有

限何以該參將名下分賠至一千一百餘兩

之多則不必賠而開銷又當凡幾此事原辦

時必有情弊或因達福已故可冀寬免故於

伊名下分賠獨多亦未可定著傳諭李侍堯

即將此案徹底通查已開銷若干應賠之數

共係若干原係何人所辦幾人承辦作何分

賠達福名下賠數因何如許之多有無影射

情弊詳悉查明據實覆奏尋奏達福分賠等

項並無影射情弊請將該員應追銀著落前

撫臣明德及軍需局員與未能妥辦之歷任督撫分股攤賠下部議○戊子

上自盛京啟鑾迴京師○遣官祭

歷代帝王廟○遣官祭

都城隍之神○諭軍機大臣等昨據高晉等奏儀封漫口東壩應行軟鑲之丈尺做完於二十一日吉期起至二十三日已下埽四個連東西壩臺及先後軟鑲丈尺已做成一百零三丈均甚穩固等語覽奏深慰塵懷儀封漫口前後共刷寬二百二十餘丈今下埽及軟鑲已做成一百零三丈是工程將及一半似乎九月內即可合龍高晉等務即上緊催趲迅速妥辦並將近日又進若干埽約計何時可以合龍之處即行由驛速奏又據稱對岸開挑引河并舊河內引渠現有人夫一萬六千餘名分段趲挑已有三分工程等語引河關係緊要自應急速趲挑但所開引河必須挑濬極深方能引掣大溜速歸舊道即多

用工價亦所不靳高晉等切不可稍存惜費之見致引河平淺不得力也至引河挑成時或俟合龍後再行引溜或先引溜再圖合龍河工舊日章程若何高晉等作何辦法著即據實具奏朕意引河既成似應即行引溜歸槽則口門水淺淤停施工較易合龍似更可迅速高晉等以朕所見為何如將此傳諭知之仍將所詢各情形即由驛覆奏以慰懸注○又諭曰周元理奏審明偷竊山西巡撫本箱之竊賊鄭四問擬發遣一摺已批交該部議奏矣至高三身係馬夫輪值接遞本章自應照例騎馬背負馳遞乃遇熟識便車輒搭坐打盹將本箱拴放車尾以致被竊遺失至睡醒知覺復畏罪逃匿其情節甚為可惡不可不嚴拏務獲從重懲治該犯係該縣馬夫未必即能遠颺且聞本章已得竊賊鄭四業經審明定罪或竟潛回本處或避匿近地俱未可定著傳諭周元理即密飭地方官上緊

躡緝務將高三拏獲到案。嚴審定擬。毋稍疎縱。致令免脫漏網。○吏部等部議覆。江西巡撫郝碩疏稱。南豐縣屬羅坊墟。清江縣屬樟樹鎮。高安縣屬灰埠墟。崇仁縣屬鳳岡墟。各該處水陸通衢。戶稠民悍。需員巡防彈壓。查建昌臨江瑞州三府。均設有經歷。其照磨俱屬閒曹。應如所請。臨江府照磨移駐樟樹鎮。為該通判照磨。定為選缺。裁建昌府照磨。改為南豐縣羅坊司巡檢。瑞州府照磨並裁。改設高安縣灰埠司巡檢。崇仁縣向設坑埠司巡檢。離城甚近。居民漸少。應移駐鳳岡。改為鳳岡司巡檢。三缺均以要缺註冊。缺出在外揀調。從之。○旌表守正捐軀廣東新寧縣民梅耀親妻陳氏。○是日。駐蹕佛柵子大營。○已丑。駐蹕黃旗堡大營。○庚寅。諭刑部會同九卿秋讞已畢。當以次繕冊具題。聞今年各省情實人犯。較上年多至一百八十餘人。其因金刃傷人。擬入者較多。是各督撫均未能

深體朕意。朕上年明降諭旨。以彼此鬪毆之案。若死者僅用手足。而兇犯輒持金刃殺傷。此等好勇鬪狠之徒。不可不嚴示懲儆。自當入於秋審情實。但不教而殺。朕尚不忍。因令各督撫。徧行出示。咸使聞知。俾各畏法悛改。并予限一年。俟再下屆秋審時。始行分別辦理。若教而不從。則是自取其死。情罪俱無可恕矣。因思今年秋審案件。俱在未奉諭旨以前。愚民尚未周知。若即行予勾。何以副朕前旨。辟以止辟之意。所有今年秋審情實金刃傷人之案。著刑部於黃冊內。夾簽聲明。其已經具題者。於進到時。交行在刑部夾簽呈進。原可扣除不勾。但此等案犯。情節較重。即不予勾。亦止應照情實未勾之犯。辦理不得援尋常緩決人犯之例。三年後即予減等。是於從寬之中。已寓戒好勇鬪狠之意矣。恐僻壤窮鄉。遽難家喻戶曉。著再予以五年之限。令各該督撫。將朕此旨。明白曉諭。實力勸導。務

使人盡儆凜以化其桀驁不馴之習勿致輕罹刑網若五年後仍然怙終不悛復有用金刃傷斃徒手之人者則殺人者死律合抵償且屢訓不悛法難更宥即當概行予勾無稍矜恤各宜感悔省悟毋負朕諄切教戒化民勵俗之至意將此通諭中外知之○是日駐蹕蔣家店大營○辛卯諭軍機大臣等據勒爾謹奏河西一帶秋禾滋長茂盛地氣較寒之處尚在青蔥其較暖地方將次成熟至附近河流之田渠水灌溉更可必其豐稔等語所奏殊未明晰甘省五六月間節次得雨未能深透普遍前經該督奏報臯蘭等三十六廳州縣高阜地方間被旱災雖得雨亦屬無濟業已降旨令該督實力查勘妥協辦理今勒爾謹第奏稱河西一帶秋禾豐稔而於河東地方情形除被旱之臯蘭等廳州縣外其餘各處情形若何並未提及又臯蘭等州縣惟高阜被旱其低窪處所尚有收成與否至

通省各州縣合計被災者若干成災約有十分之幾均未詳晰聲敘著傳諭勒爾謹即速查明分析具摺覆奏尋奏前奏秋禾情形僅就河西一帶而言現飭藩司確查另題報聞○以兵部左侍郎周煌知武舉內閣學士胡高望為武會試正考官詹事金士松為副考官○是日駐蹕常家屯大營○壬辰遣官祭黑龍潭昭靈沛澤龍王之神玉泉山惠濟慈佑龍王之神○諭軍機大臣等據薩載奏高寶邵伯湖河水勢盛長啟壩分洩現已平定一招覽奏稍慰至湖河水勢盛大堤岸在在危險於高寶一帶所關甚鉅自不得不急籌啟壩減洩而減下之水既多下河亦不免稍淹此亦無可如何之事據稱下河民田早稻業經刈獲完竣所種晚禾先經地方官出示曉諭趕緊收割惟低窪灘地間有補種晚禾之處所淹亦屬無幾現已飛飭確查

辦理等語。深為厪念。著傳諭薩載。即速查明下河被淹情形。若何。田廬有無傷損。該督現在作何辦理。即行據實覆奏。○是日駐蹕網戶屯大營。○癸巳。諭軍機大臣等。據閩鶚元奏。查勘鳳。泗等屬水旱偏災。現在確覈詳辦一摺。覽奏稍慰。安省之亳州蒙城二處。被水較重。其餘壽州。鳳臺等處。俱已先被旱災。又被水淹浸。被災亦重。深為軫念。前經降旨。令文綬將川省倉穀二三十萬石。碾米運赴江南。以備賑卹。尋據薩載奏。川省碾運之米。約計十五萬石。以十萬石撥交上江。五萬石撥交下江備用。係就兩省情形。酌量分撥。自應如此辦理。今閩鶚元奏。安省通屬常平倉實貯穀米等項。一百一十餘萬石。各處賑需。俱可就近撥濟。川米到江稍遲。亦可留為明春賑糶之用等語。是安省百姓。尚不急需川米之接濟。該撫查辦災務。尚屬認真。自不致有遺漏。著傳諭該撫。速即督率各屬。照例妥協。

辦賑嚴禁吏胥侵漁中飽。務令災黎均霑實惠。勿使一夫失所。○又諭。據楊魁接准學政劉墉咨會。有丹徒縣生員殷寶山。投遞呈詞。語多狂悖。又如阜縣民童志璘。呈繳泰州已故舉人徐述夔詩集。語多憤激。現在嚴行搜查審辦等語。此二案。前據劉墉具奏。已降旨薩載。楊魁。令派委妥員。將殷寶山。嚴行解京審訊。並將其家屬就近查拏。聽候辦理。薩載。楊魁。接奉前旨。自即當遵照。妥辦。至徐述夔一犯。雖已身故。其所著之書。自應向其子孫速行追繳。今據楊魁稱。伊孫徐食田。賄囑縣書。捏稱自行呈繳等語。徐食田既隱匿伊祖書籍。不早呈繳。及知事已敗露。復敢賄囑縣書。捏稱自繳。其詐偽殊為可惡。且必有隱匿書籍板片之事。亦當解京嚴訊。徐食田自己拘提到蘇。著傳諭楊魁。即派委妥員。將徐食田嚴行解京審訊。沿途小心防範。毋致疎虞。派人嚴搜其家。有無藏匿書籍之事。速行奏

聞并將聽受賄囑之縣書一併遣員隔別管解來京。沿途毋任見面串供。另滋弊竇。所有徐述夔家中各項書籍書板。仍即詳細搜查。全行解京查辦。并諭薩載知之。又諭本日楊魁奏報各屬七月分糧價單內。如江寧蘇州鎮江揚州等府屬米麥時價。俱注有比上月減字樣。殊為不解。今歲江寧等屬夏間均各短雨。及得雨以後。亦未能一律補種。晚禾秋收未免歉薄。何以四郡糧價轉較上月有減。或係川省商販於文綬未辦以前。業已運至江省。因而米價漸平。抑或安徽未經被災之處。悉已成熟。米糧較多。各商因得運販下江。源源接濟。以致市價平減。著傳諭楊魁即將實在情形查明據實覆奏。尋奏閏六月以前雨少水淺。商米不能輓運入市。糧價稍增。迨七月連得透雨。河港水長。販運流通。且松太等屬秋收本豐。餘米出糶。是以市價比前平減。得旨覽奏稍慰。又諭據陸耀奏東省

自閏六月七月以來。各屬俱得透雨。秋禾普種。現在百穀登場。合計通省收成。確有九分有餘。前奉恩旨。截留江西漕糧五萬石。已飭令收貯濟寧水次。酌給各州縣相時出糶等語。東省收成既有九分有餘。是各屬均屬豐收。現可無需米糧接濟。而豫省今年被災較重。雖節次降旨。截留漕糧二十萬石。又留豫省新糧十萬石。以備賑卹。尚恐不敷。與其將截留漕糧五萬石。留貯東省水次。以待來年之用。又不若即將此項米石撥交豫省接運。以備賑卹。於豫民自更有益。著傳諭國泰即酌量情形。如濟寧所貯之截漕五萬石。可以撥給豫省。即一面覆奏。一面知會鄭大進派員赴濟寧領運。如此項米石東省亦所必需。即據實具奏。不必勉強從事。尋奏請將已撥存貯漕糧。仍留為東省平糶之用。得旨是。直隸總督周元理奏永定河南北兩岸及下北口隄逼近河溜。隄身單薄。亟應堵築。得旨

如所議行。是日駐蹕金剛屯大營。甲午諭軍機大臣等。昨據山東布政使陸燿奏報。東省收成約有九分有餘。又巡漕御史西平昨至行在復命。詢其沿途所見農田情形。據奏經過山東地方俱已布種秋麥。且已出土青蔥。但未知通省各屬曾否一律普種。至該省久未奏報得雨。已種之麥是否有需雨澤。或曾經得雨。而國泰未奏。著傳諭國泰即速查明據實覆奏。至豫省未被水災之處。所前據鄭大進奏。已經趕種秋麥。未知所種能否普偏。是否尚需秋雨滋培。自八月至今曾否得雨。或地氣尚濕。無需雨澤。著傳諭鄭大進即速查明據實覆奏。尋國泰奏東省各府屬於八月十一十九等日得雨。本月初三日又雨。麥土既潤。翻犁播種倍見青蔥。得旨欣慰。覽之。鄭大進奏八月十一二十一等日得有微雨。早麥出土二三寸。稍遲者亦已破土。至歸德各屬被水之區。地氣稍暖。尚可於十月

中補種得旨。覽奏稍慰。又諭京師自八月初五日奏報得雨以後。迄今已及月餘。未見續報得雨。現在正當播種秋麥之際。是否尚需雨澤滋培。抑或地土本濕。尚不至急於盼雨。著傳諭留京王大臣。即查明實在情形。具摺覆奏。又諭向來西洋人有具呈廣東督撫衙門。情願進京効力者。俱經該督撫等轉奏送京。近年以來。未見有續來者。或係該國本無人呈請。抑係曾經具呈。而該督撫不為轉奏。著傳諭桂林李質穎。即行查明據實具奏。嗣後如西洋人呈請進京効力者。即為奏聞送京。不必拒阻。兵部議准陝甘總督勒爾謹疏。稱烏嚕木齊提屬原安塘兵六十二名。請照舊存留。以便郵務從之。是日駐蹕興隆屯大營。乙未諭本日有錦縣生員金從善於御道旁進遞呈詞。條陳四事。狂誕悖逆。為從來所未有。觀其首以建儲為請。蓋妄思彼言一出。便可為他日邀功之具。而敢於

蔑視王章。情實可惡。即以此事而論。康熙年間。未嘗不立皇太子。乃因情性乖張。羣小復從而蠱惑。遂致屢生事端。幸而

皇祖洞燭其情。再立再廢。國家得以乂安。使理密親王。及弘哲父子。相繼嗣位。豈我大清宗社臣民之福乎。至所云立太子。可杜分門別戶之嫌。尤為大謬。不知有太子。然後有門戶。蓋衆人見神器有屬。其庸碌者。必豫為獻媚。逢迎。榮點者。且隱圖設機。構陷。往牒昭然。可鑒。若不立儲。則同係皇子。並無分別。即有儉邪之輩。又孰從而依附親覲乎。我

皇祖有鑒於前事。自理密親王既廢。不復建儲。迨康熙六十一年十一月。

皇祖龍馭上賓。

皇考紹膺大寶。內外帖然。我

皇考效法

前徽。亦不立儲位。唯於雍正元年。

親書朕名。緘藏於乾清宮正大光明扁內。並不

明降

諭旨。及雍正十三年八月。

皇考升遐。遵

向諭敬啟

御函。朕即繼承洪緒。彼時人情亦甚輯寧。此即不建儲之益。固天下臣民所共見共聞者也。朕登極之初。恪遵

家法。以皇次子為

孝賢皇后所出。人亦貴重端良。曾書其名。立為皇太子。亦藏於正大光明扁內。未幾薨逝。因追謚為端慧皇太子。其旨亦即徹去。不復再立。且皇七子亦

皇后所出。又復逾年悼殤。若以次序論。則當及於皇長子。既弗克永年。而以才質論。則當及於皇五子。亦旋因病逝。設如古制之繼建元良。則朕在位而國儲四殞。尚復成何事體乎。然此等大事。朕未嘗不計及也。曾於乾隆三十八年冬。密書封識。並以此意諭知軍機

大臣但遵

皇考舊例。不明示以所定何人。蓋不肯顯露端倪。使羣情有所窺伺。此正朕善於維持愛護之深心也。然是年冬至

南郊大祀。即令諸皇子在

壇侍儀觀禮。朕曾以所定皇子之名默禱

上帝。以所定之子若賢。能承大清基業。則祈

昊蒼眷佑。俾得有成。若其人弗克自荷。則速奪

其算。毋誤國家重大之任。予亦可另行選擇

此朕告

天之語。豈能飾詞以欺人乎。是朕雖未明詔立儲。實與立儲無異。但不欲似前代之務虛名而滋流弊耳。而該逆犯乃以為大清不宜立太子。豈以不正之運自待耶。此何言乎。尤為大逆不道。我朝得天下之正。實非漢唐宋明所可比。而該逆犯竟敢目為不正。其心顯然存內外之見。肆其狂吠。非惟詆斥朕躬。並且干犯

列祖。該逆犯身列青衿。自其高曾以來。皆本朝

臣僕。食毛踐土。百有餘年。况其父曾為知縣。

乃敢悖逆若此。雖夷其三族。亦豈足蔽辜乎。

朕每諭自昔為建儲之請者。大率自為身謀。

即年已老耄。亦為其子孫計。明執古禮。以博

正人之名。隱挾私見。以圖一己之利。若而人

者。實無足取。即今時諸臣中。亦未必無存此

見者。但如逆犯所云。以不正之運自待。明肆

詆毀。則實稱罕見之鬼蜮耳。總之建儲與封

建井田相似。封建井田。不可行於後世。建儲

亦何獨不然。至所稱立后一事。更屬妄誕。乾

隆十三年

孝賢皇后崩逝時。因那拉氏本係朕青宮時

皇考所賜之側室。福晉位次相當。遂奏聞

聖母皇太后。冊為皇貴妃。攝六宮事。又越三年

乃冊立為后。其後自獲過愆。朕仍優容如故。

乃至自行翦髮。則國俗所最忌者。而彼竟悍

然不顧。然朕猶曲予包含。不行廢斥。後因病

堯逝祇令減其儀文并未降明旨削其位號朕處此事實為仁至義盡且其立也循序而進並非以愛選色升及其後自蹈非理更非因色衰愛弛況自此不復繼立皇后朕心事光明正大如此洵可上對

天

祖下對臣民天下後世又何從訾議乎該逆犯乃欲朕下罪己之詔朕有何罪而當下詔自責乎逆犯又請復立后朕春秋六十有八豈有復冊中宮之理況現在妃嬪中既無克當斯位之人若別為選立則在朝滿洲大臣及蒙古扎薩克諸王公皆朕兒孫輩行其女更屬卑幼豈可與朕相匹而膺尊號乎此更可笑不足論矣至所稱納諫一節朕自臨御以來凡臣工條奏果有益於國計民生者無不即為採納或下部議行從無拒諫之事若各省水旱偏災皆朕於督撫等奏報晴雨摺或咨之奉差入覲之人稍遇雨暘失調無不先

事郵詢嚴飭封疆大臣實力妥辦多方賑卹並未有臣下陳奏朕轉拒而不聽者即或內外大臣如有不公不法之事原許諸臣劾奏朕察覈果實無難立治所劾大臣之罪又何嘗有如明季言官彈劾大臣因而得禍者乎若勝國宦官宮妾竊攬大權擅作威福者今日實無其事科道更何從白簡從事亦何待朕之拒絕乎又所請施德一事朕踐阼至今四十三年曾普免天下錢糧三次普免漕糧一次而災賑之需動輒數百萬且如今年豫省水災截漕三十萬發帑百餘萬此尤近事之可徵者即以奉天一省而論今歲既當輪免之年復以巡幸盛京特蠲明年正賦恩德之及民不為不厚而該逆犯何尚敢於妄逞橫議耶此等逆犯實屬罪大惡極昔曾靜尚屬遠居湖南不料陪都根本重地俗樸風淳乃有如此悖逆之徒實為意想所無若行在大學士九卿會同嚴審定擬具奏○諭軍機

大臣等前據步軍統領衙門具奏侍衛傳濬假捏印契串同民人誑騙伊靈阿銀兩請革職交部審擬一摺已交部查審矣傳濬以大臣子弟身為侍衛乃交結市井無賴假捏印契串通誘典又假冒惟精與伊靈阿會面說合誑得銀兩實屬無恥不堪著傳諭刑部堂官即行嚴訊確情按律定擬具奏並趕入本年秋審情實○又諭今年各省辦理秋審情實金刃傷人擬入者較多此等案件皆在朕未降諭旨以前各督撫及九卿等未免誤會朕意因諭令刑部於黃冊內夾簽聲明其已經具題者於進到時交行在刑部夾簽呈進以便扣除不勾茲據錢汝誠奏稱刃傷案內除共毆及各斃一命畏罪脫逃並姦姦起釁數起擬不加簽等語本應如此辦理朕辦此一事屢次降旨原欲於諄切教誡之中寓辟以止辟之義所指原止係鬪毆刃傷之案如錢汝誠所指各項原係每年按例辦理者本

不應在扣除之列恐在京刑部又復誤會然今日錢汝誠所加簽之內即有情重應勾者總之朕細看而已亦不辭勞也將此再行傳諭知之○又諭曰袁守侗奏豫省現辦撫卹災民事宜一摺據稱先經撫臣鄭大進派委守令等官分路救護將災民家口移置大隄及沙河惠濟河各隄上並各村莊高曠地方搭蓬居住或分給米麵或先散倉穀并查明戶口豫給一月口糧其災民因家有什物戀守不出者即分乘舟筏前往勸諭接濟至豫賑口糧一事銀米兼賑等語所辦甚好鄭大進等務當督率各員實力妥辦使災黎均霑實惠又據稱商邱縣護城隄內甚寬該府杜憲竭力保護得免衝決附近災民避入者數及萬口寧陵縣護城隄幾至衝塌該縣羅楫晝夜築防完固復赴各遠鄉徧加撫卹考城令王金成搭蓬移置居民該縣亦在彼居住早晚親身查看等語杜憲等辦理災務俱能

實心奮勉頗屬可嘉。俟災賑事竣。鄭大進即將該員等出具考語。送部引見。並查更有似此出力者否。一併送部。將此傳諭高晉等知之。○子福建出洋遭風淹斃澎湖右營把總俞文貴兵丁黎志亮等四名。卹賞如例。○是日。駐蹕杏山東大營。○丙申。諭軍機大臣等。據高晉等奏。儀封漫工。東西兩壩。共做出四十丈。連前共做成一百四十餘丈。現在嚴督晝夜進埽加鑲。不使稍遺餘力。通盤計算。已有五六分工程。約計九月底。十月初即可一律工竣。合龍等語。覽奏欣慰。此時逐漸下埽。可為應手。至將近合龍時。口門收束。溜勢愈加湍急。施工自必較難。尤宜加意慎重。著傳諭高晉等。督率工員。務期如法妥辦。俾得及早合龍。以慰懸注。仍將下埽及開挑引河情形。隨時具奏。○是日。駐蹕五里河村大營。○丁酉。諭軍機大臣等。前因川省辦理軍需銷算。經部議駁之案甚多。恐限內不能辦理完

竣。降旨富勒渾等將新舊各案。通盤覈計。約再需幾月。方可辦完。據實奏聞。今據富勒渾等覆奏。所有題過各案。除經部覈准及部駁後業已登覆外。其最後具題之案。部議到川。須在明年三四月內。如有應登覆者。約須十日半月。若再有輟轉駁查之案。計明歲秋冬。方可完竣。查乾隆十二三年。欽差大臣兆惠留川覈辦軍需銷算。祇將准駁各條。並銀米收支各數。分析奏定。移交督臣策楞歸案具題登覆。承辦等語。川省前次軍需奏銷。既係歸於督臣覈覆登答。富勒渾劉秉恬即可於明歲三四月間。來京供職。其有復經部議駁查之案。即交文綬督率承辦各員。詳慎確覈。明晰登覆完案。將此傳諭知之。○是日。駐蹕沙河所東大營。○戊戌。諭曰。禮部尚書鍾音。歎歷內外。奉職恪勤。且在滿洲科目中。尚為通達事體。因擢授秩宗。方加任使。茲以扈從途次。忽遘沉疴。特遣太醫診治。並令先期回

京調攝以冀速痊。遽聞溘逝。深為惻惻。著加恩晉贈太子太保。所有應得卹典。仍著該部察例具奏。○又諭曰。鍾音現在病故。著派散秩大臣一員。帶領侍衛等。往奠茶酒。○行在大學士等議奏。逆犯金從善進遞呈詞。妄肆詆斥。實屬罪大惡極。應照例擬凌遲處死。得旨。金從善著從寬改為斬決。○戶部奏請給發五城煮賑銀米。得旨。這煮賑銀米。著五城御史親身散給。務使貧民得需實惠。勿致胥役侵蝕中飽。仍著都察院堂官。不時察看。○是日。駐蹕周家村西大營。○己亥。諭軍機大臣等。據周元理奏。查辦保定。易州。永平。遵化。所屬各境內神祠門堡隘口。凡有碑碣門扁詩文等項。中有違礙字句。應行磨毀者。分註應毀。應改。開單進呈。自應如此辦理。已諭令該督照此辦理。毋庸存案。并就近諭知弘昉矣。著將原單鈔寄李綬。令照此詳悉確查。如有此等字句。即行磨毀改刻。務須實心妥辦。

勿以空言塞責。仍將查辦情形。據實具奏。○又諭。今日薩載覆奏查辦逆犯殷寶山。徐述夔悖逆詩詞一摺。據稱陶易於本年五月。即據東臺縣監生徐食田呈送。伊祖徐述夔遺存一柱樓詩本。及書板等項。六月間。據監生蔡嘉樹赴司呈控等語。徐述夔身係舉人。乃敢編造詩詞。肆其狂悖。且存留其家已久。該地方官何以漫無覺察。且屢經傳諭各督撫查辦悖逆書籍。因何容其存留至今。待人舉首。而陶易於五月間。即據東臺縣稟報。並不立即查辦。輾轉遲延。直至八月中。始以一稟塞責。實不知其是何肺腑。已有旨令其明白回奏矣。並據薩載奏。於此等不法詩文。不能及早蒐羅淨盡。請旨從重治罪。已交部嚴察議奏。然薩載尚係總河。第因從前曾任江蘇巡撫。其咎已無可辭。至高晉以大學士。久任兩江總督。所屬有此等逆詞。既不能早為查出。而陶易近在同城。如此玩視重大案件。該

督何竟毫無見聞。不即查叅辦理。其罪更較薩載為重。著傳諭高晉。即速據實明白回奏。○又諭據薩載奏查辦逆犯殷寶山。徐述夔悖逆詩詞一案。藩司陶易於本年五月。即據東臺縣稟報監生徐食田呈送伊祖徐述夔所遺一柱樓詩本。及書板等項。至六月間。據監生蔡嘉樹赴司呈控徐述夔詩文。伊先稟首等語。此即徐食田賄囑縣書將被首查出。改為自行呈送。其詭詐尤為可惡。徐述夔身

書集卷一百六

高

係舉人。乃喪心病狂。敢於所作一柱樓詩稿內。繫懷勝國。暗肆詆譏。謬妄悖逆。實為罪大惡極。雖其人已死。將來定案時。仍當剖棺戮尸。以伸國法。至徐食田係逆犯嫡孫。本屬例應緣坐之人。乃藏匿伊祖悖逆詩本。及被人告發。復賄囑縣書。捏稱自首。其狡詐尤為可惡。前已降旨薩載楊魁令派妥員將徐食田及受賄縣書。隔別解京審訊。薩載等接到前旨。即當遵照辦理。至徐述夔編造詩文。恐尚

有流傳鈔錄之本。或另有別項逆詞。不可不嚴搜淨盡。著傳諭薩載等。即派妥員嚴行搜查。務使犬吠狼嗥。根株盡絕。並諭楊魁知之。○以福建巡撫德保為禮部尚書。福建布政使黃檢為福建巡撫。江蘇按察使孔傳炯為福建布政使。原任江蘇按察使龍承祖為江蘇按察使。○是日駐蹕中前所東大營。○庚子。諭曰。李中簡前任山東學政。因逆匪王倫案內失察。生員從逆處分甚多。經該部議以

書集卷一百六

高

降九級調用。朕加恩賞給翰林院編修。仍令在尚書房行走。嗣緣綿德阿哥。令秦雄褒進見一事。該員不能查知。勸阻復降。革職固屬罪所應得。但念伊獲咎究非自取。且學問尚優。現亦在館纂辦書籍。著再加恩。仍授翰林院編修。○諭軍機大臣等。前據楊魁奏查辦逆犯徐述夔悖逆書籍一案。稱蔡嘉樹赴江寧藩司具控。稱徐述夔之書。伊在縣先行呈首。其孫徐食田賄囑縣書。捏稱自首等語。

當以徐食田詭詐舞弊情尤可惡。降旨令薩載將徐食田同該縣書一併解京審辦。昨又據薩載奏。藩司陶易於本年五月。即據東臺縣稟報。徐食田呈送伊祖徐述夔所遺詩本板片。至六月間。蔡嘉樹赴司呈首。并稱係伊先行稟首等語。若徐食田果於四月間呈首。該縣五月具詳。蔡嘉樹六月內始赴司具控。則是呈控在後。自首在前。何以云該犯賄囑捏改。若實係如此。則徐食田尚係自首之人。祇應坐於緣坐之罪。不得坐以賄囑之罪。但恐蔡嘉樹控告在前。該犯聞信。始行呈繳書藉板片。復賄囑縣書。倒提年月。捏改自首。則徐食田於緣坐本律外。更加詭狡之罪。即當從重問擬。至其月日在前。或係該縣抹煞蔡嘉樹初告情節。或係陶易倒提月日。必須徹底查明。方可以定此案罪名輕重。若竟係陶易倒提月日。改重作輕。則陶易之罪。即與逆犯相等。並查陶易與該犯有何瓜葛。欲為之

袒護開脫。此事甚有關係。不可稍涉顛預。著傳諭薩載。即將此情節詳析查明。據實覆奏。該逆犯等現在解京審訊。其前後實情。一經交部嚴鞫。自必水落石出。薩載若稍有袒徇陶易之心。為之掩飾迴護。將來研審得實。恐薩載不能任其罪也。並諭楊魁知之。○以喀統。○是日駐蹕文殊菴行宮。翼日如之。○辛丑。諭軍機大臣等。據英廉奏。九江關監督蘇凌阿將原任監督全德應交乾隆四十一年蜜工用存並節省平色銀二千二百餘兩。解交造辦處查收等語。此項銀兩。自即係木榜所未載者。全德任內。既如此辦解。蘇凌阿到任後。現在作何辦理。將來應交造辦處之項。作何辦解。著傳諭蘇凌阿。令其將現辦情形。據實覆奏。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千六十六

實錄卷之六

六

大清高宗法天隆運至誠先覺體元立極敷文  
奮武孝慈神聖純皇帝實錄卷之一千六十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌九月壬寅諭朕惟吉林

實錄卷之六

之松花江紫護陪京滋演億載

靈脉向未建廟專祭無以仰答

神庥著交福康安於吉林城外沿江處所特

建

松花江神廟將如何擇地興工之處定議具

奏又諭曰薩載等奏查辦徐述夔悖逆

詩詞一案請將東臺縣知縣涂躍龍藩司陶

易揚州府知府謝啟昆革職訊究等語徐述

夔身係舉人乃敢編造詩詞肆其狂悖實為

罪大惡極。雖已伏冥誅。亦當按律嚴懲。以彰國法。其孫徐食田。久匿伊祖逆詞。且有賄囑縣書。捏控自首情節。其罪不止於大逆緣坐。昨已傳諭將徐食田解京審訊。涂躍龍接據呈控逆詞。不即通詳嚴究。又不查明是否自首。抑係被人呈控。分別究辦。陶易接據縣稟悖逆詩文。並不立時嚴究。就近稟知督臣奏辦。均出情理之外。顯有袒護消弭情節。知府謝啟昆接奉司批。不即通詳審究。其罪亦無

可逭。陶易謝啟昆。涂躍龍俱著革職。著該督等派委妥員。隔別押解來京。交大學士九卿會同該部嚴審定擬具奏。○又諭曰。復興向來辦事誠實。人亦體面。朕所稔知。著即馳驛回京。整裝前往葉爾羌辦事。俟一二年後更換。並著景福馳往該處協同辦理。○諭軍機大臣曰。薩載等奏查辦逆犯徐述夔悖逆詩本一案。東臺縣涂躍龍遇有此等逆詞。並不認真辦理。且經蔡嘉樹將書計控。又不嚴行

審究。藩司陶易於該縣解到逆詩之時。既不自行校閱。又發令該縣粘簽另呈。續據蔡嘉樹控告。又不即通稟提究。而揚州府知府謝啟昆接到藩司批詞。亦不迅速集訊。據實詳辦。均屬錯謬。怠玩。請旨將陶易謝啟昆涂躍龍革職提究等語。已有旨將陶易等革職解京審訊矣。涂躍龍接據悖逆詩文。並不通詳嚴辦。僅行專稟藩司。又不查明是否自首。抑係被人呈控之處。分別辦理。必有倒提年月。

欲為開脫之弊。陶易近在省城。接據縣稟。並不即稟督臣奏辦。轉將書發還。飭令粘簽送閱。輾轉稽延。顯有袒護消弭情事。而謝啟昆接到藩司批示。亦不速訊審究。以上各情節。亦須徹底嚴訊。使之水落石出。恐非外間所能辦理。著傳諭薩載楊魁。即派妥幹大員。將陶易謝啟昆涂躍龍三人派委妥幹員弁。隔別解京。交大學士九卿會同該部嚴訊具奏。仍當嚴飭委員沿途小心管押。毋任見面串

供。倘有疎虞。惟該督等是問。其餘食田及縣書。仍遵前旨。分別解京。○又諭。刑部進呈廣東省秋審冊。經九卿從緩決。改入情實者二起。禍德容。因禍文星同姪禍典忻。阻其砍伐公共樹枝起釁。禍德容與禍典忻扭結。禍文星上前幫護。禍德容祖母劉氏。走至用竹棍戳傷禍文星左額角。禍德容接過竹棍。先後戳傷禍文星左胳膊左臙肘右乳等處。因傷殞命。而禍劉氏。亦被禍亞留毆傷太陽身死。禍亞留旋即畏罪自盡。雖屬各斃一命。但釁同械鬪。毆戳多傷。情節強暴。又裴儒泰。因隣居幼女苻那寒。在伊園內折取甘蔗。喝阻不理。輒取斷蔗向打。致傷苻那寒太陽殞命。細故起衅。毆斃幼孩。殊為兇暴。此二案。該撫僅擬緩決。實乖情理之平。九卿所改甚是。李質穎平日辦事尚屬認真。何輕率錯擬若此。著傳旨申飭。○又諭曰。永貴奏據阿奇木伯克色提巴爾第。控告高樸。在葉爾羌私採玉石。

串通商人。販至內地售賣一案。親往該處。將高樸翎頂拔去。與案內人犯質審等語。高樸係慧賢皇貴妃之姪。高斌之孫。經朕加恩擢用。不料如此貪黷妄為。殊出情理之外。永貴據實奏辦。公正可嘉。著即秉公嚴審。如果屬實。一面具奏。一面將高樸。即在該處正法。淑寶協同辦事。於高樸種種劣蹟。匿不陳奏。咎亦難辭。俟審明時。著拏解來京治罪。將此諭令知之。○是日駐蹕深河村西大營。○癸卯諭軍機大臣曰。薩載奏湖河水勢平定情形。一摺。覽奏稍慰。前次洪澤湖水驟長。開放五壩分洩。並放至高郵邵伯。諸湖嗣因各湖水亦平隄。以次由各閘壩減洩。自不得不如此籌辦。據稱下河民田。先期曉諭。早晚禾俱收割齊全。惟高郵甘泉二州縣逼近湖河。各壩減下之水。由該處經過。不無散漫。灘地民房并低窪地畝。間有被淹之處。現在委員勘辦等語。下河田廬被水。貧民自不免拮据。所幸

僅此兩州縣餘皆安堵。但既有一隅偏災亦不宜膜視。著傳諭薩載速飭委員盡心查勘。如有應行賑卹者即行照例妥辦。俾災黎俱各得所以副厯念。○又諭昨據永貴奏高樸苦累回民一摺已降旨俟此案審實即將高樸在彼正法。因思伊什罕伯克乃幫同阿奇木辦事之人高樸擾累回民理當諫阻而阿布都舒庫爾和卓從中慫恿取利情實可惡著再傳諭永貴嚴行訊鞫即與高樸一併

正法。如此回衆始能心服而畏法令其弟阿布賚則斯等隨同附和亦應分別示懲再閱色提巴爾第呈內有高樸自鄂對故後愈甚之語是其苦累回衆非自今日若不嚴加懲治必致回人俱不聊生因而瓦解永貴辦理此事務必秉公審辦庶足示儆不得少事姑容○又諭昨據永貴奏阿奇木伯克色提巴爾第控告高樸在葉爾羌私採玉石運送回京各款已降旨將高樸革職究審矣據控稱

高樸曾遣家人進京送回銀兩諸物等語其家人既已在途恐聞知高樸之事將銀兩物件沿途寄匿或併竊取潛逃俱未可定著傳諭沿途各督撫飛飭各屬留心盤詰如有高樸家人過境即行鎖拏並將伊隨帶物件嚴密搜查派委妥員一併解送至京審訊除就近諭知周元理外將此諭令巴延三等知之仍各將作何辦理緣由有無盤獲之處即行覆奏○又諭昨據永貴奏高樸貨買金珠

不發價值又夥同商人盜賣玉石運往內地等情已降旨交永貴審訊治罪矣但自葉爾羌運至內地處處俱有關隘盤查其商人圖利藏帶小塊偷過者尚屬有之今以數百觔重玉石竟敢攜帶行走俱係地方大臣官員日久懈弛不以事為事所致況玉塊稍大者官運尚且費力今高樸如何將數百觔重玉石運至內地伊等所查者何事除嚴行申飭地方大臣外仍行寄知該督撫等所有高樸

差往京城家人。不拘行至何處。務必將人物一併拿獲。派委幹員。作速解京。斷不可致令逃脫。○調福建布政使孔傳炯。為江寧布政使。以江西按察使德文。為福建布政使。署廣西蒼梧道瑞齡。為江西按察使。○是日。駐蹕天台山大營。○甲辰。諭前已降旨。於山海關之澄海樓旁。建立

北海神廟。茲稽考祀典。北海原於河南濟源縣望祭。河南地屬中州。且非濱海。固於事理未協。嗣經改於吉林東門外望祭。雖屬北境。然距海尚遠。亦非所宜。所有春秋秩祀。及遇告祭典禮。自應恭移於此。以協方位。至吉林之松花江。導源長白。襟帶神輦。為本朝發祥之地。綿演億萬載

景祚靈長。厥功甚鉅。自宜虔崇廟祀。用迓

神庥。已諭令吉林將軍福康安。於吉林城外濱江處所。度地鳩工。興建松花江神廟。其一切祀事。即照從前望祭

北海之制。著禮部載入會典遵行。○諭軍機大臣等。昨據永貴奏。高樸節經降旨。令其東公確訊。惟伊摺內。有摘取高樸印信代理地方一語。烏什事務亦繁。永貴勢難久處。葉爾羌著傳諭永貴。速將高樸案內應訊人犯。在彼審訊。一面馳奏。一面即回烏什。和闐現有德風瑪興阿。二人駐劄。瑪興阿曾經辦理葉爾羌事務。著即前赴葉爾羌。暫管地方。及採玉等事。俟復興到日。再回和闐。○實授金輝為兵部左侍郎。○以工部左侍郎德成。為正白旗滿洲副都統。○是日。駐蹕夷齊廟行宮。翼日如之。○乙巳。諭軍機大臣曰。永貴奏。阿奇木伯克色提巴爾第。控告高樸。在葉爾羌與商人串通。私採玉石一案。已將高樸革職。並傳諭永貴。嚴加究訊矣。茲檢閱高樸等於五月間奏。請間年一次。於密爾岱山開採玉石一摺。該山久經封閉。嚴禁開採。並經期成額奏。請安設卡座一處。以防私竊。乃高樸

奏。欲間年開採一次。名為嚴防回人之涉險營私。其實與商人串通漁利。是高樸特借此奏。豫占地步。得以逞所欲為。其居心尤不可問。且摺內有商詢伊什罕伯克。以為甚屬有益之語。其與伊什罕伯克。朋比為奸。或并為所惑。憑更屬顯然。著將原摺鈔寄永貴。令其究詰。務使水落石出。至高樸曾代色提巴爾第差人往密爾岱。即得元寶五十個。計其所得。不過婪索之一股。分賄以塞其口。且止此一次。已多至二千五百兩。則高樸婪得之數。更不知幾何。其從前勾通商人私賣之弊。不知又有幾次。均不可不確切根究。又伊什罕伯克所得。僅騰格二千餘。伊係與高樸通同作弊之人。何乃反少於給色提巴爾第塞口之數。其贓數必不止於此。著傳諭永貴。一併嚴切訊究。務得實情。迅速具奏。○又諭。昨據永貴奏。阿奇木伯克色提巴爾第控告高樸。在葉爾羌。與蘇州商人串通。私採玉石。運進

內地販賣等語。偷採玉石。本有例禁。商人等出口私自偷買。運回販賣。已有應得之咎。乃竟敢與欽差大臣講明勾通。赴山偷採。尤為可惡。恐伊等有先行購得玉石。私運進口者。因思甘肅之嘉峪關。及陝西之潼關。均係大路總匯之區。各商進口。必由該關行走。著傳諭勒爾謹。畢沅。即飭各該屬。在關留心盤詰。如有客商私販玉石經過者。即行嚴拏。奏明治罪。並將所帶玉石。搜查送京。將此由五百里發往。該督等仍將作何辦理緣由。先行奏覆。○兵部以武會試中額請得旨。這考試。漢軍取中二名。直隸取中八名。陝西取中六名。廣東取中六名。河南取中二名。山東取中五名。江南取中二名。山西取中三名。湖北取中二名。湖南取中一名。四川取中一名。廣西取中一名。福建取中三名。浙江取中一名。江西取中一名。雲南取中一名。貴州取中一名。○鑄給四川富順縣分駐鄧井關管理鹽務縣丞。永

寧縣分駐赤水糧捕縣丞等關防從總督文  
綬請也。○丙午諭軍機大臣等昨據永貴奏  
阿奇木伯克色提巴爾第控告高樸在葉爾  
羌與蘇州買玉商人串通謀利各款已降旨  
將高樸革職嚴審並將伊家產查封茲據大  
學士公阿桂等於其家信內有家人李福差  
往內地別處辦事年底方得回京之語高樸  
既與買玉商人串通一路其所差之李福在  
內地辦事大約非蘇州即江寧製辦物件又  
高樸家信內稱所有物件俱令常永李福兩  
次帶回家中之語是李福攜有銀物並非輕  
裝更無難蹤跡著傳諭楊魁即速於蘇州城  
內嚴密查拏其江寧省城著薩載即派妥幹  
員弁迅往查緝如李福一經就獲即派幹員  
嚴行鎖押迅速解京勿稍疎懈其所攜銀物  
及製辦物件亦即嚴密查封委員送京將此  
傳諭知之○又諭據阿桂等奏查抄高樸家  
產一摺現在查點物件並搜出其寄回家信

有違常永李福各帶銀物回京之語二人尚  
未到京派員分路截拏等語所辦甚是即此  
可見阿桂之善於辦事今高樸家內既查得  
金珠玉碗等物與色提巴爾第所開之單約  
畧相仿其事斷非虛妄閱單內載玉碗甚多  
且其家信并云係極好者高樸每次所進玉  
器不過九件又俱甚平常今乃以佳者留藏  
家內即此一端亦可見其天良盡喪矣著阿  
桂等逐一點明嚴密封識俟回鑾呈覽至其  
家人常永據顧本供中途耽擱尚未到來其  
李福則高樸家信稱係差往內地別處辦事  
恐其必往蘇州江寧製辦物件已馳諭薩載  
楊魁派員嚴密查拏諒必不能漏網而顧本  
供又稱李福隨尚書綽克托回京今俱經阿  
桂差委司員分路截拏自可獲解此二人皆  
高樸所得用者高樸行事二人必備知之解  
到時著阿桂嚴加刑訊令將高樸數年來婪  
贓作弊之事和盤托出勿令稍有諱飾至侍

衛納蘇圖為高樸攜帶物件。且甚為親密。高樸之事。納蘇圖必知其詳。阿桂現已行文調取。俟其到時。亦即嚴加訊問。務令供吐實情。毋使代為隱諱。至侍衛綽克託。係解玉之員。高樸既託其攜帶物件。自亦係通同一氣之人。俟其解玉到京時。並著阿桂一併詳悉嚴訊。將此諭令知之。○又諭曰。淑寶。係葉爾羌幫辦之員。從前曾任布政。署理巡撫。非不知事體輕重者。高樸如此任意擾累。色提巴爾第。俱不能堪。所司何事。豈可諉為不知。著傳諭永貴嚴行究訊。○是日。駐蹕興隆山大營。翼日如之。○丁未。諭朕歷覽諸史。今古異宜。知立儲之不可行。與封建井田等。實非萬全無弊之道也。蓋一立太子。衆見神器有屬。幻起百端。弟兄既多。所猜嫌。宵小且從而揣測。其懦者。獻媚逢迎。以陷於非。其強者。設機媒孽。以誣其過。往往釀成禍變。遂致父子之間。慈孝兩虧。家國大計。轉滋罅隙。平心而論。其

事果有益乎。無益乎。且人君當以堯舜為法。唐虞之世。無所謂太子者。即夏后氏不傳賢而傳子。亦云啟賢能。敬承繼禹之道。未聞立啟為太子。紂以嫡立而喪商。若立微子之庶。商未必亡也。太子之名。蓋自周始。禮記因有文王世子之篇。其後遂相沿襲。然至幽王時。太子宜臼。即以讒廢。後世若漢武帝之立太子據。卒為江充構陷。致有巫蠱之禍。唐太宗立太子承乾。亦為魏王泰讒構。竟以謀逆廢黜。即明洪熙為太子時。漢王高煦。百計相傾。東宮諸臣。接踵下獄。幸而洪熙謹慎。得以保全。然以憂讒畏譏成疾。在位弗克。永年史冊所載。大都可考。得不引以為鑑乎。至於立嫡立長之說。尤非確論。漢之文帝最賢。並非嫡子。使漢高令其嗣位。何至有呂氏之禍。又如唐太宗為羣雄所附。明永樂亦勇畧著聞。使唐高祖不立建成而立太宗。明太祖不立建文而立永樂。則元武門之變。金川門之難。皆

無自而起。何至骨肉傷殘。忠良慘戮。此立嫡立長之貽害。不大彰明較著乎。我朝

家法。實為美善。我

太宗

世祖

聖聖相承。皆未豫定儲位。蓋

天命人心所屬。自符萬年垂裕之謀。迨

皇祖時。曾立理密親王為皇太子。亦因羣小從而盡惑。遂致屢生事端。幸而

皇祖洞燭先幾。即行廢黜。後尚冀其悔悟。而復立之。尋仍以怙終再廢。自是

皇祖遂不復建儲。而

屬意於我

皇考。使理密親王及弘皙父子。繼踐尊位。豈大

清宗社臣民之福乎。迨康熙六十一年十一月。

皇祖龍馭上賓。

皇考紹膺大寶。中外帖然。雍正元年。

皇考親書朕名。緘藏於乾清宮正大光明扁內。而不豫宣示。及雍正十三年八月。

皇考升遐。遵

向諭敬啟

御函。朕即續承洪緒。衆皆欽悅。乾隆元年。朕效法

前徽。以皇次子為

孝賢皇后所出。人亦貴重。端良。曾書其名。立為皇太子。亦藏其名於正大光明扁內。未幾

薨逝。遂將前旨撤出。明示衆人。謚為端慧皇太子。不復再立。且皇七子亦

皇后所出。又復逾年悼殤。而以長以賢。則莫

若皇長子。皇五子。亦相繼病逝。設如古制之亟亟有冊立之事。則朕在位而前星四隕。復

成何事體。故不得不慎也。然此等大事。朕未嘗不計及也。曾於乾隆三十八年冬。手書應

立皇子之名。密緘而識藏之。並以其事諭知軍機大臣。特未明示。以所定何人。而是年冬

至

南郊大祀。命諸皇子侍儀觀禮。因以書立皇子之名。默禱。

上帝。如其人賢。能承國家洪業。則祈

佑以有成。若其不賢。亦願潛奪其算。毋使他日貽誤。予亦得以另擇元良。朕非不愛己子也。然以宗社大計。不得不如此。惟願為天下得人。以繼

祖宗億萬年無疆之緒。此意

吳蒼實式憑之。是朕非不立儲。特不肯顯露端倪。俾衆人有所窺伺耳。此正朕之善於維持保護。

天地

祖宗。實鑒朕心。若子子孫孫。皆能以朕此心為心。則我大清億萬斯年。可永承

天佑也。然朕此舉。天下臣民。無由共聞。未嘗無竊議朕為貪戀寶位。不肯立儲。不知朕踐阼之初。曾焚香告

天云。昔

皇祖御極六十一年。予不敢相比。若邀

穹蒼眷佑。至乾隆六十年乙卯。予壽躋八十有五。即當傳位皇子。歸政退閒。第此意向未宣示。衆亦不能深悉也。迨朕六旬大慶後。即敕豫葺寧壽宮。為將來優游頤養之所。臣工應莫不共聞共見。豈有所偽飾乎。今朕春秋六十有八。康彊尚如昔時。自當代

上天愛養。億兆董治百官。以期無負

祖宗付托之重。必不敢遽釋仔肩。但今距乙卯尚十七年。為日甚長。若朕精力始終不懈。惟當日慎一日。兢業守成。克全朕之初志。豈不甚善。設或七旬八旬以後。神志稍衰。不能似今之精勤求治。亦不肯貪天位以曠天工。且歷代帝王。享位四五十餘年而歸政者。實所罕觀。朕非不知足者。又何必定以六十年為期乎。昔唐宣宗聞裴休立儲之請。曰。若立太子。則朕為閒人。又宋仁宗儲位既定。鬱鬱不

樂。宋英宗立太子後。泣然泣下。皆朕所嗤鄙。曾於批閱通鑑輯覽時。評斥其非。安肯踵其庸陋之見乎。且此數君之所以戀戀不舍者。惟知席豐履厚。以為君為樂。而不知為君之難也。自朕論之。人君一日二日萬幾。庶司百職之事。皆其事。非躬親總攬。則柄或下移。其弊將無所底止。豈能稍自暇逸。而天下之大羣黎之衆。疾苦時繫於衷。非先事疇咨。民隱或無由上達。宵衣旰食。不遑寧居。但覺其難而不覺其樂。若至倦勤歸老。乃可以釋重負而圖真樂。此理顯而易曉。朕久積有深願。但如宋高宗孝宗值多事之秋。當勵其有為之志。乃未及耄期。而遽行內禪。圖遂一己之佚樂。而不顧國計之重輕。其人實不足取。則又朕所深薄者耳。又前史所載。每有因愛其母而欲立其子者。遠代姑弗具論。如明神宗寵鄭貴妃。諸臣遂有立愛之疑。共為建儲之請。盈廷爭執。致首相王錫爵為朝士所逼。幾欲

自戕。尚復成何政體。本朝

家法。則無是也。至於朕現在之諸皇子。皆已無所生妃母。寧復有愛憎之見。參其中乎。又古來惟以豫教之說。屬之太子。於是明季遂有因儲嗣未立。不肯令皇子出閣者。衆皆起而爭之。此甚非理。若我國家之制。諸皇子六歲以上。即就尚書房讀書。即皇孫皇曾孫亦然。既選京堂翰林。以分課其讀。復派大學士尚書數人。以總視其成。更簡滿洲蒙古大臣侍衛等。以肄之國語騎射。長幼相聚。昕夕程功。初無歧視之心。詎有嫌疑之迹。實大異乎勝國之所為也。蓋從來諫請立儲者。動輒徵引古說。自以為得忠臣事君之道。不知其心。隱以為所言若得採納。即屬首功。可博他日之富貴。名議國是。而實為身謀。即或其年已老。亦為其子孫計。大端不出乎此。朕今為之扶其隱微。作偽者尚何所托辭乎。總之不可不立儲。而尤不可顯立儲。最為良法美意。我世

世子孫所當遵守而弗變者。倘億萬年後或有拘泥古說。復立太子之人。必不能安然無恙。及禍患既生。而始歎不悟。朕言。悔當晚矣。朕此意。本欲俟將來歸政時。再行宣布。以明朕心。因昨有錦縣逆犯金從善。逞其悖逆邪說。甚至以不正之運。自待一語。毀斥本朝。其罪固不容誅。恐天下臣民。雖不敢如逆犯之抵觸。而立儲之說。未必不耿耿潛蓄於心。用是反覆開導。明白宣諭。俾中外知之。○諭軍

機大臣等。昨據大學士公阿桂等奏。查抄高樸家產。其家信內。有家人李福差往內地辦事。冬底可以到京之語。已傳諭薩載等。於蘇州。江寧兩處。嚴密查拏解京矣。茲復聞其家信內。尚有辦事熊先生。今年冬底也可到京等語。所稱熊姓。既係伊辦事之人。其到京之期。與李福相仿。或同李福到蘇州。江寧亦未可定。著傳諭薩載。楊魁。即派妥幹員弁。將熊姓一併嚴密查拏。如經就獲。即派妥員。將二

犯隔別鎖押解京。沿途毋任見面串供。稍有疎懈。○又諭。據薩載等奏。接奉諭旨。將徐述夔之孫徐食田等。先後查拏。派委同知師彥公等。隔別管解赴京等語。徐述夔身係舉人。乃喪心病狂。敢於所作詩稿內。繫懷勝國。暗肆詆譏。謬妄悖逆。實為罪大惡極。雖其人已伏冥誅。亦當按律嚴辦。以伸國法。而快人心。至聞伊同校書之徐首髮。沈成濯二名。更堪駭異。該二犯。一以首髮為名。一以成濯為名。

四字合看。明是取義孟子牛山之木。若彼濯濯。詆毀本朝。薙髮之制。其為逆黨顯然。實為可惡。已交刑部存記。俟該二犯解到時。嚴加刑訊。務令供吐實情。此等鬼蜮伎倆。豈能逃朕之洞鑒。薩載。楊魁。何以竟為其瞞過。即或伊二人文義平常。豈幕友中全無一人看出者。何皆為之隱諱。不言乎。此等逆犯。其潛懷誹謗已久。家內必有自作悖逆之書。雖據摺內稱。於徐首髮家。查出不全。留青集一本。更

恐尚係查檢未到。著薩載、楊魁即派誠妥大員於該二犯家內再行嚴密搜查。將所有字跡書本即行封固解京。勿任稍有隱匿。再該二犯之名均非命名正理。未必係從幼取定。必因為逆犯校書後始行更改此名。著傳諭薩載、楊魁即速嚴密訪察。據實覆奏。○又諭查抄高樸家產一事。昨已有旨諭阿桂等詳悉嚴辦矣。聞高樸所開寄京物件單有交待衛綽克託帶回者。有交待衛納蘇圖奇理圖兩次帶回者。著將原單鈔寄阿桂等。令將現在抄出各件逐一查封。數目是否符合。至侍衛綽克託尚未到京。阿桂等即派妥員攜帶所開之單迎至前途。將綽克託所帶高樸物件照單查對。是否符合。即行封固解京。並令綽克託趲程進京。以備訊問。再高樸家信內有熊先生約於年底到京一語。恐其亦同李福往江南。已寄信薩載等一併查拏。並著阿桂等嚴訊高樸家人。令將熊姓何名。係何處

人。現在是否從葉爾羌起身。詳悉訊明辦理。將此諭令知之。戶部等部議准。雲南巡撫裴宗錫疏稱。復隆白石谷二井大使既經裁汰。額設攢典各一名。應并裁。所有復隆井大使事務歸黑井大使查辦。白石谷井大使事務歸白井大使查辦。從之。○戊申諭軍機大臣曰。阿桂等奏查抄高樸家產。及訊問家人供詞一摺。有在常貴住房內。創出銀二千餘兩之事。恐此外家人尚有隱匿私藏財物。不可不逐一嚴究。并一切有應行訊問之處。著傳諭阿桂等即行迅速審辦。毋任稍有不實不盡。至摺內尚有究出高樸向兵部宋姓借銀一節。高樸係兵部侍郎。乃與屬員借貸銀兩。與受均有應得之罪。並著阿桂等即就近傳訊明確。按律辦理。又阿桂摺內復稱有借給熊姓職銜銀兩。其人既經捐職。其的名更易查問。著即速行訊明。熊姓在高樸處代辦何事。並即行文查拏審辦。○又諭昨據大學

士公阿桂等奏查抄高樸家產。其家信內有家人李福差往內地辦事。冬底可以到京。又有辦事的熊先生。冬間亦可到京之語。已傳諭薩載等。於蘇州江寧兩處嚴密查拏解京矣。高樸之父高恒。曾任鹽政。或因揚州行鹽商人。均係伊父舊時熟識。遣李福等前往該處售賣玉器。亦未可定。著傳諭伊齡阿。迅即嚴密查緝。如李福熊姓。一經就獲。即委幹員嚴行鎖押。迅速隔別解京。勿稍疎懈。其所帶

銀物。及製辦物件。亦即嚴密查封。委員送京。伊齡阿與高樸。同係內務府人員。倘稍有瞻徇隱飾。恐伊齡阿不能當其咎也。將此由五百里諭令知之。○戶部議覆河南巡撫鄭大進奏。請於豫省不被水之州縣內。應徵粟米。改徵麥豆。得旨。依議速行。○是日駐蹕琪樹莊大營。○已酉。諭據錢琦奏接奉諭旨。迅速束裝。趨赴闕廷。因母現年九十一歲。順經里門。就便省視。再行赴京等語。錢琦之母。既年

踰九旬。且伊年力亦已就衰。自應在家侍奉。錢琦著在籍終養。不必來京。○諭軍機大臣等。據阿桂等奏。傳到熊姓之子熊鶴齡。據供伊父熊濂。係鎮江出旗監生。充四庫館謄錄。高樸赴葉爾羌時。隨往代管筆札等事。上年高樸寄給伊父銀兩。代捐州同職銜。今年三月回京。即往鎮江葬墳等語。查熊鶴齡所供伊父到京後。即往鎮江葬墳之語。本不足信。且熊濂於三月到京。安知非高樸豫令起程。

同李福前往江省辦事。朕意其必係前往蘇州江寧等處料理諸事。業經節次傳諭薩載楊魁嚴密查拏解京。今既據熊濂之子。有伊父往鎮江葬墳之供。或該犯借葬墳為名。潛同李福往蘇州等處幹事。亦鬼蜮伎倆所必至。著傳諭薩載楊魁。迅速派委委員。分路嚴緝。一經就獲。即派委員將該二犯。隔別鎖押解京。又昨恐高樸與揚州商人相熟。或差李福等前往。亦未可定。已諭令伊齡阿一體查

訪。今熊濂既查有的名籍貫。著再傳諭伊齡阿。一併查拏妥辦。○撫卹陝西商州山陽三州縣。本年水災貧民。並緩歷年積欠。并本年應徵常社等糧石有差。○是日。駐蹕興家樓西大營。○庚戌。

上御行殿。勾到秋審官犯。服制及貴州雲南情實罪犯。停決官犯十一人。服制斬犯三十七人。貴州斬犯一人。絞犯三人。雲南斬犯一人。絞犯一人。餘三十六人予勾。○諭軍機大臣

曰。陶易身任藩司。於逆犯徐述夔所作一柱樓詩內。編造逆詞。接據東臺縣詳報。並不即稟督撫奏辦。轉將原書發還。飭令粘發送閱。輒轉稽延。顯有袒護消弭情事。不知其是何肺腸。已降旨。將陶易革職。解京審訊矣。陶易久任州縣知府。復自道員超擢藩司。乃竟敢於負恩若此。殊為可惡。伊籍隸山東。著傳諭國泰。即派妥幹大員。前往陶易原籍。將所有一切貲財產業。俱行嚴密查封。毋得稍有疎

漏。至其任所貲財。並著傳諭薩載。楊魁。一併查抄。毋任隱匿寄頓。○又諭據伊勒圖奏審訊貝子恭坦等。控告觀音保各款。惟將曾經行竊之巴克丹。補放叅領。實屬不合。觀音保舒通阿。俱著來京候旨。海成。現在烏什辦事。著賞給頭等侍衛。前往哈喇沙爾辦理事務。○是日。駐蹕白澗行宮。○辛亥。

上御行殿。勾到秋審四川廣西情實罪犯。停決四川斬犯五名。絞犯十四名。廣西斬犯三人。

實錄卷三六六

三

絞犯三人。餘八十七人予勾。○吏部議覆。江西巡撫郝碩奏。各省駐防將軍都統。俱設有理事同知。通判等官。嗣後凡移行無筆帖式理事丞倅之江西湖南廣西安徽貴州等省事件。俱清漢兼寫。其有理事丞倅及筆帖式省分之該督撫。亦兼寫清漢咨覆。如無前項官職省分。即專用漢文回覆。從之。○工部議准。浙江巡撫王亶望疏。稱海寧境內魚鱗石塘。被潮衝刷。請築坦水二層。從之。○是日。駐

驛烟郊行宮。○壬子

上還宮。○諭前經桂林奏廣東碣石鎮總兵許時中。年已七十七歲。難勝專閫之任等語。其員缺已令陳國泰補授。許時中俟陞見後。再降諭旨。昨於行在召見該鎮。見其精力實已就衰。著以原品休致。○諭軍機大臣等。前以高樸在葉爾羌販賣玉石一案。究出有代熊姓出銀捐納職銜之事。料其必借葬墳為名。潛同高樸家人李福。在蘇州一帶幹事。業經

實錄卷二十六

五

傳諭薩載等嚴密緝拏解京。今又續訊熊鶴齡供稱。伊父本同李福欲往蘇州販賣玉石。行至汾州。因病暫行存住。後經病痊到京。即於閏六月內。趕赴蘇州。幫同李福買賣去了等語。是李福、熊濂等同在蘇州一帶販賣玉石。已無疑義。著再傳諭薩載、楊魁速將熊濂及李福拏獲。派員解京。並將其所有銀兩、玉石等件。俱行查解。及有無向葉爾羌販賣玉石人。找取價值之處。一併嚴行究辦。毋任絲毫

透漏。至熊濂自京至蘇。路經揚州。或即在彼販賣。亦未可定。並再傳諭伊齡阿一體訪拏。不得稍存疎懈。致令聞風遠颺。○癸丑。孝慈高皇后忌辰。遣官祭

福陵。

上詣

奉先殿。

大高殿。

壽皇殿行禮。○諭軍機大臣等。據周元理奏。據

實錄卷二十六

五

署望都縣知縣趙大經。盤獲跟隨高樸家人常永之張元兒。並同行之馬德亮。訊據供稱。常永現在陝西渭南縣良天坡趙鄉約家居住。有大車二輛。箱子四隻。現已飛咨陝撫密拏。並將張元兒、馬德亮押送軍機處查辦等語。常永既經高樸遣令進京。乃行至渭南縣地方。無故逗留。且聞常永家信。有令其兄來至渭南接收辦理字樣。明係沿途出賣玉石。實出情理之外。該犯既在渭南。著畢沅即派

幹員。前往該處。迅速查拏。並將其隨身行李車輛箱隻。逐一嚴拏解京。併將常永訊供所帶玉石。已在陝變賣若干。即就近嚴切根究。務得實在著落。查追起解。仍一面將常永先派妥員。嚴行鎖押。解京審辦。毋稍疎懈。將此傳諭知之。○又諭本日軍機大臣。訊據侍衛納蘇圖供稱。庫車辦事之常喜。本年曾拏獲葉爾羌回子等。偷出玉石。送高樸處辦理。高樸以五十觔以下之玉塊。向來俱不具奏。因

實錄卷一百六十七

三

招商變賣。每觔定價一錢等語。此等犯禁偷出之玉石。無論多寡大小。一經盤獲。該處之大臣官員。自應一面具奏。並將玉石送京。一面將偷帶之人。照例治罪。何以轉送葉爾羌覈辦。致高樸得以操縱自如。滋生弊端。常喜所辦。本屬非是。或係相沿如此。他處俱各相同。抑係常喜一人之意。著永貴查明具奏。至五十觔以下之玉。向不具奏。及招商變價。每觔一錢之例。係何時所定。何人任內所辦。曾

實錄卷一百六十七

三

否奏明。亦著查明具奏。並著傳諭回疆辦事大臣等。嗣後凡盤獲偷帶玉石之回民商販。即行具奏治罪。并將玉石開明觔重塊數解京。不得仍前以較小之玉。私自變賣完結。如敢故違不遵。別經發覺。定行從重究治。至新疆偷運內地玉石。必進嘉峪關。例應盤詰。勒爾謹向來作何查辦。且並未見有拏獲之案。著勒爾謹一併查明具奏。將此傳諭知之。○又諭。訊據侍衛納蘇圖供稱。高樸家人常永於今年四月十九日。自葉爾羌起身。帶車五六輛。載運玉石。赴肅州一帶售賣等語。是其在甘肅販賣已屬確實。常永所帶之玉石。實有若干數目。賣與何人。得價若干。曾否賣完。帶銀回京。均須逐一嚴查辦理。著傳諭勒爾謹。將常永迅速嚴密查拏。毋得絲毫徇隱。其查出玉石銀兩。一併解京。其事即有干涉甘省官員者。亦不得稍存迴護。此案該督既經失察於前。若再有袒庇屬員之處。則其取咎

更大。亦必不能逃朕之洞鑒也。至陝西、山西，皆由甘肅來京必經之路。常永或沿途販賣，亦屬必有之事。著畢沅已延三一體訪拏，毋得稍有隱匿，致干咎戾。將此傳諭知之。仍各將如何查辦情形，迅速覆奏。○又諭曰：高晉等奏九月初十日東北風暴，已將時和驛漫口刷深，亦須下埽。乃十八日夜西北風暴，更狂且久，全河大溜直注口門，搶護不及，將已做埽工全行塌去。口門約寬一百餘丈，風定

實錄卷二十六

四

後，察看溜勢，已有六七分入於漫口。尚有三四分由正河下注。現在督飭裹護壩臺，並酌量分別軟鑲下埽，挑渠引溜，以期及早完竣。等語。覽奏深切軫念。豫省今歲先被旱災，繼被水災，朕已深憐災黎之苦，節次截漕撥帑，責成撫藩等，加意撫卹，俾無失所。今時和驛又復有掣溜之事，漫水下注，淹浸自所不免。待哺就輯之民，其何以堪！更為之矜憫，不置。但時和驛河隄，六月中曾經平漫，瀕河附近

田廬業已被淹。此次掣溜之水下注，或仍係已淹地面，或續有旁溢，侵及村落人民之處。著鄭大進等實力速查。如有續被災傷者，照前一體撫卹。毋稍匿飾。至儀封漫口，已施工十之七八。此月底可望合龍。今時和驛又復掣溜，儀封合龍之期，不免稍稽。但時和驛居儀封上游，必須先就該處堵築速竣，然後將儀封漫口合龍，方為穩固。高晉現赴時和驛督辦，可即多撥諳習下埽之將備弁兵前往

實錄卷二十六

五

該處上緊進埽，尅期速完。俾儀封大工合龍，不致多延時日，以慰懸注。又據稱千總武士鎡及兵丁傅應魁等十人，隨埽落水，淹斃。汛兵朱路一名等語，甚為可憫。朱路自應照例撫卹。其武士鎡是否高晉所帶之員，抑係豫省汛弁，並著查明奏聞。於工竣送部引見。至落水撈起之兵丁傅應魁等，亦著姚立德、鄭大進查明量加賞錄，以示慰勸。至此次風暴掣溜，實非人力所能豫防。姚立德、鄭大進及

高晉素守伺等俱著加恩免其交部議處高晉等當倍加奮勉實力籌辦速竣以慰朕念將此傳諭知之仍將時和驛現在施工情形先行由驛速奏○又諭據楊景素王亶望奏稱准江蘇巡撫楊魁咨查揚州府屬東臺縣已故逆犯徐述夔所著一柱樓詩係浙江人毛澄作跋飛咨查拏查毛澄係歸安縣學廩生乾隆三十二年赴甘肅作幕三十九年冒阜康縣籍貫改名黃斌去年丁酉科中式第二名舉人如今現在甘肅迪化州等語毛澄為逆犯徐述夔作跋必須查拏訊究並搜查其寓所書籍字跡一併解京併案審辦該犯既現在迪化州著傳諭勒爾謹速將黃斌即毛澄拏獲派委妥員鎖押解京審訊其冒籍情由並著勒爾謹查明具奏○甲寅諭據永貴奏審訊高樸婪贓各款高樸俯首無詞因訊其心腹家人沈泰等據供稱任內積有金銀一萬數千兩珠寶不計其數等語從前喀

實錄卷一〇六七

三

實錄卷一〇六七

三

喇汗在厄魯特辦事動向回人勒索幾至激變今高樸係欽差大員肆行擾害與喀喇汗何異稍遲數年恐又有烏什之事深可痛恨著傳諭永貴將高樸審明即於該處正法伊什罕伯克阿布都舒庫爾和卓什呼勒伯克果普爾慈懋高樸釀成事端亦斷不可暫留家人沈泰等雖係高樸主使就中國利致令伊主獲罪亦屬可惡均著一同正法○又諭曰阿奇木伯克色提巴爾第前因奮勉出力施恩賞給公爵並調補葉爾羌阿奇木伯克今於高樸及伊什罕伯克等通同舞弊秉公呈報甚屬可嘉著賞給貝子職銜以示鼓勵○又諭曰高樸在葉爾羌苦累回民採辦玉石串商私賣又復婪索金銀盈千累萬回眾嗟怨經阿奇木伯克色提巴爾第向永貴呈控永貴據情奏奏隨查抄高樸家中所有寄回金玉等物與原奏單開之項大畧相符茲復據永貴奏查詢原控各款俱實并查得高

樸彼處仍現有銀一萬六千餘兩。金五百餘兩。高樸貪婪無忌。罔顧法紀。實出情理之外。已另降諭旨。將高樸革職嚴審。即於該處正法矣。至綽克托。係總辦回疆事務之人。朕加恩用為吏部尚書。高樸如此聲名狼籍。豈偶爾一二事短發價值。失於查察者可比。綽克托所司何事。何以不據實叅奏。其通同徇隱。幾釀事端。實為深負朕恩。綽克托著革職。并著奎林前往直隸。山西一帶。傳旨拏交刑部

實錄卷一百六十七

三

治罪。所有吏部尚書員缺。仍著永貴補授。朕於臣工功罪。一秉大公至正。如高樸貪黷負恩若此。較伊父高恒尤甚。不能念係慧賢皇貴妃之姪。高斌之孫。稍為矜宥也。又如綽克托。前因其總理回疆。尚覺認真。特加擢用。乃敢徇私誤公。咎難輕逭。因即黜革拏問。若永貴原因市恩李淑芳。身獲重譴之人。今辦理此事。公正可嘉。因復加恩擢用。此諸臣所共知。共見。禍福惟視其人之自取。朕並不稍存

成見於其間。將此通諭知之。○戶部議覆江蘇巡撫楊魁奏。淮揚等屬猝被旱災。應需賑銀。藩庫不敷籌支。請撥蘇松糧道庫銀八十萬兩。移解江寧藩庫收貯聽用。得旨。依議速行。○是日起。

上以孟冬享

太廟。齋戒三日。○乙卯。

孝敬憲皇后忌辰。遣官祭

泰陵。○兵部議准。察哈爾都統常青咨稱。察哈

實錄卷一百六十七

三

爾所製夾帳房。係備出口巡查牧羣應用。請照軍機大臣原奏。准其製造。定為六年應修十二年應造。從之。○以禮部尚書德保為鑲黃旗漢軍都統。○命左都御史邁拉遜署吏部尚書。○旌表守正被戕湖北房縣民盧士虎妻錢氏。○丙辰。諭現在工部滿侍郎俱經出差。所有工部侍郎事務。著申保署理。○又諭據高晉奏。今春高樸差家人赴蘇州辦貢。路過江寧。曾寄家信一次。今高樸既在葉爾

羌私採玉石。運回內地。其辦貢家人。自必知情。或即交其在蘇售賣。現在飛札楊燧。密速查拏。嚴搜奏辦等語。高晉辦此一事。實屬大謬。回疆辦事大臣。從無進貢之事。或伊等因所賞養廉優厚。積有盈餘。將回部玉碗。及痕都斯坦所做玉器。購買數件呈進。朕亦間為收存。此情理之常也。若和闐所產玉石。皆為官物。駐回部之大臣。取此持往蘇州製造充貢。朕一見即知。不但不收。必且罪其監守自盜。十餘年來。從無此事。衆所共聞。共見。高晉豈得諉為不知。若因庚子歲為朕七旬萬壽。思欲豫備貢品。不特為期尚早。且高樸侍郎亦非應行進貢之人。況朕曾經降旨。七旬萬壽。不許內外大臣進貢。亦高晉所深知者。高樸有何貢之可辦。而差人赴蘇乎。高晉一聞高樸家人之言。即應計度及此。向其家人詳細嚴詰。並將所攜物件。逐一搜查。見有玉石等物。即行訊明。據實叅奏。朕必嘉其公正。使

實錄卷千六十七

四

高晉彼時早為舉發。高樸或尚不至狼籍不堪。若此。且幾釀生事端。即高晉為其姪高樸計。早發以杜其弊。何如今日之潰敗決裂。而不可挽救乎。高晉與高樸。雖係從堂叔姪。高樸之貪黷負恩。原與高晉無涉。朕亦不肯因高樸而累及高晉。乃高晉明知高樸差人赴蘇。不為詰究。聽其自往。謂非徇私容隱。其誰信之。高晉此事。獲戾甚大。著交部嚴加議處。○諭軍機大臣等。本日陶易覆奏。徐述夔逆書一案。稱據東臺縣知縣涂躍龍將徐述夔所著一柱樓詩等書。稟送書局。局員上元縣訓導保定緯。茶引所大使沈瀾。因其書內不將違礙語句簽出。未送檢閱。即批發縣粘簽另送。以備詳辦。嗣經監生蔡嘉樹。赴控徐述夔所著書籍。係伊呈首。縣書捏作自繳等情。隨批發揚州府查訊。復經檄飭速究覈辦等語。徐述夔所作不法書籍。既經東臺縣呈送。陶易即應親加檢閱。據實查辦。何得僅交局

實錄卷千六十七

四

員覈辦。事後借以卸責。此實無解於陶易之罪。但保定緯沈瀾。既係委勘書籍之員。一見狂悖詩句。理應逐一簽出。稟請嚴辦。乃竟延擱不簽。顯有欲為消弭之意。其罪亦無可逭。著傳諭薩載。楊魁。即將保定緯沈瀾革職。委員隔別管解赴京。一併交部訊究。○又諭曰。高樸在葉爾羌採辦玉石。串商私賣一案。高晉接到高樸家信。即應計及高樸在葉爾羌有何辦貢之事。其差家人赴蘇。必有他故。乃

實錄卷六十七

三

竟不向其家人詰問。又不將所帶行李點查。輒聽其前往蘇州。所辦實屬大謬。已降旨將高晉交部嚴加議處矣。至高樸家人攜帶玉石赴蘇售賣。自必與商人交通說合。兌銀銷貨。況自春至今。已逾半載。豈能掩衆人耳目。楊魁身任巡撫。且近在蘇州。此等駭異之事。豈得諉為毫無見聞。竟爾置之不問。所司何事。封疆大臣。於所屬地方。事無鉅細。俱應留心訪察。據實查辦。乃有此明目張膽。散法營

私重案。並不立時發覺查拏。據實具奏。其為甘心徇隱。無可置辯。實不知其是何肺腸。如伊天良未盡泯絕。撫心能自安乎。著傳諭楊魁。令其速行明白回奏。再高樸此次所差赴蘇州之家人。尚在李福之前。並著就近於玉貨鋪內。訊明姓名。即速同所有玉石銀兩。一并查封解送。並將該犯迅速拏獲。派委妥員鎖押解京。毋致稍有疎懈。○以故湖南澧州屬石門縣添平所龍溪隘土把總職銜鄭作

實錄卷六十七

三

常子文宗。已革貴州獨山州屬爛土司土官張乾子祁定。各襲職。○是月直隸總督周元理奏。天津青縣靜海滄州元城大名六州縣村莊間有被淹。又宣化萬全赤城西寧龍門懷安六縣。因節氣較早。亦有被霜之處。請將出借倉穀。及應徵屯糧米豆。均緩至明年參後徵還。報聞。○署兩江總督薩載奏。下河民田。惟高郵江都境內。逼近湖河水勢減洩。既多。不免淹及。現查被水之處。統歸旱災案內

妥辦。寶應縣亦有淹處。一律辦理。得旨。有成災者。妥為撫卹。勉之。○河南巡撫鄭大進奏報開封等七府州。得雪一二寸不等。足為豐登豫兆。得旨。豫省屢被災傷。窮黎疾苦。正我君臣抱愧之日。況此微雪。何足為慰。而汝似有喜耶。○山西巡撫覺羅巴延三奏。鹽池黑河。東西長五千餘丈。南北寬六十丈。應開至黑泥硝版為準。現經修築完竣。並請嗣後定為歲修章程。隨時粘補。以期永久。得旨。嘉獎。○四川成都將軍特成額奏。據綽斯甲布及布拉克底。巴旺等土司稟稱。該土司地方。俱興建喇嘛廟。學改黃教。又巴旺土司。將幼子二人。送廣法寺學習經典。批。好事也。

大清高宗法天隆運至誠先覺體元立極敷文奮武孝慈神聖純皇帝實錄卷之一千六十七

大清高宗法天隆運至誠先覺體元立極敷文  
奮武孝慈神聖純皇帝實錄卷之一千六十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌冬十月丁巳朔享

實錄卷一百六十八

太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭

孝賢皇后陵。

端慧皇太子園寢。○頒乾隆四十四年時憲

書。○戊午。

上御乾清門聽政。○諭曰高樸在葉爾羌向回

民勒索金寶諸物又多累回人開採玉石串

商牟利並公然遣家人載赴內地私賣種種

貪婪款跡均出情理之外已降旨將高樸革

實錄卷一百六十八

職嚴審即於該處正法矣回疆辦事大臣經

理該處事務責任匪輕當體朕意撫輯回民

俾得安居樂業不宜稍有派累滋擾致蹈素

誠覆轍貽誤國事即間有不能潔已畏法之

人意圖染指或向商人私分餘潤未必非事

之所無然亦幸而不發得逃法網乃高樸在

葉爾羌勒取回人財物賊數累累已屬從來

所無又先期奏請開採久經封閉之密爾岱

山豫為作弊地步遂派回人三千餘至該山

採取玉石。致諸回受累含怨。且與蘇商串通。以官玉私獲厚利。並差家人裝運多車。至內地各處。冀得重價。實屬從來所罕見。是直全無人心。非復人類之所為。朕豈能廢法稍為曲貸。即現在如此辦理。已屬從寬矣。至綽克托為總辦回疆事務大臣。各城之事。皆應留心體察。乃高樸狼籍若此。且現訊解到馬德亮供詞。亦稱高樸在彼。回人無不抱怨。烏什距葉爾羌不遠。且綽克托亦曾至其地。豈竟毫無聞見。何以不據實指參。其徇隱之罪。實無可逭。至淑寶與高樸同城辦事。高樸肆行不法。賊跡纍纍。更不得諉為不知。若訊明與高樸通同作弊。亦當解京。即正典刑。設僅係畏懼高樸。不敢舉發。雖誤國家回疆重務。而不顧其罪更重於綽克托。亦不能輕宥也。今年三月。鄂對病故。高樸即奏請以鄂對之子鄂斯瑞接辦該處阿奇木伯克事。朕以為若如此。父子相繼辦事。竟似葉爾羌之阿奇木

為伊家世職。久之與唐時藩鎮何異。因將色提巴爾第調至該處。以鄂斯瑞調赴喀什噶爾。意在為回部伯克防微杜漸。並非令色提巴爾第往查高樸之事也。及色提巴爾第到彼。聞知高樸貪婪不法各款。及回眾抱怨情形。並據高樸代其遣人至採玉處。取回元寶五十個。色提巴爾第即將元寶交伊通事薩木薩克封貯。一面將高樸之事。向永貴呈控。其事乃得敗露。若照高樸之奏。令鄂斯瑞在彼為阿奇木伯克。鄂斯瑞知其父鄂對與高樸相好。有礙顏面。且伊年輕未能更事。必順從高樸所為。扶同徇隱。不能如色提巴爾第之和盤托出矣。至於永貴之往烏什。因綽克托年班已滿。而永貴適有市恩李淑芳之事。身獲重譴。隨即革職示懲。念其向在新疆年久。事尚熟習。因賞以三品銜。派令換綽克托回京。然猶恐永貴才力未必能如綽克托之周到。更不冀其有整頓稽覈之效也。乃永貴

一接色提巴爾第之呈。即據實叅奏。且迅馳往葉爾羌。親身查辦。遂令高樸贓款水落石出。使綽克托不換。雖得色提巴爾第之呈。未必能如永貴之秉公辦理也。是色提巴爾第之調缺。永貴之換班。朕初意並未逆億及此。乃因二人到彼。而高樸之事。始得敗露。回衆藉以輯寧。若無此調換。其事必不能破。回衆積怨日深。一二年內。必致如昔年素誠在烏什激變之事。而葉爾羌地大城堅。較烏什尤甚。尚復成何事體。此實仰賴

上蒼眷佑。默啟朕衷。故不期然而然。辦此大案。誠非意計所及。而高樸之贖貨營私。喪心放膽。亦非意計所及。夫高樸以昏妄乖張。自罹顯戮。在彼實為大失。而於國家綏靖回疆之舉。則為大得。朕益惟感

天庥而凜敬畏耳。永貴原摺已譯漢發鈔。令滿漢九卿等閱看。並以朕於諸臣功罪。悉秉大公。惟視其人之自取。從不豫存成見之處。明

白宣示矣。至辦理此事原委。及無意中調派之益。則衆所未曉。著再行明白通諭知之。○諭軍機大臣等。據伊勒圖奏稱。哈喇沙爾。回商雜處。有竊盜鬪毆事件。請交辦事大臣管理。土爾扈特游牧人衆事繁。請派侍衛管理。如遇要事。該處呈報盟長。轉報大臣等語。應如所奏。前曾令舒通阿來京。現在辦事需人。舒通阿不必來京。著加恩賞給侍衛。前往伊犁當差。即著在伊犁侍衛內挑選一員。遣往

哈喇沙爾。管理土爾扈特游牧。現在高樸擾累回民一案。已交永貴審明後。即於彼處正法。淑寶。綽克托。俱交刑部治罪。伊犁地方。厄魯特回人雜處。又與哈薩克交易。恐有不肖官員。侵漁勒索。將軍大臣等。自應留心詳查。據實叅奏。倘扶同徇隱。一經發覺。綽克托等即前車之鑒。斷不寬貸。著傳諭伊勒圖等知之。○命禮部尚書德保。充經筵講官。刑部尚書德福。署經筵講官。○己未。

上御懋勤殿。勾到廣東福建情實罪犯。停決廣東斬犯十人。絞犯五人。福建斬犯十一人。絞犯一人。餘一百二人予勾。○諭曰。大學士管兩江總督高晉。閩浙總督楊景素等。合詞陳奏。以江浙臣民望幸甚殷。且河工海塘皆冀親臨指示。懇請於庚子春再舉南巡盛典。以愜輿情一摺。朕於乙酉南巡迴鑾時。因耆孺攀戀情殷。曾許以翠華再莅。然敬念聖母皇太后春秋已高。難以再奉

安輿。長途遠涉。遂諭江浙大吏。不必更以南巡為請。而江鄉士庶愛戴依戀之情狀。未嘗不往來於懷。距今已十有四年。其顙望悃忱。自益肫切。且自前巡閱定五壩水誌。以為展拓清口之準。下河從此遂免水災。嗣聞黃河倒漾。所繫甚重。因酌定挑濬陶莊引河。面諭薩載籌辦。河成而清黃交匯處。移遠清口。不復有倒灌之患。但下游尚有停淤。亦不可不除其流弊。而一切善後事宜。若非臨莅閱視。究

不能悉其實在情形。至浙省海塘。近來潮勢漸趨北岸。深為慮念。亦不可不親為相度機宜。今高晉等既有此奏。著照所請。於乾隆四十五年正月。諏吉啟鑾。巡幸江浙。便道親閱河工海塘。所有各處行宮坐落。俱就舊有規模。畧加葺治。毋得踵事增華。致滋煩費。至該督等。以庚子年適逢朕七旬萬壽。欲就近舉行慶典。則斷不可。朕本意以庚子年為朕七旬慶辰。越歲辛丑。即恭逢

聖母九旬萬壽。斯則敷天同慶。自當臚歡祝嘏。以抒萬姓悃忱。今既不能遂朕初願。尚復何心為己稱慶。况朕蹕途所經。老幼歡迎扶攜。恐後。未嘗不顧而樂之。若經棚戲臺。侈陳燈綵。點綴紛華。飾為衢歌巷舞。深所不取。且非所以深體朕意也。不特江浙臣民不當為祝釐之舉。即凡內外大小臣工。於朕七旬萬壽時。亦不得請行慶典。以及進貢獻詩。若伊等謂欲藉以申其尊敬之誠。是轉增朕心之不

悅尚得謂之忠愛乎。但天下士民遇朕七旬萬壽。皆不免望恩倖澤。此則情理之常。朕亦何肯因不舉行慶典。併靳恩施乎。著於己亥年八月。舉行恩科鄉試。庚子年三月。舉行恩科會試。以彰壽考作人之盛。至各省漕糧。於乾隆三十一年普免一次。茲蒙

昊蒼眷佑。累洽重熙。敬體

天心。愛養億兆。用是再沛恩膏。著於庚子年為始。復行普免天下漕糧一次。俾藏富於民。共

享盈寧之福。所謂斂福錫民。慶莫大焉。其開科事宜。著交禮部查例辦理。其各省漕糧。應如何分年輪免之處。著交戶部詳悉妥議具奏。將此通諭中外知之。○又諭。原任戶部尚書王際華之子王朝梧。著加恩授為內閣中書。○諭軍機大臣等。據畢沅奏稱。西安省城搜獲私販玉石之吳芑洲等七人。共獲大小玉石一千三百六十七觔。俱無官給驗票。現在分別審擬。請旨懲治等語。前因高樸在葉

爾羌。與商人串通。私採玉石。差家人載運內地販賣。業已屢降諭旨。飭令陝甘各督撫。嚴拏治罪。嗣據直隸盤獲。跟隨高樸家人常永之張元。馬德亮等。送京審訊。據供。常永帶有玉石四千觔。現在陝西渭南縣居住等語。又經馳諭畢沅。迅速查拏。妥辦。畢沅此奏。自尚未接奉前旨。著再傳諭該撫。即差明幹大員。馳赴渭南縣。查拏常永。派員嚴行鎖押解京。并將玉石行李車輛。查封解送。其已獲之商人吳芑洲等。亦即嚴行審訊。一并委員鎖押。隔別解京。但商人買玉售賣。不始於近日。畢沅止須就其與高樸家人夥同販玉之事。嚴訊查辦。勿使捏飾。其從前私買私賣之案。非與高樸勾通者。毋庸追究。致多波累。○又諭。前以高樸家人李福等攜帶玉石。販運蘇州售賣。該撫楊魁並不查拏。奏辦甘心徇隱。已降旨令其明白回奏矣。茲據伊齡阿奏稱。查得本年三月內。有西客張名遠。從口外來蘇。

後來四月間。有高樸家人李姓等。住在他家。攜帶物料甚多。約值價銀數十萬兩。復往揚關。查得李福。熊姓。業於九月十七日乘坐大船。上有兵部左堂旗號。船內有箱四十餘隻。過關北上。現在咨明飛速追緝等語。覽奏殊堪駭異。高樸家人在蘇半載有餘。販賣玉石。肆行牟利。值價數十萬兩。甚至連牆裝運箱籠數十隻。並擅用高樸官銜旗號。明目張膽。衆所共知。楊魁身任巡撫。近在蘇州。且非聾非瞽。豈得諉之毫無聞見。乃竟任其執法無忌。一至於此。實不知其是何肺腑。深負朕委任之恩。封疆大臣。遇有此等重案。尚敢徇私容隱。將何事不可隱匿。朕復何以用人乎。況楊魁係漢軍世僕。由縣令用至巡撫。乃敢昧良若此。自揣當得何罪。著傳諭楊魁。令其即速自行議罪具奏。並著將西客張名遠。迅速嚴拏。先行派委委員。鎖押解京。沿途小心管押。勿稍疎懈。一面將伊家所有玉料貨物。盡

行查點。造冊送京。並將張名遠家貲田產。嚴密查封。勿使絲毫隱匿寄頓。但蘇州商人。赴回疆買玉運蘇。製器售賣。往往有極大白玉。並不始於近日。朕久已知之。因係市廛貿易之常。向皆置之不問。今張名遠敢與高樸家人勾通。公同作弊。則不可不審明重治。但其罪亦止於張名遠。其從張名遠手內轉售之人必多。恐現在蘇州玉鋪。皆不能免。若因此事輟轉根究。必致擾累衆人。朕辦事惟去其已甚。不為已甚。不肯使稍有株連。恐楊魁因獲重譴。思以查辦買玉之事。稍救其過。以致矯枉過正。拖累無辜。則斷乎不可。如李福。張名遠等。解到時。訊有應行拏訊之人。當再行傳諭楊魁查拏。此時且不必辦及。亦無慮其遠颺也。總之楊魁舒文之罪。全在明知高樸家人李福。住蘇半年餘。串同商人賣玉。又復明用高樸官銜旗號。載船北上。楊魁舒文徇情故縱。不即據實奏聞。其罪實在於此。並非

細查蘇商賣玉所能解免也。○又諭曰。高樸家人在蘇半年有餘。攜帶玉料。值銀至數十萬兩。肆行售賣。公然明目張膽。毫無顧忌。已屬衆所共知。況李福等於九月中。乘坐大船。裝載箱籠四十餘隻。張挂高樸兵部左堂旗號。必由許墅關經過。舒文管理關務。船隻過關時。豈有竟不查檢貨物上稅。聽其連檣北上之理。抑係討關免稅。徑行放過。二者必居一於此。舒文乃敢徇情故縱。不行叅奏。其罪實

無可逭。前因其在任辦事。尚屬認真。加恩擢授武備院卿。乃於此等大案。敢於徇私欺隱。若此深負朕恩。實屬天良喪盡。自問應得何罪。舒文著革職。令其白身在蘇州織造上効力行走。並令其自行議罪具奏。若再不知愧悔。改其獲罪更重。不能復邀曲宥矣。○又諭曰。李福。熊濂。既由蘇州乘用大船。裝載物件銀兩。並有箱籠四十餘隻。且船上張挂高樸官銜旗號。衆所共見。其經過淮關時。寅著

因何並不查驗。任其過關北上。不即據實具奏。寅著屢獲罪愆。朕皆曲加寬宥。今於此事。復敢徇私容隱。若此良心何在。著傳諭寅著令其速行明白回奏。○庚申。諭。國史館恭輯開國方畧。著大學士公阿桂同辦。○辛酉。諭。軍機大臣等。據薩載奏。九月二十六日。於淮關盤獲高樸家人李福。及同行之熊濂。委員解京等因。一摺。現派軍機司員。由直隸。山東。一帶沿途迎見。先將李福。星飛解京審訊矣。其

張鑾一犯。即係伊齡阿所奏之張名遠。既據楊魁咨報。在蘇拏獲。即著楊魁遵照前旨。派委妥員。迅速解京審究。至薩載摺內。所稱查覈帳目。與所供俱有不符之處。不可不徹底根究。著將薩載原摺。鈔寄楊魁。逐一查覈。毋稍疎漏。所有會票期票。及餘欠之項。俱即照數追清。解交內務府。至辦理此案。原因張名遠。膽敢與高樸家人。偷載官玉。勾通售賣。數逾鉅萬。罪難輕逭。自當嚴行查辦。將該犯家

內所存玉器玉料。及其資產。嚴密查抄。勿致絲毫隱匿寄頓。至向張名遠手內轉售者。蘇州玉鋪。自皆不能免。亦無不知係高樸家人。從回疆帶來之玉。恐楊魁欲圖稍救其過。以致矯枉過正。輾轉追求。株連必多。即不免於擾累。殊非朕不為己甚之意。已諭令楊魁。分別妥辦。昨伊齡阿奏到。解交薩載覆訊之童韶成。及薩載此奏所稱。拏獲之顧姓。及顧姓家人鄭全。若有干礙張名遠之處。自當一併解京。若無亦毋庸波及。薩載等。仍行遵照辦理。如張名遠到案。尚有供出同伊至回疆。曾與高樸交通。及與李福等朋比為奸之玉商。則須查拏究治。自有旨寄查。若李福等解京。訊有應行提質之犯。亦可續行馳諭查拏。并無慮其先行遠颺也。將此由六百里發往。並隨報傳諭伊齡阿知之。○又諭。據高晉等奏。時和驛八堡奪溜處所。現在施工堵築情形。一摺。所辦甚是。已於摺內批示矣。據稱此次

掣溜之水。一股由時和驛旁洩。一股由毗連時和驛之八堡直注。相度形勢。應在八堡地方施工。斜築東西兩壩。計長一百五十餘丈。就水勢稍緩處。先用軟鑲數十丈。再行進埽。一經堵閉。則八堡時和驛。均包裹在內。其東壩迤下。本有衝刷寬深溝槽二百餘丈。只須接連迤下。再挑一千三百餘丈。即達入正河。挑成後。兩壩進埽。則水勢就近引入溝槽。掣溜東趨。漫口自易堵閉。其儀封兩壩鑲做。將口門收至五丈。即行停工。以通其氣。俟時和驛八堡堵築完竣。再將下游籌辦。甚屬妥協。至儀封漫工。高晉等原計十月初可以合龍。今添築時和驛漫口。通計何時可以全竣。著高晉等。即速覈計覆奏。以慰懸注。並將現辦之時和驛鑲裏挑河情形。即行繪圖呈覽。仍即由驛迅速覆奏。○又諭。戶部議駁。勒爾謹請減寧夏府屬捐監糧數一摺。所駁甚是。已依議行矣。昨歲王亶望奏。請將寧夏監糧減

至八十石收捐。經部議駁。朕特准酌減十四石。半年以來已報捐五百二十餘名。是各生並無裹足不前之事。若照該督所請復行議減。必恐他屬報捐各生。見寧夏額數獨少。趨之若鶩。致生避多就少之弊。是該督此奏止知為寧夏籌畫。而不為別府倉儲通盤覈計。殊未允協。且據戶部奏稱。以寧夏半年收捐穀數計之。一年約可得監糧九萬餘石。加以該府額徵糧數。每年可得糧二十四萬餘石。除供支兵糧籽種口糧等項外。尚餘五萬餘石。實屬有盈無絀。勒爾謹何必鯁鯁過計。若此。著將戶部摺鈔寄閱。令其據實覆奏。彼將何以措辭乎。設或勒爾謹以部駁過於苛刻。該府實屬有難辦情形。亦不妨據實再行陳奏。如所言果合情理。朕自有權衡也。○予故禮部尚書鐘音祭葬如例。謚文恪。○廣東巡撫李質穎疏報。徐聞。恩平。花縣。陽春。新興等五縣。乾隆四十二年分開墾荒蕪田地二

十一頃五十二畝有奇。○旌表守正捐軀山東文登縣民鄒四妻趙氏。○壬戌。

上御懋勤殿。勾到奉天。陝西。浙江。情實罪犯。停決奉天。斬犯四人。絞犯六人。陝西。斬犯六人。絞犯四人。浙江。絞犯二人。餘八十人。予勾。○諭軍機大臣等。據閩。鄂。元。秦。合肥縣民人夏瑤江等。因該縣撮城鎮地方。客販馱米下船。邀衆攔阻。巡檢汪立誠。前往彈壓。夏瑤江毆傷弓兵。經縣役拏獲。旋被夏惟凡等奪去。復趕去汪巡檢寓所。毆及巡檢額顯手指。逼寫字據。現已拏獲夏惟凡等三犯。即呈馳前往查拏。審辦等語。地方偶遇偏災。即切諭地方官照例撫恤。妥協查辦。勿使失所。若刁民藉端生事。則必盡法處治。至各處商販流通。例禁遏糴。乃夏瑤江等。輒敢攔阻米販。及巡檢前往彈壓。並敢毆傷弓兵。實屬目無法紀。至首犯夏瑤江被獲。夏惟凡等。復敢糾衆搶奪。並趕至巡檢寓所。肆行毆辱。逼寫字樣。不法

已極。不可不多辦數人。大示懲創。若僅照常題奏。部覈擬轉。致刁悍得稽顯戮。無以示儆。著傳諭閔鶚元。務將此案要犯。迅速嚴緝就獲。勿使一人漏網。嚴訊本案為首起意。及奪犯毆官。同惡相濟各要犯。擬以斬決。一面奏聞。一面於該處。即行正法示衆。其聽糾助惡之人。並當擬以死罪。隨行而不加功者。亦應問擬遠遣。庶奸民觸目警心。稍知畏法。閔鶚元。斷不可稍存姑息。曲為開脫。○又諭。據舒文奏。四十二年許墅關徵收商稅短少。查係上游收成歉薄。米豆稀少所致。一摺。自係該關實在情形。已於摺內批示。並發交該部矣。舒文辦理織造。及管理關務。尚屬認真。至其於高樸家人李福夥同張名遠。私販玉石一案。置若罔聞。不行具奏。其錯誤甚大。不能為之原諒。李福等在蘇半載有餘。製賣玉器數逾十萬。蘇州人喜說新奇。自早已喧傳城市。舒文豈得諉為不知。若責舒文一聞其事。當

將李福。張鑾。拏獲查辦。則伊非地方官。原可不必。但亦當據實密奏。庶不負朕加恩委用之意。即或慮及繕摺必經幕友之手。恐致漏洩。舒文於今年六月內赴京。陛見。距李福到蘇。業經數月。其事已為衆所共知。朕面詢以蘇州之事。舒文即應據實面奏。乃竟甘心徇隱。並未一語提及。不幾喪盡天良乎。前已傳旨。將舒文革職。以白身在織造上効力行走。並令自行議罪。著傳諭舒文。令其撫心自問。必如何始得稍安。自行切實議罪。迅速覆奏。○又諭。曰。畢沅奏。在長武縣地方。盤獲高樸家人常永等。搜查行李。僅有零星玉器什物。並無大玉材料。訊據供稱。實在因病告假回京。不曾攜帶玉石。亦無隱匿寄頓等語。所訊全屬誑供。已於摺內批示。常永一犯。現據直隸拏獲。跟伊同行之張元。馬德亮等。送京審訊。供明常永帶大車九輛。箱子四隻。內載有高樸玉料三千觔。家人等玉料一千觔。現在

暫住陝西渭南縣。差張元等來京。寄信伊兄。令其前往接收辦理。供情甚為明確。經節次傳諭畢沅。迅速嚴拏解京。畢沅既將常永拏獲。即應向其嚴切根訊。則所帶玉石車輛。自無能掩飾。即馬德亮所供。在渭南存留之玉。亦必和盤托出。乃畢沅率憑常永謊供支吾。竟深信其別無攜帶。不復窮追。此乃外省惡習。甚為非是。畢沅平日辦事。尚知認真。何於此等大案。荒唐乃爾。著傳旨嚴行申飭。除常永一犯。現派侍衛隆安。前往迎提解京外。其馬德亮所供常永攜帶玉石車輛各情節。業已兩次傳諭。畢沅此時自己接奉。著傳諭畢沅。即速派委明幹大員。馳往渭南。按照前所鈔寄馬德亮供詞。嚴行搜查起獲。派員送京。毋任絲毫隱匿窩藏。○又諭。前以高樸家人李福赴蘇。借辦貢為名。售賣玉石。路過江寧。投遞家書。高晉並不究詰。有心徇隱。獲戾甚大。已降旨交部嚴加議處。並另諭令其自行

議罪矣。昨據薩載等奏。已拏獲李福。據供今年三月內。由浦口坐船。到江寧投信。並呈送玉椀皮統等件。告知高晉。往蘇州購買玉器。等語。高樸係回疆辦事之人。伊等或因所賞養廉優厚。積有贏餘。就近購買。痕都斯坦玉器。及回部玉椀數件呈進。間亦賞收。若買蘇州所製玉器同進。不但不收。必當究治。設或因後年萬壽豫備。為時太早。且朕曾降旨。至期不許進貢。而高樸官僅侍郎。職分不應進貢。何必遣人赴蘇。置辦玉器。況蘇州辦貢之事。不特高樸不應差人前往。凡在京之王公滿漢大臣。亦俱不應有此。即高晉身任兩江總督。亦不應在蘇置辦貢物。此等情節。皆高晉所當計及者。彼時自應向李福嚴行盤詰。并將其船隻行李。及同行入眾。逐一查點。自可得其實情。方不失公正大臣之道。或高晉因高樸係其親姪。心存袒護。并念高樸係伊叔高斌之孫。欲為保全。亦當視其事之大小。

似此負恩藐法。墮其家聲。高晉方宜切齒痛恨。豈可復為姑息。即朕亦何嘗不念及高斌。但此等孽種。不惟國法所不容。亦其家所斷不可留者。且使高晉彼時即行具奏。早為發覺。或尚不至狼籍若此。何致此時之潰敗決裂。無可挽救乎。高晉平日尚能秉公持正。頗知大體。此事之錯謬甚大。伊必無辭以對。但伊聞此事。亦不必過於畏懼。惟當撫衷自問。切實議罪。必如何而其心始得稍安。庶天良尚未盡泯耳。至朕委任高晉。原因其於地方公事。實力妥辦。而於河務。亦能實心籌度。是以屢次加恩。今特派其前赴豫省。督辦堵築事宜。實倚以辦此大工。俾得合龍迅速。若伊心存惶惑。轉於公務懈弛。不能上緊截工。則其獲罪無可解免。朕不能復加曲貸矣。將此由六百里發往。並將薩載。楊魁等。查辦高樸一案各摺。鈔寄高晉閱看。令其即行由驛覆奏。○又諭。據永貴奏稱。主事職銜達三泰。伊

沙噶伯克阿布都舒庫爾和卓。於密爾岱山採玉之三千人外。添派二百名。回衆俱皆怨恨。業將達三泰等。嚴刑究訊。並將回衆用言安慰等語。所辦極是。達三泰等。恣恣高樸營私舞弊。擾累回人。若非永貴認真辦理。日久必致如烏什之事。尚復成何事體。此時高樸如未正法。亦當加之刑訊。以快衆心。再楊魁奏稱。鄂對尚欠張鑒銀七千餘兩。自應著落鄂對家屬。照數追出入官。伊子鄂斯瑞。本未同居。朕亦不肯加罪。著傳諭喀什噶爾辦事大臣。曉諭鄂斯瑞。不必畏懼。令其加意撫卹。回人遇事奮勉。勿如阿布都舒庫爾和卓所為。致干重戾。○以署鑲黃旗護軍統領傅景為鑲白旗蒙古副都統。○喀爾喀扎薩克固山貝子朋素克休致。以其子納木扎勒襲爵。○癸亥。諭軍機大臣等。本年豫省黃河漫口。奪溜儀封。考城等屬。被災較重。業經降旨。截留漕糧二十萬石。并留豫省新漕十萬石。又

先後撥運兩淮鹽課銀一百萬兩。並命尚書  
袁守侗。前往查辦。董飭有司。實心賑卹。而安  
徽之亳州等處。因黃水漲溢。田廬淹浸。被災  
亦重。且有先被旱而後被水者。又甘肅本屬  
積歉之區。今年皋蘭等三十六廳州縣。夏間  
亦有因旱成災者。及湖北之漢陽。安陸。荊州。  
各府屬。夏禾被旱。入秋漢江盛漲。又被淹浸。  
災分亦重。雖屢經降旨。該督撫等。統率各屬。  
切實查勘。妥協賑卹。災黎均可不致失所。但  
恐明春正賑已畢。尚屆青黃不接之時。民食  
不無拮据。是否尚需加賑。以資接濟。著傳諭  
該督撫等。即行妥酌覆奏。候朕於新正降旨。  
至江蘇上元等三十六州縣。及湖南湘陰等  
十四州縣。高阜地畝。被旱成災者。不過一隅。  
業據該撫題報。分別給賑。明春是否尚須量  
予加恩。或酌借口糧牛具之處。亦著該撫查  
明覆奏。候朕酌量降旨。此旨甘肅。湖南。由五  
百里發往。湖北。江蘇。安徽。河南。由三百里發

往。仍各按原發里數。由驛覆奏。○旌表守正  
捐軀直隸獻縣民李廷貴妻柳氏。○甲子。諭  
曰。納木扎勒。承襲扎薩克貝子。應令暫回游  
牧。辦理旗務。每遇來京時。其扎薩克印務。即  
著伊弟丹津垂扎勒署理。○諭軍機大臣等。  
據勒爾謹奏。接准閩浙總督咨文。查拏江蘇  
逆犯徐述夔和陶詩內作跋之毛澄。即黃斌  
一犯。現在蘭州府省城拏獲。派員解赴江蘇  
質審等語。此案逆犯徐述夔之孫徐食田等  
各犯。已經江省遵旨解京。現交大學士九卿  
審訊。所有毛澄一犯。亦應解京。併案嚴審。前  
已降旨。令勒爾謹。於拏獲該犯後。即行鎖押  
解京。想該督尚未接奉前旨。著再傳諭勒爾  
謹。並陝西。河南。各該撫。即令管解之員。將毛  
澄。即行管押解京。審訊。勿稍疎虞。○又諭。據  
畢沅奏。接奉諭旨。覆訊常永。始據供稱。高樸  
原有玉石一千觔。交伊與向在葉爾羌充當  
鄉約之趙鈞瑞。攜帶進口。沿途設法售賣。將

銀帶京。常永先行。即被拏獲。趙鄉約尚在後未到。所攜玉石。曾否賣去。未得知悉。一面將該犯鎖交委員。迅速起解赴京。一面嚴拏趙鄉約。再行訊究等語。足見畢沅從前所辦不實。大不是。已於摺內批示矣。常永所遣馬德亮等在京供稱。常永帶大車五輛。分載玉石。載有高樸玉料三千觔。家人等玉料一千觔。極為明確。今據常永止供認高樸有玉石一千觔。則所供尚多不實不盡。況常永同趙鄉約。自肅州分路。既稱所攜玉石。因價賤尚未售去。而趙鈞瑞先遣回之趕車人馬同良等。又供趙鈞瑞到肅州。因帳目未清。一時不能起程。前後自相矛盾。此等俱係緊要關鍵。畢沅並不向其切實根究。任其誑供支飾。仍屬草率顛預。其不是更大。至鄉約趙鈞瑞。現在尚未拏獲。該犯及所載玉料車輛。自尚在甘肅境內。著傳諭勒爾謹。即速派委明幹大員。迅往查拏。務令人贓並獲。先將趙鈞瑞委員

解京。勿稍疎懈。並將所帶玉石及售得銀兩。盡行查明封固解京。勿使絲毫隱匿遺漏。其趙鈞瑞先雇人送回之行李車輛。及渭南縣原籍。雖據稱搜無玉石銀兩。亦難憑信。恐係該犯等。豫先隱匿寄頓。並著畢沅。派員嚴密緝訪搜查。若再不實心妥辦。則其獲咎更重矣。○軍機大臣議覆。西安將軍伍彌泰。陝甘總督勒爾謹。陝西巡撫畢沅奏。覆伊犁屯田換班兵。請改為眷兵三千名。於陝甘兩省綠營派撥。其移駐之缺。以漢軍與綠營曾經出征者間補。至現在西安存營兵丁。不敷防守。除將漢軍全數改補外。另於滿洲兵丁內。挑補馬兵二百。步兵一百。應如所請。惟查伊犁換回兵。俱有本缺。其所稱漢軍與綠營撥補之處。應令該將軍等。分晰議奏。從之。○賑卹湖南湘陰。長沙。善化。瀏陽。巴陵。臨湘。華容。平江。武陵。桃源。龍陽。澧州。安鄉。安福等十四州縣。並岳州。武昌。黃州。三衛。本年旱災貧民。○

補行直隸省。乾隆四十年軍政卓異官九員。年老官一員。有疾官二員。才力不及官二員。分別議敘處分如例。○予福建遭風淹歿之澎湖水師右營把總俞文貴卹賞如例。○乙丑。

上御懋勤殿。勾到湖廣情實罪犯。停決斬犯十人。絞犯六人。餘九十八人予勾。○旌表守正捐軀直隸深澤縣民高際太妻孫氏。山東荷澤縣民張三妻郭氏。○丙寅策試天下武

舉邢敦行等四十八人於太和殿。○諭戶部議駁長蘆鹽政西寧奏請將本年應徵引課銀四十萬兩分限五年完交一摺。固屬照例議駁。但據該鹽政奏稱上年額課全賴本年醬菜二季鹽價收齊完課。春夏運河淺阻。又兼儀封一帶被水。以致銷運遲滯等語。自屬實在情形。所有長蘆應完四十二年正餘引課銀四十萬兩。著加恩准其展限分作五年完交。以紓商力。○諭軍機大臣等。河南儀封

漫工。前據高晉等奏十月初可以合龍。今又添築時和驛漫口。通計兩處何時可以全竣。業經降旨令高晉等約計時日。即行覆奏。尚未據高晉等奏到。因思目下立冬已逾半月。東省運河有蓄水濟運及然壩挑河各事宜。關係明年漕務甚為緊要。恐東省河員因姚立德現在豫省不能親身董覈稽查。以致蓄收水誌草率驗報。而挑河工程更易滋弊。混不可不防。且豫省堵築漫工之事。現有高晉調度督辦。袁守侗協同經理。而催辦夫料等事。又有巡撫鄭大進承辦。原非必需姚立德。在工相助。而山東運河工程則係姚立德專責。雖有道將等員。承管其事。尚不足信。著傳諭姚立德自行酌量。如兩處合龍之期俱不甚遠。工竣後馳赴山東。不致貽誤然壩挑河之事。則俟豫省歲工即赴東省督辦運河諸務。如儀封及時和驛合龍尚難遽定時日。而東省然壩之期將近。姚立德即一面起程。迅

赴東省。一面奏聞。至兩處堵築漫口。究於何日可以合龍全竣之處。並著高晉等迅速覈計。由驛覆奏。○戶部議准。署兩江總督薩載奏。嗣後營兵撥派差使。請每兵日給差費銀三分。即於各營公糧銀內動支。從之。○丁卯。諭軍機大臣等。據劉墉奏。請將御製新樂府及全韻詩。自行刊刻宣示。事屬可行。至所請勅發各直省。敬謹刊刻。聽許流布之處。殊可不。朕所製新樂府。及全韻詩二種。雖議論咸關政治。非僅陶寫性情。但不過幾餘遣興。並非欲昭示藝林。况朕從不肯以篇章之末。與海內文士爭長。劉墉自應深悉。但伊現為學政。且二詩俱曾賞給。欲自行校刊。傳示諸生。固無不可。即詩本亦毋庸再發。他省學政有願自刊者。亦可聽之。若頒發各省。俾一體刊刻流傳。則非朕意也。○又諭。據楊魁覆奏。查辦高樸家人李福。及夥賣商人張鑾等。因一摺。所稱飛咨張鑾原籍山西撫臣。查封該

犯貲財之處。似此事後留心。誰則不能。已於摺內批抹矣。至所稱除張鑾外。並無販玉商人。找取價值情事等語。尤屬未確。李福。張鑾在蘇。串同夥售玉石。得價至十二萬八千餘兩之多。已查有帳本可據。而李福等船中。搜獲現銀。僅二萬四千餘兩。其會票期票所開。亦止四萬六千餘兩。較所賣十二萬八千餘兩。原數缺小半。理應按數全行追出。俾無短少。今該撫輒云。除張鑾外。並無販玉商人。找取價值。竟欲止就已獲之張鑾。草率完案。餘欠概不查追。致歸無著。有是理乎。朕前諭。如在張鑾手內轉售之人。不必波及者。原因蘇州玉鋪較多。若輾轉根究。必致株連。恐吏胥得以藉端滋擾。非朕不為己甚之意。是以令楊魁妥協辦理。至其轉售之玉器價值。則當如數追繳。特非知情同謀者。不必問罪耳。豈可因此。將已買玉器未交之價。亦皆置之不問。使無著落。反令買贓之人獲利乎。著傳諭

楊魁。即將李福等所賣十二萬八千餘兩之項。照數追足解京。勿任絲毫欠缺。若不實力查追。或并代人開脫。即將所缺之銀。著令該撫如數賠繳全完。以示懲儆。○又諭曰。閔鶚元奏。據泗州知州劉作垣稟報。有強搶孀婦之紋犯楊朝武。由省遞回。於八月初三日。在途扭鎖脫逃。當經差役躡緝。旋於初七日。在桃源地方拏獲等語。該州劉作垣。一聞紋犯楊朝武脫逃。隨差役分頭躡緝。旋即弋獲。頗屬能事認真。功過尚可相抵。其在途疎縱之解差。自應嚴訊明確。重治其罪。至楊朝武。於八月初三日脫逃。該州即應一面差拏。一面具報。底要犯不致漏網。乃直待至初七日拏獲。始行具報。殊屬非是。幸而犯已就獲。設或數日後查緝無蹤。不使上司聞知。飭屬通行嚴緝。致令該犯遠颺。該州豈能辭諱匿之罪耶。著傳諭閔鶚元。即將該州劉作垣。嚴行申飭。並將紋犯楊朝武。及解役祁連。周感。嚴訊

確情。從重定擬具奏。○雲南巡撫裴宗錫疏報。陸涼永善二州縣。乾隆四十二年分開墾下則田三十七頃二十九畝。○旌表守正被戕河南商水縣民王忠妻李氏。○戊辰上御懋勤殿。勾到江西安徽江蘇情實罪犯。停決江西斬犯三人。安徽斬犯二人。絞犯二人。江蘇斬犯十一人。絞犯二人。餘九十九人予勾。○諭。本日戶部議覆薩載三寶等同鹽政伊齡阿會議酌加江西湖廣戊戌綱鹽價兩摺。俱稱仍令該督等隨時察訪。嗣後雨水調勻。若無起剝水腳之費。仍覈實辦理。不准加增等語。所議尚未周到。江楚兩省鹽觔。原因本年水淺。輓運維艱。自應暫加價值。不使商本有虧。但不予以限期。該商等一經增價。誰肯復行議減。該督等亦未必能實力稽查。是此時調劑之議。增遂為日後長行之憑藉。究於民食有礙。著各照所定之價。止准暫增一年。過期仍照舊價行銷。以杜流弊。○諭軍機

大臣曰。吳虎炳奏。桂林府屬興安靈川永福全州。暨柳州府屬馬平。雖容。來賓。象州等八州縣。八月初旬以後。因雨稀少。凡不近水源之處。禾苗漸槁。現在親赴各鄉查看等語。著傳諭吳虎炳。董率各屬。實心勘辦。如有被災處所。查明分數。照例妥辦。勿使吏胥滋弊。致災黎或有失所。○又諭曰。高晉等奏。時和驛漫工。約計十月內。可期堵竣等語。究在下澣幾日間。未據聲明。已於摺內批示矣。因閱進到之圖。其舊定東西兩壩。距河隄太遠。不能得力。且接壩無隄。原不成事體。所擬原未妥協。即現在軟鑲之東西兩壩。雖較舊壩移向外。但此壩外河溜。復分兩股。穿隄兩口而出。今僅從隄內施工。而於隄口漫缺處。並未辦及。亦未周妥。因於圖內現做之東西二壩。誌以硃筆尖圈二。又於外隄缺口處。誌以硃筆圓圈四。并於西壩尖圈至圓圈處。誌以硃筆甲乙字。若僅照伊等所定兩壩處鑲築。不將

外隄缺口堵閉。設或舊西壩甲乙之空處。復有漫口。恐仍不免於掣溜。循缺隄而出。為患匪小。今既辦此大工。不可不籌及萬全。著將硃筆標識圖樣。發交高晉等。悉心閱看。令其將因何如此施工。并因何不將外隄缺口。一併堵築之處。據實覆奏。仍即上緊督辦。迅速合龍。以慰厯念。○又諭。本日勾到江蘇省情實人犯。內有鹽梟拒捕二案。餘犯張信元等七名。覈其情節稍輕。是以未勾。梟徒敢於糾衆私販。持械拒捕。傷斃兵役。不法已極。不可不盡法處治。以示懲儆。所有為首糾夥。及同惡相濟。動手各犯。已在該處正法示衆。至其隨同到場各犯。擬以監候。入於秋審情實。固屬罪所應得。第念張信元。陳有富。李榮先。朱孔祥。王添明。呂二。鄒理順等七犯。雖係隨衆同行。臨時並未動手。尚可量從末減。故未予勾。但此等人犯。究非安分之徒。若僅令久禁囹圄。恐衆人不知畏懼。著傳諭楊魁。於接奉

勾到部文。將此未勾之張信元等七犯與勾決各犯俱行綁赴市曹。俟他犯行刑畢。即集衆宣朕諭旨。以此等人犯罪皆自取。朕尚念其未敢隨行動手。不即予勾。實係法外之仁。並將各犯綁押。遊示四門。派委明妥之員。到處明白曉諭。使愚民觸目警心。未始非辟以止辟之意也。今年此等人犯既不勾。明年自然亦不勾。總令牢固監候。每年皆當如此辦理。仍每年奏明。庶刁民久而知畏。將此諭令知之。○已已。

上御紫光閣。閱中式武舉騎射。○諭軍機大臣等。據李奉堯覆奏。察看亳州蒙城縣撫卹賑情形一摺。內稱蒙城縣知縣胡春熙辦理災務。未愜民望。給放撫卹。則又遲緩。災民嘖有煩言。當遣左營守備于作樑。前往催放等語。自屬實在情形。亳州蒙城二州縣。因黃水猝至。被災較重。撫卹甚關緊要。且災賑之事。最宜迅速。災民庶得早霑實惠。今胡春熙既

辦理遲緩。不愜民心。李奉堯尚且知之。閔鶚元。豈轉無聞見。即應一面叅奏。一面另揀賢員。往彼妥辦。使災黎不致失所。況目下距明春尚有數月。若仍姑容該員在彼。必致貽誤賑務。閔鶚元。何以竟不查辦。殊屬非是。著傳旨申飭。並著該撫。即速將胡春熙承辦災務。如何不行盡心之處。查明叅奏。並即揀員。奏明調往蒙城。加意妥為經理。毋得稍存迴護。致干咎戾。○又諭。據伊齡阿奏。九月十八日

午刻。海州所屬三場地方。風暴陡作。竟夜不息。潮水盛漲。漫入竈地。低處全被淹浸。惟較高處所。池井僅留十之五六。各場竈戶房屋。間有倒塌。人口並無傷損。一應鹽廩。築埂抵禦。尚無疎失等語。板浦等三場。夏間被旱。業經勘實。成災七分。今又猝被風潮。近海竈戶。恒業頓失。殊為可憫。著傳諭伊齡阿。即速督率分司場員。逐一確勘。照例撫卹。妥協辦理。務使窮竈均霑實惠。無任吏胥滋弊。將此由

五百里諭令知之。仍即將查辦情形迅速覆奏。以慰廬念。○庚午。

上御紫光閣。閱中式武舉技勇。○諭軍機大臣曰。勒爾謹奏。據固原州知州那禮善。拿獲趙鄉約。在該犯行李車內。細加搜查。並無攜帶玉石。現飭解省審究等語。所辦全未認真。實大不是。此案先經訊明馬德亮。張元等。供稱常永帶有大車九輛。內載高樸玉料三千觔。家人等玉料一千觔。暫住陝西渭

實錄卷一〇六八

六八

南縣趙鄉約家。供詞甚為明確。節經傳諭該督等。嚴行查緝。嗣據畢沅奏。於入陝首境之長武縣。將常永拿獲。初尚狡賴。及知馬德亮等業已就獲。趙鄉約現在截拏。始供稱有玉石一千觔。交趙鄉約。在後照料而行。原屬不實。不盡。著傳諭勒爾謹。實力嚴究。勒爾謹接奉屢次諭旨。自應切實查辦。務使人贓全獲。方為認真辦事。況常永在入陝首境。即經盤獲。則其所帶玉石車輛。自全在甘肅境內。無

難蹤跡。且趙鄉約現已就獲解省。該督自應迅速催提該犯到案嚴訊。其所帶四千觔之玉。寄存何處。或轉賣何人。即當嚴拏轉買之人。方為實心任事之道。乃率據屬員之稟。輒稱其並無攜帶玉石。而於馬德亮所供四千觔之玉。並不派委明幹大員。挨次嚴查。勿使絲毫隱匿。乃輒據屬員報詞。率行陳奏。思欲顛預了事。豈視高樸之明目張膽。偷竊官玉。牟利作弊。為平常之事。漠不關心乎。勒爾謹此事荒唐太甚。天良何在。著傳旨嚴行申飭。仍著傳諭該督。即速嚴查常永。趙鄉約所帶之玉。盡數追獲解京。如尚不實力搜查。則是勒爾謹自速重戾矣。○又諭。前據畢沅奏。在西安省城。拏獲私販玉石之吳芑洲等七人。共獲大小玉石一千三百六十七觔。分別審擬懲治一案。已諭將吳芑洲等嚴訊。一併解京。並諭以商人買玉售賣。不始於今日。止須究其與高樸家人夥同販賣之事。嚴訊查辦。

實錄卷一〇六八

六八

其從前私賣之案。毋庸追究。所降諭旨已明。恐畢沅誤會朕意。以訊非與高樸家人串通。將此次犯人。亦付之不問。則非理矣。應知此等玉石。即或在高樸作弊之前。亦究係商人偷販。其未經查獲者。原可聽其漏網。至既經查獲。即應將其家中及店內之玉。盡數查出。解京。並當切實嚴訊。若亦與高樸家人串通。并當分別定擬。如無勾通情節。亦應治其私販之罪。豈有已獲賊。付之不問之理。至其從

實錄卷二五八

四

前偷販之玉。為時已久。自可毋庸追究。此朕辦事不為已甚之意也。畢沅當分晰妥辦。至常永於何時起解。其供詞曾否訊實。其馬德亮所供四千觔玉石。曾否全行追獲。並著該撫。一併詳悉具奏。○辛未。

上御太和殿傳臚。賜中式武舉一甲邢敦行。樊雄楚。董金鳳。三人。武進士及第。二甲羅廷弼等四人。武進士出身。三甲李春欄等四十一人。同武進士出身。○諭軍機大臣曰。逆犯徐

述夔。身係舉人。且自其高曾以來。均在本朝食毛踐土。厚澤涵濡。乃敢於所作一柱樓詩。各種妄肆詆譏。狂誕悖逆。實為覆載所不容。伊子徐懷祖。並敢將伊父逆詞。公然刊刻。均屬罪大惡極。雖皆已伏冥誅。現將伊孫徐食田等。鎖拏解京。嚴加審訊。定案時。必當照例剖棺戮屍。以伸國法。至其詩集各種刊刻已久。流傳各省者。自復不少。著將所有應燬各書。開單傳諭各督撫。留心實力訪查。如有逆犯一柱樓詩等項刷印之本。及或有翻刻板片。均著即行搜出。解京銷燬。務使犬吠狼嗥。根株盡絕。以正人心。而維風俗。各督撫並宜實心嚴查。勿以具文塞責。致干咎戾。○又諭曰。沈德潛。並無為國家出力之處。朕特因其留心詩學。且憐其晚成。不數年擢為卿貳。乞休後。復賞給尚書銜。令其在籍食俸。恩施至為優渥。理宜謹慎自持。勉圖報効。乃敢為逆犯徐述夔作傳。視其悖逆之詞。恬不為怪。轉

實錄卷二五八

四

多贊揚。實為喪盡天良。負恩無恥。使其身尚在。必當重治其罪。今沈德潛身故後。伊嗣子沈種松。及伊孫恩賜舉人沈維熙。亦相繼夭歿。此即其昧良負恩之報。至伊嗣子沈種松。除沈維熙外。是否另有他子。及沈維熙有無子嗣。年歲各若干。現習何業。並著傳諭楊魁。即速詳悉查明。據實具奏。再沈德潛既為徐述夔作傳。則逆犯所作一柱樓詩等項。刻本其家必有收藏。並著楊魁。即親往伊家搜查。

實錄卷一百六十八

四

將所藏逆犯詩文各種。盡數查出。封固解京。毋稍袒徇隱匿。自取重戾。尋奏查無留藏一柱樓詩。得旨覽。摺內稱。沈種松有子十四人。沈維熙並無子嗣。批作孽不堪之物。○又諭曰。嘉峪關為新疆往來總路。前因回疆大玉塊。間有偷販內地之事。曾諭令勒爾謹。於嘉峪關嚴行查詰。乃李福攜帶玉石數千觔。裝載車輛。明目張膽進關而行。關口員役詢係高樸幕友家人。竟不查看。即行放過。是關口

實錄卷一百六十八

四

竟為虛設。而勒爾謹視前此所降諭旨。亦全不經意。且該犯等載玉至肅州。仍復毫無盤詰。則平日於查拏私玉一事。並不止具文塞責矣。勒爾謹受朕厚恩。委任封疆。於此等事。並不實心辦理。而近日於趙鄉約所帶玉石車輛。又不實心查拏。幾同木偶。良心何在。至李福所帶玉石車輛。據供由肅州即換驢頭。從口外邊牆一帶行走。至山西汾州府等語。此項玉石。雖未經由陝西。而常永所帶之玉。即係交趙鄉約。載至陝西之渭南縣。今因事已發覺。於陝西首境長武。即行獲犯。其玉車尚未運到。然此一路。亦是奸徒偷玉所必經。即如現獲之吳芑洲等。所賣之玉一千餘觔。即其明證。且近日查訊常永一案。任其狡供支飾。並不切實根究。是畢沅之不能實心任事。亦與勒爾謹無異。第念伊等平日於地方事務。尚屬認真。姑從寬免其交部治罪。但此事錯謬太甚。著即自行議罪具奏。至李福由

邊牆一帶到汾州府。由山西何處進口。因何並無盤詰。亦著已延三明白回奏。其餘各關如何偷過。俟將各犯嚴訊明確。再行辦理。

實錄卷一百一十五

聖

大清高宗法天隆運至誠先覺體元立極敷文奮武孝慈神聖純皇帝實錄卷之一千六十八

大清高宗法天隆運至誠先覺體元立極敷文奮武孝慈神聖純皇帝實錄卷之一千六十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理  
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務  
世襲騎都尉軍功加十九級隨帶加二級又加二級臣董誥內大臣戶部尚書鑲藍滿洲都統軍功紀錄五次  
尋常紀錄十四次臣德繼經筵講官太子少保工部尚書紀錄六次臣曹振鏞等奉  
敕修

乾隆四十三年戊戌十月壬申。

上御懋勤殿。勾到河南山東情實罪犯。停決河南斬犯十人。絞犯五人。山東斬犯六人。絞犯一人。餘九十人。予勾。○諭軍機大臣等。本日勾到山東省情實人犯。有嶧縣鹽梟拒捕案內之餘犯范二麻子。雖隨同在場。並未助勢。覈其情節稍輕。是以未勾。此案梟徒糾眾私販。持械拒捕。傷斃兵役。不法已極。不可不盡法處治。以示懲儆。所有為首糾夥。及同惡相濟。動手各犯。均經陸續審明。在該處正法示

衆至范二麻子一犯雖經隨衆同行。臨時並未動手。尚可量從末減。故未予勾。但該犯究非安分之徒。若僅令久繫圜牆。恐衆人不知畏懼。著傳諭國泰。於接奉勾到部文後。將未勾之范二麻子一犯與勾決各犯俱行綁赴市曹。俟他犯行刑畢。即集衆宣諭朕旨。以該犯固屬罪由自取。念其未敢隨同動手。不即予勾。係朕法外之仁。并將該犯綁押。遊示四門。委明妥之員。到處明白曉諭。今年既不勾。明年亦不勾。總令牢固監候。每年皆當如此辦理。仍著每年奏聞。庶乃民久而知畏。未始非辟以止辟之意也。昨江蘇勾到時。所有鹽業內。在場而不助勢各犯。未經予勾者。曾諭楊魁。遵旨辦理。著傳諭國泰。亦遵照妥辦。

○又諭。據軍機大臣審訊高樸家人李福供稱。從蘇州起身時。曾持高樸名帖。並高晉所給護牌。到織造衙門。舒文代為上稅過關。至由閘。揚關亦皆驗放。到淮關盤獲。寅著將護

牌查出收去。薩載審問時。並將情節供明等語。外省官官相護惡習。固結不解。實為可恨。李福過淮關時。高樸之事。業經發覺。寅著既將李福等盤獲。即當將其持有護牌情節據實奏聞。乃寅著輒敢將高晉所給護牌收去。意欲消弭。實屬徇情膽大。至薩載尚屬曉事之人。既經李福供明寅著收去伊護牌之事。即應向寅著取討據以入告。乃竟匿不上聞。止顧袒護同官。不復知有國法。初不料薩載竟至於此。且薩載豈不慮及李福到京。經軍機大臣訊問。必然和盤托出。軍機大臣自必據供具奏。豈敢似伊等之徇私忘公。代為隱匿乎。薩載。寅著此事實屬昧良負恩。非尋常袒護可比。著傳諭薩載。寅著即自行議罪具奏。並著寅著將所收高晉原給李福護牌。即行繳出呈覽。夫似此給發護牌。亦外省常有之事。朕不苛察至此也。但若高樸以大臣而敢於明目張膽。偷盜官玉。與奸商合夥販賣。

此而尚相容隱。推此量也。雖謀叛亦可矣。朕之所以恨汝等以此。至高晉身為大學士。受朕厚恩。既給與李福護牌。朕屢次傳諭詢問。時即應據實陳奏。乃竟敢隱瞞欺罔。其心實不可問。況高晉於李福到署時。詢知高樸差其往蘇州辦貢。並不窮詰查察。又不立時叅奏。實係知情容隱。其獲罪本屬不小。即將護牌一併奏出。又豈肯因此。即將伊草職。掣交刑部治罪乎。高晉寧不自計。既給李福護牌。斷無不破之理。外省惡習。或竟代為護庇。及李福解京。一經軍機大臣研訊。必得實供。一得實供。必然具奏。朕命軍機大臣問事。焉敢看高晉情面。於朕前稍有欺飾。若軍機大臣亦如薩載等之偏袒同官。朕復有何人可用。為君不更難乎。高晉久任封疆。簡畀閣務。寵榮已極。且朕平日之所以倚畀高晉者。因其公正自持。尚得大臣之體。乃護牌一事。前此膽敢涉欺。今仍不免於敗露。高晉聞之。能不

慚愧無地乎。且問心亦何以自安乎。著高晉即行明白回奏。其過許墅關時。李福持帖及護牌。告之舒文。因何令其開單代為上稅。及李福單內所開。俱係何物。亦著傳諭舒文。令其明白回奏。其過由閘揚關。是否如李福所供情形。並著薩載查明具奏。將此由六百里傳諭知之。李福供單。並鈔寄閱看。仍各由驛即速覆奏。○又諭曰。鄂對前在軍營。曾賞給員勒職銜。授為阿奇木伯克。理宜感激朕恩。實力報効。如高樸擾累回人。偷販玉石。自當勸阻不然。亦當如色提巴爾第據實控告。乃反扶同附和。給與高樸金五十兩。玉二千餘觔。令其帶回內地售賣。看來鄂對從前亦有私採玉石之事。實屬昧良負恩。伊若尚在。亦當正法。今雖已故。伊子鄂斯瑞所襲員勒職銜。著傳諭永貴傳旨革去。鄂斯瑞未隨伊父同居。此事尚無干涉。著加恩授為散秩大臣。仍留喀什噶爾阿奇木伯克之任。○賑卹河

南儀封考城寧陵商邱睢州祥符陳留杞縣柘城鹿邑永城淮寧太康等十三州縣本年水災貧民並予緩徵○旌表守正捐軀廣東南海縣民陳景和妻黃氏○癸酉賑卹湖北漢川沔陽潛江荊門江陵監利等六州縣並沔陽荊州荊左荊右等四衛本年水災貧民並予緩徵○旌表守正捐軀廣東英德縣民莫某女莫氏○甲戌諭軍機大臣等據德成奏勘估奉天等處各屬城垣邁拉遜但圖節省反欲將鳳凰城等處城垣減至一丈苟且塞責其事實所難從不得不據實陳奏等語邁拉遜與德成承辦此事朕早知二人必不睦屢經訓諭當和衷共濟今仍如此各持己見實屬可笑邁拉遜德成俱傳旨申飭至盛京為根本重地所有應修各城垣自應一律修築整齊鞏固以壯觀瞻況現今府庫充盈此等工程即多用帑金亦所不靳但不可從中侵冒耳若專以節省為事豈為善體朕意

乎但邁拉遜德成同辦一事而各執己見如此豈能妥協著傳諭弘昫即將各處城垣應全行修葺或稍加黏補之處詳加斟酌另行妥議具奏尋奏臣現遵旨清查盛京銀庫事竣即同德成等親往各城勘估議奏報聞○又諭曰徐述夔逆詞一案蔡嘉樹在陶易處呈控徐食田藏匿其祖逆詞並摘其狂悖語句黏單具控陶易並不立時稟詳嚴辦轉批其呈詞云與爾何干又於行揚州府文內有蒐羅書籍原為明末國初有著作悖謬詩章諷刺實有違礙者俱應收解奏繳至講論經傳文章發為歌吟篇什如只有字句失檢並無悖逆實跡者將首舉之人即以所誣之罪依律反坐著有明條倘係蔡嘉樹挾嫌妄行指摘思圖傾陷亦即嚴訊擬議等語俱於原稿內改定字跡顯然可據朕初閱之即疑必係劣幕有心袒護開脫而陶易與之商同舞弊欲圖消弭今陶易解到朕親加鞠訊據供

此稿係幕友陸炎所改。伊並未寓目。即果如所供。陶易之罪。亦不能稍減。而陸炎敢於舞文玩法。有意消弭情節。可惡。其罪亦斷難輕宥。茲并訊據陶易供。陸炎係浙江石門縣人。伊或已回本籍。或尚在江寧。均未可定。著傳諭薩載。王亶望。迅即查明陸炎現在何處。派委明幹大員。密速查拏。並即遴幹員將該犯嚴行鎖押解京。勿致疎懈。並查其家內有無違礙不法書籍字跡。一併封繳。○又諭據舒

文議罪覆奏一摺。種種誑飾。有心欺妄。已於摺內詳悉批抹矣。舒文身任織造。非若督撫關防衙門。不能悉知外間細事者可比。況伊承辦玉器。常有玉匠往來。若輩聲息相通。斷無不言及高樸差李福等。在蘇私賣玉器之事。舒文本不能諉為毫無見聞。乃摺內尚稱李福。張鑾等夥販私玉來蘇。詭秘掩藏。零星分售。所以被其蒙蔽等語。似此巧詞飾辯。實屬膽大。況李福解到時。經軍機大臣訊問。據

供。曾將高樸名帖。及高晉所給護牌。到織造衙門。舒文令其開單。代為上稅。供詞確鑿。昨已諭令舒文明白回奏。今此摺乃稱止令完稅放行。將李福曾持牌帖前往。及舒文代為上稅之處。仍敢隱匿不奏。更屬有心欺罔。其罪更重。伊已自認昧良負恩。當得何罪乎。舒文之意。必以為織造之任。非伊莫能辦。設舒文病死。將不辦此事乎。且滿朝大小臣工。皆如此。朕並非專藉一二人辦事。舒文雖任織

造日久。又何足恃乎。至舒文在京陛見。曾經內務府大臣。派令庫長同德。前往織造衙門學習。其人亦未必有益。朕看全德人尚結實可信。已降旨賞給主事銜。令其前往蘇州。幫辦織造。及關稅事務。其同德即著撤回。○刑部奏書吏馮士傑挖改城票。騙錢脫逃。應照例擬遣。緝獲辦理。得旨。此案馮士傑敢挖改城票。串通沈裕功分用。復行乘間脫逃。情罪甚為可惡。僅照本罪擬遣。尚不足以示懲。著

交步軍統領及五城順天府。即將該犯速行嚴緝務獲。著該部將伊犯罪私逃之處另行從重定擬具奏。又諭軍機大臣等。本日刑部奏書吏馮士傑挖改城票。騙用錢文。事甫發覺。即行逃避。已諭步軍統領及五城順天府嚴緝務獲矣。馮士傑身為刑部書吏。膽敢改票騙銀。乘間脫逃。情罪甚為可惡。未便任其倖逃法網。伊籍隸浙江紹興。自必逃回原籍。著傳諭王亶望。即速派委明幹大員。前往該犯原籍嚴密查拏。務即就獲。即派妥員解送刑部。從重治罪。毋致疎懈。○又議奏兵部郎中宋國璫。於高樸出差時。借給銀兩。應照例杖徒。得旨。宋國璫以兵部司員。乃敢借給高樸銀兩。明係因其為兵部堂官。藉端交結。實近來少有之事。不可不嚴加懲儆。宋國璫著改發軍臺効力贖罪。○旌表守正被戕江西萍鄉縣民易文祥妻劉氏。○乙亥。上御懋勤殿。勾到山西直隸情實罪犯。停決山

西絞犯一人。直隸斬犯二人。絞犯九人。餘一百一人。予勾。○諭曰。薩載等奏。據淮安府通判奎光稟稱。七月間。隨同藩司陶易勘災。伊有玉器八件。託為覓匠裝潢。今聞查封陶易任所貲財。理合稟繳。查奎光接收上司玉器。代為裝潢。甚屬不合。請交部嚴加議處等語。奎光身係滿洲。乃染外省習氣。為上司裝潢玉器。意圖交結。深為可鄙。其罪實與宋國璫無異。著交部嚴加議處。○諭軍機大臣等。據常永等供稱。高樸於補放伯克時。有索取銀兩之事。且稱本年正月內。在葉爾羌地方。演戲聽曲。高樸係欽派大臣。今孝聖憲皇后大事。未滿二十七月。乃敢肆行取樂。實出人倫之外。僅將伊正法。不足蔽辜。著傳諭永貴。於高樸正法後。尸骸不准攜回內地。其餽送高樸銀兩之五品伯克阿布都拉阿濟斯。莫捫。及和闐阿奇木伯克邁底雅爾。俱著永貴一併查辦。○刑部議。已草江蘇布

政使陶易。於徐述夔逆詞一策。意存徇縱。擬斬立決。得旨。陶易著加恩。改為應斬監候。秋後處決。○緩徵江蘇上元。江寧句容。江浦。六合。吳縣。武進。陽湖。無錫。金匱。宜興。荆溪。丹徒。丹陽。金壇。溧陽。山陽。阜寧。清河。桃源。安東。鹽城。高郵。寶應。江都。甘泉。儀徵。興化。泰州。東臺。蕭縣。宿遷。海州。沐陽。等三十四州縣。並鎮江。淮安。大河。揚州。徐州。儀徵。等六衛。本年水旱災田地。新舊漕項銀米。○丙子。諭軍機大臣等。前因合肥縣民夏瑤江等阻截米販。拒捕傷差。及夏惟凡奪犯毆官一案。情罪甚為可惡。隨諭令閔鶚元。上緊嚴緝。務獲。訊明案情。從重多辦數人。以示懲儆。嗣據閔鶚元。將拏獲夏惟凡等十一名。分別斬絞發遣。定擬具奏。惟夏瑤江一犯。尚未就獲。本日據李奉堯奏。於蒙城途次聞報。即馳往督拏。並派委員弁。協同營縣嚴密購緝。已將案內首夥各犯拏獲十一名。惟夏瑤江一犯未獲等語。夏瑤

江糾眾攔截米販。拒傷弓兵。實屬目無法紀。為此案起意要犯。必當盡法懲治。斷不可任其久稽顯戮。何以至今尚未弋獲。著再傳諭閔鶚元。迅速嚴飭所屬。實力購緝。並專派明幹大員。上緊督辦。務將該犯立時擒獲。審明從重定擬。毋使遠颺漏網。○又諭。昨已降旨。允江浙督撫等所請。於乾隆四十五年正月。啟鑾南巡。並諭令沿途毋得踵事增華。致滋糜費矣。至蹕路所經。水營行宮等事。皆不需費用。前四次南巡。俱曾賞給銀兩。以資籌辦。而督撫至道府等大員。亦有稱自捐廉俸者。今春高晉在京。亦曾奏及。照上數屆之例。於伊等養廉內。公捐備用。今高晉楊魁俱有應繳之項。勢不能再捐養廉。若止令司道公捐。更屬不成事體。朕南巡省方。觀民期使萬姓共臻安阜。豈肯令不肖官吏。藉端科派。方今府庫充盈。因巡幸而頒發帑金。一切皆由公辦。於理為宜。朕亦無所靳惜。著傳諭高

晉即將後歲南巡一應差務需用銀兩若干。詳悉查明通盤覈計。據實具奏。候朕降旨撥給。毋得絲毫派累閭閻。高晉於高樸家人李福到蘇州賣玉石一事。既未盤詰查叅。轉給以護牌。其罪甚大。朕不將伊革職治罪。已屬格外施恩。當如何感激圖報。若於南巡一事。再不據實確覈具奏。並不能妥協辦理。致有派累。則是該督自取重戾。不能更為曲貸矣。○蠲免甘肅皋蘭金縣狄道河州渭源靖遠

紅水縣丞。隴西安定會寧漳縣平涼靜寧隆德固原華亭張掖山丹武威永昌鎮番平番靈州中衛。已燕戎格。西寧碾伯大通涇州肅州安西玉門等三十二廳州縣。乾隆四十二年旱災地畝額賦有差。○旌表守正被戕四川綿竹縣民歐某女歐氏。○丁丑

上御乾清門聽政。○禮部等部議覆直隸總督周元理學政汪廷璵奏稱。直隸商學向例文童額進八名。武童七名。查應試文童不滿三

十人。武童不滿二十人。應遵新例酌減以十名取進一名。即應考人多。文童不得過三名。武童不得過二名。至竈籍文童額進七名。武童六名。嗣後應考人數。文童七十名以上。武童六十名以上。准照原額如少。亦照商籍以十名取進一名。應如所請。從之。○又議覆閩浙總督楊景素浙江巡撫王亶望學政彭元瑞奏。浙江商學額進五十名。撥入杭州仁和錢塘三學。請於鄉試另編齒字號。歸浙省中

額五十名取中一名。人數雖多。不准過二名。應如所請。至所稱應考童生。有正商之商二項。查商籍以執引為憑。現在行商子弟例應與試。至乏商之後。自有原籍合例者。亦應列入民籍。請飭交該督等將乏商子弟開除。覈實人數。另議具奏。從之。○又議覆山西巡撫覺羅巴延三學政百齡奏。山西商籍有坐商運商二項。其置有畦地澆曬鹽觔者。與竈戶等。均應以竈籍應試。向例運學文武各進十

二名。查現在文童百七十人。武童三十餘人。照原額酌減。文童額進十名。武童四名。應如所請。至鄉試。照竈戶例。歸入民籍。無庸另編。齒字號。從之。○兵部等部議覆。兩江總督薩載奏稱。江南各標。向設塘兵四百一十一名。專司走遞。不復操演。未免技藝生疎。應嗣後以一半裁撤。歸營差操。一半走遞公文。於春秋二季輪換。再壽春鎮。汎廣兵單。應添巡兵五十二名。即於塘兵內派撥。應如所請。從之。○

又議覆。福州將軍覺羅承德等奏稱。福州將軍隨印筆帖式三員。年滿時。以驍騎校改補。伊等係由兵丁考取。補授筆帖式。弓馬未免廢弛。應令其一體操演。弓馬嫻熟者。三年期滿。咨部。遇驍騎校缺出。與兵丁一同揀選。弓馬中平者。六年期滿。於第四缺坐補。至辦事平常。弓馬不堪者。年滿時。咨部開缺。應如所請。從之。○盛京將軍弘昫奏。盤查盛京戶部庫貯銀。虧短甚多。顯有侵盜情弊。請旨審辦。

得旨。著派署工部尚書。戶部侍郎。金簡帶同三庫司員。并諳習平兌之人。及較準平法。馳驛前往盛京。會同將軍弘昫。查辦具奏。○戊寅。

上御懋勤殿。勾到朝審情實罪犯。停決官犯。斬犯六人。絞犯六人。常犯。斬犯十七人。絞犯十人。餘二十二人。予勾。○諭曰。舒文。於高樸家人李福等。在蘇偷賣玉石。半載有餘。及用高樸官銜旗號。連檣北上。並不據實參奏。實屬徇情故縱。已降旨。將伊革職。令其白身在蘇州織造。上効力贖罪。及訊據李福供稱。伊自蘇州起身。過許墅關時。曾持高樸名帖。及高晉所給護牌。前赴織造衙門。舒文令其開單。代為上稅。更出情理之外。乃伊屢次覆奏之摺。尚敢隱飾支離。非但糊塗不堪。其昧良負恩。罪實難逭。舒文著革去織造監督之任。仍以白身在蘇州織造。烏林大上行走贖罪。看來全德人尚結實。所有蘇州織造員缺。即

著全德補授兼管許野關務。○諭軍機大臣等據李湖奏。審擬攸縣民人楊明魁殺死賀步月一家三命一摺。已批交三法司覈擬速奏矣。事關三命重案。該撫既經審明定擬。一面錄供具題。一面專摺具奏。并於摺尾聲請勅部覈議。方為正理。乃該撫此奏。僅稱另繕供單。恭呈御覽。並未聲明請交部覈議。殊屬疎漏。李湖非不能辦事之人。但時或糊塗。此其一端也。李湖著傳旨申飭。○又諭據李湖奏。查勘湘陰等州縣田禾成災分數一摺。湘陰等處田禾被旱。已成偏災。昨已降旨將明春應否加恩之處。令該撫確查具奏。茲據奏查勘災分。及分別辦賑情形。著傳諭該撫。即董飭所屬。妥協經理。嚴加查察。勿使吏胥侵漁中飽。俾災黎均霑實惠。仍即將明春應否再行加恩之處。查明據實覆奏。候朕酌量降旨。○又諭據勒爾謹奏。四十五年新疆各處備用綢緞。開明顏色丈尺數目清單。請勅交

山東山西巡撫暨江寧蘇州杭州各織造。照數織辦。解送來甘。以便分交各處備用等語。著傳諭國泰。已延三。穆騰額。全德徵瑞。即照勒爾謹單開所需各項綢緞。如式妥協製辦。務使質地厚重。顏色鮮明。不得稍有粗糙輕減。並著遴委妥員。沿途小心護解。毋得稍有微污。致滋挑駁。所有勒爾謹原摺清單。並着鈔寄閱看。至此項緞匹。解到甘省時。即著該督詳悉點驗。派員轉解伊犁等處。並飭接解之員。一體小心照料。以專責成。○已卯諭。據三寶等奏。審擬殺城縣知縣邱德孚。於起解斬犯王長時。僉差不慎。致解役疎縱脫逃。捏稱落水一摺。已批交該部議奏矣。州縣解審重犯。理應僉派妥役。飭令小心管押。乃邱德孚漫不經心。聽憑解役出錢雇替。以致中途縱放重囚。非尋常僉差不慎可比。其點派兵丁。致令雇替之千總詹如侯亦然。僅予革職不足蔽辜。著該部將邱德孚。詹如侯。另行擬

罪具奏。並著為例。尋議嗣後押解重犯。遇有解役違例雇替。縱囚脫逃者。將僉差不慎之州縣。照管獄官縱脫重犯例。減一等杖七十。徒一年半。所有革職署穀城縣知縣邱德孚。千總詹如侯。請即照此例辦理。從之。○諭軍機大臣等。據三寶等奏。審擬穀城縣知縣邱德孚。於起解斬犯王長時。僉差不慎。致解役疎縱脫逃。捏稱落水一摺。已另降諭旨。交該部等另行擬罪矣。摺內稱有兵役率稟崩崖落水之語。崩崖二字。殊屬不經。即係該處土語。自應按其語意。改作習見字面。敘入摺內。豈宜率以此等俚俗難解之語。混行入告。三寶、陳輝祖。皆久任封疆。不應漫無檢點。若此俱著傳旨申飭。至要犯王長。即應上緊嚴緝。務獲。勿致漏網。不得僅以具文塞責。並著三寶等迅速派委妥幹員弁。設法躡緝。嚴拏務獲。審明正法。毋使遠颺。久稽顯戮。○又諭曰。高樸在葉爾羌。串同商人販賣私玉。貪婪狼

籍各款。實出情理之外。為從來所未有。西寧雖係高樸堂伯。但相隔甚遠。朕不肯因其姪而累及。即李福至高晉署中遞信。及高晉給與護牌之事。高晉之咎。實無可辭。已令高晉自行議罪矣。然西寧係高晉親兄。朕亦不肯因而相累。本日軍機大臣。訊與高樸通同販玉之張鑾。據供。今年三月。同高樸家人李福。路過江寧。先到總督衙門送信。復到基織造衙門請安。復訊據李福。亦稱前往織造衙門請安。回明赴蘇辦貢等語。李福既至基厚署中。並過基厚所管之地。基厚毫無盤詰。當時既不奏聞。事後又不舉首。實屬徇私負恩。著傳諭基厚。令其明白回奏。基厚係西寧之子。西寧豈得諉為不知。其將何辭以對。著將張鑾、李福。口供鈔寄西寧閱看。令其明白回奏。○又諭。軍機大臣。訊據高樸家人常永供稱。伊跟隨高樸往葉爾羌時。沿途驛站。需索銀兩。少者四兩。六兩。多至五六十兩等語。前因

各省驛站。遇有欽差大臣官員過境。往往豫備公館。長隨胥役。備辦供應。任意開銷。而大臣官員之家人前站。亦每有需索騷擾之事。屢降諭旨。嚴加飭禁。乃高樸奉差往葉爾羌。沿途經過各驛站。縱容家人需索騷擾。該督撫豈毫無見聞。何以不行叅奏。況高樸曾在保定。喝令鞭打辦差家人。周元理安得諉為不知。乃竟隱忍不言。伊等不過因高樸係兵部侍郎出差。驛站事務。亦其專管。故爾畏懼逢迎。甘心徇隱。設欽差大臣。勢位更有大於此者。沿途地方官。又將如何酬應乎。此事於吏治甚有關係。著傳諭周元理。已延三。畢沅。勒爾謹。將因何不行查察。叅奏之故。明白回奏。○又諭。據已延三。明白回奏。並自請議處一摺。內稱李福。攜帶玉石。由邊牆一帶行走。至山西汾州。潞安。路徑共有三條。俟部臣訊明李福。張鑾。確由何路入山西境。再將未經盤獲之地方官。查叅等語。現據軍機大臣訊

明張鑾。李福。攜帶玉石。於上年十一月。由甘肅涼州走。二月初。至山西綏德。水寧。汾州。平陽等處。前往河南。由臨淮關。至浦口。換船。過江寧。由泗安一路。四月初。繞道至蘇州等語。沿途地方官。何以毫無盤詰。著已延三。即將山西各處不行盤獲之地方官。查明叅奏。至已延三。平日不能稽查覺察。所司何事。甚屬非是。即交部嚴加議處。不過革職留任。仍不足以示儆。著傳諭已延三。即行切實自行議罪具奏。其甘肅。自嘉峪關。及各州縣。復由肅州至涼州。所過之地最多。且所至均有查拏玉石之責。乃竟聽伊等安行無忌。該地方官獲譴甚重。即河南。安徽。江蘇。浙江。不能盤查之各地方官。及各關監督。亦均難辭咎。並著各該督撫。查明叅奏。○庚辰。諭軍機大臣等。據楊景素奏。福建延平府上洋通判員缺。於本年九月二十四日。准撫臣德保札稱。此缺先經兩司。以興化府通判李燁請調。但查李

煒試俸未滿。恐干部駁。茲據司詳。以漳州府分駐石碼通判顧朝泰調補。可否照依司詳辦理。札商到臣。隨詳加確覈。顧朝泰較優於李煒。即於九月二十八日。會摺具奏。并札覆撫臣。茲於十月初六日。又准撫臣德保來札。延平府上洋通判員缺。仍以興化府通判李煒請調。業經具奏。並聲明未及會銜。辦理兩歧。實非意料所及等語。上洋通判一缺。德保既知李煒恐干部駁。札商楊景素。欲以顧朝泰調補。因何不候楊景素札覆。復將李煒奏調。且閱楊景素摺內稱。九月二十四日。接到德保之札。約計程期。應是九月中旬所發。德保因何札致楊景素未久。復於九月二十一日。仍以恐干部駁之李煒奏請調補。非但事涉兩歧。且與札商之語。亦自相矛盾。殊不可解。著傳諭德保。即行明白回奏。尋奏。臣因上洋通判。無合例可調之員。先曾札商楊景素。將顧朝泰調補。繼因石碼分駐漳州。民情刁

悍。未便遽易生手。遂將李煒奏請。又因要缺不便久懸。一面具奏。一面札知楊景素。故致兩歧。得旨該部議奏。○賑卹安徽亳州蒙城。阜陽宿州。鳳陽壽州。靈璧懷遠。鳳臺泗州。盱眙。天長。五河定遠。和州全椒。來安當塗蕪湖。繁昌合肥。巢縣廬江。霍邱滁州。六安含山等二十七州縣。本年水災貧民。並緩徵漕項銀米有差。○辛巳。諭據楊魁奏。贛榆縣民韋昭。稟首伊姪韋玉振。為父刊刻行述內。有於佃戶之貧者。赦不加息。並赦屢年積欠之語。殊屬狂悖。而行述內。敘其祖著有松西堂稿。因委員赴其家。查無別項違悖。訊明松西堂稿。亦已無存。惟家譜內云。山東日照縣人丁椒園有傳。已飛咨國泰。密飭查覆。一面帶犯至蘇確審。又據寶山縣職員范起鳳。呈控堂弟范起鵠。串竊書籍。因有應繳違礙禁書。被其挾制等情。必因為人查出。假稱被失。並據該州解到書籍。查有現在應繳之禁書。亭林集

等數種。即委員赴其家嚴查有無狂悖著作。及別項應繳禁書。提齊人證。至蘇審究等語。所辦殊屬過當。即此可以見楊魁之不能實心辦事也。查繳違礙書籍。屢諭各督撫實力稽查。而伊等率以具文塞責。即如徐述夔所作逆詞。狂悖顯然。且刊板已久。該撫並未豫行查出。及被人告發。陶易尚欲為之消弭。若非劉墉據實具奏。幾至漏網。然亦因其詩有明朝期振翮。一舉去清都之句。借朝夕之朝。作朝代之朝。且不言到清都。而云去清都。顯有欲興明朝。去本朝之意。而其餘悖逆詞句。不可枚舉。實為罪大惡極。是以提犯解京。命廷臣集訊。定徐述夔等以大逆不道之罪。律陶易以故縱大逆之條。以正人心而肅法紀。此因實有逆詞足據。故不可不辦也。今楊魁因前案之失。意存惶惑。遇有控首逆詞之案。不論其事之輕重。紛紛提訊。株累多人。自以為辦理認真。而不知其過當。以飾其前次之

不能查察徐述夔逆詞等之罪。夫韋昭控告伊姪韋玉振。於伊父行述內。敘其自免佃戶之租。擅用赦字。於理固不宜用。但此外並無悖逆之跡。豈可因一赦字。遂坐以大逆重罪乎。至各處違礙應燬書籍。各省現在陸續查繳。但經繳出。其遲早原所不計。若始終隱匿不交。後經發覺。即不能復為寬貸。並當視其所藏之書。係何等違礙。以定罪名耳。至此等控首之人。不過聞有蔡嘉樹告徐食田一案。遂爾效尤挾制。以快其私。非實心尊君親上也。現經審明蔡嘉樹。因徐食田不允贖田。挾嫌出告。其心亦為私而非為公。且徐述夔書籍。刊刻已十餘年。蔡嘉樹自必早有聞見。若非近時涉訟之隙。彼仍隱忍不言。以此論之。蔡嘉樹原不能無罪。第因所控逆詞不妄。既辦逆案。不必究及原首之人。是以從寬免議耳。設此後復有首告逆案之人。該督撫即應悉心研鞫。辨其真偽。如虛。仍當治以反坐之

罪。據實具奏。使奸頑知警。不敢妄行。若如楊魁。則怨家欲圖傾陷者。片紙一投。而被控之身家已破。拖累無辜。成何政體。且告訐之風。伊於何底乎。況如徐述夔之逆詞。久經刊印。地方官理應切實訪查。本不待他人之出首。各督撫又不可因此旨。而因噎廢食耳。朕綜理庶務。從不豫存成見。其情真罪當者。必不稍事姑容。其事屬虛誣者。更不肯畧使屈抑。且從不為己甚之舉。致滋流弊。而長刁風。楊魁經朕簡用有年。豈尚不能仰體朕意乎。楊魁著交部議處。並將此通諭中外知之。○兵部等部議准。陝甘總督勒爾謹奏。稱階州屬白馬關地方。係川陝入甘大路。離州寫遠。易藏賊匪。請於階州營把總酌派一員。帶兵二十名。駐劄巡防。仍令階州遊擊分季抽調操演。從之。○賑卹湖北江夏武昌咸寧嘉魚蒲圻崇陽通城興國大冶通山漢陽漢川黃陂孝感沔陽黃岡蘄水麻城黃安羅田蘄州黃

梅廣濟鍾祥京山潛江天門荊門當陽安陸雲夢應城隨州應山江陵公安石首監利松滋枝江宜都遠安襄陽棗陽宜城南漳穀城長陽等四十八州縣衛。本年水旱災貧民並予緩徵。○旌表守正捐軀湖北來鳳縣民王秀林妻袁氏。湖南瀏陽縣民曾常清妻歐氏。○壬午。諭軍機大臣等。前據軍機大臣審訊高樸家人李福供出。高晉給與護牌。寅著於淮關盤獲時。將牌收去。李福亦曾於薩載處供明。伊等竟匿不上聞。而高晉於屢次傳諭詢問時。亦始終欺隱。業經降旨嚴飭。並令高晉明白回奏。并著寅著將所收高晉原給李福護牌。即行繳出呈覽。茲據寅著將護牌進呈。閱牌內稱接准欽差駐劄葉爾羌辦事大臣高札知。現差家人李福等來南。到蘇辦理貢物。發給執照。以免沿途盤詰等語。高晉此事錯謬太甚。實出情理之外。高樸職係侍郎。本非應行進貢之人。而駐劄葉爾羌辦事大

臣或因所賞養廉優厚。積有贏餘。將回部玉  
碗及痕都斯坦所做玉器。購買數件呈進。朕  
亦間為收存。若將蘇州所做玉器呈進。朕一  
見即能辨別。不但不收。必且查究重治其罪。  
十餘年來。從無此事。眾所共見共聞。且高樸  
又非織造鹽政關差。及各督撫可比。朕又屢  
經降旨。庚子年七旬萬壽。不許內外大臣進  
貢。亦高晉所深知者。若西寧基厚或差人赴  
蘇辦貢。尚屬事之所有。高晉可以不問。今高  
樸有何貢之可辨。而差人遠赴蘇州。且請護  
牌執照。非私偷玉石。至蘇牟利。而何高晉非  
糊塗不曉事之人。乃並不向李福盤詰。輒給  
李福護牌。其形跡業已顯露。是高樸之事。高  
晉雖欲諉為不知。其誰信之。即令其捫心自  
問。亦恐難以自欺也。朕簡任高晉封疆有年。  
因其平日公正自持。推心倚畀。且目為督撫  
中傑出之員。今以此事而論。所謂公正者安  
在。尚得稱為好總督乎。況高晉身為大學士。

尤當公爾忘私。乃於伊姪高樸偷賣玉石一  
案。始終隱匿欺罔。實屬昧良負恩。高晉以閣  
臣而兼總督。事君之道。當如是乎。今朕已加  
恩。不明治高晉之罪。著將寅著繳到護牌。發  
交高晉閱看。使其知所愧恥。伊如尚有人心。  
能無汗懼無地。且將何以自解乎。高晉著再  
傳旨嚴行申飭。○又諭兵部議駁國泰條奏  
內。挑出鳥鎗兵丁。不當別項差使。及製造鳥  
鎗。必與本人手法相合二款。所駁甚是。已依  
議行矣。山東鳥鎗兵。通計應有五千名。自應  
令其概行操演精熟。若於各營兵內。另挑五  
百名。專習鳥鎗。僅得定額十分之一。其餘未  
挑之兵。皆可不復留心操演。是名為訓練。起  
見。而熟習鳥鎗者。轉較從前大減。變更成例。  
豈整飭營伍之道。至兵弁演習鳥鎗。如平時  
訓練純熟。施放自能有準。若因打靶中少。欲  
為另製與手法相合之鎗。勢必一兵專給一  
鎗。遇另行挑換之時。又須將鳥鎗另製。成何

事體。國泰巡閱營伍時。果能實心簡覈。技藝自皆精熟。營伍亦必改觀。豈藉條陳塞責。況又不曉武備。強作解事乎。國泰人尚明白。但總不免喜事見長。意欲常有條奏。以見其留心公務。不知封疆大臣。惟當深體朕意。察吏安民。督練軍實。初不在無益之條陳。逞才自炫。國泰著傳旨申飭。嗣後務當切戒。勿再高興干咎。○又諭。前據吳虎炳奏。興安等八州縣。八月以後。雨澤稀少。情形業經傳諭該撫。令其董率各屬。實心查勘。如有被災處所。查明分數。照例妥辦。茲復據奏。續查得柳州府屬之柳城縣地方。亦因八月初間缺雨。多有被旱之處。現在委員協同履勘。成災頃畝分數。一併具題。著再傳諭吳虎炳。令其督飭屬員。一體實力勘查。照例妥辦。勿使吏胥侵漁滋弊。副朕軫念。○癸未。諭軍機大臣等。前因勒爾謹奏。據固原州知州那禮善拏獲趙鄉約。並未嚴切訊究。率據誑供具報。看來該員

必係一無能為之人。或并即偷買賊贓。是以諭令該督將那禮善解京候審。今據勒爾謹奏。此案趙鄉約實係那禮善會同千總沈宗貴拏獲。並經該員徹夜盤詰。始據供出埋藏玉石地方。全行起獲等語。那禮善既有拏犯獲玉之事。尚屬實力辦事。已諭軍機大臣存記。俟那禮善到京時。帶領引見。其缺可不必出。候朕再降諭旨。至本日已延三奏。查訊張鑾同夥馮致安口供內稱。張鑾寄往肅州魏象紀信內。向肅州道門上索姓要銀子等語。該道係屬何人。因何令管門家人與奸商張鑾。欠有銀兩交涉之事。其咎實所難辭。並著勒爾謹查明係作何事銀兩。提犯嚴切訊擬。若有私弊。將該道據實參奏。毋稍徇隱。尋奏肅州道陳之銓。舊有長隨索添福。現已告假出口。訊據管門家人供稱。上年索添福曾買過張鑾玉石。俟咨提該犯到甘究辦。報聞。○又諭。據蘇凌阿覆奏。九江關鑿工節省銀兩

一摺。所奏殊未明晰。隨令軍機大臣傳詢全德。據稱向例。每年於關稅項下。動支銀一萬兩。為燒造窯器之用。各年實用銀七八千餘兩不等。又給發窯廠工價。俱用市平市色。按照庫銀。每兩扣銀八分。已敷市間平色。覈計二項。每年約共節省銀二千餘兩。解交造辦處充公。此項每兩扣銀八分之處。誠非木榜所載。但歷任俱如此辦理。即蘇凌阿將來亦不能不如此辦理等語。自係該處實在情形。前降旨蘇凌阿。即應據實具奏。乃此次摺內。仍復隱躍其詞。蓋因從前曾以此為全德之弊。故不肯明言。仍照彼辦理耳。其實從前所奏。亦非蘇凌阿之意。乃係郝碩令其如此參奏。欲以坐實全德之罪。今既詢明。並無情弊。而蘇凌阿將來。又不能不照全德辦理。乃故為遠避全德一層。意存迴護。實係沾染外省惡習。殊屬非是。著再傳諭蘇凌阿。令將窯工節省一項。將來是否仍照全德辦理之處。據

實覆奏。毋稍支飾。尋奏。窯工支放各項。臣於現在辦理之處。覆奏未經聲明。請交部嚴加議處。得旨。此次姑寬。以後戒之。改之摺內。又稱。俱係仍照全德辦理。批。如何。果不出朕所料。又稱。實屬糊塗。又批。糊塗猶可用。巧則不可。豈不聞今之愚也。詐而已矣。○兵部議准。山東巡撫國泰奏。東省沿河防汛馬步兵。終年竟無操演之事。技藝難免生疎。應嗣後每半年。與存城兵丁互換一體操演。再壽張營左哨把總。駐劄博平縣。距東昌營止四十里。距壽張營一百八十里。應改歸東昌營管轄。從之。○步軍統領奏。河南偃師縣民李惠元等。控告該縣採辦工料。折價累民。應請查審。得旨。此案著派侍郎喀寧阿。胡季堂。馳驛前往河南。秉公查審。具奏。所有隨帶司員。並著一并馳驛。其原控之李惠元等。著交部照例解往質審。○旌表守正捐軀湖北當陽縣民趙士彥妻王氏。○甲申。

上以

裕貴妃母妃九十壽。晉封

裕皇貴妃。

親奉冊寶。並

御筆扇聯。

御製詩章。詣

裕皇貴妃宮行禮。冊文曰。璇扉篤慶。喬齡昭  
多壽之徵。芝檢騰輝。崇嘏致延洪之祝。聿稽  
盛典。載奉鴻稱。

裕貴妃母妃。德秉安貞。性成淑慎。

椒庭佐治。嫺內則而矩度彌彰。蘭掖凝祥。育介  
弟而藩維式衍。侍

愉怡於長樂。

高年之親愛尤深。申敬禮於初元。懿號之尊崇  
久晉。彤編紀盛。頤和逾卅載而遙。瑶策增祺。  
益算慶九旬之屆。宜隆位秩。用集庥嘉。謹以  
冊寶。尊為

裕皇貴妃。於戲。綏第祿於羣衣。丕煥琅函之

采。式令儀於鶴髮。永欽瑤佩之徽。謹言。○諭

軍機大臣等。前因吳虎炳奏。粵西所屬州縣。  
八月以後。間有被旱之處。節經諭令該撫督  
飭屬員。實力查勘。照例妥協辦理。今據桂林  
奏。接准吳虎炳札稱。柳城縣知縣譚應麒。前  
報收成八分。嗣又稟改七分。委員密訪。據詳  
被旱成災者。八百餘村。前後不符等語。地方  
有司。理應留心勘覈。據實稟報。乃譚應麒。於  
柳城縣收成。先報八分。復改七分。而八百餘  
村被旱之處。匿不呈報。非玩視民瘼。即捏飾  
諱災。此等劣員。豈宜姑容。貽誤民社。著傳諭  
吳虎炳。即將柳城縣被災確情。妥協經理。務  
使災黎得所。其稟報不實之知縣譚應麒。即  
行查明分別叅處。至廣東省。向來產米較少。  
每藉粵西米糧運濟。今粵西既有偏災。收成  
歉薄。自不便復任客商運米出境。恐廣東米  
價。不無稍昂。亦不可不豫為調劑。昨歲粵東  
曾向江西購米接濟。今歲江西仍屬豐收。自

可就近糴運以濟民食。若粵東現在米糧不  
缺。市價不昂。即可毋庸另辦。著桂林飭屬確  
查。悉心籌議具奏。尋奏現在招商於江西採  
買米石。接濟粵東。報聞。○又諭永貴奏稱遵  
旨將高樸及阿布都舒庫爾和卓等即在葉  
爾羌城外正法。回衆俱皆悅服。惟色提巴爾  
第。以此案因伊控告。恐不知者謂其構釁。實  
深愧懼等語。高樸平素擾害回人。衆皆痛恨。  
今見其明正典刑。無不歡悅。自屬情理。至此  
事由色提巴爾第發覺。頗為奮勉。朕尚當施  
恩嘉獎。有何愧懼之有。即著永貴傳諭。令其  
實心辦理。以承恩眷。○乙酉。諭戶部奏查覈  
鳳陽淮安。許豐三關徵收贏餘稅銀。照例以  
上三年比較。各短少十餘萬兩。及九萬餘兩  
不等。應令各該監督。照三年中所短最多之  
數。賠補三摺。固屬照例辦理。但各關贏餘短  
少之故。實由豫省被災。收成歉薄。今夏二麥  
俱復歉收。及夏末秋初。又值黃河漫溢。阻滯

行商。朕屢經加恩賑卹。其所稱米豆商販過  
關稀少。均屬實在情形。所有鳳陽淮安。許豐  
三關。短少贏餘銀兩。俱著加恩免其賠補。嗣  
後不得援以為例。倘監督等因此次恩免。將  
來遇有贏餘短少之年。輒稱貸少。船稀。藉端  
侵蝕。查出除照例賠補外。必行重治其罪。○  
又諭據銘通奏。盛京工部侍郎兼管奉天府  
府尹富察善。染患痰症。驟難痊愈等語。所有  
奉天府府尹事務。著盛京禮部侍郎全魁暫  
行兼管。○諭軍機大臣等。前據陶易供出。蔡  
嘉樹控告徐述夔逆詞一案。所批呈詞。及行  
文稿內。袒護開脫之語。係幕友陸炎所改。因  
諭令薩載等。迅速查拏。解京審訊。嗣經召見  
解送陶易之江寧府知府章攀桂。詢及陸炎  
之事。據奏。陶易起解時。署總督薩載曾囑咐  
江寧司道。將陸炎圈住。不令遠離江寧。朕尚  
以薩載所辦為能事。曾諭知軍機大臣。本日  
該署督奏到。拏獲陸炎一摺。閱至陸炎是否

尚在江寧。朕以該犯業經薩載飭屬圍住。何必為此虛文。因於摺內批抹。及閱至下文。稱於二十三日在寶應縣途次盤獲。並據供稱。因陶易叅革解京。在昇平橋姚三房家內暫住數日。今由江寧起身。前赴淮揚一帶尋覓館地。舟至寶應縣地方。就被盤問。拏住等語。該犯既在寶應就獲。則非留於江寧可知。何以章攀桂前日面奏。有此一語。或欲於朕前為薩載見好。或薩載曾經囑咐。而該處司道

奉行不力。二者必居其一。朕遇事無論大小。不肯稍涉顛預。著傳諭薩載即將實在情形。明晰覆奏。毋稍掩飾。至該府章攀桂平日居官如何。並著薩載據實覆奏。尋奏。臣於委解陶易時。曾密囑江寧司道。將陶易任所家屬。嚴加防範。故章攀桂有圍住陸炎之奏。至其平日居官。尚屬勤能。報聞。○賑貸兩淮豐利。掘港。石港。金沙。餘西。餘東。呂四。興莊。拼茶。角斜。富安。安豐。梁垛。東臺。何垛。丁溪。草堰。劉莊。

伍佑。新興。廟灣。板浦。徐瀆。中正。莞瀆。臨洪。臨興等二十七場。本年旱災。竈民並予緩徵。○丙戌

上詣

奉先殿。

壽皇殿行禮。○諭曰。土爾扈特親王策伯克多爾濟。自歸順以來。辦理游牧事務。極為恭謹。茲聞溘逝。殊堪憫惻。著派乾清門侍衛佛爾卿。領前往奠醊。並賞銀五百兩。經理喪事。其親王爵秩。著伊弟奇哩布承襲。授為盟長。奇哩布副盟長員缺。著阿克薩哈勒補授。○諭軍機大臣等。昨據薩載等。派員將江寧書局委員訓導保定緯茶引所大使沈瀾。管解到京。交軍機大臣。會同刑部審訊。據保定緯供。向來各處繳局書籍。查明在應燬書目內者。俱留存彙繳。其違礙之書。原經簽出者。即查覈有簽處。是否應燬。分別辦理。若未經黏簽。即將原書發交原繳之員。加簽送局。向來俱

係如此辦理。歷有批稟印稿存局可據。本年六月初間。東臺縣繳到徐食田所呈伊祖徐述夔書籍。查未黏簽。因即照舊規辦理。其書如何違礙。當時實未閱看。且上年書局委員。原有十餘人。今年二月後。各員俱別經差委。及事故離局。局中止留我一人。各處繳來之書。實在不能逐一翻閱。至沈瀾供稱係派管書局內來往文移。並不看書。徐述夔書內有無違礙。並不知道等語。保定縛本屬微員。在局司事。將所繳徐述夔之書。照依局中舊規。發縣加簽。反覆嚴訊。實屬未見悖逆之語。且今年書局止伊一人。亦不能遍加翻閱。於理尚屬可信。沈瀾更係承管文移。於書籍無涉。較之陶易身為藩司大員。既據蔡嘉樹摘句首告。尚欲為之消弭。故縱者。情節迥別。保定縛。沈瀾著省釋。並著加恩開復。仍回原任。至學政劉墉所奏。丹徒縣生員殷寶山呈遞劄莧之獻。因於其家搜出岫亭集內紀夢一篇。

中有紅者朱也。語近悖逆。當經提解來京會鞫。據稱於乙酉年。為本縣北門小李家村朱建爵家教讀。伊弟朱建綱。為人兇惡。屢來吵鬧。將我書館打破。以致不能養家。所以借紀夢為題。做這篇文章。罵他男女內外尊卑上下。幾無人物之辨。並說他不惜廉恥之事。因不好直言。故云若問姓名。物之紅者是。又因他家中扁對。假借作朱文公子孫。他却懼內。故云其為會稽太守之後歟。抑薇國公之後。固有如此者歟。以見其懼內是朱買臣之後。而非文公之後。詞意軒輊。實是可以看得出來的。至我與朱建綱不和。做文罵他。我學生朱文斗。朱文鳴。都曉得的等語。殷寶山一犯。若果有假託朱姓。隱躍其詞。寓其懷想前明之意。自屬罪不容誅。理宜盡法懲治。若果如所供。不過係憤激無聊。借端譏毀仇人。計圖洩怨。本無悖逆情事。則僅當治其遞獻呈詞。狂妄乖謬之罪。但其所供。尚難憑信。著將供

詞行文薩載楊魁詳細確查將該犯所供情節。是否實有其事。據實咨覆。所有殷寶山一犯。著該部仍行監禁。俟查覆到日。再行覈實定案。至岫亭集評點作序之殷一柱。趙學禮。尹發華。不過係庸陋無知之徒。其代為評點作序。非沈德潛與逆犯徐述夔作傳者可比。俱著從寬釋放回籍。○是月。江南河道總督署兩江總督薩載奏。九月內。洪澤寶應高郵邵伯諸湖。因風掣塌各工。節經飭員先用柴

卷六十九

四

料土方趕緊縷護。現俱堅穩。至所需磚石新料。俟水消後估計。目下先發銀四萬兩購辦。以備興工。統限來歲四月。一律修竣。得旨覽奏俱悉。○兩淮鹽政伊齡阿奏。覆海州所屬板浦等場。風潮暴漲。當即飭員酌動鹽義倉穀。先行撫卹。所淹池井。董率竈丁戽洩。現經涸出復業。得旨覽奏俱悉。○淮關監督寅著奏覆。接到薩載知會。查拏高樸家人李福。即於九月二十六日。放關時盤獲。並同行之熊

灝。任效曾等。一併拏交薩載。取供解部。得旨。樂得作此。急公任事之語。看汝等包衣下賤之風。終不改。奈何奈何。又批。若非薩載知會。想汝亦必私行放過。今知而拏獲。汝之幸耳。○福建按察使瑞齡奏。請陞見得旨。不必來外任。汝所曾為。但莫學外任習氣。一切認真。據理妥辦可也。

卷六十九

四

大清高宗法天隆運至誠先覺體元立極敷文奮武孝慈神聖純皇帝實錄卷之一千六十九

大清高宗法天隆運至誠先覺體元立極敷文奮武孝慈神聖純皇帝實錄卷之一千七十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌十一月丁亥朔諭豫省

開封彰德衛輝懷慶河南歸德陳州七府並

許汝二州本年雨澤稀少春麥未得及時播

種業經加恩將被旱貧民酌借口糧籽種俾

得耕作有資並上年出借倉穀緩至來年麥

收後徵還以紓民力第念該省久旱之後復

被水災窮黎實為可憫雖此七府二州所屬

州縣秋收亦有在八分以上者但二麥既已

歉收元氣未能驟復若將秋後應還之籽種

口糧與出借倉穀同時並徵民力未免拮据

著再加恩將開封等七府屬並許汝三州秋

收尚有八分之洧川鄆陵中牟陽武封邱蘭

陽鄭州滎澤滎陽汜水密縣新鄭夏邑虞城

新鄉輝縣淇縣延津滑縣濬縣修武武陟孟

縣溫縣偃師鞏縣宜陽登封永寧澠池高縣

三十一州縣所有出借倉穀二十二萬六千

三百二十一石零減半徵還餘俟來年秋後

徵收還項其秋收僅有七分之通許尉氏禹

州安陽湯陰林縣武安涉縣內黃獲嘉河內

濟源原武洛陽孟津新安扶溝汝州十八州

縣所有出借倉穀二十萬五千一百六十五

石零同秋收僅有六分之許州并襄城長葛

二縣及毗連災地一隅被水之淮寧太康二

縣出借倉穀七萬八千九百五十一石零均

緩俟來年秋後徵還至上年先已被災而秋

收僅有七分之汲縣臨漳二縣本年出借籽

種口糧銀四萬六千餘兩并出借倉穀一萬

一千七百三石零均俟來年麥熟後分別徵

還再汝陽上蔡正陽新蔡信陽羅山商水西華臨潁魯山郟縣寶豐伊陽光州光山固始息縣商城十八州縣出借倉穀二十萬四千五百八十石零先徵十分之六餘俟明年秋後徵還俾民力更紓以示軫念窮黎至意該部即遵諭行○又諭據勒爾謹等奏審訊在西安拏獲私販玉石之吳芑洲等七犯堅供各玉石或係發賣綢緞在口外阿克蘇并肅州價買或係在肅州涼州蘭州等處以結欠貨帳折得玉石并或以貨換玉帶回銷售該犯等與常永趙鈞瑞並不認識實未向伊等接買玉石質之趙鈞瑞亦供未認識其人不敢混扳反覆嚴審矢口不移至搜出玉石並無官給照票自係私販但向無治罪專條請初部定擬分別治罪等語轉可不必如此辦理自平定回部以來所產玉石除交官所餘招商變價外其回民違禁私賣奸商潛蹤私買載回內地製器牟利者並不始於此時而

邇年來蘇州所製玉器色白而大者不一而足非自回疆偷售而何朕久經深悉第以國家幅幘廣闊地不愛寶美玉充盈以天地自然之利供小民貿易之常尚屬事所應有故雖知之而不加嚴禁此即抵壁於山之意至高樸駐劄回疆敢於明目張膽偷賣官玉價逾鉅萬實出情理之外雖已審明在該處正法尚不足抵其罪愆其案內之商人張鑒鄉約趙鈞瑞膽敢交結大臣夥同其家人沈泰李福常永輩偷販覓利情罪可惡自難輕宥至吳芑洲等既訊與趙鈞瑞等不相認識並非高樸案內有名人犯則不必與張鑒等同科但吳芑洲所販之玉既無官給照票其為私販無疑若伊等謂買時實不知情乃必無之事此等狡獪伎倆豈能欺人乎況已人贓並獲偷販之罪實無可辭亦伊等所自取但究非與高樸通同販賣尚可末減若將此七人治罪則前此私販回疆玉石之人轉得漏

網亦非情法之平。今該犯等所販之玉俱已查明入官。亦足以蔽辜。無庸另行治罪。吳芑洲等現據該撫奏明解京。俟解到時軍機大臣會同刑部覆訊供詞。如果無虛捏。即行奏聞釋放。昨陳輝祖奏於襄陽盤獲玉商楊添山等十七名。解到時亦著詳悉研鞫。是否與張鑒、趙鈞瑞同夥。或不相干涉。訊取確供。分別辦理具奏。其現在或有續獲者。亦照此辦理。此乃朕格外之恩。凡屬商衆。俱當感激改悔。若經此次查辦之後。復有私赴新疆偷販玉石者。一經查獲。即照竊盜滿貫例計贓論罪。不能復邀寬貸矣。將此通諭中外知之。○又諭前經降旨各督撫查繳違礙書籍。並令明白宣示。如有收藏明末國初悖謬之書。急宜及早交出。與收藏之人並無干礙。又因王錫侯逆詞一案。並令各督撫一體嚴查。雖節經各督撫陸續收繳呈進。譬之常人。設遇詬其祖宗之字。亦將泚而不視。而況國家乎。而

況食毛踐土之臣民乎。但查辦業經數載。仍復有續獲之書。此非近日之認真。皆由前此之忽畧。且如徐述夔所著逆詞。狂悖顯然。其刊板已久。該督撫並未豫行查出。即可為奉行不力之據。蓋因查書向未定期。各督撫視為末務。每隔數月。奏繳數種塞責。如此漫不經意。何時可以竣事。而挾讐告訐。騷擾欺嚇。將百弊叢生。其藏書之人。亦不免意存觀望。呈繳逾期。皆各督撫經理不善之故。著通諭各督撫。以接奉此旨之日為始。予限二年。實力查繳。並再明白宣諭。凡收藏違礙悖逆之書。俱各及早呈繳。仍免治罪。至二年限滿。即毋庸再查。如限滿後。仍有隱匿存留。違礙悖逆之書。一經發覺。必將收藏者從重治罪。不能復邀寬典。且惟於承辦之督撫是問。恐亦不能當此重戾也。○又諭前因軍機大臣訊據高樸家人常永供稱。伊跟隨高樸往葉爾羌時。沿途驛站需索銀兩。少者四兩六兩。

多至五六十兩。直隸境內尚少。山西一帶漸多。並稱高樸曾在保定。喝令鞭打辦差家人等語。隨降旨令周元理等明白回奏。昨據周元理奏查高樸過保定時。因索取清醬未給。將該縣辦差家人李玉鞭打。前任知縣鄭製錦隱忍不言。請交部議處。並自請交部嚴加議處一摺。已批交該部嚴察議奏矣。各省驛站。遇有欽差大臣官員過境。向每豫備公館承辦供應。屢降諭旨嚴加飭禁。地方大吏如果遵旨查飭。力除積弊。遇有需索騷擾之事。即行參奏。欽差過境。自皆不敢妄行。至直隸為各省首途。直隸如此。他省自效尤滋甚。則需索騷擾之弊。皆由直隸而起。已無可辭咎。今高樸縱容家人。需索騷擾。即在達爾吉善任內。直隸臬司專管驛站事務。乃容各州縣違例支應。致高樸主僕縱恣不法。達爾吉善所司何事。至其責打辦差家人一事。達爾吉善近在省城。豈得諉為漫無聞見。乃竟匿不

具奏。其獲戾尤重。達爾吉善著交部嚴加議處。又諭。昨召見雅德。據稱回子伯克每日俱上大臣衙門。每見必叩頭行禮。殊屬非是。中國之待外藩。原有定制。並不在接見間過事森嚴。如高樸之貪婪勒索。使回人含怨。若非知之早而辦之速。恐不免激成事端。豈僅禮儀隆重。即能懾服人心耶。明季文臣識見淺陋。大率重文而輕武。其武臣又重內而輕外。每將沿邊部落。恣意欺凌。及致釀成變故。則又束手無策。即如明將軍李成梁與本朝構釁。我

太祖

太宗躬行天討。守邊官吏各皆退避。苟且彌縫。終至困敗。其明鑒也。今當國家全盛之時。外藩畏服威德。朕撫馭懷徠。回子等無不感恩知法。不敢稍懷異心。然而必命大臣前往駐劄者。乃國家億萬年之計。我後世子孫。不可不善體朕意。將所定成法。永遠遵守。尋常之

見必以為回子每見大臣叩頭行禮體統森嚴亦所應爾此特未嘗長計遠慮耳。若不思患豫防其弊甚大。所謂涓涓不已將成江河是也。且大臣等果能正己率屬恩威並施伊等自然悅服。倘回子伯克干犯法律據實奏。小則降革大則予誅亦不為過。若徒倚恃尊嚴欺凌作踐斷乎不可。現在準噶爾回人年班入覲朕施恩優待厚加賞賚與內扎薩克無異。大臣等辦理新疆事務回衆皆其屬下。乃不以恩禮相待。豈撫綏遠人之道乎。不但見回子伯克等不可如此。即土爾扈特金川番子見大臣亦不可如此。著交軍機大臣將各回城伯克及土爾扈特金川番子等謁見大臣儀注一併妥議具奏。並將此旨繕寫一通交尚書房諭阿哥等知之。○諭軍機大臣等據高晉等奏時和驛八堡每日進埽口門日窄溜勢湍急二十五日口門僅存三丈二尺。隨將兩壩鑲修。正在兜攬堵閉不意西

壩中腰陡整一段該壩本屬堅實因溜緊搜刷塌去邊埽撞動正壩當即督令搶鑲懇准寬限十二日上緊趕辦等語。覽之深為屢念。豫省漫口所關甚鉅前據高晉等奏時和驛工程約計十月二十五日合龍儀封工程約計十月二十八日合龍日來盼望甚切茲復據高晉等奏西壩中腰有整塌之事究係所做工作不能牢固所致但既因溜緊搜塌亦無可如何。今高晉等奏請展限十二日著照所請准其上緊趕辦。高晉等務須督飭迅速如法鑲做依限合龍以慰朕晝夜懸注之意。將此由六百里傳諭知之。仍著將趕辦情形若何由六百里覆奏合龍既經展限姚立德不必坐候即速往河東料理挑河事務不必兩誤也。○又諭據伊齡阿奏前經奏明俟辦理老少餘鹽事竣即赴闕仰覲天顏已蒙聖鑒等語朕並未批允伊齡阿來京之奏此言從何而來。因查檢其六月初奏到之摺據稱

俟餘鹽辦有就緒。即奏請赴闕。跪聆聖訓。乃屬未定之詞。因於摺內批覽。伊齡阿。即欲來京。陛見。亦當專摺奏請。候朕允否。遵行。乃執前此覽字之批。遂以為允准之據。竟爾定期起程。所辦又涉取巧。伊齡阿著飭行。至此時該鹽政任內。並無應行面陳事件。伊齡阿。不必來京。陛見。可將此傳諭知之。○是日起上以冬至祀天於

園立齋戒三日。○戊子。諭本日據巴延三奏。起獲張鑒同夥私販之衛全義。寄賣各玉器內有玉如意一枝。票開價銀四千兩。覽之深為駭異。前次屢降諭旨。禁止貢獻。而督撫等於呈進方物時。間有以玉如意附進者。朕因如意義寓祥占。且計所值無幾。間亦賞收。以聯上下之情。初不知商人等之居奇罔利。若此也。今閱單內。衛全義所寄之玉如意一枝。需售四千兩。實出情理之外。其餘玉器價值。概

可想見。奸商輩以近市三倍之心。貪得無厭。高擡市值。以惑人。固屬可恨。而督撫等不惜重費購覓。亦屬愚而無謂矣。朕於整玉如意。本非所喜。是以座右陳設。止用鑲玉者。而不屑用整玉。乃衆所共知。況回疆玉料。琢成器皿。朕一見即能辨識。今既徹底查禁。將來自不敢復有違犯。但舊時存者。恐尚不少。豈可仍聽市儈之昧心漁利。現諭督撫等。即朕七旬萬壽。亦不准進貢。其或偶於方物附呈者。不得仍用和闐整玉如意及大件玉器。即呈進亦必不收。使奸商無利可圖。其弊自息。將此通諭中外知之。○諭軍機大臣等。據周元理奏。剝運京銅之船戶張明安。在香河縣狼二窩地方。鑿漏船隻。偷盜銅觔。脫逃一摺。該犯敢於鑿船。竊盜官銅。潛行逃竄。情罪甚為可惡。該督務須飭屬迅速嚴密查拏。務獲從重治罪。毋稍稽延疎懈。致令遠颺漏網。至該犯所竊之銅。至三千六百餘觔。且係鑿漏船底。

斷非一時即能偷運。自係沉於河底。暗為記認。俟事後陸續撈取。並著周元理。即派幹員。於鑿船相近處所。細心察探。打撈勿留為賊匪潛匿。將此傳諭知之。並令將查辦情形。即行覆奏。○已丑。

上詣

南郊齋宮齋宿。○諭前經降旨。允江浙所請。於乾隆四十五年正月。啟鑾南巡。並諭令沿途毋得踵事增華。致滋糜費。第念蹕路所經。江蘇地面較多。水營行宮等事。皆不能不需用。度前四次南巡。俱曾賞給庫銀。以資籌辦。因諭令高晉將現辦南巡差務。需用銀兩若干。通盤覈計。據實具奏。茲據高晉將上四次南巡報銷銀數。及恩賞銀兩。開單呈覽。並稱此次差務。除添建行宮三處。餘俱撙節辦理。較之上屆所費。有減無增等語。該省辦理差務所用經費。既有一定章程。上屆乙酉年。曾經恩賞運庫銀三十萬兩。以資籌辦。此次著照

乙酉年之例。於運庫恩賞銀三十萬兩。為辦理南巡差務之用。即著伊齡阿。照數撥給。仍具摺奏聞。該督務須董率所屬。妥協經理。毋得絲毫科派閭閻。致滋擾累。副朕觀民孚惠至意。該部即遵諭行。○又諭曰。高晉奏查時和驛漫口下注之水。歷陳留杞縣睢州柘城境內之橫河康家河南沙河老黃河均歸賈魯新河。下達江南亳州之渦河。儀封漫口下注之水。一由考城之盤馬寺溝。入北沙河。至商邱縣之鄧濱口。由歸德府之陳兩沙河。匯入渦河。一由寧陵縣之馬三河。亦會歸德之陳兩沙河入渦。是豫省漫水。均以亳州之渦河為總匯。現在賈魯等河。雖流行迅速。並無阻遏之虞。但水過沙停。勢所不免。現與河南安徽撫臣札商。委員將賈魯河至渦河止。再行逐細查勘。如有停淤。即督飭各州縣。照業食佃力之例。歸於歲修水利案內。一律疏濬等語。所籌未為妥善。豫省今年漫水下注。其

勢頗大。而為時稍久。所有經由之各州縣。瀕水村莊。俱被淹浸。受災較重。朕屢經降旨發帑截漕。多方賑卹。不使一夫失所。若如高晉所奏。疏濬賈魯等河。照業食佃力之例。歸於歲修辦理。勢不能不用民力。災後貧黎。豈能堪此。且今歲豫省及安徽沿河被水成災。各州縣非尋常可比。其疏濬工程。斷不宜照常籌辦。復滋派累。著高晉於祥符儀封合龍事竣。會同鄭大進。閱鶚元沿途親行確勘。將應挑之河。覈實估計。具摺奏聞。候朕發帑興工。高晉勘畢各河。即順道回兩江之任。其應濬之河。責成鄭大進。閱鶚元率屬實力妥辦。俾得善後久遠。並使沿河災民。力作餬口。尤合寓賑於工之意。高晉等仍將勘辦事宜。先行覆奏。該部即遵諭速行。○諭軍機大臣等。據高晉奏在豫督工。擬俟大工告竣。奏懇陞見等語。高晉自七月中旬。前赴豫省督辦進埽堵築漫口等要工。迄今已逾三月。離江省為

時甚久。其兩江總督印務。雖有薩載兼署。然一切地方事件。亦有必應該督回任辦理者。南巡差務。其一端也。況賈魯河。渦河。一帶工程。現已降旨。令高晉於工竣回江。順道會同鄭大進。閱鶚元。勘估具奏。是高晉現在正有承辦要務。此時即來京。亦無可訓諭之處。著傳諭高晉。一俟漫口合龍。大工告竣。即回兩江總督之任。不必來京陞見。○又諭前因刑部奏書吏馮士傑。挖改城票。騙用錢文。事甫發覺。即行逃避。情罪甚為可惡。未便任其倖逃法網。恐潛回紹興原籍。當經傳諭王亶望。派員嚴行拏緝。今據奏稱。馮士傑籍隸山陰。父母妻室俱經病故。並無子女。亦無宗族房產。止有胞姊馮氏。查獲到案。據供該犯出外二十餘年。從未回家。亦無音信等語。此等刁猾之徒。一見犯案發覺。輒行逃避出京。揣知原籍地方。必行文查緝。不敢遽即逃回。或在江蘇地面。潛行逗留藏匿。亦未可定。著傳

諭薩載楊魁。即飭各該地方官。實力躡緝。如遇馮士傑到境。務即拏獲。派員解京。仍飭委員小心管押。毋致疎懈。該署督等。勿視為海捕具文。徒以空言塞責。○又諭。據永貴奏到。審辦高樸一案情形。各摺。其酌定玉價一事。實屬不妥。前此商人等。偷玉私販。皆因變賣官玉。借端影射。今高樸勾串奸商。贓私狼籍。雖屬從來所未有。亦實因有此變價而起也。既經盡法懲治。不可不徹底嚴禁。以杜將來。若仍許商人承買官玉。是顯留罅隙。為奸商作弊之地。斷不宜如此辦理。至所云挑刺之玉。方行發售。如實係質低色青者。誰肯承買。若其中稍有通融。日久又成弊藪。且定價聽商人貿易。則與盛京吉林之商賣人。復何異。人獲本係藥品。人或藉以治病。且係陪都所產。久經如此流通。尚屬無妨。今玉塊採自回疆。其地為新闢幅員。若許商人售販。實不成事體。設為較量鎰銖定價。更屬小器。非外域

所宜辦。朕意現有之玉。莫如勻作數年。概行解京。不必分定成色。招商承買。及令官兵繳價獲利。并不必賞給回人。致滋流弊。永貴此時。如尚未辦及。最為妥善。如已招商發賣。及官兵認買者。仍行撤回。惟已賞給回人者。即不必徹。況既已嚴禁商人賣玉。回人即得有玉石。亦難轉售。嗣後凡採玉回人。量其多少。美惡。或騰格。或綢緞布匹。量為給賞。伊等轉得實濟。該處存貯錢文綢布等物。均屬寬餘。儘堪賞用。至官兵更不必賞買。葉爾羌之兵。與喀什噶爾。阿克蘇相同。各處既無此賞賚。何獨葉爾羌兵丁。予以優恤。亦非平允之道。總之密爾岱山。竟宜永遠封禁。或回人赴山偷採。惟當令守卡兵丁。嚴行稽查。一經盤獲。即將人贓。一併解送該管大臣處。嚴行究治。如果能實力巡查盤詰。私玉自不能偷越。其守卡兵丁回役。亦視其所獲之玉。多寡美惡。量為賞賚。官兵回役。當益知感奮。於事更屬

有益。至和闐之玉。似亦可停止二年。更為妥協。或恐回人私赴河內撈採。雖禁止亦屬有名無實。則不妨仍舊。著永貴悉心籌畫。奏聞辦理。又昨經軍機大臣審訊張鑾據供。伊等向俱在阿克蘇私買玉石。或與回人交手。或內地商人在彼開鋪收買。其地為回城售賣玉石之地。且滿洲兵丁一城。回人一城。中間相隔。即買賣街。玉石皆聚於彼。其地甚屬緊要。且商人路引。皆自烏什總領。在彼臨時給發。該處僅係烏什大臣。派遊擊等官一員。在彼辦事。未為妥協。著永貴悉心酌量。如阿克蘇。應特派內地大臣一員。駐劄稽查。方為有益。永貴即速奏聞。候朕酌量派往。至高樸家人沈泰。情罪亦甚重大。如尚未正法。即派委委員。嚴押解京處究。沿途小心管押。勿稍疎懈。其抄出高樸書籍。不必在彼變價。即行附便解京查辦。將此由六百里加緊傳諭知之。仍著由六百里覆奏。○又諭曰。勒爾謹奏。拏

獲高樸家人常永之車夫馬萬金。馬士賓。馬萬龍等。訊據供稱。於九月初二日。携帶玉石。行至大河驛。有管馬號長隨蕭姓。盤詰來歷。稍留玉石一車。索銀一千兩等語。蕭姓長隨以管理馬號之人。乃於馬萬龍等。裝載玉石經過。膽敢訛索千金。輒行私放。情罪甚屬可惡。不可不嚴行懲治。著傳諭勒爾謹等。即將蕭姓長隨。速行拏獲。派委委員。沿途小心管解。毋稍疎懈。至大河驛。係何州縣所管。該員縱容長隨。婪索多贓。縱放私玉。其獲咎甚重。著該督等。即速查明。嚴行參奏。所有失察之該管上司。並著查明。一併附參。○喀什噶爾辦事大臣吏部尚書永貴奏。據色提巴爾第稟稱。密爾岱山產玉地方。有奇盤。舒克蘇二處。最關緊要。應專派員管轄。查塔克伯克玉素布。舒克蘇。伯克布塔雅爾。人俱結實。請即派令巡察。如能實力防範。三年無事。請以應陞之缺奏補。再該處卡座。向係大臣派委侍

衛驗放。請嗣後另派大伯克一員同駐防守等語。應如所稟辦理。至各處埋藏私玉。一時難盡搜查。應咨令各城大臣通行曉諭。如能自首者。玉石入官。免其治罪。若不自首。經人發覺。除照例治罪外。將玉變價。一半入官。一半賞給出首之人。諭軍機大臣等。據永貴奏防範密爾岱山私行採玉一節。除已降漢字諭旨外。其專派玉素布布塔雅爾管轄。並添派大伯克坐卡之處。均如所請行。至高樸現已正法。私行採玉之事。悉委之高樸。伊固不肖之徒。而伊未至葉爾羌以前。鄂對等即有玉石。可見已非始自高樸。今查阿布都舒庫爾家產藏匿物件甚多。則鄂對藏匿物件諒亦不少。當一併嚴查。著傳諭永貴遵照辦理。

○庚寅冬至祀

天於

圓丘

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭

孝賢皇后陵。

端慧皇太子園寢。○諭阿克蘇地當衝途。應專派大臣駐劄。景福人尚穩妥。著授為領隊大臣。駐劄阿克蘇辦事。景福所遺員缺。著舒泰前往。烏什與阿克蘇相距不遠。倘景福不得主意之處。即與永貴商酌辦理。○辛卯上御太和殿視朝。文武陞轉各官謝恩。○諭軍機大臣曰。汪廷璵奏。據河間府知府顧學潮稟稱。訪有交河縣文童魏鵬程。黃干城。被人

掉去銀兩一事。旋即緝獲陳建龍一名。並傳喚魏鵬程。黃干城。到案質認。供係七月內有陳姓三人。到魏鵬程。黃干城。館中。談及營謀進學。言定每進一名。謝銀一百。如不進。罰銀亦一百。該童等信以為實。各出銀一百兩。陳姓等亦出銀二百兩。用布袱共作一包。交該童等收存。及私取銀封拆看。俱係鉛錫。訊據陳建龍供出二人。一係錢明。一係張信。每人各分銀六十餘兩。分頭逃走等語。棍徒等敢借進學為名。撞騙文童銀兩。並潛將鉛錫抵換。其情罪甚屬可惡。不可不迅速弋獲。徹底究治。現在陳建龍雖已就獲。而錢明。張信。必須上緊查拏治罪。斷不可聽其遠颺漏網。著傳諭周元理。即速督飭所屬。選派幹役。購線躡緝。將各犯嚴拏務獲。從重定擬。毋稍寬縱。再該二犯。俱籍隸安徽。或潛回原籍。亦未可定。並著閔鶚元。派員一體嚴緝。訊明供詞。移咨周元理。定擬結案。毋庸將所獲之犯解赴

直省。以免疎虞。至魏鵬程。黃干城。二人。輕信棍徒哄誘。受騙封銀。亦非安分之徒。著周元理。一併訊明。照例治罪。將此傳諭知之。所有汪廷璵原奏。均著鈔寄閱看。○壬辰。遣官祭先醫之神。○定驛務歸巡道分管例。諭昨因高樓家人。隨往葉爾羌。沿途需索騷擾。皆由驛站各員之逢迎酬應。實為郵政積弊。不可不設法剔除。已諭令各督撫。按站查叅。並降旨通行嚴飭整頓矣。但思向來各省驛站事務。直隸則係臬司兼轄。其餘俱係糧鹽道員兼管。該員等俱駐劄省城。以一人而轄通省郵傳。地方遼濶。稽察難周。莫若將各省驛站事務。皆令各守巡道。按其所屬府州縣。分司其事。而以按察使總其成。不必令糧鹽等道兼管。如有本係專管驛傳。並無兼轄他務者。即將員缺裁汰。則事有專責。而呼應亦靈。倘再有廢弛。及徇縱供應等弊。惟該管之司道等是問。其如何分轄歸併。及作何巡查稽覈

之處著交該部詳細酌議具奏尋奉嗣後各省驛務應令巡道分管糧鹽道兼管驛務者如有分巡地方仍令管理所屬之驛無則不必兼管其專管驛務者惟甘肅驛傳道一缺應初該督酌定裁併奏覆另議再驛站馬匹即令巡道稽查加結送部仍將差員印花底冊按月繳部如有餽遺需索照例查叅並將該道議處從之○諭昨因高樸家人跟隨伊主往葉爾羌時沿途驛站有需索騷擾之事已諭令各督撫按站查叅直隸按察使係專管該省驛站之員而其事係達爾吉善任內之事並降旨將伊交部嚴加議處矣前此以各省驛站遇出差大臣官員沿途俱為備辦供應屢經飭諭嚴禁該管驛站之大員理應嚴飭所屬遵旨妥辦設有需索情事或直揭部科或稟報上司叅劾其風自必斂戢何以高樸出差其家人尚敢沿途勒索此皆不肖州縣迎合應付有以誘之高樸業已於偷賣

官玉一案審明正法其家人亦罪不容誅而所在驛站官員曾經給與銀兩者皆不可不查明從重議處以儆將來此等積弊始於換馬使費皆由各驛站馬不足數或疲瘦不堪恐為欽差叅奏遂私自打點彌縫日久竟成錮習并聞有上下站合棚餵養之說遇到站馬不敷用即令上站之馬仍復應差俗稱為打過站此於郵政大有關係蓋由有驛各州縣平時短餵馬匹扣剋馬乾草料自肥及差至需馬稍多不敷支應因而巧為生法以混目前且計其終年所扣之數甚多而欽差家人勒索雖費至十餘金數十金亦尚有限遂致甘心付給希冀無事此等惡習不可不徹底嚴查現已另降諭旨令各省守巡道分管所屬驛傳事務並令按察使總司其事嗣後伊等必隨時查點如有短少及疲瘦者立即查叅州縣自必凜法知畏如果馬匹臃壯不缺額數而欽差往來家人仍復借端需索者

即報知管驛之司道。驗明馬匹。具揭該督撫  
叅奏。必將縱容勒索之欽差。及其家人。查明  
從重治罪。如仍有應付驛站之事。一經發覺。  
除將該州縣重處外。惟於該管驛站之司道  
是問。恐伊等不能當其重戾也。將此通諭知  
之。○諭軍機大臣等。據勒爾謹。畢沅奏。高樸  
家人沿站勒索使費。不能稽察。惟自請交部  
嚴加議處。而於經過驛站州縣。並不查叅。殊  
屬非是。高樸家人沿站勒索。其時經過各州

縣。如何迎合應付。原可逐程查覈。即有離任  
事故。詢之管號書役人等。無難究出實情。秉  
公叅奏。現在周元理。已將直隸供應各地方  
官。逐一查叅。交部嚴加議處。直隸既能如此  
辦理。陝甘何獨不能。乃勒爾謹。畢沅。僅自請  
交部嚴加議處。而於各州縣。並不指實查叅。  
其意蓋以交部議處。極重不過革職。朕亦必  
加恩留任。該督撫故欲獨自擔承。而於屬員  
意存袒護。此豈封疆大臣秉公整飭之道。况

高樸家人之敢於勒索騷擾。皆沿途州縣之  
迎合應付。有以導之。今朕降旨挨查。如復令  
其脫然事外。伊等豈復知警懼乎。勒爾謹。畢  
沅。俱著傳旨嚴行申飭。仍將高樸沿途經過  
各地方官。逐站詳查。指實叅奏。毋得稍有徇  
縱。致干重咎。○又諭。據常喜奏。稱。去年在庫  
車。拏獲私玉一千六百餘觔。當即請示綽克  
托。解往葉爾羌變價等語。殊屬非是。常喜駐  
劄庫車。專任辦事。拏獲私玉。理應即行具奏。

因何聽從綽克托指示。私自消弭。常喜著交  
部嚴加議處。此外如葉爾羌。及哈密各處駐  
劄大臣。俱係專城辦事之人。著傳諭伊等。遇  
有應奏事件。即當據實入奏。不可如常喜所  
為。自取罪戾。○又諭。前因邁拉遜。德成。意見  
參差。今派令同辦城工。恐仍執私不化。曾面  
加訓誨。並著軍機大臣傳旨。令其和衷共濟。  
嗣據德成獨奏。勘估各工。有與邁拉遜不合  
之處。朕因其偏執見小。曾降旨嚴行申飭。並

諭知邁拉遜。而其事則交將軍弘晌。秉公會商。妥酌。以期公事有濟。邁拉遜奉到此旨。自應痛加湔改。今日又據奏。南路查勘八處城工。其岫巖。熊岳。復州。三處。復與德成意見不同。且據稱。已告之弘晌。尤當聽其悉心查勘。公同商辦。乃復哢哢。奏所見益可鄙笑。邁拉遜。德成。同辦一事。各持己見。實屬不成事體。俱著傳旨申飭。邁拉遜摺。並著鈔寄弘晌閱看。令其一併勘估。妥議具奏。至此後一切事宜。邁拉遜。德成。俱當與弘晌公同商酌。妥協籌辦。勿再固執私見。各自專具奏摺。致干咎戾。○賑卹廣西興寧。靈川。永福。全州。馬平。雒容。柳城。來賓。象州等九州縣。本年旱災。貧民並予緩徵。○癸巳。諭。從前各城回衆。於厄魯特時。派喀喇罕前往駐劄。受其種種苦累。復被霍集占兄弟。任意擾害。回子等甚屬難堪。朕因憐憫西域羣生。特移平定準部之兵。前往平定回部。安撫地方。即於各城分駐官

兵。並派欽差大員。經理其事。是以回子等。賴以得就生理。各安本業。後。素誠在烏什。不知愛養回人。且與阿奇木伯克。阿布都拉。任意滋擾。於私事。執行派累。差使。以致回人。怨憤激變。復經派兵平定。迄今二十年來。各處辦事大臣。均知守法。撫輯地方。頗屬寧謐。不意高樸。又與鄂對。阿布都舒庫爾等。朋比為奸。恣意勒索。希圖漁利。私行派撥三千餘人。往密爾岱山。採取玉石。夥通奸商。潛赴內地。售賣。而鄂對。阿布都舒庫爾等。亦冀攜帶伊等私玉。遂告知高樸。復湊派二百餘人。致令回子力不能支。各懷怨恨。實非意料所及。殊堪駭異。幸色提巴爾第。感激朕恩。念地方緊要。據實呈告。永貴即秉公參奏。其事始得敗露。徹底查辦。以肅法紀。而輯回民。若再遲一二。年不辦。安知不又有如烏什從前之事耶。今已將高樸。並慫慂附和之伊什罕伯克。阿布都舒庫爾等。審訊明確。均於彼處正法。並將

協同辦事之淑寶。及派往密爾岱山採玉之達三泰。瞻徇未奏之烏什。叅贊大臣綽克托等。亦俱交刑部治罪。其與高樸代赴蘇州販賣玉石之商人張鑒。趙鈞瑞。及高樸家人李福。常永。沈泰。均經查明解京嚴訊。從重辦理。以昭炯戒。並因色提巴爾第據實控告。賞給貝子職銜。永貴秉公叅奏。亦仍擢用尚書。又念回子等屢被擾累。甚為可憫。因將高樸所有派累之騰格。普爾令其於官項內動支。照數撥還。其派出採玉之回子三千餘人。所有明歲應輸錢糧。概行蠲免。今經此番整理。嗣後自無人復敢似此恣意妄行。第恐日久仍有負恩不法。如高樸及鄂對。阿布都舒庫爾者。尚不能保其不滋生事端。必須酌定章程。方可遵行永久。不致稍有流弊。因特降諭旨。將密爾岱山採玉之例。永行禁止。交色提巴爾第管理。以絕滋擾。又將葉爾羌和闐所採廢玉。停其變價。概行送京。以杜藉端冒濫。

之弊。此等事之緊要者。節經朕洞鑒酌定。其微細條例。必須相度地方情形。籌畫辦理。其應作何防範偷採玉石。不致擾累。俾回子等各安生理等事。已諭令永貴定議。俟其具奏到時。另降諭旨。外朕辦理庶務。一秉大公。惟視其人之自取。從不肯稍存成見。駐劄各回城辦事大臣官員。伯克等。果能仰體朕愛養回衆之至意。善為撫馭。於伊等應行輸納官賦之外。毫不多為派累。俾新疆回衆永享昇平。方不失滿洲體面。副朕恩眷。倘有肆行擾累。不知體恤撫育。恣意勒索。致令回子心存怨望。釀生事端。朕必重治其罪。斷不稍為寬宥。高樸即其榜樣也。近復諭令軍機大臣。將各城伯克。每日上衙門。及大臣接見伯克禮節。另行酌議。向後自不至復有往來交結之事。如將來衆伯克內。仍有如鄂對。及阿布都舒庫爾之營私作弊。該管大臣。能據實叅奏者。除訊明將該伯克從重治罪外。必將持正

之大臣。加以獎賞。若大臣中有如高樸之貪黷狼籍。斂怨於人。伯克等有能如色提巴爾第之據實告發者。一經審實。亦必將該伯克照色提巴爾第之格外施恩。將此傳諭各回城駐劄大臣官員。及伯克等。俾各凜遵奉行。○甲午。諭諸皇子及軍機大臣等。昨惇妃將伊宮內使喚女子。責處致斃。事屬駭見。爾等想應聞知。前此妃嬪內間有氣性不好。痛毆婢女。致令情急輕生者。雖為主位之人。不宜過於很虐。而死者究係窘迫自戕。然一經奏聞。無不量其情節懲治。從未有妃嬪將使女毒毆立斃之事。今惇妃此案。若不從重辦理。於情法未為平允。且不足使備位宮闈之人咸知警畏。況滿漢大臣官員。將家奴不依法決罰。毆責立斃者。皆係按其情事。分別議處。重則革職。輕則降調。定例森然。朕豈肯稍存歧視。惇妃即著降封為嬪。以示懲儆。並令妃嬪等嗣後當引以為戒。毋蹈覆轍。自干重戾。

朕辦理此事。準情酌理。惟協於公當。恐外間無識之徒。或有竊以為過重者。不知朕心已覺從寬。事關人命。其得罪本屬不輕。第念其曾育公主。故量從末減耳。若就案情而論。即將伊位號攢黜。亦豈得為過當乎。朕臨御四十三年以來。從不肯有溺愛徇情之事。爾眾皇子及眾大臣。皆所深知。即如惇嬪。平日受朕恩眷較優。今既有過犯。即不能復為曲宥。且不特此也。如大臣等辦理事務。今日有善即從而眷遇。明日有過。即予以訓飭。如其有心干犯私過。亦即嚴懲。禍福悉視其人之自取。絲毫不設成見。且不肯存某事必須某人辦理之心。如大學士鄂爾泰張廷玉大學士公傳恒。協辦大學士公兆惠。皆在左右襄贊機務。伊等既逝。未嘗無承辦政事之大臣。又如尚書張照。汪由敦。大學士梁詩正。劉綸。皆在內廷經理筆墨。伊等病歿。亦未嘗無接辦文墨之詞臣。此外皆可類推。若為人君不能

見及於此。何以撫馭天下。董率羣臣乎。此即為君難之一端也。諸皇子各有福晉格格。家庭之事。當法朕於宮闈。不稍溺愛。徇情。其下亦有官員太監。即可以小喻大。當法朕於臣工。不稍專恃偏護。家國一理。事可相通。諸皇子。可不知所遵守乎。至若縱性濫刑。虐毆奴婢。不但福晉格格等不宜有。即諸皇子亦當切戒。且如朕為天下主。掌生殺之權。從未嘗有任一時之氣。將閹豎輩立斃杖下。諸皇子

豈不知之。從前小太監胡世傑。如意等在朕前常有惹氣之事。不過予以薄懲。杖責二十。極多亦不過四十者。諸皇子當遵朕此諭。咸知效法。倘或管教不嚴。及自行任性毒毆。致死奴婢者。朕一有所聞。必不輕恕。所有惇嬪此案。本宮之首領太監郭進忠。劉良。獲罪甚重。著革去頂帶。並罰錢糧二年。其總管太監亦難辭咎。除桂元在奏事處。蕭雲鵬兼司茶膳房。每日在御前伺候。不能復至宮內稽查。

伊二人著免其議罪。其王成。王忠。王承義。鄭玉柱。趙德勝。專司內庭。今惇嬪毆斃使女。伊等不能豫為勸阻。所司何事。著各罰錢糧一年。但其事究因惇嬪波累。著將伊等應罰錢糧。於各名下扣罰一半。其一半亦著惇嬪代為繳完。所有毆斃之女子。並著惇嬪罰出銀一百兩。給其父母殮埋。此案雖係小事。朕一秉大公至正。與綜理庶務無異。亦可恍然咸喻朕意矣。將此旨交總管內務府大臣傳諭

內府諸人知之。並著繕錄一通。交尚書房。敬事房存記。令諸皇子共知警省。永遠遵奉。○諭軍機大臣等。前據高晉等奏。時和驛八堡。將次堵竣。因西壩陡然蟄塌。懇展限十二日趕辦。雖允所請。而心甚懸注。茲據奏。現在設法撈鑿水底。刷存柴土。使其一律平整。已補鑲十七丈。尚存口門十四丈五尺。惟有晝夜趕辦鑲做。不敢稍懈。至所開引河水。已源源下注。將來上游八堡之工。將次堵閉。則下游

之儀封引河。亦可相機開放。即當同時合龍等語。高晉等既為此奏。自必上緊籌辦。所喜冬至以後。連日天氣融和。豫省距京不遠。氣候自應相仿。施工當更為迅便。但時和驛。是否能照所展之限。於此月初十日合龍。儀封之工。是否亦同日竣事。奏內未經詳晰聲敘。朕心倍殷盼望。今日已初八。此旨發往。計該處應已合龍。佇待喜音。以慰廑念。至姚立德在豫。並無必不可離之事。而山東運河煞霸估挑。乃其專責。姚立德接奉此旨。著即速馳往山東。料理挑河諸務。不必在豫耽延。以致兩誤。將此由六百里傳諭知之。仍著高晉等。將合龍情形。由六百里加緊覆奏。○乙未。諭軍機大臣等。畢沅奏。於長安縣地方。拏獲趙金海。遣回之雇工黃虎兒。並起出衣服雜貨七十一箱。包訊據供稱。趙鈞瑞之子趙世保。并伊弟趙金海。在蘇置辦。令其押貨先行。趙金海尚在蘇州未回。并聽得伊等先令肅州

人牛四。帶玉石赴蘇。賣銀二萬餘兩。牛四現在揚州。梗子街寶玉行內等語。趙金海係趙鈞瑞之弟。且既在蘇置買物件。自必將玉石賣去。收回價銀。始能辦貨。亦係案內應行訊究之犯。現尚逗留在蘇。著傳諭楊魁。即速派委幹員。嚴密查拏。務獲。並將所有貨財查封。一面奏聞。一面派委妥員。管解來京。質訊。毋稍疎懈。其牛四一犯。既住揚州。梗子街寶玉行內。著伊齡阿。即速嚴緝。就獲。查追所賣玉價。全數起解。仍將該犯。派委妥員。押解來京。沿途小心防範。毋致疎誤。○丙申。諭據吳虎炳奏。署柳城縣事梧州府經歷譚應麒。先報該縣收成八分。及批司確查。即稟改實止七分。又忽報被旱八百餘村。臣因該縣不過八百餘村。如全縣被災。因何不早具稟。即飭委該道府等。親往各鄉確勘。所屬田禾。均已全行收割。並無歉收之象。出具勘不成災印結。該署縣亦自行稟請銷案。似此游移反覆。辦

事不實之員。請旨革職等語。譚應麒查辦該縣豐歉情形。並不覈實呈報。反覆更改。固有應得之咎。但朕自臨御以來。於有司玩視民瘼。從不肯因報災過重。加以處分。今若照吳虎炳所奏。將譚應麒革職。恐無知之徒。妄生揣度。致啟諱匿災傷之弊。於事甚有關係。譚應麒轉可毋庸置議。但須將該員徹回。另選妥員接署。至譚應麒辦事如此。其人之無能。可知。柳城本任知縣。係屬何人。因何委署。況

柳城在粵西。較為要缺。該撫理應遴選幹員署理。何得率以庸劣之人。令其承乏。且譚應麒於勘災情節。既屬支離。吳虎炳即應迅派大員。及早查出。因何俟桂林檄令藩司等往勘。並據實奏聞。該撫始為此奏塞責。殊屬不合。吳虎炳著交部議處。○又諭。據伊勒圖奏。稱總兵劉鑑。自到伊犁。管轄屯田綠營兵丁以來。實心辦理。屯務等語。劉鑑至伊犁。於屯田出力辦理。甚為可嘉。著施恩賞戴孔雀翎。

以示鼓勵。○諭軍機大臣等。昨據畢沅奏。拏獲趙金海。乃趙鈞瑞之弟。牛四亦伊等夥計。先後攜帶玉石赴蘇販賣。置辦貨物。均係高樸一案干涉之人。自應緝獲到案。訊究明確。歸案辦理。但現在應行拏究者。不過趙金海、牛四二人。伊等所有玉器貨財。理應查封入官。其從伊等轉售者。即不必查辦。波累。即如張鑾夥同李福。在蘇偷賣私玉。其在張鑾手內買去者。自應查明玉器大小。及作價若干。

照數追繳。並治以知情之罪。倘若經買去之人。另行轉售。即不必追求。應知此等大玉器。如如意。非賣給鹽商。即售與督撫。若徹底根查。究及督撫鹽商。尚復成何事體。況朕辦事。惟去其已甚。不為已甚。不肯使稍有株連。前降諭旨甚明。著傳諭楊魁。伊齡阿。辦理此事。當善體朕意。切勿張皇滋擾。○又諭。昨據畢沅奏。續獲商販玉石雷英等六人。訊明所帶玉石。係在哈密闢展。阿克蘇等處。有用銀陸

續收買者。有將貨物易換者。並非勾通高樸家人。通同販賣。現在咨查口外。照各犯所供得價賣玉。及給玉抵欠各銀數。一併追出解京等語。已諭令該撫。將玉石入官。人犯省釋矣。此等販玉牟利之人。既非與高樸家人通同偷賣。自可無庸另行治罪。止須將其玉石入官。亦足蔽辜。至伊等前在哈密等處零星收買。為數甚多。閱時又久。若輾轉根究。波累必多。朕辦事不為已甚。即如張鑾夥同李福。在蘇偷賣私玉。其在張鑾手內買去之人。自應查追。若復經轉售。即諭令毋庸究辦。朕於內地商人販賣玉器者。尚不使輾轉株連。況回疆各處。豈肯追究已往。致滋擾累乎。恐哈密等處。接到畢沅咨文。照供查辦。殊覺不成事體。著傳諭景福。伯忠。佛德。松齡等。將畢沅行查之案。毋庸辦理。如有已獲得價賣玉之人。亦即遵旨釋放。仍將辦理情形。迅即奏聞。其肅州等處。並著勒爾謹。遵照辦理。至畢沅

前此緝獲常永。訊供顛預草率。屢經傳諭訓飭。茲於供出口外賣玉之事。思欲稍蓋前愆。所辦又不免矯枉過正。殊屬非是。畢沅著傳旨申飭。○閩浙總督楊景素奏。閩省存局硝觔。不敷支發。前經奏明委員採辦。所有四十二年。及本年應辦硝二十五萬餘觔。現俱抵閩無誤。查委員在山東。向與產硝地方官。各半認買。恐不免折價短缺等弊。已咨令東省查禁。於辦足時。秤明觔兩。移咨覆覈。得旨嘉獎。○旌表守正被戕河南太康縣民張二妮妻李氏。○丁酉諭。本年湖北漢陽等各府屬。先被旱災。又因漢江盛漲被淹。災分較重。節經降旨。諭令該督撫等。加意撫卹。第念災後貧民。蓋藏鮮少。其補種之秋。收穫雜糧。收成亦屬有限。若銀米兼徵。民力不無拮据。著加恩將成災有漕之江夏。武昌。嘉魚。漢陽。黃陂。孝感。黃岡。潛江。天門。荊門。安陸。雲夢。應城。應山。江陵。公安。石首。監利。松滋。咸寧。蒲圻。大冶等

二十二州縣。本年應完漕糧正耗米石水腳及隨漕銀兩。均緩作兩年帶徵。至有漕之崇陽。通城。興國。沔陽。蘄水。羅田。蘄州。廣濟。黃梅。隨州等十州縣。雖未成災。但悉與災地環近。在本處既歉收食貴。而鄰境成災。應賑之民。皆仰資購食。又通山。當陽。二縣。雖係折徵銀兩。但需撥江夏等縣耗米。均宜藏富於民。以資接濟。並著加恩。將該十二州縣。應納漕糧正耗米石。及折漕銀兩。水腳隨漕等銀。同成災無漕。而有應徵隨漕淺船銀之黃安等縣。暨屯田分坐災地。應徵軍三安家閑丁等項。分解湖北。湖南之武昌。荊州等。各衛所銀兩。一體暫寬催納。亦緩至下年。一年帶徵。該督撫等。務宜董率各屬。實力妥辦。毋使吏胥從中滋弊。以副朕軫念災黎至意。該部即遵諭行。○諭軍機大臣等。據王亶望奏。浙江巡撫衙門。額設養廉銀一萬兩。諸事已敷用度。向因兼管鹽政。於引費項下。添有養廉銀四千

八百兩。及掣鹽路費。賞賚等項。公費銀五千兩。請一併裁減。撥充海塘經費等語。自應如此辦理。已批交該部知道矣。但歷任浙江巡撫。因兼管鹽政。養廉優厚。每將金珠鑲嵌之如意。陳設等項。附貢呈進。耗物力而適形其俗。朕所不喜。向來多不賞收。今該撫既奏裁鹽政養廉等項。更不必復為此無益之費。著傳諭該撫。嗣後務須遵旨妥辦。不得復以金珠鑲嵌器玩呈獻。○署湖北布政使按察使

福川奏。安陸府城外富民河淤塞。士民情願公捐疏濬。需銀一萬二千兩。工多費繁。請借項墊發。照隄工例。按畝帶徵。分兩年歸款。得旨。告之督撫。令其速行辦理。○旌表守正捐軀山東寧海州民修柱妻孫氏。○戊戌。諭本年輪蠲奉天等省地丁銀兩。又因臨幸盛京。降旨加恩。將奉天所屬乾隆四十四年。地丁正項錢糧。通行蠲免。其米豆一項。例不在應蠲之內。但念奉天省地丁。向係銀糧。並納其

額徵米豆。即屬仕土正供。自當普予加恩。著將乾隆四十三年。四十四年。該省應徵米豆。一體免徵。俾得均霑渥澤。該部即遵諭行。○戶部奏。出派金川各省兵丁。製辦衣履銀兩。請於本省未經出師之文武員弁。養廉內攤賠。得旨。此項辦送征兵衣履銀兩。戶部議在本省未經出師之文武員弁。酌量養廉多寡。分別攤賠歸款。固屬允協。第念此次平定金川大功告成。各省綠營官兵。均能奮勉出力。應予加恩優卹。且此項節次運送衣裝。均在乾隆三十七年。准予開銷恩旨之後。所有陝甘兩省。應完川省墊支夫價。米價。銀二十六萬兩。俱著加恩。准入軍需項下。作正開銷。其湖廣。雲貴等省。亦著一律開銷。○浙江巡撫王亶望疏報。仁和場乾隆四十二年分。開墾下則地一百畝有奇。○已亥。

聖祖仁皇帝忌辰。遣官祭

景陵。○

上詣

奉先殿。

壽皇殿行禮。○諭。本年豫省黃河漫口。儀封。考城。一帶。被災較重。業經降旨。於兩淮運庫撥銀一百萬兩。以為工賑之需。復命截留江西漕米。及本省新漕三十萬石。以備賑卹。第念該省災重之區。明春尚需加恩展賑。恐有不敷。著再撥戶部庫銀六十萬兩。速派妥員。解赴豫省。俾資接濟。該部即遵諭行。○庚子。調盛京禮部侍郎全魁。為盛京戶部侍郎。以內閣學士宗室玉鼎柱。為盛京禮部侍郎。○蠲免甘肅寧夏。寧朔。鹽茶。安化。合水。環縣。古浪等七廳州縣。乾隆四十二年雹水霜災地畝額賦有差。○旌表守正被戕山西河曲縣民李順妻鍾氏。○辛丑。諭軍機大臣曰。高晉等奏。儀工漫口。先行合龍。及時和驛八堡。近日辦理情形一摺。已於摺內批示矣。高晉等之意。因時和驛水深沙活。施工稍艱。而儀封溜

勢平緩。辦理較易。即派員赴該處堵閉合龍。固欲先完一工之意。但據稱彼處水勢。現已積高五尺。仍俟正河水勢再湧高一二尺。即將引河開放。暢達下注等語。自屬慎重辦理。但儀封距祥符不過百里。若必俟正河再高一二尺。始行開放引河。恐現在之水。向上湧長。更增時和驛八堡之勢。朕意以為儀封既已合龍。莫若即開放引河。引歸正溜。如儀封之溜。果能暢達下注。則時和驛八堡之水。不

實錄卷三十三

三

致湧積旁趨。施工自更較迅捷。將此由六百里加緊傳諭知之。仍將能否如此辦理。緣由迅即覆奏。如八堡已經合龍。即由六百里加緊馳奏。以慰廑念。○又諭曰。周元理奏。雲南委員陳朝書。連銅被竊一案。先經緝獲正犯來彬。丁三。二名。現據署天津府知府朱瀾稟稱。又拏獲正犯張五到案。查此案正犯三名。業俱拏獲。訊係來彬起意。質證相符。又續獲賣船之閻明。拉緯之丁六等。飭解來省嚴審。

等語。此案偷銅正犯該地方官。俱能迅速拏獲。辦理頗好。著交該督查明。記功一次。以示鼓勵。其獲犯之差役人等。亦著查明量加獎賞。並令該督。即將此案各犯。速行嚴審定擬。仍將未獲從犯一併拏獲。並所竊銅觔。全行起獲具奏。○又諭。據畢沅奏。拏獲趙鈞瑞之子趙世保。究出伊父同衛良弼。徐盛如等。合夥販玉。帶往南方貨賣。共有四起。約重四千餘觔。每起合夥人數多寡不一。各人所出本

實錄卷三十三

三

銀亦多寡不齊。玉石所賣銀兩。照股分收。共計賣出蘇平色銀一十四萬一千兩。除現在起獲趙世保貨物。及會票銀兩。照數查追外。其供出之同夥各人。分過銀數。約計十萬兩有零。自應一併追出。以警奸販等語。衛良弼等。與趙鈞瑞合夥販玉。赴蘇售賣。分得多金。均應緝獲。訊究其銀兩理應一併究追。除趙金海一犯。業經諭令楊魁查拏。牛四一犯。亦經傳諭伊齡阿查拏。至衛良弼等。亦應拏究。

著將趙世保開出清單。鈔寄勒爾謹。楊魁。巴延。即將衛良弼等拏獲到案。訊究伊等從前分得銀數。是否符合。速行查追解京。毋令絲毫漏匿。再本日訊據趙鈞瑞供稱。此項玉石。俱於四十一年二三月間。葉爾羌。因瑪興阿。雅德。俱有發賣官玉萬餘觔。所以陸續收買四千二百餘觔。俱經給有官票等語。著畢沅。查明伊所執官票。現在何處。並覈對與所供觔數。是否相符。至葉爾羌從前。何以有萬餘觔官玉發賣。雅德。瑪興阿。作何辦理。除就近詢問雅德外。并著傳諭永貴。併詢問瑪興阿。仍將此事詳悉查明。迅速覆奏。○刑部議奏。嗣後白役詐贓逼命之案。除將白役擬抵外。正役知情同行主使者。發黑龍江。給披甲人為奴。同行而無逼索者。杖一百。流三千里。未同行。亦未主使。而止分贓者。杖一百。徒三年。至並未分贓。及詐贓並未致斃命者。仍照私帶白役例。責革。加枷號兩個月。並交各

督撫飭令州縣。剔除白役。嚴行禁止。從之。○旌表守正捐軀山西崞縣民于金牛女于氏。

大清高宗法天隆運至誠先覺體元立極敷文奮武孝慈神聖純皇帝實錄卷之一千七十

大清高宗法天隆運至誠先覺體元立極敷文奮武孝慈神聖純皇帝實錄卷之一千七十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌十一月壬寅諭軍機大臣等昨據趙鈞瑞供稱乾隆四十年葉爾羌

因雅德瑪興阿俱有發賣官玉萬餘觔所以陸續收買四千二百餘觔俱經給有官票等語現諭永貴詳細查奏茲復詢據雅德稱四十年間採辦大玉除挑選進呈外其餘零碎平常玉塊於摺內聲明照例變價分給官兵認買尚未奉到硃批即奉調喀什噶爾所有葉爾羌官玉變價之事係瑪興阿淑寶接辦等語此項玉石雖經雅德奏明變價認買但

原定之價為數過輕若再照高樸所定之價出售則伊等漁利尤重更不成事體矣總之發賣官玉實開影射私玉之端從前所辦本屬未安而日久弊滋遂致高樸勾串官商賤私狼藉若此不可不徹底嚴懲至葉爾羌官兵與喀什噶爾阿克蘇無異勞逸亦同何以他處俱無獨葉爾羌酌賞亦未平允永貴前奏仍欲官為變價是未知去弊之根源也前已諭令永貴嗣後將官兵回子議給賞玉之處一併停止并諭知永貴將密爾岱山即行永遠封禁絲毫不許夾帶偷漏方為正本清源之道永貴深體朕意妥議行之至瑪興阿等從前辦理此事是否照所定官價發賣抑係輕價收買官玉重價發給商人從中牟利染指及雅德尚未經手即交給瑪興阿辦理之處是否確情并著永貴詳悉確查據實迅速覆奏所有軍機大臣詢問雅德奏片并著鈔寄永貴閱看○癸卯諭軍機大臣等據嚮

導處奏。乾隆四十五年春南巡。所有自京至浙江杭州府沿途水陸路程。繪圖進呈。請旨辦理等因。一摺。從前四次南巡。皆豫派嚮導。前往查勘。原因山東江南尚有行營數處。是以必須嚮導相度覈定。今春高晉國奏在京面請江南山東各添建行宮數處。以供憩息。俱已酌定地面。并稱現在各行宮均有移拆材料。足敷添用。不致多費。因允其所請。飭令勿事浮靡。是由京至江南登舟處陸程沿途俱有行宮。毋庸武備院備帶大營城分及糧廬等項。以省駝馱之煩。并不必復派嚮導前往。其沿途尖營。向日本有章程。只須酌量道路遠近安設。遠者設尖營兩處。若近在四十里以內者。止設尖營一處。均非難辦之事。各督撫自能經理裕如。著傳諭各督撫。將南巡蹕路所經一應橋梁道路尖營行宮。按站開明。總列一摺。並詳晰繪圖貼說呈進。其兩省交界之處。並須彼此照會。將何處行宮及何

道路。係何省何州縣所轄。明白聲敘。自可一目了然。又水程所安大營。上四次南巡江浙兩省久經辨熟。近年直隸山東間有於水營內備板房坐落數楹。朕因回鑾時天氣漸熱。且北方岸旁寬濶。尚可擴充。若江浙河岸窄狹。實無可容板房之處。且自登舟至回程。不過春末夏初。亦無取涼爽之所。斷不可做照山東直隸辦理。至山東水營舊料尚存。原不妨聽之。直隸并不必備水營也。其餘各省古蹟行宮。有由督撫承辦者。有由鹽政織造承辦者。均著一併開列清單。繪圖貼說呈進。總宜善體朕意。勿稍踵事增華。致耗物力。○又諭本日閱鶚元彙奏甄別六年俸滿千總止於摺內總敘。並未另行分款開單。殊屬不合。甄別員弁。乃每年照例彙奏之件。各督撫等俱係開列清單。將千總若干員。留任者幾員。勒休者幾員。分項詳列。便可一目了然。閱鶚元簡任巡撫數年。何於此等體例尚屬未知。

任意率畧若此。閔鶚元著傳旨申飭。仍著開列清單。另行具奏。○又諭。據索諾木策凌奏。查訊密賴里木。所控吐魯番郡王素賚瑞。向回人科斂銀兩。挑選幼女等情。種種屬實。素賚瑞肆意妄為。自應革去王爵審辦。但由彼處革其王爵。則似大臣等過於權重。著傳諭索諾木策凌。接奉此旨。即曉諭素賚瑞。言此事業經奏聞。交部辦理。將伊及所有應質人犯。派員解送來京。沿途密為防範。毋致疎脫。

○以奉天遼陽城守尉安臨為錦州副都統。○緩徵浙江歸安。烏程。長興。德清。仁和等五縣。本年霜災地畝額賦。○甲辰。

上御乾清門聽政。○諭軍機大臣等。本日據步軍統領衙門奏。湖北黃州府廣濟縣。已革監生劉經邦。呈控伊嫂張氏。與故夫族弟劉道高通姦。控縣不為審究。反將伊衣頂詳革。是以來京呈控等因。一摺。細閱原告劉經邦供詞。所稱張氏年已六旬有餘。而劉道高年止

三十。則其指為通姦之處。殊非情理所應有。且於該署縣是否得贓。袒護被告。又無指實。或係劉經邦。被該署縣審出誣控情節。因而逃匿來京。捏詞具控。亦未可知。但此事甚小。不值特派大臣往訊。已令刑部揀派明幹司官一員。押帶劉經邦。馳往湖北會同三寶。秉公查辦矣。至所供縣役陳皓等。向其稱說該署縣楊仁譽。係大學士于敏中外甥。能作威福。現今壽誕。何若送銀祝壽。可以早完此案。

因我不肯。遂將我詳革等語。楊仁譽如果有此事。即應查明究治。或係縣役招搖指撞。亦當訊實嚴究。至該署縣查審此案。因何不即完結。又該犯有要挾我嚴審治罪之供。劉經邦是否應行治罪。并著三寶會同刑部司員。一併審明。據實覆奏。三寶務須秉公查辦。不得稍有瞻徇。○以戶科給事中圖思義為內閣學士兼禮部侍郎。○乙巳。諭。前據浙江提督李杰龍。條奏烏鎗兼用鐵砂一摺。據稱。每

鎗裝藥二錢六分。大鐵砂六錢。仍加三錢重鉛子一顆。其準頭力量。仍與單放相同。若在六十弓以內。上靶愈多。力量愈大。一鎗可當數鎗之用。請飭各省通行等語。朕時臨幸盛京。於途次披閱奏章。即以所言不甚合理。蓋烏鎗朕自幼留心肄習。每於山莊用以獲鹿。其火藥鉛彈。配合催送之法。素所洞悉。素知鉛砂不可并用之一鎗中。但該提督既有此奏。不可不交部議。曾向軍機大臣面諭及之。

嗣據該部議覆時。大學士公阿桂留京辦事。暫兼兵部事務。議以二錢六分之藥。催發九錢重之鉛砂。與以一催二之成例不符。隨於健銳營內。擇施放烏鎗嫺熟之官員兵丁。照所奏演放。則百弓至八九十弓。全無著靶。自五六十弓至三四十弓。始間有飛砂著紙。亦不能穿透。隨經議駁。並恐該提督。或僅據屬員之言。即行入告。或該處官兵。另有別法。可致遠。行令該提督親加試驗。如果與原奏

符合。即將該處放鎗之弁兵內。擇一二人送京演試等語。此議覆摺。朕亦於行在批閱者。因復諭軍機大臣云。阿桂果能辦事。如此詢問。看李杰龍如何措辭。因諭令明白回奏。意該提督必以為誤信人言。自行引咎。本不得謂之大過。且提鎮奏辦烏鎗鉛砂。尚屬留心營務。并可置之不問。乃該提督覆奏。以為實係屢經親試。加砂實無礙鉛子之致遠。并派弁兵三名。攜帶鎗藥砂彈。赴部候試。朕隨令福隆安。奎林。監視演放。據奏。令送來弁兵施放於六十弓。設立牌靶。每放一鎗。看其鐵砂。於二三十弓外。多有落地者。連試數鎗。靶上只中有一砂。尚未入木。至鉛子均未中靶。與該提督所奏。迥不相同。請將李杰龍交部議處等語。朕意如此完結。李杰龍必尚有後言。且恐外間無識之徒。或疑福隆安等試驗。自然傳會阿桂等原議。并恐喜事生風。妄逞臆說者。甚以為李杰龍未經賄通兵部。故既駁

其條陳復抑其技藝。不特無以服李杰龍之心。且有為之抱屈者。其何以示公允。因親御紫光閣。令該弁兵面為試驗。則所放之鎗。與福隆安等所奏無異。衆目所共見。李杰龍實無從復行置喙矣。此事雖小。或以帝王不必親細務。則殊不然。事機之乘。每由小以致大。語云。涓涓不息。將成江河。古聖王所以有謹小慎微之戒也。況烏鎗乃軍火重器。本非不急之務。兵可百年不用。不可一日不備。若以此為小節而忽之。必如何方為切要之圖乎。朕臨御四十三年。事無鉅細。必躬必親。故得綱紀肅清。是非不紊。非好勞。亦不肯憚勞。此為君之所以難也。若明季諸君。狃於燕安之習。一切視為細故。諉之臣下。以致太阿下移。事歸權倖。朝臣又各持門戶。伐異黨同。遂使軍政邊防。日益墮廢。其君終惛然罔覺。因而潰敗難支。是以我

太祖

太宗得以乘時舉事。創成大業。設彼時為君者。能如朕之乾綱獨攬。諸事親裁。則非但勝國之社。未必遂墟。即遼瀋要區。豈能為我

祖宗克取乎。朕所以兢兢業業。雖小弗遺。不敢稍自暇逸者。實深有鑒於此也。至李杰龍尚屬可以辦事之人。而所見不免卑瑣。伊前任處州鎮時。曾奏烏鎗所用鉛子。不必拘定銷三撿七之成例。請盡給兵丁。實用實銷一摺。經該部議駁。朕並未加責備。此次所奏鉛砂並用。若伊自知錯誤。亦可不與處分。乃既輕信冒昧於前。又復飾詞迴護於後。而覆奏之摺。又涉於尚氣取巧。難勝提督之任。其浙江提督員缺。著劉鑑補授。李杰龍仍加恩以總兵銜。往伊犁代劉鑑管屯田事務。將此事始末明白宣示。通諭中外知之。○以雲南糧儲道海寧為甘肅按察使。○旌表守正捐軀江蘇豐縣民劉路妻張氏。○丙午諭曰。李杰龍著以總兵銜。管理屯田事務。浙江提督員缺。

已降旨令劉鑑補授。但劉鑑尚在伊犁。到任尚需時日。所有浙江提督印務。著李奉堯即赴浙江署理。其壽春鎮總兵員缺。著閔正祥前往暫署。○諭軍機大臣等。據永貴奏。審擬高樸一案。將達三泰擬以斬決。委員解京辦理一摺。已批交該部議奏矣。達三泰係該處辦事司員。乃敢恣意高樸。派累回人。開採玉石。串商牟利。伊即從中婪索多金。實屬助惡之尤。情節甚為可惡。伊與高樸之罪。雖斬決不足蔽辜。但律止於此。更難加重。然亦不值解京辦理。著傳諭勒爾謹。即派大員前往嘉峪關一帶。俟達三泰解至何處。即於該處將該犯正法。并將其屍骸拋棄野外。不准收殮。以示懲儆。○又諭曰。桑齋多爾濟諸事奮勉。矢心誠懇。今聞溘逝。深為軫惻。著派阿玉璽前往奠輿。仍賞銀五百兩。經理喪事。即著土謝圖汗車登多爾濟前往庫倫。協同博清額辦事。其尋常事件。令博清額掌欵。差大臣關

防。如遇給俄羅斯文移。著車登多爾濟列名在前。○定伯克等官謁見駐劄大臣儀注。軍機大臣議覆。嗣後回子伯克等。除回事外。定於每月朔望日。謁見駐劄大臣。尋常不准私謁。其相見儀注。伯克中兼公爵貝勒貝子者。大臣加禮貌。阿奇木。伊沙噶。及四五品伯克。初次謁見。請安。朔望及因公進署。不准叩頭。六品以下伯克。大臣初到。公謁准叩頭。常時不叩頭。土爾扈特王公貝子等。以常禮見。台吉以下。侍坐隨行。金川各土目。照屯練禮行。明正各土司。按其品級。照伯克禮行。從之。○大學士管雲貴總督李侍堯奏。南掌國王准第駕公滿之弟名翁。差目具稟。稱該國將屆貢期。恐道路阻滯。請委員商辦等語。查召翁在國擅權。該處不能相容。逃至猛天。常與交沙遊匪爭殺。今因該國貢期將屆。擅請委員往議。實為要約求援之地。當即批令鎮道傳諭召翁。將准第駕公滿現在何處。何以召翁

自稱南掌國王。出名具稟。據實呈報。得旨所辦是。知道了。摺內又稱。欲即檄詢准第駕公滿。未便令名翁之人帶去。另行遞發。又恐名翁窺探。批所慮是。○丁未。

上幸瀛臺。○諭曰。努三在內廷行走多年。甚屬勤慎。今聞溘逝。著加恩。派散秩大臣一員。侍衛十員。前往奠醊。并賞銀三百兩。經理喪事。其一切應得卹典。該部查例具奏。○又諭曰。桑齋多爾濟病故。伊瑩地均在京師。且聞其在時。有意欲來京之語。著加恩。賞給烏拉。將伊靈柩送京安厝。○諭軍機大臣曰。鄭大進奏。據祥符縣知縣楊暨。訪獲縣民劉我祿。藉鋪內刷賣。

聖諱實錄一書。刊有

廟諱御名。各依本字正體寫刻。殊屬不法。訊據劉我。及買板之李伯行等。僅供稱。乾隆二十一年間。馬均璧。將書板四塊。書簽一條。向劉我之祖劉振。當錢六百元。後因馬均璧病故。積

欠工銀。即將書板抵給。其買自何人。實不知情。惟閱書內有得於江右藩幕之語。似其書即起於江右。而著書姓名。及刊刻月日。并未開載。已密咨江西巡撫查究等語。此書雖以欲使人知所避諱為名。乃敢將

廟諱及朕御名。各依本字全體寫刊。不法已極。實與王錫侯字貫無異。自當根究刊著之人。按律治罪。雖李伯行等。訛係走腳為生。不通文義。即刷賣之劉我。亦不知此書來歷。但書內載有雍正年。得於江右藩幕之語。自無難查考。而知著傳諭郝碩。即速查明。彼時江西藩司。係屬何人。如何得有

諭旨。并所延幕友何人。此書確係何人著述。刊刻。逐一詳晰訪查確實。據實具奏。毋得稍存延緩諱飾。將此由五百里發往。鄭大進原摺。一併鈔寄閱看。仍著郝碩查明。由驛覆奏。并諭鄭大進知之。至此書恐有流傳各省者。并著傳諭各督撫實力確查。解京銷燬。不得僅

以具文塞責。尋郝碩奏查書內

諭旨。係雍正三四年間頒發。其時江西藩司係

丁士一。幕友無檔可查。俟飛咨山東巡撫傳

訊丁士一子孫。確查另奏報聞。○又諭昨據

德福奏稱。錦州協領富伸保。錦縣知縣雅爾

善。於各處商船內。大船每隻索銀十六兩。小

船每隻索銀十兩。以臨幸辦差為名。稱係將

軍弘晌交辦。計船九百餘隻。共湊銀一萬四

千兩零。顯係該協領等指稱詐索。請將富伸

保。雅爾善。解京交部。審明治罪等因。一摺。此

事殊堪駭異。已令福隆安馳驛前往。徹底根

究。嚴密查辦矣。因思錦州一帶商船。載運赴

天津者必多。該協領知縣等。如果有藉端科

派情事。各船自必眾口共傳。畧一詢訪。即可

得其大概。況明興平日。尚屬能事之人。此案

又與直隸無涉。更無難一訪而得。著傳諭明

興。即就各船。體訪錦州文武。勒派情形。若何

伊等曾出銀若干。據實覆奏。勿稍存瞻徇捏

飾之心。致干咎戾。○以散秩大臣弘晷為內

大臣。○旌表守正捐軀陝西藍屋縣民馬某

妻羅氏。○戊申。諭軍機大臣等。據桂林等奏

查勘廣西桂林等屬被災情形一摺。已屢經

傳諭。其署柳城縣譚應麒。止須撤回另換。毋

庸置議。亦經明降諭旨。該督等自可遵照辦

理矣。至永福等五州縣。被旱田畝。雖不過一

隅偏災。恐貧民究不免拮据。或有應行酌借

接濟之處。該督撫。照例妥協辦理。仍董飭所

屬。實力妥辦。務使閭閻均霑實惠。○又諭。連

日盼望合龍之信甚切。茲據高晉等奏。時和

驛八堡下埽。至十六日。僅存口門三丈九尺。

意謂十七日。準可合龍。乃西壩忽又裂縫。溜

從埽底翻花。帶動門埽。塌去六丈。現在設法

籌辦等語。已於摺內詳悉批示矣。時和驛工

程。每次將屆合龍。屢有蟄裂之事。固由沙活

水深所致。究係其地不宜施工。朕前閱高晉

等進到圖樣。即以該處現築壩臺。不近隄根。

無可倚靠。又不將外隄缺口辨及。亦未周妥。曾於圖內。用硃筆標識。詢問高晉等。妥籌。伊等覆奏。以為無患。今屢築不就。自不得不改弦更張。現據高晉等奏。擬將兩壩上水頭幫寬。另由外越進埽。可期鑲壓到底等語。較現在施工之處。似較妥協。自應將擬辦情形。繪圖呈覽。朕亦得就圖指示。著傳諭高晉等。一面趕做。一面詳悉繪圖貼說。迅速呈進。但既改由外越進埽。自不免畧需時日。高晉等務

須董率諸練將備等。上緊如法堅做。仍約計何日可以合龍之處。即行具奏。以慰懸念。此旨著由六百里加緊發往。仍著由驛覆奏。如已合龍。即由六百里加緊覆奏。○旌表守正捐軀江蘇山陽縣民陶順遠女陶氏。河南唐縣民白士雅妻趙氏。○已酉。

上辛瀛臺。○庚戌。諭。據金簡等奏。查辦盛京銀庫虧短銀兩一事。所有案內應行審究之掌關防郎中藝倫。副關防已陞刑部員外郎拉

薩禮。前任司庫。已陞大理寺評事。傳通。現在京城。又庫使億齡。百祿。亦因請領餉來京。俱著革職。交兵部派員。分別押解前往。交金簡等。嚴審定擬具奏。○諭軍機大臣等。現有面詢伊齡阿之事。著該鹽政。即起程迅速來京。陛見。務於歲內到京。其鹽政印務。照例交運使朱孝純護理。○又諭。據兵部奏。川省補製額設礮位一案。其交存打箭鑪礮八十七位。從前被水衝失。現在則獲未及三分之一。且

此項鐵質尚新。即遭水衝。何致全行損壞。飭交該督。詳查實在情形。覆奏一摺。已依議行矣。此項礮位。新鑄者多。雖被水一衝。亦不應全行損壞。不堪應用。至於鐵質甚重。即大水亦不能衝其遠去。況據稱碩石堆累之下。刨獲二十三位。則其餘未獲礮位。安知不并埋於碩石之下。自應飭令所屬。督率兵役。上緊打撈。務須多獲。不得任外省習氣。憚勞避事。著傳諭文綬。即速委員。實力妥辦。毋稍疎懈。

仍將如何辦理緣由。先行據實覆奏。將此由四百里傳諭知之。所有兵部原摺並著鈔寄文綬閱看。尋奏嚴飭兵弁打撈。又於下流水石內挖獲沉壓礮三位得旨覽。又批足見以前未實力。○又諭戶部議覆李侍堯等奏滇省裁減鑪座。撙節銅觔。並查明各銅廠鑪欠分別著賠二摺。已依議行矣。滇省銅觔關係甚大。近年來因所產不敷所用。督撫等紛紛條奏。無非挖肉補瘡之見。遷就因循。迄無善策。該部議覆亦未實有定見。不過依樣葫蘆。年復一年。積疲日甚。長此安窮。朕洞悉其情。若非改絃更張。斷難行之久遠。今年李侍堯來京。以其素能辦事。又非沽名市惠之人。可以擔當辦理。是以諭令悉心籌畫。據實覆奏。候朕酌量定奪。勿稍游移。復至日後棘手。此實朕正本清源之至意也。今李侍堯等於減鑪一項。未能將各省歲需銅。實係若干。籌酌減鑪勻湊。俾此後各省採買之銅。每歲總無

虧短。自應查照部議。妥協籌辦。以期永遠遵行。至廠欠一項。朕前旨。原令查明舊欠有著者。即勒限追繳。其無著者若干。據實奏聞。朕不難加恩寬免。原欲將舊案覈實清理。使將來新案。年清年款。不復絲毫欠缺。以杜挪抵彌縫之弊。計無逾於此者。今李侍堯等所奏。仍未能善體朕意。如將有著無著之項。概令攤賠。仍不脫從前陋習。試問承追以來。已完若干。是名為追賠。不過紙上空談。有名無實。又復何裨於事。若牽涉現任之員。即按限畧完。更不免挪新掩舊。將見舊欠未淨。新欠又增。積弊伊於何底。至令現在上司等攤賠。尤未平允。即如彰寶錢度。久已查抄家產。無可著追。若將二人名下應賠之項。又攤派現任之李侍堯。裴宗錫。名下代賠。伊等何辜。為其代完賠項。於事理亦未允協。其餘皆可類推。若此次查辦。仍不能徹底清釐。截然不紊。則李侍堯不得謂之能辦事矣。著傳諭李侍

堯等將舊有厥欠之項詳悉覈查其有著者若干即將鑪戶勒追如逾限不交查明家產抵補未完之項即於經手原放之員名下著追無論現任在籍亦俱勒限追繳如不能完即將家貲田產查封抵補庶不敢遲迴觀望其從前實係無著之項查明若干即據實開單奏明候朕覈定降旨豁免此後新案務須年清年款毋許絲毫拖欠如仍前牽混該督撫即行查叅若稍瞻徇袒庇惟該督撫是問

書漢書三十一

五

即著賠亦所應當朕此次清釐專在剔除積弊即或應免無著之項稍多亦所不惜李侍堯不得存帑項為重之心畏首畏尾復涉含糊致負朕諄切訓諭之意也將此由六百里傳諭知之戶部原摺并發仍著即行妥議由驛覆奏○辛亥

上詣

慈寧宮行禮○諭據索諾木策凌等奏哈密蔡把什湖種地兵丁遣犯收糧在十八石以上

與敘賞之例相符等語所有蔡把什湖之管屯管遣犯各員弁著交部議敘兵丁遣犯賞給一月口糧○又諭據索諾木策凌奏瑪納斯左右二營庫爾喀喇烏蘇晶河并提標中右二營濟木薩營巴里坤營種地兵丁每名收穫細糧均在十五石以上古城穆壘營種地兵丁每名收穫細糧在十八石以上又瑪納斯左右二營提標中左營庫爾喀喇烏蘇晶河種地遣犯每名收穫細糧均在六石六斗以上巴里坤種地遣犯每名收穫細糧在十五石以上均與議敘給賞之例相符等語所有瑪納斯等處管屯官弁及管遣犯官弁俱著交部議敘兵丁賞給一月鹽菜銀兩遣犯分別賞給麵觔○又諭嗣後派往西北兩路回城及藏內辦事各弁兵賞借銀兩祇准按照品級借給一年俸餉著為令○增建直隸新城縣白溝河倉廩二十間從總督周元理請也○壬子

書漢書三十一

五

上詣

大高殿行禮。○諭軍機大臣等。戶部奏江蘇省報銷常平倉穀案內有漏報開除及重複開造各款。請交兩江總督徹底清查一摺。已依議行矣。據稱陽山等六縣。乾隆七年至二十四年。查有另案支銷穀石。漏報開除者六款。又新收項下。重複開造者三款。通共穀三萬四千餘石。請於此次奏銷。補行開除等語。此項穀石為數不少。節年奏銷。俱彙入實存項下。若果係倉貯所有。何此時乃欲徹出開除。若並未實貯在倉。則每年憑何結報無虧。今事隔數十餘年。忽行查款開除。其中自不免有虧缺挪移情弊。即各款果無虛捏。而歷任承辦各員。因何聽其遷延至今。始行查改。足見外省吏治不堪矣。高晉楊魁。現任督撫。即薩載亦任江蘇巡撫多年。均有稽查之責。因何不及早奏明。據實覈辦。其咎亦屬難辭。著將戶部原摺及朕折角處。發交高晉等閱看。

令其明白回奏。并著該督等。遴派誠幹大員。照朕折角處情節。及戶部指駁各條。徹底清查。分別真偽。即據實在情形。具摺覆奏。毋稍袒徇干咎。○癸丑。大學士九卿等議奏。徐述夔編造悖逆詩句一案。應照例將各犯。分別戮屍斬決。得旨。逆犯徐述夔。徐懷祖。俱著照議戮屍。即派乾清門侍衛阿彌達。馳驛前往東臺縣。會同該撫楊魁。監視辦理。其沈德潛墓所。應行撲毀之祭葬碑文。并著阿彌達。前往蘇州。會同該撫。監看磨毀字跡。并將其石移棄他處。以昭炯戒。至徐述夔之孫徐食田。徐食書。及列名校對之徐首髮。沈成濯。并陶易之幕友陸炎。俱著從寬改為應斬監候。秋後處決。○又諭。本日大學士九卿具奏。定擬逆犯徐述夔等一案。已將各犯應得之罪。分別降旨矣。至據稱查出徐述夔之傳。係沈德潛所作。請將沈德潛從前所有宮銜謚典。盡行革去。其鄉賢祠內牌位。一併撤出。及賜祭

葬碑文。查明撲毀等語。實屬罪所應得。逆犯徐述夔。身係舉人。且自其高曾以來。均在本朝食毛踐土。厚澤涵濡。乃於所作一柱樓詩。各種敢於妄肆詆譏。狂誕悖逆。實為覆載所不容。至其詩內懷想勝朝之語。無非藉以為名。不可信以為實。即以前明政事而論。並無可以動民繫戀者。如洪武開基。嚴刑峻罰。永樂篡逆。瓜蔓抄誅。士民無不含怨。又如洪武因蘇松嘉湖各府。為張士誠固守。遷怒及民。浮糧加重。寢至末季。徵歛日增。累及天下。民多愁苦嗟怨。此皆見於史冊者。有何可以繫感之處。而追念不忘乎。至我本朝。

列聖相承。愛養百姓。賑災蠲緩。厚澤頻施。而江浙浮糧之額。節經裁減。以除民害。朕踐阼至今四十三年。普免天下錢糧三次。普免漕糧二次。其他災賑之需。動輒數百萬。窮簷疾苦。疊沛恩膏。小民具有天良。豈有不知感戴。轉屬念於前朝。全無恩德及民者。

之理。此不過抑鬱無聊之人。自揣毫無進路。遁而為此。與匹夫匹婦之自經溝壑無異。而讀書失志之徒。遂託言懷想前朝。以為萬一敗露。猶可藉以立名。肺腑真可洞鑒。此等鬼蜮伎倆。豈能匿於光天化日之下。若無知者。以此輩為真有追懷故國之思。轉為若輩所愚矣。至伊子徐懷祖。敢將伊父逆詞。公然刊刻。均屬罪大惡極。乃沈德潛所作傳內。稱其一柱樓編年詩已付梓。并云品行文章皆可。

法。是沈德潛於徐述夔所作悖逆不法詩句。皆曾閱看。並不切齒痛恨。轉欲為之記述流傳。尚得謂稍有人心者乎。又伊傳內稱徐述夔之從弟賡武。安雅大辟。閱十七月而冤雪之語。因命薩載等查閱原案。則係乾隆元年。有泰州民繆照乘。與繆又南之妻蔣氏通姦。商同勒死親夫。蔣氏因曾被徐賡武刁姦。懷恨。是以到案。供指徐賡武同謀。後經審出實情。擬以枷杖完結。徐賡武刁姦婦女。本屬有

罪之人。沈德潛轉為之論敘。稱冤身為大臣。不應顛倒是非。若此。沈德潛自中式進士。及選入翰林時。朕因聞其平日學問尚好。格外施恩。又念其留心詩學。且憐其晚成。是以不數年間。即擢為卿貳。又令在尚書房行走。而伊自服官以來。不過旅進旅退。毫無建白。並未為國家絲毫出力。眾所共知。及乞休後。復賞給尚書銜。晉階太子太傅。並予在籍食俸。恩施至為優渥。沈德潛理宜飭躬安分。謹慎自持。乃竟敢視悖逆為泛常。為之揄揚頌美。實屬昧良負恩。且伊為徐述夔作傳。自係貪圖潤筆。為囊橐計。其卑污無恥。尤為玷辱搢紳。使其身尚在。雖不至與徐述夔同科。亦當重治其罪。令伊業已身故。不加深究。然竟置而不論。俾其身後。仍得永受恩榮。則凡在籍朝紳。又將何所警惕乎。著照所請。將沈德潛所有官爵。及宮銜謚典。盡行革去。其鄉賢祠牌位。亦一併撤出。所賜祭墓碑文。現派阿彌

達前往。會同楊魁。查明撲毀。以昭炯戒。將此通諭中外知之。○又諭曰。錦州協領富伸保等。科斂船戶銀兩一案。弘昫應解任質審。所遺盛京將軍。著福康安調補。吉林將軍。著和隆武調補。福康安接奉此旨。即赴盛京將軍之任。若前案未經完結。福康安即會同金簡審辦。○諭軍機大臣等。據福隆安奏。廿四日馳抵錦州。傳集協領富伸保等訊供。已據稱。總局協領托恩多。七十。曾向說令其幫助。他處亦俱如此。遂與知縣雅爾善商。令向鋪戶及貨船湊解萬餘兩。並非將軍弘昫面交。想來亦無不知等語。其事已屬有據。實大奇事。朕看弘昫平日辦事。頗為結實。其在盛京。亦甚體面。方以為將軍得人。并可經久任用。昨德福奏至。朕尚疑信參半。連日心緒為之不懌。今福隆安甫至錦州。即查有端緒。雖其中詳細。尚須拘眾研訊。而大局已定。弘昫即難辭咎。殊出朕意料之外。如此。尚用何法以

觀人乎。朕亦不能自信矣。但事已至此。不得不徹底根究。並不能因其係近派宗室。及平日能事之故。稍為姑容。已另降清字諭旨。將弘昫解任。交福隆安會同金蘭。秉公嚴訊。辦理。並有旨將福康安調補盛京將軍。和隆武調補吉林將軍。並諭令福康安即馳驛速赴新任。如福康安到盛京時。此案尚未審結。即著會同福隆安一併查審。至雅爾善所供。湊銀一萬兩。除送盛京六千兩外。餘四千兩。是

因公用了。俱有帳目可查等語。此四千兩。既稱有帳可查。即應查其何項公事用銀若干。是否符合。伊等有無從中染指。逐一查明。覈實。方可憑以定罪。其所交盛京銀六千兩。亦當查明何項用銀若干。務令水落石出。分別辦公入已。據實確查。方成信識。又據富伸保供。他處俱如此辦理。自屬實情。福隆安等。務將各處詳悉查明。一體訊辦。勿使稍有匿飾隱漏。至朕此次巡幸盛京。非若前兩次行圍

宴賚可比。該將軍等。並無糜費之處。何至派及鋪戶貨船。即或該將軍。有私行應酬。餽送禮物之事。亦應伊自行解囊。朕所賞銀五千兩。儘足敷用。何至藉端派累。且朕在盛京。曾將辦差有無料派。面詢弘昫數次。伊皆奏稱。並無絲毫料派。今既有此情弊。朕面詢時。何不據實奏明。尚敢心存欺飾乎。著福隆安等。將此一節。切訊弘昫。令其據實供明。勿再涉欺罔。致干重戾。又弘昫曾叅奏德福。案情甚

輕。而勘語甚重。似弘昫彼時。已知德福欲舉發此事。故為過甚其詞。冀朕或將德福加罪。或將其調開。則伊等派銀之案。可以不致敗露。若弘昫居心如此。則是敢於取巧彌縫。其罪更重。亦著福隆安等。將此一節。詳切訊明。覆奏。至各船派銀一事。朕以該處船隻。往天津貿易者多。無難訪問得實。已傳諭天津道明興。查明覆奏。似亦可得其底裏。茲據明興奏稱。商人赴錦縣。糴買雜糧船隻。載運至津。

俱泊海河一帶。即密飭天津縣李汝琬前往查傳由錦縣回津之商人楊釗等二人。又坐商馮廷元等六人。隔別查訊。據供。本年六月間。有兩處馬頭開行之蘭耀章。孫勝一等。聲稱錦縣與協領。以辨差為名。每一照票。索銀二十四兩。各商始猶觀望。至閏六月初。恐誤進口售賣之期。公議每大船一隻。出銀十六兩。小船一隻。出銀十兩。交該處各行家收送。凡天津商船。俱照數交出。方能得票開船。眾供如一。惟按船覈計。尚不及所索之數。據供。該處馬頭。尚有江南。山東。福建。廣東。等省貨船。是以銀數不符等語。更為確鑿。可據。著將明興原摺。及供單。鈔寄福隆安等閱看。查明供內應訊之人。即行傳集到案。訊問確情。與富伸保。雅爾善。質對明確。據實具奏。又據金簡奏。銀庫虧缺銀兩一案。又究出庫丁楊國宗等。陸續偷銀。並分給庫使那親等弊。擬仍先回盛京辦理等語。現在福隆安。因盛京科

斂之案。馳赴該處查辦。所有銀庫一案。亦著福隆安會同金簡等。一併查審。此旨。著由六百里加緊發往。仍將查訊情節。由驛加緊覆奏。○甲寅。

上幸瀛臺。○諭曰。鄂勒哲依鄂羅什。呼在乾清門効力多年。今聞溘逝。殊堪憫惻。著加恩賞銀一百兩。經理喪事。其厄魯特總管員缺。著阿布什補授。阿布什所遺翼長員缺。著們都補授。○諭軍機大臣等。昨據福隆安奏。查訊

錦州科派一案。協領富伸保。知縣雅爾善。俱已供認。而天津道明興覆奏。傳喚自錦州來津各船。訊得大小船隻出銀之數。尤為確鑿。已諭令福隆安等。詳悉查訊矣。至船戶等所供。尚有江南。山東。福建。廣東。各省貨船等語。此等客船。自皆往他處運販。未必尚在錦州。而馬頭俱有開行之人。一經拘喚。無難得實。著福隆安等。即速喚齊。確切查訊。務得實情。仍覈計所派之數。與富伸保所稱湊銀一萬

餘兩原供。是否相符。悉心覈實。勿令稍有支飾。又富伸保等供。並有向鋪戶湊銀之事。因思鹽當商。及大小鋪戶。各處皆有。錦州如此。他處可知。並著福隆安等。將各處逐一確查。毋使遁飾漏網。至所派之數。務令經手承辦之員。逐條開出。何項公事。用銀若干。不許絲毫欺罔。其無項可開者。即該員藉端中飽。無疑。各城派項。俱令如此畫一開明。其為辦公入已。更屬截然不紊。自不能稍有牽混。又如

所供送盛京銀六千兩。仍應訊之富伸保等。其銀如係交總局查收。即應嚴訊總局協領托恩多。七十。將此項銀兩。辦何公事。動用若干。據實開出。其用有餘剩者。或仍存總局。或交將軍弘昫查收。弘昫曾否與伊等。將所用銀數覈算。至錦州一城。已有六千兩。其餘各城。交盛京者。各有若干。並著托恩多等。一例開明。則弘昫之有無染指底裏。畢露。更不能稍為諉卸矣。又近據弘昫。富察善等會奏。

開原等十四城修道旗夫呈稱。伊等世受撫育之恩。非民夫可比。且自十九年東巡後。迄今已逾二十餘年。畧盡微忱。効力道路。分所當為。茲又蒙恩免地糧一半。何敢以分所當盡之差。冒領工價。茲據承德等十二州縣修道民夫呈稱。身等雖係民籍。安居奉省。霑沐皇恩。今逾二十餘載。駕臨一次。修理道路。均係樂効。況既蒙恩蠲免賦課。今復蒙格外仁慈。降旨給價。情難自安。亦不敢領夫價各等語。修理道路。所費本屬無多。而該處旗民。以相隔二十餘年。辦差一次。分所當然。且又蒙恩蠲免。不敢復領夫價。其急公奉上。均出誠心。深有合於執役子來之義。自可俯如所請。已交部議奏矣。此項夫價。既經弘昫等奏明。旗夫民夫。均不敢支領。則伊等料派銀兩。自不便復指此項開銷。而除此一項。又更有何煩費。必須斂銀貼辦。其故殊不可解。福隆安等。即當就此情節。確切嚴訊。務得實情。先行

具奏。仍將應查各處之事。詳細確查。毋稍疎漏。將此由六百里加緊傳諭知之。仍即將訊得實情。迅行由驛加緊覆奏。○兵部議准。熱河副都統恒秀奏。嗣後熱河。古北口。佐領防禦等缺。先儘本翼人員送補。如不得人。准於左右兩翼內揀選。擬定正陪保送。從之。○補行吉林乾隆四十二年軍政卓異官三員。罷軟官一員。年老官十四員。才力不及官五員。分別議敘處分如例。○以山海關副都統扎什扎木素。為寧夏將軍。原任黑龍江副都統都爾嘉。為山海關副都統。○乙卯。諭軍機大臣等。近日盼望合龍。晝夜懸切。昨據高晉等奏。時和驛八堡進埽情形。并繪圖呈進。已於圖內。用硃筆標識批示矣。今思口門愈窄。河底愈深。溜勢愈急。若僅照常式進埽。顯與水爭。自不免費時勞力。何不將西壩之埽。酌收向東。東壩之埽。酌展向西。使為兜袖之勢。則急溜至此。或成迴溜。合龍自應較易。因於做

存圖樣內。用硃筆標記。圈出即可合龍之處。著發交高晉等閱看。如此旨到時。已經合龍固佳。否則照朕標記之圖。悉心妥酌為之。又今年八月間。偶憶衷曰。修曾言。下埽漸近中泓。頗難著力。遂每埽繫以大鐵錨八隻。便可直墜到底。其說似為近理。曾傳詢高晉等。是否可行。旋據高晉等覆奏。從前下埽。原有用錨之說。非特多費。抑且耽延時日。近年堵築。總不用錨。且河工諺語云。下埽無法。全憑土壓。故每埽惟用繩橛鈎絆。埽既下水。即用層土層柴追壓。自然到底。高晉屢次堵築漫口。皆如此辦理等語。朕以高晉於河工堵築機宜。最為熟練。所言自屬可信。遂聽其辦理。乃時和驛八堡工程。於將屆合龍時。屢有墊塌之事。自係所下之埽。根腳不堅。以致合龍期日屢展。耽延不為不久。且昨日奏到之摺云。金門水深七丈以上。一埽落水。隨即加鑲。一晝夜尚未到底等語。可見層土層柴追壓。亦

不能實在得力。今口門不及十丈。需埽無多。而溜緊底深。急切不能到底。或可做每埽用大鐵錨八隻。墜下之法。鐵性沉重。著底較易。且蛟龍畏鐵。古人治水多用之。而所存口門不寬。為費亦甚有限。姑試為之。似亦有益。無損。此旨到時。如已經合龍。自屬甚善。若尚未得手。即將圖內所指東西兜袖。及鐵錨墜埽之法。迅速酌行。朕辦事從無成見。高晉等自亦不迴護前說。惟佇盼合龍喜信。以慰廑念。

將此由六百里加緊傳諭知之。若已合龍。亦速加緊覆奏。○丙辰。

上詣

大高殿行禮。○諭。刑部議。吳雲章活埋小功堂姪吳狗狸一案。以吳雲章律應擬絞監候。因年逾八十。照律聲請收贖。此固按律也。而於情理未為允協。族中卑幼為匪。如果肆竊異族財物。貽害鄉鄰。有傷合族顏面。為尊長者管教不從。激於公忿。因而致死。情自可原。或

其人年逾八旬。亦可按律收贖。今細閱此案。吳狗狸曾竊吳雲章家衣被。又曾竊吳應元家工人棉被。聞喊攜賊而逸。經吳應元。吳應文。尋獲。用草繩反縛其手。拴繫堂柱。報知吳雲章。走至訓斥。欲俟次早送官。吳狗狸聞言。混罵。并稱官府不過枷責。將來回家。必將吳雲章。吳應元。吳應文。三人殺害。并放火洩忿。吳雲章。恐日後反遭毒手。主令吳應元。吳應文。將吳狗狸活埋除害等語。是吳雲章等之致死吳狗狸。並非為除族中竊匪之公心。實係欲免己家受禍之私見。情事顯然。不應置之不論。且吳雲章。係吳狗狸小功堂叔。吳應元。吳應文。亦係吳狗狸總麻服叔。若以睦婣任卹之道而論。均為瞻族所應及。如果吳雲章等。於其姪時相周濟。何致吳狗狸行竊其家。所以同族相盜。較盜取他人者。罪得稍減。亦此意也。乃刑部於此案。將主使之吳雲章。既以年老收贖。其聽從下手之吳應元等。又

僅照為從擬流。是吳狗狸之死。竟無一實在擬抵之人。豈為公當。且吳狗狸雖下流不堪。其罪不至於死。而登時活埋。情殊慘忍。即謂吳雲章律應收贖。亦應於吳應元。吳應文。二人內。擇其情節稍重者。擬以絞候。然此等至秋審時。罪原不至予勾。何不律以死者有抵庶可杜擅殺之端。兼足維敦睦之誼。今刑部如此議覆。豈得為讞獄之平。著將此本發還刑部等衙門。另行定擬具奏。並將此通諭知

通鑑卷一百一十一

一〇七二

之。○旌表守正捐軀四川梓潼縣民吳興女吳氏。○是月。署兩江總督江南河道總督薩載等奏。鎮洋縣境內劉河。為太湖下游。藉資宣洩。現在河身淤淺。應自該處西陳門涇上頭起。至王家港止。興工疏濬。照例借帑估挑。於沿河民田。分年攤徵歸款。報聞。○江西巡撫郝碩奏。撫標左右兩營。礮手七十二名。鎗手二百八十八名。向例分隊操演。查同城南昌鎮兵。礮手俱兼鎗手。不應兩歧。請嗣後撫

標礮隊。均令兼習鳥鎗。報聞。○閩浙總督楊景素等奏。浙西杭嘉湖三府。米價稍昂。應酌撥閩省臺灣倉穀。招商運糶。現值北風盛發。臺穀難運。請先於福州。興化。泉州。福寧等府屬。撥穀十萬石。令浙商糶運。仍於臺灣府倉內。撥穀還補。得旨嘉獎。○山西巡撫覺羅巴延三奏。河東增復鹽價。已屆三年限滿。例應刪減。查現在場價腳費。較前俱昂。商力未能驟復。請將每觔增復二釐鹽價。再予展限三年。下部知之。○陝甘總督勒爾謹奏。伊犁改設眷兵。奏准調撥安西。沙州。巴里坤。兵一千名。查該三處存兵。不敷派調。酌於甘州。涼州。西寧。肅州。各派兵二百。巴里坤。派兵一百。沙州等十一營。派兵一百。支給口糧前往。報聞。

通鑑卷一百一十一

四

大清高宗法天隆運至誠先覺體元立極敷文  
奮武孝慈神聖純皇帝實錄卷之一千七十一

里

大清高宗法天隆運至誠先覺體元立極敷文  
奮武孝慈神聖純皇帝實錄卷之一千七十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌十二月丁巳朔諭前經

降旨允江浙所請於乾隆四十五年正月啟

鑒南巡因江蘇辦理差務不無經費已有旨

令伊齡阿於運庫內賞給銀三十萬兩以為

南巡差務之用矣第念浙江水營行宮等事

雖少於江蘇地面然一切差務亦資費用自

宜一體加恩著於鹽項餘銀內賞給十萬兩

以為浙省辦差之用該督撫務須董率所屬

妥協經理毋得絲毫派累民間致滋紛擾以

副朕孚惠於民至意○諭軍機大臣等勒爾

謹奏。捐納衛千總路悅書呈請改補營缺。謹據情轉奏等語。所奏不可行。守備千總分別營衛定例昭然。即如武科之進士舉人。分別營衛。俱特派王大臣考驗。以優等者用營缺。次等者用衛缺。最為慎重。蓋因營缺事繁。衛缺事簡。就其材技以為衡。從無以衛缺懇改營缺之例。今路悅書所懇。不過因衛缺少而營缺多。希圖速用。此端一開。適啟取巧倖進之捷徑。勒爾謹乃不嚴行飭駁。轉代為奏請。甚屬不合。著傳諭嚴行申飭。○豁免遭風沉溺之雲南省運京銅五萬一千五百四十觔有奇。○戊午。

上御乾清門聽政。○諭軍機大臣等。昨據福隆安奏。馳抵盛京。審訊大概情形一摺。已於摺內詳悉批示。仍由驛發往矣。但據弘昫所供情節。俱不足信。自係福隆安初至盛京。僅能問其大概。未加細詰。即如所供盛京設立總局。派協領七十一。托恩多。噶爾璜。經理其事。

所有錦州協領富仲保。幫送銀六千兩。蓋州協領明保。幫送銀一千八百兩。牛莊協領常寧。幫送銀二千五百兩。三共銀一萬零三百兩。我並未見面。即令存交局內聽用。俱經七十一等。就各處應用款項。分發領用。其銀兩出入。局內俱有帳本可查。我並未經手等語。此即非情理。所有辦差設立總局。例仿各省常例辦事。雖由派出各員。而總其大綱。無不以督撫為政。此次盛京總局。其銀錢出入。即或將軍不親自經手。而某事應用若干。斷無不稟知將軍。覈定給發。竟以各處所幫之萬餘金。率憑協領數人。隨意分用。將軍全不與聞之理。至其所存帳目。更不足信。辦差之初。各項既未有定局。安能豫計某項應用若干。適數分發。僅剩銀十五兩存局。設或不敷應用。又當如何。是所存帳目。顯係聞此事已經敗露。必有欽差查審。故另造帳本。以圖掩飾。福隆安等。切不可信以為實。應將七十一等。

嚴加究詰。務得實情。令其水落石出。方成信  
讞。至錦州協領富伸保等幫銀之事。弘晌僅  
稱因錦州蓋州牛莊三處缺好。傳語令其各  
行幫辦。至伊等之銀。係何來歷。從前並未查  
及等語。尤不足信。如錦州一處。派斂客船。為  
數不少。弘晌豈得諉為毫無見聞。且錦州缺  
分雖好。而一協領旗員。豈能自出己貲。幫至  
六千兩。弘晌全不向其詢問。顯係弘晌欲思  
卸罪。協領不肯承認。今富伸保現已拘提到  
案。福隆安等即當向其嚴詰。此事如係弘晌  
令其派斂。則弘晌之罪。愈不能輕。若實係出  
於富伸保之意。科派多貲。又未向將軍稟及。  
則富伸保之罪。更當加重。一經嚴質。自不能  
更有遁情。福隆安等務須悉心究詰得實。勿  
使稍有掩飾。其蓋州牛莊二處。並一體徹底  
嚴訊。至於科斂一事。弘晌以為向未得知。而  
令三處協領幫銀一萬餘兩。弘晌已經供認。  
何以朕屢次面詢。弘晌於此項銀兩。亦未奏

及其意何居。著福隆安等將此一節。問之弘  
晌。令其據實供明。先行覆奏。又據稱各處道  
路。例應旗員與地方官分辦。而旗員向無開  
銷之例。因令錦州等三處協領幫貼。其說更  
屬荒唐。此次盛京道路。朕原降旨施恩。令照  
關內之例。一體開銷。乃弘晌等會奏。以盛京  
旗人民夫。各願自修道路。不領價銀。朕尚以  
伊等所奏。自出於旗人民夫等誠心。朕二十  
餘年臨幸一次。且已屢次加恩。伊等欲効子  
來之義。尚可先行。因交部覈議。現據工部議  
准。但弘晌等既以辦道藉口幫貼。則又何必  
代旗民等為此虛文。所有此項辦道銀兩。仍  
著照朕前旨。令其一體開銷。看伊等復將何  
事推諉。著將工部原摺。寄交福隆安等。令其  
遵旨另行覈議。到日再降諭旨。至所稱姜女  
廟工。須幫築山基。而北鎮廟亦須捐辦。此兩  
處。北鎮廟修理。原應動官項。即姜女廟工。所  
費諒亦有限。且不另加葺治。又有何礙。即或

必須辦理。弘昫等何不將應需銀數豫行奏聞。朕無難酌量停止。或行賞辦。乃於事後藉此為詞。明係伊等欲借工程為科斂冒銷之地矣。總之弘昫於此事實。在有無染指。必須就以上各款。嚴加訊明實據。不得僅聽其一面之詞。率行結案。其總局承辦之協領七十。一托恩多噶爾璜。經管銀一萬餘兩。悉行用完。僅存銀十五兩。其中必有侵蝕浮開之事。尤須切實嚴訊。不得信其帳本查對。致令飾混。其錦州協領富伸保。錦縣知縣雅爾善。亦須查明實在派收若干。除交六千兩外。餘存之銀。作何動用。則伊等之藉端分肥。無難得實。又蓋州牛莊二處協領。既已解任提訊。并須究其銀兩向何處商民斂派。除交總局外。尚存若干。作何動用。逐一跟訊明確。則伊等之指派侵冒。亦不能支飾。福隆安審訊此案。及侵盜銀庫一事。若已將緊要關鍵。俱經審明。則福康安到後。福隆安即可將此二案交

福康安會同金簡審訊。福隆安即起身回程。於本月二十六七到京。如案內關要情節。未能審得。則在盛京將各案審明。至新正起程回京。於正月十六七到此。亦不為遲。至錦縣知縣雅爾善。已經革訊。恐其餘州縣亦有應解任質訊者。該處現無試用之人。已派員會同該部揀選滿漢知縣各二員。即速帶領引見發往。各員到後。福隆安等即可酌量委用。將此由六百里加緊傳諭知之。仍將審得實情。迅即加緊覆奏。○以故雲南順寧府屬猛麻土巡檢倖晉琦子維繁襲職。○己未。命禮科給事中戴第元提督安徽學政。○庚申。上幸瀛臺。○諭據高晉等奏。堵築時和驛八堡漫口。於十一月二十九日。口門僅存三丈。隨時兜攔鑲填。合龍甚為穩固。金門水已斷流。詎大河水勢暢達下注。儀封水勢陡長四丈。新埽工偶有墊陷。俱經鑲壓平穩。不意二十九日。水復湧高。陡墊一段入水。隨經縷護。奈

溜勢湍激。竟塌寬十六七丈。現在趕緊裹護。不使衝塌過寬。惟念時和驛八堡甫經合龍。而儀封新工。復有墊陷之事。不能一律告成。負疚滋深。請交部嚴加議處等語。伊等實無可辭咎。已於摺內批示矣。時和驛儀封兩處。本應同時合龍。前此高晉等。因時和驛水深沙活。施工稍難。而儀封溜勢平緩。辦理較易。即先將儀封堵閉。亦屬乘便巧辦。先完一工之意。如果經理得宜。俾無後患。未為不可。今

新修埽工。復因溜勢湍激。致有墊塌之事。則工作原非穩固。可知。高晉等督辦何事。責無可辭。高晉袁守侗姚立德鄭大進。俱著交部嚴加議處。其在儀封董辦之大員。不能實力妥辦。其咎更無可逭。並著高晉等查取職名。交部從重議處。○諭軍機大臣等。據高晉等奏。時和驛八堡。已於二十九日合龍。儀封新工。復有墊塌一摺。伊等實不能辭其咎。已於摺內批示。並明降諭旨。交部分別嚴加議處。

矣。儀封與時和驛。本應同時合龍。前此先將儀封合龍。原屬權宜巧辦。理應切實施工。俾無後患。其時高晉。因時和驛工程緊要。未能兼顧。僅派司員等。會同該道及備弁等。將口門堵閉。今不久復有墊塌之事。其工程之草率可知。現在時和驛八堡。雖已合龍。而一切善後事宜。甚關緊要。據奏高晉等。尚在時和驛八堡料理一二日。再行趕赴儀封督辦等語。高晉務將時和驛善後事宜。籌辦妥協。務使所做之工。在在穩固。俾無後患。不可復顧彼忽此。至現在塌寬處所。至十六七丈。其水勢半入引河東趨。半入缺口。由舊河形下注。是合龍又需時日。據稱塌開之後。勢尚平緩。與時和驛八堡之水深沙活者不同。堵築較易等語。高晉等務須督率將弁。上緊趲辦。切實施工。務使一律穩固堅實。不可又蹈前轍。將此由六百里加緊傳諭高晉等知之。仍將辦理情形。先行覆奏。如已堵築合龍。一面籌

辦堅實。永保無虞。一面由驛加緊具奏。以慰  
廛念。○又諭據李奉堯奏。因查閱鳳陽一帶  
營伍。體察各州縣所辦賑務。懷遠。盱眙。兩縣  
災民。有以遺漏飢口。求額馬前者。至五河一  
帶。本為積歉之區。小民輒以本年賑次。不及  
上屆。老幼婦女。所至環集求增。查該縣勘定  
成災七八分。其極貧初賑。已經散訖。次貧一  
賑。例於十二月始行開放。災民未免嗷嗷。當  
即商之該縣。令其先行煮粥接濟等語。所辦  
頗好。已於摺內批示。地方遇有災務。撫藩等  
自應實力查辦。即或有不能周到之處。亦當  
以民食為重。俾皆得所。寧濫毋遺。方足副朕  
惠愛黎元之意。今閱鶚元等查辦賑務後。仍  
有數處災民。向鎮臣環籲。則原辦之未能妥  
實可知。今幸俱已籌辦安輯。可無他患。但閱  
鶚元之查辦災務。是否屬實。即難深信矣。刁  
民藉災控訴。其風固不可長。但災黎以待哺  
情急。向巡閱營伍之鎮臣籲訴。為民牧者聞

之。能無愧乎。著將李奉堯摺鈔寄閱看。令其  
確查。勿使一人向隅。副朕廛念災黎之至意。  
仍將查辦情形。明白回奏。此旨著由四百里  
傳諭。閱鶚元。並諭李奉堯知之。尋閱鶚元奏。  
懷遠。盱眙等處災民。現俱寧帖。年內尚有極  
貧二賑。次貧一賑。成災九十分各屬。普賑一  
月。報聞。○又諭曰。福隆安等奏。訊問弘昫供  
詞一摺。恐所供尚非實情。如所稱錦州蓋州。  
牛莊。三處協領。因其缺分較好。是以令其出  
力幫助。並不是教他們科派等語。協領雖管  
落地稅務。其出息亦屬無多。今錦州一處。幫  
至六千兩。斷非富伸保一人所能解囊。豈有  
弘昫竟置之不問之理。且錦州既訊有派累  
船隻之事。則蓋州牛莊兩處之銀。必不能免  
於勒派。前據供稱。蓋州幫銀一千八百兩。牛  
莊幫銀二千五百兩。數亦不少。均非一協領  
力所能辦。其為派累無疑。福隆安等。已將該  
二處協領解任。提到時。即行嚴訊確情具奏。

勿任絲毫遁飾。至弘昫所供。旗員與地方官分段辦理。係就辦道而言。若錦州一處。因辦道而派斂如此。其餘各處辦道。又出於何項。自不能不俱有派累矣。前因盛京道路。向無開銷之例。特降恩旨。准其一體報銷。而弘昫等。旋即會奏。以旗人民人。均係感恩報効。願自出己力辦道。不敢請領官項。朕尚以為出自伊等誠心。可以允行。昨工部奏覆時。適福隆安等。初次查訊之摺奏至。其錦州科斂。竟

以辦道為名。是盛京此次道路。俱由官辦。旗民並無出貲自効之處。又豈可派累商船。而令旗人民戶。居急公之虛名乎。是以諭將修道之項。仍照原旨開銷。而以工部議摺。發交福隆安另行覈議具奏。又如所稱蓮花套噶布。該得各嘉邦等處道路。俱有上山水之處。其意自以為此數處費用較多。故有幫貼之事。果爾。何不豫行奏明。朕無難諭令動帑修治。何必留此罅隙。為藉端科派之地乎。總

之辦道一項。竟應除出。不准其影射糾纏。至總局所有冊籍。自係伊等於事後另造。不足為據。但所開各項用度。諒必有所指稱。著福隆安等。查其原冊內。開造某項用銀若干。除去辦道不算外。此外復有何項開銷。是否應用。抑係混指浮開。無難立辨。但不得以伊等所造之冊。竟為憑據。仍當逐一研訊確情。務令水落石出。即行覆奏。又如總局用銀至一萬餘兩。豈有僅諉之協領七十一等。專司出

入。而弘昫全不與聞之理。即如各省辦差。俱有總局專派司道大員管理。經手銀錢用度。至所入銀兩。得自何項。及辦理何事。發銀若干。其大端總要。斷無不稟請督撫指示者。弘昫豈得諉為不知。此不過欲避染指之罪耳。實不足信。著福隆安等。即就七十一等三員。嚴切問究。弘昫實係如何辦理。則其有無入已。可以得實。毋使各協領狡供詭飾。代為弘昫隱瞞。方成信讞。看來此案應行提訊之人。

尚多。而侵盜銀庫一案。並有自京解往之犯。未能即到。恐非歲內可能辦完。計福康安接奉調任諭旨。馳赴新任。大約此月望後。可至盛京。福康安係新將軍。所有各案。俱與伊毫無干涉。即與派往之福隆安無異。現在年節已近。福隆安等尚有後護及承辦之事。應在朕前祇候者。今查訊案情。已得端倪。著傳諭福隆安。俟福康安到盛京後。即將案內緊要情節。及屢次所奉諭旨。交付福康安。令其會同金簡查訊。福隆安即起程回京。務於封印後趕到。其所帶司員姜晟等四人。著福隆安酌帶一員隨同。餘俱留與福康安等查辦事件。俟兩案全行審畢。再令其隨金簡回京。將此由六百里加緊傳諭知之。仍將應行覆奏情節。及定於何日起程之處。先行覆奏。○辛酉。

上詣

大高殿行禮。○諭軍機大臣曰。福隆安等奏查

訊七十一等供詞。及覈對存局帳本等因。一摺。其帳本總不足信。又如協領富伸保。知縣雅爾善。向各船斂湊銀兩。按船隻之大小。定出銀之多寡。其科派已屬顯然。豈得為借。況各商船來往靡常。今歲到錦州之船。明歲未必復到。豈有向行蹤無定之船。零星借銀之理。富伸保等。不過欲避派累之名。故妄稱斂借。其實是派非借。毫無疑義。福隆安等訊供時。務當究其科派實情。勿使託言借用。妄希狡飾。至富伸保。雅爾善二人。向各船斂派銀一萬餘兩。內六千兩。據訊已經富伸保交送總局。尚有四千餘兩。自係雅爾善收存。此項銀兩。作何動用。若云用之於民力之修造。則其餘州縣。又以何項動用。或係雅爾善藉端中飽。必須嚴切訊明。以定伊等罪名輕重。毋令稍有遁情。至於總局所存帳本。朕於福隆安等初奏到時。即以為必係七十一等事後另造假帳。不足為據。今閱鈔呈發銀款項。其

為謊開捏造。更屬顯然。如四處修理隄塌。本係一事。何以分作兩項開銷。且隄塌即在道路之內。前既奏稱旗民各夫。均願自効。悃忱不敢領價。安得復有此項用度。至修道什物器具。現係地方官備辦。聽旗員取用。開銷官價。何以總局復有支發之款。此事以地方官備辦之物。旗員取用開銷。彼此糾纏。致令借名影射。辦理本屬不善。而伊等如此開造。其為浮冒。更無可辯矣。又如幫修北鎮廟工銀

實錄卷八十二

八百兩。第就廟中油飾黏補而論。所費原屬有限。若連新添之坐落房計之。則工料更覺不敷。如更兼觀音閣一帶工程覈算。其費更甚。除此八百兩外。餘者又出於何項。至幫修姜女廟工銀一千六百兩。數亦相懸。此次弘昫於廟旁貼築地基。添蓋房屋。約計施工費用。應在二三千金內外。乃止幫銀一千六百兩。尚缺大半。又動何項銀兩。以資工作。即此指出各款。失枝脫節處甚多。其餘皆不足信。

矣。且局中既存帳本。自當有每日收發流水細帳。何以所開僅列總綱。不言細目。豈有如此糊塗帳簿。其為偽造。益無疑矣。著福隆安等。將以上情節。逐一嚴訊明確。勿任其再有飾混。又據稱支用款項。係轉發協領防禦官弁等。分頭辦公。現在提傳經手領用銀兩各員弁。覈其有無虛捏等語。自應如此辦理。福隆安等於各員提到時。即嚴加看守。隔別研訊。務令水落石出。勿使串供隱飾。至弘昫於

實錄卷八十二

此事實。在有無染指。尤須訊究確據。不可聽弘昫諉過避罪。及其屬員。代為擔承開脫。福隆安等。即將此等緊要關鍵。先行訊得實情。具奏。俟福康安到盛京時。將此案情節。及所奉諭旨。告之福康安。令其與金簡。會同詳悉審明定案。福隆安。仍遵昨日所降諭旨。即行起程。於封印後到京。此旨著由六百里加緊發往。仍將續行訊得實情。迅即覆奏。○又諭。昨據高晉等奏。時和驛八堡合龍。及儀封新

工墊塌一摺。已有旨令高晉在時和驛將善後事宜詳慎妥辦。不可顧彼忽此。本日又據高晉等奏稱。時和驛八堡合龍之後。尚有一二處滲水。此漫工合龍一時未即閉氣。亦向來常有之事等語。朕正為此廋念。惟當慎之又慎。以期鞏固。已於摺內批示矣。高晉於堵築河工事宜。最為諳習。是以派令董率熟練埽工之將弁等。赴豫督視。前此時和驛初漫時。既合復開。尚係高晉未到河南之事。至儀封漫口。既已合龍。又忽墊塌。自係工作草率所致。高晉雖未在彼目睹。而既已堵成。即當期其鞏固。高晉即不能親往兼顧。亦宜遍示機宜。令其妥辦。乃致有此閃失。不但咎無可辭。亦當引以為戒。今時和驛八堡。經久始得合龍。尤當壓實填堅。俾無後患。且現在尚有滲水不能閉氣之處。更關緊要。高晉切不可視為常有之事。稍生懈怠。務須督率兵弁。上緊加壓。餞鑲。俾根腳層層鞏固。不使絲毫滲

漏。方為妥善。斷不可存惜工省事之見。復滋貽誤。罅隙稍未周到。或畧有疎虞。非但不成事體。高晉豈尚得稱為河防老手。以副朕之委任乎。至儀封墊塌埽工。據稱水勢尚屬平緩。趕緊堵築。旬日內可期辦竣等語。高晉等務當督飭將弁等。加緊施工。倍為慎重。以期及早合龍。堅實穩固。永資利賴。將此由六百里加緊傳諭知之。仍將時和驛善後事宜。及儀封堵築情形。先行覆奏。如已合龍。即加緊馳奏。以慰廋念。○賑卹甘肅寧夏寧朔平羅秦州秦安莊浪安化正寧環縣撫彝張掖古浪西寧鹽茶廳禮縣山丹永昌等十七廳州縣。本年水旱雹霜災貧民。並蠲緩額賦有差。○壬戌。

孝惠章皇后忌辰。遣官祭。

孝東陵。○諭。明年正月恭值。

孝聖憲皇后再週忌辰。及四月釋服。朕親詣泰東陵展謁致祭。所有應行豫備事宜。著各該

衙門照例敬謹辦理○又諭刑部等衙門題覆雲南文山縣民申張保毆死高應美致伊父母先後服毒身死一案將申張保問擬絞決固係按例議罪而揆其情節實未允協凡子犯死罪致令父母自盡擬以立決者原為其子違犯教令及身犯不端之事致累其親忿恨自戕此等孽種斷不可復留於人世例意顯然今此案申張保因高應美與其母胡氏不避嫌疑屢為其父申茂盛撞見遂相反

書奏卷八十二

目申張保曾經往勸數次嗣其父鬱結成疾申張保往視始將情由密行告知及胡氏被夫責逐即奔至申張保家居住後高應美途遇申張保復聲言欲往伊家見其母申張保用言阻止高應美輒行嗔罵拾石向擲申張保情急始用所攜木棍毆斃致死後經事發申茂盛胡氏忿激羞愧先後服毒身死是此案釁由伊母與高應美有姦淫惡欺凌實為為子者所宜恨且申張保始而勸解其父繼

而接母同居並無不合迨後姦夫欲往其家明係圖姦其母此而再不心生忿恨任聽其母與人苟且則竟無復廉恥之心且將置其父於何地乎是申張保之毆死高應美實出於義忿殊堪矜憫而申茂盛胡氏之死由於姦情敗露忿愧輕生並非申張保貽累若亦予以立決未得事理之平但非於姦所殺死姦夫自不能免罪擬以絞候亦足矣此本著交九卿會同該部另行妥酌定例具奏嗣後遇有此等案情即照新例辦理朕綜理庶獄無論案情鉅細悉為反覆權衡折衷至當如其子自作罪惡致親忿激輕生則當立正典刑以申明刑弼教之義若似此案之殺姦因雪恥而成親死非波累所致則不宜即予縲首致乖明慎用刑之文內外問刑衙門並當深體朕意慎重聽讞並將此通諭知之尋刑部會同九卿議奏嗣後凡母犯姦淫其子激於義忿非姦所將姦夫殺死父母因之羞忿

平定卷八十二

自盡者。照罪人不拒捕而擅殺例。擬絞監候。從之。○諭軍機大臣等。據國泰奏。籌議兵丁差費一摺。已交部議奏矣。此係今春之事。經軍機大臣議令各督撫通盤籌畫。奏明辦理者。各省俱已陸續奏到。即遠至雲貴。亦有籌議覆奏。山東距京最近。何以具奏轉在各省之後。殊屬遲延。國泰著傳旨申飭。至該撫另摺奏。查封陶易原籍貲財房產。備造細冊。送部查覈等語。向來此等物件。或解交內務府。或解交崇文門。從無交部者。國泰所奏。亦未妥合。除交部俟解到時。照例另辦外。並將此諭令知之。○又諭前此大兵進勦金川。所調各省綠營兵丁。頗有潛行逃竄者。曾經屢降諭旨。令四川及調兵各省督撫。實力查拏。初時各省尚有陸續拏獲。奏聞正法者。近來則鮮有弋獲逃兵入告之事。必係各督撫見大功久歲。遂不復嚴行督緝。而地方文武亦俱視為具文。任其遠颺潛匿。不知兵丁受國家

養養有年。調至軍營。正當奮勉圖功。以思報効。乃敢相率潛逃。情罪實為可惡。若因日久疎怠。任其倖逃。法網何以申軍律。而儆將來。此等逃兵。見事隔多年。捕緝漸懈。自必潛回本籍。匿跡稽誅。如地方官實力稽查。無難就獲。著傳諭文綬。查明軍營逃兵。某省實有若干。即行奏聞。并令原經派兵之各督撫。查明該省逃兵。已獲若干。未獲若干。先行具奏。一面設法。飭屬上緊嚴拏。奏請正法。仍於歲底將一年所獲逃兵多少。具摺彙奏。毋得僅以虛文塞責。致干咎戾。○又諭從前四川木果木潰兵之事。實由綠營懦卒。罔顧軍律。相率奔逃。置將軍於不顧。以致失事。其罪本不容誅。第因人數過多。不忍悉行駢戮。是以諭令查明發遣雲貴。兩廣甘肅湖廣等省安插。如有脫逃者。即行緝獲正法。仍令該督撫等。查明有無脫逃。於年終具奏。今其事已隔六年。各省按例。每年陳奏。竟成故套。亦不成事體。

著傳諭安插潰兵之各督撫查明尚存潰兵若干詳悉具奏俟奏齊之日交軍機大臣請旨○又諭據章嘉呼圖克圖奏稱班禪額爾德尼情願來京入覲等語即照所請著傳諭留保住協同堪布諾們汗阿旺簇勒提木齊旨前往後藏扎什倫布允其前來至四十五年班禪額爾德尼起程時即令留保住照料隨行沿途一切事宜仍會同阿旺簇勒提木妥協辦理○旌表守正被戕湖北棗陽縣民

蔣雲妻王氏○癸亥

上幸瀛臺翼日如之○四川總督文綬疏報捷為縣開淘鹽井二十四眼徵課如例○乙丑諭據福隆安等奏查審錦州欽派商船銀兩及蓋州牛莊幫銀一案請將錦州協領富伸保蓋州協領烏占圖明保牛莊協領常寧錦縣知縣雅爾善革職經管總局之協領七十○托思多噶爾璦暫行解任以便嚴行審訊等語富伸保烏占圖明保常寧雅爾善俱著

革職七十一托思多噶爾璦俱著解任交福隆安等嚴審定擬具奏○諭軍機大臣曰福隆安等奏續經審明情節一摺覽奏已悉據弘昫供稱總局銀錢出入我雖未親自經手至某事應用若干應發若干俱係辦事官員開單向我告知方始收發此項幫銀送到總局後原覈算各處需用款項儘數牽勻酌撥並令撙節辦理即稍有不敷亦屬無多等語此項銀兩收存分發以及請領承辦既各有

人弘昫自不能從中染指所供或非捏卸至

七十一等三員專司總局出入而七十一專辦車輛托思多修理教場又均有領銀承辦之事實難信其一無浮冒況朕今年至盛京並不閱兵昨歲即諭知弘昫是教場並無應修之工衆所共知且伊等按例操演常至教場即有損舊之處原當隨時黏補不應至此時藉詞修飾費至四百餘兩之多則此項之浮冒開銷已可概見著福隆安等即行嚴切

訊究。毋任絲毫狡賴。又據弘晌供稱。富伸保所幫之銀。實不知有敘收情事。如果知道。必不肯聽其如此辦理。至蓋州牛莊二處。該協領等。堅稱實係自出已貲。並無科派等語。其情節均不足信。尚須逐一研訊。使其水落石出。至弘晌於各協領幫銀來歷。或果不知情。但辦理差務。因三處缺分較好。授意幫貼。及朕再三詢問。又不據實奏明。此一節。弘晌之罪。實無可諉。應俟審明後。通覈案情。定擬具

實錄卷一〇七二

奏。又據蓋州正任協領烏占圖。署任協領明保供稱。實止幫銀八百兩。俱係自出已貲。其銀數。既較弘晌原供。計少一千兩。則所稱自出已貲。亦不足據。又牛莊協領常寧供稱。春間將軍諭令幫貼差費。五月回家。先將現銀五百兩送局。後聞錦州幫銀較多。將住房兩所。暫向四處錢店。押借銀一千六百兩。契載八釐行息。又將已銀四百兩。湊成二千兩。續送總局等語。其說甚屬荒唐。弘晌因此數處

實錄卷一〇七二

缺分較好。令其幫銀。該協領等。止須自度囊資。多為幫助。何至指房押借。湊銀如許之多。伊等既非總辦大員。幫後又不能列名入告。即係誠心急公。豈肯於暗中獨累。況協領所住之屋。自係官房。即與解署無異。各錢店。如何敢允其指押借銀。種種供詞。皆非情理。所應有。據福隆安等奏稱。蓋州牛莊均有海口店戶。安知非向客船派斂。故為掩飾。現提該二處店戶。及錢店人等。到案質審等語。自應如此辦理。但錢店近在一城。尚防其串供開脫。而店戶各分海口專管。如果協領等。亦有似錦州科斂之事。斷難掩飾。著福隆安等。即行嚴訊確實。勿使稍有遁情。並將此二事。明察暗訪。務得實據。以成信讞。茲復據福康安本月初二日具奏。俟副都統克星額至吉林。即起程馳赴新任。約計本月望前。可至盛京。福隆安仍遵前旨。俟福康安到盛京。即將案內緊要關鍵。告知福康安。令其同金簡。詳悉

審訊結案。福隆安即起身回京。於封印後趕到為妥。不但後護諸事。需其料理。昨據章嘉呼圖克圖奏稱。班禪額爾德尼。因庚子年為大皇帝七十萬壽。欲來稱祝。朕本欲見班禪額爾德尼。因道路遙遠。或身子尚生。不便令其遠涉。今既出於本願。實屬吉祥之事。已允所請。是年朕萬壽月。即駐熱河。外藩畢集。班禪額爾德尼。若於彼時到熱河。最為便益。已諭令於熱河度地建廟。備其居住。至沿途應

實錄卷一百一十二

三八

辦事宜尚多。均係理藩院承辦。雖為日尚寬。而早為部署。更覺從容妥當。福隆安因此事更宜早來。著將前日所發清字諭旨。鈔寄閱看。此旨著由六百里加緊發往。仍令將續訊緊要情節。迅速覆奏。○又諭。據國泰奏。派按察使于易簡等。前赴冠縣。嚴拏義和拳邪教楊姓一案。拏獲楊四海。據供。伊父在日會拳。借此防夜。伊自小未學。張九錫並元城童姓。都不認得等語。楊四海之父。既經會拳。其人

必非安分之徒。或曾經招人學習。以致有義和拳名色。亦未可定。伊子亦斷無不隨同學習之理。所供未必可信。恐係畏罪支飾。即所稱並不認得張九錫之語。亦難憑信。如果該犯與張九錫素未謀面。則張九錫又何所見聞。遽行控告。種種情節。殊屬支離。著傳諭國泰。即提集該犯。嚴加確究。務得實情。毋使遁飾。今張九錫已解赴豫省。著傳諭胡季堂等。即將張九錫詳悉研訊。與楊四海何時相識。

實錄卷一百一十二

三九

曾否至其家。因何得知其傳習義和拳邪教。一面飛咨國泰查訊。一面據實奏聞。其元城童姓。據供亦不認得。並著周元理。質訊童姓供詞。是否相符。一併移咨國泰辦理。所有國泰原摺。著鈔寄胡季堂等。及周元理閱看。○又諭。前據高晉奏。繳違礙書籍內。有九十九籌一書。計四本。係明人顏季亨所撰。其中詆斥之處甚多。較尋常違禁各書。更為狂悖不法。隨即銷燬外。但此書既已流傳。必不止此。

一部著傳諭薩載楊魁於江省再行切實搜查。如有續行查出者。即封固送京。不必俟彙齊他書奏繳。並應查此書有無刊刻板片。一併起出解京。並恐各省亦有傳布收藏者。著傳諭各督撫一體嚴查。盡數解京銷燬。毋使片紙隻字存留。各督撫不得視為具文。漫不經意。致干重戾。○又諭本日郝碩奏到摺內一係民數穀數。一係常平義倉實存穀數。此等彙奏事件。理應於摺由內先將款項標識

實錄卷十七

三

明晰。朕披閱之下。方可一目了然。今郝碩兩摺均未將款項聲明。竟似一事兩奏。殊欠明晰。郝碩新任巡撫。於彙奏各事件。款項式樣尚未熟悉。著傳諭郝碩嗣後奏摺。務將所奏事由聲明。勿再似此含混。○丁卯諭據陸耀奏親母陳氏現年七十九歲。久患痰症。入冬以來。病勢轉劇。非臣親身調護。則晝夜不寧。而以此牽懷。必至公私兩負。懇恩解任侍養等語。所奏自屬實情。伊母生長南方。水土相

習。若回籍調治。或可就痊。陸耀著准其解任。俾侍伊母南歸。以遂其侍疾奉養之情。所有山東布政使員缺。著徐恕調補。其浙江布政使員缺。著國棟補授。○諭軍機大臣等。據高晉等奏儀封壑塌壩工十七丈。已將兩頭裹護。鑲成數丈。口門只剩九丈。數日內即可合龍。但該處引河日漸平緩。下三段均有淤墊。二三尺已多。撥人夫上緊挑挖。所幸天氣晴暖。地土未凍。易於施工。十日內可以辦竣。現

實錄卷十七

三

在一面將漫口切實施工。一面催挑引河一俟挑成。開放掣動溜勢。即將壩工合龍。呈馳奏報等語。自應如此速辦。但日甚一日。盼望彌殷。已於摺內批示矣。挑濬引河。雖不能咄嗟而就。但為期十日。不為不多。務飭承辦之員。董率夫役。上緊挑治。如期而就。一俟挑成。即可開放掣溜。迅將壩工合龍。方為妥善。否則轉瞬立春。凌汛將動。又恐經理不易。高晉等不可不豫為計及也。將此由六百里加緊

傳諭知之。仍將現辦情形。先行覆奏。如已堵築合龍。即由驛加緊馳奏。以慰廛念。○又諭。據高晉等奏。本年豫省。因兩處漫口。所需工料較多。已分派通省。不被災之各州縣承辦。但該省尚有額辦明歲稽料。共七千七百萬觔。際此辦運大工之後。民間存料有限。若再照例發辦。民力恐有不繼。請於直隸之大名府。江南之徐州府。各辦稽一千六百萬觔。山東之兗曹二府。及濟寧州。辦稽二千五百萬

實錄卷一千七十三

三

觔。令該督撫飭屬照數採辦。運豫備用等語。所奏是。已於摺內批示矣。今年豫省堵築漫口。所用工料已多。本省自不敷採辦。所有明年額料。自當於鄰省籌辦。著傳諭周元理薩載。楊魁。國泰等。按照指定各地方。如數上緊購辦。並即派委幹員。迅速解往。交河南附近各廳工次接收。以備來歲修防之用。所有採辦料價。俱著照例動支公項給發。毋使絲毫派累閭閻。將此由六百里各傳諭知之。高晉

等原摺。鈔寄閱看。仍各將辦理情形。迅速覆奏。並諭令高晉等知之。○又諭。曰。福隆安等奏。審辦虧短庫銀一案。已得其大端。至其中詳細情節。尚須逐一嚴訊等語。庫丁官吏等。膽敢將庫貯銀兩。零竊錠件。甚至提出三口袋。且有節規節禮等項。實出情理之外。自應嚴切鞠訊。徹底根求。令其弊端畢露。監守自盜。情罪甚重。一經審實。即應按律定擬具奏。至錦州斂派銀兩一案。現在設法嚴究。務得科斂侵肥各實情。不使稍有縱漏。其牛莊蓋州二處之海口鋪戶。及在局領銀之阿精阿等二人。一俟提到。即可質訊。如再茹供不吐。即加刑訊等語。自應如此辦理。福隆安等。即將節次諭旨內。指示情節。嚴行勘訊。則協領等之如何浮冒開銷。及弘昫之有無分肥。染指。均可水落石出。無難審結。但恐各處提人。未能一時全到。福隆安。亦不必在盛京久待。況此事大局已定。福康安與金簡。均能就其

實錄卷一千七十三

三

中緊要關鍵。訊問得實。與福隆安在彼同審無異。福隆安。俟福康安到後。止須將兩案情節。及所奉諭旨。交付福康安。詳悉告知。令其同金簡。查審明確。定案。福隆安即遵前旨。起程回京。務於封印後。趕到。將此由六百里加緊發往。仍將應奏之事。迅即由驛具奏。○以署浙江提督李奉堯為江南提督。湖北黃州協副將陳大紱為雲南臨元鎮總兵。○旌表守正被戕山東滕縣民白興文女白氏。○戊

實錄卷千七

三

辰。廣西巡撫吳虎炳奏。粵西寶桂錢局。設鑪十六座。現應採辦。已亥銅觔。據滇撫咨稱。本年截數後。無銅可撥。將來移咨赴買。約四十五年夏季方到。局銅不敷配鑄。請暫減三鑪以十三鑪鼓鑄。滇銅充裕後。再行奏復。下部知之。○命刑部侍郎錢汝誠。在南書房行走。○已已。

上御乾清門聽政。○諭。八旗中孤女無依者。嗣後著照孤子例。一體給與錢糧。以資養贍。○

吏部議。失察高樸家人私玉過境。各官分別降革。得旨。各省地方官。於私玉過境。漫無稽查。吏部照例議以降革。均屬罪所應得。但此等玩忽積習。皆由平日吏治因循所致。此案係初次發覺。從前類此者。自屬不少。難於逐一追究。所有議處大小各員。其應革任者。著從寬免其革任。仍註冊。其應革職降調者。著照部議降級。俱從寬留任。此係朕格外施恩。當共知謹凜。嗣後如仍不實心稽察。一經事

實錄卷千七

三

發。定照部議實降實革。不能復邀寬宥矣。○刑部議。河南太康縣民婦陳王氏。誣告董四謀死伊夫。應照例擬流。不准收贖。得旨。此案陳王氏。心疑其夫被人謀害。屢行控告。以致屍遭蒸檢。其罪固所應得。但究因痛夫情切。意在伸冤。與挾嫌誣告者有間。且一經審明。即俯首認罪。其情尚屬可原。陳王氏著加恩。准其照例收贖。○以鑲黃旗領侍衛內大臣福隆安。正黃旗領侍衛內大臣扎拉豐阿。對

調調正黃旗領侍衛內大臣拉旺多爾濟為正白旗領侍衛內大臣。○以浙江杭嘉湖道孔毓文為浙江按察使。○庚午。諭據三寶奏查閱湖南省營伍情形一摺。已批交該部議奏矣。至摺內所稱衡州協副將福海。年力已非強健。不能振作。有為。但出師金川。著有勞績。若以旗員補用。尚能勝任。請給咨送部引見。又沅州協副將洪昌運。年力漸衰。志氣將頹。請勒令休致等語。所辦非是。福海身屬滿

實錄卷三十一

吏

洲。請以旗員補用。而於洪昌運。則竟請勒休。顯係偏護旗員。有心軒輊。非所以示公允。況福海在金川出師。如果勞績懋著。自必得受世職。該旗必照例辦理。非查覈軍政之督撫所應議及也。且三寶以滿洲身任總督。於閩屬滿漢員弁。均宜一視。方足以飭營伍而昭懲勸。乃於滿漢副將。一例兩辦。其何以使衆心帖服耶。三寶著傳旨嚴行申飭。○諭軍機大臣等。據國泰奏。等獲安徽脫逃軍犯劉裕

泰。改擬絞候一摺。已批該部議奏矣。至夾片所稱劉裕泰。原係不准捐官之人。究與曾任職官有間。可否量為末減等語。殊屬非是。劉裕泰。業已選授刑部司員。旋經叅革擬罪。即與曾任職官無異。況該犯本係賤役子孫。妄干名器。隱匿報捐。較之尋常職官逃竄。尚多一層罪犯。且又於配所脫逃。既經拿獲。自應按照官犯定例問擬。乃該撫轉為夾片申說。冀圖末減。實乖情理之平。國泰好作聰明。而

實錄卷三十一

吏

所辦多不當於理。往往如此。國泰著傳旨申飭。○以署鑲黃旗漢軍副都統陳杰為正白旗漢軍副都統。○旌表守正捐軀河南永寧縣民郭進昌妻李氏。○辛未。

上御太和殿視朝。文武陞轉各官謝恩。○詣大高殿行禮。○諭軍機大臣等。鄭大進奏藩臬考語一摺。所辦未為妥合。各省大計。所奏藩臬考語。例應交部。是以向來各督撫。俱於摺內聲敘。本日周元理奏到之摺。即係如此辦

理。乃鄭大進於兩司考語。另列清單。並不敘於摺內。殊未畫一。自因初任封疆。未能熟悉體例之故。著將周元理奏摺鈔寄閱看。令其嗣後遵照辦理。○賑卹兩淮板浦并歸併之徐瀆。中正并歸併之莞瀆。臨洪并歸併之興莊等六場。潮災貧民。並予緩徵。

大清高宗法天隆運至誠先覺體元立極敷文奮武孝慈神聖純皇帝實錄卷之一千七十二

大清高宗法天隆運至誠先覺體元立極敷文奮武孝慈神聖純皇帝實錄卷之一千七十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書琅玕滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十三年戊戌十二月壬申禮部等部

議覆直隸總督周元理學政汪廷璵奏稱直隸商學鄉試從前另編鹵字號取中嗣經議裁歸入北貝字號現奉新例本省商籍童生祇准寄籍行商與試入學後若仍回原籍鄉試往返不便請仍照舊例編設鹵字號以五十名取中一名等語應如所請至房考閱卷令與商籍同省之考官迴避從之○以故一等果毅繼勇公豐昇額繼子明安三等子德昌子和寧各襲爵○予故領侍衛內大臣努

三。祭葬如例。謚恪靖。○癸酉。諭。前因長淮宿州。二幫漕船。在洪澤湖。遭風漂沒。曾降旨於道庫內。賞借銀一萬兩。給發各船。購料趕造。分作五年歸款。嗣念該丁等辦運。歲需費用。復降旨展限三年。以紓丁力。本年亳州被黃水漫淹。該丁等田疇房舍。多有淹沒衝塌之處。若將應扣二限銀兩。照數扣繳。丁力不無拮据。著再加恩。將該丁等本年應扣二限銀兩。緩扣一年。俟來年冬底。再行照數扣還。仍分七年歸款。該督等。務宜率屬實力妥辦。毋使胥役從中滋弊。以副朕嘉惠疲丁至意。該部即遵諭行。○又諭。據胡季堂。喀寧阿奏。查審山西民人張九錫。控告河南各府派累工料一案。提訊曾經交料之司位東等。俱供只知每料千觔。須價銀十三四兩。並無折收銀十四兩之事。又運料赴工。沿途拋撒。每千觔約折耗數十觔。係屬常例。並無千觔只收二百觔之事。復嚴詰張九錫。據稱實因在河南

年久。貿易折本。不敷度日。今見民間辦料艱難。思欲代為伸雪。河南百姓。必能感激。得個好名。在此生理。即可興旺獲利。是以冒昧具控。現俟將所控內黃輕縱搶奪一案審結。再行從重定擬等語。朕惠愛黎元。臨御以來。四十年。如一日。免漕蠲賦。至再至三。偶遇水旱偏災。不惜多費帑金。加意賑恤。即如今歲豫省河水衝溢。被災較重。先後撥給帑銀一百六十萬兩。又截撥江西漕米二十萬石。復截留本省新漕十萬石。令實力撫綏。以期無致一夫失所。又念漫口所需物料較多。恐購備不易。興工之初。即嚴諭地方大吏。飭屬妥辦。毋得絲毫派累閭閻。復令於正價之外。每百觔加價五分。俾知踴躍。又慮本省糴糴不敷採辦。令山東省就近協濟。而明年應備之額料。並令山東。直隸。江南。三省辦運。其所以體恤之者。實已無所不周。至於一切物料。勢不能不購自民間。而按糧辦料。又屬向來成

例。百姓等自當共知感奮。且目擊本省被災。官為施工辦料。凡屬有收之地。尤應休戚相關。努力辦公。以相周濟。况豫省民風淳樸。更不宜有造言訐控之事。今張九錫。以山西民人。在豫貿易。乃因生計艱難。撫拾風聞。無據之言。妄思代民伸雪。以冀得名獲利。其情甚屬可惡。不可不嚴示創懲。以昭炯戒。至此等挾私誣告之伎倆。即讀書失志之徒。恐亦不能免。一經欽差大臣查訊。虛實自可立辨。必不致吏胥有擾民之患。奸民逞刁健之風。然亦足見朕平日勤求民瘼。閭閻疾苦。無不周知。且偶有控訴。即派員鞠勘。從不壅於上聞。如此案張九錫之譴張為幻。亦未嘗非揣測朕意。敢於架詞越控。是朕平日如傷在抱之懷。實能見信於天下百姓。而民隱斷不致壅蔽。所謂觀過知仁。朕心轉因此而稍慰矣。除張九錫一案。俟胡季堂等審結具奏後。該部按律定擬外。著將此通諭知之。○又諭曰。福

隆安等奏。查審錦州藉差派斂一案。訊據錦州協領富伸保。錦縣知縣雅爾善供稱。我二人因商酌幫貼辦差之費。傳集店戶及船客面商。允為設湊。按船隻大小。自七八兩至十五六兩不等。店戶六家。又湊銀一百五十兩。送至縣署。富伸保即攜銀六千兩。盡數交局。餘銀四千兩。據雅爾善供。因境內大營四座。尖營五座。計用銀九千六百餘兩。領過銀五千兩。尚屬不敷。即以所斂之四千兩墊用。正在造冊報銷等語。又訊據牛莊協領常寧供稱。自有現銀九百兩。餘銀一千六百兩。係將房屋向錢鋪抵借。及提訊該處錢鋪。同供六月間。常協領傳我等去。說辦差緊急。將房屋抵借銀兩應用。我等因其係本處管轄官員。不敢違拗。湊銀一千六百兩送去。實是指房為名。我們如何敢要他的房子。也不敢想他還項是實。並訊據牛莊店戶供稱。常寧曾將我等傳去。令為轉借銀兩。我等因十餘年前。

高治中索要客船陋規。曾經受累。故不肯允辦。其蓋州正署協領烏占圖。明保所幫銀一千八百兩。據供俱係已貲。今訊之該州店戶等。堅稱我們蓋州地方較小。只有三家店戶。協領於本年三月後赴省辦差。直至九月差竣回任。實沒有向我們湊借銀兩。其餘各地。方雖據業內人證。僉稱實無別項斂派。臣福康安。仍會同全魁。設法訪查。另行辦理。至總局帳本內開修理北鎮廟工。發銀八百兩。姜女廟工。發銀一千六百兩。就兩處工程而計。所發之銀。均不及半。餘係動用何項。今訊據廣寧縣知縣伊湯安供稱。北鎮廟在縣境內。我在任已經五年。廉俸所餘。尚能捐辦。所有添建座落及修葺觀音閣等處。皆我情願承認。該處地近山場。購辦木石較易。所費不過一千餘金。均係自辦。實無絲毫派累。又訊據岫巖通判阿精阿供稱。將軍因寧遠州界內有姜女廟。必須展拓修整。該處知州不能辦

理。調我幫辦。我即前往查估興工。填築山基。展拓十餘丈。並搭蓋大小房屋遊廊等項。實用銀三千三百餘兩。將軍看工。說辦得好。給我銀一千六百兩。其餘銀一千七百餘兩。實係我情願捐辦。因我父額爾金泰歷任口北天津道員。力量尚能。原該報効。至我本任岫巖偏僻寒苦。無從斂派。只求訪查。至總局呈出籠統用帳。恐係事後捏造。希圖掩飾。將承辦之七十一等嚴加推鞠。據各供稱。此係派幫銀兩。收項僅止三宗。用項僅止十宗。原係節次稟請將軍發銀。各單於差竣後補登總帳。呈送將軍閱看。當時實無流水細帳。所有銀兩。不但將軍並未使用。即伊等給發各項俱有領銀承辦各員可查。隨嚴訊領用銀兩之達克守等三員。各堅稱照數收領。並無短發。至伊等承辦事務。均有細帳呈驗。只求查勘覈實。反覆嚴究。供無異詞。並據弘昫供稱。我因錦州。蓋州。牛莊。三處協領缺分較好。令

其量為幫貼實未授意斂銀並不知伊等有斂派之事質之富伸保等供亦相同請將富伸保雅爾善照例從重問擬發往烏魯木齊効力贖罪常寧依律問擬滿流照例枷責發落七十一等各員分別擬以革職以及聲請開復免議餘犯分別杖枷無干者概行省釋弘昫請革職交宗人府會同刑部從重治罪莽古賚交部嚴加議處富察善等分別議處案內濫派各項銀兩於各名下照追入官等因一摺已批該部議奏矣弘昫如果與所屬通同作弊藉差派斂入已則罪無可逭即當從重懲治以伸法紀今訊明於總局銀兩實無絲毫染指亦未授意派斂不至革職治罪但身為將軍於辦理差務令屬員幫費而於錦州科派之事又漫無覺察實屬糊塗辦理不善咎亦難辭弘昫著加恩以散秩大臣効力贖罪不必在御前侍衛上行走餘著各該部覈擬具奏○以署工部侍郎申保為禮部

侍郎○以禮部侍郎阿肅為正藍旗漢軍副都統○以故三等伯亨一姪呼圖靈阿三等男明惠弟永德各襲爵○甲戌賑卹安徽當塗蕪湖繁昌合肥廬江巢縣壽州宿州鳳陽懷遠定遠靈璧鳳臺阜陽霍邱亳州蒙城六安霍山泗州盱眙天長五河滁州全椒來安和州含山建陽廬州鳳陽長淮泗州滁州等三十四州縣衛本年水旱災貧民○賑卹湖南湘陰巴陵臨湘華容平江武陵桃源龍陽澧州安鄉安福長沙善化瀏陽岳州等十五州縣衛本年旱災貧民並蠲緩額賦有差○賑卹甘肅皋蘭紅水縣丞金縣渭源循化狄道河州靖遠沙泥州判隴西寧遠安定會寧通渭漳縣岷州洮州平涼靜寧隆德固原合水武威鎮番平番靈州花馬池州同中衛涇州鎮原靈臺清水肅州高臺安西玉門敦煌等三十七廳州縣本年雹蟲旱災貧民並蠲緩額賦有差○豁除江蘇長洲縣坍沒田二

十八頃八十四畝有奇額賦○是日巳亥年立春順天府進土牛春山寶座○乙亥諭軍機大臣等據周元理奏近日保定省城錢價較往年增長數十文若至歲底民間買賣殷繁恐市價益致昂貴現於庫存錢內撥錢五千串照搭放兵餉之例交清苑縣轉發鋪戶出易市值自必平減等語自應如此辦理京城從前錢貴時曾設官局平價未能有益蓋京師地面寬廣稽察匪易市僧轉得藉口居奇是以不復辦及而十餘年前錢價忽然平減直至於今並非官為辦理今京師錢價較常雖昂亦只可聽從其便大約度歲以後價必漸平至保定省城雖云人烟稠密其錢鋪究屬無多易於查禁且向來年底屢有發錢平價之事衆皆習以為常奸僧無從壟斷自可於民間日用有濟但須董飭所屬留心體察勿使囤積轉販令市中錢貨流通閭閻方得霑實惠將此傳諭知之仍俟發錢出

易旬日後錢價能否就平據實覆奏尋奏發錢出易後每銀一兩較前減價三十餘文報聞○又諭據勒爾謹奏查訊安肅道陳之銓管門家人袁添福有與張鑾交結及經手銀兩等事該犯現在口外謀生已飛咨緝拏等語自應將袁添福即速緝獲嚴行審訊務得確情從重定擬並將各犯嚴加詰究陳之銓是否知情不可庇護據實分別奏奏至大河驛長隨蕭姓於馬萬龍等裝載玉器經過膽敢訛索千金輒行私放其情罪甚屬可惡前已屢諭查拏何以尚未據奏緝獲起解著再傳諭勒爾謹即將蕭姓長隨速行拏獲派委妥員解京沿途小心管解毋稍疎懈○又諭據李永鄴奏山西省城於十二月十一日得雪三寸有餘并據太原汾州等屬具報於初六初七等日各得雪自三四寸至六寸八寸不等等語覽奏欣慰已於摺內批示矣晉省各屬得雪有至六寸八寸者可為優渥已延

三何以未經具奏。殊不可解。著傳諭巴延三將此次得雪。是否優霑。及該撫因何未奏緣由。即行覆奏。尋奏得雪實在優渥。因各屬報到後。省城十五日適又大雪。故臣於十六日一併具奏。致在李承鄴拜摺之後報聞。○山東巡撫國泰奏。東省麥收歉薄。現在穀價。每石七錢。至一兩不等。明春青黃不接。恐市價漸昂。應行減糶。酌議市價一兩以上者。減銀五分。一兩一錢者。減一錢。一兩二三錢者。減二錢。至一兩三錢以上者。概以一兩一錢出糶。照例先動社倉。次及常平倉雜糧穀石。報聞。○命輔國公積拉堪。在散秩大臣上行走。○丙子。諭明歲浙江省。係輪應蠲免錢糧之年。該省溫台二府。所屬玉環廳額徵租穀二萬二千六百一十九石四斗七升有零。又海寧州沙地。應納租銀二千五百六兩八錢五分有零。本不在應免之例。第念此項銀穀。按畝輸將。實與地丁無異。若照舊徵收。小民未

免向隅。著加恩將前項租穀租銀。一體蠲免。俾瀕海黎民。均霑實惠。該部即遵諭行。○又諭本年安徽各屬。被災較廣。太平。廬州。二府行月米石。因災緩缺。建陽。廬州。滁州。三衛軍丁口糧。未免拮据。著加恩將前項緩缺米六千五百二十石有零。各按水次。於太平。廬州。二府屬熟田漕糧內。照數撥抵支給。統俟來年開徵後。歸還漕糧起運。俾幫丁口糧藉資接濟。以示體恤。該部即遵諭行。○諭軍機大臣等。據圖思德奏。拏獲流犯龍鳳祥。將妄誕語句。鐫刻圖章。黏貼印譜。分作上下兩卷。實為玩法。現在嚴訊該犯。曾否傳播。務得確切供情。從重究擬。等因。一摺。並將搜獲印存二本。黏簽呈覽。朕細加搜閱。並無悖逆不法字句。毋庸照逆案辦理。惟語多傲慢。必係疎狂浮薄之徒。且該犯曾任職官。獲譴在配。尤應安分守法。乃敢將狂放語句。鐫刻圖章。希圖獲利。自有應得之罪。且亦不便存留內地。將

來審明定案時。將該犯發遣伊犁等處。亦足蔽辜。將此由四百里傳諭圖思德。并令李侍堯知之。○丁丑。諭軍機大臣等。本年夏間。因京畿麥價漸昂。諭令畢沅。將陝省常平倉所貯麥石。酌撥五萬。轉運京城。以備平糶之用。嗣據該撫陸續運到。發廠平糶。市價漸平。即將餘麥三萬石。存貯在倉備用。現在京師麥價又復昂貴。因諭部臣。即將前麥發廠平糶。數日以來。市麥價值漸平。於民食甚為有益。今歲豫東二省。已普種秋麥。明歲似可望有收。但現距麥收。為期尚遠。當此青黃不接之時。商販尚不能流通轉運。不可不豫為籌辦。著傳諭畢沅。迅速查明常平麥石內。能否再酌撥麥四五萬石解京。據實奏聞。如能再撥若干萬石。即於河路可行時。仍照今年之例。由豫省轉運。一面辦理覆奏。一面知照豫省。備辦接運。將此由六百里諭令知之。仍由驛六百里覆奏。○又諭。刑部查訊江西贛關監

督委員杜持元。領解該關稅銀短少平頭銀兩一摺。據杜持元供。上年十一月護理贛南道許蔭楷。委解該關盈餘稅銀時。委通判宋登崙彈兌封好。我領銀時。並未逐封再兌。即將前項銀兩。眼同宋通判。裝鞘封固。又應加平餘銀七百六兩零。另裝一鞘。赴部交納。經庫驗明。鞘封印烙。及劈鞘彈兌。每鞘內短銀四十五兩。至五六十兩不等。除將另鞘平餘銀七百六兩零補交外。尚短銀一千七百二十八兩。當即具稟本道。寄銀完帑。並先措銀二百兩。赴部交納。我實在是領銀短少。並無侵挪情弊等語。關稅銀兩解部時。理應令委員當堂彈兌明確。領解部庫交收。但有短少。惟該委員是問。茲贛關盈餘銀兩。短平至一千餘兩之多。現據刑部查訊。該委員供稱。實係領銀短少。並無侵挪情弊。但係該員一面之詞。未足憑信。著傳諭薩載。會同郝碩。即提訊通判宋登崙及經手之關書人等。將原發

銀兩是否平兌短缺。及該委員有無侵蝕之處。秉公查訊。據實具奏。不得稍存瞻徇。以便交部覈擬。所有短平銀兩。並令該撫速飭該道。另委妥員補解。勿再遲延。所有刑部原摺。並著鈔寄閱看。○軍機大臣議奏。適拉遜德成。辦理岫巖。熊岳。復州。三處城垣。意見不同。臣等遵旨詢問。查得岫巖地方卑窪。舊城基址較高。應即就該處加修。將衙署倉庫。移建城內。復州土性鬆浮。若城垣根腳。外用磚修。內填灰土。不能堅固。應將拆下石料。挪砌俱用石工。至熊岳城南逼近沙河。應於臨河堅築泊岸。再於上游添設挑水壩。俟興工時。度地辦理。商之邁拉遜。德成等。均無異說。請仍交伊等酌辦。從之。○戊寅。諭。據袁守侗等奏。大學士高晉。前在八堡工次。偶患咳嗽。痰中帶血。嗣復受風寒。至本月初十日以後。飲食少進等語。朕心深為廕念。著派乾清門侍衛一等子布彥達。齎帶同太醫院堂官陳世官

馳驛前往河南診視。俾得速痊。用示優眷。○諭軍機大臣曰。高晉等奏。儀封十六堡漫工。已於十八日寅時合龍。隨即馳奏。正在督率將備等。趕緊加鑲追壓。乃東壩忽又有蟄陷。至十九日寅時。連金門全塌。塌去十餘丈。西壩亦平蟄七八丈。現在搶護出水。可期保住等語。今歲河南漫工。屢築屢蟄。久切繫懷。昨聞奏報合龍。方為稍慰。不意復有蟄塌之事。為從來堵築漫口所未有。實不解係何故。據高晉等奏。請將伊等交部嚴加議處。轉可不必。高晉等在工督辦。今工作未經堅妥。自不能辭咎。但伊等俱係屢經獲譴之人。即再予以議處。仍不過革職留任。及革任註冊。既不足以示懲。亦復無益於事。且朕於此事。亦覺抱愧。又何顏將若輩議處乎。此摺竟毋庸交部。止將昨日議敘之旨。撤回。作為尚未辦竣之局。且俟合龍妥固。再為發鈔可耳。至所稱東壩裏六七丈裂縫尺餘。其時外水湧高溜

勢湍激。隨鑲隨墊等語。此固保護未能周慎所致。但外水湧激。自係隄外存積之水。向內流注於全河。離隄尚遠。或可藉外水趨河。刷動中泓。逼溜東注。於全河形勢。似不為大礙。此時轉不必急與水爭拒。徒費料作。且不妨稍緩施工。俟外水勢平。不能內漾。再上緊加工堵築。自可期事半功倍。若河身距隄甚近。則又當另酌機宜。設法妥辦。朕見及此。似屬事理之正。然非身臨其境。得之目覩。可以相

機指辦也。不知高晉等曾如此籌度否。且以朕所指示為何如。著傳諭高晉等。就該處情形。及諭旨指詢處。妥協酌辦。並將墊塌處。及外水形勢。繪圖貼說呈覽。又據袁守侗等奏。高晉現在患病。深為廕念。已派太醫院堂官陳世官。令乾清門侍衛布彥達。齎帶同馳驛前往診視。高晉務須加意調攝。不宜過勞。即堵築要工。止須在寓與眾詳悉商酌。不必力疾親在隄上辦理也。此旨著由六百里加緊

發往。仍將應行覆奏事宜。及高晉近日病體若何。即行由驛覆奏。○已卯。諭軍機大臣等。戶部議駁勒爾謹請減寧夏府屬捐監糧數一摺。前據勒爾謹以寧夏所收糧數。不敷支給。請照蘭州等處之例。每名八十石減數收捐。經戶部議駁。朕降旨令該督將實在情形具奏。茲勒爾謹仍以不敷支發之說陳請。而戶部則稱查據該府歷年冊報出入總數。覈以現在報捐情形。無慮不敷等語。戶部所言。

頗為近理。朕亦不能代勒爾謹曲為之解。駁詰該部也。著將戶部摺內。朕折角處鈔寄勒爾謹閱看。令其據實覆奏。如果該府屬另有籌辦情形。勒爾謹不妨據實陳奏。候朕酌量降旨。○辛巳。

孝莊文皇后忌辰。遣官祭。

昭西陵。○諭八旗入官地畝。向來原准賣給八旗官兵。嗣因不肖之徒。私行賣與民人。種種滋弊。始令入官取租。現在生齒日繁。八旗人

等園地俱在京城附近五百里內數目有限若仍將此項地畝入官取租旗人產業不免日漸短少嗣後所有入官園地加恩仍照舊例賣給官兵著都統等嚴密稽查不許私自賣與民人以示矜恤八旗之意○是日起

上以歲暮禋祭

太廟齋戒三日○壬午以二等侍衛烏爾圖納

遜為鑲紅旗蒙古副都統三等侍衛承安為

鑲紅旗漢軍副都統○以原任錦州副都統

德福為熊岳副都統○癸未以歲暮禋祭遣

官祭

太廟中殿

後殿○甲申禋祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○遣官祭

太歲之神○諭軍機大臣等據索諾木策凌

奏稱遵旨將素賚瑞解京審訊後交院照例

定罪加恩留其王爵予以罰俸等語所見尚

是素賚瑞到京時著軍機大臣會同該院定

擬具奏再降恩旨因思額敏和卓自康熙年

間歸順安插瓜州後以軍功封爵令回原游

牧居住其從瓜州隨往之人乃伊真正屬下

至吐魯番本係準噶爾地方屬莽噶里克管

轄後莽噶里克被殺始歸額敏和卓此皆國

家兵力威服與伊無涉况吐魯番係回城衝

要令伊等世守難保無事。今素賚瑞既經獲罪。即當乘機辦理。朕意將額敏和卓地方舊日屬人。仍令管轄。其餘地方俱令徹出。另放阿奇木伯克。索諾木策凌。尚屬曉事。著諭令酌量情形。妥悉籌畫。○以鳳凰城城守尉普正。為三姓副都統。乍浦協領舒楞額。為杭州副都統。○乙酉。諭軍機大臣曰。高晉等奏堵築儀封漫口情形一摺。亦祇可如此辦理。今擬將引河挑深。宜即妥速為之。此次引河不

實錄卷一百三十三

三

能得力。究係原挑過淺所致。伊等本圖省費。而所費愈多。不可不引以為前車之鑒。據稱現在口門上水十丈。下水九丈。擬將口門收至二三丈時。儘力多壓厚土。俟引河挑深。開放掣溜。再將壩工堵閉等語。自屬正理。但口門收窄後。河底愈深。溜勢愈急。施工自難期速效。昨時和驛將合龍時。曾經指示兜袖之法。若易合龍固佳。若復有變局。或照前說。將此處金門東壩之埽。酌展向南。西壩之埽。酌

展向北。使為兜袖之勢。則急湍至此。或成迴溜。合龍自應較易而速。因於圖內用硃筆標識。高晉等宜急熟籌。妥協辦理。不必拘於遵旨也。再閱圖內現挑引河之處。距漫口太近。且不得勢。亦係伊等原辦時。止顧惜費。未將河形大勢。通盤籌覈所致。今就圖觀之。引河本當向北施工。因於圖內用硃筆標示。若伊等初時。即就其處挑挖引河。雖工大費多。而事或可早歲。乃專就地近工小起見。所費雖

實錄卷一百三十三

三

覺少省。今復經淤墊重挑。且屢開屢塞。前工盡成虛擲。恐其費更不止於硃筆所指處興工之多矣。今已辦定。所謂成事不說。然其間孰得孰失。顯而易曉。伊等深思之。能無悔乎。又高晉等前奏。十八日儀封合龍之摺。請於十六堡。捐建大王廟一座。今閱圖內十六堡原有大王廟。不應復建新廟。黷祀不經。轉難冀其靈應。譬如內而六部。各有職掌大員。設或另添一署。別置一員。令其同管一部。則事

將誰屬。其下更何所適從。祀神之道亦猶是也。高晉等欲籲河神默佑。止宜向現有之大王廟。誠心祈懇。自可望其効靈。即或欲請御書扁額。亦止應俟工成後。請扁於現有之廟內懸掛。以答神貺。又何必有一新工。即新建一廟乎。朕因豫省漫工。晝夜懸念。今為日愈久。盼望愈殷。高晉等務善體朕意。悉心籌度。率屬實力速辦。以期及早合龍。必須於驚蟄節前辦竣。方為妥善。此旨及圖。著由六百里加緊發往。仍著將現在施工。并接奉朕旨後。籌度情形。及高晉曾否稍覺健旺。思飲食之處。即由驛覆奏。如已經合龍。即一面加工培護。一面由六百里加緊奏聞。明日即交新年。專盼喜音速至。○是月。署兩江總督江南河道總督薩載奏。查洪澤高寶諸湖水勢漸消。現已將山盱五滾壩封堵。運河東岸各壩亦趕緊堵閉。至清口東西壩前留口門三十八丈。現在接續補築。酌留二十丈。以資收蓄。俾

濟來春重運報聞。○山東巡撫國泰奏。昌邑縣新修沿海隄工。於十月竣事。臣親赴查勘。計長五十六里三分。工程穩固。擬於隄內種植柳株。隄外試種葦草。其通隄潮水頂衝處。責成該府。每年履勘。令本處認墾地畝居民。出夫修補報聞。○陝西巡撫畢沅奏。報得雪得旨。欣慰覽之。摺內稱。晉豫接壤。商民多從渭河販運糧石接濟。已飭屬任其流通。批。更可嘉。又稱。本地糧價。因此漸增。又批。此自不能免。又稱。榆林綏德一帶。秋禾被霜。現飭該處於歲內豫行借糶。又批。更好。○是年。追予出師金川陣亡同知胡邦佑一員。經歷許景淹一員。把總王玉等二員。祭葬卹賞如例。俱入祀昭忠祠。○旌表孝子江西等省賴克信等七名。守節合例八旗閑散宗室明奎妻崇氏等五口。覺羅延貴妻齊馬禮氏一口。滿洲護軍額楞太妻赫舍哩氏等一百八口。蒙古前鋒豆金斗妻李氏等二十三口。漢軍閑散

羅極妻康氏等十七口。內務府。包衣馬甲五達色妻薛氏等五口。奉天等省。駐防馬甲扎藍太妻兀扎喇氏等一百四十口。直隸等省。民徐應亨妻馬氏等四百六十口。未婚守志。直隸等省。民高瑜聘妻蘭氏等十六口。夫亡殉節。山東等省。民解宜萃妻李氏等十一口。百歲壽民。婦直隸等省。鄭崇玉等十六名口。各給銀建坊如例。○會計天下民穀數。各省通共大小男婦二萬四千二百九十六萬五千六百十八名口。各省通共存倉米穀三千九百四十五萬七千八百八十九石四斗三升六合零。

大清高宗法天隆運至誠先覺體元立極敦文奮武孝慈神聖純皇帝實錄卷之一千七十三

大清高宗法天隆運至誠先覺體元立極敷文奮武孝慈神聖純皇帝實錄卷之一千七十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理御史理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄 次臣慶桂  
總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務  
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次  
尋常紀錄十四次臣德瑛經筵講官太子少保工部尚書紀錄六次臣曹振鏞等奉  
敕修

乾隆四十四年己亥春正月丙戌朔

上詣

奉先殿行禮 詣

堂子行禮 詣

大高殿

壽皇殿行禮 遣官祭

太廟後殿 丁亥諭上年安徽亳州蒙城等處

因上游黃水漲溢田廬淹浸被災亦重而懷

遠宿州等十州縣有先被旱而復被水者節

經降旨令該撫切實查勘蠲賑兼施災黎自

可不致失所第念東作將興當此青黃不接之時例賑將停麥秋未逮小民口食恐尚不免拮据著再加恩將災重之亳州蒙城二州縣九十分災貧民無論極次俱各加賑兩個月其八分災貧民及阜陽懷遠宿州鳳陽靈璧壽州鳳臺泗州盱眙五河天長等十一州縣鳳陽長淮泗州三衛七分災以上貧民無論極次俱各加賑一個月至無庸加賑各地如有應行的借口糧籽種之處並著該撫察

看情形分別妥辦務俾均霑實惠用溥春祺

該部即遵諭行○又諭上年湖北漢陽安陸

荊州各府屬夏禾被旱入秋漢江盛漲又被

淹浸災分較重業經降旨該督撫加意撫綏

照例給賑以示優恤第念今春正賑已畢尚

屆青黃不接之時民食未免拮据著再加恩

將江夏漢陽漢川黃陂孝感鍾祥京山潛江

天門荊門雲夢應城江陵公安石首監利襄

陽宜城十八州縣及屯田坐落各州縣之武

昌武左沔陽黃州德安荊州荊左荊右襄陽等九衛成災七八九十分極次貧軍民俱各加賑一個月以資東作其無庸展賑各州縣衛亦著察看情形分別酌借口糧籽種俾得盡力南畝以待麥秋該督撫等董率屬員實心經理務使窮簷均霑渥澤該部遵諭速行○又諭上年豫省儀封考城一帶黃河漫口被災較重朕心深為軫惻業經降旨截留漕糧二十萬石并留豫省新漕十萬石又先後撥運兩淮鹽課銀一百萬兩戶部庫銀六十萬兩命尚書袁守侗前往查辦董飭有司實心賑恤並節經降旨蠲緩兼施災民自可不致失所第念藉賑貧民向資官廩入春東作方興正在青黃不接之際若驟行按例停止未免餬口維艱深為軫念著再加恩將被災較重之儀封考城祥符陳留杞縣商邱寧陵睢州鹿邑柘城十州縣十分災之極貧加賑兩個月十分災之次貧同九分災之極次貧

各加賑一個月咸俾惠洽始和其餘被災較輕各地方有應行酌借口糧籽種之處該撫察看情形妥協辦理務使窮簷均霑渥澤副朕加惠無已至意該部遵諭速行○戊子諭前據陳輝祖奏請撥辦賑銀七十萬兩業已降旨撥給其奏片聲請另撥銀六十萬兩以備加賑之需經軍機大臣具奏以該撫所稱尚屬約畧之詞未便遽撥令該督撫將實在應需加賑折色銀數若干詳悉查覈覆奏到

日再定意在覈實辦理並非為節省帑項起見也今據三寶等奏江夏等十八州縣及九衛所加賑一月口糧實需折銀五十九萬八千七百六十餘兩擬借用司庫封貯銀兩及寄貯荊州滿營馬價並鑄錢餘息等銀俟將來陸續歸款此時無庸請撥等語所奏非是朕惠愛黎元痼瘼在抱凡遇水旱偏災無不即發帑金多方賑卹期無一夫失所即數逾百萬從不稍有吝惜此天下臣民所共見共

知者況今庫藏充盈其所請之六十萬兩尚不及庫貯百分之一且用以贍卹災黎朕更何所靳乎三寶等既經查明實需加賑銀約六十萬即應奏請撥給乃紛紛籌借動用而以暫時無庸撥發為詞試思所借各款將來仍須分別歸還何必徒費一番周折三寶等非特不能善體朕意亦并不善於辦事矣如照伊等所奏恐外間無識之徒妄生議論且恐他省督撫聞之漫為臆度遇有應辦災賑轉致諱匿所係甚大封疆大臣豈可不以保赤為懷存此惜費小見乎著於戶部庫帑內即撥銀六十萬兩解往該省為加賑之需該督撫務董飭所屬實力妥辦使貧民均霑實惠該部遵諭速行並將此通諭中外知之

是日起

上以祈穀於

上帝齋戒三日○己丑諭曰陳輝祖著調補河南巡撫其湖北巡撫員缺即著鄭大進補授

陳輝祖接奉諭旨即將印信交與三寶兼署迅速前往河南鄭大進俟陳輝祖到後將一切現辦事宜詳晰告知即行起程赴湖北新任俱不必來京請訓○又諭上年江蘇上元等州縣衛夏間雨澤愆期高阜地畝被旱成災而高寶一帶因湖河水勢盛長開壩宣洩下河低田被淹致成偏災業經降旨令該督撫卹蠲緩俾災民不致失所第念東作將興青黃不接茆簷口食未免拮据著再加恩將江浦六合清河高郵甘泉東臺泰州海州沐陽上元江寧句容丹陽金壇山陽阜寧桃源安東鹽城江都興化寶應蕭縣宿遷吳縣溧陽等二十六州縣又鎮江淮安大河揚州徐州五衛八九分災之極次貧及七分災之極貧各加賑一個月俾資接濟其餘無庸展賑各州縣衛今春亦有應行酌借籽種口糧牛具之處並著該督撫察看情形分別妥辦務俾均霑實惠以普開韶恩澤該部即遵諭

行○又諭昨歲甘肅皋蘭等三十六廳州縣因夏間雨澤愆期以致田畝被旱成災節經降旨令該督等切實查勘賑恤兼施俾無失所第念皋蘭河州靜寧固原平番安定涇州等七州縣被旱情形較重開春正賑既畢民食未免拮据著加恩各展賑一個月用敷春澤其餘被災較輕地方雖亦經照例賑恤如今春尚有缺乏籽種口糧之戶並著該督隨時體察酌借以資接濟勒爾謹務董率所屬實心料理俾得均霑實惠以副朕軫恤災黎至意該部遵諭速行○諭軍機大臣等去冬河南山東山西等省俱屢經得雪頃據巴延三奏山西省城於臘月二十八九等日得雪八寸有餘其勢甚寬霑被必廣惟京城自十月初微雪以後至今未霑雪澤而直隸各屬亦未據周元理奏及朕心盼望甚殷昨濃陰竟日頗有釀雪之意朕問夜達旦不能安寢曉復開晴又成虛望更為焦急豈畿輔政事

或有缺失致不能感召祥雲朕用是益深寅畏著傳諭周元理於辦理諸務倍加謹凜以期仰迓

天和至保定一帶自尚未得雪豈迤南迤西各屬與河南山東山西境壤毗連者亦未一律普霑該督何以亦未據奏報並著周元理即行詳悉查明迅速覆奏有應為綢繆之計亦當早為留心但不過於出示飭辦反致民間增長米麥價也將此由五百里諭令知之尋

奏保定省城去年十二月二十九日得雨不及一寸天津河間廣平大名宣化承德易州等府州屬均於十二月二十七八九等日先後得雪一二三寸不等餘未報得雪各屬因去秋雨透土潤無礙麥苗現在糧價亦平無力之戶已據各屬照例詳請酌借籽種報聞○庚寅

上詣

南郊齋宮齋宿○辛卯祈穀於

上帝

上親詣行禮○壬辰

世祖章皇帝忌辰遣官祭

孝陵○

上詣

大高殿行禮○諭曰高麗係外藩遇貢使來時

恐中途失落行李曾經降旨著派幹員照管

今送高麗貢使至永平府該協領竟漫不經

心派雙目失明官華塞管送殊屬非是協領

福珠里等著交部嚴加議處再華塞目既失

明不能當差何以不令離任且入於應賞數

內著扎什扎木素據實明白回奏○諭軍機

大臣等據畢沅奏籌辦運京麥石酌擬在附

近水次之藍田涇陽等地方撥常平倉貯

并收捐監生麥五萬石均勻配載由渭入河

分起押送銜尾前進仍在前次交收之陝州

會興頭地方令豫省委員接收轉運赴京等

語所辦甚好著傳諭鄭大進即派委妥員雇

辦車輛船隻豫備接收迅速轉運送京並將

應辦事宜於陳輝祖到任時詳晰告知令其

妥協辦理此旨著由五百里發往至直隸接

收轉運諸事並著周元理循照向例速籌妥

辦運至通州交倉場侍郎舒常等並諭周元理及

就近傳知倉場侍郎舒常等並諭周元理及

畢沅知之○癸巳

上詣

雍和宮行禮○諭軍機大臣等據李湖奏大計

藩臬考語一摺內於布政使陳用敷用禔躬

二字殊屬未當禔躬二字本不經見惟揚雄

法言有禔身之語禔當作安字解後世誤以

禔為持字義且改身為躬已失本意然亦惟

庸爛時文中有之本非章奏所宜用而施之

考語尤屬不合此乃李湖不求甚解致蹈不

通之病除令軍機大臣改正發鈔外將此傳

諭該撫知之○甲午享

太廟遣鄭親王積哈納恭代行禮○

上詣

大高殿行禮○遣官祭

太歲之神○諭據永貴奏鄂蘭舊病復發驟難痊愈。敦福雖護印辦事究係一人。瑪興阿現駐葉爾羌。富興到彼請令瑪興阿赴喀什噶爾。協同敦福辦事等語。鄂蘭現既患病。著緩程來京。富興至葉爾羌時。瑪興阿不必回和聞。即赴喀什噶爾代鄂蘭辦事。和聞事務無多。德風一人足資辦理。瑪興阿之缺不必

另行簡派○諭軍機大臣等。據薩載奏。攔黃壩外添築束水隄工一道。為陶莊新河重門保障等語。所辦甚好。自應如此添築。至黃河自周家莊以下。形勢稍曲。且中河口所出之水。橫衝抵溜。河水易於迴漾生淤。是其受病之處。高晉等前此議移中河口向下。自屬有益。因令該督等悉心查勘。熟籌妥議。嗣據高晉等奏稱。現擬將中河口門改在下游李家莊。定於回空未到以前堵舊開新。使清黃三

道並行東注。可期清水暢流無阻。仍俟中河口門改由李家莊出口後。再看黃運湖河衝刷形勢。如有應行酌辦之處。再行請旨。又於九月內。據薩載奏稱。因洪澤湖水暢出清口。黃河內清水盛大。若將李家莊新運口門開放。水勢內外相平。不能迅流暢注。自應慎重辦理。目下回空漕船已經南下。仍由楊莊出口。進行其中河運口。俟黃河水勢消定。或冬間。或春初。相機開舊開新等語。今閱圖內所

繪情形。中河仍由楊家莊出口。是冬間並未籌辦及此。茲已屆春初。因何尚未堵舊開新。抑或另有酌辦之處。著傳諭薩載。即將現在情形詳悉據實覆奏。將此由四百里傳諭知之。○又諭曰。畢沅奏覆查鞏川省逃兵一摺。並將已未獲各兵名數開單進呈。朕閱覈單內所開自陝省調赴軍營脫逃者。共一百六十八名。現在僅拏獲正法過三十七名。未及十分之四。其自四川甘肅綠營調赴軍營脫

逃因原籍陝西。咨明查緝者共四十三名。已拏獲正法者不過三名。尚不及十分之一。此等兵丁久經國家養訓練及至調赴軍營。不能奮勉出力。乃敢相率潛逃。其情罪極為可惡。必當按名拏獲正法。以示懲儆。計該犯等見大功久歲。查拏漸疎。自必潛回原籍藏匿。冀延殘喘。文武員弁。如果實力查緝。自無難盡數就獲。乃至今拏獲者。尚屬寥寥。究係各該地方員弁。未能實力辦理之故。著傳諭畢沅嚴飭各屬。設法上緊嚴緝。務期盡數弋獲。一面正法。一面奏聞。毋任稍有疎懈。致令漏網稽誅。將此遇各督撫奏事之便。傳諭知之。○安南國王黎維禱奏謝國民陳廷暄等冒充使臣跟役入邊。蒙恩釋回。交該國王自行懲治。並稱另具表貢。專員謝恩。得旨覽王奏謝知道了。不必再行具表。專員謝恩。該部咨行該國王知之。○署兩江總督江南河道總督薩載奏丹徒丹陽縣境運河為江浙漕

船要道。江潮灌注挾沙而行。兼岸陡泥鬆。易致淤墊。請將上屆未經估挑及挑而復淤各段丹徒境自江口至丹徒鎮以南金涵口丹陽境自黃金溝至大王廟等處。動樂生洲租息銀給該二縣挑濬。並責成該道府督勸報聞。○乙未大學士管兩江總督高晉遺疏聞。諭曰。大學士管兩江總督高晉。品行端醇。材猷練達。老成敦樸。體用兼優。由州縣洊陟封疆。宣勤奉職。數歷多年。自簡畀綸扉。仍管兩江總督。秉公持正。董率有方。其兼管南河事務。亦能經理得宜。深資倚任。昨以豫省漫口工程緊要。特令馳赴工次。督辦堵築事宜。近據索守侗等奏其染患痰咯之症。不能眠食。即派乾清門侍衛布彥達齎帶同太醫院堂官陳世官馳往診視。並諭安心調養。以冀速痊。茲聞溘逝。深為軫惜。著仍派乾清門侍衛布彥達齎馳驛前往奠醢。並加恩入祀賢良祠。其任內革職降級註冊之案。俱著開復。所

有應得卹典。仍著該部察例具奏。○又諭曰。三寶著補授大學士。仍暫行兼管湖廣總督事務。俟朕酌量得人。另簡總督後。三寶再行來京。入閣辦事。兩江總督員缺。著薩載補授。仍兼管江南河務。所有江南河道總督員缺。著李奉翰署理。○丙申。諭曰。廣西提督員缺。著五福補授。其四川松潘鎮總兵員缺。著劉倬補授。所有五福辦理新疆屯田事務。即著劉倬前往駐劄接辦。○戶部議准。成都將軍

特成額奏。兩金川新收屯糧。請照打箭鑪至西藏一路臺站貯糧例。存倉及支放兵糧。每石准銷耗米五合。撥運別屯。每石准銷盤折一升。並令逐年冊報部覈從之。○丁酉。諭。經筵典禮。兩年未經舉行。本年二月。已過大祥。且經筵為闡學崇經。又無宮懸之奏。自可如常循舉。今以二月初四日御經筵。所有應行事宜。各該衙門照例豫備。○又諭。聞劉秉恬之母。年逾八旬。現在患病頗重。病中思念其

子甚切。劉秉恬承辦軍需奏銷業將完竣。著即馳驛迅速回京侍奉伊母。聞子克日回京。自必心生欣喜。病勢或可漸痊。將此速行傳諭知之。○又諭。據巴圖奏。喀爾喀郡王車木楚克扎布。於上年十二月病故。等語。車木楚克扎布。前在軍營。著有勞績。且係喀爾喀中舊人。昨奏伊患病。朕即派乾清門侍衛伊魯爾圖。帶同御醫前往診視。以冀痊可。茲聞溘逝。朕心深為軫惻。著即傳諭伊魯爾圖。令其

就近備辦茶酒致奠。並加恩賞銀五百兩。就近於烏里雅蘇台庫貯銀支用。○以喀爾喀副將軍車臣汗。車布登扎布。為烏里雅蘇台叅贊大臣。○戊戌。

上詣

大高殿行禮。○諭。八旗入官老園田地。向皆令八旗官兵認買。後因不肖之徒。私行典賣。諸弊叢生。始降旨不准認買。租由官取。今旗人生齒較繁。此項田地。若仍由官取租。旗人產

業漸少於伊等生計無益復降旨將入官老園田地加恩仍准官兵分買並交戶部八旗查覈議奏今又詳思八旗人衆內有家奴者無多分買之田與京相近尚易取租倘分買之田過遠告假取租不但徒耗盤費更恐百姓刁難租銀得否尚在未定而每月錢糧先扣存地價於伊等生計更屬無益朕意此項田地莫若仍由官取租俟每歲租銀送交戶部時分給八旗兵丁則伊等既不費力又不須扣存地價於生計甚有裨益著交戶部八旗將如何分給之處妥議具奏以副朕惠養旗人之至意○諭軍機大臣等連日盼望儀封合龍之信甚切茲據索守伺等奏西壩復有蟄塌現擬遵照兜袖法改做兩壩頭兜挑以期迴溜分入引河等語亦祇可如此辦理現今口門之水深至七八丈若照常下壩著力較難茲將兩壩頭展越斜兜使口門之水逼成迴溜即可相機如法堵開索守伺等務

督率將備實力妥速為之又據稱引河頭去口門稍遠因酌開引溝一道長三百餘丈直達引河擬俟口門相對處之斜壩鑲築將成即察看溜勢先放引溝庶兩壩不致著重等語此亦便捷之一法閱圖內所繪擬開之引溝稍向南仍恐紆溜尚不能得勢因用硃筆向北改直標識此旨到時如引溝業經挑成可期挑引合龍自屬甚善或尚稍需時日即照硃筆標示處上緊趕辦以冀於事有益此次儀封堵築之事施工不可稍稽而合龍不可欲速總須斟酌萬全俾得永資鞏固方為妥善著將壩工引溝圖隨摺發往令各閱看至高晉自南河帶來之將備等於進埽諸事素所諳習自不致稍有舛誤而堵築施工亦衆目所共見更不能畧事粉飾今高晉已故恐伊等因無專轄董率之大臣心中或存觀望於工務甚有關係著傳諭索守伺等將朕此旨諭知該將備等令其照前出力勿稍懈

弛伊等皆南河得用之員。此次遠來協助。辦成時。顏面既覺有光。且其中果有出衆得力之人。朕亦必加恩獎錄。著素守同等。將南河將備。自正月初六日以後。每日如何竭力。辦工之處。詳細記明。俟合龍時。一併繕摺開單具奏。候朕酌量降旨。將此由六百里加緊傳諭知之。仍將辦理情形。若何由六百里覆奏。如已經合龍。即行加緊奏聞。以慰廑念。○已亥。

上詣

壽康宮行禮。○諭曰。安慶衛借帑贖田。應完六限銀一萬兩。應於乾隆四十四年徵完。第念該衛幫船。上年沿途剝淺。又在黃河口被風損壞九十餘隻。置備桅蓬什物。以及添補修塏。工費繁多。若按數全徵。丁力未免拮据。著加恩。將六限應徵銀一萬兩。除現在先徵一半銀五千兩外。其餘一半銀五千兩。遞展至四十五年完解。以紓丁力。該部即遵諭行。○

庚子

上詣

奉先殿

壽皇殿行禮

實錄卷之十四

千

大清高宗法天隆運至誠先覺體元立極敷文奮武孝慈神聖純皇帝實錄卷之一千七十四

大清高宗法天隆運至誠先覺體元立極敷文奮武孝慈神聖純皇帝實錄卷之一千七十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥正月辛丑諭曰副都統

銜索琳著赴藏辦事並加恩賞戴花翎○諭軍機大臣曰慶桂奏稱據阿克愛曼鄂拓克哈薩克穆色布等告稱伊族百餘人願投內地為奴僕等語前因伊犁等處人少哈薩克內有一二來投者俱收留安插今人民漸多若穆色布等百餘人來投即行收留將來聞風踵至多占內地於事無益但此時亦不必明言我處不便收留著伊勒圖咨詢阿布賚阿布勒比斯等將收留此輩於彼有無裨益

令其答覆諒阿布賚等必不情願嗣後來投者即可據阿布賚等覆文却之至現來告投之穆色布等即著慶桂曉諭云爾哈薩克等俱大皇帝之奴僕在內在外原無分別但業經將軍咨詢爾汗阿布賚等尚未覆文爾等且不必來曉諭後遵依則已如仍再三哀懇且暫收留俟阿布賚等咨覆到時再行遣回將此由六百里傳諭伊勒圖遵辦並著傳諭慶桂知之○軍機大臣等議覆伊犁將軍伊

勒圖奏稱伊犁屯田綠營官兵三千現經改駐眷兵需建城池兵房除綏定城祇須修補外餘屯請於塔爾奇溝口外之烏可爾博爾蘇克東察罕烏蘇霍爾果斯巴顏岱等處分別建築應如所請綏定城兵房修竣後令總兵帶駐中營官兵烏可爾博爾蘇克建城駐左營官兵東察罕烏蘇建城駐右營官兵霍爾果斯建城專設一營分駐叅將一巴顏岱建堡專設一營分駐都司一並於塔爾奇堡

內添房分駐守備一。從之。○壬寅。諭軍機大臣等。昨據袁守侗等奏。現擬遵照兜袖法。改做兩壩頭。并酌開引溝一道。直達引河。以期引歸正溜。就勢堵閉等因。祇可如所奏辦理。惟閱圖內所繪擬開之引溝。稍覺向南。恐紆溜不能得勢。因於圖內用硃筆向北改直。標識諭令袁守侗等。如奉到前旨時。尚未合龍。即照硃筆標示處。上緊趕辦。以冀安速。距今又越四日。尚未據袁守侗等續奏河工情形。深為懸厪。連日天氣融和。施工較易。未知引河挑濬如何。前次之失。究因引河未深。不能暢注所致。此次當以前事為戒。務將引河挑挖極深。較比黃河底。稍有建瓴之勢。然後相機放水。則引溜方能得力。兼以兜袖迴溜之法。或可及早合龍。而善後鑲填。亦更當鞏固。朕因此事。晝夜盼望。不能置懷。著傳諭袁守侗等。將現辦情形。若何迅速覆奏。此旨。著由六百里加緊發往。如已經合龍。亦即加緊具

奏。尋奏。儀封壩工。遵用兜袖法。已成新斜壩臺八丈。並將新下一埽。及新壩臺加厚。高舊壩臺數尺。隨後下一埽。溜勢逼開。由北而東。連東壩根入口門。其引溜溝西一帶北灘。屢有塌動。惟東壩稍著重。此時暫停下埽。俟西壩埽過東壩頭一二丈。水勢漸成迴溜。再將東壩進一埽。或兩埽。即可相機合龍。至新挑引溜溝工。已八分。其入水口門。及溝尾。接至引河第三段處。工日內可竣。引河九段。初挑深一丈五尺。六段以下。亦抽挑深溝。嗣因口門掣溜。引河復有淤墊。加挑深三四尺不等。並於正河底。接挑深溝六百餘丈。俾三段以下漸低。九段尾接正河處。得下注勢。又引河頭。及引溜溝外河。現在水不盈尺。所有攔水土壩。及各段土格。俱未開。擬先放九段積水。以驗果否深暢。未暢。加挑。俟新築斜壩漸兇。過東壩大溜。直逼引河時。開引溝頭土壩。使水勢建瓴直下。於兩壩兜袖中。相機堵合。合

龍後即將兩壩口門堵閉得旨所辦皆合機宜佇待合龍佳音之至○以扎薩克和碩親王諾爾布扎布為喀爾喀賽因諾顏部落副將軍○癸卯

上啟鑾謁

泰陵

泰東陵○諭朕此次敬謁

泰陵恭祭

泰東陵及四月釋服恭詣祭謁所有沿途經過

地方著加恩蠲免本年地丁錢糧十分之三該部即遵諭行○又諭曰福州副都統額爾布年已衰邁著原品休致福州有將軍一員副都統一員足敷辦事此缺著即行裁汰額爾布本係杭州駐防之人伊願赴原駐防處居住即令其前往如願來京居住亦聽其便○是日駐蹕黃新莊行宮○甲辰諭軍機大臣等據巴圖等奏杜爾伯特汗瑪克蘇爾扎布今歲年已十二理合遵旨令其入覲請於

本年木蘭秋獵時同本部落杜爾伯特人等遣往等語瑪克蘇爾扎布年已十二自應遵朕前旨令其入覲但明年七月班禪額爾德尼至避暑山莊瞻仰朕顏是瑪克蘇爾扎布與其今歲入覲莫若明歲前來既可以瞻仰朕顏又可謁班禪額爾德尼甚屬妥協著傳諭巴圖等傳旨令其遵行○是日駐蹕半壁店行宮○乙巳諭曰原任大學士高晉靈柩到京時著加恩令其入城○又諭曰大學士公阿桂差往河南查勘辦理善後事宜及賑恤情形著即馳驛前往所有隨帶司員俱著一體馳驛○諭軍機大臣曰袁守侗等奏籌辦儀工情形一摺據稱新斜壩之埽漸次鏤出兩面兜收溜勢自挑向北趨並遵照圖內標示處將西首淤灘切去四十七丈俾溝口愈向西北開寬溜勢到此自更可吸川下注再西壩展寬斜壩已占河面數丈大溜挑逼漸遠東壩下埽後水勢更向北趨引溝以西

之北灘。日有塌動。將來斜壩築成。自能挑迴。急溜暢達。引河等語。皆此時好機會。看來此次合龍。尚屬易辦。佇盼喜音。至另奏勘查隄岸。并籌辦善後事宜一摺。所奏未免太遲。據稱八堡新莊兩處要工。共估需銀二萬五千九百餘兩。交藩司榮祚照估發銀。委員趕辦。月內即可完工。其儀考新工。並時和驛隄外土堰及楊橋黑堦各隄岸。應辦善後。共估需銀十二萬三千零八十六兩。今桃汛將至。不

便再遲。應即於藩庫支撥。遴派勤能州縣分段實力築做。定限二月初一日興工。三月初十日以前一律告竣等語。善後工段固屬關係緊要。但自興工至完工。不過一月有餘。為期太迫。施工難免草率。未必能果有實濟。此乃姚立德因堵築之事。未能速竣。毫無主意。或更為屬員慫恿。致有此議。即袁守伺於河工本非素習。今於此事。未能悉其利弊。遂爾列銜會奏。伊等在彼。亦必不能親身履勘。使

各工皆實做實銷。則所辦仍屬有名無實。若祇顧目前。潦草塞責。及遇有伏秋大汛。仍不能抵禦。彼時即將袁守伺姚立德二人重治其罪。亦何益於事乎。大約工程。河臣及地方官皆所樂辦。袁守伺雖係欽差。但在豫日久。所謂久客成主人。恐不能力為主持。若有高

晉朕必無此慮也。今其事所關甚大。且豫省昨歲被災亦重。不可不遣重臣往視。已派大學士公阿桂前往豫省查勘善後各工。是否必須如此辦理。據實勘奏。於河務民生方有裨益。朕非因伊等估需十餘萬金。心存惜費。但恐徒費無益耳。朕於利益民生之事。從不靳多費帑金。即如豫省此次工賑。已發帑一百六十萬兩。豈於河防善後事宜。轉有所吝乎。如各工果係必需成做。能使工歸實用。帑不虛糜。即照原估多費一倍。朕亦無所靳惜也。現距桃汛為期不遠。施工不宜再遲。即著照伊等所奏。於二月初一日興工。設或其時

阿桂尚未到豫亦不必等候。致將來或稍遲誤。轉得有所藉口。不妨一面興工。俟阿桂到後。再加細勘。其虛實更可立辨。原屬並行不悖也。至袁守侗既奏辦此事。即有責成。未便遽離豫省。必須俟今年伏秋大汛過後。新工俱各平穩。方可回京。現在軍機處及刑部俱有人辦事。並不少袁守侗一人也。此旨著由六百里加緊發往。如儀封已經合龍。即速加緊奏報。以慰屢念。○直隸總督周元理奏。宣

化府城外西北瀕柳川河。常峪青邊口外諸山水匯歸。遇汛漲直逼城根。舊有護城壩二十四段。係分別平險。建築石土各工。近屢被水衝。勘明頂衝土工。應改石工。並添築石坦坡者七段。原石土工。應修者三段。請動司庫節年地糧銀趕辦報聞。○是日駐蹕秋瀾村行宮。○丙午。諭軍機大臣等。昨據袁守侗等奏。籌辦善後事宜一摺。恐所辦未必得實。因差阿桂前往查勘。并面諭一切矣。今復思伊

等所請辦之儀。考時和驛楊橋黑擇各隄岸工程。俱於二月初一日興工。三月初十日以前完竣。為期僅一月有餘。而欲辦十二萬餘兩之工。縱上緊趕辦。亦恐不能如期。歲事況水土工程。最難考覈。其挑挖成河者。一經放水。即已無跡可尋。至隄岸各工。做就後。設復遇河水漫溢。又誣之異漲難防。遂得藉口。以肆其浮冒。此乃工員長技。並恐尚不止於此者。姚立德鄭大進皆有應賠之項。為數不少。或工員欲於上司處獻勤。藉做工為名。從中侵扣。以貼補其賠項。則為弊甚大。更不可不徹底根究。朕非欲為逆詐億不信之事。但高樸一案。竟出情理之外。不得不以此揣度矣。昨曾籌度及此。未得面諭阿桂。因復詳悉諭知。著阿桂到豫後。密為訪查。如其中果有情弊。即據實具奏。籌辦大工。必有所為。若因防桃汛。則三月桃汛已屆。已屬無及。若因防伏秋二汛。則為時尚遠。何必剋期趕辦。反覆

思之不得其解。使高晉尚在。必不肯為此奏。朕亦必不為此慮。今袁守侗列銜會奏。若云與姚立德鄭大進等串通一氣。亦思從中染指。朕可信其必無。但為人所瞞。哄扶同入告。則不能免。阿桂到豫。可以此密諭袁守侗。如彼或有所聞。即當據實告知阿桂。聽其查辦。此旨著由五百里發往傳諭阿桂知之。○是日駐蹕梁格莊行宮。翼日如之。○丁未上謁。

泰陵

泰東陵俱未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員隨行禮。○諭曰。永貴自遣往烏什。於高樸一事辦理果決。甚屬妥協。且年齒亦老。著授申保為叅贊大臣。馳驛前往烏什。更換永貴來京。○又諭據伊勒圖等奏。商民趙良載。售賣馬匹形跡可疑。隨嚴行究詢。供有從哈薩克

購買。亦有賒給幹珠罕等卡上官兵物件。輾轉由哈薩克買馬償還。伊等者因傳集應詢人等。一一究問。俱經承認。請將防禦德保革職。所有兵民分別枷號三個月。四個月。卡上章京塔思哈業已換回。請交部議處等語。伊勒圖等見民人趙良載形跡可疑。即行究出。偷買哈薩克馬匹情節。尚屬留心。但向哈薩克偷買偷換馬匹牲畜。以圖微利。向來原難保其必無。然一經發覺。即嚴行治罪。方足以懲儆。今奸民趙良載等膽敢向哈薩克偷買馬匹牲畜。且卡上官兵等俱有偷買之事。若不嚴行治罪。日久即與趙鈞瑞等偷買玉石之事相同。殊有關係。伊勒圖等僅將驍騎校塞特錫伯空藍翎順德塞克圖革職。披甲伊靈阿蘇登額厄魯特閒散海柳並民人張元長等俱枷號三個月。民人趙良載藍文炳枷號四個月。所擬尚輕。不足以懲戒不肖之徒。除卡上章京德保照所奏革去防禦外。著

交伊勒圖等將伊等所定。應枷號三個月者。枷號六個月。應枷號四個月者。枷號一年。卡上章京塔思哈。既已回京。著交軍機大臣辦理。嗣後伊勒圖等。益加留心稽查。並嚴飭各卡。嚴行禁止。向哈薩克偷買偷換馬匹牲畜。倘敢復違犯。一經發覺。即從重治罪具奏。○諭軍機大臣等。明年七月間。班禪額爾德尼來避暑山莊謁覲屆期。朕欲遣皇六子迎接。例應有一領侍衛內大臣隨往。尤須得一老成練達者。方妥。永貴熟悉外藩事務。且伊原係總諸達。朕欲即令伊為領侍衛內大臣。總諸達。隨皇六子前往。著傳諭申保。即於二月內馳驛赴烏什。到彼後。傳旨令永貴速行交代。起程來京。○又諭昨念及袁守侗等所奏籌辦之工。為期太迫。即上緊趕辦。亦未必能有實濟。恐係工員見姚立德鄭大進賠項過多。欲於上司處獻勤。藉工侵扣。以貼補其賠項。而袁守侗為所瞞哄。則為弊甚大。不可不

徹底根究。因傳諭阿桂到豫後。密行察訪。據實具奏。係專指摺內儀考新工。并時和驛隄外土堰。以及楊橋黑堰。各隄岸工段。共估需銀十二萬三千餘兩者而言。其八堡新莊兩處要工。共估需銀二萬五千餘兩。已經發銀趕辦。月內即可完工者。尚不在其內。而昨日所寫之旨。叙列未清。恐阿桂接閱後。未能明晰。辦理不得主意。伊等以估需十二萬三千餘兩之工。限於一月餘辦完。實為理所必無。且閱圖內所開擬做工段。相連數百里。料物人夫。豈能一時應手。乃責令如期集事。勢亦有所不能。而二月半後。即交三月節氣。計未完工之前。桃汛早過。更不當據以藉口。種種皆其情節之可疑者。著再傳諭阿桂。詳悉密將實在情形。即行覆奏。此旨著隨報發往。諭阿桂知之。○又諭昨袁守侗等奏籌辦善後各工。一摺。據稱儀考新工。并時和驛隄外土堰。以及楊橋黑堰。各隄岸應辦工段。共估需

銀十二萬三千零八十六兩。定限二月初一日興工。三月初十日一律告竣等語。朕以此項工程甚大。而興工至完工。僅一月有餘。斷難趕辦。即如期辦成。亦未必果有實濟。因派大學士公阿桂。前往查勘。覈實具奏。今復細閱進到之圖。所擬工程。原屬應行辦理者。如果工皆實做。自於善後有裨。但各工相距甚遠。而以十二萬餘兩之工。定限一月餘辦成。恐物料人夫。俱難湊手。而責其不誤限期。斷無是理。其弊更不止於潦草塞責也。且伊等奏稱。因桃汛將至。不便再遲。今年節氣較早。二月十九。即交清明。三月節已當桃汛之時。縱能依限。於三月初完工。彼時桃汛早過。豈尚足資防禦。此更不足信矣。昨已諭令。照伊等所擬。於二月初一。即行興工。勿使工員。因工程稽誤。得有藉口。俟阿桂到豫。赴工閱看。其各工之是否按估。如期可收實效。自可立辨。至所奏儀封漫工一摺。據稱新斜壩之外。

水深現祇五丈。擬於十八日。往前進埽。如法追壓。務期下一埽。即收一埽之效。又云東壩已於十四日。下埽一個。俟鑲壓到底。再行進埽等語。竟似十四日所下之埽。至十七日。伊等具摺時。尚未鑲壓到底。直至十八日。方可進埽。是一埽必得鑲壓五日。則續進之埽。何日始得進完。合龍當在何日。看來袁守侗。姚立德二人。當此工艱任重。未免茫無主意。不過就事敷衍。袁守侗素未諳悉河務。姚立德雖任總河有年。僅能謹飭自守。而於堵築機宜。未經閱歷。自不能卓有定見。且高晉熟悉河工。今罕其匹。尚因工久不成。焦急成疾。竟至不起。何況袁守侗。姚立德之未曾更事。朕亦不深怪二人也。此時如已合龍。固屬甚善。設或尚未歲工。或臨時復有更變。且不必勉強支持。俟阿桂到工商酌。多一人心思。庶不致有舛誤。將此由六百里加緊發往。傳諭袁守侗等。令即由六百里覆奏。並諭阿桂知之。

尋奏善後工段內如八堡補過越隄及新莊夾壩二處俱因緊要。先奏交布政使榮柱督辦。據報此時兩頭俱接連出水。自七八尺至一丈不等。餘工雖上下距遠。但俱屬土工。用料處少。已遣涿州縣分段募夫興工。並委道府分駐監辦。惟定限太促。誠恐工程草率。不敢復拘原限。務期工皆穩固。至儀工東壩。自本月十四下埽後。未復進埽。實因大溜回逼。東壩著重擬俟西斜壩埽過。東壩一二丈。再酌下一二埽。今西斜壩下首已兇近東壩上首。南北相對。中間過水處。不過二丈。口門內溜水湍激。幸西斜壩外。逼開大溜。自北而東。復折而西。由口門南出。其勢稍紓。擬於二三日內再進西斜壩二埽。東壩一埽。兩面兇過。五大餘水勢回溜。北趨。即相機堵合。新挑引溜溝。及開深舊引河。現俱工竣。其引溜溝及引河頭積水。次第開放。兩水由引河第三段合流。直達第九段。入正河。勢頗通暢。趨辦合

工。漸有成效。大學士公阿桂到豫。更可公酌妥辦。如未到前。工可堵合。即乘機速辦。得旨。自應如此。日夜望之。○戊申。

上詣

泰東陵。行二週年大祭禮。○以直隸泰寧鎮總兵保泰署理藩院侍郎調直隸正定鎮總兵寶琳署泰寧鎮總兵。以原任雲南臨沅鎮總兵陳大用為正定鎮總兵。○是日駐蹕秋瀾村行宮。○已酉。吏部奏請大學士三寶應定何殿閣。及兼銜。得旨。三寶著為東閣大學士。兼禮部尚書。○直隸總督周元理奏。直屬威縣土城年久坍塌。玉田縣磚城水衝蟄陷。均應估修。阜城。安州。新安。三處土城。工不經久。請一體改建磚城。並動司庫旗租銀項。委員督辦。下部知之。○是日駐蹕半壁店行宮。○庚戌。湖南巡撫李湖奏。長沙。岳州。常德。澧州。四府州屬。因上年旱災。米價昂貴。其駐劄災地之撫。提。兩標。暨長沙。洞庭。二協。岳州。常德。

澧州三營。並毗連災地之辰州。協非災地而僻處苗疆之鎮。單鎮標各兵。雖有應領銀米。但眷屬買食貴米。究形竭蹶。請借給一月兵餉。於本年夏秋。冬三季餉銀內扣還。報聞。○是日駐蹕黃新莊行宮。○辛亥。

上詣

大高殿行禮。○還宮。○大理寺卿王昶乞假。奠親允之。○予故大學士管兩江總督高晉。祭奠如例。諡文端。○壬子。諭據福康安等奏。已

亥年東三省官兵俸餉銀兩。因委員和清在京患病。另行揀派協領湛露等。赴京領取。但俸餉例於二月內放給。若俟由京請領到日。始行發給。未免需時。請於備存賞銀內動支湊足。先行發給。以免稽遲。俟由京領到俸餉銀兩。即行按款歸還。以清庫項等語。所辦甚是。已批交該部知道矣。此項銀兩。業據戶部奏稱。令請領花紅之主事永泰領解。並飭沿途派員迅速護送。自可不致稽遲。但發給俸

餉既有定期。而委員赴京請領患病等事。亦所時有。若必待該省續行揀員接領。未免輾轉需時。恐誤支發。嗣後盛京委員至京。請領俸餉。如該員在京有患病稽延事故。即著戶部派委司員解往。以免遲滯。○癸丑。重輯國子監志書成。命繕入四庫全書。議敘騰錄有差。○戶部等部議准。安徽布政使農起奏。稱安徽各營需用硝觔。向由鳳陽潁州等屬按年採辦。礦觔因產自晉省。兩年彙辦一次。例應各營繳價。但火藥要需。俟價繳再辦。恐致遲誤。請借匣費銀給辦。於各營請領時扣公糧還款。冊報部覈。再礦觔兩年彙辦一次。遇產地稍短。委員運遲。即恐缺乏。請嗣後礦觔并硝觔均豫購一年從之。○甲寅。諭曰。保泰著兼管太僕寺。嗣後太僕寺俱應派大臣一員。責令兼管。著為例。○又諭據永貴奏。葉爾羌官兵承買官玉。轉售商人。均情願照原價各繳銀三十倍等因。現經軍機大臣議准。具

泰因伊等咎所應得。但念官玉變價。令兵丁承買。從前辦事之員。經理本屬未善。況葉爾羌駐防官兵。與和闐喀什噶爾無異。何以葉爾羌之官兵。獨應沾恩。所辦尤未允協。且其事在乾隆四十年。非高樸案內之玉。而兵丁亦非官員可比。若均照三十倍繳價。兵力未免拮据。著加恩。令其照原價十倍完繳。以示格外體恤之意。○又諭。據勒爾謹奏。安肅道陳之銓。管門家人袁炳堂。即袁添福。在葉爾羌。陸續交過高樸家人沈泰金銀綢緞等物。該犯係微賤。長隨。安得有此貲本。若出自陳之銓。則罪無可逭。即銀兩別有來歷。該道漫無覺察。亦難辭咎。請旨將陳之銓解任質審等語。陳之銓縱令家人。在回城販玉漁利。罪無可辭。即著革職。交該督截提袁炳堂到案。隔別嚴審實情。按律定擬具奏。○又諭。據勒爾謹奏。寧夏鎮標營馬。缺少三百七十九匹。該鎮總兵斐慎。並未隨時具報。及提督委員

印烙。始稱冬間倒斃過多。按馬存價查覈。該鎮冬季領項。又已支領草乾銀兩。恐有分肥入已情事。請旨將斐慎革審等語。斐慎著革職。交該督即提同應訊人證。嚴審定擬具奏。○軍機大臣等奏。遵旨將各省彙奏事件。分別專摺彙摺。以歸簡易。查民數穀數。各屬城垣完固。藩司奏交庫銀號。無弊發遣新疆人犯。有無逃脫。俱應照舊專摺具奏。其餘款項相仿。可并一摺者。俱分別并奏。得旨。是。○又奏。湖南巡撫李湖。查出明李檢討陶汝鴈榮木堂集。及其孫陶煊。同張燦所選國朝詩。的遵旨覆覈。籤出違礙語。又江西巡撫郝碩。查出明李進士黎元寬。進賢堂集。及其子黎祖功所著。不已集。均覈有違礙語。除將原書繳銷。並行文各督撫嚴禁。黎元寬僅一子祖功。祖功早被賊戕。無嗣。陶汝鴈。張燦案。請仍飭李湖辦理。得旨。陶汝鴈。黎元寬。所刻詩集。各種雖俱有違悖語句。但其人係明李科目。在

本朝未經出仕至陶煊張燦選刻國朝詩的將錢謙益屈大均等詩選入尚在未曾查禁之前本人久已身故其子孫亦無另行刊刻之事均非徐述夔一案可比所有各項書籍自應一體行查銷燬至陶汝鵬之曾孫陶仕修陶仕倫張燦之子張濬俱著加恩免其治罪○吏部議奏太僕寺卿福勒賀吉夢熊少卿良誠將原任奉天廣寧縣知縣因不諳吏治改補太僕寺筆帖式之噶爾薩咨送吏部

以知縣擬用並未將改補緣由查明殊屬疎忽應照保薦不實例各降二級調用得旨福勒賀吉夢熊良誠俱著降二級調用（乙卯諭軍機大臣等日來盼望合龍之信甚切茲據袁守侗等奏近日斜壩下埽兜溜及引河引溝開放情形等因一摺亦祇可如此辦理已於摺內批示閱圖內形勢西壩頭尚嫌其短斜挑恐未能得勢據奏擬於日內往前進埽一兩個雖較前稍長究不如於西壩頭再

添一埽使袖勢益兜加之東壩復下一埽必成迴溜之勢即於兜袖中相機合龍自可期一舉集事務須妥速為之又閱圖內十七堡下攔黃壩一道甚不合理河身既北高南窪漫口又在南岸正當挽令北趨即不能亦當令隨隄內舊河且東注為是乃於舊河橫築壩攔截致大溜益趨漫口是不能得迴瀾之益轉增激溜之害也設使河溜或順隄北東注則南岸漫口之勢必殺早可施工堵築而

隄北之水徐圖引疏順軌所謂急則治標較之與漫口急溜爭功自屬省便且正河在北若溜循隄北而行即引河亦近而易就何故捨易而取難乎此壩如係舊有則辦堵口工程時亦應拆去或係新築則辦理之初殊為失算使朕親臨閱視必不肯令其為此高晉彼時何亦竟未計及耶因於圖內壩身用硃筆標記發往此旨到時如已經合龍甚善倘臨期別有變更又羈時日即當速議改弦不

可仍前株守朕以為急則治標之法莫如就  
硃筆標記處將壩拆開一口以減南岸激溜  
之勢俟漫口合龍堅實再將開壩放出之水  
引歸正河斷不致於費力計彼時阿桂亦應  
至工所按圖審度必以朕言為然可與素守  
伺姚立德等會商妥辦佇聽喜音此旨著由  
六百里加緊發往仍速將籌辦情形由驛履  
奏如現已合龍即行加緊奏報以慰繫念○  
大學士于敏中等奏前奉諭旨令主事門應

兆恭繪

開國實錄圖內事蹟應派員繕寫擬分清字蒙  
古字漢字各派中書四員在南書房恭繕並  
輪派懋勤殿行走翰林一人入直照料收發  
報聞○以甘肅慶陽協副將武靈阿為寧夏  
鎮總兵○是日起

上以祭

社稷壇齋戒三日○是月成都將軍特成額等  
奏新疆原駐屯防兵六千經奏准徹二留四

已飭該鎮等選年壯嫻耕及願留兵不拘班  
次挑留餘兵撤回至兩金川屯務向派總兵  
二員分辦現奏歸一鎮統轄查金川土司地  
方原屬松潘鎮應仍令該鎮駐美諾督辦兼  
轄促浸屯務駐阿爾古之重慶鎮總兵撤回  
阿爾古屯務改派維州協副將駐辦仍聽駐  
美諾總兵管轄下部知之○江西巡撫郝碩  
奏年終彙奏新疆遣犯及改遣各犯有無脫  
逃已未拏獲江西向分兩案奏報乾隆四十

三年雲南按察使汪圻奏請將本省應緝節  
年逃遠及外省通緝節年逃遠分摺具奏是  
又應分兩案查前二案奏本年後二案奏節  
年雖有區別但奏節年本年即在本內且一事  
分四摺亦屬煩瀆請嗣後應緝逃遠及已未  
拏獲於年終將本省彙一摺外省彙一摺以  
歸簡要得旨覽○兩廣總督桂林奏廣西桂  
林柳州二府屬上年間被旱災現屆東作恐  
青黃不接時災地及毗連各屬穀價稍昂廣

西水次各州縣向有貯備廣東平糶穀十萬石。廣東上年歲稔。米價亦平。請將貯備廣東平糶穀交廣西巡撫。於需用時酌撥。或運濟災地鄰邑。或就近平糶。如無需動用。即飭各州縣照舊存貯。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之一千七十五

大清高宗法天隆運至誠先覺體元立極敷文奮武孝慈神聖純皇帝實錄卷之一千七十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥二月丙辰朔遣官祭黑

龍潭

昭靈沛澤龍王之神玉泉山

惠濟慈佑龍王之神○諭曰皇八子永璇皇十一子永理著充四庫全書館正總裁謝墀周煌達椿汪廷璵錢載胡高望寶光鼎曹文埴金士松李汪度朱珪倪承寬吉夢熊著充四庫全書館總閱書成時與總裁一體列名○諭軍機大臣曰薩載等奏中河運口尚未能移於下游一摺據稱先因七月間中河水

大楊莊舊口水勢湍急難以堵閉繼因九十  
月間洪湖發水李家莊新口水高壩內又難  
開放是以酌籌緩辦現在楊莊口門內外水  
深重運幫船仍由楊莊進口過行無滯等語  
自屬實在情形中河楊莊運口經

皇祖閔定至今七十餘年相沿無弊昨春高晉  
在京奏及楊莊口門淤阻必須移向下游之  
李家莊是以令其勘明籌辦今既據薩載等  
覆奏去年緩辦緣由及現在運口暢行無阻

是此時竟可毋庸辦及如今年伏秋兩汛後  
楊莊口門仍有必須籌辦情形薩載等臨時  
確勘據實奏聞辦理如實無關礙或介於兩  
可之間且俟朕明春南巡時親臨閱視再為  
覈定將此諭令薩載等知之仍著先行覆奏  
尋奏楊莊口門應俟今年伏秋兩汛後確勘  
情形另行酌籌奏辦否則恭候臨幸時指示  
遵辦得旨覽○又諭曰閔鶚元奏地方情形  
摺內稱桐城懷寧向來稻田兩熟種麥較少

現在雨水透足池塘充滿即可蓄水養秧等  
語自屬實情至所稱無需再雨一語殊屬非  
理南省春雨較勤而陂塘足資蓄蓄無慮損  
及麥禾非若六七月間大雨過多溪河漲溢  
易致成潦者可比閔鶚元於此等風土情形  
尚未深悉耶總由該撫所延幕友文義不通  
又不能自行斟酌遂爾措詞失當若此閔鶚  
元著傳旨申飭○禮部議覆江蘇巡撫楊魁  
學政劉墉奏稱御史戈源奏請裁各省商籍  
學額經大學士九卿議請交各督撫學政覈  
查應試商籍人數酌減查兩淮商籍學額十  
四名現在官商親子弟姪例試商籍者祇一  
人不數十名取一已停考請嗣後將舊額裁  
十留四照例十名取一不及十名停考鄉試  
仍歸民卷又泰州通州等處沿海電戶因業  
煎鹽前設電籍學額六此等電戶與土著無  
異請裁歸本州縣應試應如所請惟商籍合  
例應試者現祇一人未便豫留學額四名以

啟冒濫請暫裁俟後應試人多該撫等隨時奏設至商籍生員願歸本籍鄉試者准呈改廩增改為候廩候增與本籍生員照考案新舊間補廩生照原食餼年分挨貢其例符入籍江南者准於現住該州縣入籍從之○丁巳祭

先師孔子遣協辦大學士英廉行禮○諭軍機大臣等上年淮揚道松齡有降調引見之案例應出缺另補因該督奏將該員暫緩離任俟秋汎事畢給咨送部嗣據該督已將該員咨送到部而至今尚未引見朕因現屆挑汎南河各工料理需人該員係因公降調引見後仍可發往諭吏部傳伊即日引見今觀其人現在患病精神亦漸形老邁已派陳世官將該員診治再降諭旨但松齡在江年久於河務情形是否熟悉平日辦事究竟如何其未起身之前曾否有病著傳諭薩載即速詳悉據實覆奏將此由四百里諭令知之尋

奏松齡熟悉河務辦事諳練但向有腿疾時發時止得旨已成病廢留工亦不得力也○又諭前據袁守侗等奏正月二十七日於斜壩趕進一埽已越過東壩丈餘擬往前再進一兩埽並於東壩再下一埽兩面迎收計可兜過五丈餘使成迴溜之勢即可於兜袖中乘機堵築無難一舉集事等語所奏頗合機宜亦祇可如此辦理因諭令於斜壩加進一兩埽後或再添進一埽應更得勢堵築似可

期迅速茲距袁守侗等前奏又越數日尚未據奏報合龍益切懸盼又因圖內於舊河築攔黃壩一道使河溜至此折回逼向漫口是此壩不能得迴瀾之益轉增激溜之害殊為失算在伊等必係防河溜順隄北東注恐其下南隄一帶復有疎失故加壩攔截不知河溜如果順隄北而行即可減南岸漫口之勢且正河在北引溜歸槽亦不甚費力所謂急則治標較之與漫口大溜爭勝難易顯然不

知伊等何故為此。即高晉當日亦未見及。無怪堵築之屢次不就也。已於圖內用硃筆於壩身標記。諭令伊等。如接奉諭旨時。已經合龍。甚善。設或臨期別有變更。即照硃筆標記處。酌量將壩拆開一口。以殺南岸溜勢。俟漫口合龍堅實。再引隄北之水。使歸正河。亦不甚費事。計其時。阿桂已至工所。必以朕言為然。令其會商妥辦。自應即有成算。著傳諭阿桂等。將如何酌籌辦理之處。迅由六百里覆奏。如已經合龍。即速加緊奏報。以慰朕宵旰廑念。○又諭。據三寶等奏。拏獲偷撈官銅之匪徒。審擬具奏一摺。已批交三法司覈擬。速奏矣。據稱雲南押運銅船委員張大本。在武昌縣屬大江遭風。打至對岸白露磯。沉銅九萬餘觔。一面移縣雇人打撈。因距城寫遠。協同護送武員會撥兵役保甲看守。夜間被匪船先後踵至。偷撈銅觔。旋經兵役鳴鑼放鎗。賊匪竟聲喊抗拒。撈銅而去。因雨夜莫追等

語殊不成事。既有護送武員。會撥兵役保甲看守。何至賊匪踵至偷撈。事前既不能嚴防。臨時又不能擒捕。轉以兩夜為詞。其護送武員之無能。及兵役保甲等之有名無實。已可概見。自當各予嚴懲。乃該督等。僅將現獲各犯擬罪。而於護送武員。及兵役保甲等。均未議及。殊屬非是。著傳諭三寶等。即將護送武員。查明參奏。其兵役保甲。並查明責革示儆。其未獲各犯。并嚴飭該地方官。速行躡緝。務獲定擬具奏。毋任一名漏網。○軍機大臣等議奏。正白旗漢軍侍衛兼佐領惟精。被莊頭王達子。以逼索地銀。並差馬甲張士爵。收伊家產呈控。查惟精屢索王達子地銀。嗣查出隱瞞園地。借端需索。不控官究。被控後。復因王達子許銀服罪。具呈銷案。應交部議處。張士爵代惟精照看地畝。惟精差伊索銀。即將王達子所存穀糶售賣。致成訟端。張士爵應革馬甲杖枷。王達子以旗奴控主。發駐防兵

為奴得旨。惟精屢向莊頭王達子勒逼地畝。銀錢嗣查出隱瞞園地。並不當官控究。輒又借端需索。迨後呈控在旗。又因許給銀兩。具呈銷案。甚為不顧顏面。軍機大臣等。僅擬以交部議處。殊屬非是。惟精著革職。其惟精所有該莊頭名下地畝菜園。俱著內務府查追入官。至馬甲張士爵。為惟精照看地畝。恣憑多方勒索。復至王達子家。將其穀稻什物。俱行變賣。以致釀成事端。前後皆伊所蔽弄。甚

為可惡。僅予枷號鞭責。尚不足蔽辜。張士爵著革去馬甲。發往烏魯木齊充當苦差。王達子隱匿地畝。而復行賄誣告。所定之罪原當餘依議。○戊午祭

大社

大稷

上親詣行禮。○諭曰。現充文淵閣檢閱之內閣中書八員。於朕御文淵閣時。應行站班。俱著賞戴朝珠。○又諭曰。戶部議覆李侍堯等奏

滇省裁減鑪座。搏節銅餉。并查明各銅廠鑪欠。將可否邀免之處。請旨二摺。所有廠欠未完無著銀八萬四千三百餘兩。又廠欠經放之員產盡而上司亦無可著追銀三萬三千九百六十四兩零。又銷過銅價廠欠在十分之一以內銀十八萬二千九百九十七兩零。俱著加恩豁免。餘依議行。此次查辦之後。期於徹底清釐。使將來新案。年清年款。不許復有絲毫拖欠。該督撫務須董飭屬員實力整

頓。一切那抵彌縫之弊。嚴行杜絕。如敢仍蹈前轍。除將廠員及該管之道府等。嚴行治罪外。惟該督撫是問。○又諭豫省河工堵築漫口。現在尚未竣事。著於部庫內再撥銀一百萬兩。解往備用。該部遵諭速行。○又諭曰。江南淮揚道松齡。因降調。送部引見。見其人現在患病。未必即能就痊。即令回任。於河務亦未必有益。松齡著解任。留京調理。其淮揚道員缺緊要。著薩載即於河員內揀選一員奏

補○諭軍機大臣曰。索守同等奏二十八日寅刻東壩門埽忽又蟄塌。直衝西首正壩。水勢愈猛。至黎明時。遂段鬆動。共塌開口門四十八丈等語。此亦無可如何。並據阿桂奏二十八日午刻已抵工次。一二日內。即公同商酌。一可望有成之策。再行迅速奏聞等語。阿桂此行。竟似朕有先見者。大工屢辦未就多一人心思於事。自屬有益。看來此次所辦工程。既用兜袖之法。理應穩固。何以復有蟄塌

之處。或兩壩雖如法兜做。而所下之埽。本不甚寬。壩身不能厚實。雖層層壓土。而不能逐個幫鑲。在急溜中。勢仍單薄。易於搖動。故不能得在。或當於下埽時。設法幫厚。不知其事可行否。試詢之南河諸工將備。悉心講求之。至朕連日所疑者。總在順陡北之攔黃壩。似大溜至此。不能下注。激迴溜勢。趨逼南岸口門。甚足為患。其受病自在於此。業已兩次傳諭。令伊等妥酌而行。阿桂可即勘度情形。並

與索守同等詳細講求。如應從急。則治標之法。切勿憚於改絃。著即速妥議具奏。至該處屢次施工未就。總由口門之水太深。下埽猝難到底。且聞壩根沙性浮活。水每從根搜汕翻花。不可不思變計。乃於急溜洶湧之中。屢屬焚樁。與水爭勢。徒費工作。而不能收功實為失算。蓋漫口之下。業經大溜跌落。刷深勢不能冀其復淺。而水過沙浮。日久愈甚。亦不能使之堅實。是在彼處施工。終屬無益。朕意或於口門外距陡稍遠。擇水勢平緩處。所另行接隄築壩。較之在漫口下埽。難易若何。可熟酌為之。若可行。當於口門收小時。或用兜袖之法。必應兩壩較今壩加寬培厚。雖所費不免過多。但多費而工可速成。較之徒費而事無把握者。其得失利害。曉然可見。現在又諭戶部撥庫帑一百萬兩。解往豫省備用。無虞工費不足。阿桂可即與索守同等確勘熟籌。若應如此辦理。即一面興工。一面奏聞。至

阿桂所奏漫口之下水已先由漫口旁溢引河。即不能掣溜自不如在上游另尋減水之法等語。其言甚屬有理。朕於上年十二月間。閱高晉等進到圖樣。覺現挑引河處距漫口太近。且不得勢。必係伊等止顧惜費。未能將河形大勢通盤籌覈。因於圖內用硃筆標示。傳諭伊等第因引河既已辦定。止可為成事。不說今阿桂此奏與朕前此指示處似覺相合。著即將硃批原圖仍行發往。令阿桂與袁守同等詳細體勘講究。將應作何施工。可望有成之處切實具奏。如果必應更張。似不當仍為守株之見。阿桂辦事必不孟浪。袁守同等現今皆茫無主意。亦不慮其迴護也。將此由六百里加緊傳諭知之。仍即將詢諭籌辦各條迅速議定。由驛馳奏。○己未春分朝日於東郊遣豫親王修齡行禮。○上御乾清門聽政。○以舉行仲春經筵遣官告祭。

奉先殿

傳心殿

上御文華殿講官暨侍班之大學士九卿詹事等行二跪六叩禮。分班入殿內序立。直講官四人出就講案前行一跪三叩禮。復位。直講官德保嵇璜進講論語先之勞之請益曰無倦三句講畢。

上宣御論曰。此夫子為子路言先之勞之者。似為有司親民者而發。而人君為政之道亦實不外乎此。蓋君與臣其職不同。而為民為政則同。先之以孝弟。固君臣所應同者。至於循旃陋。勸農桑。乃臣之事。而非君所宜親者。然則君可以不勞乎。朝乾夕惕宵衣旰食。又何以云乎。是則君有君之勞。臣有臣之勞。臣之勞即所謂循行勸課。勞其身之事也。至於君之勞。則所謂敬天勤民。勅幾求賢。先天下之憂而憂。其勞蓋有不可勝言者。而皆勞其心之事也。設厭其勞而圖逸。雖不乏一日之樂。

而將貽百世之害是則夫子一言而具萬世君臣為政之大要。若夫無倦則益申乾象天行不息之義與公旦無逸之訓相發明。非徒為子路好勇而戒其不能持久而已也。講官暨侍班官跪聆畢。興。直講官阿肅董誥進講。易經自上下下其道大光二句講畢。

上宣御論曰。自上下下二語。非申明損上益下而言也。夫既損上以益下。民之說之。自无窮極。其為益也。更有何言。蓋自者由也。自上下

下。重言為上者。應不自恃居崇高之位。每虛已。撝謙尊賢納諫。縱能而視若不能。已治而恒如未治。延訪必以精明達必以徧。雖芻蕘弗遺焉。斯乃由上以下其下。而其道有弗大光者乎。或曰。如此則益豈祇為為君者言之乎。曰。易无不該。且一邑有一邑之上下。一家有一家之上下。推是道也。孰无自上下下之理。而吾在君言。君惟引以為己鑒耳。講官暨侍班官跪聆畢。大學士于敏中。協辦大學士

英廉奏曰。

皇上乾行不息。謙尊而光。首庶物而宵旰惟勤。集衆善而壞流並蓄。洵作所於無逸。受益於有容矣。臣等幸侍

講筵。親承

聖訓。不勝欽服。奏畢。諸臣出。就拜位。行二跪六叩禮。禮成。

上還宮。○諭曰。文綬奏。榮縣富順地方。訪有奸民惑衆之事。分飭司道前往各該處率同該

府縣等。嚴速查拏。並親赴督辦。已將收受偽照之畢登臣。及造謀為首之羅朝臣。拏獲。又續獲要犯龔海。吳懷應。鄧朝玉。及供出夥犯共五十一名。又起獲綾片執照。及黃布小旗共五十九件。現在根究嚴緝。研訊確情。從重辦理等語。奸民膽敢假造旗記執照。捏寫偽職傳布邪言。招人入夥。不法已極。該督一聞稟報。立即親往該處。督同道府等。嚴速查拏。於數日內。將首夥各要犯緝獲。並究明造謀

糾夥惑衆各情節所辦甚為妥速文綬及該道德克進布陳奉舊陳燮等俱著交部照勒爾謹辦理河州王伏林一案之例議敘所有榮縣知縣符兆熊首先訪拏破案甚屬可嘉著於事竣時送部引見○又諭曰烏珠穆沁親王弼蘇克喇布坦來京病故著加恩賞銀三百兩照例遣侍衛祭奠○轉吏部右侍郎王杰為左侍郎以戶部右侍郎劉墉為吏部右侍郎○以通政使司副使索芳松為大理

寺卿原任禮部左侍郎降三級調用瑪興阿大理寺少卿江蘭為太僕寺卿○庚申

上詣

大高殿行禮○詣

恩慕寺行禮○詣

安佑宮行禮○幸圓明園○諭據常青等奏上年隨往盛京官員兵丁等換回商都達布遜諾爾達里剛愛牧場馬一萬一百七十七匹駝一千二百六十四隻因路途遙遠倒斃者

多請於此次十分之中准賞倒斃二分後不為例等語昨官兵等所換太僕寺馬三千九百餘匹業已加恩寬免一半今常青等所奏商都達布遜諾爾達里剛愛牧場馬駝亦係向盛京官員兵丁等換回者著加恩亦照太僕寺牧場馬匹之例寬免一半○諭軍機大臣等據文綬奏榮縣富順縣有奸民畢登臣等傳布邪言捏造偽印招人入夥即自省起程馳赴該處督同該司道等嚴速查拏已將

首夥各犯緝獲究審等語所辦甚好已另降諭旨將該督等交部議敘矣奸民敢於光天化日之下傳布邪言捏造印照散給多人糾夥不法其情罪實為可惡不可不盡數拏獲從重治罪至所稱朱天龍其里居蹤跡尤宜根究明確嚴緝速獲毋使首惡得以漏網著傳諭文綬務將匪夥各犯嚴加審訊務得確情並於定案時多辦數人大示懲創俾共知敬畏仍當一面奏聞一面即行正法勿使兇

徒稍稽顯戮將此由五百里諭令知之○辛酉諭曰吏部奏請將四庫館効力年滿議敘人員嚴加考試分別覈辦所奏是應如此辦理此項在館人員雖係自備資斧効力而議敘實不免過優殊非慎重名器之道朕原因四庫全書卷帙浩繁既辦一大事即不能計及小節畧予從優非不知其中有些微小弊也但思恩施固當令均霑而錄敘亦不宜太濫況人多即流品混淆自當明示區別嗣後

此項議敘人員著照部議彙齊五十名奏請考試一次惟是伊等寫書時大率倩人代繕其本人字畫未必悉能工楷將來考試時著派出閱卷大臣稍為寬取不必照正考之例過於精覈以示格外體恤之意其有不到及倩人代作諸弊仍著照部議嚴察○又諭曰吏部議山西陝西甘肅三省濫給高樸家人銀兩之驛站各員降調現已加恩照部議所降之級從寬留任矣驛站官員濫給銀兩予

以實降因屬應得之罪因此三省員數過多特從寬典第念同案之直隸省應議各員業經降調是人數過多者得以邀恩格外而人數少者不免向隅非朕辦理庶務從不肯屈人之本意所有前此直隸議處一案除臬司達爾吉善因其平日辦事本無足取是以革任俟其到京時原欲酌用著該部帶領引見其餘降調各員並著加恩照部議所降之級從寬留任如已出缺離任者仍著發往該省

交該督遇有相當之缺補用○又諭上年湖北被災處所較多藩庫存銀一百一十四萬餘兩俱因賑恤動用並借動封貯銀三十五萬兩業經降旨於浙省撥銀七十萬兩部庫撥銀六十萬兩解往該省止敷正賑加賑之需即歸還封貯原款為數亦未為充裕著再於部庫撥銀一百萬兩解交該省司庫存貯以資儲備○諭軍機大臣等昨據阿桂等奏另籌引河壩工一摺自應如此迅速辦理已

於摺內批示發往。現在所挑引河既不能得引溜之益。自不可不改絃更張。今阿桂等酌擬新挑引河。即係朕前此硃筆標示之處。經伊等親往履勘而定。自必確有所見。諒非迎合朕旨。應即上緊興工。但既已擇地另挑。非寬深不能得力。必須開挑極寬。庶可掣動大溜。其河底尤須挑挖深通。使成建瓴之勢。方為有益。至所築之攔黃壩。更當培築寬厚。由西南向東北。令挑溜逼向引河。不可復似從

前之單薄。致有閃挫。即所費浮於原估之數。亦不靳惜。阿桂等自不復存省費之見。總之此次施工。果能一舉集事。所費歸於實濟。雖多亦不為過。若如高晉等原辦之引河。屢引不就。徒成虛擲。豈非因欲省費而轉成妄費乎。阿桂等當善體朕意。妥速籌辦。以慰懸注。至該處河工諸事。僅據伊等屢次奏到圖摺。未能悉其實在情形。索守伺自開工至今。皆所目擊。其見聞自必真切。今阿桂在工董辦。

索守伺現無專辦之事。著即速馳驛來京。朕得以面詢一切。且伊母亦已高年。索守伺并可因便省視公私。俱屬有益。俟其到京。住數日後。再令前往。朕既得面為講論。即索守伺亦更得安心辦事矣。此旨著由六百里加緊發往。索守伺奉到此旨。即日起程。阿桂等仍將新挑之引河。於何日興工。擬辦寬深丈尺。若何。即行由驛覆奏。○壬戌諭軍機大臣曰。阿桂等覆奏順隄河攔黃壩情形一摺。已於

摺內批示。今引河既移向十堡施工。其順隄舊有之攔黃壩。原可無庸置議。至現在新挑引河。實為全河關鍵。必須挑挖極寬極深。方能得引溜之益。據奏。已於二月初一日興工。計共十二段。派員分頭趕辦等語。自可期迅速集事。至籌辦新壩。亦據奏。現已挖槽填壓柴土。盤做兩岸壩臺。陸續接築等語。自應上緊趕辦。閱昨日進到圖樣。此次所辦之攔黃壩。名為築壩。其實即係移堵口之工。於此仍

須進埽合龍工程最為著重。所有壩身務須幫鑲寬厚。以次接築堅固。方能得力。至口門收小時。溜勢必緊。自不能不仍用兜袖之法。其兩袖頭尤須較壩身更加寬厚。始能抵禦急溜。不虞衝激。庶可藉迴溜收功。但必須俟引河挑成。先放引河掣動大溜。然後將壩工合龍。方為萬全之策。仍著將新築壩工詳晰繪圖貼說。並將現辦壩身丈尺較舊寬厚若干。及兩袖頭擬加厚若干。一併開明具奏。至該處實在情形。究非紙上空言所能盡曉。昨已有旨令袁守伺即行馳驛來京。俟其到京面加詢問。方能深悉耳。將此由六百里傳諭知之。仍即由驛覆奏。○禮部題。朝鮮國王李祘遣使表賀。

萬壽冬至元旦三大節及進歲貢方物賞賚如例。停止筵宴。○癸亥。左都御史邁拉遜以疾乞解任。得旨。邁拉遜著原品休致。○予故喀爾喀扎薩克多羅郡王車木楚克扎布祭加

例。○甲子。遣官祭

先醫之神。○諭曰。邁拉遜所遺鑲蓋旗滿洲都統員缺。著永貴補授。永貴未到京以前。著弘暢暫署。○諭軍機大臣曰。永和等奏。修建須彌福壽之廟。所需匠役。現有數千之多。並運用物料。夫役亦復不少。日食米石。在所必需。當此青黃不接之時。米價未免稍昂。請於承德府常平倉所存穀內。動用二萬石。糶給夫匠人等支食。仍於工價內扣除穀價。交地

方官。俟秋成平賤之際。如數買穀補額等語。廟工夫役衆多。米價不無昂貴。自應設法通融辦理。但常平穀石原為地方儲備調劑之用。亦當留其有餘。况從前辦理普陀宗乘廟工程。止借用官倉穀一萬石。此次即欲暫借動常平倉穀。亦祇可借用一萬石。照上屆妥協出糶。仍令該地方官俟米價平賤時。即照數買補歸款。將此一併傳諭知之。○又諭據索諾木策凌奏稱。接奉諭旨。令將額敏和卓

所管莽噶里克屬下回民徹出。另設阿奇木伯克管理。查從前莽噶里克所管回民編入額敏和卓佐領者僅十九戶。餘俱移駐伊犁。將此十九戶徹出。另設伯克。不成部落。請并入素賚瑞所管回戶內。作為素賚瑞屬下。安插魯布沁。其餘回衆全行徹出。仍住吐魯番。烈木沁。闡展。托克遜。哈喇和卓等處。酌設伯克管束。再吐魯番係居中之地。田肥水足。請建城。撥滿兵駐防。裁闡展大臣。請旨另放領

隊大臣一員駐劄吐魯番等語。朕以吐魯番等處為通烏魯木齊扼要之區。彼處回民衆多。若令素賚瑞管領。延及世世。所領回民益多。非經久之計。素賚瑞現既獲咎。應乘此時整頓。故特降諭旨。令將前在瓜州隨額敏和卓。後復派往本游牧舊屬人。仍留與素賚瑞管理。其餘莽噶里克舊領人地悉徹出。照布固爾庫車等處例。另設伯克管理。今閱索諾木策凌所奏。莽噶里克舊管回人祇十九戶。

歸額敏和卓管束。徹出另設伯克。不成部落。請并入素賚瑞所管回戶安插。查素賚瑞現管回戶雖非莽噶里克屬回。然係節次施恩。著額敏和卓管領者。並非素賚瑞正項屬人。即徹出分撥。亦無不可。但未審回民果否情願於伊等生計。果否有益。永貴此時諒已至闡展著傳諭永貴。會同索諾木策凌詳悉籌議具奏。再素賚瑞現已到京。命軍機大臣等另行擬辦矣。朕意欲留彼在京。不行遣回。至

吐魯番建城駐兵。裁闡展大臣。設領隊大臣。駐劄吐魯番。尚非今日急務。均著傳諭永貴與索諾木策凌一并熟籌。定議奏聞。○吏部議覆山西巡撫覺羅巴延三奏。稱山西按察使李永鄴奏請鑄給吏目典史印信。並將現用條記之汾州平陽兩府通判由部補給關防。奉旨交議。查汾州平陽通判向因與知府同城。未請給關防。但均有專管屯糧事務。僅用司頒條記。未昭慎重。應如李永鄴所請。各

補給部頒關防吏目典史管監獄而兼緝捕印官公出緊要事代用文稿亦應部頒鈐記查汾州平陽通判該撫既稱專管屯糧事務應如所奏各給部頒關防至吏目典史既有司頒條記足昭信守無庸部頒鈐記從之○

乙丑遣官祭

關帝廟○丙寅

孝康章皇后忌辰遣官祭

孝陵○諭據陳輝祖奏現在豫省隄工重務需

員差委即將來每歲修防疏洩其稽察釐剔既不便令同官久任之員致多瞻徇而地方要件亦有隨時查辦之事必得妥幹之員以資遴委因初蒞豫省屬員均係甫經識面之人若奏請揀發亦恐人地生疎懇請將現任湖北同知永慶陳嘉謨陳文緯通判歸朝煦知縣李之駿發往豫省等語督撫奏調隔省官員屢經降旨飭禁但豫省現有堵築漫工急需幹員差委非尋常奏調者可比所有陳

輝祖請調豫省之永慶等五員俱准其發往差委遇缺酌補嗣後不得援以為例該部知道尋大學士暫署湖廣總督三寶等奏武昌府同知永慶係附省首廳漢陽府同知陳嘉謨承辦事繁均難驟易生手請仍留湖北得旨如所請行○又諭曰文綬奏查審榮縣奸民散照惑眾一案將首夥各要犯先行分別正法一摺應交該部覈擬具奏據稱嚴訊首犯韓培元等曾於乾隆三十五年在榮縣地方商同縣民龔海等雕刻偽印鈐蓋黃綾填寫職官散照騙錢至三十六年因眾人生疑隨經燬照止息等語韓培元等先在榮縣惑眾不法已越兩年以致眾疑是無人不知也該縣知縣千把等並不查拏究治其該管之知府守備等漫無覺察實難辭咎且其時正當金川生事尤應一切留心鎮靜若云正印皆辦軍需亦當有署理之員該督既經審出實情即應將是年該管專管之文武員弁查

明叅處何以文綬並未辦及殊屬疎縱本應予以議處但前該督一聞稟報立即親往查拏獲犯訊出造謀糾夥各實情頗為妥速曾降旨將文綬照例議敘今文綬不將前案文武官查叅殊屬非是其功過止可相抵無庸復予議敘並著傳諭嚴行申飭其餘此案在事道府以下各員仍遵前旨議敘所有三十五、六兩年分失察管轄各員並著文綬速行查明叅奏○兵部奏貴州古州鎮總兵烏大

經以操演該鎮標並各協營烏鎗兵中靶不及分數奏請將將備千把各員送部議處並自請交部議處得旨校數烏鎗兵丁中靶不及分數之案若由總督提督查叅者該管總兵自應照例議處此案係烏大經自行校閱據實具奏并自請交部其誠實尚屬可嘉並無可罪之處若亦予以處分則此後誰肯直陳甚或捏飾倖免不又歸於有名無實耶烏大經毋庸議處嗣後有似此自行查奏者俱

著照此案辦理○丁卯遣官祭昭忠祠○戊辰諭豫省自上年麥收歉薄節經降旨將開封等府州縣錢糧倉穀分別緩徵並將乾隆四十五年豫省應行輪免之錢糧即改於四十四年蠲免嗣因儀封考城一帶黃河漫口被災較重軫念災黎截漕發帑賑恤撫綏新春又加恩展賑自可不致失所第念目今已屆開徵之期而儀考漫口屢衝不免復有被淹之處其麥收不無歉薄即未經被災地方

亦有出夫辦料之事小民踴躍急公均屬可嘉著再加恩將該省應徵乾隆四十四年分地丁錢糧無論已未被災地方概行緩至本年秋收後開徵以紓民力該撫務督率所屬妥協辦理務使窮簷均霑愷澤副朕加惠無已至意該部遵諭速行○諭軍機大臣等據嚮導處大臣奏稱明歲六阿哥前往岱漢地方迎接班禪額爾德尼由京起程出殺虎口到岱漢地方自岱漢經由察哈爾多倫諾爾

克什克騰翁牛特喀喇沁過賽因達巴罕由中關至熱河所有住宿之處及行程里數請交直隸總督山西巡撫察哈爾都統經過各扎薩克或七十里或八十里編定行程住宿覆知等語著照所請傳知各該處遵照辦理但阿哥奉差出京乃常有之事其經行地方從不修治橋道此次當仍照常辦理至阿哥每日住宿之處亦與朕駐蹕大營不同止須酌量可容城分約寬長六丈地面畧為掃除

無庸過於寬大及糜費豫備將此諭令知之○又諭曰阿桂等覆奏開挑引河寬深丈尺及大壩寬厚計共二十丈並擬於東岸添築子埝一道以防旁溢及引河唇鑲築草壩逼溜直趨各事宜一摺所辦俱合機宜惟當董率實力妥辦以期迅速集事又聞原圖內有草壩一道係因舊引河至其處歸入正河築以攔禦倒漾之水今既改從上游另挑引河則河身內不宜復有草壩攔阻自應亟速拆

去俾得引溜暢達至壩外正河身現在寬深若何較新開之引河尾深淺尺寸若何能否得建甌之勢抑或正河身亦須挑挖以期暢順之處並宜詳悉測量豫為妥辦使臨時得以應手方為萬全所有硃筆批示原圖及此旨並著由六百里加緊發往仍著將指示查辦情形即行由驛覆奏○又諭昨素賚瑞到京經軍機大臣等審實閹割家人復致於死等情照例定擬革去郡王朕念額敏和卓著有前勞意欲加恩將素賚瑞郡王降為貝勒仍罰貝勒俸五年留京居住但伊游牧回衆須扎薩克管束今授素賚瑞為貝勒伊游牧復另放一扎薩克伊家轉俸邀添一官因欲將素賚瑞留京其恩襲之爵選伊弟一人承襲即作為扎薩克駐游牧管束屬人著將審擬素賚瑞奏摺暨朕欲降恩旨一併寄與永貴索諾木策凌閱看俟將素賚瑞諸弟內揀選有人奏到時再降諭旨此事務須嚴密不

可洩露將此傳諭永貴索諾木策凌知之○  
內務府大臣議奏。戶部據綏遠城將軍雅郎  
阿咨稱。助馬口外莊頭三丫頭。鄧世忠。嘉宏  
劉住子等四名。因欠糧革退。將伊等家屬一  
百四十餘口。交該處莊頭張思載等名下充  
當壯丁。茲據張思載等呈稱。無力養贍。懇請  
放出為民。查乾隆九年。因口內莊頭生齒日  
繁。奏准除莊頭子弟及緣罪發遣壯丁。無庸  
置議。並鰥寡孤獨老幼廢疾。令莊頭留養外。

其願為民之壯丁等。准該莊頭陸續呈報。覈  
咨戶部轉令該州縣改入民籍在案。今三丫  
頭等家屬莊頭張思載等既無力養贍。應如  
該將軍所請。除本人因欠糧革退莊頭不准  
為民外。兄弟子姪情尚可原。請照例准其為  
民。得旨。此等莊頭。既因拖欠錢糧革退。本係  
獲罪之人。轉因接辦之莊頭以人多不能養  
贍。請將伊等之兄弟子孫放出為民。令其自  
謀生計。內務府大臣雖係照例議准。日久不

能保無流弊。莊頭等或欲圖出旗自便。故意  
拖欠錢糧。罪止革退。而其子孫轉得為民。仍  
可倚以自贍。日後并可考試。俾登仕籍。皆情  
理所必有。不可不防其漸。嗣後凡獲罪革退  
之莊頭。其家屬有呈請為民者。除疎遠族戶  
准仍照舊例辦理外。其本身及子孫俱應發  
往打牲烏拉充當苦差。以示懲儆。此案即照  
此例行。○己巳遣官祭

歷代帝王廟。○又諭曰。姚立德題參。年老力  
衰之守備孫自祥。請勅部勒休一疏。所辦已  
遲。據稱孫自祥年逾六旬。精力日衰。因閱該  
守備履歷。年已六十八歲。其衰頹必非始於  
近日。姚立德何以不早為劾退。姑容至今。明  
係聞知阿桂將至工次。恐其看出該守備衰  
老情形。難以掩飾。始題此疏。以彌縫其過。殊  
屬非是。各省督撫。往往於庸劣之員。平日容  
其戀棧。及至陞調離任時。懼後任持其短長。  
每於交印之前。叅奏數人。以圖塞責。其惡習

最為可恨。亦從不能逃朕之洞鑒。姚立德此疏。即係如此。著交部議處。所有年老力衰之守備孫自祥。並著交部議處具奏。○刑部議覆。大學士暫署湖廣總督三寶等奏。稱湖北鄭陽府界連秦豫。宜昌施南二府地接川黔。距省較遠。秋審人犯。請照雲南永昌等府例。免解省責成。該管道研訊。應如所請。鄭陽令安襄鄖道。宜昌施南。令荆宜施道。各於冬季按巡之便。親詣各州縣提訊。不令原審知府會勘。果無異詞者。即加結冊申院司。情罪未協者。另繕招冊。將犯證委員解省。候院司覆審。徇庇及有心翻案。該督撫叅辦從之。○予故教漢多羅郡王喇什喇布坦祭如例。○庚午。諭木蘭秋獮之典。已隔兩年。今秋自應照例舉行。以肄武事。朕於五月十二日啟鑒。前往熱河駐蹕。屆期進哨。所有應行事宜。各該衙門照例豫備。○又諭。朕於五月內臨幸避暑山莊。射布靶時。兵丁等仍遣王大臣觀看。

大臣侍衛章京部院官員等皆朕親閱看

大清高宗法天隆運至誠先覺體元立極敷文奮武孝慈神聖純皇帝實錄卷之一千七十六

大清高宗法天隆運至誠先覺體元立極敷文奮武孝慈神聖純皇帝實錄卷之一千七十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭書處管理

吏部理藩院事務正黃旗滿洲都統世襲騎都尉軍功加七級隨帶加一級尋常加一級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭書處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥二月辛未吏部議覆閩

浙總督楊景素等奏稱臺灣俸滿人員向俱循例報滿並無甄別請嗣後照臺灣俸滿武職例一體察驗應如所請令該督撫甄別照烟瘴俸滿例政績卓著者保題陞用無實政而年力富強者仍補原官將俸滿應陞查銷無劣蹟而辦事因循年力就衰者勒休從之○予故多羅克勤郡王慶恒祭葬如例謚曰良○壬申旌表守正捐軀山西陽曲縣民韓雲女韓氏○癸酉諭曰寧布多爾濟被控事

件著派奎林帶同主事銜諾穆親前往烏里雅蘇台會同將軍巴圖審辦○軍機大臣等議覆調任烏什辦事大臣永貴奏稱烏什領隊大臣現移駐阿克蘇所有一切事宜應籌定○弁兵商民經過阿克蘇賽哩木城應換路引向係阿克蘇綠營遊擊領烏什叅贊大臣豫用空白印票臨時填給報叅贊大臣察覈今既移駐領隊大臣即應由領隊大臣更換請交部以清漢文兼回字三體字鑄給駐

劄阿克蘇辦事烏什領隊大臣鈴記從前庫存阿克蘇辦事大臣印繳銷○阿克蘇賽哩木城中驛站及回衆交納官糧並一切關毆事件向由該城綠營首領官承辦今既移駐領隊大臣即應就近交辦應報者仍報叅贊大臣○阿克蘇向無駐防滿兵祇綠營兵一百今移駐領隊大臣請由烏什調駐滿兵五十酌派章京驍騎校二員管束並調筆帖式一貼寫二承辦檔案其官兵住房酌添三四

十間。烏什領隊大臣向與叅贊大臣同城。遇奏事及咨行事件俱同列衙。今移駐阿克蘇相距較遠。請嗣後咨行事件概不會衙。其應奏事件叅贊大臣及領隊大臣商辦者。仍同列衙。餘俱專摺具奏。從之。○吏部等部議准。貴州巡撫覺羅圖思德等奏。稱大定府分駐水城通判係苗疆要缺。地廣事繁。遇公出同城別無文員請裁。平越縣兼管巡檢之楊老驛丞。移改通判。照磨專管捕獄。協防倉庫。定為苗疆要缺。由外遴補。其現任楊老驛丞留本省。以相當缺補用。照磨衙署即將楊老驛丞舊署估建。書役工食通融改撥。從之。○伊犁將軍伊勒圖等奏。伊犁鑄錢。每歲由南路各回城辦銅配鑄。搭放兵餉。嗣因烏什庫存停運。葉爾羌銅並喀什噶爾舊存銅先後運到。奏明加鑄。復因加鑄銅盡。奏明委員赴哈爾海圖地方試採。現計獲銅九千一百餘觔。請每歲撥一千五百觔。交寶伊局加鑄。報

聞○甲戌清明節遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○

上詣

安佑宮行禮○詣

恩慕寺行禮○諭軍機大臣等。朕披閱方畧館

所進金川方畧。卷內於敘述各土司處。有綽

斯甲布土司。工噶諾爾布。人又狡猾。心存觀

望。及綽斯甲布土司。亦難深信。各等語。從前

進勘金川時緯斯甲布與金川地界毗連又  
誼屬姻姪彼時辦理自不得不嚴加防範其  
餘各土司類此者亦多有之今金川久經平  
定各土司俱恭順守法同為僕隸自當開誠  
布公使永遠安心向化將來方畧告成頒行  
或流傳該處各土司內有認識漢字者見書  
內尚有此等語句轉致心生疑畏亦非所以  
示中外一體之意現諭令軍機大臣檢查方  
畧內凡有諭及防範土司者概為刪節至川

省從前辦理軍務時各處文移或有行知防  
範土司之處諒復不必自宜一體刪除著傳  
諭文綬即將從前川省各衙門關涉土司文  
移案件逐細詳查如有此等防範字句即於  
案卷內刪節不使存留並於嗣後文移內留  
心檢點可將此傳諭知之仍著將作何辦理  
緣由遇便覆奏此亦係要務文綬莫復漫視  
之尋奉奉旨後即將在省各衙門前經理軍  
需及查辦夷務文卷遇防範土司字句摘刪

其餘曾委辦軍務或曾轄各番土司文武衙  
門均以奉文日始限一月將舊存文卷查明  
應節刪處呈刪並通飭嗣後文移加意檢點  
得旨覽○又諭前據文綬奏審辦榮縣奸民  
韓培元等散照惑眾一案朕以該督既將韓  
培元等六犯先行審明正法其餘黨夥各犯  
自即質訊明確續行定擬具奏是以諭交該  
部覈議今據刑部將案內例應緣坐之犯先  
行議奏此外原無可覈議之人由於文綬辦

理此事未能周到之故此案夥犯如張應畢  
登臣等一百一十餘人其中豈無情節較重  
應行正法之犯文綬自應將既獲者上緊審  
辦未獲者速飭嚴拏乃前指奏到以來至今  
已逾旬日尚未續奏殊屬疎懈看來文綬親  
往查辦此案連獲首夥要犯並審出前後案  
情已不勝自喜一切忘其所以遂將審辦夥  
犯之事視如末務不即審擬結案甚屬非是  
文綬著傳旨申飭至熊子龍一犯當韓培元

密散狂言時。代為作證。分受誑騙錢文。實為此案要犯。尤不可任其漏網。著傳諭文綬。即速設法嚴拏。務獲審明。從重究擬。毋致兔脫。稽誅再原。奏內有該犯捏造朱天順。繼改名天龍一犯。稱其現在雲南。年僅十二。係張祖扶助等語。所稱自即指滇省邪教首犯張保泰而言。雖當時已將該逆犯戮屍示衆。但此等妖言惑衆之案。往往本犯已經伏法。而其餘孽仍然假託名目。煽惑人心。最為可惡。現在滇省。必尚有指稱張保泰之教。流傳煽惑。即朱天龍。或亦竟有其人。不可不嚴密緝訪。徹底查辦。以淨根株。至熊子龍。或因川省查拏甚急。竄入滇省潛匿。亦未可定。著傳諭李侍堯。裴宗錫。即飭各屬嚴行訪拏。實力查究。不得僅以虛文塞責。仍將作何查辦情形。即行覆奏。將此由六百里傳諭知之。尋李侍堯等奏。滇省自乾隆十一年。張保泰子張曉謀為不軌正法。並將張保泰戮屍。迄今嚴禁邪

教。雖無流傳煽惑。破案到官。但邊民易愚。恐仍有指名作奸之人。應飭屬實力查拏。至朱天龍是否實有其人。熊子龍有無竄入滇境。均應嚴查務獲。以絕根株。報聞。戶部議覆。調任湖北巡撫陳輝祖奏。稱湖北省本年輪蠲錢糧。武昌。鄖陽等府屬額徵支應驛站等項銀。亦在蠲內。除裁節馬價等項銀歸地丁。無庸請補外。其夫馬工料等項。共需銀九萬七千有奇。請於鄰省撥支。應如所請。於安徽上年撥剩漕項內。如數撥解。從之。舉行乾隆四十三年大計。奉天。罷軟官一員。年老官一員。有疾官一員。直隸。卓異官九員。不謹官一員。罷軟官一員。年老官七員。有疾官一員。才力不及官二員。浮躁官二員。江蘇。卓異官八員。不謹官一員。罷軟官二員。年老官八員。有疾官六員。才力不及官六員。江南河員。卓異官四員。年老官一員。才力不及官二員。安徽。卓異官五員。年老官十三員。有疾官三員。

才力不及官三員。浮躁官一員。江西卓異官十二員。不謹官一員。罷軟官一員。年老官八員。有疾官五員。才力不及官二員。浮躁官一員。浙江卓異官十五員。不謹官一員。罷軟官一員。年老官三員。有疾官五員。才力不及官五員。浮躁官一員。湖北卓異官八員。罷軟官二員。年老官九員。有疾官四員。才力不及官二員。浮躁官二員。湖南卓異官六員。不謹官一員。罷軟官一員。年老官四員。有疾官五員。才力不及官二員。浮躁官一員。河南卓異官十三員。不謹官一員。罷軟官一員。年老官十員。有疾官四員。山東卓異官九員。年老官三員。有疾官一員。才力不及官三員。浮躁官一員。河東河員卓異官三員。年老官一員。有疾官二員。才力不及官一員。山西卓異官十二員。不謹官二員。罷軟官二員。年老官七員。有疾官三員。陝西卓異官十四員。罷軟官二員。年老官七員。有疾官三員。才力不及官二員。

甘肅卓異官九員。罷軟官一員。年老官八員。有疾官一員。四川卓異官七員。不謹官二員。年老官十四員。有疾官二員。才力不及官二員。廣東卓異官八員。罷軟官三員。年老官六員。有疾官三員。才力不及官二員。浮躁官一員。廣西卓異官五員。罷軟官一員。年老官三員。有疾官二員。才力不及官一員。雲南卓異官五員。不謹官二員。罷軟官二員。有疾官一員。才力不及官一員。貴州卓異官五員。罷軟

官一員。年老官二員。有疾官一員。才力不及官一員。分別議敘處分。如例。乙亥。諭軍機大臣曰。周元理奏查辦井陘縣革生李望春。梁綠野等集眾抗官毆差一摺。其情節甚為可惡。李望春、梁綠野因挾嫌起釁。傳單飲錢。主使李馥控告縣官。已屬刁惡。及該府審出實情。飭委典史查拏各犯。梁文進等復敢哄誘典史。攔入空房。糾集村眾毆傷差役。尤屬目無法紀。不可不嚴。姑懲創著傳諭周元理

即將現獲各犯嚴行審訊務得確情並將在此逃之梁綠野等上緊緝獲從重究擬并須多辦數人以示炯戒將此傳諭知之仍將獲犯審擬緣由即行覆奏○又諭據博清額等奏稱遣扎奇魯克齊玉木扎布等至恰克圖照驗號票而俄羅斯頗羅楚克等託故不來只好喚回玉木扎布等置之不問等語俄羅斯惟利是圖其託故不來自屬有心試探詭譎無恥實堪髮指博清額等將玉木扎布等喚

回置之不問辦理尚妥但從前我處未令人過境猶以為彼處瑪玉爾不曉事體今既令驗號票頗羅楚克等尚如此舉動恐係俄羅斯薩納特衙門及固畢爾那托爾等授意果爾則應一并飭責以覘俄羅斯情形著撰一公文咨行俄羅斯薩納特衙門曰前據庫倫駐劄辦事大臣等差扎奇魯克齊伊什根等往爾處齎送公文爾處瑪玉爾以無邊境大臣執照不肯放行伊什根等復向大臣處領

取執照看驗始行放過我邊境大臣等聲明緣由咨報前來查原定款內緊要事件差員齎送公文邊境官員見文書即給馬匹食物護送如刁難貽誤不行回覆即暫停貿易俟事明後方准照舊通商數年以來爾處齎文書人到境我邊境官員見有薩納特衙門文書即如議護送並未因無固畢爾那托爾執照刁難阻格乃我邊境大臣遣扎奇魯克齊伊什根等往爾薩納特衙門送文爾處瑪玉爾竟以無執照藉詞刁難然猶以為爾處瑪玉爾不曉事體妄自尊大昨我庫倫辦事大臣因爾等來文有請派人互驗執照之語即派扎奇魯克齊玉木扎布等將彼此互給字樣底稿帶往恰克圖會同爾處頗羅楚克等互看並一面行文文固畢爾那托爾令轉飭頗羅楚克秉公行事不可再行狡詐及玉木扎布等至恰克圖通知頗羅楚克令在立界牌地方相見頗羅楚克並未前來但令色爾占

尼克伊布爾來說鈔錄執照收存官署令我  
扎奇魯克齊等往爾地方閱看我扎奇魯克  
齊等以無先來就爾之理仍令頗羅楚克在  
立界牌處相見乃頗羅楚克往返推諉不敢  
前來互驗顯係因字樣中有不便令我見處  
又不能另生機變始如此借端推諉甚屬譎  
詐無恥頗羅楚克瑪玉爾等係爾等派辦邊  
務之人如此不顧理體爾薩納特衙門及固  
畢爾那托爾等豈竟不知耶果不知情即宜  
將頗羅楚克瑪玉爾等徹回治罪另派妥人  
辦理否則明係授意伊等妄為爾種種狡謀  
實堪髮指但我國辦事一秉大公至正既看  
出爾等巧詐不得明白指示是以特行咨  
文開示曉諭爾等其度量行之可也將此稿  
發交博清額閱看後即照轉行戶部議准  
陝甘總督勒爾謹等奏稱甘肅宜禾縣乾隆  
三十三。四。五。等年民墾地畝因鹹潮俱成廢  
地請豁除以新墾地三千九百七十畝應徵

糧草抵補從之○以署理藩院侍郎保泰為  
正白旗蒙古副都統○丙子

上御勤政殿聽政○諭昨檢閱查抄高樸家內  
書籍見有已故大學士黃廷桂奏疏刻本係

恭載所奉

皇考硃批及朕硃批之摺深為駭異偶閱一篇  
其所載

皇考硃批與頒行之

硃批諭旨多有未符因交軍機大臣校覈則其

所刊奉有

皇考硃批者計一百七十餘摺較之

硃批刊行者幾多至兩倍而字句亦多不符合

甚屬非是因思

皇考硃批久經

欽定選擇刊行而朕臨御後硃批之摺從未選

刻豈臣下所得私鐫況朕向曾降旨凡臣工

奏摺奉有硃批者概不准其引入章疏所謂

君不密則失臣臣不密則失身理應如是則

凡硃批事件更非臣下所宜宣露且其所利多係

嘉獎之語其或奉有

訓飭即未載入尤為失實恭繹

皇考御製序文云朕臨御寰區惟日孜孜勤求治理以為敷政寧人之本內外臣工皆令具摺奏事以廣諮諏其中確有可採者即見諸施行而介在兩可者或勅交部議或密諭督撫酌奪奏聞其有應行指示開導及戒勉懲

儆者則因彼之敷陳發朕之訓諭每摺或手批數十言或數百言且有多至千言者皆出一己之見教人為善戒人為非其有兩人奏事而朕之批示迥乎不同者此則因人而施量材而教嚴急者導之以寬和優柔者濟之以剛毅過者裁之不及者引之此等奏摺皆本人封達朕前朕親自覽閱親筆批發一字一句皆出朕之心思無一件假手於人亦無一人贊襄於側非如外廷宣布之諭旨尚有

閣臣等之撰擬也今檢內外諸臣繳回硃批之摺不下萬餘件酌量其可以頒發者檢出付之剞劂計不過十分之二三俾天下臣民展讀咸知朕圖治之念誨人之誠或人人觀此而感動奮發各自砥礪共為忠良上下蒙福朕愉快更當何如欽此是現在刊行之硃批諭旨深費

皇考聖心且所有

批摺乃

擇其可以宣示者始行刊布其餘刪去甚多而勸戒並施

垂教之意尤切更非臣下所當妄為增損也閱所刊之奏疏標題稱及黃廷桂謚法必非黃廷桂生前所為自係黃檢選其高興之見專務虛名而不度事理輒為刊刻不意黃檢荒唐竟至於此即使黃檢欲刊伊祖奏疏亦當先行奏聞更不應漫無顧忌孟浪若此皇考硃批何等重大既經

刪定豈可臣下妄有所增減且黃廷桂久經  
皇考任用。原因其有辦事之才。並不由於奏疏。  
即朕擢用黃廷桂。亦以其足任封疆。更非因  
彼之以章奏見長也。至其辦理西路軍需。實  
心任事。洵為國家得力大臣。及其身後。朕深  
為悼惜。飾終之典。極優。既入祀賢良祠。又因  
西陲大功告成。照軍功例。予以世襲伯爵。朕  
之加恩於黃廷桂者。不為不厚。而黃廷桂亦  
因此可以傳名。更不藉其奏疏刊本為之表  
揚也。況黃廷桂係漢軍世僕。黃檢尤當恪守  
舊風。更不當效漢人好名惡習。至黃廷桂任  
兩江總督時。於整飭地方。甚為有益。然亦不  
能盡愜人心。即如蘇州。尚有稱為黃老虎者。  
朕所深知。雖小人之毀譽。本不足憑。但既有  
此語。亦豈區區奏疏所能化之。使改乎。黃檢  
此事。絕不類其祖所為。並不類黃廷桂之孫。  
則其不能效法伊祖。可知。朕向日尚冀其可  
以造就有成。今以此觀之。雖小有材。乃實無

知好名之人。玷辱其祖。而朕用之為過當矣。  
此非因公過誤。可比。設使黃廷桂尚在。見有  
此事。必將黃檢重責。即黃廷桂九原有知。又  
安能瞑目乎。看來黃檢竟不能承受朕恩。豈  
宜復膺封疆之寄。黃檢著交部嚴加議處。并  
著即來京候旨。其所有板片及刷存之本。或  
已經分送者。並著即行查明。解京銷燬。恐從  
前曾為大員之人。其奏摺奉有

硃批者。類此刊刻。亦未可定。著各省督撫詳悉  
曉諭。確查如大臣家有似此曾經鐫刻者。即  
令其子孫將板片書本。一并繳出。奏聞送京  
查銷。至於我朝

祖宗以來。恩澤深入民心。一切皆由  
宸斷。及朕侍

皇考親見十三年中。

深仁善政。並不由於臣下之奏請。而下情亦毫  
無不能上達之處。朕臨御四十四年。所辦之  
事。亦然。內外大臣亦從無有擅權不法及分

門植黨。經言官劾奏者。設果有之。

皇考及朕。非不能覈實查辦。而科道中。亦從無。振拾風聞。僅以糾彈塞責者。綱紀最為整肅。而內外諸臣。為國整飭。綱紀實心任事。及效命疆場者。無不生被殊恩。死垂不朽。或優入賢良祠。以表揚其善。並不藉章奏虛詞。以為美談也。若明季諸臣。惟以虛名相尚。彼此黨同伐異。攻訐不休。並有虛擬一稿。未經陳奏。亦列入文集。以弋取稱譽者。其錮結不解之

惡習。深可痛恨。今幸積弊久已廓清。豈宜復使潛滋暗長。若黃檢之刊布伊祖黃廷桂奏疏。仍不免蹈前人覆轍。恐眾皆效尤。其為患將無所底止。不可不豫防其漸。將此通諭中外知之。○又諭曰。黃檢現已降旨交部嚴加議處。並著來京候旨。福建巡撫員缺。著增福補授。其江蘇布政使員缺。著吳壇補授。何裕城著調補江南河庫道。所遺河南河北道。今正用人之際。其員缺著朱岐速行前往署理。

俟服闋再行實授。何裕城俟朱岐到後。再赴河庫道之任。吳壇俟何裕城到淮。再赴江蘇藩司之任。增福俟與吳壇交代後。即起程來京請訓。再赴新任。增福未到福建之前。所有巡撫事務。著楊景素兼署。並令黃檢速行來京。○諭軍機大臣等。昨袁守侗在京面詢河務事宜。據奏南岸隄工有應行修補者。業已具奏覈辦。其北岸隄工亦多有殘缺之處。高晉在時。以其尚屬可緩。未經議及。等語。朕意北岸隄工。就現在而論。雖似不關緊要。但黃河溜勢無常。設溜或趨北。則北岸又為著重。若不豫行培補。堅實何以禦盛漲而保安瀾。是北岸隄工亦不宜視為末務。即或所費較多。而先事豫防。較之事後堵築。其費帑多寡。奚啻霄壤。又不可不就全局覈計也。但北岸之隄甚長。其應補情形。非大臣親行履勘。不能覈實。曾面諭袁守侗到工後。即同阿桂姚立德前往。逐段細勘。據實覈估。具奏上緊興

工第袁守備甫於今日起程其到豫計須旬日。目下正當桃汛而今年伏汛亦較往年為早。既為未雨綢繆之計。則愈早愈佳。現在挑挖引河已有藩司榮柱承辦而開放引河之事尚早。此時無庸阿桂在工坐督。阿桂接奉此旨可即會同姚立德親赴北岸將應修補隄工通行詳悉查勘。據實確估一面奏聞一面擇日興工。倘現發之帑尚不敷用即按應用之數再請續發亦無不可。此旨著由六百

里加緊發往諭令阿桂等知之。仍著將如何查辦情形由驛覆奏。○又諭曰黃檢私行刊刻伊祖黃廷桂奏疏一事甚屬非是。已降旨通行嚴切曉諭並將黃檢交部嚴加議處。並令來京候旨矣。所有原刊奏疏板片並刷印過若干部曾經分送何人亦令黃檢逐一查繳。黃檢久任山西藩臬恐即係在山西刊刻其書板或尚存晉省又高樸路過該省尚經分送則黃檢在任時分送上司僚屬者必多。

著傳諭已延三即行逐一查明彙齊解送來京。毋任稍有遺漏。將此由五百里傳諭知之。○又諭昨閱繳到高樸任所書籍有黃廷桂所奉

硃批奏疏刻本必係黃檢在山西時所刊。恐板片尚在晉省。且高樸處尚有其書則黃檢在山西曾經分送之人必多。因諭令已延三即行查明解京銷燬。今復思黃檢既為伊祖黃廷桂刊刻奏疏閱時必久。已延三豈無見聞其刻成後亦必送與該撫更不得諉為未覩。已延三見黃檢如此謬妄並不即行劾奏。殊屬非是。然此等瞻徇情面之事各督撫俱所不免。設使黃廷桂為督撫見其布政使為此事自必據實糾彈。或大學士傅恒為外任遇此等事亦必舉以入告。其餘已故及現在大臣中未必能更有其人。但

皇考刊布  
硃批諭旨俱經

聖心刪定。為臣子者。豈得於此外妄為增減。至於朕之硃批。並未刊行。又豈臣下所宜私刻。況朕前經降旨。督撫等奏摺。奉有硃批者。概不得引入章奏。則硃批之不宜宣示。尤所共知。況已延三。曾為軍機章京。於此事更當深知。悉乃於黃檢妄行刊刻之事。視同泛常。竟不具奏。惟狃於官官相護之惡習。全不以國家大體為念。天良何在。已延三著傳旨嚴行申飭。仍令其捫心自問。明白迴奏。此旨著由五百里傳諭知之。尋奏黃廷桂奏疏。查係黃檢任山西按察使時。私刻時刻。初無聞見。但黃檢曾送一部。不將謬妄處奏聞。實屬糊塗。請交部嚴加議處。得旨該部嚴察議奏。尋吏部議請革職。得旨已延三著革職。從寬留任。又諭曰黃檢私行刊刻伊祖黃廷桂奏疏一事。甚屬謬妄。已降旨通行嚴切曉諭。並將伊交部嚴加議處。令伊即來京候旨。矣。此項板片。自係黃檢在山西時所刻。其板片或尚在

晉省。或并有分送之事。已諭令已延三就近查繳。若板片攜往福建任所。從前印過若干。部曾經分送若干。部著傳諭黃檢。令其即速查明。將板片書本。即速解京銷燬。若再有隱匿。則其獲戾更重矣。將此由六百里傳諭知之。○又諭曰何裕城現經調補江南河庫道。其河南河北道員缺。亦屬緊要。因思前任道員朱岐在豫多年。河務頗為熟諳。該員丁憂回籍。已屆年餘。現有旨令其署理河北道印務。該省現有堵築疏濬各事宜。需人辦理。著傳諭周元理。即速傳知該員。由原籍束裝。速赴新任。不必來京請訓。將此並諭阿桂知之。○又諭曰原任河南開歸道周於智在豫年久。於河務頗為熟諳。前因告病回籍。調理今聞該員病已向痊。豫省現有修防疏濬各工。需員辦理。著傳諭李侍堯。迅速傳知該員。如已痊愈。即由原籍馳驛赴豫。並諭阿桂等俟該員到工。酌量委用。遇有河道缺出。即行奏

補將此由六百里諭令知之。以禮部左侍郎申保為都察院左都御史。署工部左侍郎彭元瑞為戶部右侍郎。丁丑諭朕閱黃廷桂奏疏刊本載有

皇考及朕硃批自係黃檢所刊實屬謬妄。已將黃檢交部嚴加議處。即令來京候旨。並通行曉諭矣。因復令軍機大臣詢之黃廷桂曾孫黃文燦。據稱伊家並未見此刻本。即伊曾祖祠堂及伊曾祖母處均無此書。並問之老家

人亦不知此書刻自何處。其太古堂實係伊家公共堂名。至伊曾祖黃廷桂錄存奏疏稿本。聞伊曾祖身後即經伊叔等取去。不知歸在何人之手。等語。黃檢等兄弟三人一為總兵黃模。一為知府黃棧。皆非能刻書之人。其為黃檢所刻更無疑義。但伊既為伊祖彙刊奏疏。乃於伊祖祠堂及伊祖母處俱不留置一部。可見其鐫刻此書並非實欲效法其祖。思為表揚。不過刷印多本分送眾人。圖於顏

面增光。且博取虛名耳。或其事由於庸劣幕友之慫恿。亦未可定。但黃檢身係漢軍世僕。本不當學漢人之刻集沽名。況伊祖歿後受恩極為優異。入祀賢良。世襲伯爵。並於紫光閣圖形。已足名垂不朽。更何藉奏疏流傳為重。是黃檢此舉非惟不能繼乃祖之志。并不能體乃祖之心。朕將黃檢不次擢用。實望其克肖祖風。若早知其如此。必不加恩簡任矣。仰惟

皇考硃批諭旨。導人善而戒人為非。裁其過而引其不及。因人施教之。

聖心至深且切。黃檢如果能敬繹遵行。服膺勿失。其於立己服官之道。該括靡遺。又何待刻其祖所奉。

硃批方足為法哉。至朕臨御以來。不特硃批從未鐫刻。即歷年所降諭旨。前經大學士蔣溥奏請刊布。朕亦未允行。蓋因習見皇考時。每召九卿等進見。冀人領悟。乃

訓誨開導反覆數千言。諸臣退出。惟竊語跪聆。踰晷形體疲勞。從無言及。

聖訓之當深體者。足見衆情。非可口舌化導。朕故不欲以批答之詞。宣布之旨。付之剗剗耳。至於

硃批諭旨。曾經

皇考親加刪定。豈臣下所可稍為增減。若朕之硃批。既未刊行。更非臣子所當漏洩。況君前臣名。古今通義。朕偶抽閱所刻奏疏。內有乾

隆八年三月初二日。黃廷桂請開石羊河船運柳林湖屯糧一摺。其中將提督總兵俱但書其姓。不書其名。而於總督尹繼善則直書之。即以刻書體例而論。亦不盡一。蓋黃廷桂素與尹繼善不睦。黃檢必知之。故逞其私見。妄加揚抑耳。至刊載諭旨。更無不直書臣工名字者。而其摺內敘述朕之硃批。將黃廷桂李繩武之名。俱空缺不書。尤為無禮。可見黃檢無知高興。謬妄硃出情理之外。斷不能承

受朕恩矣。黃檢膽敢刊刻伊祖所奉

硃批。又復種種乖謬。於不率不密之失。兼而有之。其咎戾實在於此。朕將黃檢嚴示懲創。亦在於此。恐外間無識之徒。妄議朕之處分。黃檢必因黃廷桂奏疏中。有過於切直。不可傳布之語。此甚非也。黃廷桂之為人。衆論不免謂其深刻。即所奏之摺。亦非以文辭見長。大率不避嫌怨。據實上陳。間或近於揣摩朕意者。容或有之。若直言極諫。則實無其事。其疏

具在。可考而知也。況朕非不容直言之主。臣工亦從無以批鱗激切之言。奏聞者。朕方以此為愧。其或事關民隱。無不立見施行。若隨事條陳。亦無不下部覈議。並未嘗稍為禁遏也。方今內外臣工。尚無大奸大惡。結黨納賄之人。言路亦無門戶紛爭肆意攻訐之事。其餘一切章奏。從不留中。又復有何隱諱乎。且如錢度之貪黷多賊。方世雋良卿之敗檢不法。皆經朕察知重治其罪。並非由科道之叅

勿又何有不納諫之事乎。至於刊刻奏疏。乃明季陋習。甚至真偽混淆。深為世道人心之害。其事本非盛世所宜有。況自焚諫草。實古來人臣之大誼。必欲存稿以炫其長。已乖正理。然或將曾經採用之疏。刻入集中。尚不為過。若已經部駁者。即不宜復行存刻。至以皇考及朕之硃批。亦併刊列。則尤不可。且黃廷桂奏疏刻本。因永貴自葉爾羌查送高樸所攜去書籍。朕始見之。並非有意查訪而得。可

見昧良之事為

天理所不容。自然敗露。為臣子者。可不知所做懼乎。著再將此通諭知之。○軍機大臣等議覆。御史西成奏稱。烏什喀什噶爾葉爾羌等處協同辦事大臣。並無印信。又因路遠。大臣奏事。不差家人齎奏。俱交驛站馳遞。驛站官無印封。不敢接遞。遇辦事大臣有應參事件。協辦大臣不得另摺密奏。請嗣後令協辦大臣向辦事大臣領取印封。專摺請安。每歲或

三四次。有應密奏事件。即就便密奏。應如所請。除烏什領隊大臣。現駐阿克蘇。另有印信外。其餘新疆協辦大臣。一體遵行。從之。○戊寅諭。直隸大名廣平順德三府屬。因上年夏麥歉收。節經加恩緩徵。並賞借貧民五六兩月口糧。以資接濟。第借過口糧。應於本年麥熟前。照數徵還。惟現在地丁錢糧亦屆開徵之期。若新舊並徵。閭閻未免拮据。著再加恩。將直省上年夏間出借口糧社義倉穀十三

萬二千五百餘石。常平糶價銀十一萬二千八百餘兩。俱緩至本年秋成後徵收。以紓民力。該部遵諭速行。○諭軍機大臣等。前因章嘉呼圖克圖奏稱。班禪額爾德尼欲於庚子年前來為朕稱祝萬壽。已允所請。並將一切事宜諭知留保住。令其親赴後藏。見班禪額爾德尼。面為商定。即行覆奏。此旨於上年十二月初六日。由六百里發往。距今已兩月有餘。尚未覆奏。殊不可解。因思初次所發諭旨。

印封外有章嘉呼圖克圖寄班禪額爾德尼字包并木匣一件內貯珍珠手串係朕賜班禪額爾德尼者附報發往恐途中被人窺見竊取并印封竊去亦未可定然此必非內地驛站遺失自係番子地面賊番所為著傳諭文綬速即查明十二月初六日諭旨印封於何日發交番子地方遞送按日逐站挨查如係被竊遺失即一面嚴緝賊犯追究印封珠匣下落一面由驛速奏若沿途並無失誤即將何月日遞交留保住之處迅速具奏又第二次諭留保住印封一件於正月十三日發往以程站計之留保住久應接奉乃亦未見奏到並著文綬查明第二次諭旨印封於何日遞交留保住一併覆奏此旨著由六百里加緊發往諭令文綬知之附發留保住諭旨印封一件並著文綬即速交站由六百里加緊遞交留保住仍著文綬將查辦情節迅速由驛加緊覆奏尋奏現發留保住諭旨印封

遵交站由六百里馳遞西藏上年十二月初六自京發遞印文珠匣於十六日由成都接遞計程二十內即應發交番子地方本年正月月底可到藏駐藏大臣尚未覆奏不應如此遲延至本年正月十三第二次自京發遞廷寄於二十五日由成都接遞計程二月初十前後亦可到藏已飛飭一路臺站員弁嚴查兩次公文包匣有無遺失遲延分別辦理得旨此後馳驛之事正多一切留心查催可也

將何月日遞交留保住之處迅速具奏又第二次諭留保住印封一件於正月十三日發往以程站計之留保住久應接奉乃亦未見奏到並著文綬查明第二次諭旨印封於何日遞交留保住一併覆奏此旨著由六百里加緊發往諭令文綬知之附發留保住諭旨印封一件並著文綬即速交站由六百里加緊遞交留保住仍著文綬將查辦情節迅速由驛加緊覆奏尋奏現發留保住諭旨印封

○命察哈爾副都統齊勒克忒來京署鑲藍旗蒙古副都統以哈喇沙爾辦事大臣觀音保為察哈爾副都統○已卯諭今日據弘暢等奏閱看考試繙譯進士之八旗舉人馬步騎射除因病不到並騎射平常者九人裁不准考外其尚能騎射者僅四十七名人數不足應否考試之處請旨遵行等語滿洲奴僕學習繙譯雖係當務但騎射終為根本不能騎射徒精繙譯亦復何用是以凡考試時特

派王大臣先看馬步騎射。分別准試。此次將不能騎射之佛保等九名。裁不准考。甚是其餘四十七人。雖為數不足。姑念繙譯鄉會試之例。停止已二十餘年。今朕特恩舉行。去歲始考取繙譯舉人。以人數不足。即停止會試。無以副朕惠養滿洲之至意。著加恩仍交部辦理。並著曉諭八旗大臣。此次朕不深究嗣後凡係考試進士舉人生員時。該旗大臣務須嚴察教導。未考以前。擇能騎射者送名。若

仍行濫送。被派出閱射之王大臣奏聞。不惟不准考試。並將該旗大臣處分。斷不寬貸。又諭曰。桑齋多爾濟之子蘊端多爾濟。著加恩在御前行走。伊此時年幼。著在阿哥書房內讀書。予故烏珠穆沁扎薩克和碩親王朋蘇克喇布坦祭如例。旌表守正捐軀山西繁峙縣民李舉子妻宋氏。庚辰命輯明季諸臣奏疏。諭四庫全書館。節次彙進各省。送到違礙應燬書籍。朕親加抽閱。內如徐必

達南州草所載奸商奸璫結賄欺君諸疏。俱持論不撓。極為伉直。又如蕭近高疏。草內載有劾大璫潘相等。以礦稅擾民。宋一韓掖垣封事。亦有劾東廠及稅監李鳳梁永等蠹國病民諸疏。均屬詳明剴切。又侯震暘天垣疏。畧以客氏再入禁中。抗章極論。并及於沈渥之交通。內臣亦能侃侃不阿。雖其間若徐爾一之九八分疏。極口詆斥孫承宗。而於溫體仁霍維華等。則曲加贊譽。是非倒置。以圖榮

聽。此外亦不過撫拾陳言。固無足取其餘。讜論危言。切中彼時弊病者。實俱無。慚骨鯁。前因明季諸臣如劉宗周黃道周等。立身行己。秉正不回。其抗疏直諫。皆意切於匡救。時艱忠蓋之忱。溢於簡牘。已降旨將其違礙字句酌量改易。毋庸銷燬。因復思。明自神宗以後。朝多執政諸臣。目擊國勢之岌危。往往苦口極言。無所隱諱。雖其君置若罔聞。不能稍收補救之效。而遺篇具在。凡一時廢弛。釐亂之

跡痛切敷陳足資考鏡朕以為不若擇其較有關係者別加編錄名為明季奏疏勒成一書使天下萬世曉然於明之所以亡亦可垂示方來永為殷鑒況諸臣彈劾權奸指摘利病至不憚再三入告實皆出自愛君體國之誠而其姓名章疏不盡見於明史朕方欲闡幽顯微又何忍令其湮沒弗彰況諸臣在勝國言事於我國家間有干犯之語彼自為其主不宜深責非若身入本朝肆為詆悖者可比原不妨就其應存諸疏將觸背字面量為改易選錄餘仍分別徹燬於辦理違礙書籍亦屬並行不悖著交該總裁遴選一二人詳悉校閱編輯繕錄以次呈覽候朕鑒定並將此通諭中外知之○辛巳

孝昭仁皇后忌辰遣官祭

景陵○諭曰刑部查開私自淨身者共七案朕詳覈案情其實係貧難度日私自淨身者三案別無他故著該部移交內務府充當太監

令其在外圍當差其餘四案俱係犯有盜竊等事畏罪情急起意閹割者仍著該部照原擬辦理嗣後並著於年終彙奏一次請旨分別覈辦○諭軍機大臣曰薩載奏南巡隨從官兵執事人等應需馬匹俱於綠旗標營及江寧京口駐防馬內撥應查江寧京口額馬止四千匹不敷添換上屆經督臣尹繼善奏准在豫省旗營馬內酌撥來江協濟照江省買馬價值解還豫省在案明歲應備馬匹請仍照依上屆撥協等語著傳諭陳輝祖即照上屆之例在豫省旗營馬內酌撥六百匹於本年十月內撥送江省交界地方薩載慎派妥員前往接收交代善為餵養以為來年南巡協濟之用仍於差竣後照該省馬價還豫以便買補歸額該督撫等務宜妥為經理毋致從中滋弊將此傳諭陳輝祖並諭薩載嵩椿知之○軍機大臣等奏江蘇巡撫楊魁奏繳明人顏李亨所撰九十九籌十卷附時務

體要一卷奉旨交臣等檢閱查顏季亨籍本江陰出處始末不得而詳即其所撰九十九籌不但於本朝為管窺即為明季籌策亦謬妄不足存應并時務體要通行禁燬以正人心從之○兩江總督薩載奏明年

聖駕巡幸江浙江南驛馬不敷差派請照乾隆二十七年三十年兩次巡幸例暫增買七百匹分派沿途各州縣馬價借支驛項草料自本年十一月起照額設驛馬支給差竣停並

將增馬如數變價歸款得旨如所議行○壬午遣官祭賢良祠○大理寺卿陳孝泳以疾奏請解任得旨准其解任並著派陳世官前往診視○癸未

上還宮○甲申諭軍機大臣等前經傳諭各督撫將南巡蹕路所經一應橋梁道路尖營行宮按站開明總列一摺并詳悉繪圖貼說呈進嗣據直隸山東陸續奏到其浙省程站亦於今日據楊景素等覆奏江南距京較浙江

近何以轉未具奏必係從前因高晉差赴豫省督辦河工江南差務無專主之人是以未經辦及今薩載接任已一月有餘且大局已經高晉奏定無藉多方經畫該督自應會同該撫上緊籌辦無可復存觀望著傳諭薩載楊魁即速查明將程站營盤詳悉繪圖貼說迅速具奏將此由四百里諭令知之尋奏自山東紅花埠入江南境內如龍泉莊林家莊徐家渡早營經前督高晉奏明改建行宮查

三站早營惟林家莊應就舊基改建龍泉莊舊基低濕應移西南高平處改建徐家渡舊基逼近河隄應移東九里之桂家莊改建又陶莊新河攔黃順黃三壩各情形

聖駕親臨閱視應於陶莊

河神廟西添建座落數間備暫停蹕至渡黃渡清路輿上屆不同俱經委員查勘並咨會署河督李奉翰飭河員詳繪總圖其餘江南境營站俱仍舊報聞○又諭曰周元理奏審

擬并陘縣革生梁進文等集衆抗官毆差分別擬罪一摺已批交三法司覈擬速奏矣梁進文李望春為此案罪魁自當立實重典至梁綠野身係生員乃因挾嫌起釁傳單飲錢主使告官及該府審出實情飭委典史查拏梁綠野聞信輒即剃鬚潛逃情罪實為可惡即梁傑梁謀野任英亦俱係案內要犯不可不上緊全行緝獲從重嚴懲著周元理迅速選派明幹員弁設法加緊躡緝勿使一人漏

網今又獲幾人否但恐該犯自揣罪重未必敢潛匿近地或竟逃竄出口冀延殘喘亦未可定著并傳諭張家口古北口山海關各都統副都統提督總兵等密派兵役於各關隘嚴行稽查物色并著熱河道明山保口北道尚安於所屬地方及偏僻山溝等處詳細搜查務即弋獲毋得僅以海捕具文塞責具奏再該犯等籍隸正定又多係梁姓是否係故大學士梁清標子孫著查明速奏如果倚恃

故紳把持滋事尤不可不嚴行懲創從重究辦將此由五百里傳諭知之○又諭曰并陘縣革生梁進文等集衆抗官一案甚屬不法該犯等籍隸正定又多係梁姓或係故大學士梁清標子孫已諭令周元理查明速奏矣梁清標係明末顯宦入本朝曾任大學士受恩深重其子孫如敢倚恃故紳集衆抗官則其罪較常人尤重而地方官之平時不行管束悠悠此輩又將成明末陋習矣不可不嚴

行懲創著傳諭周元理即速查明如該犯等實係梁清標子孫則是自獲重懲難以輕寢即派按察使文祿前往梁清標家內將梁清標所遺詩文等件盡行封進并將伊家產嚴密查封一併速奏毋致遺漏隱匿將此由五百里諭令知之尋奏案犯梁進文梁綠野梁謀野梁秀野等查均非故大學士梁清標子孫但是否同宗平日有無往來均密劄按察使文祿查明並令督同正定府知府往梁進

文等家搜查有無詩文不法字跡得旨覽  
又諭前據博清額等奏稱將回商穆金福等  
暫留庫掄如開貿易只賞六個月口糧不開  
貿易再給往返十四個月口糧等因已批發  
准行矣今詳察俄羅斯情形難與交易若久  
令穆金福等在庫掄守候亦無常給口糧之  
例著傳諭博清額等即照前奏酌賞口糧遣  
回本地此項賞銀在庫掄所存呼圖克圖商  
上動用俟索琳應賠款項交部時再發庫掄  
還項○吏部議奏河東河道總督姚立德奏  
稱河南下北河同知陞廣西柳州府知府張  
符升在工年久熟諳河防請仍留辦查該員  
係推陞知府留工與例不符所請無庸議得  
旨豫省現有堵築漫口事宜留熟諳之員在  
工辦理尚屬可行張符升著照該督所請准  
其以陞銜暫留本任此後不得援以為例  
旌表守正捐軀河南許州民楊玉和妻金氏  
是月直隸總督周元理奏天津武清二縣

境舊有東隄并斜埧一道因修葺年久間段  
被水衝缺請撥永定河道庫節年扣存河院  
書吏飯食銀交天津武清三縣趕汛前修竣  
報聞○署江南河道總督李奉翰奏江南洪  
澤湖前因豫省儀封壩工墊塌恐水勢下注  
將高堰山圩臨湖磚石等工趕修豫防茲勘  
清口東西壩工上年原存金門寬二十丈今  
春洪澤湖水較大且儀封黃水下注清口須  
早展寬使湖水暢達東注現拆東壩五丈湖  
水再長即將東西壩續拆至各廳春修埽壩  
徐屬已竣揚屬亦將報完得旨覽奏俱悉又  
批是亟宜留心總以早開壩工為要○安徽  
巡撫閔鶚元奏安徽太平廬州鳳陽潁州六  
安泗州滁州和州等府州屬上年災歉雖疊  
經賑卹現屆青黃不接糧價增長請減價平  
糶市價每石一兩四錢上減一錢一兩七錢  
上減一錢五分二兩上減二錢麥豆每石照  
市價減一錢雜糧減五分其因隣災區米價

亦增之州縣。照存七糶三。分別減糶價一兩

五錢上。每石減五分一兩五錢內不減糶報

聞。○陝西巡撫畢沅奏。陝省本年額徵兵馬

糧料。前因恩蠲。奏請動項採買。經戶部議州

縣同時採買。恐長糧價。令借道倉貯糧。以每

年支剩建曠及各州縣監糧撥補。其潼關廳

不敷兵糧。於倉貯附近之州縣運供。查道倉

現貯豆石數不敷借。所貯粟米係備不時之

需。未便撥空。建曠支剩糧料。每年為數無多

近省之西。同鳳乾各邑監糧。經撥運京豫現

存有限餘屬。道遠難運。至潼關廳不敷兵糧

該廳附近各邑。現貯倉糧不能再撥。請將駐

省旗標各營。并潼關協營。本年不敷兵糧。仍

照原奏分買價昂即停報聞。○四川總督文

綬奏。布政使錢鑒去年夏秋患病。因承辦軍

需。奏明留川奉旨令俟報銷竣後自度精力

奏候加恩。茲病勢日增。飭委按察使杜玉林

接署布政使印務。按察使印務。飭委驛鹽道

林雋兼署錢鑒。令由水路赴京報聞。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千七十七

大清高宗法天隆運至誠先覺體元立極敷文  
奮武孝慈神聖純皇帝實錄卷之一千七十八

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鎮邊將軍滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆四十四年己亥三月乙酉朔諭軍機大

臣曰郝碩等奏樂安縣民婦二十餘人擊鼓  
鬧堂並有奸民二百餘人擁至擲石傷官搶  
去衣皿等因一案情節甚為可惡丐婦先行  
奸徒踵至以乞借錢米為名甚至毆官鬧署  
斷非事起邂逅必有主使之人不可不徹底  
根究重示創懲自應將現獲各犯嚴訊起意  
糾衆及同惡相濟之犯多辦數人庶足以戢  
刁風而肅法紀據奏提訊已獲之董員仔供  
係因丐婦先向伊親戚索討錢米詭言縣官

現在施給以冀遣去董員仔復隨丐婦到縣  
親自觀看因該縣詰問該犯懼拏即擲石嚇  
禁等語是董員仔之罪已無可遁但所供是  
否實情此外或尚有主謀要犯均當嚴切訊  
究以成信讞至董員仔如係平民滋事不法  
已干重戾若係生監及有職銜之人則其罪  
更重該撫尤須嚴訊分別辦理至所稱把總  
到署拏獲一人當被搶去足見把總必一無  
能之人且奸民必係糾聚而來豈得飾為偶

然湊集今該撫僅獲犯二十一人不過十分  
之一乃率據董員仔供詞稱此外皆觀看之  
人並未隨同打鬧等語深染外省化大事為  
小事之惡習希冀從輕完結甚屬非是郝碩  
著傳旨嚴行申飭並著該撫悉心嚴究務得  
此案切實原委即將未獲各犯上緊緝獲嚴  
訊勿使漏網並即審明起意主使者實係何  
人同惡相濟者共有幾人其拋擲磚石擊傷  
縣官及打毀暖閣宅門搶毀衣皿等事實係

在場動手者共若干人各按情節擬以重罪將決不待時者一面辦理一面奏聞庶足稍示炯戒斷不可意存姑息致遺養癰之患此旨著由五百里傳諭知之仍將如何查辦情形先行由驛覆奏尋奏此案先獲犯二十一人續獲十五人自投到六人審無生監職銜人在內但毆官毀署情罪重大除將各犯覈擬另摺具奏即遵旨將決不待時者一面辦理一面奏聞至獲犯被搶之把總朱秉智請

革職治罪得旨覽○以四川按察使杜玉林為四川布政使○丙戌

上幸圓明園○吏部議奏福建巡撫黃檢私刻伊祖故大學士黃廷桂奏疏應革職治罪得旨黃檢著革職○禮部等部議覆山東巡撫國泰學政桃梁奏御史戈源奏請裁各省商籍學額經大學士九卿等議交各督撫學政通查查東省商籍文武學額各八名因本省商人子弟改歸本籍應試人必請各酌減半

額如應試人數不敷額取寧缺無濫查取進學額當以應試人數為準山東商學額既應減請飭督撫等嗣後逢試期覈定十名取一人數果足四十名准各取進四名再多亦不得過四名額入學後或因人數不敷鄉試中額願改回本籍者准呈改從之予故杜爾伯特固山貝子布顏濟爾噶勒祭如例蠲緩廣西興安靈川永福馬平確容來賓象州等州縣乾隆四十三年旱災田糧有差並加

賑興安靈川來賓象州四州縣極貧民口糧一月○旌表守正捐軀直隸雄縣民裴榮妻田氏江蘇桃源縣民李永茂妻劉氏河南偃師縣民王萬益妻劉氏丁亥諭前諭營建王府公府以備皇子等分居之用現在各工將次告成皇八子永璇著加恩封為郡王賞給西長安街王府居住其西華門外王府著賞給皇孫定郡王綿恩居住西單牌樓公府著賞給皇孫鎮國公綿德居住所有分府及

封爵各事宜著各該衙門照例辦理具奏○諭軍機大臣等據勒爾謹奏蘭州府循化同知所轄之郎家族番民慘殺撒拉回民多命獲犯審擬分別正法發遣一摺所辦總不成事已於摺內批示矣此案郎家族番人慘殺回民五命且敢將被殺之屍剝皮支解兇惡已極自應將現獲各犯嚴訊明確即於番境集衆正法梟示庶足以警兇頑而戢殘暴乃該督獲犯審辦時致令監斃五名已屬倖逃顯戮及審訊擬罪僅將者黑隆本乙舍完的二犯請即行正法餘犯七名改發伊犁為奴實屬姑息至該番頭人雖於事後將兇犯綁縛獻出然其平日約束不嚴致所屬番人兇橫不法若此自有應得之咎勒爾謹何竟置之不問亦屬疎漏至勒爾謹一聞循化同知稟報自應即差大員帶領兵役前往緝捕乃先遣通丁喇嘛往諭繼則操演鎗礮藤牌逆示兵威實覺可笑該督從前查辦河州王伏

林一案頗能妥速今辦此案糾謬無能與前案如出兩人殊不可解勒爾謹著傳旨嚴行申飭仍著將擬遣各犯俱行押赴番境同者黑隆本乙舍完的一併正法示衆並將該頭人擬以管轄不嚴之罪酌令罰贖俾知凜畏庶足儆戒將來將此由六百里諭令知之仍將辦理情形即行覆奏尋奏遵旨將原擬發遣伊犁為奴七犯改同者黑隆本乙舍完的委員押赴番境正法示衆並傳飭該頭人約束不嚴之罪令其罰贖得旨覽○兵部議奏據甘肅提督法靈阿冊送考驗本標五營烏鎗兵中靶不及分數請將該管將弁暫停開揭復不自行引咎應交部察議該管將弁仍令送部議處得旨兵部奏甘肅提督法靈阿因考驗烏鎗兵下中靶不及分數呈請暫停開揭又不自行引咎請將該提督交部察議等語法靈阿所辦實大乖謬各標營操演烏鎗本應實力整頓况中靶分數即係該提督

奏定章程尤當如式演習。據實劾奏。何得飾詞咨部。邀免處分。前此烏大經。因巡閱各營。烏鎗不及分數。將所轄將弁查叅。并自請議處。朕以烏大經。係自行查出。非由提督所糾。且就所閱情形。直陳毫無粉飾。誠實可嘉。特勅免其置議。法靈阿若據實具奏。此等公過處分。未嘗不可加恩寬免。況法靈阿身為提督。且久在乾清門行走。何所見轉不及烏大經。伊平日辦事尚屬妥協。實不意其荒唐若

此。法靈阿著交部嚴加議處。餘依議。○以湖南衡永郴桂道汪新。為四川按察使。○戊子。步軍統領衙門奏。拏獲直隸井陘縣歛錢告官。復聚眾抗官毆差。案犯梁綠野。審明供詞。奏請查辦。得旨著派喀寧阿。錢汝誠。馳驛前往。並將梁綠野帶至該處。審明辦理具奏。其隨帶司員亦著一併馳驛。○轉禮部右侍郎阿肅。為左侍郎。以內閣學士達椿。為禮部右侍郎。○己丑。諭江蘇上年被有偏災地方。俱

已加恩展賑。其鹽屬場竈坐落各州縣情形。與地方貧民無異。自應一體加恩。著將淮海分司所屬被災九分之板浦。中正。臨興。三場。分別極貧次貧。應展賑者。照例按月展賑。應借給口糧者。酌量借給。俱著照地方災民之例。一體辦理。該鹽政務督率所屬。實力奉行。務使竈戶均霑實惠。該部遵諭速行。○軍機大臣等議奏。四川木果木潰兵。因人數過多。從寬發遣。湖北湖南廣東廣西雲南貴州等省安插。但令安居內地。不足示懲。請改發伊犁。給厄魯特為奴。得旨。木果木失事。皆因此等綠營潰兵。罔顧軍律。相率奔逸。情罪實為可惡。本應概予駢誅。徒以人眾。朕心不忍。然仍令其偷生內地。將何以戒將來。可保百年無用兵之事乎。今即發往伊犁。給厄魯特為奴。尚屬施恩格外。理應共知感悔。著各該督撫。於各潰兵起解時。詳悉諭知。爾等已蒙恩貸。以不死實。逃非常曠典。如不知安靜守法。

或於中途乘間脫逃。無不即時拏獲。照改發新疆例。立行正法。決不再為寬貸。俾共知凜懼。不致自蹈刑辟。副朕法外施仁之意。○庚寅諭。向來各館應進書籍。俱係按卯稽查。惟四庫館所辦之書。向無查覈全書卷帙浩繁。不可不設法稽考。該館總裁福隆安。英廉金簡。俱無閱書之事。即著專司考覈督催。以期迅速。歲事。○又諭。本年湖南省係輪應蠲免錢糧之年。該省苗民歸化已久。其一體輸納

地丁銀兩者。已在蠲免之內。尚有辰州府屬乾州。鳳凰。永綏。三廳。額徵苗民雜糧。二百八十三石三斗零。城步。綏寧。二縣。額徵苗米。五百七十八石五斗零。此等苗民。向不完納地丁。其應徵本色米糧。即與丁銀無異。未便令其向隅。著加恩。照上屆普蠲之例。一體蠲免。俾得均霑惠澤。該部即遵諭行。○諭軍機大臣等。湖南省辰州府屬之乾州。鳳凰。永綏。三廳。額徵苗民錢糧。及城步。綏寧。二縣。額徵苗

米。已特降諭旨。加恩蠲免矣。此等加恩事件。理應該撫具摺奏明。候朕特降諭旨。上兩屆普蠲錢糧。即係如此辦理。今李湖並不查照。向例具奏。率行咨請部示。殊屬不合。李湖著傳旨申飭。○又諭。前據勒爾謹奏。安肅道陳之銓。管門家人索炳堂。即索添福。在葉爾羌陸續送交高樸家人沈泰。金銀綢緞等物。請將陳之銓解任實審等語。當以陳之銓身任道員。縱令家人。在回城販玉漁利。罪無可辭。

即降旨將陳之銓革職。並令該督提索炳堂到案。審擬具奏。此旨於正月二十九日頒發。距今已一月有餘。何以尚未據勒爾謹奏覆。辦理殊屬遲緩。著傳諭勒爾謹。即將此案迅速嚴訊。明確按律究擬。具奏毋稍延宕。○舉行繕譯會試。以禮部左侍郎阿肅為知貢舉。禮部尚書德保為滿洲正考官。刑部尚書德福為副考官。正藍旗蒙古都統德勒克為蒙古考官。○辛卯。諭曰。尚書公福隆安。派往正

定有查辦事件。即著馳驛前往。隨帶司員。亦著一併馳驛。其現在拏獲之梁二觀。並著帶往質訊。○諭軍機大臣等。據阿桂等奏。新築之攔黃壩。共軟鑲得一百二十餘丈。新挑引河工程。通計已有六分。尚有數段工程較欠者。現擬將先行完工處所。夫役撥往幫同速挑。其兩壩轉令緩緩進工。俟引河辦竣。可以定期開放時。即將壩工計期趕辦。庶於啟閉機宜。倍為慎重。又稱。自新引河頭。至新引河尾。接入舊引河處。及舊引河尾。歸入正河。河身各段。俱令以次而低。將來開放時。方能奔騰暢達。即可刷深。斷不致復有淤阻。各等語。所辦甚好。俱合機宜。自應如此辦理。但不知引河工程。通計何日可以全竣。開放引河。當在何日。其新壩工口門。趕緊收小。合龍應在何時。並著阿桂等。即約計期日。先行奏聞。以慰廑念。至阿桂辦理合龍。及善後事宜。完畢。尚須會勘。應行修補兩岸隄工。覈議定局。交

總河巡撫。遵照辦理。並須查看漫水下注。至渦河一帶情形。估勘確實。交河南安徽兩省巡撫妥辦。阿桂方可起身回京。若合龍期早。查勘諸事。亦得早竣。阿桂自可於朕詣熱河。啟鑾前到京。若各項估勘。稍需時日。阿桂轉不必過於趕急。以致不能周到。阿桂不過留京辦事。現在亦無必需交辦之事也。聞此次進到之圖。所辦俱好。已於圖內批示。並著發回。此旨。着由六百里加緊傳諭知之。仍著迅速由驛覆奏。○又諭。本日據正黃旗滿洲都統英廉等奏。原任廣西鎮安府知府舒世泰。丁憂回旗。旋准該撫咨明。俟該員服滿應補時。該旗照例給咨。發往原省。俟有沿海烟瘴地方。缺出題補等因。乃本旗叅領等。於該員服滿引見時。遺漏原咨。並未呈明。辦理請分別交部。至舒世泰係本省職官。既經該撫出具考語。服滿仍咨本省。以烟瘴缺補用。不得諉為不知。到京後並未呈明。恐有規避情節。

傳訊該員。據稱服滿後仍咨該省補用之處。該撫實未告知亦未給有咨文等語。著傳諭吳虎炳即將從前該員丁憂回旗時曾否將服滿後尚須赴該省候補之例向其告知及有無給與咨文齎回之處即行據實覆奏以便交部分別辦理。將此由四百里傳諭知之。尋奏舒世泰丁憂回旗時因已有文咨明吏部。本旗未將服滿仍須來粵例告知其應送部旗家口冊咨文當發給該員收領。下部知之。

○旌表守正被戕河南羅山縣民李琦妻羅氏○壬辰

上御勤政殿聽政○諭今年恩科鄉試屆期所有應行開列試差之進士出身人員著於三月二十五日在正大光明殿考試仍著吏部照例按各衙門次序於二十七日帶領引見○諭軍機大臣等本日國棟奏海塘沙水情形摺內據稱西塘章家巷至潮神廟老沙現長五百八十餘丈東塘韓家池迤西至陳文

港之東陰沙現長三千九百六十餘丈巖峯山東口門外陰沙前有岔口之處今已連成一片等語較之前次王亶望所奏摺內西塘則減至二十餘丈東塘竟減至七百餘丈其餘各處情形又大畧相同因思王亶望所奏之摺係正月二十八日拜發而國棟之摺則係二月二十一日拜發相距已將一月或海塘沙水偶有長落亦未可定著傳諭王亶望將二月內海塘沙水是否有長落之處即行

查明據實具奏將此由四百里傳諭知之尋奏海塘沙水長落無常逢大汛多衝刷二月情形較正月不同三月望汛後東塘韓家池一帶陰沙較二月又低刷數百丈得旨覽又批此可慮也一切應留心○以侍講學士紀昀為詹事通政使司副使錢士雲為光祿寺卿○癸巳諭軍機大臣等開周元理初奏井陘縣劣生哄誘村人歛錢上控及聚眾抗官毆差一案摺尾聲明如或該縣果有派累侵

漁情事。其罪亦無可寬。現今徹底根究。明確據實。嚴叅查辦等語。初報案情。自應如此聲敘。但朕從前曾降諭旨。地方遇有奸民抗官不法情事。應即從重辦理。其地方官或有累民激變之處。亦不宜同時並辦。致啟刁風。但應確切查明。俟本案辦結後。仍將釀事之地。方官另行叅奏懲治。周元理初奏此案時。即應將遵照前諭。分別查辦之處聲明。仍一面審辦奸民不法情罪。一面嚴查屬員之因何

致民激怒滋事情由。方為平允。今覆閱周元理所奏結案之摺。雖據將井陘縣知縣周尚親辦理各緣由敘入。但於採買穀價一款。則云因錢鋪繳錢未齊。先發六錢。嗣於繳足錢文後。陸續找發三錢三分。合縣三十二莊鄉已有二十八莊找領清楚。惟金柱等四莊因劣生傅單阻止未領。賈之鄉總等亦供無異詞。其採買麩料一款。則稱並無短發。又修葺橋座及城隍廟工程一款。則稱係合縣紳衿

情願出資自行辦理。官不經手。又淤灘地租一款。則稱向為書院膏火之資。該縣均無不合。並恐所發穀豆價值或尚有短領偏枯之處。又委趙州知州興孝前往各鄉逐細查問。僉稱均係實發實領。即訊諸修橋修廟董事紳衿亦堅供並無苦累情事等語。果如所言。何致村民聚集多人赴府控告。恐係周元理袒徇劣員。欲為開脫。所言殊未足信。即如梁綠野、梁二觀在京所控井陘縣民百餘人赴

正定府向劉浩處喊冤。該督時亦在隆興寺內始交清河道沈鳴皋查訊。該督摺內何以未將此一層敘入。顯有欲圖消弭化大事為小事之意。則所奏更難免無粉飾。今派福隆安前往該處查辦。逐款詳訊。自無難水落石出。如該縣實有派累情弊。亦斷不能絲毫遁飾。務即查訊明確。迅速據實具奏。至周元理因何如此辦理之處。並著福隆安將此旨與周元理閱看。詢其復有何辭。一併具奏。此旨

著由六百里發往諭令福隆安知之○甲午  
軍機大臣等議准哈喇沙爾辦事大臣海成  
奏稱察罕通格卡座向無駐防滿兵惟綠營  
把總外委各一員兵十名駐守而土爾扈特  
和碩特自移哈喇沙爾辦事俱用清文往烏  
魯木齊蘭展等處貿易往返照票俱填清字  
駐察罕通格卡座弁兵不識清字及蒙古語  
恐不能查詰請裁把總外委就近於烏魯木  
齊滿洲前鋒馬甲內調通清漢字蒙古語者  
一名委署筆帖式駐該卡座查對照票訪拏  
逃匪得項照軍臺委署筆帖式給裁員留城  
守營差遣從之○乙未

孝賢皇后忌辰

上命

皇十五子**寶琮**祭

陵寢○諭軍機大臣曰喀寧阿等奏稱途次先  
將梁綠野逐款訊問據供該縣藉公科歛短  
價派賁等項俱有經手承辦及各村鄉總等

可以質證等語看來此案各款似非奸民捏  
詞誣控且合之續獲之梁二觀所供亦大畧  
相同更非盡屬子虛今福隆安前往查辦計  
日內已至該處各款俱有人證可質逐條確  
訊無難水落石出福隆安自能秉公覈實得  
其確切情形也昨閱周元理辦理此案審結  
之摺竟云該縣並無不合顯欲為之開脫所  
言殊不足信曾傳諭福隆安令其帶周元理  
前往並將諭旨令周元理細閱看其復有何  
辭據實具奏不知周元理見朕諭旨神色若  
何其對答之言或理直氣壯自信其並無隱  
庇抑或詞意含糊強為支飾即可以決其大  
概虛實矣此事若查明該縣實有派累情弊  
而周元理故為彌縫是不但袒徇兼涉欺罔  
其各實無可寬督撫徇庇屬員即應降調亦  
衆所不免若係公過處分朕無不從寬留任  
如高晉革任註冊之案積至十餘次朕皆曲  
示姑容以其皆係因公也今并陘一案若該

縣實係科派累民以致激變而該督尚欲為之消弭開脫於政體官方大有關係非尋常公過可比若復置之不究致各省相率效尤吏治尚可問乎即或周元理之意以奸民聚衆抗官亟宜懲治若將地方官同時糾劾恐長刁風則朕前降諭旨甚明周元理亦當將該縣派累激變劣蹟據實查明另摺具奏並聲明先將奸民盡法懲治俟過數月後再將該員另行叅劾不使劣員得以肆行無忌方

為正理若止將奸民正法了事而置派累激變之劣員於不問其何以服民心而肅法紀乎今已明言該縣無過則是結案矣朕辦理庶務從無成見即如此案初獲梁綠野到案供出派累各款朕尚以必係該犯畏罪反噬止令喀寧阿錢汝誠前往查辦及續獲梁二觀供亦相同則各款必非盡由捏飾不得不疑及周元理之偏徇縱容其事非喀寧阿錢汝誠二人所能辦因派福隆安前往會同該

侍郎等徹底查訊自可得實情而成信讞也至朕於周元理素為信任以其在直隸年久諸多熟悉第因其年來精力稍衰方憐惜之朕實不願周元理之果有此事致畿輔少一封疆熟手若查訊該知縣派累屬實而周元理竟敢為之開脫則其罪由自取朕豈能曲為原宥此而不加整飭豈朕平日大公至正之道其又何以董治臣工乎朕此意福隆安所深知著再詳悉傳諭令即秉公確訊據實

迅速覆奏此旨著由六百里發往喀寧阿等摺奏並發寄閱看并諭喀寧阿錢汝誠知之○旌表守正捐軀浙江奉化縣民仇永裕妻徐氏○丙申諭前據周元理奏并陞縣民李馥等斂錢告官並劣生梁進文等抗官毆差一案審明分別定擬隨交三法司速議及覆奏之日適提督衙門將案內逆犯梁綠野緝獲具奏閱其供詞稱係因該縣知縣短價派買穀石及修橋修廟派錢累民各款是以赴

府控告等語。朕以梁綠野係此案重犯。所供情節。或係畏罪反噬。然亦不可不查其虛實。因派侍郎喀寧阿、錢汝誠前往該處查訊。明確如所供悉屬誣捏。即將梁綠野同應正法。各犯奏聞在彼辦理。嗣復經提督衙門拏獲梁二觀到案。並非有名要犯。而所供與梁綠野相同。朕始疑該縣之短價派錢各款。似非盡由杆民誣捏。而周元理並未將該縣派累激變之事據實具奏。顯屬袒庇劣員。於吏治

甚有關係。尤當徹底根究。而其事甚大。非喀寧阿等所能覈辦。因派福隆安馳往該處。訊明覈實具奏。並傳諭福隆安。令將諭旨與周元理閱看。先行詢問奏聞。茲據福隆安奏。初九日馳抵正定府。提集此案要犯人證。並知縣周尚親。隔別研訊。據李馥等供詞。覈之梁綠野等在京所供情節相符。嚴訊周尚親。及該縣管門家人駱榮並倉書等。雖尚未肯即吐實情。而供詞閃爍。罅竇甚多。該縣科派情

事在所不免等語。看來此案竟係屬實。殊堪駭異。奸民聚眾抗官。固宜亟行懲治。而該縣派累激變。豈宜置之不問。况朕向降諭旨。甚明。地方遇有民變之事。其滋事之劣員。固不便同時糾劾。致長刁風。亦應查明實在款蹟。具摺聲明。俟本案審結後。另行劾辦。周元理久任封疆。豈得諉為不知。何竟不遵照辦理。及福隆安詢問周元理。據稱既不將劣員奸民一併辦理具奏。迨辦結奸民案後。又不將

該縣續行覈參。實屬糊塗錯謬。更無能置喙等語。而於結案摺內。稱該縣並無不合之處。竟未提及。是周元理亦自知袒護劣員。罪無可逭。所辦殊出情理之外。非尋常徇庇因公者可比。難以復邀寬免。朕實不意周元理竟至於此。今此案現交福隆安等秉公查訊。周元理不便復居總督之任。著即解任。聽候查辦。其直隸總督員缺。著英廉速行前往署理。俟福隆安審明到日。另降諭旨。其承辦之臬

司道府等並著福隆安查明叅奏。○又諭據國泰奏拏獲恩縣聚衆抗官之左都馬現等審明正法分別定擬並聲明該縣知縣任鍾岳查無派辦不均及短價侵漁情事等因一摺國泰辦理此案頗為妥協儀封堵築漫口工程緊要所需稽料不得不令隣省協濟山東承辦之各州縣及該縣各村莊俱遵辦起運惟左家莊劣監左都等敢於抗違不辦且把持隣近之小村莊一體抗拒屢催不理及該縣親往督催左都等敢於抗違如故甚至聚衆奪犯傷差並擲傷縣令不法已極其情罪甚為可惡首犯左都馬現實不可稍稽顯戮自應立時正法示衆以昭炯戒其周普等各犯並著三法司覈擬速奏仍著該撫將未獲之三犯嚴拏務獲審明另結至該縣任鍾岳既無派辦短價情事並無不合而村民聚衆傷差實係左都等抗違辦公所致與現在直隸井陘縣知縣派累激變者不同該縣任

鍾岳並無應得之咎其因所帶人少不能擒捕即上省稟請拏犯審訊亦無不合應免置議其該管之東昌府知府胡德琳於該縣稽料尚有五千餘觔未交並未查明捏報起運完竣又不實心催辦實難辭咎著交部議處○諭軍機大臣等據福隆安奏查辦井陘聚衆之案大概情形一摺看來此案竟實已於摺內詳晰批示周元理查審此案既不將劣員奸民一併辦理迨結案時不但不叅而且謂該縣無過其袒護劣員實屬罪無可逭非尋常徇庇因公者可比未便復居總督之任且福隆安等現在查審此事若周元理尚為總督屬員等未免意存觀望即難得實已明降諭旨將周元理解任並令英廉前往暫署直隸總督俟福隆安等審明定案後再行明降諭旨英廉此時自應先赴正定接受總督印信並將直隸應辦各事詢之周元理即回保定省城辦理總督事務至井陘一案現有

福隆安等查訊無庸英廉在彼同辦也本日據國泰奏審辦恩縣聚眾抗官之左都馬現等審明正法分別定擬並聲明該知縣任鍾岳查無派辦不均及短價侵漁情事一摺所辦即屬妥協周元理久任封疆何所見轉出國泰之下著將所降諭旨及國泰原摺鈔寄福隆安令其同朕今日所批福隆安原摺交周元理細閱看其復有何辭置辯此旨著由六百里發往所有現在訊得情節並著迅速

覆奏○又諭曰周元理審擬井陘縣刁民梁進文等抗官毆差一案於該縣科派累民等情事置之不問竟云並無不合顯欲為之消弭開脫其咎甚大非尋常徇庇可比難以復居總督之任已降旨將該督解任令英廉前往署理所遺員缺俟福隆安審明到日再降諭旨但直隸總督必須熟手楊景素在直年久尚堪勝任朕意欲令其調補其閩浙總督亦屬緊要三寶任浙江巡撫有年於該處風

土情形自為熟悉欲令三寶調補其湖廣總督欲令圖思德補授但明降諭旨尚需數日英廉在京承辦事務較多不能久署直督若楊景素俟奉到明旨再候新任交代未免太遲著傳諭三寶即將湖廣總督印務交鄭大進暫行署理不必俟圖思德交代亦不必來京請訓即著馳驛速赴福建與楊景素交代並令楊景素亦即馳驛前來赴直隸總督之任計三寶到閩楊景素已可接到明發諭旨

如此較為迅速將此由六百里傳諭三寶知之○丁酉諭曰英廉現署直隸總督所有協辦大學士事務著德福暫行署理其翰林院掌院及教習庶吉士事務著德保暫行署理○又諭曰納蘭泰在總兵任內並無材能惟務巧詐漸染綠營習氣著留京在頭等侍衛上行走○諭軍機大臣等周元理奏查辦井陘一案惟稱未將該縣周尚親累民各款切實根究續叅自以為咎無可辭而於結案摺

內敘稱該縣並無不合之語。竟不提及。尤屬用巧大謬。周元理於劣員派累激變之處。意存袒徇。非但不遵向降諭旨。查明另辦。且於審擬定罪摺內。聲叙派員赴井。陞縣確查各款。該縣均無不合等語。直是將該縣開脫完事。周元理之罪。實在於此。乃此次奏摺。僅認不行續叅之過。而於稱該縣並無不合。開脫結案之處。隱而不敘。顯係避重就輕。巧為支飾。亦思此文過飾。非可用之於朕前乎。可以

存此一句疑案。即為無過。而朕之處分。為過嚴抱屈乎。至所稱梁綠野在劉浩處喊冤一節。雖即飭交清河道等查辦。未經詳細奏明。實屬糊塗錯謬等語。亦屬取巧。蓋周元理明知劉浩祇圖自了。其餘概置不問。料其必不入告。是以匿不具奏。希圖消弭耳。若金輝或英廉在彼向其喊冤。自必據實上聞。周元理亦不敢不奏矣。此等伎倆。豈能逃朕洞鑒。尚敢以遁詞巧飾乎。實屬可笑。豈朕之辦事。周

元理尚竟不知乎。著傳諭嚴行申飭。昨已降旨。將周元理解任。俟福隆安等審明到日。另降諭旨。將此傳諭知之。又諭曰。李侍堯奏拏獲四川軍營逃兵汪有志。審明正法一摺。固屬照例辦理。但據稱該犯供係四川泰寧協右營兵丁。乾隆三十七年調撥出師金川。隨營打仗。三十八年十月內。撤回至半山門。因與同伴跌錢吵鬧。私自潛逃等語。兵丁奉派出征。若在軍營畏避潛逃。實為軍律所難

逭。拏獲之日。自應立時正法。以示懲戒。若既經撤回。則已無臨陣打仗之事。且所供僅係跌錢吵鬧。其過亦輕。即或私自潛逃。與尋常營汛脫逃之兵無異。其罪尚不至於死。亦照軍營逃兵例正法。未免太過。但三十八年十月。正當續調征兵進剿之時。何以有撤回之事。恐係該犯藉詞支飾。抑或摺內敘供未能明晰。雖該兵已經正法。無可質訊。而川省逃兵冊檔具在。無難檢查。其應得罪名輕重。不

可不加確覈著傳諭李侍堯即將逃兵汪有  
志全供詳悉查對究係何項逃兵是否尚在  
軍營或因何事撤回分晰明白據實覆奏再  
逃兵事實及何年月日因何撤回之故川省  
冊檔必更詳細著傳諭文綬一併查明具奏  
將此由四百里諭令知之尋李侍堯奏滇省  
查緝逃兵均按川省開造年貌籍貫訪拏冊  
內不註脫逃事由其回至半山門跌錢吵鬧  
被責潛逃等情係據汪有志在滇親供覈對

年貌及脫逃月分相符因照例辦理得旨覽

○以禮部尚書德保兼總管內務府大臣

旌表守正捐軀直隸完縣民李兆雲妻高氏

○戊戌諭昨據福隆安等奏查訊井陘縣民  
聚衆抗官一案所控知縣周尚親科派款蹟  
在所不免必須徹底根究已降旨將周元理  
解任聽候查辦今復據福隆安等奏訊據該  
縣管門家人駱榮供稱上年八月採買倉穀  
三千石官價原係九錢三分彼時將銀換錢

給發適錢鋪短錢該縣止照六錢銀數給發  
錢文其餘三錢三分若百姓無話即不找給  
今年正月間聞金柱等莊有人要告隨傳集  
本縣各莊鄉保找發銀三錢三分其二十八  
莊俱經領去惟金柱等四莊不肯補領即赴  
府呈控質之該縣周尚親亦不能辯其為先  
侵後吐已屬顯然尚須逐案質證明確方可  
定擬結案等語是該縣周尚親侵扣穀價一  
款業經審實所侵數至盈千且滋怨激變其

罪已難輕宥著福隆安等即將各款審明一  
併從重定擬具奏至周元理於所屬知縣中  
有此等派累劣款經縣民控告並不切實查  
辦遵朕向降諭旨另摺奏明於懲治奸民後  
續將該縣劾究且於審擬結案摺內聲敘查  
明該縣均無不合顯係有心開脫冀以虛詞  
了事實出情理之外不意周元理竟至於此  
及傳旨詢問周元理其覆奏之摺僅認不行  
續叅之過而於稱該縣並無不合一語匿不

提及尤屬避重就輕巧為支飾。蓋周元理亦自知袒護劣員。應獲重譴。故爾文過飾非。此等伎倆。豈能施之於朕前乎。可以存此一句疑案。即為無過。而朕之處分。為過嚴抱屈乎。周元理在直多年。由縣令擢總督。其平日偏徇屬員。諸事彌縫之習。錮蔽已久。但向未敗露。朕亦不肯過於逆億。即各督撫於所屬各員。曲為護庇。皆不能免。而未經發覺。朕并不肯以苛為察。以刻為明。多方究詰。即或遇

有袒徇屬員之案。其事涉因公者。無不從寬留任。即如高晉一人。革任註冊至十餘案之多。其明證也。若周元理於科派激變之劣員。置之不問。且稱其並無不合。顯為開脫。其於政體官方所繫甚大。非尋常徇庇可比。此而不加整飭。何以服民心。而肅法紀。周元理簡任總督以來。辦理諸事。頗為盡心。朕方且憐之。即派福隆安前往查辦。曾經面諭。不願周元理之果有此事。今既審明屬實。不能因周

元理之小節。足取復示姑容。朕綜理庶務一秉大公。至正功罪輕重。惟視人之自取。此事若復姑息。非所以示公允。且恐各省效尤。吏治尚可問乎。周元理本應革職發往軍臺効力。姑念其年老著革職。仍加恩賞給三品銜。在正定隆興寺。同劉浩管理廟工。効力贖罪。其司道府等官。應行議罪議處者。著福隆安等於審結此案時。一併叅奏。再降諭旨。並將此通諭中外知之。又諭據福隆安查奏井

陘縣民聚集一百餘人。於二月十三日午後赴正定府劉浩寓所。控告該縣科派各款。劉浩並未出見。惟向知府告稱。我係辦理工程之人。未便多管此等事件。知府出告衆人。於三更時。方各散去。隨將此事詢之劉浩。亦無可置辯等語。劉浩係欽差大員。於地方尋常事件。自不應干與。若遇此等聚衆控官之事。雖不受其控辭。審理亦當據實。以有此事入告。豈得視同膜外。置若罔聞。劉浩此次辦理

廟工諸事見小推諉。朕因其平素為人。本係如此。不足深責。乃於此等大案。亦竟漠不關心。藉詞推諉。又安用此侍郎為耶。劉浩著革職。仍加恩賞給三品銜。留於隆興寺。同周元理管理廟工。効力贖罪。其工部侍郎員缺。著汪廷璵補授。汪廷璵現在出差。徐績近復丁憂。工部漢侍郎乏人。徐績百日未滿之前。著謝墉暫行兼署。又諭曰。直隸總督員缺。著楊景素調補。閩浙總督員缺。著三寶調補。圖

思德著補授湖廣總督。其貴州巡撫員缺。著舒常補授。倉場侍郎員缺。著雅德調補。所遺工部侍郎員缺。著惠齡補授。仍留伊犁。為領隊大臣。○諭軍機大臣等。據福隆安等奏。查訊井陘縣知縣周尚親。侵扣穀價一款。業經審實。是周元理之罪。已無可逭。現在明降諭旨。將周元理革職。仍加恩賞給三品銜。在隆興寺辦理廟工。至劉浩。於井陘縣民聚集一百餘人。向伊寓所控告。劉浩置之不問。又不

據實奏聞。亦不勝侍郎之任。並降旨將伊革職。加恩賞給三品銜。同周元理管理隆興寺廟工矣。至周尚親。侵扣穀價。數已盈千。又復激變縣民。非僅監守自盜。可比。著福隆安等。於審明後。從重定擬具奏。至奸民聚眾抗官。毆差頑梗不法。其為首及在場之人。情罪甚屬可惡。自不便輕縱。其因知縣侵扣穀價。以致滋怨上控之犯。應分別稍予末減。方為平允。著福隆安等。即就案情。另行分別定擬具

奏。將此由六百里傳諭知之。以原任總兵。現在頭等侍衛上行走。常泰為浙江衢州鎮總兵。○己亥祭

先農之神。遣理郡王弘暉行禮。諭軍機大臣等。本日進呈繙譯進士卷。朕細加閱看。所擬第一第二兩卷。雖不甚精當。尚無大疵。且所繙元郝經字樣。亦屬相合。其所擬第三卷。將元郝經誤繙闡中。應尚有備取之卷。著德保等。復加檢閱遴選。如有別卷。繙元郝經無

誤文義尚堪錄取者。即將此卷易換填榜。毋庸復行進呈。若實在別無合式之卷。再將此卷錄取。將此諭令德保等知之。又諭曰。周元理覆奏接奉諭旨。自行請罪一摺。不值更為諭示。周元理第閱摺內。有家人駱三等。雖經按察使文祿用刑訊問。但臣並未親加刑訊。審出確情等語。此一節甚有關係。若文祿將駱三等刑訊得有實情。而周元理敢於消弭不辦。則周元理之獲罪更大。不止於昨所降旨之處分矣。若文祿將各犯刑訊。竟不能訊出實情。何以福隆安等審訊駱三。一經嚴鞫。即據供吐確鑿。是文祿之所謂刑訊。非以具文了事。即全未切實研訊。則其在刑部。因何尚稱為出色司員。若文祿迎合周元理之意。雖訊得實情。仍為彌縫不辦。則文祿之罪更大。總之此事之失。非在周元理。即在文祿。二者必居一於此。不可不徹底根究。現今周元理、文祿俱在正定。著福隆安即將二人面

加詰問。務得確情。即行據實覆奏。如福隆安已將全案審結。起程回京。途中接奉此旨。仍著回至正定。將此一節。問明具奏。再行起程。將此由六百里傳諭知之。又諭本日。文綬奏到摺內。所有雲南等省。辦運銅鉛船隻。過境共分四摺。此次船隻出入境。汎沿途接護。催趲。不過按例奏報之事。不拘幾起。祇須彙總一摺。聲敘。即或各省並至。亦祇須另列清單。今文綬分作四摺具奏。殊屬煩瑣。該督久任封疆。不應如此拘泥。著傳諭文綬。嗣後凡遇奏報事件。並宜酌量。并敘。以歸簡易。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千七十八

實錄卷之一千七十八

三

大清高宗法天隆運至誠先覺體元立極敷文  
奮武孝慈神聖純皇帝實錄卷之一千七十九

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥三月庚子諭軍機大臣

實錄卷之一千七十九

一

等昨已降旨令三寶調補閩浙總督其湖廣  
總督員缺令圖思德補授所遺貴州巡撫員  
缺令舒常補授並諭令三寶即速馳驛赴閩  
其總督印務交鄭大進暫行署理至舒常由  
京赴黔未免畧需時日著傳諭圖思德不必  
候舒常交代即將貴州巡撫印務交布政使  
李本暫行護理即赴湖廣總督新任不必來  
京請訓將此由五百里發往仍著圖思德將  
接奉諭旨起程日期覆奏並諭令雲貴總督

李侍堯知之。又諭據三寶等奏興國州候選訓導馮王孫呈所著五經簡咏二本語多狂悖并不避

廟諱之處。現在提同應質犯證嚴審究擬。俟將刷印各本搜查淨盡。同起出板片一併解京等語。朕初閱時。尚以為不過如李湖前奏陶汝鼎黎元寬詩集一例。及加細閱。則馮王孫現係捐貢候選訓導。且曾在國子監肄業。久為學校教育之人。理應知法守分。今閱發出詩內各句。悖妄狂誕。不可枚舉。且有復明削清之語。並於

廟諱全然不避。悖逆顯然。實屬可惡。應即嚴訊該犯。錄取確供。照大逆凌遲緣坐例。迅速問擬具奏。以正人心。而伸法紀。並將所有刷印各本。盡行查繳。毋使片紙存留。并查此外不法詩文。一併解京銷燬。勿以具文了事。計此時三寶應已遵旨。馳驛赴閩。圖思德尚未到任。此案即交鄭大進速行妥辦。具奏此旨著

由五百里傳諭知之。又諭曰。傳玉等奏稱本年齊齊哈爾黑龍江副都統派三城官兵巡查俄羅斯邊境。不准帶貨物。並曉諭官兵如俄羅斯問時。不必說恰克圖停止交易。祇言去歲爾處失馬十一匹。混稱十三匹。冒昧索取。故未帶貨交易。以辱俄羅斯等語。所見甚小。恰克圖現既停止交易。齊齊哈爾等處自不准帶貨私易。即俄羅斯詢問。宜直告以前因爾俄羅斯妄自尊大。奏聞大皇帝停止恰克圖交易。經駐劄恰克圖大臣咨會凡齊齊哈爾與俄羅斯接壤地方。一體停止。其混索馬匹一節。祇須帶說。若專以此為詞。其事甚小。安能窮詰俄羅斯耶。著傳諭傳玉遵照辦理。以禮部右侍郎達椿為正紅旗漢軍副都統。予故烏拉特扎薩克鎮國公噶勒桑車凌祭如例。旌表守正捐軀山西文水縣民李大有妻趙氏。辛丑諭據福隆安等奏查審井陘縣知縣周尚親短發穀價屬實。

按律問擬並將此案不能究出實情之臬司文祿清河道沈鳴皋正定府知府方立經俱請革職分別發往新疆及軍臺効力贖罪等因一摺已批交軍機大臣會同該部議奏矣達爾吉善前此革職之案尚非大過且任直隸臬司年久尚屬熟手著加恩補授直隸按察使仍帶革職留任劉戡丁憂回籍已將一年著署理清河道事務俟服闋再行實授劉戡未到任之前著梁肯堂暫行護理黃檢妄刻伊祖黃廷桂奏疏已照部議革職固屬自取但其罪尚不至終於廢棄著補授正定府知府仍帶革職留任並著隨同周元理等辦理隆興寺廟工以贖前愆以正白旗蒙古副都統保泰鑲藍旗漢軍副都統阿爾都對調○壬寅

上詣

安佑宮行禮 諭曰刑部進呈毆傷李子相身死之劉廩子擬絞監候聲明年僅九歲可否

減等請旨一本固屬照例辦理但所指十歲以下犯殺人應死者或係被殺之人較伊年長強弱不同如丁乞三仔之案自可量從末減今劉廩子所毆之李子相同係九歲且劉廩子因索討萌豆不給致將李子相毆跌其理亦曲若第因其年幼輒行免死豈為情法之平况九齡幼童即能毆斃人命其賦性兇悍可知尤不宜遽為輕宥向因戲殺之案曾諭令刑部將該犯監禁數年再議減等以消

其桀驁不馴之氣此等幼童自當遵照辦理且擬以應絞監候原不入於情實數年後仍可減等何必亟於寬貸乎嗣後遇有十歲以下毆人致斃之案如死者長於該犯四歲以上者仍照例聲明雙請若所長止三歲以上則年齒相若不得謂死者之恃長欺凌或齒小者轉較性暴力強亦情事所有縱不令其實抵而監禁數年亦不為過著刑部將此例另行定擬具奏劉廩子即照新例行尋奏幼

童毆死人命嗣後十歲以下死者長充犯四歲以上聲明雙請三歲以上擬絞監候不准概行聲請十五歲以下或被長欺凌毆斃人命或無心戲殺死者長充犯四歲以上方准援雍正十年丁乞三仔例聲請此案劉縻子依闕殺律擬絞監候秋後處決無庸聲請從之○諭軍機大臣等據駐劄西寧辦事副都統法福禮奏拏獲郭羅克番子策令等六名今其解京轉發烟瘴地方已諭令該副都統選派弁兵管押起解所有經過省分著各該督撫豫派妥幹員弁於番子解到時即速督率兵役小心護送出境如有中途脫逃者即速嚴緝務獲於該處立行正法以示懲儆各督撫務須實力妥辦毋稍疎懈干咎將此由四百里傳諭知之○又諭據法福禮奏扎薩克台吉羅布藏丹津呈報上年十二月差往探聽郭羅克賊番之昆都色布騰達爾集帶領蒙古兵丁在察罕果爾地方拏獲郭羅克

賊番策令等六人已有旨令押解來京交刑部審明發往烟瘴地方矣郭羅克賊番向每至蒙古遊牧地方搶掠偷盜甚為可惡今番子策令等六名經蒙古拏獲雖嚴訊現無盜劫之事罪不至死但越界潛至蒙古遊牧地方必係計圖偷竊自當發往烟瘴以示懲創著傳諭特成額文綬詳悉宣諭郭羅克頭目務須管教所屬番人止許在伊本境打牲如敢潛越蒙古地界犯有搶劫傷人之事必嚴拏就獲立即正法即無偷竊之案但經越界潛往者一經拏獲均照此發往烟瘴不稍寬貸該頭目務諭番人等凜遵法度毋稍違犯若頭目等不行教約致令滋事不法該頭目亦難辭咎將此由四百里諭令知之○癸卯諭軍機大臣等據周元理奏現候英廉來至正定接印後同赴保定將一切應辦事宜交代明白即起程赴京泥首宮門叩謝天恩等語殊可不必周元理此時尚何顏見朕即朕

亦不忍見之。且周元理自簡任總督以來。辦理地方諸事。頗為盡心。惟通年來。見其精力漸不如前。朕方且憐之。恐其引年致仕。另易生手。至此案之發覺。並非朕之有意吹求。及豫存逆億。亦非大臣等所能挾嫌中傷。且並無風力科道聞而糾劾。周元理應所深知。況周元理審結此案時。朕即交部議降旨。及拏獲梁綠野。供出知縣派累各款。尚以為該犯畏罪反噬。及續獲梁二觀。供亦相同。則不

得不疑其事或有因矣。然猶恐初派之喀寧阿等。不能審出實情。特派福隆安前往查辦。以定真偽。并面諭福隆安。以不顧周元理之果有此事。及福隆安至正定。訊明周尚親之短發穀價屬實。則周元理之袒庇劣員。不即查辦。且謂其並無不合。曲為開脫。則於政體官方。大有關係。若優為之姑容。致各省效尤。吏治將不可問。是周元理之罪實由自取。朕雖心存憐惜。亦不能廢法姑容。此朕辦理此

案之苦心也。然猶念其年老。不忍徑行罷斥。發往軍臺。仍從寬賞以三品銜。令在隆興寺廟工効力贖罪。此實格外矜全。周元理如果自知感激愧勉。惟當於廟工實力董辦。以期安速完工。庶可為桑榆之補。此時即欲來京。亦不在應見之列。朕更無可與言。且俟一二年後。廟工告竣。朕自當親詣瞻禮。落成。伊於彼時再見。未晚。將此明白諭令知之。甲辰諭曰。直隸井陘縣劣生梁進文等。哄誘村人

斂錢聚眾抗官毆差一案。現經尚書公福隆安等覆審定擬。分別斬決梟示矣。今日郝碩奏到查審江西樂安縣有丐婦二十餘人。擊鼓鬧堂。并有奸民董員仔元九仔等二百餘人。擁至縣堂。擲石傷官。打毀衙署。一案。前日國泰亦奏有審辦山東恩縣聚眾抗官之左都馬現等一案。俱將首犯立時正法。餘俱分別斬決。監候均交三法司覈擬。速奏。不稍寬貸。一月之中。聚眾抗官之案。竟有三起。是外

省人心風俗未免澆漓甚為可惡但聞百姓等因素知朕愛養黎元體恤備至遂爾漸生驕縱此則自速罪戾不能承受朕恩矣殊不知朕平日所撫綏惠愛者乃良善平民若強悍之徒敢於糾眾抗官必執法嚴懲不稍輕縱所謂稂莠不除嘉禾不植剪奸頑正所以全善類也從前順治康熙年間督撫等猶沿明季陋習於抗官拒捕之案每多暗為消弭歸於不辦

皇考在位力加整頓各省官民始知凜遵朕臨御以來嚴飭封疆大臣不許彌縫了事匿不上聞朕亦有犯必懲期於辟以止辟乃愚民仍不知悛改究係教化未周牧民者不可不引以為愧夫地方官果有科派累民之事自應重究而奸民膽敢藉端抗官亦誅所必加是以從前曾降諭旨凡有此等案件不宜同時並辦致啟刁風但應確切查明俟本案辦結後仍將釀事之地方官另行叅奏即如井

陘一案周元理審辦時止將奸民正法了事而置派累激變之劣員於不問此則袒庇徇私於政體官方大有關係因派福隆安等前往徹底查訊嗣據審明該縣周尚親實有侵扣穀價等事問擬絞候而周元理及司道府等袒護劣員曲為開脫其罪實難輕宥已明降諭旨分別處分將伊等獲咎緣由明白宣示若山東江西兩案地方官實無不合原可無庸辦理若梁進文等之糾眾拒捕亦不能

因釁起劣員遂將刁民曲從未減也朕綜理庶務一秉大公至正明罰勅法惟視其人之自取從不肯畸重畸輕凡我羣黎豈尚不能深悉朕意乎著通飭各督撫將來如遇此等案件務將起意奸徒及同惡相濟之犯重加懲創不得稍存姑息仍當董飭各屬實意撫民毋得執法滋事倘不肖有司科派擾累亦當查明劾治勿稍徇縱否則井陘之例在督撫等可不知所儆懼乎朕意在愛民惟恐愚

祇輕蹈法網將此旨詳悉曉諭使家喻戶曉不致以身試法庶風淳俗厚安享盈寧副朕明刑弼教之至意將此通諭中外知之 又諭曰提督法靈阿於自行條奏之事並不遵辦僅行報部並未具奏巧避己罪更復掩飾屬員之罪已照部議革任矣但法靈阿係乾清門侍衛經朕格外加恩用至提督今取巧冀免輕罪甚屬不堪與別項因公呈誤者不同法靈阿所襲世職一併解退仍加恩賞給

三品職銜前往和闐同德風辦事所有應得之項俱不必支給令其自備資斧効力贖罪諭軍機大臣等井陘縣刁民梁進文等抗官毆差一案經軍機大臣會同該部覈覆分別斬決梟示已依議行矣所有應行斬決各犯現在正定府監禁無庸解往井陘之金柱村辦理以免疎虞著傳諭喀寧阿等即於府城將各犯正法示衆仍將梁進文傳首該村梟示亦足使闔屬人民共知儆戒喀寧阿等

辦理完畢即起程回京此旨著同議覆之招由六百里一併發往 又諭前據勒爾謹奏總兵斐慎虧短馬匹並支領冬春兩季馬乾銀兩一摺已於正月二十九日降旨將斐慎革職交該督嚴審定擬具奏距今已將兩月何以尚未據審明奏覆著傳諭勒爾謹速行審訊明確據實具奏如勒爾謹已經交印起程來京即著畢沅查審速奏又今日王廷贊奏稱於二月二十七日到蘭是夜得雨三

寸等語甘省得有春雨於農田甚為有益且除蘭州外各屬曾否均霑何以未據勒爾謹奏及並著一併查明具奏此旨著由五百里傳諭知之 以直隸天津鎮總兵仁和為甘肅提督山東文登協副將剛塔為直隸天津鎮總兵 乙巳

上御勤政殿聽政 祭

先蠶之神遣妃行禮 諭曰直隸布政使單功權徇庇劣員又曾保舉卓薦經軍機大臣

會同該部議以革任固屬罪所應得但總督周元理業已罷斥臬司文祿清河道沈鳴皋亦俱革職分別發往新疆及軍臺効力贖罪若復將藩司革退是直隸一省總督司道大員同時更換於辦理地方一應事務俱易生手亦多未便况尙庇周尚親一事本於單功擢無涉大計卓異自以總督為政單功擢之罪尚輕至承審短價累民原係文祿沈鳴皋查審單功擢著加恩仍留直隸布政使任其

革任之處仍照例註冊但此案情節重大非尋常公過處分可比俟八年無過方准開復又諭曰寧夏將軍扎什扎木素前在山海關副都統任內於殘廢防禦不即查叅經部議奏現降三級調用其員缺著莽古賚補授莽古賚所遺盛京副都統員缺不必另行簡放即著盛京工部侍郎福德兼管諭軍機大臣等前因章嘉呼圖克圖奏稱班禪額爾德尼欲於庚子年前來為朕稱祝萬壽已允

所請並將一切事宜諭知留保住令其親赴後藏見班禪額爾德尼面為商定前據留保住奏稱班禪額爾德尼擬於本年六月十七日自西藏起程留駐塔爾寺於明年由青海西寧一帶行走前至熱河等語其經由陝甘山西等省俱有應行豫備事宜應令該督撫來京面諭妥辦勒爾謹昨已准其陛見著傳諭已延三接奉諭旨即起程來京陛見所有山西巡撫印務即交譚尚忠暫行護理將此由四百里諭令知之○又諭上年諭令李綬將奉天各屬所有神祠墳墓碑碣及村堡隘口門扁等項詳細查明如有違礙字樣即行磨毀改刻嗣據該府丞陸續奏明應行磨毀改刻者共一百六十六件並據福康安奏稱接准府丞會辦咨文委員查驗并於巡視城工之便留心詢訪親詣查勘等語現在曾否通行辦完未據續奏朕昨歲在盛京見李綬人尚能事欲俟其辦完此事加恩擢用並曾

命軍機大臣傳諭及之。想彼辦理此事。益當奮勉。著傳諭福康安。即將李綬曾否辦竣之處。詳悉具奏。并諭令李綬。即行據實覆奏。尋福康安奏。奉天各屬碑碣。門扁違礙字跡。均經府丞李綬親往各城堡。詳查毀改。其應改刻碑文。亦據該府丞改撰送閱。已發屬遵錫報聞。○以太常寺卿德明為內閣學士兼禮部侍郎。○丙午諭曰。喀喇沁貝子瑚圖靈阿。在御前行走。宣力有年。今聞溘逝。朕心深為

軫念。著加恩賞銀三千兩。仍派乾清門侍衛布彥達賚。馳驛前往游牧處。賜奠茶酒。○丁未。諭。前因黃檢刊刻伊祖黃廷桂

硃批奏疏。殊屬謬妄。因諭令將所有板片。及刷存之本。或已經分送者。查明解京銷燬。並通諭各督撫。詳悉曉諭確查。如大臣家有似此。曾經鐫刻者。即令其子孫。將板片書本。一併繳出。奏聞送京銷燬。原因刊刻奏疏。乃明季陋習。甚至真偽混淆。深為世道人心之害。况

自焚諫草。實古來人臣之大誼。必欲存稿。以炫其長。已乖正理。然或將曾經採用之疏。刻入集中。尚不為過。若已經部駁者。即不宜復行存刻。至以所奉硃批。妄行增減。則尤不可。所降諭旨。甚明。茲據原任大理寺卿尹嘉銓。將刊刻伊父尹會一奏疏二本。及板片奏繳。請燬。朕詳加批閱。大率發部議者居多。原可無容慎密。即其中間有訓勉之旨。亦不過隨事批示。非必不可宣露於外者。與黃檢所刻

伊祖黃廷桂奏疏。擅將

皇考硃批刪改。且止載

嘉獎。而不載

訓飭者不同。不在應燬之列。所有尹嘉銓繳出原書。及板片。仍著發還。朕辦理庶政。務期得當。從不肯為己甚之事。此其一端也。恐內外臣工。尚未能深喻朕意。著再將此通諭知之。○戊申。諭。正珠朝珠。定例惟御用。至皇子及親王。郡王。不但。不准用正珠。即東珠朝珠。亦

不准用。嗣後分封王爵俱不必賞給珠子朝珠。予故輔國公圖爾都子托克托襲爵。已酉。賑湖北江夏武昌咸寧嘉魚蒲圻大冶漢陽漢川黃陂孝感黃岡麻城黃安鍾祥京山潛江天門荊門安陸雲夢應城應山江陵公安石首監利枝江襄陽棗陽宜城並武昌武左黃州沔陽荊州荊左荊右襄陽德安等三十九州縣衛上年旱災極次貧軍民並緩徵勘不成災之崇陽通城興國通山沔陽蘄水羅田蘄州黃梅廣濟當陽隨州宜都遠安南漳穀城長陽並武昌武左沔陽黃州蘄州荊州荊左荊右襄陽德安二十七州縣衛民屯田四十二年錢糧及成災之江夏江陵監利並黃州等縣衛舊欠錢糧旌表守正捐軀直隸井陘縣民馮三妮妻郝氏庚戌諭軍機大臣等戶部奏金川報銷全數完竣請勅交會辦報銷大臣等將駁查各款勒限半年上緊查明覈實登覆一摺已依議行矣川

省軍需報銷正案既已全數題報完竣富勒渾著即起程回京所有駁查各款即交文綬督率局員詳悉登覆並照部議定限半年查覈完竣以期全案速清毋得稽滯將此由四百里諭令知之辛亥旌表守正捐軀河南安陽縣民王成妻秦氏壬子諭據福康安等奏奉天應修城工共十八處事務重大各該地方官才具能否不一且工程之事尤須熟諳方克辦理妥協從前邁拉遜等原奏內有派員前往查驗之語但與其查驗於辦料之後不若指示於辦料之先懇恩勅部揀派熟諳工程之司員數人令其早為前來會同該地方官備料辦理等語著照所請交該堂官揀選諳練工程之司員數人帶領引見即行前往會同各該處地方官妥協辦理癸丑順天府奏正白旗漢軍都統范時綬家人與懷柔縣民爭墳山請旨查辦得旨著派舒常會同侍郎胡李堂前往秉公查辦都統范

時綬亦著隨往。甲寅諭軍機大臣等戶部議覆李侍堯等奏請停止滇銅逾折之例一摺。自應如此辦理。已依議行矣。銅觔非米麥可比。途中運送本不應有折耗。且日久漸多。自係不肖之員盜賣責價。而以賤價買補其弊實所不免。可見滇省銅政之病。非但產銅短少。前此各督撫等實有辦理不善之處。今李侍堯既將逾折一項奏請永行停止。此外或尚有相類者。務須留心體察。剔除積弊。前

因李侍堯等覈實覆奏。業將無著欠項降旨加恩寬免。將來銅務自當日有起色。李侍堯等益當實力整飭。令此後辦銅務須年清年款。嚴飭廠員等毋蹈從前故轍。如有弊混侵虧情弊。立即嚴叅治罪。毋稍徇縱。將此由四百里傳諭李侍堯。張宗錫知之。又諭前據勒爾謹奏請陞見。已准令來京。並著將總督印務交畢沅暫署。批發奏摺至今已二十餘日。尚未據該督奏報起程日期。或因伊齋摺

家人回程未能迅速。昨留保住奏。班禪額爾德尼於本年六月內即自西藏起程至塔爾寺留住過冬。於明年由青海西寧一帶行走。陝甘兩省有應行豫備事宜。即須該督來京面諭妥辦。著傳諭勒爾謹接奉此旨。即速兼程來京。將此由五百里諭令知之。旌表守正捐軀河南息縣民王偉妻劉氏。是月直隸馬蘭鎮總兵保寧奏前因

昭西陵大紅門西尚有民居。於兩旁設撥汛紅

椿。分別內外。乾隆十年圍禁西峯口。將此內居民另賞房地移居西峯口至

昭西陵一帶。久為禁地。其右邊自圍牆至天臺山下。原設紅椿四十。請徹交石門工部存用。並將右首北邊頭二三堆撥移設

陵西南天臺山一帶要地。其

陵東堆撥南邊僅二汛。請將北邊連近之頭二三堆撥酌徹一汛移南邊二汛中間空曠處安設。得旨好如所議行。○調任閩浙總督楊

景素奏明年巡幸浙省應備差馬請豫動來歲大報馬價銀七十委員赴宣化大同張家口古北口等處買馬五百匹差竣分撥各標營兵即補該年倒馬應買額按額銷價清款報聞又奏前因閩省鹽商本薄奏准撥道庫溢額盈餘銀十三萬分貯道府庫發場員養竈收鹽配商領銷幣本隨配隨收奉行以來商竈兩益但前奏銀數係統計一年應發之項鹽則陸續煎曬祇按季先發幣收買當

發春季時夏秋冬三季銀即開貯在庫請酌借本簿小商春初動秋應發幣夏初動冬應發幣秋初冬初俱以半年更番轉運其借幣秋季於夏季底繳還冬季於秋季底繳還取息一分為修倉公用並於領借時令眾商具連環保結一商誤眾商公完無保結者不准借報聞○湖北巡撫鄭大進奏湖北上年被災較寬其本年滿漢各營官兵俸餉等項除將司庫存剩銀儘數供支尚不敷銀五十四

萬三千六百七十餘兩請於恩撥來楚部庫銀一百萬兩內如數動支作正開銷下部知之

大清高宗法天隆運至誠先覺體元立極敷文奮武孝慈神聖純皇帝實錄卷之一千七十九

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理  
吏部理藩院事務直隸總督前據滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務  
世襲騎都尉軍功加十九級隨帶加二級又加二級 直隸內大臣戶部尚書兼鑾儀衛滿洲都統軍功紀錄五次  
尋常紀錄十四次臣德瑛經筵講官太子少保工部尚書紀錄六次臣曹振鏞等奉  
敕修

乾隆四十四年己亥夏四月乙卯朔享

太廟遣禮郡王弘曉恭代行禮○

上御演武廳閱火器營操獎賞有差○丙辰刑  
部議准原任福建巡撫黃檢疏稱閩省民俗  
刁頑無賴棍徒詭立花會名色以賭輸贏多  
者至一二百人向來遇此等案件辦理太輕  
請嗣後拏獲花會訊明為首之犯照造買賭  
具例發邊遠充軍同夥開設輾轉糾人之犯  
照販賣為首例杖一百流三千里在場幫收  
錢文等犯均照為從例杖一百徒三年仍依

賭博本法先於該處枷號兩個月被誘入會  
之人枷號三個月滿日杖一百如匪徒另立  
名色誘賭聚眾至三十人以上者均照此例  
辦理地保汛兵賄庇照為首之犯問擬贓重  
者仍從重論即僅知情容隱亦科以為從例  
或甫經開設實止失查者比照造賣牌骰保  
甲知而不首例杖一百革役失察之州縣革  
職留任武職降二級留任旬日內拏獲首從  
各犯免議倘諱匿不報及有心縱容別經上

司訪拏將該管官嚴叅治罪從之○予故大  
學士陳宏謀入祀鄉賢祠○旌表守正捐軀  
廣東始興縣民蕭良才妻謝氏○丁巳

上還宮○諭軍機大臣等安肅道陳之銓縱令  
家人袁炳堂回城販玉漁利一案已降旨將  
陳之銓革職令該督提袁炳堂到案審擬嗣  
因該督月餘未經審結具奏復傳諭飭催迄  
今又將一月尚未據該督奏覆殊屬遲緩著  
傳諭勒爾謹將此案因何不即查審緣由迅

速覆奏。此時勒爾謹自己起程來京。即著署總督畢沅速行嚴訊明確。按律定擬具奏。毋稍延緩。將此由四百里諭令知之。尋畢沅奏途次迎見勒爾謹。詢悉業於在蘭時提集犯證。審明具奏。其袁炳堂一犯亦經起解來京報聞。○刑部議覆陞任貴州巡撫覺羅圖思德疏稱。安化縣民年仰用因與張大盈互爭田界被毆。適年仰用之子年占祖聞鬧趨視鎗斃張大盈。年占祖應依鬪毆殺人律擬絞。

監候。聲明救父情急援例雙請得旨。向例救父情切之案。許於疏內聲明雙請。此指父母無故被人毆打。勢在危急。其子救護情切者而言。今此案年占祖之父年仰用因占界搭棚起衅。理本不直。且與張大盈爭毆。輒舉鐵鎗柄還擊及撲跌倒地。致被張大盈乘機按毆。而年占祖即聞聲趨往拾取鐵鎗連戳斃命。此乃子幫父毆殺人。豈得謂之救父。本不當援雙請之例。况殺人者死。其罪本應抵償。

而此等案情即擬以絞候亦不至入於情實數年後或改可矜或議減等。原不在秋審應勾之例。何如將該犯圈禁數年以消其桀驁不馴之氣。何必急於曲貸乎。且寬例過多愚民益無畏忌。輕於犯法。是以近年鬪毆殺人之案愈多是此例實無當於辟以止辟也。著交刑部另行定擬嗣後如遇父母實係無過被人毆打其子趨往救護因而傷人致死者該部即照減等之例定擬具題。若有父子幫

助毆斃情形即不得謂之救護止當照鬪毆律問擬。毋庸議減。所有聲明雙請之例竟宜刪除。著該部另行定擬具奏。此案即照新例行。○戊午。

御書

華嚴廟匾曰金祇載福。○諭軍機大臣等據沈初奏請將御製新樂府及全韻詩自行刊刻宣示諸生一摺。事屬可行。從前劉墉亦有此請。曾諭令聽其自行刊刻流傳。但不必通

行各省一體刊布。今沈初既因曾經賞給二種詩篇，願自行校刊，傳示閩省諸生，即聽其自行酌定式樣鐫刻，宣示可也。將此諭令知之。○又諭曰：李侍堯奏據宣慰土司刁士宛稟報在猛嵩隘口盤獲內地民人陳文清等五人，自南掌地方攜帶象牙犀角鹿茸孔雀尾等貨，連人一併解究等語。刁士宛新復土司世職，即知感恩奮勉，將越境貿易民人留心盤獲，稟解訊究，甚屬可嘉。著傳諭該督量

實錄卷五十五

五

為獎賞，以示鼓勵。至所稱擬將陳文清五犯照例發邊遠充軍之處，尚未妥協。陳文清五犯係兩廣及雲南人，若照例發邊遠充軍，不過仍發於此數省，距各犯本籍不遠，既不足以示懲，並恐日久乘間竄逸。此等奸徒膽敢私越邊境，逗留貿易，殊屬不法。竟應解交刑部酌其情節，改發烏喇及新疆等處，以昭炯戒。此案已交刑部另行定擬具奏，並著傳諭李侍堯、裴宗錫及兩廣、四川、貴州各督撫嗣

後遇有此等案犯，俱遵照此旨辦理。○又諭前經降旨令楊魁於寶蘇局現在洋銅內動撥十萬觔，作速解京，以供應用。嗣據該撫奏稱業經動撥，委員起解於本年正月十六日自蘇起程，何以至今尚未到京。著傳諭楊魁即行檄催該委員上緊督運，解京備用。毋稍遲緩，並著傳諭山東直隸督撫飭令沿途催趲迅速趕運，毋許逗留遲誤。○軍機大臣等議准庫車辦事大臣常喜奏稱葉爾羌等處

實錄卷五十五

六

商販私玉，有自首一項。前經高樸奏准，凡商民回入埋藏隱匿者，如自行首報一體給與照票，攜帶售賣。聞此項玉石尚多，恐奸商影射漁利，應令葉爾羌大臣查明給過照票若干。觔重塊數若干，如已攜帶起身，傳知口裏口外於驗票時截留，照票追繳未起身者，查出入官俟官玉起解時搭解從之。○又議准原任寧夏將軍扎什扎木素等奏稱駐防官兵出差幫項自乾隆三十五年賞銀一萬兩

作為定額除紅白事件進京引見操演職位及修理軍器兵房等五款尚敷用外至如進京奏事操練行圍牧放馬匹將軍副都統陞見隨帶官兵等四項細數原數實屬不敷查寧夏廠地陸續開墾每年租銀除公用外餘一千二百二十二兩零空間衙署每年租錢除公用外餘五百餘串合此二項足給一年官差應請添入從之○是日起

上以常寧祀

實錄卷一〇八〇

天於

園丘齋戒三日○己未諭軍機大臣曰李奉翰奏查勘揚河等廳工程水勢情形一摺據稱上游洪澤湖內旬日來水勢有消無長高堰誌椿現存水九尺九寸等語初閱時以為必係豫省開放新挑引河掣動大溜之故及閱李奉翰此摺於三月二十六日拜發尚在阿桂等二十九日開放引河之前何以上游水勢有消無長或係挑汎後黃河水勢本小是

以漫下入淮之水無多果爾則儀封堵築口門施工必更易為力該處自開放引河已曾否將大溜全行掣動其攔黃壩進埽施工若何著傳諭阿桂等即將現在情形迅速覆奏再昨據阿桂等奏四月初七八日內即可合龍此旨到時自己如期合龍全工告竣佇盼喜音尤切將此由六百里加緊諭令知之仍即迅速覆奏○軍機大臣等議覆烏什辦事大臣永貴烏魯木齊都統索諾木策凌奏

實錄卷一〇八〇

八

稱額敏和卓之子色伊普拉因伊兄素齊瑞獲罪請將所屬回眾撥出另派員管束應如所請除將哈喇和卓及羅布諾爾一帶二百數十戶仍令色伊普拉管束外其鄰近吐魯番之數百戶應令原設之伯克管束又據稱種地兵丁由內地調撥修城兵丁由嘉峪關調撥駐防滿兵由烏魯木齊餘丁內派往并請設領隊大臣一員統轄亦應如所請將聞展辦事之大臣作為領隊大臣移駐吐魯番

其領隊大臣員缺。或以伯忠補授。或另行簡放。請旨遵行。得旨。補放領隊大臣。另降諭旨。餘依議。○庚申。

上詣

南郊齋宮齋宿。○諭曰。軍機大臣等。議准永貴等奏。請裁改闡展辦事大臣。作為領隊大臣。移駐吐魯番。或即派伯忠。或請旨另派等語。伯忠在闡展辦事有年。想於彼處情形。自能熟悉。但吐魯番地方。係初建城垣。駐防滿洲。

實錄卷二十

九

綠營兵丁事務繁多。未知伯忠能否辦理。著傳諭永貴。索諾木。策凌等。令其料度吐魯番地方。或應即調伯忠。或應另派人前往。酌量情形。據實奏聞。到時另降諭旨。○又諭。川省軍需銀報銷正案。現已全數題報完竣。其經部駁查各款。該督文綬。自可詳悉登覆。所有辦理奏銷之尚書。富勒渾。前已降旨。令即回京。其熊學鵬。現今尚在該省。並無應辦之事。且年力亦已衰老。著即令其來京候旨。○諭。

軍機大臣等。刑部奏。駁文綬將金。办殺人。之案。定限。問擬情實。咨部。請示一摺。所駁。甚是。已交該部。仍照上年秋審。辦理矣。殺人者。死。情罪。本應。擬抵。况。鬪毆。而用金。办傷人。其兇惡。尤甚。更屬。無可。矜原。乃向來。於此等。兇犯。入於。緩決者。多。致。愚民。無所。懲儆。犯法。日眾。殊非。辟以。止辟之義。是以。前經。降旨。令各督撫。出示。曉諭。定以。限期。使。僻壤。窮鄉。咸知。儆凜。奉法。化民。之道。止能。如此。原難。期其。果有。

實錄卷二十

十

效也。是以上年。辦理。秋審。時。令刑部。將金。办傷人之案。於情實冊內。夾簽。聲明。朕於。勾到時。仍覈其情節。輕重。或勾。或緩。計夾簽。各案。未經。勾決者。不過。十分之二。今年秋審。刑部自應。仍照上年。辦理。即各省督撫。並有上年。辦定之式。均可。遵照。妥辦。題達。刑部。夾簽之處。亦有。昨歲。章程。可仿。至朕。於各犯等之應否。予勾。反覆。詳閱。臨時。自有。權衡。毋庸。督撫等之。過慮也。今文綬。定期。咨請。部示之處。殊。

屬非是著傳旨申飭文綬既有此咨恐各省督撫未能領受朕意者亦所不免著傳諭各督撫將秋審冊內金刃殺人之犯均照上年之例辦理刑部亦仍照上年覈辦現今將屆秋審題本之期著將此旨分別各省遠近由驛發往傳諭遵照並諭刑部知之○又諭前據阿桂等奏於三月二十九日開放引河水勢暢達計算四月初七八日以內可以合龍等語日內諒可如期合龍盼望喜音甚切昨又傳諭詢問矣至合龍工竣該處一切善後事宜尚須阿桂在彼妥為籌畫為時約需四五日並有南北兩岸應否修補及自賈魯河至渦河一帶河身沙土停淤之處作何勘估疏挑曾經諭令阿桂等於合龍事畢親往會同履勘籌辦以期妥善似未必能剋日歲事現在英廉暫署直隸總督印務先經諭令三寶即馳驛赴閩換楊景素馳驛前來直隸換英廉進京今日據三寶覆奏於三月二十二

日自楚起程按日而計楊景素約須五月中方得到直恐英廉未必能於朕啟鑾前回京雖啟鑾後京城無應辦要務但留京辦事亦不可無熟手曉事之大臣著傳諭阿桂自行酌量如儀封合龍後能將應行勘查事務妥速辦畢於朕啟鑾前到京固屬甚善如工多路遠不能趕緊辦竣又不可因趨辦致有草率阿桂可將隄岸河身各擇其最要者會同袁守侗籌勘辦數處已可得其大概餘亦可類推仿照阿桂辦定數處即與袁守侗詳悉面為講論袁守侗諒亦能領會照辦阿桂即可起程於朕起鑾前到京尚不致遲誤阿桂回京後其事尤袁守侗專責應即會同姚立德及陳輝祖閱鴉元逐段悉心履勘切實估計繪圖貼說先寄阿桂覈定如有未協阿桂仍可駁正再行會奏亦不虞有率略歧舛及浮冒糜費之弊將此由六百里加緊諭令知之仍將現在合龍情形及奉諭旨作何辦理

之處迅速覆奏若實在不能如期至京亦即據實奏來○辛酉常雩祀

天於

園丘

上親詣行禮○辛圓明園○協辦大學士署直隸總督英廉奏陝省撥麥五萬石由河南轉運赴京原因初春以後京師雨少麥貴於平糶倉麥外又以此為有備無患之舉今畿輔及豫東各處春雨優霑市間麴價平減前項

奏奉 聖旨

下

陝麥運交倉場接收後請暫留通倉似可少節糜費即或京倉有需支應亦可量用分撥毋庸於此時全行運京得旨嘉獎○壬戌諭據李奉堯奏江南提標左營遊擊楊宗豹年力就衰弓馬軟弱又後營遊擊田法年逾七旬騎射艱難均請旨勒令休致一摺已批交該部矣遊擊有表率訓練之責豈得任衰老之員因循貽誤李奉堯甫經到任即將該二員據實劾奏從前歷任提督何以竟未辦

及陳杰在任數年過容其總棧至今實屬姑息著交部嚴加議處俞金鰲雖到任未久但該二員俱近在同城其衰老情形一望可見並未據實奏亦難辭咎著交部察議○諭軍機大臣等據農起奏查勘渦河水勢情形因黃水倏長倏消尚難遍勘確估俟豫省漫口合龍黃水全消始得估勘準確等語自應如此辦理又據稱渦河水勢湍急建瓴而下河道深寬現在水流通暢毫無阻滯間有新

奏奉 聖旨

舊沙淤坍缺係在河岸兩旁無礙水道等語則將來勘估疏挑更易為力著將農起原摺鈔寄阿桂等閱看俟合龍事畢前往各該處會同履勘時查覈該藩司所奏情形是否確實一併覈辦再昨諭阿桂或將隄岸河身擇其最要者會同索守同等勘辦數處定其大概交索守偕同照辦即可起程於朕啟鑒前到京抑或必須親往嚴勘不能如期至京之處迅速覆奏此旨諒已接到著傳諭阿桂即將

奉到諭旨作何辦理之處據實速奏現在正當前奏約計合龍之期計壩工堵築全竣即可星速馳報是以連日盼望喜音尤切將此由六百里加緊諭令知之仍著據實速奏○癸亥諭軍機大臣等前據阿桂等奏儀封河工計初六七以內可以合龍連日盼望喜音甚切現就攔黃壩堵築合龍施工較易其南岸口門只須俟合龍後補還原隄便無他患但此處雖足資鞏固而通身隄岸甚長設或

夏秋大汛復值盛漲遇隄身鬆薄處所難保其必無漫溢今此次大興工作所費不貲雖不能為一勞永逸之計而查勘險要隄工豫為補葺實屬善後急務即費用稍多亦不可靳惜前已諭令阿桂袁守侗於工竣後確覈妥辦此時想已籌及自應即行具奏及早辦理看來豫省隄岸近來辦理實不及前使何謂尚在未必有去歲疊次漫決之事皆由徐績姚立德不能實心經理致有貽誤而姚立

德為河防專責其過尤大至每年培補隄岸費用作何開銷何謂任內每年動用若干徐績姚立德每年動用若干及因何不能妥協之故並著阿桂袁守侗逐一查明據實覆奏將此由六百里傳諭知之○軍機大臣等議覆西安將軍伍彌泰等奏稱接准伊犁將軍伊勒圖咨覆該處建築城房兩年完竣且倉糧甚多足敷支用請將前項派撥養兵三千名陸續撥送西安漢軍撥換之兵一千五百

名於本年秋間起程陝甘二省裁撥兵一千五百名於次年秋間起程等語初次兵數應分派撫標五十名提標四百名延綏鎮標三百七十名興漢鎮標二百六十名固原鎮標四百二十名撫提兩標固原一鎮路屬通衢從本營派往延綏興漢兩鎮各營山路崎嶇挈眷難行所派養兵六百三十名照移駐新疆等處養兵例由甘省河西各標營就近代派前往共足一千五百名之數即將漢軍頂

補額缺至二次派往著兵原議由陝甘兩省  
均勻裁撥但西安漢軍兵丁共二千三百三  
十二名除撥補綠營兵缺外尚存八百餘名  
若俟綠營缺出撥補未免需時請於明年移  
駐兵內將應行改補之漢軍兵丁八百餘名  
全數改補其餘綠營兵六百餘名作為裁缺  
毋庸另募以符營制從之○旌表守正捐軀  
湖南攸縣民劉輝五妻洪氏○甲子諭前因  
刑部議覆陞任貴州巡撫圖思德審擬安化

縣民牟占祖毆傷張大盈身死一案將牟占  
祖依圖殺律擬絞監候并聲明救父情切援  
例兩請朕閱案情因其子助父毆斃人命  
不得謂之救父不宜援例雙請辦理未為允  
協是以降旨令該部另行定例具奏今據覆  
奏原例載稱人命案內如父母被人毆打實  
係事在危急伊子救護情切因而毆死人者  
於疏內聲明兩請其或與人角口故令伊子  
將人毆死或父母與人尋釁鬪毆其子助勢

共毆斃命俱仍照例科罪不得概擬減等等  
語向例原屬分明今年占祖毆傷張大盈一  
案正與子助父勢共毆斃命之條相合本不  
應雙請刑部於圖思德所擬雙請之處未經  
查照定例駁正遽為聲明雙請自屬錯誤牟  
占祖著改擬絞監候秋後處決此條舊例既  
已分晰詳明嗣後內外問刑衙門惟當按例  
妥辦毋庸另行改定○諭軍機大臣等連日  
盼合龍喜音晝夜懸切茲據阿桂等奏口門

之水深至五丈以外每下一埽須遲至三四  
日始能著地堅實現在儘力趕做約計十五  
日前後方可合龍等語盼望雖殷亦實無法  
已於摺內批示矣據稱引河雖有二三分溜  
勢尚未能掣動全溜等語自係新挑引河仍  
未寬深之故然業已放水又難再施挑濬之  
工所稱東岸添築兜水壩一道以冀回溜北  
趨亦屬幫助之一法至稱每進一埽須加鑲  
培厚著地堅實方敢更進一埽當此工程喫

緊之際不得不慎重。以圖歲事等語。自應如此辦理。此次工程。總以穩固為要。斷不可欲速而稍涉草率。據稱日內風勢較順。河水源源下注。自可期就深通。朕惟默禱。

天佑神助。以冀及早成功耳。至上年十二月內。高晉等曾奏請於十六堡捐建。

河神廟一座。朕閱圖內十六堡原有。

大王廟。自當向現有之廟。誠心乞懇。望其效靈。何必有一新工。即建一新廟。是以未經允

行。今思現築攔黃壩進埽之處。其地在十二堡。距原漫之口門較遠。如果

河神靈應。速助工成。原可於合龍後。即在該處建廟。以答神貺。著阿桂等二併妥酌行之。此旨著由六百里加緊發往。如有合龍喜音。仍即加緊馳奏。○又諭據吳虎炳奏。桂平縣奸民李萬春。李逢春。邀結匪類。假扮天師。妄言禍福。哄騙愚民。各處銀錢。建醮免災。該縣知縣楊聯榜。前往查拏搜檢。李萬春已挈眷

逃往貴縣。李逢春先期外出。現在分委幹員上緊嚴拏等語。奸民李萬春等。敢於聚集匪類。妄言禍福。哄騙愚民。斂取銀錢。情節甚屬可惡。不可不嚴拏務獲。盡法懲治。據稱挈眷逃往貴縣。其地係廣西所屬。且有逃往地名。無難蹤跡。况係挈眷同行。更未必即能遠颺。傳諭吳虎炳。速飭署臬司王懿德。遴派妥幹員弁。星飛查緝。務將李萬春並其眷屬及李逢春一併弋獲。嚴訊倡造邪說。哄誘愚民實

情。首夥共有幾犯。起自何時。從重定擬具奏。並恐該犯等行蹤詭秘。所稱逃往貴縣。亦未足盡信。粵西與粵東境壤毗連。恐奸民竄入廣東地界藏匿。亦未可定。並著傳諭李質穎。派委妥幹員弁一體躡緝。務獲毋使兔脫。漏網。將此由五百里諭令知之。仍著將曾否獲犯審訊緣由。迅速覆奏。○以故克勤郡王慶恒從祖父雅朗阿襲爵。○命署協辦大學士刑部尚書德福充經筵講官。○以太常寺少

卿達敏為太常寺卿。○予故喀喇沁固山貝子多羅額駙瑚圖靈阿祭如例。○旌表守正捐軀直隸慶雲縣民宗文魁妻蕭氏。○丙寅上御勤政殿聽政。○諭據勒爾謹等奏陝甘省營伍本年輪應查閱現在口內口外俱遵旨次第查閱具奏惟烏魯木齊提標五屬距蘭州四千餘里可否由都統就近查閱等語著照所請。烏魯木齊提標五屬營伍即令都統索諾木策凌查閱。○諭軍機大臣等據阿桂

等奏四月初七日未刻水勢洶湧北壩上首邊埽塌去七丈西刻以後風暴大作全河之水狂湧口門又將舊做各埽連軟鐵一併塌走計共衝去二十丈有餘等語此亦無可如何之事已傳諭阿桂等竭力籌辦妥為經理並於圖內標示機宜諭令斟酌辦理矣又據阿桂奏現在另商趕辦儘此一月內晝夜催儻以僥倖歲工若一日後即屆伏汛大水有長無落施工更難盛漲下注不特豫省下游

淹浸愈多而江南淮安高寶一帶更不知作何光景等語此實不可不慮昨歲因豫省漫口大溜全注渦河入淮恐洪湖不能容納豫飭薩載將清口兩壩及早展拓俾宣洩有資薩載遵旨陸續將清口拆開六十丈清水得以暢出下河不致重災已收釜底抽薪之益現在洪湖底水已較去歲為大設或豫省合龍不能速竣伏秋大汛下注清水必更盛長尤當實力豫籌清口兩壩不宜復拘六十丈

定誌即展寬至七八十丈以上亦無不可總期於事有濟又聞淮河之下洪澤湖之上有地名高家灣者其旁有洧河一道不礙田廬儘堪分洩淮河盛漲仍可歸入黃河等語果爾於保護高寶下河之事甚為有益向亦聞歸仁隄左近可資宣洩未知即其地否著薩載前往高家灣悉心履勘如果有可以分洩淮黃之水處使不入洪湖不致加長下河得免漫溢即當切實估計由驛加緊奏聞以便

迅速妥辦。或於其地酌建閘壩以資啓閉。不但受一時之利。並可為經久之計。如其地不能施工。亦不必因有此旨。稍為遷就。將此由六百里加緊傳諭薩載等。並將阿桂等原摺鈔寄閱看。仍著由驛加緊覆奏。兼令阿桂等知之。○又諭據阿桂等奏稱引河迤西一帶俱已淤淺。現將引河口門暫時堵閉。自應如此至所稱擬於引河頭之西百餘丈外坐灣水深處所復開引溜溝一道接入新引河之

第二段約長三百餘丈等語。閱圖內形勢。其地正當兜灣迎溜。於引溜似更得力。且據稱河流至此尚未跌深。期可掣動大溜等語。於勢尤順。自當上緊施工。但所擬新挑之引溜溝其河頭必須較現在引河分外加寬。其河身亦應加深。方可冀掣動大溜。又不可復圖省費。致河仍淺窄。不能資掣動之益也。至圖內於北壩上首邊埽幫寬培厚作為壩臺。并據稱兩壩俱由外越進埽期易堵合。自是正

理。但看圖似進埽處距口門太近。尚恐將大溜逼緊。復至刷深。或可就新做北壩臺處斜向西南進埽。以期挑逼。猶伊等所做兜水壩之意。似於堵築施工較為得濟。因於圖內用硃筆標識。著將原圖發與阿桂等閱看。可否如此辦理。即速悉心妥酌。據實覆奏。並將壩工進埽挖引溜溝情形詳悉繪圖貼說速行呈覽。○以詹事紀昀為內閣學士兼禮部侍郎。○丁卯諭軍機大臣曰。阿桂等覆奏現在

籌辦河工。及將來查勘應辦各工情形一摺。已於摺內批示矣。前因阿桂等原奏四月初可望合龍。是以諭詢阿桂。或於合龍後將善後事宜擇其要者辦定章程。阿桂即先行回京。令袁守侗在彼仿照妥辦。乃就前此垂成之局而言。今北壩復衝塌二十丈有餘。現在另籌挑挖引溜溝及設法進埽。此時應辦之事。關係重大。阿桂自當在彼督辦。冀速歲工。俟合龍堅固後再行起程。為是不必因有前

日詢問之旨。急於回京。至新挑引河務須極寬極深。方可期掣動大溜。不得存惜費之見。當以從前之淺窄。後致不能得力。為戒。壩工進埽。照圖內硃筆標識。自新做壩臺起。斜向西南進埽。俾挑大溜。由東北趨注引河。底開放掣溜。更為順利。至進埽合龍。亦照硃筆橫識處施工。仍不離前此所指兜袖之法。自當有益。阿桂等務即悉心妥籌。一面辦理。一面覆奏。其現擬另挑之引河。通計不過三百丈。

易於趨辦。阿桂等務須董飭承辦各員弁。趨集人夫。上緊趕辦。以期速竣。其壩工進埽。必須較前寬厚。逐步培壓堅實。方可得濟。總之此次辦理堵築事宜。引河必比舊寬深。進埽必加意堅固。以期速收實效。現今河流平緩。上緊趨辦。自可速期歲事。此時惟當以剋期趕辦為言。使在工人員共知奮勉。斷不可為萬一不能即完之說。致眾心懈弛。各懷觀望。或致因循遲緩。不可不慎。亦猶軍營進兵務

為必勝之說。使將士咸皆用命。不論地之險易。並得成功。所謂事在人為。阿桂尤所深知也。至於本年節候雖早。然初伏亦在六月初八日。伏汛距今尚有兩月。此時上緊趕辦。斷無至伏汛時。尚未能歲工之理。著阿桂等詳悉覈計。若果如法施工。諸事應手。約計何時可以合龍。先行覆奏。再儀封工次。四月初七日。東北風暴。以致塌動壩工。是日京師下午亦有東北風。可見百里不同風之說。亦不盡

確。前日下午。此間西南風甚大。豫省諒亦相同。或將大溜逼向引河。可期暢注。該處情形實在如何。並著阿桂等據實覆奏。朕於豫省河工一事。晝夜焦勞。而軫念災黎。尤為懸切。以

上蒼仁愛民生。無日不誠心默禱。仰祈垂佑。昨又降旨。令阿桂等俟合龍後。於現在施工處所。興建

河神廟。以答神貺。速得工成。今復思古有沉

壁禮河之事。因擇白玉壁一件並撰擬祭文一道。由驛發往著阿桂等於接奉後即詣現做壩工河岸虔誠致祭或可冀

河神佑助速得歲工。至於現在儀封堵築事惟在阿桂等實力妥辦。不可畏難亦不宜欲速以冀

天佑神助及早成功。此外亦更無他法。但缺口漫下之工。由賈魯河至渦河入淮河歸於洪澤湖。計洪湖不能容納。則下河被災必重。此

則不可不先事綢繆者。昨已諭薩載先將清口兩壩及早展拓。不必拘定六十丈之誌。即拆至八十丈以外亦無不可。但東壩難於多拆。自應將西壩展數十丈。使清水暢注。庶為有益。至所聞淮河以下洪湖以上有高家灣之地。可以分洩淮水。仍入黃河。已令薩載迅速前往履勘。如果施工有益。即速估計覆奏及早辦理。○刑部議覆大理寺卿虞鳴球奏稱。律內五徒三流。各載杖數。至五軍發遣及

雜犯三流。總徒四年。雜犯斬絞。准徒五年。俱未載杖數。恐罪重者轉得倖免。請照大清會典所載於律內軍遣及總徒准徒項下。逐一註明等語。查五徒三流俱杖一百。而總徒准徒及軍遣罪名律內轉未分晰者。滿杖至一百而止。名例所載應杖之數。即會典所載並杖一百也。既有定例。未便添改。惟是外省問刑衙門未曉全律。於軍犯等到配或不復照例折責。嗣後除外。違當差之犯例不加杖外。凡問擬五軍及總徒准徒罪名者。俱於逐案題稿引律出語內添入。仍依名例至配所照應杖之數杖一百。折責發落。語句通行辦理。從之。○豁除甘肅靈州屬河水衝坍廢田十五頃三十四畝。有奇。額賦。○戊辰

上以恭謁

泰陵

泰東陵。自圓明園啟鑒。○是日駐蹕黃新莊行宮。○己巳諭軍機大臣等。據阿桂等覆奏查

詢豫省堤岸及現辦壩工引河情形各摺已於摺內批示矣。豫省堤岸工程由於平日未能先事綢繆致有漫灘衝突之事。姚立德徐績自俱不能辭咎。而姚立德為河工專責其咎較徐績尤重。但此時正當趕辦要工之時原可無庸遽辦。及此據奏此時若稍露痕跡恐所屬河員不免愈生觀望。所奏亦是。已交工部查覈。然總須俟將來工竣後再行酌奪。非目下要務也。至現在趕辦引河壩工之事

書來二十个

七

惟當儘力催督冀早合龍庶可剋期集事。若豫存一或不能成之見及此時必辦不及之心則是甘於自盡。且恐衆人間之心生怠惰殊於辦公有礙。阿桂等既知此時若查辦歷年歲搶工程底案恐各員傳述驚疑不為無見。今辦理壩工合龍若豫為伏汎前恐不能完之說衆必聞而解體。阿桂等何獨未見及此乎。據奏現在南北兩壩又復各進一埽加緊填壓尚未到底等語。此處河溜已刷深五

丈餘。下埽自必費力。但南北並進仍係尋常合龍做法。日漸逼緊則口門跌刷愈深。似非善策。朕意莫若專就北壩臺進埽斜指西南使成挑溜之勢。可期大溜逼注東北使引河掣溜順利。方為妥善。且專就一邊進埽可不致逼緊口門。自不復慮其有跌深之患。若向西南進埽漸進漸長或可接至南岸計南岸水勢必淺。借挑溜以築壩工不與急溜相爭。竟於無意中得以合龍亦未可定。此實無聊

書來二十个

七

極思之想。不知可如此行否。著阿桂等悉心妥酌。據實速奏。又據稱日內大河之水緊靠兜水壩內向北動盪引河口所堵子埽漸又汕刷。因復相機開通河流進口尚屬順暢。察看下游一帶流亦頗急等語。實屬極好機會。此即前旨所云此地西南風大之時也。看來豫省風勢竟與京畿大畧相同。此間連日俱係西南風或吹河流徑趨引河掣動大溜得以速成誠為萬幸。惟有仰祈

天佑神助。即得合龍喜音耳。阿桂等惟當努力  
趕辦。以體朕心。勿再為遲延待時之說。徒令  
衆心觀望。致有延誤。此旨著由六百里加緊  
傳諭知之。仍著迅速履奏。○是日駐蹕半壁  
店行宮。

實錄卷一千八十

十一

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理  
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務  
世襲騎都尉軍功加十九級隨帶加二級又加二級 臣董誥內大臣戶部尚書鑲黃旗滿洲都統軍功紀錄五次  
尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆四十四年己亥四月庚午諭軍機大臣

等據陳輝祖奏大麥漸次成熟小麥揚花結  
實豐收之象已成等語覽之稍為欣慰及閱  
糧價單。開封歸德二府粟米小麥較上月稍  
增汝寧府粟麥較上月增減不一殊不可解  
豫省二麥既可望豐收今距麥熟不遠何以  
麥價轉增或因青黃不接之時市價不能不  
昂抑或別有他故著陳輝祖查明據實具奏  
又前據阿桂等奏時和驛所衝一帶漫地現  
在已經涸出其經由之惠濟河水已歸槽至

儀封十六堡決口漫下之處現俱汪洋一片其有另衝新河者舊河淤墊處所俱成沃壤等語是涸出之地小民即可乘時耕種其舊河淤墊已成沃壤者既另衝有新河無庸復還故道亦可聽民墾種惟儀封以下汪洋一片之地貧民耕作難資必多拮据但被災之區屢經賑卹加賑茲賑務已畢恩膏無可復施因思豫省上年正屆輪免錢糧之年其因災蠲免者即併於輪免之內今儀封堵築尚未

歲工漫下之水不能即時涸出災地經年淹浸無由補種不免艱食之虞情殊可憫非尋常被災可比著阿桂素守伺會同陳輝祖即速派妥幹大員確切查明現今漫水未消不能耕作之州縣共若干處據實奏明以便降旨加恩蠲免用施格外優卹將此由六百里加緊傳諭知之至現在開挑引溜溝及壩工進埽情形若何仍著迅速覆奏是日駐蹕秋瀾村行宮○辛未

孝端文皇后忌辰遣官祭

昭陵○是日駐蹕梁格莊行宮翼日如之○壬申

上謁

泰陵

泰東陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員隨行禮○調正紅旗漢軍副都統黃承恩為

正白旗漢軍副都統○賑甘肅莊浪縣丞鹽

茶廳安化正寧環縣撫彝廳張掖山丹永昌

古浪寧夏寧朔平羅西寧秦州秦安禮縣等

十七州縣廳本年雹水霜災飢民○癸酉

上詣

泰東陵行釋服大祭禮○諭朕於本日恭祭

泰東陵行釋服禮二十七月之制古禮相沿已

久不得不從惟是時序易遷益憎愴慕蓋禮有節而哀則無盡耳至朕躬所釋之服今昔

不同其故當明白宣示國俗於親喪服縗素百日而除朕昔遭

皇考大故欲持服三年

聖母諭云滿洲舊俗服縗素即不薙髮故止能以百日為斷若百日外仍服縗素亦不當薙髮經二十七月之久蓄髮甚長不幾如漢人之蓄髮乎此必不可行之事且國俗不薙髮即不祭神而舊制從無三年不祭神之事縗素百日已為得中不宜太過欽此朕因敬遵慈訓而行然於釋縗素後仍存縗素之服蓋因其時

山陵之禮未歲詰

几筵則服之而尋常則遵

皇考家法素服三年前年

聖母大事仍如前縗素百日百日後因即釋縗素而不存蓋朕即位時年力正壯自問可終三年之禮今春秋已望七設或精力稍有未逮存之而弗克盡禮於心轉有不安此今之

所以異乎昔非敢厚於前而薄於後也先王制禮不敢過亦不敢不及朕心猶歉然如不足焉將此通諭中外知之○諭軍機大臣等據閩正祥奏經過各地方二麥甚屬茂盛所豐邀撫卹麥熟足資接濟等語亳州蒙城等處為黃水下游上年豫省儀封漫口黃水下注經由該州縣漫溢田廬被災較重業經降旨撫卹蠲賑兼施並於今春加恩展賑災氓自可不致失所但儀封堵築現在尚未歲工若不能及早合龍黃水仍不免於漫下恐昨歲舊淹之處勢復難支安省上年正屆輪免錢糧之年其因災蠲免者即併於輪免之內恩膏無可復施倘災地復經漫水經年淹浸補種無由難免無艱食之患情殊可憫著傳諭閩鄂元即速派委誠幹大員確切查明亳州蒙城等處河水曾否歸槽河旁之水曾否涸出可資耕種黃水設復下注是否不致再

有淹浸之虞現在貧氓有無拮据情形詳悉據實具奏如實有應行優卹者候朕酌量加恩降旨將此由五百里諭令知之仍將查辦情形迅速覆奏○又諭曰阿桂等覆奏惟就現做局面儘此水平可辦之時竭力趕辦以期必成但能如初十以後光景別無暴漲大風約計端節前後壩工可望合龍等語據稱黃河之水係全溜奔赴壩根迎溜一面已有搜根之險惟賴兩壩勢均力敵尚可望速令直趨若做兜灣之形則繞出時又必撞擊下首在內之埽根均不免前後著重等語前說原係朕盼望急切代伊等設想今阿桂等詢之南河將備既有此慮自不可勉強從事復閱圖內兜水壩一段本係挑溜逼注引河第就圖形觀之似覺略短或可接築使長與圖內兜字相齊逼溜自更當得力此亦朕無聊極思之想但不知可如此做否若可照辦現在物料尚敷用否阿桂等務須悉心妥酌就

該處情形切實籌辦覆奏不必因有朕旨稍為遷就朕從不執成見也至稱引河水勢仍係逐漸低下只須將頭二三段略為疏濬即可復舊其新開引溜溝現亦加緊挑挖倍令寬深於接入引河處務帶趨下之勢以期能掣大溜等語如此甚好挑挖既上緊查辦成功自速但未知何日得以開放引河尤切懸望阿桂即速約計先行奏聞至兩壩口門現已收至二十丈如開放引河後即能掣動大溜使其全趨東北暢注無阻則壩工進埽自當較易合龍亦必更妥速而穩固耳又另摺所稱初十日頒發十堡建廟諭旨是日河流稍平風勢漸轉云云不必為此吉祥語並不宜以此存之於心惟當努力速辦及早告成以卹災黎而副朕懷方為正道耳此旨著由六百里加緊傳諭知之仍即迅速覆奏○是日駐蹕秋瀾村行宮○甲戌諭軍機大臣等據文綬覆奏拏獲外省及該省逃兵數目一

摺已於摺內詳晰批示矣前因川省逃兵近來鮮有弋獲恐地方文武各官見大功久藏緝捕稍疎因諭令文綬查明軍營逃兵各省實有若干即行奏聞並令原派兵之各督撫一併查明飭屬上緊嚴拏具奏續據督撫等奏到亦俱隨時批飭矣茲文綬摺內稱查覈各省逃兵湖北九十六名湖南九十七名雲南四十名貴州五十五名陝西一百六十八名甘肅一百五十二名川省之未獲者尚有七百三十名逃兵一項川省獨多至盈千即此可見其政事廢弛矣其餘各省兩湖亦俱滿百陝甘又將倍之惟雲貴通計不及百人然數年來各省弋獲無多皆由地方官平時漫不經心督撫等又不實力整飭所致此等逃兵受國家泰養之恩一旦調赴軍營不思奮勉報効相率潛逃其情罪實為可惡倘此時竟任其偷生不緝將來保無用兵之事亦何以示懲創乎朕非不體好生之心但兵可

百年不用不可一日無備明季綱紀廢弛軍無紀律臨陣委靡紛紛各鳥獸散馴至敗亡足為殷鑒凡為封疆大臣不可不知此意並於獲逃兵正法時令各綠旗兵目覩知戒著再傳諭有逃兵各省督撫查明該省未獲逃兵若干嚴飭所屬實力設法躡緝務獲不得以緝捕虛文塞責致干咎戾○倉場侍郎雅德蔣賜榮奏江蘇辦運洋銅例由張灣雇覓車輛送京計運銅十萬觔應用車五十六輛一時雇覓難齊若改用船運較為迅速請嗣後改車用船所有腳價除抵張灣以前聽該員自行辦理外其自張灣運局仍照運銅事例報銷報聞○旌表守正捐軀陝西白河縣民張士珍女張氏○是日駐蹕半壁店行宮○乙亥諭軍機大臣曰阿桂等何時可以開放引河朕心懸念甚切該處另挑之引溜溝計三百丈施工尚不甚難即加濬之引河口數段亦不甚費事自可尅日蒞工但伊等於

引河挑成後諒必俟西南風順相機開放以期得力昨日此間東北風甚大恐豫省亦復相同於放溜甚有關碍今日已轉西南風惟願豫省風信相同冀逼溜趨注東北庶引河開放勢極暢順可以及早合龍用慰厯注著再傳諭阿桂等將現挑之引溜溝及疏濬引河何日可以告竣定於何日開放連日該處風色如何是否須乘西南風之勢再行放溜詳悉查明迅速據實覆奏以慰懸盼此旨著

由六百里加緊發往仍著加緊覆奏○是日駐蹕黃新莊行宮○丙子旌表守正捐軀直隸南和縣民王磨頭妻祝氏山東萊陽縣民李芬女李氏○是日駐蹕漳拓岫雲寺行宮○丁丑吏部議准陝甘總督勒爾謹疏稱甘肅驛傳道缺向係總理通省驛務分巡蘭州一府今驛站事宜改隸各巡道而蘭州府所屬有倉庫錢糧屯田水利及莊浪甘州西寧三處經銷茶引若併歸別道稽察難周請將

驛傳道缺改為分巡蘭州道蘭州一府驛務仍令該道分管并請嗣後缺出改歸部選從之○原任福建巡撫黃檢疏報羅源晉江同安龍溪海澄詔安尤溪永安建陽浦城霞浦福安壽寧龍巖詔安廳長汀彰化諸羅淡防廳侯官等二十廳州縣乾隆四十三年開墾屯田地三十五頃六十畝有奇○是日駐蹕靜宜園至己卯皆如之○戊寅諭河工重務關係國計民生最為緊要全在河臣平日留心查勘未雨綢繆姚立德自擢任河道總督

以來僅能謹飭自守於修防堵築機宜全未講求為思患豫防之計且其平日辦理軟弱屬員不知警畏上年儀封漫口屢築屢衝推原其故皆由豫省河身寬廣漫灘之水衝有溝槽姚立德未能豫計堵塞以致水漲時串近隄根且河形近年漸已趨逼南岸姚立德並不早為籌畫妥辦因循貽誤所以在在衝決此皆姚立德經理不善所致且堵築儀封

漫口屢有蟄塌日久未能竣事物料狼藉帑項虛糜姚立德為河防專責更難辭咎伊日親情形若此亦何顏復為總河乎姚立德本係草職留任之員即著革任仍留工次効力贖罪所有河東河道總督員缺著索守侗補授刑部尚書員缺著胡季堂補授其刑部侍郎員缺著杜玉林補授○諭軍機大臣等據阿桂等奏十七八兩日連遇大風北壩漸有隙裂至十九日午刻所做新舊軟鑲復衝去八丈其臨水軟鑲工段尚有九丈餘均已裂縫恐亦未能站住等語覽之倍切軫念然亦無可如何據稱十堡形勢南高於北是以就此施工使大溜漸歸北注但溜近於北則北壩實為著重現既屢次衝塌更恐愈進愈難惟由南壩多做逼向北首如挑水壩之式逼溜北入引河尚為得勢現在專由南壩進埽使大溜愈近北岸等語所見甚是祇可如此辦理但伊等前此奏稱黃河之水非一綫單

走乃係全溜奔赴壩根迎溜一面已有搜根之險惟是兩壩勢均力敵尚可望束令直趨等語是南北壩工雖經改做而挑溜情形易地皆然由北壩進埽斜逼既慮大溜專趨南岸則由南壩多做逼向北首獨不慮溜勢專逼北岸乎雖引河引溝俱在北岸然各處隄岸俱不甚堅固亦不可不加意豫防至南岸所進之埽必須倍加寬厚下樁穩實使溜勢不能動搖方為妥善又據稱十九日衝去軟鑲時守備張位陳進明外委趙遇祥及河兵十四名俱隨埽落水分頭撈救始得救起員弁兵丁十名其河兵申克鑲婁孟魁蘇其順劉興隆等四名未經撈獲等語申克鑲等四名因公事捐軀殊堪軫惻著照陣亡例咨部議卹其落水之守備張位陳進明著遇有應陞之缺即行奏補所有外委河兵著加賞賚以示優卹又據稱現挑之引溜溝並收拾之正引河務令加倍寬深以期暢達約計二十

十四五日完工等語。今日正係二十四日。若引溝挑成風勢甚順。自可即行開放。抑或尚俟南壩進埽稍長。方議開放。著阿桂等即速奏聞。以慰廛念。此旨。著由六百里加緊發往。仍著加緊覆奏。○又諭。前因豫省堵築漫口。尚未歲工。安徽亳州蒙城等處。為黃水下游。經年淹浸。補種無由。災民難免無艱食之虞。已有旨諭。閔鶚元詳悉查明。據實覆奏。候朕酌量加恩降旨。本日閔鶚元奏到地方情形。

摺內稱。亳州北鄉。與豫省接壤。武家河等處。瀕河窪地。因春水倏長。倏落。間有未經種麥者。亦屬無多。現在飭令該州督令農民設法疏洩。以期補種。秋禾等語。是亳州所屬未經涸出之地。尚屬無多。其蒙城一縣情形。若何未經奏及。著傳諭薩載。閔鶚元速遵前旨。將亳州蒙城等處。河水下注之處。曾否涸出。現在貧氓有無拮据情形。據實迅速覆奏。又據阿桂等查奏豫省災地。現在實難豫定。統俟

秋徵之前。再將實在情形查明。據實分別具奏。請旨至現在被淹戶口。俟麥收已畢。各工完竣之後。查明實在無力者。照夏災之例。借給兩月口糧。如將來工竣時。涸出之地。尚可趕種。並請借給籽種。以資接濟等語。已如所議矣。亳州蒙城所被不過偏災。現在尚可無庸辦及。設儀封漫口。不能即合其漫下之水。恐不免仍有衝溢之處。或有應仿照豫省辦理者。並著薩載等切實查明。覆奏。將此由六

百里諭令知之。仍即由驛迅速覆奏。尋奏。夏令為水勢正長之際。上游來水。尚未斷流。淹及低窪麥地者。計有亳州蒙城懷遠鳳陽宿州五處。內亳州東北二鄉。被淹較廣。其四處止係河涯窪地。較毫為輕。現飭員履勘。如有與豫省情形相似者。一體查辦。若所傷不過一隅。按照輕重。酌給籽種。報聞。○己卯上御演武廳。閱健銳營操。獎賞有差。○以山西按察使李承鄴為四川布政使。○緩徵廣西

興安靈川永福全州馬平維容來賓象州等  
八州縣乾隆四十三年旱災額賦○庚辰

上迴圓明園○禮部議覆陝甘總督勒爾謹學  
政童鳳三疏稱甘省惟寧夏一府設有商學  
歲科兩試取進文童各八名歲試取進武童  
八名該處商人俱係平涼慶陽寧夏等府屬  
各州縣人承充並無外省正商間有一二山  
西陝西人在彼幫辦鹽務俱係平涼等府商  
人出結收考所有寧夏額設商學請裁歸入  
本州縣應試其現在商籍舉人貢監文武生  
員亦令收歸原籍文生員內原增改為候增  
候廩與本籍生員照考案新舊間補仍照原  
廩食餼年分挨次出貢應如所請從之○辛  
巳

上詣

恩佑寺

恩慕寺行禮○諭原任四川布政使錢鑒上年  
即聞其年老多病第念該縣承辦金川軍需

始終經理頗為出力是以降旨令其解任來  
京候朕酌量加恩茲據鄭大進奏錢鑒由水  
路進京行抵湖北之監利縣地方於舟次病  
故殊為可憫錢鑒著加恩賞給侍郎銜以示  
優卹○諭軍機大臣曰阿桂等覆奏引河壩  
工情形一摺已於摺內批示矣據奏引溜溝  
晝夜加緊挑挖於二十五日即可一律告竣  
此一二日間若得西南大風即先開引河以  
資分洩否則定於二十六日將引河引溝一  
併啟放等語阿桂等所擬啟放引河引溝之  
期即係昨日昨自香山迴蹕圓明園早間尚  
係東北風辰時以後即轉西北竟日未息風  
亦頗大今日仍係西北風西北雖不及西南  
但西北風吹溜東注或尚可逼溜趨入引河  
自較勝於東北而吹溜向東南轉慮其衝逼  
溜壩不勝隱憂不知豫省昨日風信如何開  
放引河時即能掣動大溜否朕懸念甚切惟  
有默禱

天佑神助冀早合龍此外更無可指示而盼望之心益殷於前矣至開放引河後口門如何收窄以待相機堵合之處即著迅速具圖貼說呈閱此旨著由六百里加緊傳諭知之惟計日以待喜音之至仍著迅速覆奏○又諭前據吳虎炳奏桂平縣奸民李萬春李逢春假扮天師糾匪騙錢一案李萬春已挈眷搬往貴縣李逢春亦先期外出現在上緊嚴拏等語李萬春等敢於聚集匪類妄言禍福情實可惡曾諭令該督撫實力嚴拏務獲勿使要犯漏網旋據吳虎炳奏李逢春已經捕獲至李萬春一犯現在根究緝拏該犯曾否弋獲未據續奏今據李質穎奏李萬春仍未就獲迅即嚴密查拏等語李萬春為此案首犯尤不便令其久稽顯戮況該犯未破案之前即挈眷搬移貴縣更非若聞拏逃竄者可比既有住居縣分又帶有家眷同行自更易於蹤跡吳虎炳派委查拏之員曾否前往貴縣

搜查有無下落即或該犯又復聞風免脫亦當設法追拏吳虎炳務當飭屬實力緝捕勿稍疎懈至粵東與粵西接壤即江西與粵省境地亦屬毗連該犯或就近竄匿亦未可定李質穎現署總督粵東西皆其所屬著傳諭該署督速派妥幹員弁上緊躡緝務獲並著傳諭郝碩亦速飭屬一體嚴拏如經就獲即一面奏聞一面審訊確供移咨粵西覈覆明確即將該犯在所獲之處按律問擬辦理不必將要犯解回以致中途疎誤○以內閣侍讀學士索守誠為山西按察使○壬午諭曰綽克托革職問罪之處雖所應得但念伊究係漫無覺察並非自獲罪愆尚可棄瑕錄用著加恩補授吏部侍郎仍著革職留任八年無過方准開復○又諭曰弘昨前經獲謹革退貝子今已一年有餘尚無大罪著加恩補授正紅旗漢軍都統但伊係棄瑕復用之人仍著革職留任四年無過再行開復○諭軍

機大臣等昨據阿桂等奏定於二十六日可以開放引河引溝計今日已經三日京師連日西北風甚大雖亦可吹溜東注較之東北風稍勝然究不如西南風之可以吹逼全溜直注引河不知儀封工次日來風信如何引河引溝於二十六日何時開放能否掣動大溜其水勢是否暢流下注朕晝夜懸念無時或釋著傳諭阿桂等即將二十六日開放引河情形速由驛加緊覆奏以慰廑懷又豫東

兩省今春雨澤渥霑麥秋可望豐稔昨據國泰奏山東通省三月中連得透雨四月初八九以後各屬雨皆優渥麥收約計九分以上而河南省自鄭大進奏報正月普霑膏澤此後惟阿桂等奏摺內間奏得雨情形至陳輝祖到任以來並未專摺具奏近日亦未奏及麥收分數未知豫省三月以後雨水如何麥收分數如何深為軫念著傳諭陳輝祖即行查明據實迅速覆奏此旨著由六百里加緊

發往仍各由驛速奏尋奏四月以來陳留通許滎澤新鄉濟源武陟南陽桐柏新野汝陽確山正陽羅山項城臨潁鄆城固始息縣商城等縣各得雨一次餘俱晴霽二麥現已登場查通省一百八縣麥收八分以上至九分十分者九十八處餘陳留十州縣均七八分不等報聞○癸未諭曰智天約以鄉曲小民竟敢編造年號妄稱大清天定運數指使張九霄於御道旁跪獻狂誕悖逆情罪實為可惡經軍機大臣會同刑部審訊照大逆律定以凌遲亦屬罪所應得但據奏稱該逆犯書內有乾隆五十七年一條敢於詛咒尤堪髮指等語此在臣子之心則然朕并不以為憎憶乙卯九月朕踐阼之初即焚香告

天默禱云昔

皇祖御極六十一年予紹膺寶位不敢仰希

皇祖若邀

昊蒼眷佑至乾隆六十年即當傳位皇子歸政

退閒。彼時朕春秋方二十五歲。初未計及在位六十年。壽當幾何。亦復不以為意。迨過五十歲。乃自計六十年。則當八十五歲矣。始以此志奏聞。

聖母蒙

懿旨云。皇帝受

祖宗付託之重。代

上天愛養億兆。董治百官。六十年後。豈宜遽釋仔肩。即天下臣民亦斷不肯聽皇帝歸政。

慈諭諄切。因更計之。若果至八十五歲蒙

天恩。朕尚能侍奉

慈顏。則禮所謂恒言不稱老。何敢遽云倦勤。彼時亦既叩

天致禱。今既不能復申。朕愛日之誠。則引年之初願。亦豈能期必遂。況今距乾隆乙卯尚十六年。為日正長。若朕精力始終不懈。自當日慎一日。兢兢業業。綜理萬幾。克全朕之初志。設或七旬八旬以後。神志稍衰。不能似今之

精勤求治。亦不肯貪天位以曠天工。朕非不知足者。又必定以六十年為期。致蹈從前人主貪戀大寶之譏乎。若朕必以六十年邀求上帝。不幾如張廷玉之以配享

太廟。向朕邀求乎。朕既知張廷玉之非禮。又安肯效其所為乎。且設果如逆犯智天約所云。乾隆五十七年之言。朕其時壽八十有二。即歸政。亦不為早。況歷代帝王在位五十餘年。而歸政者。實所罕觀。朕尚有何不足。是該犯此條。不得謂之詛咒。不必執此以定爰書也。惟該犯敢於妄編年號三十餘條。且於皇祖廟諱。直書不避。並謊稱

世祖章皇帝。顯聖於彼。希冀惑眾動聽。此則喪心病狂。身蹈大逆。不可不按律懲治。然究與誹謗毀斥者。稍為有間。智天約著從寬改為斬決。至張九霄拜逆犯為師。代其呈獻逆書。亦應按律處斬。姑念其人本屬鄉愚。無知且不識字。情尚可憫。張九霄著從寬改為應斬。

監候秋後處決並將此通諭中外知之○吏部議准湖南巡撫李湖等疏稱直隸郴州一缺向係部選該州壤接廣東為滇黔川楚等省赴粵孔道本境有銅鉛煤錫等礦所轄永興宜章興寧桂陽桂東五縣悉稱難治請照府屬州縣兼三兼四要缺例改由在外題補再寶慶府理徭同知一缺向因苗頑未靖移駐彈壓定為苗疆要缺在外題補近則苗徭無多與內地人民無異請刪去苗疆字樣改歸部選從之○兩江總督薩載奏乾隆四十

五年

聖駕南巡扈從人員乘騎馬匹於江省綠營並駐防八旗馬內各以四千匹分派江南江北伺應八旗馬匹不敷業經借撥豫馬足額綠營馬匹不敷查照上屆借司庫養廉馬價購買三百匹備用借項於次年應領各營報價內扣還報聞○以侍講彭冠堯日講起居注官○是月盛京將軍福康安奏

陵寢重地風水攸關嗣後工程凡係寶城附近

啟運門

隆恩門以內如有拆造動土修理者均於奏摺內聲明交欽天監選擇吉日以昭慎重報聞○兩江總督薩載江南河道總督李奉翰奏查高家灣在洪湖東北內係洪湖外係黃河並不在淮河之下洪湖之上兩面皆水本無田廬自上年黃水斷流河即涸所謂涸河者或即此若此處挖隄則河湖相連一經下注驟難堵閉至歸仁隄又在高家灣之西相去百餘里離湖較遠勢難分洩惟查高家灣迤下吳城磚工迤上三堡地方隄外有灘距黃河二百九十餘丈現擬挖寬二十丈外挑引渠達於河內惟是洪澤湖去路總以清口為咽喉五壩為宣洩倘豫省漫工不能速竣除已將清口東西壩拆寬六十丈外仍應再展二十二丈若湖水再長又不得不於山圩五

壩內。豫開一兩壩。使湖水循序下注。由高寶諸湖。入運歸江。或下游歸江不及。即將車邏昭關等壩。酌開一二處。使之源源歸海。再清口大展。黃河內清水已大。再增以高家灣三堡分洩之水。亦甚可慮。查王營減壩。向遇河水盛漲。開放引洩。由鹽河入北潮河歸海。頗著成效。現擬將該壩一體豫備。於盛漲時減洩。得旨。覽奏俱悉。若萬不獲已。祇可如此。然不可豫存此見。

大清高宗法天隆運至誠先覺體元立極敷文奮武孝慈神聖純皇帝實錄卷之一千八十一

大清高宗法天隆運至誠先覺體元立極敷文奮武孝慈神聖純皇帝實錄卷之一千八十二

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥五月甲申朔兵部議准

大學士管雲貴總督李侍堯疏稱。裁防設汛案內奏准。撥順雲營把總一員。兵一百名。攜眷前往緬寧駐劄。交緬寧守備差操。應請將撥往之員。即定為永昌協右營。分駐緬寧左哨三司。撥往之兵。作為緬寧汛額兵。一切考覈開收。月支俸餉。即於乾隆四十四年正月。起統歸永昌協請領辦理。其每年兵米。就近於緬寧廳倉支領搭放。至永昌協順雲營。均係馬二步八營制。應撥馬兵三十名。步兵七

十六名守兵四名。除親丁公費充賞兵一十二名。實撥馬兵十八名。步兵六十九名。守兵一名。共馬步戰守兵八十八名。所需軍械馬匹。均令順雲營按例撥往。應扣親丁公費充賞兵數。令永昌協於存城兵內。照數撥抵。從之。○緩徵浙江烏程。歸安。長興。德清。仁和等五縣。乾隆四十三年霜災。額賦。○旌表守正被戕河南盧氏縣民陳法妻李氏。○乙酉諭據富椿奏。乍浦副都統勒克。現年六十一歲。疾病纏綿。勢難就痊。請解職任等語。勒克既現在患病。不能痊癒。著加恩令其解任來京。俟病痊之日。另降諭旨。○又諭向來端午節。督撫等並無進貢之例。惟兩江。閩。浙。湖。廣等省。所進土貢。有在端節呈遞者。如茶。扇。香。葛之類。各因物土之宜。原所不禁。其餘無土產省分。並不隨眾同進。乃今歲各省督撫。亦復一例呈獻。殊為非理。現已諭令奏事處。將山東。雲南。貴州等省。所進物件。概行發還。不准

呈覽。並著傳諭各省督撫。嗣後務遵向例。如有歷年端節進獻土物者。仍准照舊呈進。至向來並無土物進貢各省。不得踵事增華。另列端陽貢名目。紛紛進獻。○又諭據慶桂等奏。稱由塔爾巴哈台。解送烏魯本齊馬三百匹。派防禦布占帶領滿洲。並厄魯特兵。俱安速解往。照數交納。請照例將官員議敘。兵丁賞給鹽菜銀兩等語。著照所奏。布占著交部議敘。所有帶往之兵十五名。每人各賞一月鹽菜銀兩。○諭軍機大臣等。據護理湖南巡撫陳用敷奏。武生沈榮英等呈繳沈大綬刊刻碩果錄。介壽辭等書。語多狂悖。現派員馳赴該犯家內。逐細搜查。並委員分往作序之陳湄。江蘇余永觀。各家查搜。提集人犯。督同司道等研審。從重定擬。並飛咨湖北。江西。二省。就近查起書籍板片。銷燬等語。沈大綬身係舉人。曾任江西知縣。緣事降調。膽敢心懷怨謗。肆其狂吠。情罪實為可惡。雖其人已伏

冥誅亦當照徐述夔之例戮屍以伸國法而快人心。著傳諭該撫即速審明定案。照律辦理。又據奏稱此案先准江西省咨查違礙各書單內列有碩果錄係湖南臨湘縣沈蘭谷著。正在委員查辦間。旋據沈榮英繳到伊父沈大綬所著詩集名目相符等語。沈榮英既將伊父詩集板片攜至江西永新縣刷印。業經江西省查出違礙書籍移咨湖南查辦。沈榮英始行呈繳。即不得謂之自首。著該撫即

速嚴訊明確按律定擬不得意存姑息。其作序各犯亦著一併訊明。照律問擬。又據奏沈榮英供稱書板先存永新縣刷印。將板片攜至新建縣交伊母舅莊老滿轉寄城內五臺菴。其江蘇家原存一部借給湖北通城縣人吳華年未還等語。著傳諭鄭大進將沈大綬詩集刷印本及板片一併查明解京銷燬。原摺並著鈔寄閱看。尋奏沈大綬所著碩果錄介壽辭等不法逆書。先據沈榮英首繳各書

時即訊明伊父沈大綬曾分送沔陽州李堂沈乾原劉應鶴侯正祿及崇陽縣榮天桂余學魯又原存江蘇家各一部借給通城吳壽平即吳華年各等情。茲已按名勘查各家或呈繳或已經燒燬委無藏匿並將刷本板片解京銷燬報聞。○又諭連日盼望開引河之信甚切。今據阿桂等奏二十六日子時先將引溜溝啟放初入即奔騰下達所有大河內北股之溜約已歸入三分其東趨七分之溜

亦有側注漸近之勢。午間已轉西南風尚不甚大。而壩頭已落水五寸等語。覽之稍慰。至所稱正引河頭逼近壩頭蓄水不過三尺有餘。恐開放時進水無多。反虞淤淺。俟正引河頭積水漸高。再得西南風即行拆壩啟放。庶兩處匯成一流。吸川下注。更為有益等語。開放引河自不得不相機慎重。未知近日引河頭積水增至若干尺。昨日此間已轉西南風。未知儀封工次連日西南風曾否稍大約計

何日可以開放引河朕心晝夜懸切著阿桂等即將何日開放引河及能否掣動全溜情形迅速覆奏又據稱現在口門二十一丈除酌留四丈合龍外尚有十七丈須下埽十二個以每日下一埽計之為期須至月餘恐不能於大汛未至之前趕竣等語此事甚有關係壩工所下之埽自當令其著底堅實若太速恐致草率貽誤但太遲又不能於大汛前趕完未免前功盡棄實為可惜據稱近隄兩

邊壩根數十丈俱已露有泥灘此是極好機會若開放引河後掣動大溜則口門汕刷之勢必減兩壩自更易於施工或必兩邊一同進埽或就一邊獨進惟在阿桂等酌量實在情形妥協辦理務於汛前趕辦全完方為妥善此旨著由六百里加緊發往仍著加緊覆奏○豁除江蘇江都縣被水衝沒廢田六頃二十畝有奇額賦○丙戌

孝誠仁皇后忌辰遣官祭

景陵○諭軍機大臣曰鄭大進奏據羅田縣知縣陳士鳳訪聞匡家河地方粘貼逆示查係范勝志挾嫌捏陷等因一摺已於摺內批示矣范勝志因受匡姓輕慢並欲控其行竊難魚輒挾嫌捏造逆示兩次粘貼希圖傾陷洩忿且敢妄為悖逆不法之詞實為罪大惡極難以輕宥該犯現既拏獲到案供認不諱著傳諭鄭大進即速嚴訊明確從重定擬具奏以示懲儆並嚴究此外有無同謀夥伴之人

一併問擬勿稍輕縱至摺內所稱匡姓焉知不於二月見人揭示始驚心斂跡恐不無別情等語轉可不必過慮范勝志挾嫌誣陷既經究出實情即與匡姓無涉若過於生疑傳訊不免令無辜株累適足以遂陷害者之心辦事不宜如此也將此由四百里傳諭知之仍即訊明定案具奏○調鑲紅旗蒙古副都統永慶為浙江乍浦副都統○丁亥諭此次巡幸木蘭駐蹕熱河著誠親王理郡王大學

士阿桂協辦大學士尚書英廉留京辦事。阿桂英廉現在出差。著尚書公額駙福隆安暫行留京。俟阿桂英廉二人內先有一人到京。福隆安即前赴熱河行在其月選文武員弁。八月以前俱著吏兵兩部堂官前至熱河帶領引見。進哨後所有月選之文員內通判州縣等官武員內八旗護軍校驍騎校及外省送到之補放水手官驍騎校並年滿千總等官俱著王大臣照例驗放。至駐蹕熱河時外

省督撫提鎮等奏摺俱著齋摺人前赴行在投遞。進哨後著兵部派員駐劄哨門投遞。各省奏摺封送行在候朕批示發回。仍於哨門交付齋摺人祇領。該部通行傳諭知之。○又諭福隆安現在暫行留京。所有步軍統領事務原係兼管。俟英廉到京福隆安前赴熱河時將該衙門印務交英廉署理。○諭軍機大臣等壽春鎮總兵閔正祥奏據鳳陽守備紀俊龍稟稱西月十六日風聞安慶有粘貼匿

名揭帖。指稱鳳邑武舉王振綱弟兄善習邪術。謀為不軌情事。隨會同該縣知縣帶同兵役前赴王振綱家詳細搜檢。止有考試大刀弓箭其餘均係農具及四書詩經時文各數本。此外並無不法書符兵器。隨將王振綱等押帶赴縣。旋據鳳陽府司獄陳廷機稟知奉臬司劄行鳳陽府拏獲匿名揭帖之王柏即王同春在該犯身邊搜出貼刺之帖與揭帖相符。訊係懷忿誣陷並密拏商謀代寫之湯

霖湯雲解審等語。此等案情發覺即應一面具奏一面迅速查辦。今挾嫌誣陷之犯既經拏獲訊有確據尤應上緊審訊嚴懲且其事係四月中旬距今已二十日閔鶚元何以尚未奏聞殊屬遲緩。著傳諭閔鶚元即將因何不即入告緣由明白回奏。仍將此案即速嚴審明確按律定擬具奏。此旨著由五百里發往諭令知之。閔正祥摺並鈔寄閱看尋奏遵查鳳陽縣民人粘貼匿名揭帖控告武舉王

振綱等謀為悖逆一案。於四月十二日。在臣  
轅門口粘貼。經縣揭獲。呈送一面。在省城嚴  
查。一面飭員速往王振綱家搜查逆跡。原擬  
俟查覆到日。即行具奏。嗣因於十四日。即將  
貼揭之王柏拏獲。訊明係挾嫌誣指。是以未  
即入告。當提寫帖之人。並應審人證。押解來  
省。於二十七日解到。審訊明確。按律定擬。於  
五月初一日。由驛馳奏報聞。○以編修韋謙  
恒。為雲南鄉試正考官。御史孟生蕙。為副考  
官。御史黃騰達。為貴州鄉試正考官。編修周  
永年。為副考官。調鑲藍旗蒙古副都統綽  
克托。為鑲紅旗蒙古副都統。○豁除江蘇常  
熟。婁縣嘉定。三縣。坍沒廢田七十九畝。有奇  
額賦。添建甘肅肅州倉廩八十間。從總督  
勒爾謹請也。○戊子。

上還宮。○諭曰。圖思義著授為領隊大臣。前往  
吐魯番辦事。吐魯番既已補放領隊大臣。闕  
展即無庸另駐人員。伯忠在彼年久。俟圖思

義到時。伯忠即著回京。是日起

上以夏至祭

地於

方澤。齋戒三日。己丑。諭朕啟鑒後。戶部尚書

現在乏人。英廉未回京之前。著福隆安兼管

俟英廉到京後。交代起程。又諭曰。軍機大

臣會同戶部議駁。蘇凌阿覆奏。添平不敷一

摺。已依議行矣。蘇凌阿之意。不過欲向部中

索取明文。以為憑據。無此情理。且上年五月

蘇凌阿接任時。如果查明全德有徵多報少

情弊。即應切實叅奏。乃彼時並無指實。及秋

間。於伊奏摺內。硃批詢問該監督。嗣後作何

辦理。令將能否不照全德接辦之處。據實奏

覆。旋據奏稱。一切仍照全德辦理。是蘇凌阿

業已自認。不能不照全德章程。今辦已經年

又復嘵嘵置辯。意欲何為。至所執全德交代

積併平餘簿。係任意捏造之處。現交薩載查

覈。自能得實。而蘇凌阿之偏執飾非。且意存

取巧殊屬不合。著傳旨嚴行申飭。○諭軍機大臣等。據阿桂等奏。二十六日開引溜溝。以後勢甚暢順。水頭已底。江南之碭山境。初二日始轉東南風。溝外水勢入口愈急。所有大河內。南首七分之溜。漸向北趨。逼近引溝之頭。日內如得大西南風。則風水俱順。必能將大溜掣動。即可拆壩。啟放引河。以洩近口一帶之水等語。已於摺內批示。初三。初四兩日。此間西南風頗大。未知工次如何。阿桂等此摺。於初三日拜發。何以未經提及。或初三日已轉西南風。此摺於初二日繕就。初三日早填寫拜發。遂未及敘入。亦未可定。朕心晝夜懸切。著阿桂等即將連日風勢如何。及能否掣動全溜情形。迅速覆奏。又據奏稱。口門現存十七丈有餘。除酌留四丈合龍外。尚有十三丈。須下埽九箇。如果諸事順序。則兩邊對下埽箇。月望以後。可以相機堵合等語。佇待佳音之至。將此由六百里加緊發往傳諭知

之。仍著加緊覆奏。○庚寅諭軍機大臣等。步軍統領衙門奏。鳳陽縣民人張萬青呈控。戶書韓載揚等侵蝕賑濟銀兩一事。請將張萬青解赴兩江交總督薩載提集人證。秉公嚴審一摺。已如所奏行矣。據稱戶書韓載揚等辦理災賑。於造報冊內。多加人口。及領銀散賑。又減戶撥給。從中侵蝕銀一萬餘兩等語。各省遇有災歉處所。國家不惜數十百萬帑金。加恩賑濟。原期百姓均霑實惠。俾無失所。各該地方官。自應實力查辦。勿使胥役弊混。中飽。方足副軫念災黎至意。今張萬青所控戶書侵蝕賑帑。至萬餘兩之多。殊堪駭異。果爾。該地方官。豈遂毫無見聞。竟任其狼籍若此。或係該縣縱容胥役舞弊。事後分肥。或串通奸蠹。藉端侵蝕。均未可定。不可不徹底根究。嚴示懲儆。著傳諭薩載。即親往該處提集人證冊案。挨戶覈對。一面嚴密訪查。如所控屬實。即速嚴審確情。將不法官吏。從重定

擬具奏。並將該管上司一併查叅。薩載不可因避失察之愆。稍存迴護。該督平日尚屬謹慎公正。諒不至袒徇干咎也。若張萬青所控毫無憑據。或別有挾嫌捏控情事。亦即訊明照例辦理。軍機大臣等議准。黑龍江將軍傳玉等奏。請將撥派發遣人犯及放出旗奴另行設立官屯。令其交納糧石一摺。內稱黑龍江地方。屢經奉諭禁止流民棲止。除往來貿易者。並無攜帶家口居住之人。惟節年奉部發遣人犯及放出旗奴所帶子女。漸俱長成。相聯姻戚。在各城居住。已有數百名之多。查邊陲之地。積貯糧穀。最為緊要。應於齊齊哈爾地方。增添官屯數處。領催一名。其餘丁口俱載入各城官屯冊內。以備挑補。至所需農器。無庸官為撥給。所用牛具。俱於各城庫貯糧價內撥給。初種之年。免其交納。次年交一半。第三年全交。從之。○辛卯夏至祭地於

方澤

上親詣行禮。辛圓明園。壬辰

上御勤政殿聽政。諭曰。全德在蘇州織造之任。已經數月。彼處事務。想已熟悉。有伊一人足敷辦理。舒文著來京。現在金輝病故。舒文著加恩賞給郎中銜。同福隆安英廉管理造辦處事務。至銅瓦一事。亦著交舒文辦理。行令舒文速即來京。舒文未到之前。管理銅瓦事務。著金簡暫行署理。舒文係特恩超擢。如果八年無過。朕必另行施恩。倘不能感激朕恩。委靡不振。朕必將伊加倍從重治罪。諭軍機大臣等。兵部議駁雲南普洱鎮總兵張和條奏馬步兵計數輪補等因一摺。所駁甚是。已依議矣。張和在總兵內。似尚明白。將來或可冀出息。今所奏滇省各營馬步極少。守糧最多之處。情形既未確實。而欲將本營之缺與別營輪拔分作定額。亦屬牽混偏枯。恐張和平日於營伍未能整頓。并欲借此為邀

譽沽名之計。亦未可定。著傳諭李侍堯將張和在任於所屬營伍能否實心整飭。加意訓練之處。即行查明。據實具奏。並將來可勝提督與否。據實具奏。毋稍徇飾。兵部摺並鈔寄閱看。廣西巡撫吳虎炳奏馬平象州俱無分貯備東穀石。該二處上年收成稍歉。自應豫籌撥運。查馬平象州與桂平武宣平南三縣相近。且係一水可通。請將武宣備東穀三千五百石。桂平備東穀四千五百石。撥給馬平。再將平南備東穀五千五百石。撥給象州。就近委員協同兵役領運需用腳價。先於司庫平糶盈餘項下動支報聞。以江西布政使白瀛為刑部侍郎。以光祿寺卿錢士雲為詹事。命御史戈岱提督廣西學政。癸巳諭戶部議覆富勒渾等奏銷川省軍需項下分別民欠商欠專賠分賠各款一摺。本欲依議行。及閱軍機大臣所查各款清單。其中如民欠一款。係民間津貼雇夫及站夫口糧。

先借官項動用。事後自應按限分追。但念辦理金川軍務。買糧運餉。悉發官帑。絲毫不以累民。而川省百姓輓輸負送。踴躍赴公。業經各出其力。今於大功告成之後。復令償還前借帑項。朕心實所不忍。且為數甚多。每年均須按地勻派。則是正供之外。又加賦斂。亦甚非政體。所有該省民欠津貼及採買站夫口糧共銀一百九十六萬八千四百餘兩。均著加恩豁免。再商欠一項。未完米價腳價銀九十八萬六千九百餘兩。雖各有虧缺實情。並非侵蝕。但既虧原數。即應賠還。據稱應將各商有家產者。查封變抵。自應如此辦理。其實在家產盡絕。無可著追者。並著加恩一體豁免。又報銷項下與例案不符各款。請分別專賠分賠。於通省文職內按年在養廉內扣半賠償。並於富勒渾等及陞調別省知縣以上各官養廉扣半賠補等語。但念此項扣半養廉。其經手承辦之員。固無可辭咎。若原辦各

員既陸續離任。至接任各員並未經手。亦將養廉扣半。於情理未為平允。而扣至五十餘年。亦不成事。且養廉扣半。所餘無幾。衆必視川省為畏途。並恐不肖之員。因養廉不敷。藉詞貪黷。於該省吏治尤大有關係。因思朕於平定金川之事。費帑六十餘萬。兩期使番民永除後患。何必以此難於報銷之案。累及各員。所有專賠分賠銀二百八十三萬二千餘兩。糧米十五萬三千六百餘石。及代賠無著一半商欠。應扣通省一半養廉。并富勒渾等與陞調別省各員。應扣一半養廉。俱著加恩一併豁免。嗣後該省各員。均宜奉公守法。潔已愛民。毋負朕格外施恩至意。將此通諭知之。○兵部議准。陝甘總督勒爾謹疏稱。操演烏鎗。每兵打靶三十鎗。中二十鎗以上者。一等。弁兵分別記功獎賞。中十五鎗以上者。二等。中十鎗以上者。三等。不記功過。不及十鎗者。官弁議處。兵丁嚴責。勒限一月練習。限滿

仍不改觀。責革該管官。不時加訓練。照廢弛營伍例革職。從之。○以安徽按察使秦雄飛為江西布政使。○甲午。諭曰。貝子扎拉豐阿在御前行走多年。甚屬奮勉出力。伊父僧衮扎布。原係貝勒。著加恩封為貝勒。○諭軍機大臣等。連日盼望開放引河。及壩工合龍之信甚切。茲據阿桂等奏。四月初七日。西北風竟日不止。河水驟長三尺有餘。溜勢洶湧。將北壩頭。及上下邊埽。衝塌十五丈。正引河頭之土埝。亦被衝開。仍未能掣動口門之溜等語。覽之深為煩悶。此次儀封之工。屢隳於垂成。實亦無可如何之事。據稱新開引河之西王家莊地方。有大兜灣一處。大河溜勢。於上游南岸埽灣而來。頂至此處。若於此開挖引河一道。歸入正河。所謂順水之性。因勢利導。現已勘估開大引河一道。長九百餘丈。接入原開正引河之第五段。較現在引河引溝。更加寬深一俟盛漲。即行啟放等語。并據繪圖

呈覽已於圖摺內批示。看來此處形勢甚順。若早於此開挖引河。即可掣動大溜。惜未能早計及此也。此時自當以此為正務。阿桂等應即董率承辦各員。上緊挑挖。迅速辦成。以便相機啟放。至所稱北壩不敢冒險。再做南壩一百二十餘丈。尚為平穩等語。朕意若於南壩向北接續進埽。或可直接北壩。以期合龍。即不然。亦可逼溜趨注引河。為得尺則尺之計。此亦無聊之極思。代伊等籌及未識。可如此辦否。著阿桂等悉心籌度。酌量辦理。可辦與否。迅速覆奏。不必因朕此旨。稍為遷就。又據奏。新開引河一事。尚可於大汛至時。驗其得失。阿桂俟六月中。開放王家莊引河後。再行回京等語。朕明日即啟程往熱河。留京辦事。已派英廉。伊現署直隸總督。令福隆安暫行留京。俟英廉回京。再赴行在。計此月下旬。英廉已可回京。阿桂即欲於六月內還京。亦無可辦之事。至於皇孫綿億指婚一節。俱

有成規。伊諸子在京。即可辦理。亦無須阿桂親為照料。且索守侗新任總河。雖其為人結實。而於河工諸務。究尚未諳。設遇有應行籌酌之處。其識見亦不及阿桂之周到。阿桂竟當在彼始終其事。俟合龍後。將兩岸隄工。所有應行培繕。以禦大汛之處。阿桂當與索守侗。帶同姚立德。親往履勘。如有即應速辦者。上緊趕修。其可緩辦之工。仍留交索守侗辦理。至漫水下游各河。至安徽之渦河一帶。應

行疏濬之處。並當會同各該撫詳悉勘明。妥協辦理。此旨著由六百里加緊發往。仍著迅速覆奏。○又諭。前據吳虎炳奏。桂平縣奸民李萬春等。假扮天師。糾匪騙錢一案。因李萬春挈眷逃往貴縣。節經傳諭李質穎。吳虎炳等。飭屬嚴拏。復恐其逃竄隣省。並諭江西巡撫一體查緝。今日據李質穎奏。拏獲該犯之父子弟妻。供出前往龍山墟賣藥。或往土田州。及歸順州地方。現在飛飭嚴緝等語。李萬

春敢於聚集匪類。妄言禍福。實為此案首犯。情罪甚為可惡。斷不可容其漏網。該省何以至今尚未弋獲。著諭詢吳虎炳。即行據實具奏。並傳諭李質穎。吳虎炳。仍嚴飭各屬。上緊設法。實力緝捕。務獲。嚴審定擬具奏。至該犯形蹤詭秘。既經聞風逃匿。或恐潛竄越界。雲貴。湖南等省。均與粵西接壤毗連。該犯冀延殘喘。竄入隣省。亦未可定。著傳諭李侍堯。舒常。李湖。速即派委妥幹員。升一體設法。購線躡緝。不得視為海捕具文。致首惡奸渠。遠颺免脫。稍稽顯戮。將此由五百里傳諭知之。軍機大臣等議准。成都將軍特成額等疏稱。新疆美諾以外。自澤爾腳至勒烏圍。十一塘半。每塘原設馬四匹。維時因初安營汛。阿爾古專設總兵一員。查辦促浸屯務。文報往來。均關緊要。是以安馬馳送。今阿爾古總兵裁撤。促浸屯務。統歸美諾總兵辦理。阿爾古止駐副將一員。文報較少。且功噶爾拉一帶。雪

山陡滑。馬匹難馳。請將澤爾腳等十一塘半額馬裁撤。每塘改設塘兵二名。遞送文報。即於美諾。阿爾古。二處汛兵內酌撥。所裁塘馬及革乾等項。均歸節省。從之。吏部議准。廣西巡撫吳虎炳等疏稱。崇善縣馱廬地方。距縣城一百三十餘里。稽查難周。查有結安土州吏目。與都結土州相連。一切事宜。儘可歸併。都結土州管理。將結安土州吏目裁汰。改為崇善縣馱廬巡檢。除命盜重案報縣外。遇奸匪賭博等事。責成查辦。從之。以故喀喇沁扎薩克貝子瑚圖靈阿子濟克濟特扎布。襲封鎮國公。以雲南迤西道徐嗣曾為安徽按察使。乙未。上以秋獮木蘭。自圓明園啟鑒。諭朕此次巡幸木蘭。所有經過沿途各州縣。著加恩蠲免本年地丁錢糧十分之三。該部即遵諭行。旌表守正被戕奉天復州民李安妻林氏。是日駐蹕南石槽行宮。丙申。遣官祭

開帝廟。諭前經降旨派誠親王、理郡王、大學士公阿桂協辦大學士尚書英廉留京辦事。並因阿桂、英廉現俱出差。令尚書公額駙福隆安暫行留京。俟英廉回京即前赴熱河行在。計此月下旬英廉已可回京。而阿桂在豫省堵築漫工。一時尚未得竣事。所有留京辦事大臣現在止有一人。著派尚書德福協同福隆安辦事。如英廉已回京仍協同英廉辦事。俟阿桂回京後德福即無庸同辦。○又

諭據廣西按察使哈靖阿奏巡撫吳虎炳於四月二十八日病故等語。廣西巡撫員缺著李世傑補授。其湖北布政使員缺著梁敦書補授。○又諭曰伊勒圖奏稱接奉諭旨准令土爾扈特奇哩布戴三眼花翎用黃韁阿克薩哈勒戴雙眼花翎俱傳旨賞給等語。土爾扈特奇哩布阿克薩哈勒私用服飾本不合體制。今經朕降旨自可戴用。仍著伊勒圖曉諭各部落爾等雖已承襲王爵授為盟長但

花翎黃韁不經特賞不准私用。即爾父兄本係應有。若無恩旨亦不准濫襲。今奇哩布因襲王爵戴三眼花翎用黃韁阿克薩哈勒因授盟長亦戴雙眼花翎均屬非是。因具奏時大皇帝念爾等係新附之人不曉內地定例破格矜卹原係特恩不可為例嗣後爾等須恪遵法制不得僭用。如果凡事用心著有勞績應行賞給者自當奏聞請旨加恩。○諭軍機大臣等廣西撫臣既已病故藩司朱椿甫

經陞見起程尚未回任通省大員止有臬司一人著傳諭李世傑即速前赴新任不必赴行在謝恩請訓。○是日駐蹕密雲縣行宮。○丁酉調四川按察使汪新為廣東按察使以四川松茂道查禮為四川按察使。○是日駐蹕要亭行宮。○戊戌諭曰熱河道明山保在任年久辦事亦屬認真著加恩賞給按察使銜並賞戴花翎以示獎勵。○是日駐蹕兩間房行宮。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十二

實錄卷一千八十二

奏

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥五月己亥諭軍機大臣

實錄卷一千八十三

等據博清額等奏為俄羅斯懇求復開貿易  
應發給回文一道所撰尚是無庸修飾著博  
清額等即遣人發與固畢爾納托爾再理藩  
院應與俄羅斯薩納特衙門文書現交該衙  
門繕寫三體字樣尚需時日此事不甚緊要  
著傳諭博清額等俟寫成發去時再行轉交  
是日駐蹕常山峪行宮○庚子以刑部員  
外郎顧葵為四川鄉試正考官編修徐如澍  
為副考官兵部郎中史夢琦為廣東鄉試正

考官。編修汪鏞。為副考官。檢討蕭九成。為廣西鄉試正考官。兵部主事王寬。為副考官。侍講學士朱珪。為福建鄉試正考官。戶部員外郎程世淳。為副考官。編修徐立綱。為湖南鄉試正考官。禮部郎中馬人龍。為副考官。旌表守正被戕浙江天台縣民王胡妹妻陳氏。○是日。駐蹕喀喇河屯行宮。○辛丑。上詣熱河新建

文廟行禮。○諭昨召見書麟。問及西安滿兵如何。伊奏稱駐防滿兵。不如京城滿兵。緣京城該管大臣。除教管當差。演習技藝外。念其同係滿洲。視為一體。毫無輕賤之處。自能振作其氣。駐防滿兵。在外已百有餘年。未免沾染漢人習氣。其歷任將軍等管束過嚴。稍有錯誤。即從重辦理。遇關毆等事。革退錢糧。是以人皆畏懼。漸形軟弱等語。書麟此奏亦是。駐防滿兵。漸染漢人習氣。必須平日教練得法。遇有戰陣之事。庶可望其奮勉。倘管束過

嚴。甚至小有過失。即行重懲。在伊等恐失生計。心存畏懼。自然志氣萎靡。流於軟弱。所關甚大。遇便通行傳諭。有駐防滿兵之各省將軍等。嗣後各該管滿洲兵丁內。果有當差懶惰。肆行遊蕩者。不可稍為瞻徇。如無大過。則當教者教之。當卹者卹之。總欲作養其氣。俾遵守滿洲舊規。斷不可無故折辱。○山西巡撫覺羅巴延三奏。綏遠城駐防官兵馬匹。歲需料豆。係採買供支。今年市價。較上屆昂貴。請於大同懷仁陽高等縣存貯未糶豆石內。撥運綏遠城倉備用。仍俟價平時採買。得旨嘉獎。○是日。駐蹕避暑山莊。至八月丁卯。皆如之。○壬寅。諭據阿桂等奏。下北河同知張符升。南河叅將李永吉。於奉委估計需用稽料數目。輒稟稱應用稽料九千萬觔。若非通同弊混。妄冀分肥。即係張大其詞。藉端阻撓。請旨將張符升革職枷號。李永吉革職留工効力等語。張符升李永吉承辦壩工。不能

穩固堅實。屢至蟄塌債事。不將伊等治罪。已屬格外加恩。該員等尚不思實心奮勉。稍贖前愆。輒因奉委勘料。通同混報。借此弊混阻撓。實屬昧盡天良。斷難輕宥。阿桂等所參甚當。張符升著革職。即於工所枷號示衆。李永吉著革職。仍留工次効力贖罪。又諭刑部奏審擬已故總兵常祿保之妻關氏呈控夫姊何氏捏報年歲。冒領建坊銀兩一摺。所辦全未用心。閱何氏供。係十三歲上選秀女。關氏則稱其選秀女時年已十七。此事易於查對。向例八旗秀女。十四歲以上始行看選。內務府女子。方係十三歲挑選。朕令軍機大臣詢之英廉。亦稱向來俱係如此辦理。此在刑部漢堂官。原不能諳悉。若滿堂官及旗下大臣。宜無不知者。此案自應查明何氏。或係包衣下女子。則十三歲之言不誤。若係八旗。則十三歲不應與選。關氏所控未得為虛。且據何氏稱。乾隆六年甫係十三。尚非八旗應挑

之歲。若至下屆則年已十六。即不合守節之例矣。今刑部概置此等情節於不問。率據何氏狡供。坐原告關氏以誣告。未為平允。原摺著發交刑部堂官。另行查明。據實定擬具奏。福隆安亦著同問。將此諭令知之。○癸卯。以署兵部侍郎書麟為正藍旗蒙古副都統。○甲辰。諭據增福奏。現患頭暈氣喘。上緊醫治。難以驟痊。懇恩即予開缺等語。該撫所患尚非篤疾。祇須寬心調養。即可復元。至福建巡撫印務。現有三寶在彼兼署。其任內亦無急切需人專辦事件。增福且不必開缺。仍著安心調攝。以冀速痊。或因南中水土不宜。即緩程進京。到京之日。著留京辦事王大臣。派太醫院堂官陳世官前往診視。俟病體痊愈。即來行在陛見。再赴新任。○緩徵湖南湘陰。巴陵。臨湘。華容。平江。武陵。桃源。龍陽。澧州。安鄉。安福。長沙。善化。瀏陽。岳州等十五州縣。衛乾隆四十三年旱災額賦。旌表逼嫁捐軀直

隸鹽山縣民劉美妻楊氏。○乙巳諭前經降旨將川省軍需項下民欠商欠專賠分賠各款銀米加恩全行豁免。因思原任大學士溫福名下應賠木果木一案銀數甚多。經伊子陸續措繳。尚未及半。雖屬應行追賠之項。但現在川省官民欠項均已加恩寬免。未便獨令向隅。且溫福究係陣亡。情亦可憫。所有溫福名下應賠未完銀兩。并著加恩全行豁免。○諭軍機大臣等。據李質穎奏廣西巡撫吳

虎炳病故。臬司哈靖阿竟自行護理巡撫印務。將藩司印信派委驛鹽道周廷俊署理。所辦殊屬冒昧。現今廣東藩司姚成烈前往廣西護理撫臣印篆等語。已於摺內批示矣。粵西撫臣既已病故。藩司朱椿進京陛見。尚未回任。通省大員止有臬司一人。哈靖阿即至撫署暫行護理撫篆。一面由驛馳奏請旨。所辦尚屬稍知事體。若如李質穎所言。哈靖阿止應將撫臣印篆暫行看守。即須將印信封

存。設遇有巡撫應辦事件。豈轉置之不辦乎。李質穎不過因哈靖阿未經候伊酌辦。竟自行護理。派委驛鹽道周廷俊署理。藩司稍涉專擅。遂爾心存憎嫉。故有此奏。所見殊小。轉屬不曉事矣。該撫奏請姚成烈赴廣西護理撫篆。既已令其前往。亦無不可。至廣西巡撫員缺。已有旨將李世傑補授。並諭令速赴新任。俟李世傑到後。姚成烈仍回粵東本任可也。將此由四百里傳諭李質穎知之。○丙午

諭。昨據增福奏患病未痊。懇請開缺。朕以該撫所患尚非篤疾。因降旨暫且不必開缺。諭令安心調養。以冀速痊。近聞增福病勢甚重。恐一時難以就愈。巡撫員缺未便久懸。增福著即行開缺。並令緩程進京。安心調攝。俟伊病體全愈。朕仍可加恩視其精力。若何外。而巡撫內而侍郎酌量錄用。其福建巡撫員缺著富綱補授。所遺陝西布政使員缺著尚安補授。○諭軍機大臣等。前據三寶奏稱。俟新

任巡撫到任後。前往浙江。查勘海塘地方情形。並將一切應修橋座工程。次第妥辦。即兼程馳赴闕廷。陛見一摺。彼時以該督補授大學士後。尚未來京。是以允其所請。茲因增福患病甚劇。一時難以驟痊。已降旨將富綱補授福建巡撫。富綱初任巡撫。一切尚未諳練。海疆重地。未便令其即署督篆。若令王亶望兼署總督。而在浙亦難於遙制。三寶竟無庸進京陛見。至浙省應行查辦事件。固應前往。但現在諸事。俱已辦有端緒。即有應行商辦之處。浙省情形。乃三寶所素悉。王亶望原可往返扎商。三寶到浙後。即須候至明春迎鑾。不能又回閩省。此時並不必急於到浙。且俟富綱到任。辦理數月。於地方情形稍熟。三寶再行赴浙。即至秋冬之間。亦未為晚。至伊欲來京到大學士任。竟俟南巡回鑾後。三寶將閩省應辦之事。稍為經理。再為陳請。朕當允行也。此旨著由四百里發往。并諭王亶望知

之。○又諭福建將軍管理閩海關事務。其所屬各口岸。向係將軍派人稽查。分管嗣經布政使錢琦條奏。於駐防官兵內。由將軍派員經營。部議准行。茲據楊景素奏稱。此等人員。於關稅事宜。向未諳習。派令管理。未能妥協。且每年徒糜工費數千金。似覺無益等語。所奏亦是。各處關務。俱係管關大員。自行派人分管。即或所派之人未妥。致正課盈餘兩項。或有缺少。例應該管大員賠補。責成甚專。該將軍必不肯率意派委。自行貽誤。原不必改委官兵。若因駐防生計起見。則每歲多費數千金。亦未能偏及。仍屬有名無實。著傳諭三寶會同永德。悉心確查。如應概由該將軍派人分管。自可仍循其舊。設或應派之人不敷。即於該將軍所熟悉之官兵內。酌量添派。亦無不可。俟妥議覆奏到日。再行降旨。○諭軍機大臣等。據哈靖阿奏。桂平縣糾匪騙錢案內。首犯李萬春。聞拏逃竄。經前撫臣委署臬

司王懿德等嚴密查拏等因一摺。此奏大非已於摺內批示矣。前因該省撫臣吳虎炳病故。藩司朱椿進京。陛見尚未回任。通省大員止有臬司一人。哈靖阿奏聞。暫行護理撫篆。尚屬稍知事體。昨李質穎奏其自行護理撫篆。殊屬冒昧。朕以李質穎因哈靖阿未經候伊酌辦。心存憎嫉。所見轉小。即傳諭飭知。至所請派令廣東藩司姚成烈赴粵西護理撫篆。既已前往。亦無不可。今哈靖阿既究出李萬春下落。並不上緊查拏。轉聽署臬司王懿德等前往偵緝。是哈靖阿竟儼然以巡撫自居。並忘此事為伊臬司任內專責。實大不是。且果拏獲李萬春。自當由驛奏聞。今首犯並未就獲。又何必率為此奏。由五百里馳遞。不過暫獲撫篆。遽爾高興。且亦太不曉事矣。哈靖阿著傳諭申飭。仍著上緊將李萬春嚴緝務獲。毋致要犯遠颺。稍稽顯戮。又諭昨俄羅斯薩納特衙門將舊設固畢爾納托爾瑪

玉爾俱皆撤回。另行更換嗣因恭順額懇准照舊開通交易。該衙門撰擬回文發與博清額。博清額接到此文。即遣人送往。因念從前停止恰克圖貿易時。並停止黑龍江交易。今既准恰克圖貿易。黑龍江亦應一體開通。著行知傳玉遵辦。並傳諭博清額等將俄羅斯薩納特衙門接到咨文如何咨覆。并何時開通貿易。著即奏聞。刑部議駁四川總督文綬咨稱。奉到乾隆四十二年九月初七日諭旨。金及傷斃徒手。秋審概入情實例一條。即於是年十一月初四日。飭屬出示曉諭。至四十年正月三十日止。計八十餘日。各州縣窮鄉僻壤。自必悉知。本年秋審。請即以四十年正月三十日為限。如有金及傷斃徒手之人。事犯在此日前者。仍照例辦理。若事犯在此日後者。入情實等語。查前奉諭旨。以窮鄉僻壤。遽難家喻戶曉。著再予以五年之限。令各該督撫實力勸導。以化其桀驁不馴之

習。是於懲兇除暴之中。寓敷教慎刑之意。該督撫等。自當欽遵諭旨。於五年內漸摩化導。俾殘暴之徒。翻然改悔。以副刑期無刑至意。今據咨稱。出示曉諭八十餘日。已能周知。是以勝殘去殺之風。視為旦夕可期之事。理所必無。况鬪毆及殺之案。情節輕重各殊。惟在外省督撫悉心酌擬。分別辦理。臣部覆加詳覈。從無辦理情實。豫請部示之理。應令該督撫。於秋審各案。妥擬具題。到日覈辦。仍嚴飭各屬。切實化導。俾鄉愚咸知向化。得旨。部駁。甚是。秋審時仍照上年夾簽辦理。丁未。

上詣

文廟行釋奠禮。

御製熱河

文廟碑記。文曰。丙申夏。駐蹕熱河避暑山莊。曹秀先以禮部尚書扈從。幾暇召見。談及時政。秀先云。臣春卿也。在職言職。以為此處宜興學校。以造就士。朕曰。俞哉。亦其時矣。於是

乎有設學之旨。於是乎有加額之恩。學校既設。則

文廟亟宜建。乃命相地伐材。卜吉鳩工。宮牆泮水。殿廡禮樂。一如制。越二年。己亥夏。朕以來巡。親釋奠而落成之。夫熱河。固自古關塞以外。荒畧之區也。雖金遼有興。州之稱。然旋舉旋廢。建置沿革。率不可考。而況有臯比之傳。絃誦之聲哉。是以我

皇祖每年避暑於此。亦不過名之曰山莊。故有聚民至萬家之句。蓋於禮樂之興。未免存待以百年之意。今則耕桑日以闢。戶口日以滋。以幅員計之。不啻數千里。而版籍或逾十萬焉。此而無學校。以牖民迪俗。豈宣

祖猷。揚

聖化之道。且今西域烏魯木齊等處。率置郡縣。立學校。以此較彼。為尤近矣。則茲文廟之建。於時於地。胥不可緩。亦不待人之請而後行。稱之曰熱河。

文廟者。今雖升之曰承德府。從其朔。紀其因也。昔蘓軾作韓愈碑記云。公之神之在天下。如水之在地中。予謂韓愈因文見道。我

夫子體道垂文。韓愈之所因者。即

夫子之所垂。而見猶待乎行。體則其本也。且水在地中。尚需求而得之。我

夫子乃天之經。地之義。山之峙。海之淵。無日不在人人心目之中。範圍曲成而不遺。豈待穿鑿求之而後得。然則

木鐸之音。孰謂不可覺斯民於關外荒畧之區也哉。○諭熱河自

皇祖建立山莊以來。迄今六十餘年。戶口日滋。耕桑益闢。儼然一大都會。禮樂百年而後興。此正其時。曾於丙申秋。降旨添設學校書院。加廣庠額。以教育而振興之。並相地鳩工。建立

文廟。茲鑾輅來巡。適屆落成。親詣行釋奠禮。宮牆泮水。間青袍環列。彬彬可觀。從此文化

益當蒸蒸日上。盛況現在庠生。已有五十餘人。均應與順天鄉試。雖丁酉科曾經中式一人。但邊外士子。撲魯者多。恐尚未能與通省員字號卷。校藝獲售。著加恩照宣化府之例。另編承字號。每科鄉試。取中舉人一名。俾士子知上進有階。愈加鼓舞。俟將來文風漸盛。人數多至百餘名。該督臣再行奏聞增額。以示嘉惠。塞上士林。多方樂育。至意。該部即遵諭行。○戊申定烏魯木齊新建奇台縣城。名曰

靖寧。城門東曰延曦。西曰景顯。南曰薰阜。北曰徠安。○四庫全書館總裁質郡王永瑤等奏。請將承辦四庫全書。依限完竣。各員分別給予議叙。得旨。王燕緒著加恩授為翰林院編修。倉聖脈。何思鈞著照該員甲第授職。朱鈴著賞給庶吉士。楊懋珩。繆琪俱著以知縣即用。○吏部議准。江西巡撫郝碩疏。稱崇仁縣向有二城。一係知縣。縣丞典史。教職武弁。駐劄之所。謂之官城。即今北城。一係有市廛。

而無官署。謂之民城。即今南城。南城錯處殷繁。須官為彈壓。請將縣丞一員移駐。遇鬪毆賭博等事。就近稽查。移縣審理。該縣丞衙署。即將舊署動開款移建。再官民一體不應城分官民。自後一切文移。改稱北城南城。從之。

○直隸總督楊景素奏。前署總督英廉。請撥平泉州倉穀二萬石。碾運熱河。以備平糶。業蒙允行。查平泉州暨豐寧縣倉貯均屬充裕。除平泉州現奉奏撥。并該二州縣各留備本處借糶外。平泉州尚餘穀四萬石。豐寧縣餘穀一萬九千餘石。應均令撥運。寬為籌備。所需運脚。於糶價內歸款。報聞。

○烏魯木齊都統索諾木策凌奏。烏魯木齊一帶。地闊人多。間有流寓孤貧。請在所屬州縣。各設養濟院一所。以資收養。循照安西州例。各令墾地二百畝。州縣以上。捐廉建築倉房。置辦馬牛器具。選殷實之戶經營。秋收除扣工價籽種外。將存剩糧石。查實在孤貧者。每名日給白麵

半觔。冬給綿衣一件。倘將來人數漸多。另籌公項支給。報聞。

○緩徵湖北江夏武昌咸寧嘉魚蒲圻大冶漢陽漢川黃陂孝感黃岡麻城黃安鍾祥京山潛江天門荊門安陸雲夢應城應山江陵公安石首監利松滋枝江襄陽棗陽宜城等三十一州縣暨屯坐各該州縣之武昌武左沔陽黃州荊州荊左荊右襄陽德安等九衛。乾隆四十三年水旱成災。額賦。○旌表守正捐軀直隸清河縣民楊大興妻李氏。○己酉。諭曰。圖思義已予副都統銜。授為吐魯番領隊大臣。所遺鑲藍旗滿洲副都統員缺。著綽克托調補。其鑲紅旗蒙古副都統員缺。著塔彰阿補授。又諭。昨值年旗請派副都統一員。管理鑲藍旗滿洲馬圈事務。因該旗副都統薩哈岱現隨朕在此。圖思義復經出差。是以未經派人。今綽克托業已調補鑲藍旗滿洲副都統。即著綽克托管理馬圈事務。○庚戌。以故阿巴哈納爾托薩克

多羅貝勒車登扎布子瑪哈巴拉襲爵。○旌表守正捐軀安徽定遠縣民朱元妻李氏。○辛亥。諭據阿桂等奏開歸道周於智於四月十七日。馳抵豫省。因途次患病。不能到工。當赴省城調理。該員病勢日增。於五月十八日病故等語。周於智本係告病回籍。昨以豫省工次需人。該員在豫年久。熟悉河務。因降旨令其馳驛赴豫。該員於途次患病。甫經到豫。旋即身故。究屬勤於王事。殊可憫惜。著加恩

賞給按察使銜。其旅櫬回滇。道途遙遠。並著由驛妥送。以示優恤。○諭軍機大臣曰。阿桂等奏開挑引河情形一摺。已於摺內批示矣。此次王家莊所挑引河。較常倍加寬深。且在初伏以前。可以竣工。俟大汛到時。自可乘勢引溜。以期暢注。果能掣動大溜。則壩工合龍自較省力。第引溜既歸正河以後。所經河南山東。至入江南境。河路尚長。其經行河底。未識能否一律深通暢達。無淤阻之虞。兩岸隄

工。是否一律堅固完好。無鬆薄之患。不可不豫行籌度。為未雨綢繆之計。今王家莊開挑引河之事。現有阿桂在彼督辦。袁守伺此時。竟當即往下游一帶。查勘兩岸隄工。并察看河底情形。如有應急需辦理者。即札商阿桂。一面奏聞。一面迅速籌辦。務於開放引河以前。勘辦全完。方為妥善。此旨著由六百里加緊傳諭知之。仍即由驛速奏。○署直隸泰寧鎮總兵寶琳奏。

泰東陵新添堆撥。周圍地面。共三十餘里。每堆撥相隔二三里。至四五里不等。地方遼闊。僅設額外外委二員。恐巡防未周。請在原設馬兵內。再挑額外外委二員。慎重防護。報聞。○士子。諭據閔鶚元奏。天長縣生員王廷贊。控首貢生程樹榴。所刻詩文。狂悖請將知縣高見龍。教諭孫麟。訓導王守愚解任。現在飛提人犯。來省審訊等因一摺。朕初閱時。尚以為此等自係挾仇控告。惟應斷以公正。不必稍

存意見已於摺內批示矣。及細閱鈔錄王廷贊呈詞內所開程樹榴詩序有造物者之心愈老而愈辣斯所操之術乃愈出而愈巧等語甚為狂誕昔

孔子稱不怨天今程樹榴身列膠庠所作序文竟敢牢騷肆憤怨謗

上蒼實屬喪盡天良自為天理所不容即如此摺朕初閱以為不過挾嫌捏控之案照常批示及加細閱則其狂悖之語終不能揜可見

慢

天悖妄之徒無不自然敗露者不可不嚴加懲治以彰國憲而正人心著交薩載會同閔鶚元即速提集案犯審訊明確按律定擬具奏將此由五百里諭令薩載閔鶚元知之閔鶚元摺及鈔呈並著鈔寄薩載閱看○大學士管閩浙總督三寶浙江巡撫王亶望奏乾隆庚子春

聖駕南巡沿途地方須設廠售錢以平市價查

乙酉年之例留錢五萬串已數售賣今次應比照辦理將寶浙局現存十三萬餘串之數酌留五萬串屆期在杭城內外及嘉興入境至桐鄉石門海寧仁和抵省沿海一帶設局出售至搭放兵餉尚有撥存餘錢及續鑄錢文儘足敷用報聞是月江蘇巡撫楊魁奏辦理地方差務不能循例陛見得旨自當如此何必為此虛飾之奏○江西巡撫郝碩奏省城外設有馬廠二處皆濱臨江湖沙地向

為撫鎮下六營暨縣驛牧馬之所界內之地間被隣田侵越今按址清出除原定額地外兩處餘地共一千三百餘畝召民墾種今歲即據各戶認繳租銀一百三十七兩零其未據認墾之地將來成熟約收租銀二百兩此項銀兩即可儲備六營公用請自今歲為始隨時支給設遇水坍沙漫酌將租銀豁除報聞○浙江巡撫王亶望奏寧紹嘉松兩分司每員額設養廉八百兩又因其經管永濟大

有兩倉積貯米穀諸多費用於引費項下各給公費銀四千二百兩查兩分司公務無多所得過優況倉內米穀現已歸地方官管理事更簡少請每年每員酌給銀二千兩儘敷公私用度餘銀六千兩請裁歸海塘經費項下報部充公報聞○署陝甘總督陝西巡撫畢沅奏甘省各屬春夏之交雨水調勻今忽被黃疸蟲傷分別勘辦得旨是其民福薄實屬可憫茲又免其積欠亦不過救弊而已○

又奏武威等縣戶民情願前往烏魯木齊墾種地畝共計一千八百八十七戶前經奏准按站派役伴送並咨明該都統於此項戶民送到時查收安插茲自上年十二月二十六日起至本年三月十七日止俱全數出關訖得旨此或甘省貧民一救急生路當從民之願亦不必強也○又奏查班禪額爾德尼從青海交界之日月山進口至塔爾寺計程一百五十里分作四站該處俱有公廨民房只

須量加修整明春從塔爾寺至營盤水出口入賀蘭山界計程七百五十里分作十九站平番以南多有公館可住平番以北俱係草地只可支搭蒙古包帳房按站住宿但此係明歲經行之地尚可從容酌辦至今年到塔爾寺居住過冬一切支應款待及備辦需用物件等項頭緒繁多均需早為停當現議章程俟督臣勒爾謹回甘時查明妥辦得旨彼尚不能回任即回任亦未能似汝詳悉料理

但不須過當太費耳○成都將軍特成額四川總督文綬提督明亮奏兩金川屯務前經奏明酌存綠營兵四千名並撥留屯練二百名給地耕種茲各屯透雨霑足督飭各兵勤力耘耔所有撥留種地屯練及調赴各屯之攜眷屯兵及各降番民戶俱相率力作以冀有秋至屯練一項原留差防兵五百名除奏明撥出種地兵二百名外尚餘三百名今查各屯既有種地屯練二百名又有調往挈眷

屯練一百五十戶。共計五百餘人。且自裁減官兵後。又已半載。番地寧謐。差防無誤。前項單身屯練三百名。應一併撤回。以節糜費。得旨欣慰覽之。大學士管雲貴總督李侍堯奏雲南騰越州屬隴川土司多朝珍因病詳請告退。現無子嗣承襲。查有該土司胞叔多有爵。誠實幹練。恭順小心。現飭協同辦事。族目相安。自應俯順夷情。准其襲職。報聞。○大學士管雲貴總督李侍堯雲南巡撫裴宗錫奏滇省檄飭各局員。按照所裁鑪座拆毀。查從前凡遇裁局停鑪。於所存房屋。從未議變價。竊思鑪座既裁。鑪房仍存。不特空閒無用。兼恐匠役人等潛匿私鑄。請一併拆變。俟將來厥旺銅多。再行撙節估建。即以變價添用。得旨嘉獎。

大清高宗法天隆運至誠先覺體元立極敷文奮武孝慈神聖純皇帝實錄卷之一千八十三

大清高宗法天隆運至誠先覺體元立極敷文奮武孝慈神聖純皇帝實錄卷之一千八十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 重福內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曾振鐸等奉

敕修

乾隆四十四年己亥六月癸丑朔伊犁將軍

伊勒圖奏。去年哈薩克阿布賚遣使鄂托爾齊。到伊犁請兵。攻取塔什干進獻。并齎誓文一張。臣等察其狡詐。曾飭令回去。今年哈薩克售賣牲畜來時。適有回人巴巴和卓同來。因問問哈薩克近事。據云。去年阿布賚遣鄂托爾齊。曾帶印文赴塔什干地方。稱言

大皇帝降有諭旨。將塔什干貢賦。賞給阿布賚取用。現有印文可憑。塔什干之伯克等。先已應允。並留鄂托爾齊之子為質。將鄂托爾齊

遣回。迨衆回人等集議。始知實係冒索。被伊欺哄。遂將鄂托爾齊之子。殺戮洩忿。嗣後阿布賚。遂不遣使再來等語。查阿布賚狡詐多端。始則欺罔臣等。繼復偽托印文。圖取塔什干財賦。覺察之後。妄念始息。是其性情詭譎。將來仍恐不無設法遣人再來之事。倘再來時。臣等酌量情形駁回。得旨甚是。知道了。駐劄西寧辦事副都統法福禮奏。據駐藏大臣咨稱。班禪額爾德尼。於本年六月十七日

起程。明年二月可至熱河。須先派番兵五十名。馬一百匹。牛三百頭。赴木魯烏蘇豫備隨行等語。查木魯烏蘇至青海邊界約二十餘日路程。若止派番兵護送。恐不諳性情。未免疎懈。因與青海扎薩克商派貝子沙克都爾扎布帶兵往迎。並派員外郎靈倫往來稽查。計至木魯烏蘇過河時。臣等即親至其地。豫備駝騾輿轎等項。以資接濟。得旨好。爾見班禪額爾德尼。如何議定。速行奏聞。○甲寅。吏

部奏外任旗員丁憂其現任腹俸實授者回旗百日孝滿後令在原衙門行走至苗疆烟瘴等邊俸以及陞署題署未經實授分發試用未經得缺人員因有將來仍赴原省例遇丁憂在旗閒居守制殊未盡一請嗣後除現任實授各員照例辦理外至邊俸未滿及未經實授得缺人員丁憂回旗後亦應俟百日孝滿由該旗咨報臣部在原衙門當差如無原衙門可歸及原衙門無相當缺臣部籤掣各部院衙門行走支給公費俸祿再此項人員未便奏署額缺服滿即令離任臣部給與執照赴原省候補其在部行走時仍屬各該堂官考察從之○丙辰諭本日哈靖阿又有五百里馳奏之摺閱所奏則李萬春仍未弋獲即稱率同署臬司等將李逢春等審訊分別定罪由驛馳奏是儼然以巡撫自居實大不是矣哈靖阿人本中材因其在宣化府任內能將屬員逢迎之事揭叅似屬公正遂擢

用道員尋畀以臬司之任哈靖阿今雖暫護撫篆其職分尚係臬司乃竟自視與巡撫無異遽爾高興實屬器小易盈觀其庸妄如此則平日之不能實心任事不過旅進苟祿概可知矣除將定罪摺交部覈擬外哈靖阿著交部嚴加議處○又諭本日哈靖阿奏將現犯李逢春等分別定擬由驛馳遞並將未獲之李萬春一併問擬斬決實屬錯謬李萬春敢於聚集匪類妄言禍福實為此案罪魁不可不嚴拏務獲且據稱前往龍山墟賣藥或往土田州及歸順州地方既有逃往地名無難蹤跡何以至今尚未弋獲足見外省辦事並不認真今哈靖阿既未將李萬春緝獲輒先行擬以斬決該犯聞知必更畏罪竄匿又安有就獲之期且此等案犯非若聚眾抗官決不待時者可比若不將首犯正法恐致別生事端自應俟要犯弋獲一併嚴審明確按律問擬何必先將現獲之犯急急定案乎聞

哈靖阿兩次奏摺。儼然以巡撫自居。竟忘其職任尚係按察使。其不能實心任事可知已。降旨交部嚴加議處。看來此事亦非哈靖阿所能辦。李世傑平日尚屬能事。著傳諭該撫。即速馳赴粵西。上緊設法。實力緝捕。務將李萬春。迅即緝獲。即行嚴審定擬。勿使要犯久稽顯戮。至此案原係李萬春。李逢春兄弟商同糾騙。厥罪維均。哈靖阿以李逢春為起意。李萬春為幫同。亦未允協。著將哈靖阿原摺。

發交李世傑看。至李萬春久未就獲。恐其竄匿鄰境。業經傳諭雲貴各省督撫一體躡緝。但粵西究係該犯本籍。不可因有通行嚴緝之諭。稍存疎懈。將此由五百里諭令知之。又諭。李萬春為此案首犯。斷不可容其漏網。該犯形跡詭秘。四川。湖北。俱與粵西相近。恐其越界潛竄。亦未可定。著傳諭文綬。圖思德。鄭大進。即派委妥幹員弁。一體設法購線躡緝。至前經傳諭查緝李萬春之各省督撫。現

在作何查緝。要犯曾否就獲。并著即行具摺覆奏。不得視為海捕具文。致首惡遠颺免脫。久稽顯戮。將此由五百里一併傳諭知之。○丁巳。諭軍機大臣等。據順天府尹胡李堂等奏。查審李英。賄買頂冒四庫館膳錄蔣翰一案。其蔣姓頂賣膳錄監生。實係鍾姓說起。據任浩等供稱。鍾姓名叫鍾三。係浙江山陰縣人。蔣姓僅止一面。並未說明係何處人氏。聽其口音。似湖州人。已經回南。現在飛咨查拏

等語。已交刑部審擬矣。此案李英等賄買頂名。且有假冒執照等弊。難以輕縱。蔣翰係屬本生。鍾姓亦係說合之人。自應迅速嚴拏。到案審訊。著傳諭王重望。即將鍾姓及蔣翰拏獲。派委妥員。迅速解交刑部訊究。沿途小心管解。毋致疎虞。○又諭。據法福禮奏。班禪額爾德尼。由塔爾寺至三眼井。沿途雖已豫備蒙古包帳房。而經過城市村莊。既有房屋。亦應量加修整。如班禪額爾德尼願住蒙古包。

即住蒙古包。願住房屋。即住房屋等語。昨勒爾謹來京陛見。據稱塔爾寺至三眼井。並無房屋。必須搭蓋蒙古包。因降旨。與其內地紛紛備辦。莫若即將青海所備蒙古包。直送至三眼井。再將阿拉善蒙古包更換。今閱法福禮所奏。是此一帶。雖不似塔爾寺。岱漢廟宇宏敞。亦俱有旅店。塔爾寺為班禪額爾德尼住居數月之地。必需大廟。岱漢係達賴喇嘛舊居之廟。並非特建。今班禪額爾德尼自西寧至三眼井。所經道路。不過住宿一夜。將現有之房屋。略為修理。即可居住。又何必搭蓋蒙古包。勒爾謹身任總督。於此一事。全無主見。是何道理。勒爾謹著傳旨嚴行申飭。此事若伊二人彼此推諉。斷不能妥協經理。現已傳諭法福禮。由驛前來。著傳諭勒爾謹。接奉此旨。即由驛前來。熱河。令伊等面議。由軍機大臣叢明。候朕指示。俟議定後。再行辦理。亦不至遲誤。○戊午。諭軍機大臣等。據特成額

等奏。明年帶領番子來京朝覲。擬仍由內地行走。等因。一摺。前降旨。令該土司等。由邊外行走。原因伊等性不耐熱。曲加體恤之意。今特成額等。既稱由番境至青海西寧等處。道路紆折。且經由蒙古游牧地方。土司等必須自備口糧騎馱。均屬費力等語。自應令其仍由內地行走。但前此所稱。早至京師。在西山各廟居住之說。斷不可行。西山本不甚涼爽。而令番子等在彼閒住數月。尤屬無謂。著傳諭特成額。於明歲五月初。帶領朝覲各番。自成都起身。沿途按計程站。酌量緩行。到京時。亦不必令其又至西山住廟。即起程前赴熱河。總於七月二十外到此可也。○己未。諭據福康安奏。前署岫巖通判德興。署城守尉佐領沙布東阿。差派兵役下鄉。採買燒窰柴薪。該牌頭劉發興。科派村民飯食草料錢文。以致將村民李明毆斃。該通判德興。雖經驗訊。拘獲兇手。尚未通報。或有規避隱諱情事。請

勅交奉天府府尹嚴審究擬等語。地方辦理城工物料。兵役藉端派擾。以致毆斃人命。該管上司。均有失察之責。若交府尹查審。不免瞻徇迴護。此案著交盛京刑部侍郎穆精阿嚴審究擬具奏。其有應行續叅之該地方官。並著福康安查明叅奏。該部知道。○諭軍機大臣曰。富綱昨已降旨。補授福建巡撫。自應至行在請訓赴任。但勒爾謹現有應行詢商事件。已傳諭令仍馳赴行在。畢沅正在蘭州

署理督篆。回陝尚需時日。雖陝西布政使業已簡用尚安。并即令赴任。但該員初至陝省。難以即護撫篆。至陝尚需時日。福建巡撫印務。現有三寶兼署。富綱此時。自可不必亟赴新任。仍著在西安暫署撫篆。俟勒爾謹回甘後。畢沅回至西安。富綱再行交代起程。將此由四百里傳諭知之。○又諭五月十一。及二十三。四等日。京城及熱河。連日俱得透雨。甚為優渥。昨據國泰奏到。東省亦於五月中旬。

下旬。得雨深透。通省均霑等語。是東省得雨。與畿輔大畧相同。豫東境壤毗連。晴雨情形。自應仿佛。乃該撫自奏五月初六得雨之後。其中下二旬。曾否普渥甘霖。未據奏及。昨阿桂等會奏引河工竣摺內。雖有自二十五日以後。連遇風雨數次之語。但未知是否深透。及各屬曾否均霑。甚為厯念。著傳諭陳輝祖即行詳悉查明。據實覆奏。○又諭據福康安奏。岫巖城兵役下鄉。採買柴薪。藉端派擾。以

致毆斃人命一摺。事關地方官辦料。縱役滋事。該府尹難辭失察之咎。若令其查審。不免瞻徇迴護。已有旨交盛京刑部侍郎穆精阿嚴審究擬矣。至府尹銘通。曾任太僕寺少卿。因赴商都等處。查馬事竣。至熱河奏聞。朕召見時。看其人尚屬黽免。且旋擢用為奉天府尹。上年朕詣盛京召見。觀其人才。不過中平。未必能大有出息。尚不知其在任辦事。究屬如何。著福康安悉心體訪。據實覆奏。又據福

康安奏查勘岫巖舊城基址。週圍量長四百六十五丈五尺。飭令照例確實估計。較原估約計節省銀三萬餘兩等語。此項工程若原估後另有刪改之處。則覈減多至三萬餘兩。尚屬情理所有。若工段料物俱係照舊。即覈減節省。止應在數千上下。何至三萬餘兩之多。是否原估浮冒。抑或另有別情。並著福康安查明。據實詳悉覆奏。將此由四百里諭令知之。尋奏。工部原咨內開。岫巖新修城垣一座。量長八百九十四丈。估計工料銀七萬四千五百七十一兩零。今查勘舊城基址。較原估新修城垣處所。地勢既高。而週圍城根土牛。尚屬堅實。自應照舊城基址修築。隨量長四百六十五丈五尺。並將城根現存土牛折抵土方。實估計銀四萬一千二百六十七兩零。是以較原估節省。並非原估浮冒。至岫巖城因兵役下鄉。採買柴薪。牌頭劉發興藉端派擾。以致毆斃人命一案。現咨明刑部侍郎

穆精阿。嚴審定擬。府尹銘通係一謹慎老實之人。雖才具未能開展。居官為人小心。黽勉並無別項劣跡報聞。○庚申。諭戶部會同吏部。議將碭山等六縣漏報開除。及銅山等八縣重複開造之該管上司。議以實降實革。二摺。固屬照例定議。但藩司係總辦衙門。其過止於疎忽。且已著令各任分別按數賠補。已足蓋愆。所有梁國治。薩載。俱著照部議所降之級。從寬留任。崔應階。圖思德。陳輝祖。託恩多。姚成烈。均著從寬免其革任。仍註冊。其已經休革各員。並著將降革留任之處註冊。至承辦之知縣。其咎較重。然亦惟初辦錯誤。及初次接任之員。應予實降。其餘歷任接收交代各員。止於不行詳查更正。亦可從寬留任。著該部查明。另行分別定議具奏。其各書辦造冊錯誤。罪所應得。著照部議辦理。○諭軍機大臣等。據楊景素奏。正定鎮總兵陳大用。稟有匿名逆詞一紙。係指山西高平縣白蓮

教任天祥等謀為不軌等因。當即飛咨山西撫臣嚴密查拏。並委按察使達爾吉善馳赴正定。率同知府黃檢嚴密查辦等語。所辦甚好。已於摺內批示矣。此等匿名逆詞大約俱係奸徒懷挾私仇計圖傾陷。詞內既稱正定有一軍師。又或即係正定地方之人挾仇造謠投遞。均未可定。但所稱軍師並未指有姓名。一時恐難根究。而所稱高平之任天祥等俱有的名。今楊景素業經飛咨山西撫臣巴

延三嚴密查拏。自己按名就獲。究其是否邪教虛實可以立辨。并可就任天祥等訊其平日有無仇家。則匿名揭帖之人即可從而蹤跡鬼域。自難遁形。該督既委達爾吉善前往率同黃檢查辦。其逐塘挨查破損緣由。易於稽覈。自可即得端倪。此時正定所屬如有應物色之處。黃檢自當在彼訪查。否則竟當馳赴山西高平縣會同該地方官查訊。任天祥等有無仇陷情由。自更可以迅速。且黃檢尚

能辦事。又曾久任山西藩臬。於該省情形素所熟悉。更屬輕車熟路也。著傳諭楊景素遵照妥辦。如已獲正犯。即速詳細研鞫。務得挾仇誣陷實情。從重定擬具奏。將此旨著由四百里發往。並諭巴延三知之。仍各將現在曾否究出正犯及查審情形迅速具奏。禮部奏承德府

文廟請照各省學校之例。頒貯書籍。得旨。所奏是著交金簡辦理。送至承德府貯

文廟內之尊經閣。○辛酉諭曰。誠親王弘暢係鑲白旗滿洲都統兼署鑲黃旗鑲藍旗滿洲都統事務。以一人管理三旗恐不能周到。伊所署永貴鑲藍旗滿洲都統之缺著克勤郡王雅朗阿署理。○壬戌兵部議覆前署湖廣總督湖北巡撫鄭大進疏稱邊缺俸滿將備人員弓馬可觀訓練有方者。照例保題其弓馬平常者查平日辦事及現在年力或調回內地或隨時糾劾勒休將展限一年之例

停止等語。查邊俸人員。以練兵安民為首務。至本身弓馬平常。原可學習改觀。今如該督所奏。是因該員弓馬之優劣。方查其平日辦事之賢否。未免輕重倒置。請嗣後考察邊俸俸滿人員。五年內果能整飭營伍。撫綏地方。兼之弓馬可觀。年力壯盛者。會覈保題。照例先行陞用。如五年內辦事奮勉。勤勞無過。而弓馬平常。年力未衰者。調回內地。將邊俸陞用之處註銷。惟循分供職。及弓馬不及。年力

已衰者。即勒令休致。所有展限一年之例。應如該督所奏停止。至武職人員。並無正印佐雜之分。其保薦甄別。總以實授之日。扣算俸滿之期。以歸畫一。從之。○以吏部左侍郎王杰。為浙江鄉試正考官。侍講學士吳省欽。為副考官。內閣學士錢載。為江西鄉試正考官。中書張虎。拜為副考官。修撰戴衢亨。為湖北鄉試正考官。中書吳俊。為副考官。○癸亥。諭軍機大臣等。刑部奏。覈擬廣西裝神惑眾。騙

錢之李逢春一案。已依擬分別斬決監候矣。至李萬春。係李逢春之兄。商同糾騙不法。厥罪維均。實為此案要犯。必須嚴拏務獲。立正刑誅。以昭炯戒。業經節次傳諭該撫。速派妥幹員弁。上緊緝獲。並諭毗連粵西之各督撫。一體查拏。該犯自難久於竄匿。著傳諭李世傑。於李萬春就獲時。迅速審訊明確。一面奏聞。一面即於該處正法。毋使稍稽顯戮。○甲子。廣西按察使哈靖阿。依部議革職。以山西歸綏道富躬。為廣西按察使。○乙丑。署江南河道總督李奉翰奏。五月中旬。大雨時行。宿遷駱馬湖內。水勢盛長。隨飭員將順隄河形。北小壩等處尾閘各壩啟放。水由六塘河。入北潮河歸海。並令將下游中河之雙金閘楊家莊頭。草壩展寬。其運河埽壩卑矮。汕刷之處。鑲修堅整。又正陽關淮河。長水六尺六寸。洪澤湖。長水九寸。高堰誌格。連前長至一長二尺九寸。除已將清口東西壩展寬八十二

丈。查看兩壩壩根後。東壩尚有土基五丈。西壩尚有土基二丈。倘湖水再長。即行挖除。至外河。山安海防三廳。水勢已大。將來再加以三堡分洩之水。勢必盛漲。現將外河王營減壩。臨河鉗口壩工。上緊鑲做。以備開放得旨。覽奏稍慰。以後正宜慎防也。○旌表守正被戕江西宜黃縣民鄒明澄女鄒氏。○丙寅。諭軍機大臣等。熱河自五月下旬得雨後。晴霽約及旬餘。今自十二日以來。連日有雨。雖不似前月之滂沛。且時雨時晴。於田禾自為有益。即各山河間有發水之處。亦無妨礙。惟念永定河正當伏汛之時。水勢有無加長。各隄岸是否鞏固。該督此時。曾否赴固安防汛。目擊情形若何。著傳諭楊景素。即速據實覆奏。尋奏。直屬得雨。各處深透。河水旺盛。消退亦速。現查永定河底水。只深二尺九寸。隄埽甚為穩固。得旨。覽奏稍慰。○丁卯。諭甘肅地處邊陲。民貧土瘠。歷年均有偏災。即降旨蠲賑。

緩帶。民間所借籽種口糧。及緩徵等項。積欠甚多。曾於乾隆三十六年。降旨加恩豁免。該省舊欠倉糧四百餘萬石。又於四十二年降旨。將該省自乾隆二十三年。至三十五年。民借折色未完銀八十四萬餘兩。概予豁免。俾邊氓共慶盈寧。茲據該署督畢沅。將各年正雜錢糧。已未完數目。開單具奏。朕詳閱單內所開。每年未完銀糧數目尚多。雖係按年帶徵之項。且該省上年額徵地丁正賦。業已加恩輪免。本年各屬。節次得有雨澤。二麥豐收。民力尚為寬裕。徵納自可如期。但念該省。究屬積歉之區。若將遠年積欠。一體並徵。為數過多。完項仍不無拮据。著再加恩。將該省自乾隆二十七年。起。至三十七年止。因災帶徵未完銀二十萬三千餘兩。糧一百零五萬四千餘石。概予豁免。其自三十八年以後。緩帶各項。及此豐年帶徵小民天良感發。當必踴躍輸將。且積逋既普免。追呼其近欠自易。

於完納如此體恤優施。閭閻更得永資樂利。該部即遵諭行。○諭軍機大臣等。據鄂寶等奏。四月十三日。突有一人赴巡漕御史天保公館。投書一封。拆看係匿名揭帖。控告湖北湖南各幫旗丁。盜賣漕糧等事。當將投書人丁自富審訊。供出寓居楊州萬壽宮之黃姓托遞。及指獲訊問。又係雷旭始經供認。迨發淮安府署府胡觀瀾審訊。雷旭頓翻前供等語。所辦殊未明晰。丁自富初供。既有黃姓給錢投遞之語。自應指拘黃姓之人。到案嚴鞫。何以差役押同丁自富指拏人犯。却將雷旭拘拏。及雷旭供詞翻覆。仍當向丁自富嚴詰。當日原交書信之人。令其指實。乃任聽丁自富扶同改供。致滋疑竇。總未得此事肯要。豈能審出實情。著傳諭薩載。提集各犯。逐一嚴鞫。務得托投匿名揭帖正犯。審訊明確。定擬具奏。鄂寶等原摺。並著鈔寄閱看。

實錄卷一百八十五

元

實錄卷一百八十五

子

大清高宗法天隆運至誠先覺體元立極敷文奮武孝慈神聖純皇帝實錄卷之一千八十四

大清高宗法天隆運至誠先覺體元立極敷文奮武孝慈神聖純皇帝實錄卷之一千八十五

監修總纂官經筵講官太子太傅文淵閣大學士文淵閣領閣事領侍衛內大臣楊家欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 重鑄內大臣戶部尚書鑲藍旗滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振鏞等奉

教修

乾隆四十四年己亥六月戊辰諭前因豫省

儀封等處堵築漫口尚未歲工傳諭薩載將安徽之亳州蒙城等處河水下注之區曾否洄出現在貧民有無拮据情形據實奏聞今據覆奏查明亳州之東北二鄉因上游黃水漫溢二麥復經被淹請動撥川米八千石借給貧民又蒙城縣境內堆河集板橋集一帶及東北鄉十餘鄉莊濱河田地俱被水淹二麥秋禾均有傷損請撥川米四千石一體借給等語亳州蒙城上年因豫省黃水漫注已

被災歉今亳州東北二鄉及蒙城之東北十

餘村莊復因漫水淹及田疇民力不無拮据

前撥川省米石原以備該省賑恤之用所有

亳州出借之米八千石蒙城縣出借之米四

千石均著加恩賞給該二州縣貧民以資接

濟該督等董率各屬實力妥辦務使窮黎均

霑實惠毋任胥役侵肥中飽以副朕軫恤災

黎至意該部即遵諭行○諭軍機大臣等據

袁宇侗等奏沁水長發民趁漫口一摺據稱

此次武陟河內二縣刷開民埝共有十餘處

漫口雖多幸水過後已有淤淺尚屬易於堵

合無庸借動官料現飭該地方官趕辦柳草

等物並調派從前辦過張村漫口之弁兵等

會同該汛員弁多集人夫分頭堵築其堵開

民埝各漫口夫工等費查照從前成案先於

司庫借項動用俟工竣確數分年均攤完納

歸款等語自應如此辦理著即上緊催趲速

辦務將各漫口一律堵合竣事至漫水所過

低窪停積之處。村落田廬。不免損傷。並著陳輝祖。督飭委員。迅速查勘。妥為撫恤。毋致失所。再沁水應匯入黃河。今沁水已長至丈餘。其漫出之水。亦繞至西南入黃東注。則黃水自應長發。何以摺內又稱。自來天色晴朗。河水甚平。未能即放引河。殊不可解。著傳諭阿桂。將現在儀封工次。黃水情形若何。沁水匯入後。黃水曾否長發。因何尚未開放引河。約計何時可以開放之處。迅速覆奏。以慰廑念。

此旨著由六百里加緊發往傳諭知之。仍著由驛速奏。○已巳。吏部題雲南東川府經歷陳受奎。盤查社倉。令書役需索銀兩。該管上司。不能豫行查叅。均應照例降調。得旨。經歷陳受奎。婪贓不法。該管上司。漫無覺察。處分固所應得。但兩司駐劄省城。相去較遠。且係通省總轄之員。其咎尚輕。孫士毅及海寧。業經有級抵銷。免其降調。汪圻亦著從寬免其革任。仍註冊。至湯雄業。白玠係專管府道。任

聽劣員兩次婪索。毫無覺察。直至控告飭查後。始行揭報。罪無可辭。湯雄業。白玠。俱著照部議實降。此案若不予以懲儆。道府等益視察覈屬員為具文。於吏治甚有關係。特降旨明白宣示。俾眾共知。此本並非照發批發。○諭軍機大臣等。據西成奏。京師錢價。自春間漸至增長。現在旗民換錢。每市平一兩。祇合制錢八百文有零。於民間日用不便。請嗣後各鋪戶商販。毋許格外堆積。買賣人等。均限

以定數。不使攜帶過多。以杜運販等語。錢價昂貴。固應調劑。但從前曾因錢貴。官為設局辦理。於民轉多不便。是以聽其自然。及十餘年前。錢價頓減。亦並非官辦所致。且京城錢價。長落有時。恐官為查禁。轉滋紛擾。又據稱市中報價。每兩換錢九百。而民間兌換實止八百有餘。何至相懸若此。所奏是否實在情形。抑或因瓜果入市。暫時昂貴。過後仍可漸平。或果有奸商堆積。及多販出城之事。自須

隨時查察懲治。著傳諭英廉卽速查明實在情形若何。及應否辦理之處。據實迅速覆奏。西成摺并發給閱看。庚午諭。據巴延三奏。派委藩司譚尚忠。馳赴高平縣。查明任天祥等。實非白蓮邪教。搜查各家。並無邪教經卷。亦無不法形跡。詢之地鄰人等。僉稱實係安分良民。詰訊任天祥等四人。俱供平日並無仇家。其因何被誣之由。不能自解。現將任天祥等押帶赴省一摺。甚屬錯謬。已於摺內詳悉批示矣。如任天祥等。果有喫齋為匪情事。如匿名帖所指。自應嚴切根究。分別查辦。今譚尚忠既親至其家。逐細搜查。並無不法經卷。及違礙書本。並查明各家。種地百餘畝。及數十畝不等。住房二三十間。延師設館教讀。繭絲滿室。並無絲毫。不法形跡。地隣等亦稱其實係安分良民。衆口如一。其為奸徒懷挾私仇。計圖傾陷。已無疑義。自應卽將任天祥等。立時省釋寧家。乃譚尚忠復將伊等押赴

省城。殊屬非是。而巴延三亦稱。俟任天祥等到省。督率司道嚴加查訊。亦太不曉事矣。大抵匿名揭帖。出於挾仇陷害者居多。本有立案不行之例。第恐同一誣害。而其中情節各殊。或所指尚屬有因。自不可竟置不問。是以令督撫等。遇有匿名揭帖之案。卽派員親往所指之家。詳細搜查。其是非虛實。無難立辨。如果盡屬虛誣。自當立時開釋。俾不致拖累無辜。且往往就被誣之人。訊得匿名正犯。使鬼域無從遁跡。既不致事涉顛預。兼可做奸頑以全良善。督撫等辦理此等案件。俱當深體此意妥辦也。今任天祥等各家。譚尚忠既經查明。實係良民。被人誣陷。復又押帶赴省。其意何居。而巴延三既知匿名帖所指全誣。尚復有何可訊。豈欲以此見其辦事認真。而不復顧事情之誠偽乎。若如此辦事。則凡溫飽良民。一經奸徒控陷。雖審明誣屈。仍不免拘解往來。縱事後得釋。早已傾家蕩產。徒使

良善受累無窮。而奸匪轉得逞其私願。其錯謬不太甚乎。任天祥等俱著即釋放。並查明各家赴省往回費用。令譚尚忠三倍罰出給予。以示薄懲。已延三著傳旨嚴行申飭。至牛四。已經查明並無不法。何必又咨山東省拏解。更屬無謂。著傳諭國泰。即行停止查拏。如已拏獲起解。迅速飛飭沿途地方。於所到之處。即行釋放。再此案匿名揭帖。任天祥等既未能指出素有仇家。其正犯自尚在正定一帶。且原係公文印封損破。方能插入匿名揭帖。其由何站損動。無難挨次嚴查。即可根究正犯蹤跡。前據楊景素奏稱。派令達爾吉善前赴各塘挨查。何以至今尚未查明覆奏。達爾吉善雖係臬司。專管驛站。而訪察奸偽。非其所長。楊景素彼時本應另派一曉事大員。幫同查緝。今此案為日已久。何以尚無端倪。著傳諭楊景素。即飭妥速挨查。務獲正犯。審擬具奏。此旨著由五百里發往。傳諭楊景素。

已延三國泰遵照速辦。且恐各省督撫查辦此等案件。或有如已延三等之舛謬過當者。亦未可定。著於各督撫奏事之便。傳諭知之。硃批。已延三摺。並著鈔寄閱看。辛未。吏部題甘肅省失察冒籍中式各官。分別議處。得旨。此案失察冒籍各員處分。固屬應得。但阜康迪化州等處。均係新設郡縣。與內地不同。該處本無土著。勢不能禁外省士民入籍。著加恩予以二十年之限。如限外有冒籍應試者。即照內地例辦理。壬申。諭元史內所載帝師名。及祝釐禱祠各名目。所譯字樣。自應與原解及原音相仿。惟字面如松之為總之類。尚與唐古忒音未合。著錄出發交章嘉呼圖克圖。閱看覈定。諭軍機大臣等。據畢沅奏備辦班禪額爾德尼。從青海進口經過各站。住宿供頓等項一摺。所辦俱是甚屬可嘉。已於摺內詳悉批示矣。如所稱平番以南。多有公館民房可住。平番以北。俱係草地。只可

支搭蒙古包帳房按站住宿等語。甚為明晰。頗得此事條理。其內地有房屋者。止須掃除潔淨。並無庸另為葺治。至草地不能豫備房屋。班禪額爾德尼原有帶來之蒙古包帳房。可以酌量妥為料理。並不必另費經營。昨勒爾謹在京時奏稱。欲自塔爾寺至三眼井各站。均須搭蓋蒙古包之處。未能將內地草地分晰籌辦。不免過涉張皇。又與法福禮不無稍存推諉之意。總未得此事要領。業已傳諭

勒爾謹。及法福禮。俱即馳赴熱河行在。再行悉心面議。候朕酌奪。並遣奎林前往查勘。今畢沅所奏。辦理俱甚合宜。勒爾謹未必能似此詳悉料理。勒爾謹回任。尚需時日。即可照畢沅所奏。速為妥辦。但不得過於繁費。現在奎林前往細勘。其沿途公館民房情形。畢沅並可詢之奎林。妥為籌酌也。至所奏修治道路橋梁等事。如山嶺峻仄處。自應量為平治。其經過橋座。實在跨臨河澗者。亦應繕葺完

整。若乾橋平路。俱可置之不辦。斷不值為之墊道也。總之。此事固不可草率遲緩。致臨時貽誤要差。亦不宜張大浮靡。一切過於勞費。畢沅自能斟酌適中耳。將此由五百里傳諭知之。○癸酉。諭軍機大臣等。據楊景素奏。查辦匿名揭帖一案。派令臬司達爾吉善。及順德府知府秦學溥。逐塘挨查。尚未知逆詞來歷。茲據達爾吉善稟覆。據正定鎮總兵陳大用。口稱該鎮前差赴京公幹。回營之把總張

士傑。曾經面稟。前日出京。行至宛平縣大井塘。見一人送到包封一個。問係上站塘兵。雇送下站。該把總接閱。看包封破口內。露有紅紙。抽出閱看。把總不甚識字。只見上面寫有潞安府白甚麼教等字。又有幾個任字。似幾個人名姓。把總不大明白。就將此紙燒燬。該鎮近因查辦此案。憶及前事。已派外委一員。押同把總張士傑。飛赴大井查拏等語。匿名揭帖。既於大井地方沿塘遞送。其蹤跡在該

處附近一帶必係山西做買賣之人。平素與任天祥等有仇。因思以此誣陷。大井離京不遠。該犯或在京城藏匿。亦未可定。著傳諭英廉即派番役前往該處嚴密挨訪。查拏務獲。至此案前經楊景素奏。據總兵陳大用稟稱接到提督長清公文內。拆有紅紙匿名揭帖一張。控告任天祥等邪教之事。其揭帖隨同奏繳。把總張士傑因何復於大井塘見有控告任姓邪教匿名揭帖。隨即燒燬。似係匿名之犯。聞知揭帖被燬。復於前途裝入自應向張士傑詰訊所見破損包封。係何處公文。是何月日。其長清公文過大井塘。是何月日。上下挨查。無難得其底裏。況封筒破損。上下塘接收轉遞。斷無不註明之理。因何達爾吉善等挨查日久。尚無影響。總之此案匿名要犯在直隸而不在山西。黃檢可即令其回任。著楊景素另派明幹大員。沿途切實挨查。務須根究正犯下落。緝獲治罪。至張士傑身為把

總係應查緝奸匪之人。既見包封內藏有匿名揭帖。即應飛稟該鎮。並報該督查辦。乃擅將揭帖燒燬。以圖滅迹。甚屬可惡。張士傑業經該鎮派員押赴大井一帶查緝。自尚在該處左近地方。並著英廉即派弁役前往查明。張士傑下落。拏交刑部嚴審治罪。楊景素摺著鈔寄英廉閱看。將此由五百里發往。一併傳諭知之。仍各將查辦緣由迅速覆奏。○甲戌諭軍機大臣等。據楊景素奏。五月下旬連日大雨。漳河漲發。於臨漳縣衝開壩口。大溜改趨壩後。溢河沙河亦同時漲發。均有民隄漫口。淹及民田之處。等因。一摺。已於摺內批示矣。據稱漳河由沙莊壩西北衝口。大溜改趨壩後。其壩前河身淤成平地。壩工已歸無用等語。漳河既改溜趨北。則南隄已成虛設。即以北隄為南隄。應否於河岸添築北隄。俾無旁溢。其何處漫口。應行堵築。孰係官修。孰係民修。亦當確切查明。分晰妥辦。至該處現

在情形若何。摺奏尚未能明晰。著即速繪圖。詳悉貼說。迅速由驛覆奏。至大名道劉致中。廣平府知府張長庚。並不在彼督率查辦。轉赴省面稟。實屬不合。楊景素將該道府嚴行申飭。令星速趕回查勘。所辦甚是。但漳河漲發。現已奪溜。而澄河沙河。亦同時並漲。其應行修繕之處。自多。亦甚關緊要。劉致中於堵築諸務。非其所長。即該督所委之梁肯堂。平日雖能認真辦事。但究係隔屬知府。與道員同在一處。未必能聽其調度。於公事恐屬無益。該處應辦工程稍大。必須確估詳覈。始不致有草率浮濫之弊。永定河若無事可辦。楊景素自應親往履勘。據實覈估。一面奏聞。一面派委誠幹諳練之員前往。會同該道府。實力承辦。方為妥善。若永定河當該督防守方妥。則漳河亦非甚要。過秋汛再往可耳。至被水各縣。田禾不無損傷。應即飭該道劉致中。董率所屬。確查是否成災。或應照例賑恤。或

應酌借籽糧。即行據實奏聞。候朕另降諭旨。將此由五百里諭令知之。仍將查辦情形。並所繪之圖。迅速由驛覆奏。其永定河日內水勢情形若何。亦著一併奏聞。○以編修吳敬輿。為陝西鄉試正考官。刑部主事祝雲棟。為副考官。吏部右侍郎謝墉。為江南鄉試正考官。編修翁方綱。為副考官。○乙亥。遣官祭火神廟。○諭曰。禮部漢侍郎。現在俱已出差。沈初未到京以前。著莊存與署理。王杰回京。即無庸兼署。○又諭吏部進呈光祿寺少卿缺本。將外省俸深道員。開列請簡。固屬照例辦理。但所開各道。尚屬外任。可以辦事之員。不必令其內擢京職。轉若投閒。因思鴻臚寺少卿缺出。既可以科道開例。光祿寺少卿較彼雖有正從之別。然同係五品少卿。即將科道開例。亦何不可之有。著將此本發回。即照鴻臚寺少卿之例。開列科道。其外省道員。仍著按例一併開列。著為令。○諭軍機大臣等。

禮部漢侍郎。現在俱已出差。已有旨令莊存與署理侍郎事務矣。莊存與昨至行在銷假。業經召見。回京未久。毋庸再赴熱河謝恩。著留京王大臣傳諭該侍郎知之。○又諭據楊景素覆奏查辦正定府屬匿名揭帖一摺。據稱提標叅將代行正定鎮之文。係五月十五日發發。把總張士傑在大井汎接閱。包封公文。係十四日之事。或係奸徒因聞前詞已燒。復寫後詞插入遞送等語。尚未得此事肯綮。奸徒挾嫌傾陷。投遞逆詞。遇便插入官封。或經一兩月餘。未見前詞發覺。復逞鬼域之謀。尚屬情理所有。今張士傑燒燬揭帖。係五月十四之事。而提標叅將代行正定鎮之文。係十五日發發。為期太促。張士傑既將揭帖燒燬。必不肯漏洩於人。奸徒何由知前詞為該把總所燒。仍復添入後詞耶。況據查訊遞送正定鎮公文。至滿城縣之方順橋。始有微損。其地在保定之南。距大井汎三百餘里。奸徒

信息。又安能如此迅速。又豈能潛隨插入揭帖之包封。沿途探聽乎。看來此案。僅從方順橋一帶根究。未必能得其蹤跡。而張士傑既將揭帖燒燬。又向該鎮陳大用稟知。轉有可疑。或揭帖即係張士傑所為。見查辦嚴緊。必然敗露。故向該鎮稟知此語。豫為巧脫之計。亦未可定。前已傳諭英廉就近將張士傑交刑部訊問。如現已就獲。英廉即將張士傑嚴行審訊。確情。如該把總已離大井汎等處。未經拏到。即著楊景素速派妥員。將張士傑拘拏到案。嚴審該把總所見。插有紅紙揭帖之包封。係何衙門行何處公文。且該把總係該鎮差赴京城公幹之人。路經大井汎。其塘兵遞送公文。因何入伊之手。伊又因何將揭帖私行燒燬。逐一嚴詰。務得實情。即速具奏。將此由五百里傳諭知之。又諭刑部奏到審擬鍾三等。假捏監照。騙賣謄錄一摺。已依議行矣。此案假造監照。描摹印信之處。係何

人看出尚屬留心傳諭刑部堂官即將首先看出之人或係刑部司員或係堂官查明據實奏覆○丙子諭軍機大臣等前據楊景素奏漳河漫溢大溜改趨壩後田禾被淹滄河沙河亦同時漲發等語因所奏該處情形未甚明晰曾諭令該督即速繪圖貼說具奏今檢閱舊存之滹沱子牙河圖見滄陽河由東鹿縣相近之營上村與滹沱合流是滄河至此即成滹沱則漳河與滄河宜在東鹿之上而下流方入滹沱也滹沱河有無驟漲未據奏及但滄河既已漲發勢必較盛其匯入滹沱以後現在滹沱河水勢若何有無增長漫溢深為厯念其漳河衝突改溜之處日來情形若何滄河沙河漲水與漳河有無關涉並著楊景素一併查明據實覆奏將此由五百里傳諭知之尋奏滄河發源於磁州沙河由山西入直隸沙河縣境歸大陸澤寧晉泊之後甫與滄河會合至衡水縣匯入滹沱是滄

河至此即成滹沱也至漳河向年原有分支一由曲周縣入滄河一由青縣入運河自沙莊壩告成後全漳盡由山東館陶縣與衛河合流入南運河從前故道已無水溜是現在滄河沙河漲水與漳河並無關涉今漳河漫口汎濫之水亦漸消落惟滄河漲發自匯入滹沱河以後水勢較盛至河間一帶之子牙河雖未泛及上游而下游青縣靜海等處間有被水之處現飭堵禦疏消並履勘是否成災情形得旨知道了有被水成災者妥為撫恤○又諭據李奏翰奏五月下旬及六月初間洪湖因上游黃淮並漲加以沁河發水匯注來源過盛清口宣洩不及現將信壩啟放情形一摺亦只可如此辦理已於摺內批示矣現今儀封漫口尚未堵築其漫下之水歸入淮河因致加漲而近日沁水又復匯注洪湖水勢原較往年為盛前據薩載奏稱如湖水再長即將山盱五壩酌開其一今既開放

信壩。俾資宣洩。自可漸次減退。但未知日來水勢。能否消落。開放三堡引河。並王營減壩。及啟信壩封土。是否足資宣洩。著傳諭李奉翰。即據實查明。迅速覆奏。以慰懸念。將此由五百里發往。並諭薩載知之。尋薩載李奉翰奏。洪澤湖內。山盱信壩放後。水勢仍接續加長。復將山盱智壩封土。啟放。湖水漸次平定。如將來上游不漲。則仁義禮三壩。無須再開。即高郵東岸南關車邏。五里等壩。亦毋庸開放。得旨好。覽奏稍慰。○又諭據三寶奏。浙江黃巖鎮總兵弓斯發稟稱。有寧波烏艚船。與閩船在一江山洋面地方角毆。致斃閩人多命一案。又蔡葵在臨海縣。呈控伊叔蔡普良。造有漁船出口。被寧波船斧劈棍毆。致斃一十六命一案。又把總顏得瓏。在洋面巡察。有外洋駛來船隻。載有婦女。前往查問。不意閩民聚集多人。夥同毆辱弁兵。把總顏得瓏。被割髮辮。兵丁受傷等情。此案同日亦據王亶

望奏到。海洋重地。奸徒膽敢聚搶毆劫。傷斃多命。甚至有不服盤查。聚眾毆傷弁兵之事。不法已極。此等重案。層見疊出。皆係地方文武。平時約束不嚴所致。三寶身任總督。統轄兩省文武。著傳諭該督。即速飭員。據實確查。將怠玩之文武員弁。嚴行叅處。以示懲儆。至毆搶抗官三案。俱在浙省地方。即著王亶望就近查拏各犯。嚴行究審。從重定擬。多辦數人。俾兇頑知儆。以靖海疆。而肅法紀。此旨由五百里發往。諭令三寶王亶望知之。○又諭據英廉奏查辦匿名揭帖一事。據番役稟稱。把總張士傑。已將投遞匿名揭帖文書之張亮拏獲。押赴正定等語。張士傑既將張亮拏獲。押赴正定。其過保定時。如楊景素尚未起身防汎。自必將該犯等。拘提到案究訊。現在曾否審有端倪。究出挾仇陷害情節。著楊景素。一面據實迅速覆奏。一面即派幹員。將張士傑。張亮解交刑部審訊。仍飭沿途隔別管

解。母任串供及有疎脫之事。將此由五百里發往。並諭英廉知之。昨諭張士傑。或為此事。今觀其能。拏此人。尚稱急公。不必苛求。英廉摺。並著鈔寄楊景素閱看。○丁丑。諭軍機大臣等。昨據三寶。王亶望奏。王環廳沿海地方。閩民聚集多人。毆辱弁兵一事。已有旨令王亶望。就近查拏各犯。嚴行究審矣。本日據署浙江提督林雲。及溫州鎮總兵孟兆熊。均奏此事。朕批閱兩人所奏。其敘情節。即有不同。如孟兆熊摺內稱。教場頭沿海地方。有小船搖載婦人。經巡哨營船查問。被閩民聚集。將官兵毆打。而林雲摺內。則稱係蟹犁船內。帶有婦女。不服盤詰。毆傷官兵等語。小船渡載近地婦女。尚屬沿海常有之事。然在浙江之地。與閩人何涉。若蟹犁船。則係外洋捕魚所用。並非尋常渡載船隻。如船中載有婦女。其形跡本屬可疑。或係藏匿海島之人。偷越海面。自應查禁。至兵丁巡查地方。盤詰乃其專

責。見有船載婦女。上前詰問。理所宜然。而閩民膽敢不服稽查。聚眾抗拒。毆辱弁兵。實屬目無法紀。不可不嚴切究治。以儆刁頑。若弁兵擅將婦女帶回。另有別項情節。以致鄉民不服。聚眾抗毆。是啟衅由於弁兵。而鄉民之罪。稍有可原。著傳諭王亶望。提集案犯。秉公嚴切查審。固不可徇弁兵。尤不可姑息鄉民。務得此案確情。即行按律定擬具奏。此旨由五百里發往。並諭三寶知之。林雲孟兆熊摺。並著鈔寄王亶望閱看。仍將審辦情形。迅速覆奏。○戊寅。諭向來刑部及各省監獄。凡在禁囚犯。有夜給燈油之例。甚屬無謂。此等身繫囹圄者。俱係犯法之人。罪由自取。如重囚給以衣食。因其爰書已定。必須明正典刑。不應復令其凍餒致斃。已屬國家法外之仁。至燈油一項。並非衣食可比。罪囚在獄。夜間本無需燈火。且小民常時入夕寢息。不留燈者居多。豈有犯罪繫獄。轉徹夜予以燈照。雖

矜恤亦不宜及此。並恐奸徒因有燈火或致放火以圖越獄。尤非慎重監獄之道。至獄官禁卒稽查監口。原可各自攜燈照看。並無藉獄囚之有燈也。著傳諭刑部堂官查明此項燈油因何給予。必係多年相沿陋例。如禁卒坐更看守。自應酌給燈油。至獄囚則斷不宜與以燈火。著即行妥議具奏。行知各省一體遵照。尋奏查例載凡在禁囚犯。日給食米一升。冬給絮衣一件。夜給燈油等語。溯自雍正

三年纂修黃冊。於此條下。即註有原條例字樣。是此條已屬相沿舊例。隨查臣部監獄房屋共十一處。每一處通連五間。懸設油燈三盞。禁卒四名。坐更看守。因同在一室。是以守犯禁役。即藉獄囚燈油照察。本無另給之項。原例只稱禁囚夜給燈油。轉致禁卒之照看。於不論本未妥協。應請於例內夜給燈油之上。添載看犯支更禁卒六字。通行直省督撫等。飭有獄衙門一體遵照。從之。又諭明歲

班禪額爾德尼入覲。在岱漢廟住宿數日。著派德保馳驛前往張家口。會同常青查看岱漢廟宇。如有應行修理之處。伊二人公同酌定具奏。軍機大臣等議覆。吉林將軍和隆武奏稱。伯都訥設立委署主事一員。專辦蒙古事件。至錢糧獄訟及旗民交涉諸務。俱歸戶司官員管理。近年流寓旗民。較從前增至數倍。微末之員。恐難彈壓。請將委署主事一缺。改為理事通判等語。查該處流民雖多。究

非土著。可比。轉移無常。日後民務減時。再將通判裁撤。未免紛更。請嗣後將伯都訥地方。凡蒙古旗民事件。均令該委署主事辦理。惟居民及錢糧稅務。令司員辦理。添設通判之處。毋庸議。從之。已卯。諭據刑部奏殺一家四命之兇犯余膺。擬以凌遲處死。其子余世聰。余世華。余世閏。余世榮。俱照新例擬以斬決。前降諭旨。將殺死一家多人之犯。加重定律者。原以此等兇惡之徒。將人全家殺害。實

戾氣所鍾。不應復留餘孽。且恐兇徒明知法止其身。或自拚一死。逞其殘忍。殺害過多。以絕人之嗣。其妻子仍得倖免。於情理實未允協。應改用重典。以期辟以止辟。今此案余膺殺害熊士順一家四命。而余膺及其子余世聰等。分別凌遲斬決者。共有五犯。擬抵之人。浮於所殺之數。亦覺稍過。所有余膺之子余世聰。余世華。余世閏。仍著照原擬斬決。其幼子余世榮。著從寬免死。同兇犯之妻丁氏。發往伊犁。給厄魯特為奴。並著刑部。嗣後如有殺一家四命以上之案。悉按其所殺人數。將兇犯父子。照數定罪。俾多寡相當。其有浮於所殺之數。或一人。或兩人者。均以其幼者照此辦理。並令內外各問刑衙門知之。著為例。

○軍機大臣等議准。烏魯木齊都統索諾木策凌奏。稱滿洲官兵。移駐吐魯番各事宜。一。哈喇和卓。迨東九百餘戶。羅布諾爾二百餘戶。令額敏和卓之子管束。吐魯番迨西七百

軍機處

奏

軍機處

奏

餘戶。令原有之伯克管束。雅木什所居七百餘戶。令原有之扎齊魯克齊等管束。其滋生之七百餘戶。令伊斯坦達爾管束。均歸領隊大臣總統。其戶口清冊。仍由烏魯木齊都統報部。以備查覈。一。闢展等處。可耕之田二萬一千畝。較回人田地俱遠。應即作為屯田。將修城之七百兵丁。分編七屯。令其耕種。一。管理吐魯番駐防滿兵領隊大臣印信。由部鑄給清字漢字。及回子三體字樣。其印信未至之前。仍暫用闢展辦事大臣印信。滿兵屯田及回人等應奏應行事件。均呈報烏魯木齊都統詳查會辦。一。闢展同知。應移駐吐魯番所屬地方。事。向由鎮西府詳道。但該府駐劄巴里坤。相隔數站。往來需時。應令徑呈該道。由道轉詳烏魯木齊都統。一。吐魯番滿兵駐防。有旗民交涉事件。應設理事通判一員。將現在同知。作為滿缺。兼管通判事。至稽查地方賊盜倉庫等事。另添巡檢一員。此缺行文

陝甘總督。若內地有應裁之缺。自行查辦。其同知。巡檢。關防圖記。由部鑄給。吐魯番滿兵五百名。分為八旗。二旗合一佐領。共四佐領。其佐領。防禦驍騎校。各四缺。令其督率兵丁操演。並添協領二員。彈壓。協領圖記。由部鑄給。吐魯番領隊大臣處。應定筆帖式缺。請將闕展辦事大臣處主事一員裁汰。祇留印務處筆帖式二員。至管臺筆帖式。均由該營兵丁內選用。其餘額外者請裁。陞轉年限。照烏魯木齊辦理。從之。庚辰。諭軍機大臣等。據荊州將軍興兆等奏。六月十四日。江水驟漲。漫過隄身。隨即登城查看。水勢甚大。向城東南直流。將月牙隄衝破。至護城隄。不能抵禦。水至城根。將城外居民住屋衝壞。居民並無傷損。即用土囊。將城門堵禦。漫水幸未進城。十六。十七兩日。水勢更大。至十九日。水勢稍退等語。荊州為楚省衝途。居民稠密。其地甚關緊要。現據興兆等所奏。江水長發。情

形。比往年較大。圖思德等。何以尚未奏到。想因荊州距省較遠。發摺稍遲。但此時該督撫諒已接據該地方官稟報。未知該處田廬民舍。有無傷損。沿隄人口。有無淹斃。著傳諭圖思德。速即親往。查明該處田畝。如有成災者。即行照例撫卹。農民如有失業者。即行照例給賑。務須董率各屬。盡心妥辦。俾災黎均霑實惠。毋致失所。又該處係滿洲兵駐劄之區。如營房等。或有因水衝壞者。即行勘估繕葺。毋任傾頽。至圖思德前曾奏請。陞見。當經批令。冬底來京。今既有應辦災務。如至冬間尚未辦竣。即至明歲開春。賑務竣後。再行起程進京。亦無不可。將此由六百里發往。並諭令興兆知之。○壬午。諭軍機大臣等。據阿桂等奏。袁守侗前往儀封下游一帶。查勘隄岸河身情形。一摺。據稱十六堡以下。已竣之工。均屬增培完整。其商虞曹儀等廳屬。俱加高如式。與舊隄一律坦平。惟與曹儀廳相連之四

門堂灘形窪下。應估鑲防風埽二百三十六丈。又商虞廳屬之虞城下汛地亦最窪。亦令於隄外估鑲防風埽二百九十丈。至下游一帶河底自豫東至江南交界地方逐路勘查。現在河身水深數尺。河面寬有八九丈至十數丈不等。實屬一律通順等語。覽奏稍慰。儀封下游一帶隄岸。袁守侗此次查勘極為詳晰周妥。所有查估應行鑲培之處均應照所奏辦理。至袁守侗查過各處情形業於回至

工次時向阿桂告知。阿桂自可無庸復往履勘。其南河各工亦經薩載等查勘籌辦。奏聞在案。亦無庸阿桂復往會查。現在王家莊引河已經挑成。只待秋汛一盛即可開放。阿桂於開放引河時看其果否掣動大溜暢注直下。歸入正河並看漫口處曾否掛淤。則大局已定。阿桂奉差之事即為告竣。其補還壩工堵築合龍事宜皆屬易辦。袁守侗力能為之。自可交其妥協辦理。阿桂即可起程。伊奉差

已經半年。自應先至行在復命候朕面詢一切。再行回程留京辦事。將此由六百里傳諭知之。如已開放引河著即由驛加緊具奏。○是月安徽巡撫閔鶚元奏上年鳳潁兩屬水旱交乘動撥常平倉米八萬餘石裕備倉麥十七萬餘石倉儲空乏應及時購買惟是災歉之後實與平時採買不同請於部價一兩之外每石連腳價增銀二錢此後不得援以為例得旨著照所請行該部知道○湖廣總

實錄卷千八十五

手

督覺羅圖思德湖北巡撫鄭大進奏江陵川水泛溢現在勘辦各情形得旨覽奏俱悉有成災者實力撫卹○河東河道總督袁守侗奏沁河北岸漫口歸入衛河衛河長水共深一丈七尺餘運河水勢不能抵禦以致衛水倒漾入運現將下河之哨馬營四女寺及上河之魏灣滾水閘壩全行開放仍恐臨清迤上一帶不無停淤隨飭確探妥辦務期一律通順以利漕運得旨此時何能疏濬耶當俟

回空過後查勘耳。○署陝甘總督陝西巡撫畢沅奏。據烏魯木齊都統索諾木策凌等咨稱。吐魯番現在建築滿城。應需工作兵五百名。當由嘉峪關各營調撥。又移駐種地兵丁七百名。當由內地調撥等語。查此項工作兵丁。到彼築城。若工竣後。仍令撤回原營。所需種地兵丁。又在內地另派。一切費用。未免糜費。請照從前派往烏魯木齊工作兵丁。事竣留屯種地例。即在附近嘉峪關之肅州鎮屬。

實錄卷一千八十五

三

派兵三百五十名。甘肅提標派兵一百五十名。共五百名。即日自各本營起程。於本年七月內。抵吐魯番工作。俟工竣後。即留屯耕種。毋庸撤回。至種地兵數。原議應需七百名。除築城兵丁五百名留屯外。尚應撥補二百名。查闕展向來派換兵丁。俱係在陝西提屬之興漢鎮派撥。應照舊辦理。於本年十月初旬起程。儘可不誤春耕。至管領員弁。每兵百名。派千把一員。外委一員。分領彈壓。並於肅州。

興漢鎮屬。分派都守二員統率。此項官兵。俱俟五年班滿另換。報聞。○四川總督文綬奏。兵丁奉調出征。敢棄伍潛逃。伏讀訓飭。愧悚無地。得旨。但知謝恩。於此等要務。不過曰愧悚無地。何益之有。

實錄卷一千八十五

三

大清高宗法天隆運至誠先覺體元立極敷文奮武孝慈神聖純皇帝實錄卷之一千八十五

大清高宗法天隆運至誠先覺體元立極敷文奮武孝慈神聖純皇帝實錄卷之一千八十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥秋七月癸未朔享

太廟遣誠親王弘暢恭代行禮○諭軍機大臣等據郝碩奏生員戴淑元赴縣稟稱有素不識認之安徽人王大蕃著人來家送與伊兄安徽學政戴第元之子修撰戴衢亨書一封并有奏疏一紙及寄程景伊之信呈繳當將該犯拏獲現在究審等語王大蕃赴戴第元家中投遞書信及妄誕奏疏伊弟戴淑元即行赴縣稟首其事即與戴淑元無涉無庸向其根究並不必令其聽候質訊致滋拖累至

該犯投遞戴第元家之書并欲寄程景伊之札伊兩人俱無由豫知戴第元處無可容查即程景伊在京亦并無可向其詢問及細閱該犯疏詞尚無悖逆之語而所稱貪官害民亦無指實看來該犯必係貧困無聊妄為此舉自不可不加以懲治著郝碩迅將該犯嚴加訊究即審無別項不法情事罪不至死而此等不安本分之徒亦斷不可留於內地自應發遣伊犁以昭儆戒將此由四百里傳諭

郝碩知之○以故四川中郭羅克押落寨土千戶麻克蘇爾哀布子索朗丹巴並陸翁土百戶拉衣呷子玉沙衣襲職○甲申安徽巡撫閔鶚元奏安省鳳陽潁泗等處民食重麥上年水旱成災動缺常平倉穀八萬餘石裕備倉麥十七萬餘石本年除亳州蒙城被水外均屬有收請通融買麥補足照部價每石一兩外連腳價增銀二錢合之以一麥抵二穀每穀二石准銷銀一兩二錢尚屬無浮得

旨允行。下部知之。○乙酉。諭。據姚成烈奏。守備甘維榮。外委張俊。於六月初十日黎明時分。至博白縣之雙鳳大石握地方。將李萬春父子拏獲。并據桂平縣叅令張健稟報。協同緝獲。飛押來省。聽候審辦等語。甘維榮等。追緝匪犯父子就獲。尚屬能事。自應查明實係親身獲犯之員。送部引見。至叅令張健。並未協緝。但夥犯柒傳榮。係張健拏獲。訊明李萬春父子蹤跡。始得就此一路追捕。其出力惟

此一節。止須照例辦理。毋庸送部。此時李世傑。自己到任。即著查明分別妥辦。○諭軍機大臣等。據楊景素奏。查審匿名揭帖。現在情形一摺。據張士傑供稱。將匿名揭帖。帶回正定。與掌房書辦吳允信面商。吳允信因包封係伊經手封發。恐有干礙。向其跪求。張士傑即於官廳後燒燬。至第二次匿名揭帖。係在承發房挨次發號。吳允信在旁。看見公文內有摺疊紅帖。即隨手奪去。交與張士傑閱看。

邀同進署面稟等語。兩次匿名揭帖。俱於公丈內插入。乃吳允信。先則跪求張士傑燒燬。繼見揭帖。徑行奪去。即給張士傑查閱。若豫知為逆詞者。此人形跡大有可疑。自應向其切實根究。務得正犯楊景素。此時諒應究有端倪矣。至陳大用。進呈原獲揭帖。業已銷燬。此案悉心研究。如果得匿名正犯。自有挾嫌銜怨情由。可以質證。不在查對筆跡也。將此由四百里諭令知之。○丙戌。諭曰。方體浴前

在淮關監督任內。有應賠短少稅銀五萬五千兩。尚未全完。雖係應行追賠之項。但淮關稅銀。實著伊齡阿任內。俱有比較短少之數。因查無情弊。曾降旨寬免。所有方體浴名下。未完稅銀二萬二千二百五十餘兩。著加恩豁免。○丁亥。軍機大臣等議覆陝甘總督勒爾謹奏稱。明歲班禪額爾德尼。來京覲祝。所過地方。平番以南。民房公館。可居量加修理。平番以北。俱係草地。須搭蓋帳房。就甘省現

有蒙古包兩分。輪替已足。其隨從喇嘛等所需帳房。於附近各營調用。馬駝等項。按營派撥。豫赴西寧待用。一應供支。照駐藏大臣咨覆辦理。應如所奏。不可草率遲誤。亦不得張大浮費。從之。○戊子。諭今日據文綬奏。請簡發知縣佐雜等官。以資差委。一摺。殊為不曉事體。向因各督撫有於行在奏請簡發試用人員者。屢經降旨申飭。並令嗣後如遇應需揀發人員。適當巡幸之時。或趕在啟蹕以前。

或待至回鑾以後。具摺奏請。節次所降諭旨甚明。文綬久任督撫。豈尚未知。現在川省亦無甚急需試用人員之事。乃於朕駐蹕熱河時。率為此奏。殊屬非是。文綬著傳旨申飭。其所請簡發各員。候朕回鑾時。簡派大臣揀選引見發往。至摺內所稱。除知府同知知州等。川省現尚缺少人多。仍請照前奏。暫停分發。其餘各項人員。應請照舊與各省一體掣簽。毋庸停止之處。著交該部議奏。尋奏川省距

京遙遠。部選赴任。及出差人員。來往動經數月。知縣佐雜委署需人較多。應如所請。通判以下正佐各項人員。均照舊分發。至知府同知知州俟補完後。該督再咨部辦理。從之。○己丑。諭軍機大臣等。據王亶望奏。福建釣船蔡葵。在一江山洋面。被寧波烏鰲船數十人口稱失物。搜賊毆殺一十六命。搶去錢文衣物。已將首夥各犯傳廷貴等五十三名全行拏獲。現在提省審擬。一摺。此案前據三寶奏

到。已有旨令王亶望就近審辦。今既據稱將首夥各犯全行拏獲。自應嚴審究擬。傳廷貴等敢於在洋面聚眾逞兇。毆斃多命。情罪甚為可惡。其搜賊起釁首犯。自應立正典刑。即幫同助毆者。俱應究明下手傷人之犯。如數擬抵。不可稍為稽緩。向來傷斃多人之案。例應一命一抵。此案撈獲浮屍已有八軀。與原告蔡葵所控毆殺十六命之數。尚未相合。且於洋面慘殺多命。更非尋常械鬥之案可比。

不得僅以助毆問擬為從致稽顯戮現今首夥各犯既已全獲務須研訊起釁確情并嚴鞠其毆斃實係若干人按數抵償無論應斬應絞俱應立決仍將首犯傳首該處示衆庶沿海兇徒稍知儆畏著傳諭王亶望即速遵照辦理仍將審擬緣由即行速奏此旨由五百里發往并諭三寶知之○庚寅諭原任蘇州府知府楊燦前在常州府任內因審轉命案失入部議降一級調用照例送部引見失

入處分較失出為重昔宋仁宗於吏部選人一坐失入死罪終身不遷所以重民命也此等部議降調實屬罪所應得若與尋常公過概從寬貸無以示懲但前據薩載楊燾奏稱楊燾在江十有餘載頗著能聲風土人情尤所熟悉倘蒙錄用懇請仍發來江差遣等語楊燾著發往江蘇以同知用非奉特旨該督等不得將伊題陞知府○又諭據李侍堯奏巡撫裴宗錫自本年四五月以來脾胃失調

飲食減少六月以後形神疲憊日甚實有不能支持之勢現將撫篆接收暫行兼辦可否令其解任調理等語裴宗錫在巡撫中尚屬實心辦事之人今既患病較重著暫行解任調理俾安心攝養以冀就痊並令該撫自行酌量如在滇延醫調治可以痊安即俟病愈時仍令接印任事若在彼水土不甚相宜即著緩程來京調理痊愈再行錄用其雲南巡撫事務著孫士毅暫行署理○諭軍機大臣

等據李侍堯奏裴宗錫病勢沉重已降旨准其解任調理所有巡撫印務因孫士毅尚有良心辦事亦屬結實即令暫署撫篆至布政使員缺亦屬緊要按察使汪圻向有蘇州習氣看來不如孫士毅之誠樸於藩司事務似不甚相宜著傳諭李侍堯即察看汪圻如尚可接署藩篆即委令署理如屬不宜即於通省道員內揀選一員奏明署理將此由五百里傳諭知之○辛卯諭曰李侍堯奏雲南巡

撫裴宗錫病勢沉重。醫治不痊。於六月二十三日身故等語。裴宗錫簡用巡撫以來。辦事實心足資倚任。昨據李侍堯奏伊患病情形。降旨令其解任。安心調理。以冀速痊。今聞溘逝。殊堪軫惜。所有應得卹典。著該部察例具奏。○壬辰

孝懿仁皇后忌辰遣官祭

景陵。諭軍機大臣等。據奏本日接准欽差大學士公阿桂咨稱。六月二十八日接到二十

四日由行在發回報匣一個。鎖門銅片俱已脫落。匣蓋口門木板亦有傷損。又同日所發河南巡撫陳輝祖廷寄。外封亦有拆露痕跡。並取有樂城縣接收上站破損印結一張。自係樂城以北各站損壞。現在咨查直省等語。並將報匣繳回。朕詳細閱看。其口門銅片均已脫落。竟係撬開。並非跌破。且所發陳輝祖外封亦有拆痕。中途顯有私拆偷看情弊。郵遞報匣印封最關緊要。豈容沿途拆開。私行

竊看。著傳諭楊景素。即派委明幹大員。於樂城以北逐站嚴行挨查。務得確情。據實奏明治罪。並將該管官嚴叅。毋得顛預了事。所有破損報匣。並著發交楊景素閱看。將此由五百里傳諭知之。尋奏查行在發回報匣。南石槽把總楊合天。接到並不親遞。差兵中途墜馬。磕損遞至德勝門。懇求把總陳明諱匿。不報至河南廷寄包封。望都縣馬夫因雨跌地。擦損遞至樂城書吏恐內件脫出。將外層拆

開。換紙加封。稟明該縣出具上站破損印結。轉遞嚴訊。並無私拆竊看等情。請將把總楊合天。陳明發往黑龍江等處當差。稽查臺站之守備革職。餘分別杖徒。得旨。下部議。○以編修嚴福為河南鄉試正考官。御史戈源為副考官。內閣學士胡高望為山東鄉試正考官。編修劉種之為副考官。編修潘曾起為山西鄉試正考官。刑部主事劉斌為副考官。○賑卹山西綏遠城渾津莊頭雹災戶口。並蠲

免本年額賦。○癸巳兩江總督薩載署江南河道總督李奉翰奏江南外河廳屬清口東西壩為全河關鍵乾隆四十一年督臣高晉請將西壩基址移下一百六十丈俾清水出口下注有力惟西壩迤外舊黃河內存有清水內外相連湖水出口至此散漫少力上年復蒙指示於西壩迤下接築束水隄一道俾清水直注歸海但查清口外河面寬濶當水勢浩瀚時隄工頗為受險每年鑲埽所費不貲而清口壩外至陶莊新河尾清黃交匯處河身寬長湖水至此力亦紆緩應請將東西壩再移下二百九十丈於惠濟祠前建築則束水隄不致受險湖水亦出口益暢抵黃更必得力擬於收束壩工時乘機移建將壩基兩頭各放長三四十丈如鐵心壩式兩邊鑲埽中心填土俾得經久中間用料接築較之全用柴料亦多節省得旨細覽繪圖正合形勢自當乘時為之○甲午諭軍機大臣曰楊

景素奏審擬正定匿名揭帖一案業經審得正犯頗為能事據稱緣錢榮祿閭之謙俱係正定鎮已革書識總兵陳大用到任後屢圖復充該鎮俱未允准遂商謀設計陷害該鎮去官又恐發覺敗露因將平日所知之山西富戶任天祥等捏稱均係邪教逆黨并稱該鎮可以合夥即封為王寫作匿名揭帖囑令書識王貫一裝入公文投遞以圖奏辦等語現飭三法司覈擬速奏至總兵陳大用不准革役復充尚屬持正及錢榮祿等兩次稟懇均不批准所辦甚是其於把總張士傑燒燬逆詞各情節該鎮未能立時查究咎止失察不過罰俸處分已交兵部照例覈議矣但思各省文武衙門革役復充之事在所不免於辦理公務甚有關係著傳諭各省督撫即通飭文武各屬衙門如有革退書吏兵役營求復充者俱不得稍有瞻徇濫准復充致滋弊竇將此遇便傳諭各督撫並諭楊景素知之

○又諭昨據薩載等奏。審擬天長縣逆犯程樹榴一案。已批交三法司覈擬速奏矣。摺內將故縱大逆之天長縣知縣高見龍。僅擬發往軍臺之處。甚屬非是。高見龍於王廷贊首稟程樹榴詩序時。既知序內有怨

天之語。並不通稟覈辦。輒自赴學宮。將板劈燬。希冀隱匿了事。及王廷贊將詩本黏發續控。高見龍知事不可掩。始將程樹榴父子拏解。此非有心消弭。故縱大逆而何。已有旨令部

改議。此案較之去歲陶易辦理徐述夔逆詞一案。尤為有心。薩載豈尚不知乃審擬此案時。於高見龍並不援引正律。輒擬以軍臺効力。從輕完結。是誠何心。薩載初任總督。即敢於徇庇屬員。姑息輕縱。若此。實非朕意想所及。大負委任之恩。使高晉尚在。斷不至此。薩載大不是。著傳旨嚴行申飭。並著該督迅速明白回奏。尋奏前審擬摺內。以高見龍續經通稟。帶犯赴省審辦。是以僅擬革職發往軍

臺。實屬輕縱。罪無可逭。得旨。汝自問當何罪。

不過革職留任乎。○乙未。實授孫士毅。為雲南巡撫。以甘肅寧夏道福明安。為雲南布政使。○丙申。諭軍機大臣曰。特成額等奏酌定金川新疆屯防經費奏銷章程一摺。據稱節年撥解新疆支給官兵夫役番屯人等鹽菜月費工價及辦運籽種牛具口糧腳價等項。共撥用銀五十一萬四千五百餘兩。並請於軍需實存項下。再撥銀十八萬八千四百五十餘兩。另存備用。連前共撥銀七十萬兩。統歸屯防案內報銷等語。金州新設屯防以來。僅閱三載。何以撥用銀款。至七十萬兩之多。殊不可解。況從前移駐屯兵。原就彼處舊有之房屋糧食。並非事事俱由創始。即或房屋畧需添葺及修建廟宇。所費亦屬有限。不致數逾鉅萬。至籽種牛具口糧月費等項。支給本自無多。況官兵既經屯種。亦有所得糧食。可以湊給。而番人屯種自耕自食。更毋庸濫

給口糧何至糜費若此且新疆設立營汛係經久之計若每年動用至十餘萬則是平定金川竟成永增多費實屬不成事體著傳諭特成額文綬等即行詳悉確查將支給過銀數分款開列清單即行呈覽究當每歲多增用若干迅速具奏此旨由六百里諭令知之

○丁酉中元節遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭

孝賢皇后陵。

端慧皇太子園寢。○諭軍機大臣等據李侍

堯奏盤獲安南竄回內地夷民田老刀等三起大小十八名現在解省嚴鞫並稱安南一有匪徒擾累等事即詳悉咨報請於沿邊防範凡從該國逸出之犯自應概為查拏不容稍有疎漏訊係內地民人按其情罪從重究擬如係該國匪徒即應照例發還聽其處治等語所辦甚是已於摺內批示矣但該督尚有思計未到之處雲南開化地方雖與安南接壤究非若廣西邊境係安南交界正路今

黃文桐既叛安南必有黨羽四布若雲南獲有安南匪犯即從開化發回或黃文桐之黨假裝安南土目接收轉墮奸人詭計不可不慮雖滇省至粵西道路稍紆應將該國匪徒於審明後派委妥幹員弁沿途小心管押解至廣西令該撫一面咨明該國王一面派委大員押至安南交界地方俟該國王具咨派員到邊接收再行詢問明確將該國匪徒交其領回方為妥善著傳諭李侍堯遵照辦理

並諭桂林李世傑一體遵辦。○又諭曰。舒常奏。普安縣民任高。楊春等挈眷移居萬福廠。被署縣嚴大為差役追回。行抵水城廳屬高家渡上船。溺斃一十二命。請將嚴大為革審等語。已批交該部矣。挈眷遷居。乃民間常有之事。並非有干例禁。任高等移居萬福廠。該縣何遽行差役拘追。以致全家被溺。傷斃多命。殊屬不成事體。或差役勒索不遂。拘累多人。或該署縣縱役擾民。藉以漁利。俱未可定。即使無別項情弊。而以無辜被繫。致斃多命。亦豈宜令其含冤莫白。不可不徹底根究。著傳諭舒常。即將嚴大為革職。並提同案內差役鄉約等犯。隔別嚴審。務得實情。分別定擬。迅速由驛覆奏。將此由五百里傳諭知之。○大學士管閩浙總督三寶。福州將軍覺羅永德議奏。閩海關稅務。向係將軍派親信人分管。責成既專。請照舊辦理。無庸另派駐防之協領佐領監收。其兌銀管櫃。即令在關書吏

兼辦。亦不必更派防禦驍騎校等員。共裁公費銀二千四十八兩。仍歸盈餘項下報解。至各口岸驗貨查船。需經理人六十一名。及巡攔當差兵役。均不可少。應請仍舊報聞。○三寶又奏。明春恭逢

南巡盛典。一切扈從人員。及官兵乘騎。需馬甚多。浙省滿營。裁存馬止有六百。不敷撥用。查閩省綠旗各營。現領價出口。買補缺額馬八百七十餘匹。回閩經浙。請截留應用。差竣趕

赴原營。得旨嘉獎。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十六

實錄卷一千八百

十九

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣黃誥內大臣戶部尚書鎮遠侯滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥七月戊戌諭軍機大臣

等據阿那布奏湖北頭二幫漕船於七月初  
三初十等日俱經催過津關其後接之湖北  
三幫湖南三幫江西十三幫各船尚未跟接  
報入直境等語各省漕船例應銜尾而進方  
得依限抵通如該巡漕御史所奏則直隸山  
東一帶江廣各幫已有脫幫之處昨據鄂寶  
等奏通漕尾幫於七月初一日已全數催入  
山東臺莊開河鄂寶督催北上並稱本年運  
河水勢深通凡向來古淺處所俱克通行無

阻等語是江廣重運俱比往年較為迅速。因何復有脫幫之事。且八月中旬方得全行抵通。今鄂寶親在尾幫督運。沿途呼應較靈。務飭各運幫員弁。並飭知經過地方官。竭力趲催。連艘遞進。勿任稽緩。至鄂寶欲於督運之便。至行在陛見。不過照例覲謁。並無緊要事宜。必須面諭之處。鄂寶竟不必前來。止須督趲各幫船迅速抵通。并即催押回空。毋誤冬兌。庶為克盡職守耳。將此由五百里傳諭知

之。○戶部奏原任雲南黑鹽井提舉吳璉緣事革職。呈請捐復。并據聲明任內虧缺薪本銀四千六百餘兩。照舊例數在三百兩以上。定有年限。捐復後依限完繳等情。臣等酌議捐復人員。如有欠項數至千兩及數千兩以上。例應分限完繳者。嗣後請俟交過十分之六。方准捐復。不得恃有限內捐復之例。置官項為緩圖。從之。○已亥諭刑部等覈議程樹榴為王沅作詩序語多狂悖一摺。因其序語

歸怨於

天憤懣牢騷毫無敬畏。擬以凌遲尚未得其獲罪實情。非但無以服該犯之心。且恐無識之徒妄議怨

天從無加罪者。今因此而律以大逆。轉似文網太密。况怨

天之人雖屬昧良悖理。然不能保其必無。即如孔子稱不怨天。亦必因當時有怨

天之人。始為此語。三代之時且然。何況後世。今

據此以定爰書。實未為允。前據王建贊原呈簽出程樹榴序內造物者之心愈老而愈辣。二句駁之云。天有何老少。必因近日王錫侯徐述夔二案。借造物以為比擬。忍心害理。莫此為甚等語。若以此詰之程樹榴。亦必不能遁飾。該犯膽敢掉弄筆端。隱喻訕謗。律以大逆。並不為枉。但念其究未詆斥本朝。及得罪於

列祖

列宗尚不至如徐述夔之甚。程樹榴著從寬改。為斬立決。該犯既從寬減。所有故縱之知縣高見龍。及緣坐之伊子程煥。俱著從寬改為應斬監候。秋後處決。餘依議。並將此通諭中外知之。○諭軍機大臣等。據英廉奏。拏獲開場聚賭之李三等十四犯。訊係通政使張若淳轎夫呂三。賃屋開賭。已將現獲各犯。交刑部訊究。並將在逃之呂三。嚴緝務獲等語。著交刑部審辦。開場聚賭。久經例禁。呂三膽敢

租房開賭。甚為不法。自應於緝獲日。按律懲治。至呂三係張若淳轎夫頭目。其在外租房。開場賭博。如張若淳知情縱容。則張若淳之處分。即應從重辦理。如並非知情。其咎止於失察。自可照例議處。著傳諭刑部堂官。秉公訊明。奏聞辦理。毋得稍涉瞻徇。○庚子。諭軍機大臣等。據李湖奏。武陵縣生員鄧大廷。呈繳前任湖廣提督俞益謨。刊刻青銅自考一書。請銷燬查辦一摺。閱其書。係俞益謨將伊

歷任奏疏。及文移書啟。彙集而成。並無違礙。即該撫發出處所。亦止擡頭款式未合。及字句偶失檢點。此等乃常有之事。不足深責。況俞益謨本係武弁。原不能通曉文義。其所刻書籍。大抵皆庸幕及字識輩。纂緝成帙。又豈能諳習體例。且刻出距今七十餘年。其人物故已久。何必復行追究乎。但原書既經繳出。自應銷燬。亦不必輟轉深求。致滋紛擾。著傳諭李湖。不必查辦。○工部等部議覆。協辦大

學士前署直隸總督英廉奏。稱北運河東岸吳家壩新建草壩。界在香河主簿。要兒渡縣丞。兩汛間。查主簿原管隄工七千九百餘丈。縣丞原管五千二百餘丈。多少本屬未均。再主簿所管隄內。有王家務石壩一。水漲時。壩南隄岸。難於飛越巡防。請移主簿汛於草壩北。將石壩及草壩南隄工九十丈。就近歸縣丞經管。再草壩外。新築南隄七百丈。北隄六百六十丈。每年培築需兵。縣丞汛舊設兵三

十五名。不敷差遣。請撥通州州同。州判。二汛內各戰兵一守兵四。河兵五。并王家務千總汛內額外委一。歸入該汛協助修防。均應如所請。從之。○辛丑。諭曰。薩載。閔鶚元。奏查勘災地情形一摺。據稱亳州渦河以北逼近武家河之宋家集等處三十保。直接豫省。受水既早。夏麥悉被淹浸。秋禾亦難望補插。其蒙城迤北之淝河兩岸。板橋等集二十六保。亦同時受水。夏麥秋禾均無收穫。請再行酌

借一月口糧。於司庫正項內折銀放給。俟明歲麥熟後。分作兩年帶徵等語。前因亳州蒙城一帶。為豫省下游。黃水漫注。被淹較重。屢經降旨。加恩撫卹。並賞給川米一萬二千石。以資口食。但儀封漫口。至今尚未堵合。秋禾業已無收。貧民必倍形拮据。情尤可憫。著再加恩將亳州被災最重之宋家等集三十保。蒙城被災最重之板橋等集二十六保。被水貧民。照夏災之例。於八月內再賞給一月口

糧。以資接濟。該督撫即督率各屬實力妥辦。務使窮黎均霑實惠。毋任吏胥侵漁中飽。副朕軫恤災氓有加無已之至意。該部即遵諭行。○諭軍機大臣等。亳州蒙城二處被水情形較重。已特降諭旨。將所請折放一月口糧。即行賞給矣。儀封漫口。一日不堵。潁水田禾。一日不能耕種。今亳州蒙城之渦淝二河。因豫省下注之水過多。附近村莊民田俱被淹浸。鄰境下游且然。則豫省儀考以下。潁河地

方。被水自必更重。今年四月中。據阿桂等奏查勘被水州縣內。儀封考城商邱為最重。次即寧陵睢州柘城。如五月間即得合龍。則高阜之區。秋禾仍可收穫。若合龍稍稽。大汛一臨。不但低地愈淹。即已經涸出之高地。或亦不免衝漫。請先借給兩月口糧。并酌借籽種。以資接濟。統俟秋徵之前。再將實在情形查明。分別具奏等語。已如所議行矣。今已七月中旬。漫工尚未堵合。且沁水曾經漲發。其滙

河以後漫注倍多。所有被水地方之高阜田禾有無方礙大局已定。不必更待秋徵之時。著阿桂等迅即查明。據實速奏。候朕酌量降旨。以蘇民困。至河南通省。除被水州縣外。其餘各屬秋成分數及糧價民食較去歲情形若何。並著陳輝祖妥速確查。即行覈實覆奏。以慰軫念。至王家莊引河業已挑成。前據阿桂等奏。必俟秋汎大至方可開放。自屬持重之見。只可聽伊等審度形勢。妥為籌辦。是以

久未咨詢。而朕懷實未能一刻少釋。今過處暑已將旬日。轉瞬即屆白露。過此以往。水勢漸弱。其汎水未必能更甚於三伏初秋。則開放引河當在何日。再無因今年汎水不大。聽漬水漫流。復待至明年夏秋方為引溜之理。阿桂等自前次奏報後。今已經旬。尚未見續奏。正不知該處現在情形若何。朕心甚為焦急。萬一汎水竟不大長。引河開放無期。豈可守株待日。不急思所變計乎。或就現有壩工

照前此諭商之處。酌量妥速築堵。或當將壩工再行移上。抑或圍過決口。稍為移下。並著阿桂等通盤覈計。務出萬全。俾得迅速集事。阿桂平日尚屬有主見之人。必能深體朕意。實心董辦也。至前諭阿桂於開放引河後。看其如果掣動大溜。暢流直注而漫口漸已挂淤。阿桂即可起身前赴熱河行在。見朕後。再回京辦事。此旨到彼。已及七月下旬。若引河業經放妥。漫口挂淤。則補完壩工尚非難事。

阿桂自可仍遵前旨至熱河。然恐在遠行程未必能速。計到此。極早亦只在萬壽前一兩日。原不必以趨赴行在為急。若引河至今尚未開放。堵築之事必須改圖。則係阿桂素守伺陳輝祖三人專責。而阿桂董司其事。尤不可輕離工次。務須悉心籌度。商擇萬妥之計。迅速堵合。以副朕懷。更不可因有前旨。急於趨赴熱河。轉置要工於不顧。想阿桂亦必不如此拘泥也。將此由六百里加緊傳諭知之。

仍著迅速覆奏。○旌表守正被戕山東利津縣民李士超女李氏。○壬寅諭曰。熊學鵬平日辦事尚屬認真。其在廣西巡撫任內。審擬秦廷基一案。定罪後不行監禁。致該犯乘間自縊。實屬袒徇。罪無可辭。念其係上司總轄。不至如廣德黃邦寧敢於欺蔽舞弊。是以僅降旨革職。令往四川辦理軍需報銷。効力贖罪。茲報銷事竣。數年來亦頗知出力。因令回京候旨。但現在患病。著加恩賞給三品職銜。

回籍調理。俟痊愈後再行來京候旨。○諭軍機大臣等。據戶部議。滇省承運銅觔每多逾限。請交該督撫設法調劑一摺。已依議行矣。又據夾片奏稱。京局本年實存現收共銅二百六十萬餘觔。以每月鑄銅三十餘萬觔。覈算計可鑄至明年二月。又有四十二年三運及加運三起一并計算。又可敷至六月。至六月以後之鑄務。便覺棘手。請勅交該督撫詳悉籌畫。另行具奏等語。京局鼓鑄最關緊要。

自應按限開行。銜尾續至方無貽誤。所有乾隆四十三年頭運兩起京銅。照大學士公阿桂等奏展之限。應於上年十月起運。何以該督等摺內稱。現今尚未開行。逾限已將十月。遲延殊甚。倘至明年六月以前。此項銅觔未能抵京。局中無銅鼓鑄。尚復成何事體。李侍堯曾任戶部堂官。孫士毅亦由戶部司員出身。銅務素所熟悉。若不悉心籌畫。致誤鼓鑄。恐伊等不能當其咎也。著傳諭李侍堯等速

將上年頭運兩起京銅。即設法上緊趲運。務於明年五月內抵京供鑄。不得仍照尋常期限。致誤鑄務。至沿途加緊催趲之處。另降諭旨。傳知銅船經行之各督撫。一并實力督催。勿稍稽緩。若此項銅觔稍違所諭之期。致誤鑄務。惟李侍堯等是問。將此由六百里諭令知之。仍將如何籌畫趲辦。及何日開行之處。迅速由驛覆奏。戶部奏片並發寄閱看。○又諭據戶部奏滇省解運京銅。節年遲誤。所有

乾隆四十三年頭運兩起。應於上年十月開幫者。至今未報開行。實屬遲緩。此項銅觔急需供鑄。不便稽延。已傳諭李侍堯等。設法上緊趲運。令其於明年五月內抵京。非向年運銅期限可比。著傳諭銅船經過之各省督撫。即行豫飭各屬。如此項滇銅到境。即上緊設法。或添雇小船剝載。或多備障夫輓送。晝夜嚴催銜尾前進。務於明年五月以前全數到局。毋得視為泛常。解運倘有稽延。惟遲誤之

該省督撫是問。將此由六百里傳諭各督撫知之。○又諭滇省承運銅觔遲誤各員。非尋常稽延解運可比。雖據該督等將運員景椿雷鼎浩奏革職。但滇省解運京銅。該委員等幾視為畏途。若遲誤限期。僅予革職。劣員等或拚棄一官。圖免重累。轉得脫身事外。而將來仍可冀倖捐復。殊不足以示儆。著傳諭戶部堂官。將此項誤運劣員。另行定議具奏。於革職之外。擬以發往新疆効力。庶將來承

辦之員。知所做戒。不敢貽誤。並諭令李侍堯等知之。○又諭據特成額等奏。裏塘土司丹津衮布稟稱。所屬熱寨地方之麻塘寺。於五月十五日半夜有膽對夾壩二百餘人。到寺焚劫殿宇住房。及佛像經典衣服器皿等物。並殺死喇嘛二名。裏去一名。隨即散去。現飭道協等帶領弁兵查辦等語。膽對番人向來慣放夾壩。今兩金川甫經勦平。該番人理應知所做畏。乃敢糾集多犯。至裏塘地方。乘夜

焚劫。肆行殺掠。不法已極。不可不嚴行懲創。著傳諭特成額等。即嚴飭膽對土司。速將此案賊賊全行拏獻。如敢遷延庇匿。不即獻出。則是該土司自取重戾。後悔無及。並派委明幹大員。設法嚴緝。務將該賊番首夥。全數擒獲。審明從重定擬。毋得顛預了事。仍將如何查辦之處。先行迅速覆奏。將此由六百里傳諭知之。○癸卯。諭據薩載等奏。江寧布政使孔傳炯精力衰憊。該司員缺緊要。未便因循

貽誤等語。孔傳炯著以原品休致。所遺江寧布政使員缺。著劉燾補授。○諭軍機大臣等。據薩載奏。洪澤湖內。現已陸續消水一尺四寸。外河山安海防一帶。已消水二尺餘寸。淮揚運河歸江之路。亦甚暢達。各工保護平穩等語。外河海防等處。水勢消落。自係暢流歸海所致。昨據楊景素奏。天津一帶。因海河白露以前。不能受水。以致上游大清河。子牙河。亦難迅速宣洩。漫溢稍多等語。海河不能受水。此語久聞之。但海為衆水所歸。今何以在江南則甫交秋汛。水勢頓消。而在直隸則白露以前。不能受水。其故殊不可解。著傳諭楊景素。即速詳悉查明覆奏。將此由四百里諭令知之。尋奏。天津海河。萬派會流。清渾並注。伏秋水勢浩瀚。是以下瀉不及。向來每謂白露以前。不能受水。臣前任天津府知府時。親往海門查勘。夏秋海氣上蒸。宣洩甚艱。白露後。其氣漸斂。始得暢流歸海。就臣臆度。大概

與浙省秋潮。較他省獨盛者相似。故江南直隸形勢不同。報聞。○甲辰。諭盛京吉林均係國家根本之地。境壤毗連。盛京旗人。潛往吉林種地謀生。本無關礙。並非逃旗可比。從前弘昫奏。請解回治罪之處。所辦原屬過當。伊等皆滿洲世僕。盛京吉林。有何區別。其正身旗人六戶。即著入於吉林當差。無庸解回盛京辦理。○戶部奏。滇省運解四十二年三運二起。加運三起。銅船在途遲滯。請並飭沿途督撫。設法嚴催。諭軍機大臣等。此項銅船。著交沿途各督撫。嚴飭地方文武員弁。上緊設法催趲。並遴派幹員。於交界地面。協同運官。接遞趕運。所有三運二起。加運一起。銅船務於今年九月十月運抵通州。其加運二起。銅船亦著上緊嚴催。務於今冬運至天津。來歲春融抵通。陸續交局。倘有稽延。惟遲誤之該督撫是問。仍即各具摺速奏。○又諭。據伊勒圖奏。明年班禪額爾德尼來時。土爾扈特汗

策凌納木扎勒等情願自備資斧前來朝賀等語著傳諭車布登扎布明山等如杜爾伯特烏梁海等亦願抒誠朝賀著照土爾扈特自貝勒以上前來且其游牧距熱河甚近俱著自備資斧不必官為辦理○以河南南汝光道浦霖為陝西按察使○乙巳諭據王亶望等奏請裁浙省商籍學額一摺雖應交部議但思浙省商籍與長蘆山東情形不同該省人文本盛應試人多本地之人借商籍登進者十居七八其中人才輩出頗有用至大僚者是浙省商籍即仁錢士子進身之一途朕所素知若一旦全行裁汰名為嚴覈商籍童生實則暗減杭城學額寒畯不免有向隅之歎況商籍之所以清釐者原因該省地方官或私令子弟至親冒名入籍以冀倖進實為積弊不可不嚴查究治此外如實係冒濫者有犯必懲其餘則不必因噎廢食豫申屬禁朕從不為已甚之事何必獨於此加嚴以

抑士氣乎且浙省商籍學額相沿已久向亦未聞其有弊竟可毋事更張朕以為浙省商籍學額竟可仍舊辦理但令該撫等隨時查察勿使有倖濫等弊足矣著九卿一併議奏以為何如○又諭曰薩載奏廣西桂林府通判歐陽鑰護送安南國貢使自京回國先據該員在蕪湖稟稱貢使船戶夾帶私鹽經蕪湖道委驗屬虛該員即懇請免查完案嗣又會同守備積廣具稟稱販私被獲曾經畫供存據私鹽傾入江中及接據積廣清字稟帖查前稟係歐陽鑰捏名聯銜并據司道等詰訊船戶係該委員挾折價不遂之嫌捏詞混稟請旨革審等語歐陽鑰著革職沿途截拏押解江寧交與薩載提集案內犯證嚴審定擬具奏積廣亦著解任赴江質訊○諭軍機大臣等據王亶望等奏請裁汰商籍學額已批交該部矣繼看伊等另摺呈請於來春南巡時特降恩綸將裁去商籍五十名之額

即在於杭府。仁錢三學酌廣額數。以為定例等語。雖屬調劑之見。但浙省商籍。即仁錢士子進身之一途。與長蘆山東由別省寄籍者迥異。若全行裁汰。則寒畯少一登進之階。即或於明歲加恩廣額。是旋裁旋復。幾同朝三暮四之權術。朕所不屑為也。況今距南巡時。尚有半載。士子不知將來廣額之恩。止知現在減額之事。能保無寒畯向隅。生心歛望乎。若該撫等早露消息。是市恩也。且江浙事同

一例。南巡降旨。必不能厚此而薄彼。亦復難以措詞。若因浙江而并廣江南。又屬不成事體。是以特降諭旨。欲將浙省商籍學額照舊辦理。較伊等所請不動聲色。尤為妥善。將此諭令三寶等知之。所請加恩另摺。仍著發還。○又諭據薩載奏。廣西桂林府通判歐陽鑰。已降旨革職拏問矣。歐陽鑰護送貢使。由水路而回。行程未能迅速。此時想尚在中途。著傳諭經過各省督撫。沿途查探。歐陽鑰行

至何處。即將其拏問。派員解赴江南審訊。另派妥員接護安南貢使前行。其守備積廣。雖無不合。亦須到案質訊。亦令解任。前往質證。諭其毋庸畏懼。沿途即令其會同解員。小心管押。歐陽鑰前赴江寧。毋致疎虞。將此由五百里傳諭各督撫知之。○丙午。諭軍機大臣曰。薩載奏審擬鳳陽縣民人張萬青在步軍統領衙門呈控。戶書韓載揚等侵蝕賑濟銀兩一摺。已批交該部議奏矣。至摺內該督僅

將該署縣附叅。其賑項議令照數賠補。不足蔽辜。著傳諭薩載飭令沈寧仁。照未報扣除銀米之數。加十倍罰賠。並將該員即行革職。以示儆戒。至薩載從前辦事。尚屬認真。是以授為兩江總督。乃莅任未幾。於審辦天長縣知縣高見龍故縱逆犯程樹榴一案。即意存姑息。並不按律問擬。已屬舛誤。當經勅部改擬傳旨嚴飭。今此案又將署令沈寧仁。僅以附叅議賠了事。尤屬大謬。看來薩載自為總

督專以沽名為事深負朕委任之恩伊從前若如此好名干譽豈肯畀以兩江重寄耶薩載著傳旨嚴行申飭將此由五百里傳諭知之○丁未

上御卷阿勝境賜扈從王公大臣蒙古王公台吉等食○蠲免安徽鳳陽當塗臨淮定遠盱眙全椒等縣乾隆四十三年分水旱成災學田八十五頃四十三畝有奇額賦○旌表守正捐軀安徽宿州民林懷玉妻張氏○戊申

上御卷阿勝境賜扈從王公大臣蒙古王公台吉等食○諭所有四庫全書欠課分校各員其記過三次者固應交部察議即記過一二次者亦已欠交字數至一二十萬此等非校閱書籍錯誤可比若亦免其積算則此次彙奏後轉得以不及三次倖免處分必至漸生懈怠非所以嚴課程著將記過一二次各員交該處存記於下次彙奏時一并積算每次俱照此辦理○又諭明歲班禪額爾德尼入

覲據哲哩木盟長齊默特多爾濟等奏稱情願幫馬二千匹駝二百隻再喀爾喀四部落亦情願幫助馬駝等語蓋因班禪額爾德尼不由伊等境內行走各願出其馬駝稍申敬意俱屬可行即欲叩見班禪額爾德尼亦足見伊等敬奉之意著交該院通行班禪額爾德尼自西藏前來經由之鄰近盟長以及內外扎薩克等於班禪額爾德尼來時有各申敬意情願幫助馬駝者均聽其便○諭軍機

大臣等據楊景素奏永定河水勢自入伏以來長水自三尺九寸暨二尺餘不等連底水均未至六尺未幾旋即消落現在底水僅深二尺七寸并二尺三寸不等大溜均由中泓行走等語永定河水勢消落各工自可無虞但永定河即桑乾河發源山西今歲伏秋大汛僅止長水三尺有餘自係上游雨水短少所致前據富綱奏稱陝西各屬六月下旬盼澤甚殷該省與陝西境壤毗連巴延三自七

月初奏報雨澤以來未據續奏現在有無望雨之處及秋禾情形如何著傳諭巴延三即行查明迅速覆奏將此由五百里諭令知之尋奏山西通省入秋以來甘澍應時並無需雨之處秋禾雜糧不日可獲至朔平府係桑乾河發源臣前赴該處閱兵亦見雨水霑足得旨欣慰覽之○戶部議覆山東巡撫國泰奏稱博興縣上年二麥失收市穀每石價一兩六錢二分民苦食貴所有乾隆四十三年

平糶倉穀一千六百餘石請照時價每石減銀四錢二分覈銷查平糶原以便民第減價過多難保官吏無糶多報少及因戶串買等弊向例即遇時價一兩三錢至一兩五六錢以上者亦不得減過三錢如果再須酌減亦當奏聞請旨請勅各直省遵辦該縣少糶價銀著追報部從之○已酉諭軍機大臣等據阿桂等奏本月二十日得雨至二十二日早方晴河水漸有增長之勢擬再停一二日即

可開放引河等語覽奏稍慰已於摺內批示此次引河地勢本順又加以挑水壩之逼溜順黃壩之兜溜阿桂等所辦已極慎重周詳現亦無可指示之處俟引河開放後應詳悉繪圖隨摺呈覽此時惟佇俟佳音耳將此由六百里加緊傳諭知之○又諭據李質穎奏接淮安南國來咨該國有匪犯黃文桐聚眾擾累現在發兵勦捕恐該犯與其黨目徒眾竄入內地懇請一并截拏准依往例發回究

處現已檄飭沿邊守口文武員弁一體查拏如有該國匪徒竄入內地即行截拏稟報提訊明確由驛具奏俟奉到諭旨後再行發回該國等語所奏殊不曉事安南久經臣服本朝最為恭順並無可疑應辦之處非若從前準噶爾之敢於叛逆屢次留我逃人應須籌辦者可比該撫既接到該國王咨請截拏黃文桐等之文自應先行移覆仍速嚴飭沿邊文武實力查拏有何不得主意必須奏請指

示方行咨覆如此往返稽延閱時太久安南不能即得回文必致心生疑畏轉似天朝有意留其逆匪故為羈遲難免其不傍徨顧慮殊失開誠布公撫馭外邦之道李質穎簡任封疆已經數年何全然不達事理差謬若此著傳旨申飭至黃文桐如果雜髮改裝竄入內地固當立刻擒獲即其匪黨有逃進邊界潛匿者亦當實力盤詰拘拏查訊明確發回安南但須遵照前旨一面將盤獲匪犯緣由

咨明該國王一面派委明幹大員押犯至安南邊境俟該國王具咨派員到邊接收再行詢問確實令其領回切不可輕率妄發致黃文桐等匪黨假裝安南土目領收轉墮奸人詭計不可不加詳慎該督撫惟當深體朕意妥協辦理此時桂林想已回粵東務須飭屬上緊妥辦至廣西與安南邊界尤近李世傑更須加意查拏毋得視為泛常緝捕再前據李侍堯奏於開化府屬地方盤獲由安南竄

入內地儂民田老刀等十八名提解訊明分別辦理所辦甚是雲南廣西同係安南邊境何以雲南業已盤獲有人廣西則至今未獲一犯而李質穎摺內並稱內地民人尚未據該國清查送到亦屬未協並著桂林李世傑一并實力查辦內地民人潛往安南實屬不成事體前此安南逃回礦徒盈千累百籍隸兩廣者居多此時仍有內地民人在彼居聚皆由各邊隘不能切實稽查致奸民得以隨

時偷越雖屢經飭諭仍然視為具文並著該督撫等設法嚴查考覈毋得視為具文致干咎戾其從前逸出之犯一經盤拏訊明何年出邊即查明是年守口員弁照例叅處外該督撫亦當予以處分如已故之吳虎炳自可毋庸置議其現任及陞調之人並著附摺聲明請交部嚴加議處庶知儆凜將此由五百里發往並諭李侍堯知之尋桂林李世傑先後覆奏奉諭嚴飭文武員弁加意巡查至內

地民人偷越。自係邊隘。疎防所致。現查訊守口各員。照例叅處。報聞。○以廣東惠州協副將劉峻德為高州鎮總兵。○庚戌。

上御卷阿勝境。賜扈從王公大臣。蒙古王公台吉等食。○江蘇巡撫楊魁疏報。乾隆四十三年分。常州府靖江縣新坍田二頃五十畝有奇。新漲田二頃十畝有奇。○辛亥。盛京將軍福康安奏。內務府會計司所屬大糧莊頭八十三名。每年交糧二萬四千餘石。除給各項

口糧外。餘糧一分入倉。一分入窖。各額貯一萬石。以備撥用。查存倉者。每年支放。出陳易新。其存窖者。分貯各莊頭住處。如有霉爛。著落賠補。並無出陳易新之例。殊難經久。請於新糧入窖時。將舊糧減價出糶。年年抽換。以免陳因之患。得旨嘉獎。○是月。署江南河道總督李奉翰奏。湖河水勢遞消。外河北岸王營減壩。此時本應堵閉。惟查鹽河開壩。夏秋啟放。以濟鹽柴船隻。冬春蓄水濟漕。每年一

啟一閉。需費浩繁。今歲河水充裕。一切船隻。即從王營減壩出入。鹽河開壩。毋庸啟閉。節省較多。現淮北引鹽左營蕩柴正當趨運。減壩緩俟。冬間堵閉。實屬兩益。至高寶邵伯諸湖水歸江甚暢。下河民地。可望豐收。得旨欣慰。覽之。○湖廣總督覺羅圖思德奏。查勘荊州被水情形。前緣荊江上游。川水泛漲。由沙市老隄漫過。致將月隄衝缺。逼近城根。經地方官堵築。并於隄面加築子隄。捍衛其沿江

一帶老隄。為郡城保障。水過不無汕刷。現飭道府俟江灘全涸。修築完固。城外涸出地畝。補種雜糧。可望收穫。居民並無傷損。間有房屋坍塌。業已查明撫卹。得旨覽奏稍慰。○湖南巡撫李湖奏。本省常平額穀。上年長岳常澧等屬。早歉糶動。須於今歲買補。查前撫臣陳宏謀奏。明州縣採買倉穀。令按本境糧冊計田大戶。每百畝約收租穀百石。買官穀四石。田多以次遞加。價照時值。糧戶自運上倉。

平斛響攬按程給予腳價。閭閻稱便。現照舊辦理。如有田少買多。及賄隱囤戶等弊。飭地方官隨時稽查。得旨。有治人。無治法。爾實力妥慎為之可也。○河南巡撫陳輝祖奏。豫省衛輝府屬之汲縣。淇縣。新鄉。濬縣。因衛河漲。浸秋禾被淹。已成偏災。其鄆陵。孟津。南陽。浙川。新野。長葛。並陳州府屬之西華。扶溝。沈邱等縣。或河水陡漲。或急雨驟來。晚禾間被淹浸。統俟詳勘後。與歸德府浸隄被水。懷慶府沁隄決口被淹村莊。分別具奏。至無力貧戶。已隨時撫卹。不致失所。得旨。一切妥協為之。俾貧民皆受實惠可也。○署陝甘總督陝西巡撫畢沅奏。甘省蘭州。西寧。涼州。寧夏等府屬。六七月間多雨。低窪被淹。高阜西成可望。惟皋蘭。狄道等州縣。夏禾受黃疸蟲傷。兼被水雹。不能翻種。民情未免拮据。現委員確勘。結報後。奏明辦理。得旨。妥為之。俾受實惠。○又奏。前赴漢南查閱營伍。道出秦棧。由褒沔

折而東行。經過漢中。城固。洋縣。西鄉。石泉。漢陰。前抵興安。各該處濱臨漢江。西接隴蜀。東連荆襄。形勢險要。至興安一州。地約四千餘里。從前多屬荒山。後因兩湖安徽。江西。四川。河南等省民人。前來開墾。數年中。驟增戶口數十萬。棄地盡成膏腴。上年湖廣歉收。窮黎就食者甚眾。業飭地方官妥為安插。又恐流徙貧民。莠良不一。出示廣為曉諭。俾知凜遵法紀。得旨。諸凡留心可嘉。○又奏。前奉諭。備辦班禪額爾德尼一切供頓事宜。令臣詢之奎林。斟酌籌辦。伏思此事。固不宜張大浮費。現飭司道擇其必不可緩者豫備。但班禪額爾德尼。以外藩初次入覲。凡款待供帳。俱須整齊新潔。妥協適中。至沿途橋道。亦飭員畧為修治。以利進行。得旨。一切俱妥可嘉。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十七

實錄卷之一千八十七

事

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部正庫事務

世襲騎都尉軍功加十九級隨帶加二級又加二級 臣董誥內大臣戶部尚書鑲藍旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十四年己亥八月壬子朔命輯蒙古

王公表傳諭我國家

開基定鼎統壹寰區蒙古四十九旗及外扎薩  
克喀爾喀諸部咸備藩衛世篤忠貞中外一  
家遠邁前古在

太祖

太宗時其抒誠効順建立豐功者固不乏人而  
皇祖

皇考及朕御極以來蒙古王公等之宣猷奏績  
著有崇勲者亦指不勝屈因念伊等各軍

功事實。若不為之追闡成勞。哀輯傳示。非獎勲猷而昭來許之道。著交國史館。會同理藩院。將各蒙古扎薩克事蹟譜系。詳悉採訪。以一部落為一表傳。其有事實顯著之王公等。即於部落表傳後。每人立一專傳。則凡建功之端委。傳派之親疎。皆可按籍而稽。昭垂奕世。該總裁大臣等。即選派纂修各員。詳慎編輯。以清漢蒙古字三體合繕成帙。陸續進呈。候朕閱定。成書後。即同宗室王公功績表傳。

以漢字錄入四庫全書。用垂久遠。其各部落。并將其所部之表傳專傳。以三體合書。頒給一冊。俾其子孫。益知觀感奮勵。副朕推思念舊至意。○癸丑。遣官祭

關帝廟。○諭軍機大臣等。據李世傑奏。審擬叅令嚴秉政。任聽丁役婪索多贓。并典史閻康。縱恣貪污一摺。已交該部議奏矣。向來審案奏章。案情敘畢。於定擬罪名處。俱空一格。書寫李世傑此摺。案情與定擬罪名。接連繕

寫。眉目不清。已於摺內用硃筆點出。著傳諭李世傑。此等體式。幕友書吏。無不知之。李世傑雖初任巡撫。但起自外吏。且為藩臬有年。何於辦理審案奏章。全未諳悉耶。李世傑著傳旨申飭。○予故喀爾喀閑散多羅貝勒丹津祭如例。○甲寅

上御卷阿勝境。賜扈從王公大臣蒙古王公台吉等食。○諭近來凡有諭旨。兼蒙古文者。必經朕親加改正。方可頒發。而以理藩院所擬原稿。示蒙古王公等。多不能解。緣繙譯人員。未能諳習蒙古語。就虛文實字。敷衍成篇。遂致不相脗合。又如從前德通所繙清文。阿岱閱之。往往不能盡曉。夫阿岱素精國語。無不備知。其所以不曉德通之清文者。非阿岱不通清語。乃由德通拘泥漢字文義。牽綴為文。於國語神理。全未體會。是歧清語與清文而二之。無怪其相背也。則蒙古王公等之不解理藩院之蒙古文。其義亦然。總由國朝定鼎

至今百有餘年八旗滿洲蒙古子弟自其祖  
父生長京城不但蒙古語不能兼通即滿洲  
語亦日漸遺忘又復憚於學習朕屢經訓飭  
而率教者無幾固由習俗所移亦其人之不  
肯念本向上耳朕因絜矩而思之非特此也  
即如制義所以代聖賢立言雖古今時會不  
同而中國語言相沿未改無難會意追求乃  
今之所為時文朕覽之多不能解朕雖不喜  
作時文然向在書齋中於明季及國初名家

大家之文亦曾誦習其中如歸有光黃淳耀  
純乎古文讀之心喜餘亦理精義正足供玩  
味奈何今之作者相戾若此至於文體之變  
固不始於今時曩者魏晉六朝習尚浮靡斯  
文極敝韓愈出而起衰八代約六經之旨以  
成文人見之轉以為怪故其言曰作俗下文  
字下筆令人慚及示人必以為好小慚者謂  
之小好大慚者即以為大好是文士趨向之  
壞在韓愈時且然何況今之距唐又將千載

乎夫文風遞降說者每以比之江河日下然  
聽其流而不返日甚一日伊於何底昔韓愈  
尚思迴狂瀾於既倒矧有移風易俗之責者  
乎文以明道宜以清真雅正為宗朕曾屢降  
諭旨諄諄訓誡無如聽之藐藐恬不為怪讀  
書人於此理尚不能喻安望他日之備國家  
任使乎大抵近來習制義者祇圖速化而不  
循正軌每以經籍束之高閣即先正名作亦  
不暇究心惟取庸陋墨卷勦襲擗捨效其浮

詞而全無精義師以是教弟以是學舉子以  
是為揣摩試官即以是為去取且今日之舉  
子即異日之試官不知翻然悔悟豈獨文風  
日敝即士習亦不可問矣嗣後作文者務宜  
沈潛經義體認儒先傳說闡發聖賢精蘊務  
去陳言辭達理舉以漸合於古人立言之道  
慎毋掉以輕心試官閱卷亦當嚴為甄別一  
切膚詞爛調概擯不錄庶幾共知謹凜文化  
蒸蒸日上以副朕崇雅黜華之至意其繕譯

清文蒙古文亦當實力講求勿仍陋習此旨著頒示貢院暨各省學政及繕書房理藩院各書一通揭之堂楣俾皆觸目警心欽承毋忽并諭中外知之○諭軍機大臣等據阿桂等奏二十六日辰時引河上層已啟放三四十丈大溜竟似吸動午後流勢漸緩至夜長水又已頓落等語實屬可惜已於摺內批示矣據稱現在一面疏濬引河之淤一面築壩擠水俟引河疏淤將次完竣再行計算時日

趙緊堵辦合龍等語亦祇可如此籌辦引河開放既不能得勢惟有蓄水逼溜以期堵築合龍惟在阿桂等悉心妥速為之朕亦無可指示也看來該處情形歲事尚須時日計此旨到彼已近萬壽阿桂正不必以趨赴行在為急務須上緊籌度擇萬安之計趙辦合龍以副朕懷至今歲豫省汎水不大由陝西夏間雨少之故本日據富綱奏西安省城於七月二十日甘霖大霈極為透足現猶陰雲密

布細雨連綿遠近諒必均霑等語陝西既得透雨則上游河水自必盛長汎水應亦加增或於助放引河之勢有益亦未可定將此由六百里加緊諭令知之仍將辦理情形若何即速覆奏以慰廑念○命編修朱筠提督福建學政○乙卯土爾扈特貝子奇布騰等入覲

上御卷阿勝境召見賜食並賜扈從王公大臣蒙古王公台吉等食○諭軍機大臣等昨據

阿桂等奏開放王家莊引河初甚暢順半日以後河水頓落引河口門一帶仍復停淤等因一摺深為可惜阿桂等現在一面挑濬引河之淤一面趕築壩工逼溜亦只可如此辦理舍此更無良法已諭阿桂等悉心熟籌迅速妥辦矣黃河漫口之事所經已多速或一兩月遲亦不過三四月無不堵築合龍從無似此次之經年未成者朕因此煩懣異常懸念無時或釋今開放引河又成虛望覽奏徊

惶竟夕不能成寐。因思汎水未經加長大溜。自必稍平。既不能助勢暢達。引河則十六堡漫口之水。應亦不似從前之洶湧。今引河既不足恃。自仍以堵築漫口為急。但十六堡口門跌有深坎。難以施工。自應即就現做壩工之處。速為堵築。前據阿桂等奏挑水壩已做成二百丈。北岸之順黃壩亦做有四十丈。即係恐河水不能甚長。設法豫辦。以期有成等語。所籌甚當。莫若即將順黃壩迅速接築。加長步步鑲培。厚實俟與南岸之挑水壩相離不遠。即可相機設法合龍。目今新料已收足。供應用計。無有出於此者。未識阿桂等主見如何。與朕意相合否。著傳諭詢問。令其即速妥酌奏覆。豫省黃河漫已經年。滔滔不止。長此安窮。總之漫口一日不堵。民患即一日不息。朕心亦一日不寧。今年漫水下游各州縣。幸河流不甚泛濫。田廬未致大受災傷。實賴上天嘉佑。然豈能保其長久如是。思之深為可

慮。且黃河未能即歸故道。則由江南入海之路已失其常。殊屬不成事體。而渾流旁溢。變黃為淮。以達洪澤。今歲南河宣洩清水已大不易。幸值來水尚小。猶可以人事經營。若日久黃河沙性淤及洪湖。再遇水大之年。湖必不能容納。雖人力亦無所施。清水溢流。其傷并不止下河一帶。所關甚大。思之益復可懼。是儀封漫口。不獨為豫省急圖。實為全河關鍵。阿桂等不可不善體朕意。熟思妥計。速使

河循舊軌。弭患衛民。以副厘念。將此由六百里加緊傳諭知之。並將週日情形若何。即由驛迅速覆奏。○丙辰

上御卷阿勝境。賜扈從王公大臣蒙古王公台吉土爾扈特貝子等食。○兵部議覆署陝甘總督陝西巡撫畢沅奏稱。查烏魯木齊涼州西寧肅州固原巴里坤等鎮協營兵操演鳥鎗鉛丸俱動項製辦。惟甘肅提標寧夏鎮標及紅德等營。係各兵自備。近因奏請頒發鎗

靴式樣勤加演習需用更多該營兵非征勦金川即係新疆撤回所關糧餉除扣借製衣裝路費外力難自備請一體動項製辦應如所奏報部覈銷從之○丁巳祭

先師孔子遣協辦大學士英廉行禮○杜爾伯特扎薩克台吉伯拜等入覲

上御卷阿勝境召見賜食並賜扈從王公大臣蒙古王公台吉土爾扈特貝子等食○諭軍機大臣等據恒瑞等奏西藏各廟熬茶大鍋

及塔上成造飛簷均需銅觔照依乾隆二十三年三十八年之例派人給與路票前往雲南中甸地方採買廢銅一萬三千觔行文總督李侍堯據覆稱現在中甸地方並無廢銅且各廠銅觔缺少嚴禁私賣未便令西藏採買致藉端偷漏所有來人不便令其入境等語李侍堯所辦未免過當西藏需用銅觔告之駐藏大臣查照向例行文滇省並給與所派之人路引赴滇採買事屬可行且從前既

經買過兩次今所買不過一萬餘觔為數有限又係廢銅並無關礙李侍堯即因查禁私銅起見止須嚴飭地方官實力稽查毋使偷漏官銅若伊等從商人購買不但廢銅在所不禁即商人等以餘銅轉售亦無庸過禁至其價之輕重地方官并不必過問倘來人因索價過重不成交易而回亦可聽之乃李侍堯將藏內原文駁回又不准其來人入境一如待外國非我所屬之例殊屬不成事體況

達賴喇嘛班禪額爾德尼向來恭敬若將赴滇買銅緣由告懇恒瑞等先行奏聞朕必降旨准將官銅賣給以示體卹李侍堯辦事素稱明練何竟見不及此且該督即欲如此辦理亦應據實入奏何以並未奏及殊不類平日所為著傳諭李侍堯即遵照妥辦並即詳悉覆奏將此由五百里傳諭知之○順天鄉試以刑部尚書兼管府尹事胡季堂為監臨官兵部尚書蔡新為正考官禮部右侍郎達

椿為副考官○以故喀爾喀多羅郡王車木楚克扎布子貢楚克扎布襲爵○戊午祭

大社

大稷遣豫親王修齡恭代行禮○

上御卷阿勝境賜扈從王公大臣蒙古王公台吉土爾扈特貝子杜爾伯特扎薩克台吉等食○禮部會同九卿議浙江巡撫王亶望等奏請裁浙省商籍學額一摺查杭府仁錢二縣向為人文淵藪商籍學額實為仁錢士子

進身一途况該省商學向撥杭府仁錢三學凡廩增出貢中式即占仁錢之額誠如諭旨與長蘆山東由別省寄籍者不同未便議裁應遵旨照舊辦理其現在行鹽及商人子弟一并收考仍飭該撫學政隨時稽察勿滋頂冒影射等弊至商籍各生既附杭府仁錢三學即與民籍無異鄉試散入民卷無庸另編國字號從之○已未

上御卷阿勝境賜扈從王公大臣蒙古王公台

吉土爾扈特貝子杜爾伯特扎薩克台吉等食○遣官祭昭忠祠○軍機大臣等議覆西安將軍伍彌泰陝甘總督勒爾謹等奏稱移駐伊犁眷兵及漢軍出旗改駐京兵各事宜一移駐兵三千分兩年派往現初次一千五百由甘省河西各標營就近先派於七月至九月分起前進毋誤春耕一弁兵眷口除游擊都司守備自行料理外千把外委兵丁每口每百里給盤費一錢二分小口減半每三

名給車一輛一漢軍馬兵二千原有左右翼官房四千間請將北城右翼兵房給本年起移駐京兵其南城左翼衙署兵房估價賣給出旗官兵房價於改補綠營俸餉內官分四季兵分八季扣還一出旗漢軍有撥補別營願攜眷同往者請量給盤費及窮苦閑散遷徙他往按戶賞給貲本一移駐兵一千五百應馬步各半今漢軍八旗馬兵共二千二十四名步兵僅三百八名請即擇馬兵中家計稍

可者令補步甲。餘於明歲一并改補綠營。一各營派出帶領移駐眷兵之游擊都司守備千把總等缺。即將出旗漢軍之協領防禦驍騎校等按品改補。一漢軍各有自立馬匹。請給價留厰。即撥給派出京兵。一陣亡兵家屬及食一兩錢糧之鰥寡孤獨。請各給守糧一分。均應如所奏。諭此項官兵認買兵房衙署。議令按季坐扣繳價。固屬照例辦理。但漢軍官員改補綠營。所得廉俸較優。自應作四季坐扣。至兵丁改補後。所領餉銀有限。若坐扣繳價。於伊等生計未免拮据。所有兵丁認買房間。著即加恩賞給居住。毋庸扣餉。以示體卹。其應派京兵。著留京王大臣會同該旗詳慎挑選。奏聞發往。餘依議。○直隸總督楊景素奏永定河北三工六號南三工十五號以下河身僅寬八九十丈。至一百五十丈與上下游寬四五百丈者迥異。形勢至此。一束水難暢洩。擬於北三工四號至十號展築新北

隄九百三十五丈。再將十號至十五號舊北隄加幫培築。南三工十五號至十八號舊越隄十八號至二十一號舊南隄亦分別加高培厚。其南北臨河舊隄二道酌量廢去。則河身均在四百丈外。一律寬展。不致與水爭地。不但上游免致出險。且可省附近險工搶修之費。現飭確估興工。得旨允行。下部知之。○庚申。

太宗文皇帝忌辰遣官祭

昭陵。○諭曰。徐嗣曾著調補雲南按察使。其安徽按察使員缺著汪圻調補。徐嗣曾現署雲南布政使事務。俟新任藩司福明安到任後。再接臬司之印任事。汪圻再赴安徽新任。○又諭。戶部議打箭鑪徵收稅銀比較上三屆均屬短少。應照虧短最多之數賠補。數年來覈辦各關應賠款項俱係如此。何以文綬遽請酌中賠補。致啟向後遞行短絀。避多就少之弊。殊屬非是。文綬之意不過欲令該監督

少賠千餘金。以圖知感。封疆大臣。豈宜如此存心。文綬既有此奏。即著照伊酌中所定之二千七百二十二兩零。令監督滿祿賠補。其比較不足銀一千五十三兩零。著文綬五倍罰出。以為市恩邀譽者戒。○兵部等部議覆護廣西巡撫按察使哈靖阿奏。稱粵西水鄉偏僻。差使無多。向無驛馬。所有全省站船及站夫水手等項。設驛鹽道一員。管理兼巡桂林。平樂。梧州。鬱林等府州。今各省驛傳奉諭改歸巡道分管。以臬司總其成。請將粵西驛務。勅令該道與左江。右江二道。各按分巡地方管理。每月應付勘合。接遞本章。及工食夫糧等事。州縣呈道移臬。彙詳督撫。至一切驛站奏銷。詳繳印花。俱歸臬司彙辦。即撥驛鹽道書吏二名。以供書算工食。照舊其驛站支剩銀兩。州縣徑解藩司。無庸另設臬司銀庫。改鑄廣西提刑按察使兼管驛傳事務印信。均應如所奏從之。○辛酉。戶部議覆江蘇布

政使吳壇奏。稱凡捐納官生貢監。全以執照為憑。若由寄籍改歸原籍。其初捐時弊止冒籍。猶屬可原。乃近年改籍者。輒以出繼歸宗為詞。全改姓名三代。覈之原照。竟屬兩人。假冒頂充。何所底止。請照乾隆二十八年例。將原照註銷。應如所奏。除實有應改情節。無關弊竇者。准其聲明。按照外。概將原照註銷。至冒籍捐監。前准順天府奏。限一年呈首。今於六月滿限。而呈請按照者尚多。若即不准改歸。仍聽濫行占籍。並恐尚有未及呈報者。聞風隱匿。日久更難覈查。請再展限一年。飭各督撫通行曉諭。本處具地方官保結。在京具同鄉官印結。報部移查。改歸如實。係無籍可歸。照例寄籍二十年。准令入籍。再俟一年。限滿停止從之。○壬戌。太祖高皇帝忌辰。遣官祭福陵。○兵部議覆吉林將軍和隆武奏。稱三姓地方辦理邊務。請撥吉林備用銀一千五百

兩借給無力剗夫接濟。於秋間交淺時完納。再三姓公中佐領缺出。因該處向無防禦。例以驍騎校揀補。嗣後請將三姓驍騎校與別城防禦一體揀補。其驍騎校並請准補別城防禦。遇各城佐領缺。一同揀補。以杜瞻徇。再每年收納官淺後。內務府止將吉林寧古塔官員議敘。其各城給放淺票人員。並無勸懲。以致疎怠不力。請將三姓伯都訥阿勒楚喀等處照原定正票餘票之數。多放者分別議

敘短放者議處。均應如所奏。惟三姓驍騎校既准補各城防禦。其佐領缺應將各城防禦揀補。本處驍騎校毋庸一體入選。從之。○伊犁將軍伊勒圖奏查哈薩克布魯特向來構釁。今哈薩克汗阿布賚知布魯特畏懼天朝。請內地派員前往調停。臣恐調停後。或布魯特不守示諭。再犯其境。轉多未便。且其構釁非止一處。即哈薩克汗亦難保其屬人。不復互相搶奪。因令其於適中之地設卡防守。曉

諭遣回。得旨所辦是知道了。○賑卹湖北鍾祥京山潛江天門荊門江陵監利石首沔陽等州縣及荊州荊左沔陽三衛被水災民。並緩徵新舊額賦。○癸亥

上御卷阿勝境。賜扈從王公大臣蒙古王公台吉土爾扈特貝子杜爾伯特扎薩克台吉等食。○諭軍機大臣等前經降旨。令鄂寶督催各幫糧船迅速抵通。并推押回空。毋誤冬兌。不必至行在陛見。嗣於七月二十八日據該督覆奏。湖廣糧船脫幫情形及嚴催各幫迅速抵通。回空各緣由。而於遵旨毋庸前來之處未經奏及。本日鄂寶又有奏糧船尾幫全出臨清日期摺內。亦未將回任緣由奏明。豈此旨未接得乎。著傳諭鄂寶即將糧艘於何日可以全數抵通。及該督何日遵旨回任之處。遇便覆奏。尋奏奉到諭旨。正在督催重運前進。擬俟江廣幫船抵通交卸後。謹將遵旨督押回任日期具奏。至重運尾幫約月內全

數抵通。臣即回任。趕辦新漕。得旨。何糊塗至  
此。○甲子。

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵○遣官祭

顯佑宮

東嶽廟。

城隍廟○

上御澹泊敬誠殿。扈從王公大臣蒙古王公台

吉土爾扈特貝子杜爾伯特扎薩克台吉等

行慶賀禮。○御卷阿勝境賜宴。○乙丑。秋分。  
夕

月於西郊遣理郡王弘曉行禮。

上御卷阿勝境。賜扈從王公大臣蒙古王公台

吉土爾扈特貝子杜爾伯特扎薩克台吉等

食。○諭軍機大臣等。據李湖奏。接奉催運銅

勦諭旨。查滇省應運乾隆四十三年分京銅。

本年四五月內。先後接准滇省來咨。頭運一

起。委員姚州知州黃韶音。已於四十三年十

二月二十日。自滇起程。二起。委員曾我縣知

縣邵滋。於四十四年二月初五日。自滇起程。

該委員等到瀘之後。受兌裝載。開幫啟行。迄

今並無日期咨會等語。該委員等於上年十

二月。本年二月。陸續自滇起程。距今已踰半

載。何以尚未報在瀘州受兌開行。殊屬延玩。

向來銅船過境。各地方官。雖有催趲之責。往

往視為具文。並不實力董促。是以運員得以

沿途逗留。本屬非是。此次銅運尤關緊要。更

不宜稍有稽延。昨據圖思德等覆奏。現於峽內豫雇小船。俟銅船一到。即為起剝。其漢口換船。亦令地方官豫為覓定。隨到隨令過載開行。不使其復拘四十日舊限。並酌派都司遊擊一員。又添委丞倅一員。逐程查督。俟銅船出境。方許回銷。以專責成等語。所辦亦是。但僅派丞倅。職分尚輕。不足以資整飭。著派吳之鵬。於漢口一帶。往來嚴催。俟銅船全出楚境。再行回任。其臬司印務。著該督等另行派

實錄卷一百八十九

十一

員奏聞。署理其餘各省督撫。並當一體留心覈實辦理。務使銅船迅速抵京備用。將此由六百里一併諭令知之。○又諭據薩載奏。廣西桂林府通判歐陽銓。護送安南貢使。捏稟船戶偷賣私鹽。因降旨將歐陽銓革職。沿途截解。赴江審訊。今據圖思德等奏稱。歐陽銓行抵湖南零陵縣地方。稱病不能前進。現在衡州調治等語。歐陽銓前因挾船戶折價不遂之嫌。捏寫守備積廣聯名誣稟偷販私

鹽。今又於中途逗留。看來歐陽銓竟係一荒唐不堪之人。著傳諭李湖。即速嚴查。如該參員尚在衡州。託病耽延。立即鎖拏。派委妥員押解江南聽審。並飭該委員沿途小心管押。毋任疎虞。將此由五百里發往。各將查辦情由。迅速覆奏。並諭薩載。李世傑知之。○丙寅。上諭。卷阿勝境。賜扈從王公大臣蒙古王公台吉土爾扈特貝子杜爾伯特扎薩克台吉等食。

實錄卷一百八十九

十一

大清高宗法天隆運至誠先覺體元立極敷文奮武孝慈神聖純皇帝實錄卷之一千八十八

大清高宗法天隆運至誠先覺體元立極敷文奮武孝慈神聖純皇帝實錄卷之一千八十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥八月丁卯大學士等奏

查國子監未經頒刊

世宗憲皇帝訓飭士子碑文臣等敬謹檢查凡有闕士習文風者共四道內雍正五年三月辛亥日

諭旨一道尤為切要恭繕進呈候

欽定即交國子監及各直省學一體敬謹刊刻得旨即用第一道○戊辰

上自避暑山莊啟鑒幸木蘭○諭向來左右兩翼稅務除監督外並無跟隨辦事之員舊例

未為盡善嗣後兩翼監督應行更換時著總

管內務府大臣選派賢能可信司官一員奏

聞隨該監督辦事照崇文門委員之例遇有

監督出差等事即可令該委員代為照料稽

查於權務更昭慎重○又諭曰陳輝祖奏本

年九月己屆新漕交納之期豫省自春至秋

豐穰倍於往昔即被災之地屢蒙恩卹元氣

日復俱可踴躍輸將惟儀封商邱等州縣漫

淤未退若漕糧新舊並徵民力不無拮据現

奉恩旨於庚子年為始普免天下漕糧一次

豫省輪應明年全免懇恩即就今歲概賜蠲

免並請將儀封考城等五州縣乾隆四十三

年緩徵漕糧展至四十五六兩年分半帶徵

等語前因豫省漫工久稽堵合瀕水田禾不

能耕獲情形不免拮据深為廛念屢經降旨

加恩賑卹並諭令該撫查明應行加恩事宜

據實速奏候朕酌量降旨以蘇民困茲屆新

漕開兌之期被淹地方不無稍形支絀即豐

收各屬自去夏至今辦供夫料亦屬急公可嘉著加恩將該省乾隆四十五年應行輪免漕糧即就今歲概賜蠲免俾閭閻益裕蓋藏其儀封考城商邱寧陵睢州被淹五州縣四十三年緩徵漕糧再著加恩展至四十五六兩年分半帶徵以紓民力該部遵諭速行至該撫所請祥符陳留杞縣三縣舊漕請照二十三年折徵之處並著該部速議具奏尋議奏祥符等三縣舊漕該撫以今歲恩賜蠲免

本色無從搭運請照舊例折徵查豫省每歲額賦向係直隸山東江南幫船協運原不需本省籌辦祥符等縣既屬有收其應徵舊漕二萬七千餘石自可成幫起運所請每石折銀八錢之處應無庸議從之○以總理西藏事務副都統銜留保住為正黃旗蒙古副都統工部右侍郎福長安為正黃旗漢軍副都統○是日駐蹕中關行宮○己巳諭前因江浙督撫等以兩省臣民望幸奏請巡閱河工

海塘已降旨允於庚子春正月諏吉南巡至所稱明歲為朕七旬萬壽欲就近申祝則斷乎不可業經宣諭飭禁蓋朕本意原以庚子為朕七旬誕辰辛丑即

聖母九旬萬壽連歲疊逢大慶中外臚歡自可聽其抒誠祝

嘏今既不能遂朕初願朕復何心為己稱慶惟念士民想望恩澤積有歲年因詔開鄉會恩科並輪免各省漕糧一周以洽羣憫明年南

巡迴鑒後俟

北郊禮成即啟程幸避暑山莊駐蹕八月慶辰一切仍照常年例行若在京受賀惟恐轉多振觸遂至山莊以避之至於西藏班禪額爾德尼豫請親祝實屬吉祥盛事是以允其前來即令於山莊瞻謁俾從其便朕並非因其稱祝先期往就之也恐內外臣工尚未能深喻朕意仍有以慶典為請者非惟不能博朕之悅適以增朕之懷又豈臣子愛敬之道乎

俟朕八旬大慶則當聽從諸臣稱祝此次必不允行又前屆朕六旬萬壽時古北口熱河兩處曾有點綴段落燈綵之類本屬朕所不取明年尤當嚴禁將此再行通諭知之○諭軍機大臣等向來各部院奏事摺於案情敘畢空一格書寫看語而外省督撫奏摺於敘案畢即接寫看語殊覺頭緒不清著傳諭各督撫嗣後奏摺凡看語俱空一格繕寫以清眉目○又諭據英廉奏拏獲富新倉花戶李

老等向關米領催多索錢文及民人楊老等在倉門口重利放帳一摺已交刑部審究矣該犯等於關放甲米之時膽敢以放給好米為詞向各領催等嚇詐多索錢文每米一石於例給四十文之外多索錢至一百六七十文情節甚屬可惡至民人楊老等即於倉門放帳盤剝自朝至暮獲利加一亦屬不法均應從重懲治俾奸徒稍知歛跡著傳諭刑部堂官即提集各犯嚴加訊究從重定擬具奏

並將各犯等於應得罪名外仍枷示倉門數月俾衆共知懲儆尋奏花戶李老陳大藉詞放給好米詐索多贓回民楊老楊六康七乘各領催關米需用重利盤剝均屬目無法紀俱應從重發往烏魯木齊給種地兵丁為奴先行枷號四個月遊示各倉懲一儆百滿日發遣從之○又諭曰鄂寶等奏湖南各幫漕

船現已據報轉衛可期陸續抵壩交卸其江西在前各幫亦可趕赴八月中旬抵壩無誤回空至在後各幫如八月二十外始能抵通者若不豫為籌畫臨時不無周章請飭交倉場侍郎就近酌看情形循照上年之例備集剝船於楊村趕緊起卸責成重運千總及領運正丁管押剝船抵通交收以速回空等語上年江廣尾幫漕艘因渡黃遲滯經倉場侍郎等奏請於楊村剝兌轉運甚為妥速今江西尾幫各船抵通稍遲恐回空稽時致誤新運著交雅德等循照上年之例豫備剝船俟

江西尾幫到時於楊村起剝並派令坐糧廳駐劄該處就近稽查俾該幫船隻隨到隨剝得以迅速抵通不致回空稽滯方為妥善將此傳諭知之○兵部奏由京移駐西安滿兵酌編設滿洲協領二佐領六蒙古佐領二每佐領下防禦驍騎校各一其設官三十員其防禦以上留京王大臣揀選正陪帶赴熱河引見諭此次京兵派往西安駐防無甚緊要即於十月起程亦無不可所有應添滿洲各官著留京王大臣揀選擬定正陪俟朕迴鑾後引見發往至沿途照料大員著派達爾吉善榮柱尚安餘依議○理藩院侍郎博清額奏俄羅斯固畢爾納托爾請開貿易臣業經咨覆准否總俟爾薩納特衙門行文內部奏聞後奉旨辦理非我等所得擅便代奏今又懇請云天朝若恩准貿易降有諭旨商人隨至察其來意尚無別情臣擬乘此機會可將邊境未完之事要其盡行完結咨覆後如果

恭順再准貿易得旨嘉獎○是日駐蹕波羅河屯行宮○庚午諭據申保等奏駐劄各回城大臣等俱挑選回人以為親隨惟烏什阿克蘇二處向無其例今阿奇木伯克阿勒呼哩等率領衆伯克等叩請情願於烏什挑選回人八名阿克蘇挑選回人十二名充當親隨等語烏什阿克蘇雖應挑選回人以為親隨但挑取十數名為數過多著交申保景福烏什居住回人較少准挑五名充當親隨其阿克蘇居住回人既多准挑八名充當親隨○諭軍機大臣等據鄂寶奏江西在後各幫八月二十外始能抵通若不豫為籌畫臨時不無周章請飭交倉場侍郎循照上年之例備集剝船於楊村趕緊起卸抵通交收以速回空等語已諭令雅德等循照上年之例妥協辦理矣上年因高家馬頭等處水淺沙淤江廣尾幫渡黃遲滯而運河水勢亦小又須沿途起剝是以不能依限抵通即於楊村剝

兌轉運本年糧艘渡河並無阻滯而江南山東一帶運河水勢均極深通且據鄂實等奏稱古淺處所今俱通行無阻等語是江廣重運應比上年迅速因何復遲至八月二十外始能抵通況各幫漕船例應依限抵通迅速回空方無誤冬兌冬開之期乃上年水淺既不能進行今年水大又復遲緩是水大水小皆當遲滯將如之何而後可自係鄂實辦理不善所致著傳諭鄂實即將江西尾幫因何

遲滯緣由詳悉查明據實迅速覆奏將此由四百里諭令知之○是日駐蹕張三營行宮○辛未

上行圍○賑卹甘肅皋蘭河州狄道金縣靖遠紅水縣丞隴西安定會寧通渭岷州平涼靜寧隆德固原鹽茶廳張掖山丹武威永昌古浪平番西寧碾伯涇州秦州清水肅州安西玉門渭源中衛環縣洮州東樂等三十五廳州縣蟲雹水災貧戶並蠲緩本年額賦有差

○是日駐蹕阿貴圖大營○壬申

上行圍○諭現在御前大臣較少和珅著在御前大臣上學習行走○諭軍機大臣等據李侍堯等覆奏籌辦運京銅觔一摺據稱戊戌頭運一起覈計程限明年五月以前定可抵京其頭運二起銅觔已檄遼東道白珣親赴威寧一帶加緊查催據稟現在途次銅觔絡繹赴瀘約數數起秤運開幫當在七八月約計明年六月以前應可抵京等語所辦可謂

用心之極已於摺內批示矣該督等派委委員於寧臺廠試辦長運已有成效現又百計籌畫委員踏勘新礮期於集少成多以彌前墮而趨後限實屬詳悉周到惟在實力行之使此後各運銅船如期速進源源接濟以供京局鼓鑄方為妥善至戊戌兩運京銅現已於瀘州開幫著傳諭沿途各督撫即行豫飭各屬遇銅船到境即遵照前旨各派大員統率稽查豫雇船隻以備撥運換船之用總須

上緊催趲不得僅照尋常期限其東省開河以內五月前正當糧艘重運之時應令總漕總河豫定章程令銅船與糧船分起相間過開勿令銅船守候稽時務使此兩運銅船迅速銜尾前進於明年五月以前全數抵通以供鼓鑄倘有稽延惟遲誤之該督撫是問又據稱銅船之弊患在走私風聞漢口商銅聚集甚多實為滇省走私之據而瀘州水路係官銅正運恐奸商巧僮即乘此串混夾帶一水運至漢口售賣更為捷徑現今藩司於通商銅船給以連三印票以憑查驗如無印票即係私銅請飭湖廣督撫驗明連三印票方准售賣如或不符及無印票應嚴究來歷懲治等語所奏甚是著傳諭圖思德鄭大進照滇省所給連三印票實力稽查以杜奸弊毋得以事屬鄰省視同膜外不為切實整理致干咎戾並將作何查辦情形迅速覆奏李侍堯摺並著鈔寄閱看此旨著由五百里傳諭

知之仍各將銅船過境及籌辦情形隨時迅速具奏○又諭據特成額等覆奏金川新疆屯防經費歷年用過銀四十一萬五千餘兩皆照奏咨定例支用自應照奏明酌定章程造冊報部覈銷至所稱每年約需銀十萬餘兩除前經奏徹屯防官兵二千三百餘員名計歲需已減十分之三所有四十四年分約計應用銀六萬五千餘兩等語殊覺不成事體兩金川設鎮安營本屬綏靖邊圉經久之策若因此而歲需兵餉不貲除已裁撤屯防官兵尚需六萬餘兩年復一年長此安窮實為非計從前平定準噶爾籌辦屯田事宜將陝甘兩省腹地各營兵額漸次裁減不但足供新疆經費且支給之外尚有盈餘所辦最為妥善今金川所設屯防經費亦當仿而行之蓋邊省多設弁兵原為捍禦外夷之計如準部回部既歸版圖則陝甘內地兵額即可裁減至川省各營兵額較多原為防守番境

而設今兩金川俱經蕩平新設鎮營屯駐足資控制毋庸川省內地兵丁復為衛禦自應將川省腹地各營兵數酌量裁減以抵新疆經費之用但兵額一時未便遽裁止須遇有兵丁缺出即為停補數年之後自可足數如此不動聲色以漸妥辦裁兵既不虞其失所而經費亦不致於添多方為兩全之道至欲將新疆官兵於今冬再撤一千名轉可不必原議添設防兵本為彈壓番境若裁減過多

恐不敷駐守且於體制非宜自不若議裁腹地兵額之為得當也著傳諭特成額文綬明亮即行悉心籌畫通盤覈計詳悉妥議迅速覆奏又諭曰特成額等覆奏查辦瞻對賊番刦殺麻塘寺僧洩忿一案現已盤獲賣馬番人郎忠一名供係跟隨擦馬所為首賊番達爾結噶馬林津等焚刦屬實等語瞻對番人常在鄰境偷放夾壩乃以捕殺構怨輒復挾忿報復刦殺多人實屬兇頑不法不可不

嚴行查辦以示懲創既已獲有番人郎忠究出為首賊番達爾結噶馬林津之名特成額等應即督飭文武各員令其嚴飭瞻對土司將首犯擒獻如該土司敢於庇匿遷延即屬有心怙過並當設法將該土司誘至拘管勒令速獻為首賊番如有續行究出同賊夥犯並令一并擒獻方可釋令歸巢毋得稍事姑息庶番夷共知警懼將此由五百里傳諭知之並將現在曾否擒獲首夥各要犯查辦緣

由迅速覆奏○是日駐蹕海拉蘇台大營○  
癸酉

上行圍諭軍機大臣等昨因滇省戊戌兩運京銅限於五月以前全數抵通計入閘河以內正當糧艘重運之時諭令總漕總河豫定章程使銅船與糧船分起相間過閘毋致守候稽時矣因思明歲春間朕南巡江浙自直隸廠登舟以及回鑾俱由水程恐總河總漕及沿途各督撫徇於舊例豫將河道肅清令

船隻豫於支河汊港迴避以待御舟經過始准放行殊可不必朕巡幸所至原以省方問俗一切均須有便於民不但銅船運緊糧艘亦不宜遲斷不可令其迴避守候致稽程限即估舶民船亦不必令其遠避凡御舫所經舟楫往來聽從其便但須於經過時令各船貼岸一邊順排停泊過後即可放行總不可因南巡蹕除河道無論閘內閘外均若無其事者然方為妥善著傳諭總河總漕及沿途各督撫深體朕意妥為辦理將此由四百里傳諭知之○以鑾儀使阿玉璽為正白旗蒙古副都統○是日駐蹕呼魯蘇台大營翼日如之○甲戌

世宗憲皇帝忌辰遣官祭

泰陵○諭軍機大臣等前據戶部奏京局現存京銅可鑄至明年二月又有四十二年三運及加運三起一并計算又可敷至六月至六月以後之鑄務更覺棘手請交該督撫詳悉

籌議當即傳諭李侍堯籌畫趕辦並諭沿途各督撫設法嚴催於明年五月以前全數抵通又據金簡等奏乾隆四十二年三運二起加運兩起京銅在途行走遲滯恐致稽誤亦已諭令沿途各督撫上緊催趲昨據李侍堯等覆奏戊戌頭運一起銅船已於本年五月開行覈計程限明年五月以前定可抵京其頭運二起銅船在瀘開幫當在七八月約計明年六月以前亦可抵京等語復又傳諭沿途督撫豫為籌備勿使稍稽自可無虞遲誤至丁酉年三運二起京銅已於五月中出江蘇境加運一起於六月初過安徽境加運二起於六月中旬出湖北境節據各督撫奏到計算日期約可於本年九月十月抵通本日又據楊景素奏丁酉年二運二起京銅於七月初一日全數運抵通壩是銅船現已源源到局可供鼓鑄似不應復有不敷接濟更須總總過慮之處著傳諭金簡等詳悉查明現

在陸續運到銅觔約可用至何時是否不虞貽誤即行據實覆奏尋金簡等奏通計實存現收銅觔及在途未到之丁酉年三運二起加運三起據沿途督撫奏本年九月十月抵通足數至明年六月今又據李侍堯覆奏戊戌年頭運三起約計明年五六月以前可到果如期而至六月後鑄務自可接濟無誤報聞

○調廣州將軍宗室永瑋為黑龍江將軍以散秩大臣福僧額為廣州將軍○乙亥

上行圍○諭前經降旨葺治寧壽宮為朕將來歸政後頤養之所現今工屆落成實為吉祥慶事宜敷惠澤以昭錫福所有管理工程大臣及在工人員俱著加恩交部議敘○又諭曰永瑋現在雖調補黑龍江將軍到任尚早傳玉暫且不必來京仍辦將軍事務俟永瑋到任後再行交代回京○又諭曰福僧額昨已補授廣州將軍但到任尚早桂林著暫署廣州將軍事務永瑋先行來京陛見○諭軍

機大臣等據李侍堯奏戊戌年頭運京銅船隻於本年五月二十一日在瀘州全數兌足開幫一摺已批交該部矣戊戌年頭運兩起京銅即照從前奏展之限應於上年十月起運今至本年五月頭運一起銅觔始於瀘州全數開幫其頭運二起昨據該督奏稱開幫尚在七八月覈計逾限已將十月遲延殊甚雖該督等已將承運逾期各員參奏治罪然業已稽遲現惟設法董催方可冀無誤此後

務須派委妥員上緊趲辦年清年限俾各運銅船如期迅進源源接濟以供京局鼓鑄如再延遲逾限惟該督撫是問將此諭令知之

○又諭本日李世傑奏截拏歐陽鋤解交江省審訊一摺用紫筆繕寫殊屬非是此必李世傑現在聞中監臨因外簾禁用墨筆是如此太覺拘泥各省巡撫入閣遇有奏章無不用墨筆繕寫者紫筆科場定例原以防閑胥役輩舞弊若巡撫自攜筆墨入閣臨時親

看幕友謄寫並無妨礙即封稿發交撫署繕寫亦無不可李世傑初任巡撫諸多未諳嗣後一切宜留心講習將此傳諭知之○又諭據李世傑奏本年六月護鎮安通判陳肇駱稟稱在於吞登巖峒拏獲交趾男女十二名口內夷婦丁安一口訊係交趾前保樂土州農候冬之妾農候冬因被堂弟爭奪州城該夷婦攜帶幼女等逃至吞登巖峒被獲俟究問明確再行請旨發還該國等語土州兄弟爭奪農候冬之妾丁安被難竄入內地若徑行發還正彼所欲得而甘心者既奪其地復獲其孥豈不令其堂弟太得便宜惟應將該夷婦審訊明確一面將盤獲緣由咨明該國王俟該國王具咨派員到邊接收再行詢問確實交其領回方為妥協著傳諭桂林李世傑即行遵旨妥辦仍將查訊辦理情形詳晰具奏○豁免陝西西安延安鳳翔漢中榆林同州興安等府州屬節年民欠社倉穀七千

四百四十石有奇○是日駐蹕納爾蘇台達已漢西山根大營○丙子

上行圍遣官祭賢良祠○軍機大臣等議覆署陝甘總督陝西巡撫畢沅署西安將軍薩炳阿奏稱由京移駐西安馬兵一千二百步兵一百照每兵百一佐領管轄之例編設十二佐領一佐領下於西安壯丁內添礮手各一弓箭鐵匠各一再派出京兵未諳西安風土擬與舊兵均勻間派俾新兵易於熟習共應編設三十二佐領再請照從前移駐西安兵例設養育兵缺一百二十以資孤寡養贍查兵部原議係通計滿洲蒙古各旗兵數共設三十佐領應將該署督等所奏減佐領二員其添補礮手工匠及新舊勻派之處均應如所奏至養育兵應否照舊賞給請旨辦理得旨養育兵缺著加恩照數賞給餘依議○是日駐蹕敦達烏拉岱大營○丁丑上行圍○諭據鄂寶奏江西尾幫糧船抵通遲

滯雖因湖南船隻在前頂阻但究係辦理不善所致自請交部嚴加議處等語鄂寶著交部議處其押運之文武各官並著鄂寶查明叅奏交部議處○諭軍機大臣等昨據阿桂等奏現在趕做順黃南北兩壩口門祇剩七十餘丈將來進埽漸多口門漸窄約計九月初旬不過餘存二三十丈水勢自可蓄高引河挑淤之事彼時亦當一律完竣總在九月初旬可以相機啟放掣動大溜其時正屆霜

降施工較易堵築二三十丈之口門須搶做十餘日約九月二十後可望合龍等語伊等現俱實力速辦無俟朕再為敦促惟冀如期蒞事以慰廑念至閱上次進到之圖順黃南壩尚距大隄不遠將來補接自易其北壩則竟齊河身做起並無隄岸倚靠即兩壩中間堵合而北之壩頭似未靠實地未為妥善因復閱圖內十堡北岸尚有圍堰一道由十八堡上舊攔黃壩起至十堡對岸而止前所做

北壩頭即接圍堰做就較為合法今亦應將此堰接長使現做壩工得有所接不致落空方妥因用硃筆標識起止阿桂等可即速籌妥辦其堰壩等工務須鑲築堅實以期鞏固至順黃壩合龍後並須將十六堡漫口仍行補築完好俾資重門保障尤堪經久無恙著將硃筆標識之圖發去令阿桂等迅速妥籌辦理仍詳晰繪圖即行具奏將此旨著由六百里加緊傳諭知之○又諭據李侍堯奏滇

省墮欠鹽款一案查係從前各屬承辦軍需將應解鹽款混行那借及至領出軍需銀兩並不歸還鹽款以致虧缺積歲增多但事歷多年官非一手其間情節輕重殊難分晰允當若徒以一叅了事而追賠延宕累月經年於課款終無實濟因思課款虛懸由於鹽觔無著遂因為勒定期限如果於今歲奏銷之前尚敢絲毫短缺不問人數多寡定即嚴叅從重治罪現任各員各向井竈收買餘鹽趕

煎趙補半年之內鹽勛業已足數等語所奏可嘉已於摺內批示矣滇省墮欠鹽款積弊相仍歷久未能釐剔今李侍堯察其致弊之由勒限趕辦不越半年而應存鹽數業已顆粒無虧可見事在人為果能實心查辦積弊自即肅清該督既屬能事又復實心宜其立見成效也至所稱此案年久弊深咎非一任請概免其叅究所見亦是從前那借各員及該管上司歷年已久物故者多既難查其始

奏

奉

於何任若徒挨查月日責令賠償亦屬有名無實與其追究已往徒諉之空言自不若整飭將來使不蹈覆轍從此年清年款不令絲毫虧欠鹽務自日有起色且該督既查明積弊原委和盤托出不敢稍存隱飾並將難辦之故據實陳明不肯稍涉顛預更非沽名邀譽如此方深得古大臣公正之道李侍堯係尚書李元亮之子本屬世家且見其頗有才幹遂由熱河副都統改授侍郎旋即用為將

軍總督並歷內部尚書閱歷日深在封疆中實為傑出遂即簡畀綸扉原屬素所倚任之人然不意其經理得宜以數十年之積弊一旦而廓清之萬妥萬全并非擬議之所及也總由

上蒼篤生此公正體國之賢臣以資治理朕覽摺嘉慰之餘實深喜悅特賞上用大荷包一對小荷包兩對用昭優獎○是日駐蹕已顏布爾噶蘇台大營○戊寅

奏

奉

上行圍○戶部議覆江蘇布政使吳壇奏稱凡陞遷事故離任人員所有廉俸及准銷工程等存庫銀兩除查現在有無賠項分別應領應抵外或前任尚有承辦工程未經覈銷者請將應支銀兩暫停給領如有賠項照數扣抵其無應扣者統於銷結後限二年飭領逾限即提歸原款報撥庶帑項不致無著塵積亦得清釐應如所奏通行各直省并載入例冊從之○兵部等部議覆署陝甘總督陝西

巡撫畢沅奏稱甘省驛務改歸巡道分轄以按察使總理各事宜一甘肅驛傳道改為分巡蘭州道與平慶秦階寧夏西寧甘涼安肅各巡道按所屬塘驛夫馬切實稽查如有缺額扣剋該道揭送臬司參奏一驛傳奏銷自明歲始由臬司辦理即遞撥驛道書吏承辦州縣交代冊結各道移臬司齎部一通省接遞本摺文報道臬一體查覈每月應付差員勘合火牌內廩給口糧夫馬黏貼印花簿及

書集卷五十九

五

馬遞公文黏用排單均由臬司按月咨部一夫馬工料等銀仍由州縣具詳藩司覈給其額領倒斃馬價及墊用廩給口糧由各道移臬司辦理一如有濫給勘合多填夫馬等弊將專辦之臬司查參至私用夫馬遲誤緊要公文道臬一并參處一改鑄甘肅等處提刑按察使兼管驛傳事務印信及分巡甘肅蘭州府兼管茶馬水利道關防其餘各道官銜內添兼管驛務字樣均應如所奏從之○浙

江巡撫王宣望疏報慈谿錢塘黃巖西安樂清等縣乾隆四十三年分開墾沙塗山塘及水衝田地共二百二頃四十畝有奇仁和場新漲沙蕩八百八十三畝有奇○以故雲南永北廳屬土順州州同子文翰弟文俊襲職○是日駐蹕已顏溝大營○己卯

上行圍○諭軍機大臣等朕於九月中旬自熱河啟鑾回京途間應勾到二次例派刑部尚書一人至行在承辦其事此次著派德福前

書集卷五十九

五

來辦理至留京辦事現有三人且為日無多毋庸另派將此諭令知之○又諭曰博清額奏接到傳玉咨參私放越境俄羅斯之守卡佐領一案查俄羅斯人被內地擒獲私行賄賂亦應治罪請行咨回畢爾納托爾等語又據傳玉奏卡上佐領衮布等膽敢收受俄羅斯物件私行釋放請旨治罪此事若止照傳玉所奏革職枷號不足示懲著渾齊布將佐領衮布等拏至卡上眼同俄羅斯人正法將

軍等交部嚴加議處。其越境俄羅斯十七名亦著伊頭目即行查出治罪詳報。但俄羅斯甚屬狡猾亦須令其拏至邊界眼同內地人懲治勿徒以文移塞責。著傳諭博清額將此旨一并咨行。○豁除甘肅西寧縣乾隆四十年添建倉廩地二十七畝有奇並高臺中衛二縣水衝沙壓地一百七十八頃三十六畝有奇額賦。○是日駐蹕達顏達巴漢北昂阿大營。○庚辰。

上行圍○遣官祭黑龍潭

昭靈沛澤龍王之神。玉泉山

惠濟慈佑龍王之神。○是日駐蹕扎克丹郭

佛囉大營。○辛巳。

上行圍○兵部議准署陝甘總督陝西巡撫畢沅奏稱甘省西寧鎮地界極邊城守營所轄地廣向未設有馬兵其步守兵除派新疆屯防外不敷差遣并無馬乘騎請即在該鎮標五營內各撥馬兵十名馬十匹作該營額設

從之。○是日駐蹕伊綿峪大營。○是月兩江總督薩載奏江南黃河內凡有高低不平及桃源臨河集陳家樓李家莊祥符閣等處淺灘岡土業經一律挑挖底平而兩岸尚有露出灘嘴之處皆由溜勢坐灣所致對岸埽壩每多迎溜受險若一概挑切需費浩繁惟於逢灣灘嘴上視溜勢所向抽濬溝槽寬以三丈為度水長時引溜直注中泓可期順軌循流俾兜灣埽壩不致著重現汎兵正閒分段派挖無庸雇夫多費其土即以幫培隄岸得旨此舉甚好。○浙江巡撫王宣望奏仁和海寧一帶海塘大汎已過均屬穩固惟尖山石壩東南面老沙現刷低二十餘丈底層中層竹簍俱係陰沙擁護而上層已經顯露查此項竹簍壩工外逼潮勢內護塘根最關緊要年久朽壞須加砌面簍一層擬乘冬令水涸時趕築至壩工向備塊石一千餘方陸續動用亦應購足庶幾有備無患得旨甚是即將

來沙漲亦屬有益。不可惜費。○河南巡撫陳輝祖奏。豫省入秋以來。普霑透雨。合計九府四州所屬。收成約八分有餘。其刈穫少遲。新糧尚未入市者。不過三四處。價稍增長。餘皆平減。得旨。覽奏稍慰。○山東巡撫國泰奏。東省六月間。因直隸河南漳衛二河水漲。倒漾入運。並本省洸泗汶各河驟漲。以致臨清濟寧德州館陶邱縣夏津武城等七州縣被淹。蒙恩截留江西漕米五萬石。分貯沿河州縣備用。現各按田禾所損之多寡。民力需用之緩急。酌借籽種。俾得及時種麥。其應還本年常社倉穀。請俟來秋徵收報聞。○山西巡撫覺羅巴延三奏。大同府屬之豐鎮廳朔平府屬之寧遠廳。向未設有常平倉糧。後將二廳應解綏遠城兵米。截留十年。以充倉儲。現共有本息穀十萬四千餘石。每歲出陳易新。不過十分之一。紅朽堪虞。而綏遠城自移駐右衛官兵七百餘名。加放米一萬餘石。口外各

廳徵解不敷。請將該二廳倉儲均以三萬石為額。餘照一穀二米之例。碾運綏遠城為兵糈報聞。○陝甘總督勒爾謹奏。吐魯番駐劄滿兵應需種地兵七百名。工作兵五百名。前經畢沅議奏。工作兵事竣。即留屯種地。以節往來之費。其不敷兵二百。即於興漢鎮屬派往。現准索諾木策凌咨稱。工作兵築城造屋。須至明冬始竣。則原調種地兵七百。應仍於陝甘各提鎮屬勻撥。於今年九月前往。以便

明春耕作報聞

大清高宗法天隆運至誠先覺體元立極敷文  
奮武孝慈神聖純皇帝實錄卷之一千八十九

實錄卷之一千八十九

至

十

大清高宗法天隆運至誠先覺體元立極敷文  
奮武孝慈神聖純皇帝實錄卷之一千九十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥九月壬午朔

上行圍○諭昨據傅玉等參奏有俄羅斯十七  
人執持器械趕馬五十餘匹越入我境被卡  
上官兵拏獲訊係貿易之人並非行劫竟不  
報明將軍遂將伊等馬匹皮張等物私留縱  
放請將守卡官員治罪等語所辦甚屬舛謬  
邊疆處所安設卡座原為稽查私行出入之  
人今俄羅斯多人執持器械越入我境即非  
行劫之徒既經擒獲自當解送將軍訊明來  
歷若果非盜賊再聽將軍交伊頭人治以應

得之罪乃佐領衮布等擒獲越境之俄羅斯多人並不解送將軍轉勒留伊等馬匹皮張等物私行縱放不法已極因特降諭旨將衮布等押赴卡上眼同俄羅斯頭人立行正法仍飭諭該頭人務將越境之俄羅斯盡行查出拏交卡上亦眼同我處之人懲治外並將失於查察之將軍總管俱從重治罪邊境禁例向屬森嚴乃日久怠生遂至衮布等不肖之徒藐視王章恣意妄為若不及今嚴行禁

飭將來何所底止著通諭伊犁塔爾巴哈台烏里雅蘇台科布多庫倫等處將軍叅贊辦事大臣及與外國連境之盛京吉林江南浙江雲南廣東廣西福建四川等省將軍督撫等轉行嚴飭各邊卡及交界地方官嗣後如有外國人等私越我境無論是否賊匪即行擒拏有將軍叅贊駐劄者報明將軍叅贊有督撫駐劄者報明督撫聽候辦理倘敢如衮布等任意賄縱查出即行正法若該管之將

軍叅贊督撫等不遵照此旨妥辦亦一并從重治罪○戶部奏殺虎口監督悟隆阿於乾隆四十三年九月徵收起嗣因病故現任蘇楞額於本年四月接辦合算一年期滿請旨更替或令另管一年諭曰蘇楞額若照該部所請另管一年是較別任多管五月若另行派員則蘇楞額尚未及半年遽爾另換均未為平允蘇楞額除另管五月外著再接管七月數計俟滿一年即行照例更換嗣後凡監

督有半任接替者戶部俱照此奏聞著為例○是日駐蹕安巴究和羅昂阿大營○癸未上行團命輯回部王公表傳諭昨朕降旨以內外扎薩克自

皇祖

皇考及朕即位以來服勤奮勉勲猷卓越者甚多交國史館會同理藩院追溯伊等從前勞績編纂表傳以垂永久茲念各城回人自投誠以來宣力軍前封授王貝勒貝子公爵者

亦有其人宜一體加恩編纂表傳著交該院查其內實心効力立有軍功者會同國史館照蒙古王公編纂表傳以示朕一體矜恤回部臣僕之意○是日駐蹕烏蘭哈達大營○甲申

上行圍○遣官祭

歷代帝王廟○遣官祭

都城隍之神○諭據陳輝祖奏現在大工正屆趕辦合龍儀考等州縣原續被淹及河北

各屬一隅被水之處分別查辦均需銀兩濟用司庫存銀不敷支應等語著於部庫內再撥銀一百萬兩照例即行解往備用該部遵諭速行○添建甘肅大通縣倉廩二十五間從署陝甘總督陝西巡撫畢沅請也○是日駐蹕伊遜河東大營○乙酉

上行圍○吏部議准江西巡撫郝碩奏稱本省同知通判督運赴通沿途有催趲稽察之責向俱帶印起程署事之員由藩司刊給木戳

以代印信查丞倅於鹽捕水利各有專司其分防者亦多地方民事非鈐蓋關防易於滋弊請頒前後幫清漢文關防二封貯藩庫該丞倅於督運起程時領用原印交署員接受運竣繳庫凡屬有漕省分一體鑄給從之○以江南漕標中軍副將任承恩為山東兗州鎮總兵○是日駐蹕塔哩雅圖昂阿西大營○丙戌賜扈從蒙古王公台吉及土爾扈特貝子杜爾伯特扎薩克台吉等食○諭據李侍堯奏開化鎮標右營軍械局於本年六月十三日下午被火焚燒幾及一月該地方文武匿不具報請將署開化鎮中軍遊擊候補都司寶善革職並請將總兵劉國樑署知府李鋌等交部議處等因一摺軍械貯局關係緊要該兵丁等並不小心看管以致失火焚燒該遊擊並不立時通詳復敢扶同欺飾希冀消弭其中顯有情弊寶善著革職交該督即提同守局弁兵徹底查審務得確情定

擬具奏。至開化鎮總兵劉國樑聞報失火情  
形。並不即時查揭。請叅轉以駁盤軍械為詞。  
模稜率轉。署開化府知府同知李鏐。文山縣  
知縣黃斌。近在同城。不即申報。均屬觀望。  
延著一併交部嚴加議處。又諭軍機大臣等。  
沿邊重地。軍械最關緊要。兵丁等並不小心。  
看管。以致失火焚燒。該管營員。並不即時通  
報。相隔一月之久。始以查點軍械為詞。扶同  
欺飾。此等綠營藐玩惡習。實為可惡。安知非

別有遺失損壞情弊。裝點失火。希圖掩蓋。  
著交李侍堯。即速提齊應訊各犯。嚴審因何失  
火確情。據實聲敘。分別定擬。速奏。至該鎮劉  
國樑前因徇庇。守備蕭掄第。經李侍堯叅奏。  
交部議處。本應照例降調。朕念其在金川軍  
營。頗知奮勉。若因此遽行降調。未免可惜。是  
以降旨從寬留任。並命該督傳諭該鎮。俾知  
感恩。詎勉毋蹈綠營惡習。今該鎮於軍械失  
火一案。遷延一月。不即查揭。請叅甚屬非是。

看來該鎮在軍營打仗。雖屬出力。而於整飭  
營伍。非其所長。恐於總鎮大員。不能勝任。著  
李侍堯即將劉國樑辦理營伍才具。若何能  
否。勝總兵之任。據實具奏。候朕酌量降旨。毋  
稍姑容。貽誤。將此由五百里諭令知之。尋奏  
劉國樑辦理營伍才具。平常難勝總兵之任。  
至失火確情。俟覆訊續奏。報聞。○是日駐蹕  
張三營行宮。○丁亥諭軍機大臣等。本日文  
綬奏查催滇銅頭運。全數開幫。並現在趲運。

緣由一摺。由五百里馳遞。而李湖奏督催銅  
運。及歐陽鋤已經廣西拏解之摺。亦由四百  
里馳遞。殊屬非是。此等事件。朕特降諭旨。交  
該督撫迅速查辦。是以由驛封發。至該督撫  
接奉諭旨。如果有應行請旨速辦之事。自當  
由驛馳奏。今文綬李湖所奏。皆係俟銅觔到  
境。方行辦理。即具摺差人齎進。亦不為遲。何  
必紛紛由驛馳遞。致擾郵政。耶。文綬久任封  
疆。即李湖亦非初任。巡撫何不曉事。若此俱

著傳旨申飭並著傳諭各督撫嗣後凡遇覆奏事件除詢問晴雨情形及交查新正展賑借種等事并地方要務諭令由幾百里覆奏者方准由驛馳遞餘概不許率意濫動驛馬將此遇各督撫奏事之便傳諭知之○是日駐蹕波羅河屯行宮○戊子諭前經降旨將甘肅省乾隆二十七年起至三十七年止因災帶徵未完銀二十三萬五千餘兩糧一百零五萬四千餘石加恩概予豁免俾邊氓共

慶盈寧因念陝西之延安榆林綏德等三府州屬與甘肅接壤雖其地分隸陝省而土瘠民貧實與甘省無異逐年積欠為數尚多若一體並徵民力不無拮据著加恩將延安榆林綏德等三府州屬自乾隆二十六年起至三十七年止民欠常平倉穀若干著該撫查明實數奏聞概予豁免俾積逋得普免追呼近欠自易於完納如此體卹優施閭閻更可永資樂利該部即遵諭行○諭軍機大臣等

閱盛京滿洲兵行圍殺獸不但如吉林黑龍江兵尚不如京師滿洲兵伊等每年所交鹿隻等物較吉林黑龍江兵為多然非伊等自行射獵聞俱買自民人者殊屬不成事體盛京為我朝根本之地兵丁技藝宜較各處加優乃至不能殺獸由漢人買取交納滿洲舊習竟致荒廢伊等豈不可恥蓋緣歷任將軍未能勤加教訓所致如不實力整頓日甚一日大有關係著傳諭福康安留心訓練騎射行圍時將軍親身督率射獵務令技藝精強以復滿洲舊習○是日駐蹕中關行宮○己丑直隸總督楊景素奏本年五月下旬河南臨漳縣屬沙莊壩衝開一口大溜改趨壩後漫及成安廣平等縣臣馳至該處履勘緣沙莊壩前河身高於壩後又有南岸之五岔口漲灘挑溜壩身反居其旁全不得力以致衝開一河改由壩後繞至李家疇仍歸舊河其舊河自沙莊壩以下李家疇以上紆迴繞

道且間段淤塞挑費浩繁轉不若壩後之近捷細察形勢即以新河為河身實為利便惟查李家疇仍歸舊河之處共有大小新河三今擬於村西築攔河壩一東西接築土埝堵截二河止留村前一河挑濬寬展即成正河其李家疇迤西之程重李重等村亦有新衝水溝四應一并堵築再下游廣平曲周二縣水無歸宿擬於成安縣之柏寺營起至杜木營止繞築土埝一千一百餘丈為重門保障

俾水漲不致漫及其沙莊壩向設歲修銀六百兩仍留為培築李家疇壩埝之需得旨允行○是日駐蹕避暑山莊至癸巳皆如之○庚寅諭軍機大臣等戶部奏查審盛京興隆店地方居住閑散關住一戶呈請入旗一摺所辦殊未明晰關住既稱係六格之孫其莊頭地畝亦已認為已產何以該旗雍正四年納糧紅冊又開載郭八佐領伊清納名下及查京旗現存歷年丁冊既無伊清納其人又

無郭八佐領名姓則雍正四年納糧是從何來種種情節疑竇甚多未便因家譜墳墓碑文及印甘各結遂定關住為另戶正身准其歸入丁冊即富德所供業德即係六格之孫亦難憑信況由民戶改歸旗籍復得田土人皆貪得便宜難保無虛捏影射情弊此案雖經往返咨查仍屬根底不清著交盛京將軍福康安提齊一切佐證具結人等逐一質訊徹底清查務得關住是否實係另戶正身確

切憑據以成信讞所有關住母子及莊頭李成林並著押回交該將軍審辦將此由四百里諭令福康安知之○戶部原摺並鈔寄閱看并諭戶部堂官知之○辛卯盛京將軍福康安奏盛京戶部每年所領東三省俸餉除本省按季給發外其吉林黑龍江路遠運回每誤二月開放之期兵食攸關應定期限及時給發嗣後請於八月內赴京支領十二月初旬運到即發該二省俾得從容運放再打牲

烏拉總管事務現歸吉林將軍統轄其俸餉銀兩亦請歸吉林省領放報聞○壬辰江蘇巡撫楊魁疏報元和鎮洋二縣乾隆四十三年分開墾田地四頃一畝有奇○豁除浙江仁和縣坍沒沙地一百七十九頃七十畝有奇並錢塘縣捐設義塚地三畝有奇額賦○癸巳諭本年恩科順天鄉試諸生中年臻耄耋者頗多踴躍觀光榜發俱未獲雋念其績學有志至老弗衰宜沛渥恩以廣化澤著加恩將應試諸生年八十以上之王景績李蘧張廣基李天民董斌許祖健康銑李成俱賞給舉人一體會試俾皓首寒儒得償夙願用昭加惠耆年之至意○又諭曰都爾嘉現丁母憂計其百日期滿密雲縣兵房亦已工竣正屆駐兵之期創設駐防地方之副都統員缺甚屬緊要必得善於管轄兼能辦事之人始可勝任看來都爾嘉尚可去得密雲縣駐兵時即著補授該處副都統所遺山海關副

都統員缺著塔彰阿調補塔彰阿所遺鑲紅旗蒙古副都統員缺著遜全補授○甲午上自避暑山莊迴鑾○諭據弘昫奏請將伊名下應追攤派銀一萬餘兩又賞銀五千兩賞限十年於將軍養廉銀兩扣交外其不敷者懇恩每年由伊家內措辦交納等語弘昫去年辦差攤賠銀一萬兩究屬因公使用並未入已著加恩免其交納但伊係將軍因辦差攤派銀兩自應將緣由具奏乃經朕詢問數次並不據實奏聞賞伊銀兩本應辦公伊既已攤派又豈可領朕賞銀耶所有應交賞銀五千兩著賞限五年交納○是日駐蹕喀喇河屯行宮○乙未上御行殿勾到秋審官犯服制及雲南貴州情實罪犯停決官犯十四人服制斬犯四十九人雲南斬犯一人絞犯一人貴州斬犯一人絞犯二人餘三十一人予勾○諭軍機大臣等據勒爾謹奏稱甘省蘭州鞏昌平涼等各

府州屬於七月十九至二十九等日各得雨二三寸四五寸及深透不等甘省節候較遲得此應時雨澤秋禾可漸次結實等語第就該省現在雨澤而言昨日奎林自甘省差竣來行在復命朕詢以沿途所見地方情形據奏伊經過甘肅地方似覺雨水過多詢之土人僉稱向年覺旱之處今歲俱得有收其低窪處所雨水不免過大且有生長黃疸者雖非通省皆然而歉收之處約有少半等語甘

省每年夏秋往往缺雨今歲因何轉得過多該省現在田禾情形若何收成通計何如勒爾謹摺內何以並未詳悉奏及著傳諭該督再行逐一查明據實覆奏毋得稍有粉飾將此由四百里諭令知之尋奏甘省入秋以來據撫彝等十九廳州縣具報有因陰雨連綿生長黃疸者有田禾甫經結穗旋被雹霜者業飭道府確勘俟覆到即分別輕重具奏報聞又諭據圖思德等奏接奉諭旨查辦漢

口私銅隨密委鹽道張廷化率同府廳逐細詳查漢口商銅現存五萬四千餘觔並提各行戶研訊據稱近年以來川陝二省運到商銅約十五六萬觔除發賣外現在存銅實係川陝二省商銅並非滇省販至此語不實川陝安得有許多銅出賣是楚省大小官員同以買漢銅為難故為此言耳伊等又稱滇省既定三連印票請敕川陝二省仿照辦理等語所奏未為妥協商人運販滇銅如果有走

私之弊自當查拏重懲若過於設法嚴防恐商人畏避裹足不前漢銅必日形其絀非但於該省採買有礙但恐商銅短少民間購買不敷勢必致有私銷之弊於錢法大有關係不可不通盤籌畫圖思德等所請川陝二省仿照滇省三連印票之法斷不可行朕意即滇省亦可毋庸急辦李侍堯等但須嚴飭所屬實力稽查如有逾額走私之事立即拏究其餘通商之銅仍從其便務令貿易相安公

私俱益方為妥善。至圖思德等所稱漢口之銅買自川陝而非由滇省。恐未必然。陝省雖新開銅廠於本省供用尚屬不敷。安得復有餘銅供商買運而川省亦非產銅之所。商人又何從多購。且李侍堯前奏原因滇銅之走私日甚。漢口現在銅多。因設為三連印票稽覈。若非訪有確據。必不肯率定章程。況滇省現有一分通商之銅。聽其流通利用。今乃云滇銅久未至楚。則此項通商銅。又復何往。

圖思德等此奏。不過因鄭大進曾奏停買漢口之銅。仍買滇銅屬員等未免迎合迴護。又恐採買漢口銅。勛價值或有賠累。是以竟云漢口無銅。此事朕不值差人馳往查覈。第以理度之。斷未必然。銅勛鼓鑄攸關。乃國家大計。不特滇省產銅之處。應行籌畫。即各省督撫亦當視其豐嗇實情。從長計較。不可稍存畛域之見。若各圖一省之利。而不顧全局。尚得謂之公忠體國之大臣乎。況圖思德曾任

滇省督撫。該省銅務尤所深知。更不應存隔膜之見。著傳諭圖思德等悉心妥辦。并令李侍堯等詳悉熟籌。務使官銅商販兩無窒礙。將此由五百里諭令知之。○軍機大臣等議覆烏魯木齊都統索諾木策凌奏稱。巴里坤屯田遣犯定額三百五十名。後因額缺。奏准截留烏魯木齊遣犯頂補。現又缺六十餘名。請將發給綠營兵及厄魯特為奴等犯擇其年力強壯者截留撥補。查此等人犯情節較重。若截留種地年滿後。又得邀恩為民。不足以懲儆。現因新疆遣犯聚集過多。改發烟瘴地方充軍。請交部擇其中情節重者給兵丁為奴。輕者即發往巴里坤等處補耕。屯缺額從之。○是日駐蹕常山峪行宮。○丙申工部等部議准。護貴州巡撫布政使李本疏稱。裁汰平越縣楊老驛丞改為大定府水城通判。照磨各事宜。查照磨專管緝捕監獄協防倉庫錢糧。應照該通判定為苗疆要缺。五年

俸滿所支廉俸仍照驛丞另鑄給水城廳照磨所兼管司獄鈐記應設衙署即移楊老驛丞原署改建不敷動項借給於該照磨養廉內分年扣還從之○是日駐蹕兩間房行宮

大清高宗法天隆運至誠先覺體元立極敷文奮武孝慈神聖純皇帝實錄卷之一千九十

大清高宗法天隆運至誠先覺體元立極敷文奮武孝慈神聖純皇帝實錄卷之一千九十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理  
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事孫  
世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次  
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥九月丁酉諭昨大學士

于敏中之孫于德裕中式舉人前赴行在謝恩因令其將闡中詩文默出呈覽雖大致尚屬清順但其首篇內朝廷自有養賢之典何臣子偏為過激之辭小臣意為棄取而大君馭富無權又今日之粟出之於國非出之於家國家無以報功而羣下適為多事等句語意俱與傳註不合朱註云孔子為魯司寇時以思為宰是思乃孔子家臣九百之粟即夫子所與非受祿於魯國更非頒祿於周室也

朝廷之語魯國尚不足以當之而况夫子之家乎又云夫子行芳志潔行芳非六經所有而以擬夫子更覺不倫此實認題不真及遣詞不當之故但恐通場類此者或所不免而今年鄉試揭曉適當木蘭秋獮回蹕熱河之時圍中十魁卷例不先行進呈朕無由得見因命軍機大臣取圍中所刻元魁卷前十名勘閱黏簽進呈則首名破題即有尊國制所以重君恩之語而其他如以功詔祿祿以馭富朝廷詔釋之典國家之體制垂焉上尊政體下廣國恩計功詔祿國典攸關御廩之藏天家之餼等句十名中不可枚舉即其中偶有敘及為宰者亦未切實發揮均未能體會正解設場中所取之文俱理精義足而于德裕獨以庸詞倖獲何難獨治其罪若其他字句或有可疑并無難嚴究其有無情弊茲聞中所取之文大率如此自不能專治于德裕一人若因于德裕而兼及衆人朕又不肯為

已甚之舉總由近時文風日壞習制義者祇圖速化而不循正軌無論經籍束之高閣即先儒傳註亦不暇究心惟取浮詞俗調摛搆求售師以是教弟子以是學舉子以是為揣摩試官即以是為去取且今日之舉子即他日之試官積習相沿伊於胡底昔韓愈起衰八代尚思迴狂瀾於既倒况有移風易俗之責者豈可聽其流而不返乎前曾降旨釐正文體務以清真雅正為宗著再明白曉諭嗣後作文者各宜體認儒先傳說闡發題義務去陳言辭達理舉以求合乎古人立言之道試官閱卷亦當嚴為甄別講究正解一切庸詞爛調概擯不錄庶趨向益真而文化可期蒸蒸日上若再不能仰體朕意仍復掉以輕心必令此等庸陋詞句悉行磨勘以示懲儆毋謂朕不戒視成也將此通行傳諭知之○諭軍機大臣等連日刑部進呈各省秋審冊朕詳加披閱惟湖北省看語每案多至一篇并

有至篇半者。殊覺繁冗。原情定罪。其緊要處。數語可了。各省看語。多不過半篇。歷年俱係如此。鄭大進獨嘵嘵不休。其意何取。若欲以此見其認真辦事。又殊不然。如果斷獄得當。片言已可扼其大要。雖簡而不嫌其少。若鄭大進之複敘案情。即連篇累牘。亦復何益。且或出於幕友所擬。或由於書吏所呈。鄭大進止於依樣葫蘆。又豈得謂之能辦事乎。朕非憚於披閱。憎厭其多。如各省招冊中。遇大案

多至十餘篇。朕無不逐行細覽。又豈嫌湖北每案之多閱數篇。但爰書自有體裁。而讞案貴得要領。看來鄭大進於事理輕重。總未體會。殊屬非是。將此飭諭知之。又諭昨據圖思德等奏。近年漢口運到商銅。約十五六萬觔。均買自川陝二省。並非滇省販至。現在存銅計五萬餘觔等語。所言不實。川陝二省。安得有許多銅觔。供商販運。而滇省現有一分餘銅通商。又豈能舍漢口而他往。且李侍堯

前奏。以漢口銅多足為走私之據。言之鑿鑿。因而設法稽查。自係探訪確實入奏。必非妄語。今圖思德等乃以漢口之銅買自川陝。久不由滇省販運。趨避之意顯然。蓋因鄭大進曾有停買漢口商銅。仍買滇銅之奏。欲為迴護。實屬非是。鄭大進前奏名為每年少得鑄息二千餘兩。其實因購買漢口商銅價值較昂。承辦之員。恐有賠累。不肯擔當。而又不肯明言其故。遂請停購商銅。仍欲赴滇買用。止

圖為楚省辦銅數員卸責。並不知為滇省銅觔盈縮大局。而計實屬大謬。如漢口定價。稍有不敷。何妨據實奏明。量為增給。若使畏難不辦。遂欲諉卸鄰封。是其視滇省銅觔之能否供用。竟如視秦越人之肥瘠。封疆大臣。豈宜出此。鄭大進心存畛域。而罔顧銅務大計。所見已小。至圖思德曾為雲南督撫。豈不知漢口之走漏滇銅。乃既至楚省。即不復為滇銅通盤籌畫。亦與鄭大進扶同入奏。圖思德

平日辦事尚屬誠實不應漫無主持若此圖思德鄭大進並著傳旨申飭至圖思德等前奏川陝二省之銅亦欲照滇省設立三連印票之法斷不可行已降旨諭令停止即滇省三連印票亦宜緩辦銅觔除鼓鑄官用外原有餘銅通商立法最善蓋銅觔為百姓器用所必需聽商賈流通貿易以便閭閻方為有利無弊若持之過嚴商人無利可圖不復營運致民間無銅供用勢必又生私銷之弊是欲禁走私而轉導奸民之銷燬雖立法甚嚴私銷者處斬然獲者百之一二耳非計之得也朕以為欲杜走私止須滇省嚴飭廠員實力查察有犯必懲毋庸另立科條徒滋流弊並著傳諭李侍堯等再行悉心籌覈具奏此旨著由五百里一併諭令知之仍著圖思德等即行據實覆奏尋圖思德鄭大進奏查滇銅係紫板蟹殼形式川陝銅俱平面圓餅今驗各行戶所存實無紫板蟹殼等銅據稱近

年滇省產銅漸少通商之銅或在本省或在中途即售到漢絕少並非諱匿旁批未必蓋自行戶以至大小官吏皆欲諱此爾等伎倆朕豈不知又奏臣鄭大進前奏寶武局需用滇銅請仍赴滇採買因近年到漢銅觔除供山西及本省錢局外存留民用者甚少遂爾冒昧呈奏容將本省鼓鑄所需并漢口現有銅觔通盤籌議又批若甚無法亦祇可畧減所增鑪座耳○豁免河南考城縣乾隆四十四年分被水衝失常社倉穀三萬一千六百石有奇○是日駐蹕要亭行宮○戊戌上御行殿勾到四川廣西秋審情實罪犯停決四川斬犯十四人絞犯十二人廣西斬犯二人絞犯三人餘一百二十二人予勾○諭曰竇瓚現已丁憂其湖廣提督員缺李國梁將屆服滿即著前往署理俟服闋後再行實授○又諭原任大學士劉統勲之孫劉鏞之現應順天鄉試未能中式著加恩賞給舉人一

體會試○又諭原任尚書王際華之子王朝  
梧昨歲已降旨賞給內閣中書著加恩准其  
一體會試又諭聞劉浩在正定甚不安靜  
以致諸事掣肘著來京候旨所有正定隆興  
寺工程著專交周元理辦理如有應行續估  
者即著周元理據實勘明具奏其劉浩帶往  
之監督匠役等仍留該工一手承辦即交周  
元理稽查約束○諭軍機大臣等據已延三  
秦河東道葉佩蓀卓異引見檄委蒲州府知  
府黃彬護理道篆一摺係循例奏明自應如  
此昨據吏部叅奏該撫因平陽府知府錢人  
龍及汾州府知府雷汪度俱經卓異引見將  
委員署理之處違例用咨照例罰俸業經降  
旨依議委署道府俱係應行奏聞之事何以  
一則循例具奏一則違例用咨辦理兩歧若  
此著傳諭已延三將前此何以未經奏聞之  
處據實覆奏是日駐蹕密雲縣行宮○已  
亥吏部議准大學士管閩浙總督三寶奏稱

泉州府金門地方為廈門咽喉孤懸海島兵  
民雜處雖設重鎮別無文員一切事件均赴  
馬家港通判衙門中隔海洋七十里跋涉維  
艱鞭長莫及請將同安縣確口縣丞改設金  
門專管該處十保事件歸馬家港通判統轄  
定為要缺在外揀補至確口亦係漳泉二府  
通衢並請將晉江縣屬浦邊地方歸并鷓鴣  
嶺陽兩巡檢分管移浦邊巡檢一員改設確  
口仍隸同安定為選缺鈐記均另行鑄給從  
之是日駐蹕南石槽行宮○庚子

上詣

安佑宮行禮○迴圓明園○辛丑諭軍機大臣  
等據李奉翰奏請於十月內赴京陛見一摺  
所奏非是已於摺內批示李奉翰不過因薩  
載奏請陛見是以亦為此奏不知薩載擢任  
總督後例應入覲且南巡在即地方事務或  
有應面為指示者是以准其來京若總河於  
南巡時止有沿河緯兵一事是其專管向有

一定章程。自可照例辦理。此外並無應辦差務。必須先期面請訓示之處。至於河防一切事宜。明春朕即親臨閱視。李奉翰扈隨而行。自可隨時面承諭旨。今距南巡為日無幾。李奉翰何必飾為此奏。可見其並非出自誠心。李奉翰著傳旨申飭。○又諭曰。李侍堯奏普洱總兵張和聞車里土司刁士宛報有猛勇頭人召齋與景線投誠安插之喇鮮占烘有仇。糾集野匪四千餘人。至境報復。張和遽帶兵往援。且欲窮追。殊屬非計。已札飭該鎮撤回官兵。并諭刁士宛自率土練極力防禦。官兵斷不能代為驅勦。么膺等語。所辦甚是。夷疆仇殺事所常有。總兵鎮撫其地。祇應隨時授以機宜。令其自行妥辦。即或土司求援。亦只可酌於附近內地之處。帶兵揚威截堵。以助聲勢。而防竄逸。乃刁士宛既辦理不善。張大其詞。希圖聳聽。張和不如審察。輕率帶兵前往。又不顧瘴發路險。致官兵染病多人。甚

屬不值。雖其心近於勇往。而冒昧從事實未得用兵機要。看來張和竟不曉事。幸李侍堯為之明晰指示。將來或可稍知慎重。不復輕妄。朕向以張和人頗明白。在總兵中似尚出色。意欲俟其歷練擢為提督。今看此事之漫無成見。率意妄行。或係外觀有餘。而中鮮實濟。恐難膺專閫重寄。李侍堯在滇三載。於張和底裏知之必深。著傳諭李侍堯將張和為人究竟若何。向後能否堪勝提督之處。據實覆奏。此旨著由五百里發往。仍著將召齋喇鮮之事。曾否查明。及該匪近日是否安靜之處。即行具奏。○壬寅。吏部等部議覆。江西巡撫郝碩奏。稱江西南昌等府。襟江帶湖。近水田廬。全賴圩隄捍衛。而南昌新建二縣。為尤要該處。附省衝繁。地方官無暇親身督察。查江浙等省。俱設主簿一官。專司水利。而江省獨無。請將濱臨江湖地當適中之南昌縣三江巡檢。新建縣吳城巡檢二缺。均改為主簿。

換給鈐記仍駐原地管理各屬圩隄并一切水利官俸役食悉仍其舊應如所奏其原管地方事務是否即令主簿兼辦應令再行妥議從之○以四川川北道福崧為甘肅按察使○癸卯

上御洞明堂勾到廣東福建秋審情實罪犯停決廣東斬犯九人絞犯四人福建斬犯二人絞犯一人餘一百二十四人予勾○諭軍機大臣等據文綬奏現在軍需奏銷辦理完竣

懇請進京陛見並請旨將總督印務派員接辦等語文綬著准其來京入覲所有總督印務著交特成額暫行署理但特成額明年亦有帶領土司入覲之事文綬接奉此旨著迅速起程來京陛見以便今冬即行回川將此傳諭文綬並令特成額知之○護貴州巡撫布政使李本疏報麻哈普安湄潭施秉畢節五州縣乾隆四十三年分開墾額內田八十九畝有奇額外田十畝有奇○甲辰大學士

管閩浙總督三寶奏閩地西北阻山東南沿海隣省倉貯不能流通全賴本省調劑查漳泉二府戶密人稠該處產米無多藉臺灣一府穀石接濟常平倉額尚宜加貯請照乾隆二十二年舊例於臺郡捐收監穀二十萬石半貯臺倉半運貯漳泉二府祇許本地民人及在臺灣貿易之閩粵商人報捐其餘不得濫冒俟足數即停報聞○賑卹長蘆所屬青縣被水成災竈戶○乙巳

上御洞明堂勾到奉天陝西浙江秋審情實罪犯停決奉天斬犯二人絞犯十人陝西斬犯四人絞犯六人浙江絞犯二人餘九十五人予勾○諭軍機大臣等本月十八日據阿桂等奏於十五日開放王家莊引河勢甚暢順等因一摺欣慰之餘盼望喜音益切距今又經七日未見續奏時切縈懷開放引河以後不即具摺郵遞自係河流順適形勢並無變動無可入告之事奏報稍稀無足為異但朕

宵旰屢念計日而待不能不急望耳前奏稱十五日子時開放引河即奔赴下注本日卯刻過六十里外之三家莊午刻又過山東連界之和好地方等語是黃流趨瀉甚駛毫無阻滯大溜業經掣動按日而計似河頭應早抵江南境若已過徐州地面則是黃河已歸故道全局大定可無他慮惟當將順黃壩上緊接築及早合龍以慰懸盼順黃壩合龍以後阿桂即可起程回京其十六堡漫口補還隄工及一切善後事宜交與袁守侗陳輝祖辦理亦自能妥協也此旨著由六百里加緊發往仍著將現在引河下注形勢如何及定於何日可以合龍即行加緊覆奏○丙午吏部等部議准原任雲南巡撫裴宗錫奏稱普洱府城內添設迤南道一員應建衙署並無隙地請改府署為道署寧洱縣署為府署即將典史署酌添房屋作縣署另建典史署一所均飭確估辦理從之○丁未

上詣

大高殿

壽皇殿行禮○還宮○諭軍機大臣等前據高晉奏豫省黃河漫口下注之水均歸賈魯河東注洪澤湖等語賈魯河係元時所開其時黃水即由此河經行自行歸入江南必非徑穿洪澤湖下注其後賈魯河於何時梗塞改用今河豫省必有可考著傳諭袁守侗於儀工合龍之後將賈魯河經由故道及興廢源委詳細查明奏聞至昨歲豫省漫下之水賴有賈魯河容納黃流不至旁溢是賈魯河未嘗不可留以有備但未知其河現在是否全行淤阻或尚可通流受何處來水消歸何處及元季開河時由何處歸入江南是否於洪湖無礙均須逐一查明或可酌量疏濬即據實勘估繪圖貼說具奏覈實興舉以備不虞亦未嘗非善後之一策將此傳諭袁守侗遵照查辦並令阿桂等知之○戊申

孝慈高皇后忌辰遣官祭

福陵諭明歲又屆庚子鄉試正科各省正副考官應行陸續簡派而雲貴省向例於四月中旬進本其時朕南巡尚未回鑾不能豫行考試而今歲考差後尚有陸續到京銷假及陞補各員應與考者亦頗不少未便獨令向隅莫若於今冬再行考試一次除本年已出各省差及上年會試曾經分校人員毋庸考試外著交吏部查明各衙門應行考試人員

開具清單於十月中旬奏請考試以備簡用其不願考者聽○又諭據李侍堯奏普洱鎮總兵張和冒瘴染疾病勢沉重一時恐難痊愈等語張和患病甚重難冀速痊著解任調理俟病痊奏聞另行簡用其普洱鎮總兵員缺緊要著喀木齊布調補所遺鶴麗鎮總兵員缺著羅江麟補授○又諭軍機大臣等普洱鎮總兵張和於土夷仇殺細故不加審察輕率帶兵前往致士卒觸瘴患病者多本欲

治其冒昧之罪念其心尚近勇往姑免深究今既冒瘴染疾勢甚沉重若竟因此不起究屬沒於王事亦屬可憫著傳諭李侍堯如張和因病身故即行奏聞候朕酌量加恩以示優卹是日起

上以孟冬享

太廟齋戒三日 已酉諭前因文綬覆奏查催滇銅開幫一摺由五百里驛遞李湖奏督催銅運及截解廣西毆陽鎗二摺亦由四百里馳遞均屬非是當經傳諭各省督撫非遇地方要務及應請旨速辦之事不得擅動驛馬今日圖思德等奏滇銅頭運第一起船隻入境日期由驛馳奏已覺無謂而黃模因緝獲逃兵解省審辦亦由四百里馳遞更屬不曉事體黃模著傳旨申飭兩人所奏皆屬尋常案件止應差人齎進豈可紛紛濫用郵傳著再明白通諭各督撫轉行例得具摺之各衙門嗣後奏摺除地方緊要事件應即請旨速

辦及詢問晴雨情形并交查新正展賑借種等事諭令由驛覆奏者方准酌量輕重緩急由幾百里馳遞其餘概不許濫動驛馬違者照例議處 又諭戶部奏准關鳳陽關盈餘均屬短少請查照三年中虧短最多之數准闕計十六萬五千餘兩著落寅著照數賠補鳳陽關計十三萬九千五百餘兩著落福保基厚名下按照經徵日月照數賠補二摺固屬照例辦理但各該監督所稱上游歉收漫工未竣以致貨船稀少亦屬實在情形著將淮關短少之十六萬五千餘兩鳳陽關短少之十三萬九千五百餘兩加恩令各該監督賠補十分之一以示薄懲後不得援以為例 命吏部尚書永貴在紫禁城內騎馬 庚戌

孝敬憲皇后忌辰遣官祭

泰陵 諭戶部議署陝甘總督畢沅奏請將臯蘭等三十七廳州縣被災地畝應免銀糧於

四十四年補蠲之處毋庸議一摺甘肅地丁額徵銀糧已於乾隆四十三年普行蠲免恩無屢邀自屬照例議駁第念甘省地瘠民貧與他省情形迥異著再加恩照三十六年之例將臯蘭等三十七廳州縣夏禾被災應免正銀一萬三千一百七十餘兩番糧七十四石四斗零於四十四年補行蠲免以示朕軫念邊氓有加無已之至意 是月署江南河道總督李奉翰奏邳睢廳屬峯山迤上向來黃河坐灣形勢兜曲計長二十餘里南岸張家瓦房及小三堡兩處建築埽壩抵禦每歲修防上年黃水盛漲於灘上衝刷河形一道溜勢直趨小三堡瓦房工一帶現勘舊河沙積河底仰高新河較灘面已深一丈有餘河形徑直下注頗順應乘此水涸時於舊河頭築壩攔截不令通流俾大溜全歸新河以期衝刷寬深暢流直注其舊河尾仍令黃水倒漾入內一律淤平查該處黃河北岸俱係山

根溜向北趨並無妨礙舊河淤高後不但小  
三堡瓦房工埽壩可以停修并南岸隄工亦  
資穩固現飭道廳尅日趨築得旨嘉獎江  
南提督李奉堯奏蒞任後通閱各營技藝陸  
操以提標中左前後城守五營及福山劉河  
吳淞三營為最右營川沙南匯柘林金山五  
營次之太湖平望青村三營又次之水操以  
外海繒船各船為最太湖為次再查定例出  
洋船隻書刻船甲字號於桅蓬船旁又船主  
或倩人代駕須赴地方官呈明如有為匪情  
事主可默記字號并有檔案可稽不難查  
緝今江省出洋船隻船旁字號僅用油書匪  
船易於剗刮桅蓬亦不遵奉書名又私自令  
人代駕迨犯案緝捕輾轉根求實由奉行不  
力業咨督撫轉飭照例遵辦報聞安徽布  
政使農起奏安省因河南儀封漫口尚未合  
龍黃水下注亳州蒙城懷遠鳳陽靈璧鳳臺  
壽州宿州泗州五河盱眙等州縣及鳳陽長

淮泗州三衛被淹蒙恩賞給川米一萬二千  
石又八月分一月口糧民情均極寧貼現查  
覈被水重輕分別給賑期於無濫無遺得旨  
一切給賑之事安慎為之俾災黎均受實惠  
安徽按察使汪圻奏謝調任恩得旨以汝  
不肯實力故調用莫自以為得計慎之浙  
江巡撫王亶望奏仁和海寧一帶海塘內東  
塘韓家池逍字號至莽字號共長二百八十  
丈年久柴椿朽壞本年夏秋塘外護沙被刷  
柴埽抽卸請動項修整報聞雲南按察使  
徐嗣曾奏謝調任恩並請陞見得旨不必來  
又批辦銅一事尤宜上緊督催勉之與總督  
看

大清高宗法天隆運至誠先覺體元立極敷文  
奮武孝慈神聖純皇帝實錄卷之一千九十一

實錄卷一千九十一

主

大清高宗法天隆運至誠先覺體元立極敷文  
奮武孝慈神聖純皇帝實錄卷之一千九十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣廣柱

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥冬十月辛亥朔享

太廟

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵遣官祭

孝賢皇后陵

端慧皇太子園寢○頒乾隆四十五年時憲

書諭曰朕明春巡幸江浙於正月十二

日啟鑒所有一切事宜著各該衙門照例

豫備又諭曰朕明春巡幸江浙所有供

宿頓次皆出自帑項絲毫不以累民第扈

從官兵以及外省接駕人等輻輳雲集經

過地方米糧價值恐一時或致騰踴著照從

前之例於江浙二省冬兌漕糧內各截留十

萬石在水陸駐蹕地方分廠平糶即令漕運

總督及各該督撫妥協辦理該部即遵諭行

○壬子

上御乾清門聽政諭據李侍堯奏普洱鎮總

兵張和因野匪召齋與喇蘇占烘讐殺滋事

帶兵追捕回至思茅冒瘴染病身故等語張

和於土夷讐殺細故不加審察輕率前往難

實錄卷九十二

二

免冒昧之咎但念其心尚近勇往今既因冒

瘴染病身故究屬沒於王事亦為可憫張和

著加恩照從前瘴亡之例議卹○實授莊存

與為禮部右侍郎○以哈喇沙爾辦事大臣

海成太僕寺卿瑪興阿俱為內閣學士兼禮

部侍郎○癸丑貴州重安司土吏目張夢緣

事革職以其子若齡襲職○甲寅

上御懋勤殿勾到湖廣情實罪犯停決斬犯二

十六人絞犯五人餘九十八人予勾○諭軍

機大臣等前據陳輝祖奏豫省現有堵築工

程及查勘賑卹等務所需差委辦事之員倍

於往昔查有原任湖北荊州府知府永福現

在丁憂回旗請於百日後照例引見時發往

河南差遣委用等語今日該旗將永福帶領

引見仍令在原衙門行走矣旗員由外任丁

憂回旗百日後該旗帶領引見例應在原衙

門行走近年來復令吏部查明此等人員於

每歲十月帶領引見一次如有堪勝外任者

實錄卷九十二

上

仍記名簡用。從無各督撫奏請指發外省補用之例。陳輝祖以豫省現辦工賑。請將永福發往。不過借此為詞。其實豫省現在工次人員甚多。遇事足供委使。豈專恃永福一人辦事乎。若此端一開。旗員必視督撫奏留為捷徑。紛紛懇請。日久必致滋沅弊。並致旗員無一回旗守制。在原衙門行走。於情理亦未允協。如冬間引見時。朕看永福若尚能勝外任。原可記名候簡。然亦須俟得缺後。方可發往。

實錄卷一千九十二

四

並非一經記名。即得邀簡發也。陳輝祖前奏不可行。將此諭令知之。○大學士等議准。成都將軍特成額等奏。兩金川寧謐。額設兵四千餘名。可裁千餘。將米折一項酌增。本折兼支。不另給鹽糧。歲收足敷搭放。仍於川省腹地各營酌裁兵千五百名。以其糧資邊餉。再裁兵後。並應如所請。將所設糧務廳七員。留五員。裁原駐阿爾古知州。歸美諾同知轄。存兵併為五營。責成總兵一。遊擊二。都司一。守

備四千總外委四十四員管領。換班屯練。兵并裁從之。○禮部奏請欽定祭

北海神廟官。得旨。著山海關副都統致祭。○刑部議奏。例載傷人夥盜。姑准自首。未將事未發自首。及聞拏投首者。分晰註明。應請嗣後事未發而自首者。擬軍。到軍逃者。加等。聞拏投首者。發黑龍江等處。給披甲人為奴。逃者。請旨即行正法。從之。○工部議駁。河東河道總督袁守侗奏。原任總河姚立德疏報。乾

實錄卷一千九十二

五

隆四十三年。豫省黃河南北岸搶修。歲修共用銀二十三萬三千九百二十六兩有奇。經部駁以為數太多。不准銷。奏請飭臣據實刪減。經臣行查各廳。並無浮冒。請銷到部。查該督所開。加高土工。用銀四萬兩。係奏借庫項。分年扣還。應准照原奏辦理。惟歲搶修銀比較往年。均有浮多。仍應飭令覈刪。得旨。工部議駁。袁守侗等覆奏。豫省黃河報銷歲搶修工程銀數一摺。所駁各條。俱甚得理。即問之

姚立德自亦無可置辯。况既經漫口之後。上游因何復有險工。需費轉多於往歲。更屬情理之不可解者。但恐該省去年多費。果有不得已之實情。並非屬員浮冒。則又不可不覈實辦理。今阿桂現駐河干。督辦壩工。無難就近查覈。著傳諭阿桂。即會同袁守侗。秉公確覈。或係浮冒應賠。抑係實用應銷。即行分晰。據實具奏。再降諭旨。將此由六百里發往工部原摺。著發寄閱看。尋阿桂袁守侗會奏。遵

實錄卷二十九上

六

旨明查暗訪。證以臣等在工所見。上年河水泛漲異常。工險費重。修築鑲墊。至年終始畢。時日較久。除加高土工銀四萬兩。餘十九萬三千九百二十六兩有奇。均係實工實用。應請准銷。從之。○乙卯

上幸皇八子永璇第。○吏部議准。江蘇巡撫楊魁咨稱。海門地廣。同知查照難周。照磨僅管監獄。請將廳境各港商船漁船。責令稽查。督緝私鹽。承辦鬪毆姦盜案件。從之。○丙辰

上幸寧壽宮。御皇極殿。賜王大臣等茶。○御閱是樓。賜皇子皇孫皇曾孫。王大臣等宴。○諭曰。三寶奏。福建臺灣道張棟。三年屆滿。應遵員吏調。請將興泉永道俞成調補等語。俞成著准其調補臺灣道員缺。至摺內稱興泉永道係由部請旨之缺。應請簡員補用。固屬照例辦理。但俞成遺缺。既請員簡放。而張棟回至內地。又復空閒待補。仍須另請題缺。與其多此周折。何如即令對調之為直捷耶。所有

興泉永道員缺。著即令張棟補授。嗣後如有臺灣道府。期滿調回者。即照此辦理。著為令。○予故烏喇特扎薩克鎮國公噶勒桑羅壘祭如例。○丁巳

上御懋勤殿。勾到江西安徽江蘇情實罪犯。停決江西斬犯二人。絞犯一人。安徽斬犯三人。絞犯一人。江蘇斬犯十一人。絞犯四人。餘百二十六人予勾。○諭曰。本日勾到江西情實人犯。內有曹守祥一名。因向總麻服叔曹振

榮索欠起釁致毆傷曹振榮身死刑部辦理秋審將曹守祥擬入情實而冊內看語稱死者理曲甚屬非是曹振榮係曹守祥總麻服叔賒欠錢文曹守祥本不應向其取討常人於鄉黨間敦睦姍任卹之道尚宜緩急相通矧有服叔姪何得以賒用錢文屢向逼索致啟衅端犯尊毆斃曹守祥之罪於情理均無可寬更不必復論死者之曲直况叔用姪錢理本非曲刑部無端加入此語豈尚欲為干犯尊屬之兇徒開釋乎明刑所以弼教似此妄加看語何以飭風化而正倫常嗣後刑部辦理秋讞務當斟酌允協舉一反三勿再舛誤今日江西勾到曹守祥業經予勾刑部堂官著傳旨申飭並通諭中外問刑衙門知之

○已未

上幸

皇十五子寶璣所○諭前據三寶奏本年恩科福建應試士子內郭鍾岳一名年九十九歲

陳應騰等三名均年逾八旬又據畢沅奏陝西應試士子郭元標等五名年皆八十以上舒常奏貴州應試士子章彥一名現年八十等語伊等暨序寒儒齒臻耄耄尚赴場屋壯志足嘉今各省榜發該生等俱未獲雋宜敷渥澤以廣作人郭鍾岳陳應騰宋耀謝士豪郭元標劉夢花馮出佐徐常淳牛文連章彥俱著加恩賞給舉人一體會試俾遂其觀光夙願用昭獎惠耆年之至意○庚申諭曰文綬題報四川松潘廳絞犯劉經柱在監病故一本已批交法司矣該犯於五月二十日病斃於獄該督直至九月十六日始行具題相距四月之久稽延太甚該督咎有難辭文綬著交部議處並著查明此案或係該廳呈報稽延抑係具報後上司未即查辦必須逐一查明將玩忽各員查取職名分別交部嚴議至各省於監犯患病之事上司漫無稽查積習相沿於吏治大有關礙此不過借監犯患

病為由。希圖展限而已。是以曾降諭旨。定以限期。雖畧有檢制。而有司蒼滑者。仍有以監犯患病。及因公出境。藉詞展限逾期者。立法尚未盡善。其應作何酌定章程。不致捏混之處。著交刑部另行妥議具奏。尋議。凡命案正犯患病。督撫接到州縣通詳。即報部。仍詳覈假捏者。嚴叅。倘俟部臣查出弊竇。將督撫並叅。至州縣因公出境。如捕蝗。勘災。監賑。有豫報起止日期可查。覈對相符。准其扣限。勘河

防險。歲有定日。鄰邑相驗。往返不過三四日。或一兩日。無庸展限。會審會勘。應擇本任無難結命案者。不得混入展限例內。再秋審情實人犯。遇病故。州縣立詳。督撫接到報部。不得過十日。其派員相驗。及研訊禁卒。有無凌虐。除在途日。報部不得過一月。踰限議處。從之。○諭軍機大臣等。據勒爾謹奏。乾隆四十六年。新疆各處備用綢緞。開明顏色丈尺數目清單。請勅交山東。山西。巡撫。暨江寧。蘇州。

杭州。各織造。照數織辦。解送來甘。以便分交各該處備用等語。著傳諭國泰。巴延三。穆騰額。全德。徵瑞。即照勒爾謹單開所需各項綢緞。如式妥協製辦。務使質地厚實。顏色鮮明。不得稍有粗糙輕減。並著遴委妥員。沿途小心護解。毋得稍有徽污。致滋挑駁。所有勒爾謹原摺清單。並著鈔寄閱看。至此項緞匹。解到甘省時。即著該督詳細點驗。派員轉解伊犁等處。並飭接解之員。一體小心照料。以專

責成。將此傳諭。巴延三等。併諭勒爾謹知之。○又諭曰。步軍統領衙門奏。據河南鄧州民婦王焦氏。呈控伊姪王維坤等。圖占產業。將伊子毆打逃走。並屢行逼伊改嫁。因其不允。即將伊吊打。並割去左乳。刃傷胃脘數處。及赴州府控告。並不審訊。將伊掌責發賣等因。當經委員傳穩婆細驗。所控傷痕。均係屬實等語。王焦氏所控。如果屬實。則王維坤以親姪圖占家產。輒敢將孀孀屢次逼嫁。並肆行

吊打割傷其情罪甚為可惡。必當嚴訊明確。重治其罪。但究係該婦一面之詞。難成定讞。此案係乾隆四十一年之事。尚在陳輝祖未到豫省以前。著交與陳輝祖提齊案犯。將所控情節逐一秉公嚴審。務得確情。據實奏聞。按律定擬具奏。王焦氏即著照例解往河南質訊。所有原摺並寄閱看。將此諭令知之。

○壬戌

上幸圓明園。○諭前經降旨。將陝西省延安榆

林綏德等三府州屬。自乾隆二十六年起。至三十七年止。民欠常平倉穀若干。令該撫查明實數。奏聞豁免。茲據畢沅奏稱。延榆綏三府州所屬膚施等十四州縣。自乾隆二十六年起。至三十七年止。民欠常平倉共京斗糧一十二萬三千七百六十八石零。係實欠在民確數等語。著加恩概予豁免。又延榆綏三府州各屬。尚有乾隆二十年起到三十七年止。民欠社倉京斗糧一萬三千一百二十五

石零。亦著加恩一并豁免。俾邊地閭閻永享盈寧之慶。該部即遵諭行。廣東巡撫李質穎疏報恩平新興高要乾隆四十三年分開墾荒地七頃三十六畝有奇。西藏辦事大臣恒瑞等奏恭奉恩詔。普免天下錢糧。西藏那克舒三十九家番子等應交馬銀三百九十一兩有奇。請照乾隆三十六年普免恩旨一體蠲免從之。伊犁將軍伊勒圖等奏據理藩院咨稱。明年班禪額爾德尼來朝。哲哩木盟長齊默特多爾濟等並喀爾喀四部落願捐馬駝資助行走。已蒙俞允。並行知內外扎薩克等願捐者。聽咨臣通諭所屬查伊犁所屬土爾扈特和碩特等生計較前稍裕。而牲畜甚少。即捐助亦無大裨。且游牧處遠。資送亦不能達。似不必通諭得旨嘉獎。○旌表守正被戕山東臨清州民劉天哲妻祝氏。○癸亥。以侍講學士觀文為武鄉試正考官。編修秦潮為副考官。甲子。禮部奏冬至次日慶賀禮

儀得旨今年冬至次日著停止行禮○豁除廣東番禺縣水衝沙田二頃九十七畝有奇額賦○乙丑

上幸皇次孫綿思第○還宮○吏部議奏酌改現行則例一月選親老改近之員行查原籍督撫咨覆到部在十二日以前者員缺歸本月選其十三日以後者員缺歸下月選一例載盛京本處司員除戶部郎中將軍衙門主事二缺外餘專以盛京禮兵二部缺陞補設

遇兩處均有應行迴避人勢必無缺可得應請無庸迴避一保用人員雖由司道等申詳實專歸督撫覈定薦舉不實自應重議督撫請將舊例司道降三級調用者改議督撫為降三級調用舊例司道革職者改議督撫為革職其司道等官即照議處督撫舊例一佐雜等官驟署正印易致貽誤申詳雖由司道准駁仍督撫為政請將准委之督撫同司道一例降一級調用一迴避候補之漢員請照

滿員例無論雙單月即用一裁缺人員請留本省遇相當缺出補其在京各缺及由部陞選之外任官尚未領憑赴任并各省教職設遇裁缺仍歸部照例不論雙單月即用一奏劾曾經保舉官犯貪劣款漏敘原保官者舊例罰俸六個月應酌增為降一級留任其教職保陞知縣復請改教并以才力不及劾參漏敘原保官者舊例降二級調用應酌減為罰俸一年一承追廢員錢糧任所無可追賠

責令歸旗回籍咨該旗稽查產變抵舊例仍將任所該管官降俸處分俟交完日查銷但原任地方已無著追之人請定為罰俸一年議結一舊例白晝夥眾搶奪未經拒捕傷人該管官照竊案例查議未免太寬請計奪贓十兩以上不滿貫者照竊案滿貫例察議滿貫者照盜案叅處一捕役誣良為竊舊例未載印捕官處分應將誣竊私刑害人致死者照誣良為盜致死例叅處其未經致死者酌

減為降一級調用。道府降一級留任。按察使罰俸一年。督撫罰俸六個月。失察私鹽過境。僅有武職處分。請嗣後文職。即照武職例。查係大夥。罰俸一年。小夥。罰俸六個月。舊例失察賭博之員。將前拏獲賭具議敘之加級紀錄註銷。是因一時公過。沒其前功。請嗣後文武官失察賭博。仍照例議處。免其查銷。從前加級紀錄。各省試用雜職內。應補者。照例聽督撫酌量才具。分別咨補咨署。其初任試用者。只准咨部試署。俟試看期滿。稱職實授。例載各項坐補人。查明原缺。應歸月選者。單月遇缺補。雙月缺出。留下月坐補。恐致員缺久懸。請嗣後原缺一出。無論單雙月。即行補用。例載恩詔加級。以奉旨日為限。如陞任在後者。將加一級。改紀錄一次。惟勞績議敘加級。陞任者。即於陞任內加級。一事兩歧。請嗣後比照畫一。例載祖籍寄籍。均應迴避。由寄籍改歸者。其寄籍應否迴避。未

議及請酌定期限。如改歸在三十年以上者。毋庸迴避。若尚在三十年內。仍迴避。併行文各督撫。飭所屬官。及在籍候補候選。人將何年月日。改歸詳報。限一年內。送部注冊。在部候缺者。部中出示。飭於投供驗到時。取具同鄉官印結。具呈報明。從之。○兵部議覆。大學士管雲貴總督李侍堯奏。開化鎮標右營軍械失火。該管官弁匿報。總兵劉國樑。不即時查叅。均應照例降調。查劉國樑無級可降。應請革任。得旨。劉國樑前因徇庇守備蕭掄第。經李侍堯奏。部議降調。朕因其宣力行間。特加恩降旨留任。已屬從寬。今該鎮於軍械失火一案。遷延一月。不即查揭請叅。轉以駁盤軍械。模稜率轉。安望其整飭營伍。劉國樑難勝專閫之任。本應即予罷斥。但念其前在金川軍營。頗知奮勉出力。著解任來京。交該部帶領引見。候朕再降諭旨。餘依議。○旌表守正捐軀浙江麗水縣民葉光妻呂氏。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千九十二

大清高宗法天隆運至誠先覺體元立極敷文  
奮武孝慈神聖純皇帝實錄卷之一千九十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲駙都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲駙都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥十月丙寅

上御乾清門聽政。○御懋勤殿。勾到河南山東。  
情實罪犯。停決河南斬犯六人。絞犯六人。山  
東斬犯十人。絞犯五人。餘百一十人予勾。○  
諭曰。前日勾到湖廣省秋審人犯。內有王成。  
砍殺江文珍等一家六命。其子王喜娃。應行  
緣坐。年僅十歲。今日勾到山東省秋審人犯。  
內有馮吉。殺死馮文煒一家六命。其子馮大  
甫。年僅六歲。馮二甫。年僅二歲。刑部俱擬入  
情實應斬。本屬例所宜然。王成。馮吉。克惡性

成。砍殺一家六命。慘毒已極。即將伊全家抵死。僅足相償。實為情真罪當。而刑部定例。將殺六命之已絕嗣者。其子均擬斬決。若尚未絕嗣者。擬斬監候。而於緣坐者之年歲。未為區別。因念二犯緣坐之子。犯事時年僅數歲。尚在童稚。無知。若概予駢誅。究覺不忍。是以均未予勾。此即朕之姑息。然仰體

上天好生之心。毋寧失之厚耳。惟是此等兇孽。留其喘息。已屬法外之仁。若伊等長成後。或遇赦減等釋宥。仍聽婚配。俾有遺孽。將何以昭示平允。併何以慰死者之心。嗣後遇有此等兇犯緣坐之子。年在十一歲以上者。仍照現行之例辦理。如在十歲以下者。俱著問擬斬候。永遠監禁。雖遇赦不准減釋。令其老死。囹圄。庶於準情之中。仍不廢法。所有此次未勾之王喜娃。馮大甫。馮二甫。即照此例行。著為令。將此通諭內外。問刑衙門知之。○諭軍機大臣等。本年各直省雨暘時若。秋成俱屬

豐稔。惟豫省儀封考城等各州縣。因堵築漫口。尚未歲工。瀕水田禾。不能耕穫。安徽之亳州蒙城等處。為黃水下注之區。地畝亦未涸出。貧民口食維艱。屢經降旨。加恩賑卹。又甘肅本屬積歉之區。本年皋蘭等四十一廳州縣。所種夏禾。亦間有被雹被水。及黃疸蟲傷者。雖經降旨。該督統率各屬。切實查勘。妥協賑卹。災黎不致失所。但恐明春正賑已畢。尚屆青黃不接之時。民食不無拮据。是否尚需加賑。以資接濟。著傳諭該督撫等。即行妥酌覆奏。候朕於新正降旨。至湖北省於六月中旬。荆江水漲。沿江之鍾祥京山等九州縣。隄垸漫漶。田禾被淹。及直隸大城武清等九縣。江蘇之阜寧清河等九州縣。衛低窪地畝。亦間有被水者。雖成災不過一隅。業據該督撫題報。分別賑卹。明春是否尚須量予加恩。或酌借口糧牛具之處。亦著該督撫查明覆奏。候朕酌量降旨。此旨。甘肅由五百里發往。湖

北江蘇安徽河南直隸由三百里發往仍各按原發里數由驛覆奏○吏部議覆廣西布政使朱椿疏稱思恩府屬有上林縣一缺又有上林縣一缺自唐宋來並設兩知縣印文相同不足以覈實昭信應如所請改鑄土上林縣印從之○以通政使司副使海寧為太僕寺卿○以湖南永綏協副將孫起蛟為雲南開化鎮總兵○丁卯月食○戊辰吏部議覆湖北巡撫鄭大進奏失入斬絞據詳率

轉之鄖陽府知府邢璵署臬司吳之黼均應照例降三級調用得旨邢璵係本管知府前據該縣詳報即行轉詳致將軍流等罪錯擬斬絞罪在失入非尋常率轉可比邢璵著照部議降三級調用至吳之黼係道員署理臬篆尚屬統轄之官著該督等出具考語送部引見候朕再降諭旨○刑部議覆湖北巡撫鄭大進奏羅田縣民曾志廣因謀產致死胞叔曾生迴滅倫克犯依律應凌遲處死得旨

此案曾志廣因謀奪繼產將期親胞叔曾生迴用石毆斃情罪極為可惡該撫照律擬以凌遲處死並聲明曾文玉無嗣應聽族戶另行議立其二房三房現因爭繼釀命均不准其繼立所議甚是曾志廣著即凌遲處死餘依議嗣後各省如有似此爭繼釀命者並應照此辦理著為令○已已

上御懋勤殿勾到山西直隸情實罪犯停決山西斬犯七人絞犯二人直隸斬犯二人絞犯十二人餘百三十二人予勾○諭曰戶部議駁雲南省乾隆四十一二兩年平糶溢額兵米及四十三年平糶常平並溢額兵米各案並不遵照定例辦理其多減價銀統在承辦各員名下著追等語此案屢經戶部駁查而該撫咨覆情節總屬支離既不按照定例辦理復不遵照題案覈辦如謂必須大加酌減亦並未經遵旨奏明此皆裴宗錫辦理不善所致所有各案多減價銀即著落裴宗錫名

下追賠嗣後如再有違例多減之處。即照戶部所議辦理。○又諭戶部奏。許墅關稅贏餘短少。請查照三年中虧短最多之八萬八千三百八十二兩零著落前任監督舒文現任監督全德各按經徵月日照數分賠。固屬照例辦理。但該監督所稱。因上年川廣歉收。米船稀少。以致錢糧不能旺盛。亦屬實在情形。著照前日所辦淮安鳳陽兩關之例。將許墅關短少贏餘之八萬八千三百八十二兩零。

加恩令前後任監督賠補十分之一。以示薄懲。後不得援以為例。○諭軍機大臣等。本日楊景素有三百里馳奏之摺。朕意其或有地方緊要事件。及披閱係覆奏詢問該省被水各州縣。明春有無應行加恩之事。未免拘泥。如果被災較重之大城武清各縣貧民急需查辦加賑。以資口食。自應遵旨由驛具奏。候朕酌量降旨。茲既查明被水各州縣。但係一隅偏災。已照例題請。分別賑借蠲緩。足資安

頓。現在別無可辦理之處。直隸距京不遠。即付便差人齎遞足矣。何必急付郵傳耶。將此遇便諭令知之。○刑部議奏發新疆人犯經軍機大臣奏准。視情罪輕重分別種地當差。給兵丁為奴。請纂入例冊。行知直省。問刑衙門遵照辦理。其為奴及種地當差人逃者。請旨即行正法。從之。○賑卹河南儀封杞縣商邱寧陵永城鹿邑睢州考城柘城汲縣淇縣新鄉濬縣延津輝縣湯陰河內武陟修武十

九州縣。本年被水災民。並予緩徵。○庚午補行冊封

順妃

誠嬪

循嬪命協辦大學士英廉為正使。禮部侍郎

阿肅為副使。持節冊封

順嬪鈕祜祿氏為

順妃。冊文曰。朕惟璇扉選德。承慶澤於椒塗。繆冊鐫華。晉褒封於芝檢。秩膺申錫。典協榮

稱爾順嬪鈕祜祿氏毓本世家訓嫺內則率  
歲規之令範壹教彌敦揚圖史之清芬彝章  
式備既鴻庥之克副宜象服之增輝茲奉  
皇太后懿旨封爾為順妃爾其煒管延禋益茂  
柔嘉之譽鳴璜奉職倍昭敬慎之儀欽哉命  
協辦大學士程景伊為正使禮部侍郎謝墀  
為副使持節冊封  
貴人鈕祜祿氏為

誠嬪冊文曰朕惟紫庭列職聿揚鳴璜之芬

丹綺褒封宜備錫鏐之典特加命秩丕煥彝  
章爾貴人鈕祜祿氏稟質粹和禋躬端謹協  
芳型於蘭池內則無違奉介祉於

璿闈

慈愉克荷用賁龍光之錫爰增翟服之輝茲奉  
皇太后懿旨封爾為誠嬪爾其敬事彌昭懋衍  
床嘉之澤榮稱式副倍彰淑慎之儀欽哉命  
禮部尚書德保為正使禮部侍郎達椿為副  
使持節冊封

貴人伊爾根覺羅氏為

循嬪冊文曰朕惟彤閨率範宜茂秩之攸加  
紫掖延釐勉嘉稱之克副新綸式煥渥典斯  
彰爾貴人伊爾根覺羅氏毓自名家昭茲粹  
質播芳聲於椒殿壹教能嫺迓蕃祉於

萱闈

慈歡懋洽既協鳴璜之譽爰宣鏤冊之恩茲奉  
皇太后懿旨封爾為循嬪爾其奉職彌虔荷鴻  
庥而衍慶持榮益慎膺象服以增輝欽哉○

諭軍機大臣等前因俄羅斯人私行越境被  
擒袞布等三人得受伊物釋放特旨將袞布  
等拏赴境上令伊國人瑪玉爾眼同正法此  
正天朝法無不行該國應知敬畏昨傳玉奏  
據瑪玉爾云未曾給還伊等馬四匹烏鎗四  
桿等語其卑鄙已極著傳諭博清額等即傳  
諭俄羅斯固畢爾那托爾等此事原因爾國  
人犯法越境起釁大皇帝照原定章程特申  
天朝憲典將受爾罪人物件之犯正法爾等

稍有人心。即應將越境之犯擒獻。一同正法。今不如此辦理。但知索及微物。豈所索之物。重於人命耶。爾國匪人行賄之物。例應入官。我天朝何惜此區區。即賞汝亦非所吝。况原係馬一匹。索稱四匹。尤為無恥。天朝如遇此等人。久寘之法矣。爾國若將越境人交出。天朝即給還爾等之物。亦無不可。博清額奉到此旨。即遵照辦理。並傳諭傅玉知之。○吏部議覆四川總督文綬奏稱。兩金川蕩平。新疆事件。悉由松茂道查辦。覈轉應如所請。該道另設屯政房典吏三名。增刑房典吏一名。從之。○豁免江蘇丹徒縣。坍沒江田九頃十畝。有奇額賦。○緩徵江蘇阜寧清河桃源安東鹽城宿遷海州沐陽大河九州縣。衛本年水災田畝新舊額賦。○辛未諭曰。朕明歲臨幸江浙。於正月十二日啟鑾。所有經行之山東江南浙江等省。將軍副都統城守尉內。自有今歲年班。來京陛見者。著傳諭經行各地方。

之將軍副都統城守尉等。如有今歲年班應來者。今年俱不必來京。於明歲年終再行陛見。○又諭據車布登扎布等奏。牧放駝羣之官兵。於三年內。孳生駝駒二千三百一十一隻。請照例賞給緞匹等項。貝勒德沁喇木丕勒。接續伊父管理駝羣。未滿三年。應否給予議敘之處。請旨等語。德沁喇木丕勒。雖未滿三年。伊父管理駝羣時。伊即隨同辦理。著加恩交部議敘。餘著照所奏賞給。○諭軍機大臣等。昨據禮部叅奏。筆帖式高煥告假赴廬龍縣修墳。現據直隸總督咨稱。該員並未到墳修理。僅至伊家當鋪內居住數日。旋即回京。請將該員交部議處等語。朕以該員捏稱告假出京。該地方官能留心察出虛捏情節。具報該督據實咨部。均屬認真辦事。諭令軍機大臣查明交部議敘。以示獎勵。及交查吏部。乃係該員告假時。即已行知該督轉飭該縣查覆。嗣因高煥並未到墳修理。止在當鋪停

留數日。即行回京。該縣具詳。該上司轉為咨部。則是因吏部知照。始行申覆。並非地方官之自行查辦矣。且此案。經前署總督英廉。於四月中。即檄飭該府縣查照。今該督於九月中。始咨覆吏部。相距已經半年。殊屬遲緩。外省如此等事件。往往視為無甚關要。任意怠延。積習難返。不可不隨事整飭。此案是否該縣稟報稽時。抑係申轉府道司院何處耽延之故。著楊景素。即速查明。據實具奏。再高煥捏稱修墳。告假出京。既未修理墳塋。其在該縣逗留多日。有無別項滋事之處。並著楊景素。訪查明確。一併覆奏。將此傳諭知之。○壬申。諭曰。正紅旗滿洲都統奏。據病痊起復之廣西永寧營守備德克積納。呈報病痊。請交兵部照例辦理等語。德克積納。係旗人。非綠營漢弁可比。自應該旗帶領引見。候朕酌量錄用。向來滿洲原無擢用綠營之例。朕令伊等補用綠營。本屬格外加恩。又定例。凡病痊

起復之員。必須坐補原缺。若將旗員交兵部照例辦理。必致待缺需時。於伊等並無益處。是以復令帶領引見。候朕定奪。乃伊等竟視外任為分所當然。一經病痊。仍思選補外省。轉以引見為畏難。殊未能體朕優卹旗人本意。且朕用旗員為外任。原因我滿洲風氣醇樸。騎射精嫻。令其訓練綠營。俾士衆知所觀感。乃行之日久。不但不能示以楷模。轉致染其惡習。惟圖在外養尊處優。是滿洲舊俗。因此日趨日下。於習尚人心。甚有關係。從前屢經降旨訓飭。乃尚不知悛改。因復明白宣諭。其各加猛省。毋再迷而不悟。嗣後病痊起復人員。俱著該旗帶領引見。候朕臨時降旨。如果人去得清。語習熟。騎射可觀。朕即以綠營之缺錄用。仍不令其守候原缺。德克積納。即照此例行。著為令。並通諭八旗及兵部知之。甲戌。諭曰。京城廣寧門外普濟堂。冬間貧民較多。所有經費米石。恐不敷用。著加恩。將

京倉氣頭廩底內較好之小米撥給三百石以資接濟。○乙亥。都察院奏貴州雲南四川廣東廣西五道向無協理御史遇掌道缺出但聽部臣開缺銓補請照江南等道例由臣等於各道內揀員轉補咨部開缺從之。○戶部議覆陝甘總督勒爾謹疏稱莊浪鹽茶廳安化正寧環縣撫彝廳張掖山丹永昌古浪寧夏寧朔平羅西寧秦州泰安禮縣十七廳州縣四十三年秋未被災額徵正銀畚糧應請蠲免惟上年已奉旨全行免徵應如所請照例於四十四年如數補免從之。○禮部議覆浙江巡撫王亶望疏稱温州府訓導移駐玉環廳應如所請該處文武生責令約束另給鈴記惟玉環城內查無平坦隙地可建文廟丁祭仍令赴府行禮從之。○丙子。諭曰此次考試差人員著吏部按照取定名次於二十七日帶領引見其未取者於二十八日帶領引見。○又諭莊浪佐領明泰窩賭放債

種種不法著革職拏交刑部嚴審定擬具奏涼州與莊浪相去不遠長額里係該處副都統於此等目無法紀之事一有風聞即當親往審辦乃並不親往紛紛遣官查辦致城守尉和亮恣情袒護通同掩飾太屬不曉事體謬誤極矣長額里著交部嚴加議處。○戶部議覆湖南巡撫李湖疏稱乾隆四十三年長沙善化巴陵蠲緩南米兵糧不敷借支各縣倉穀碾給應如所請於四十四五年各縣衛帶徵四十三年緩徵南米變價買還從之。○旌表守正被戕江蘇蕭縣民葛某妻彭氏。○丁丑。封閉廣東花縣中洞煤山從巡撫李質穎請也。○戊寅。上御乾清門聽政。○諭曰工部滿侍郎現在乏人所有惠齡右侍郎事務著福長安署理。○命吏部尚書永貴充經筵講官刑部左侍郎阿揚阿署經筵講官。○己卯。上御懋勤殿勾到朝審情實罪犯停決官犯斬

犯五人。絞犯八人。常犯。斬犯二十人。絞犯十人。餘二十一人。予勾。○諭曰。莊浪佐領明泰。不知卹愛兵丁。且多不法之事。長額里並未親身前往審辦。以致屬員通同隱匿。已交部嚴加議處矣。看來長額里不能辦理專城事務。著來京候旨。所遺涼州副都統員缺。著博成調補。博成所遺歸化城副都統員缺。著積善補授。○庚辰。

上詣

奉先殿

壽皇殿行禮。○是月。直隸總督楊景素奏。熱河唐三營空倉。經前督臣楊廷璋奏准。分歸承德府豐寧縣貯穀。茲據該府縣查詳。所屬倉甚寬。且去唐三營遠。應折毀變價。下部知之。○又奏。快雪堂彙帖。石刻四十四塊。木版三塊。係涿州馮氏原刻。謹購進。得旨覽。○兩江總督薩載奏。臣蒙面詢黃河故道。由賈魯河達於何處。謹考明潘季馴河防權所載黃河

故道。自丁家道口。由馬牧集趙家園。薊門出徐州小浮橋。查此一帶。即元賈魯所開。坐落商邱虞城夏邑永城碭山蕭縣境內。仍由徐州下達歸海。得旨覽。○署理江南河道總督李奉翰奏。洪澤湖。交冬水漸消。清口東西壩已趕築。水勢收束。流行迅疾。山安廳屬佃湖埝工。迎溜頂衝。宜籌辦鞏固。外河海防一帶。處湖下游。前經大汎汕掣。現在勘辦。惟邳州宿遷等處。運河淺工。因水勢充裕。暫緩挑報。

聞。

大清高宗法天隆運至誠先覺體元立極敷文奮武孝慈神聖純皇帝實錄卷之一千九十三

大清高宗法天隆運至誠先覺體元立極敷文奮武孝慈神聖純皇帝實錄卷之一千九十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理  
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務  
世襲騎都尉軍功加十九級隨帶加二級又加二級臣董誥內大臣戶部尚書鎮懋旗滿洲都統軍功紀錄五次  
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥十一月辛巳朔諭據伊

勒圖奏稱有來伊犁販賣牲畜之哈薩克帕勒頻等帶有卓勒齊文書其封面紙上有回字俄羅斯字各一段譯出閱看知是阿布勒比斯有事欲遣伊子布普往俄羅斯先致書於彼此係俄羅斯所付回書謹將原書呈奏等語哈薩克原有二心伊雖已臣服於我而俄羅斯亦係大部落與伊接壤哈薩克不免疑慮兩顧今觀哈薩克阿布勒比斯欲將伊子遣往俄羅斯托奔城請示於俄羅斯則伊

又欲歸附於彼。其意顯然。此事雖不甚關緊要。僅可作為不知。置之不議。但從前阿布賚來投時。俄羅斯曾有書來言。阿布賚係伊處之人。不可收留。朕亦勅覆以。阿布賚係爾之人。爾等如善為撫馭。必不來投我。今既不能使之安居樂業。致伊等投降我國。即係我國之人。揆之柔遠之意。豈能却之。爾又豈可干與乎。看來此等俱係無定之人。此際再有投來者。恐俄羅斯等咨呈領取。著將從前勅覆俄羅斯之文。鈔錄一分。寄與伊勒圖知之。將來如遇此等事。辦理亦得主意。並將現繕出回字。俄羅斯字書札。一併寄與閱看。○旌表守正被戕四川達州民屈貢妻唐氏。○癸未諭曰。杭州將軍富椿年邁不勝將軍之任。著來京候旨。所遺員缺。著加恩將傅玉補授。仍帶革職留任。○甲申遣官祭先醫之神。○諭據三寶奏。海壇鎮總兵陳汝捷染患風疾。年近六旬。醫治難痊。可否准其

休致回籍等語。陳汝捷著准其休致。回籍調理。所遺海壇鎮水師總兵員缺。著張繼勳補授。○蠲緩安徽亳州蒙城懷遠五河宿州鳳臺鳳陽靈璧泗州盱眙壽州等十一州縣并鳳陽長淮泗州三衛本年水災地畝應徵帶徵額賦。○丙戌諭曰。朕自踐阼以來。恭遇郊壇大祀。一切儀文典禮。悉本誠恪之心。敬謹將事以期

昭格。歷四十四年如一日。弗敢稍有懈弛。惟是

越歲庚子。朕春秋已屆七旬。雖自信精力如

舊。凡升降拜獻。尚可弗愆於儀。但迎

神進爵儀典繁重。若各

壇位前。俱仍親詣。轉恐過疲生憊。於精意或有

未孚。非所以展

精禋而答

鴻貺也。因思

正位上香獻爵。朕必當躬晉申虔。至

列祖。

列宗配位前上香。朕仍親致其獻帛爵諸禮。著自今年冬至。

南郊為始。令諸皇子代陳。過年

郊壇大典。命諸皇子敬侍觀禮。即所以豫教之也。庶朕稍節起跪之勞。一心得專於裸薦。此

非朕之敢萌怠念也。會典開載。

郊壇之祀。原可遣親王恭代。敬憶

皇祖聖壽六旬以後。因步履少艱。

大祀雖

遣官恭代。仍於

壇門

莊跪。以將誠意。今朕幸登拜。尚可如常。祇期省

曲節。以壹志。

明裡。並非耽安逸而倦於對越。凡天下臣民。皆

可諒朕本懷。即

上帝

祖

宗。亦必鑒朕忱悃。且不特此也。嗣是而至八旬。

能常如今日而不衰。亦不敢因年歲屢增。於裡祀稍有或軼。若蒙

上蒼眷佑。得遂朕之初願。至八十五歲歸政。惟當始終弗懈。以申朕敬

天法

祖之深衷耳。著各該衙門敬遵辦理。並通諭中外。知之。尋禮部議奏。恭遇

大祀。阿哥等豫在

壇上東西侍立。恭候

皇上詣

昊天上帝。

列祖。

列宗位前。各隨

皇上奠帛進俎如儀。至初獻。向係

昊天上帝位前獻爵後。

皇上旋讀祝位。跪候讀祝畢。始詣

列祖。

列宗位前獻爵。今

列祖。

列宗位前阿哥等分詣獻爵。臣等謹酌擬。阿哥等候。

皇上詣

昊天上帝位前獻爵時。即各分詣獻爵。亞獻終獻同。阿哥等奠獻帛爵畢。仍東西侍立。不隨行禮。從之。○又諭。據秦雄飛奏。奉新縣歲貢生王聘。年九十五歲。本年文闈應試。精神甚屬矍鑠。三場俱如期完卷。榜發未得中式等

語。王聘。老年應試。允稱士林人瑞。著加恩賞給舉人。准其一體會試。以遂寒窗績學之志。

○又諭。向年秋朝審人犯。內有業經緩決三次以上。人數積多者。每屆數年。勅刑部堂官量為查奏減等。以示法外之仁。今自乾隆四十一年十月查辦之後。至本年秋讞。擬入緩決者。又積有八千九百九十餘名。其數已為不少。著刑部堂官。將本年秋朝審。緩決至三次各犯。照前次查辦之例。逐一查明。各按所

犯情節。分別減等。以昭矜恤。至秋朝審情實

官犯。有經十次停勾者。並著查明。加恩改為緩決。其既改緩決以後。即有再閱秋朝審三次者。亦不得與常犯一例議減。朕辦理庶獄。每寬於民。而嚴於官。蓋以身為職官之人。自罹法網。與無知之小民不同。業由情實改入緩決。已邀寬典。自不當因其又經三次。遽予矜原。此次刑部辦理緩決減等各案。其官犯。即照此例。止須將其由實改緩。並閱過次數。

另列清單呈覽。此等或有應行加恩者。候朕隨時酌量降旨。刑部不得為之申請。著為令。該部即遵諭行。○又諭。據申保等奏。烏什屯田兵丁。每名收獲細糧。在十九石以上。請將管理屯田事務官員議叙。兵丁賞給鹽菜銀兩等語。著照所奏。管理屯田事務官員。著交部議敘。兵丁賞給一月鹽菜銀兩。○兵部議覆。察哈爾都統常青等奏。察哈爾鑲紅旗閑散餘丁。不敷挑差。於乾隆三十四年奏准。暫

懸護軍披甲缺百二十三名。俟十年後挑補。今年滿而兵丁可挑者。僅敷現在出差缺。應如所請。再展十年。從之。○丁亥。諭據鑒儀衛奏。民人充當校尉之榮志禮等。呈控順義縣差役人等。派令貼補老人差使。索詐錢文。各情節一摺。於吏治甚有關係。本朝丁歸糧辦。民間一切差徭。久經停免。即遇緊要工程。如河工城工之類。亦俱官給雇值。不令絲毫累民。何致順義縣復有派當老人差使。貼補錢文之事。不可不徹底查辦。至各州縣民人充當校尉。或係國初相沿。明季陋習。未及更定章程。致令濫竽。現在包衣閑散。未食錢糧之人尚多。儘可令其挑補校尉。充當差使。兼資養贍。何必令各州縣挑送鑒儀衛。假手胥吏。輾轉滋弊乎。此案著派軍機大臣會同英。庶程景伊并順天府詳加審訊。務得實情。秉公定擬具奏。如有干涉該縣事件。應行質訊之處。即行文楊景素。令將該縣管押來京。會同

審訊。亦無不可。至各縣因何設有老人名目。及民人充當校尉。作何停止挑補。改用包衣閑散之處。著一併查明。詳悉定擬具奏。尋奏該縣老人訊即鄉約地總別名。應交該督嚴行查察。毋得藉端滋事。縣役王化鵬等。索錢文。應請按律計贓定罪。知縣漫無覺察。交部議處。至鑒儀衛額設民校尉一千九百十六名。如請轡靜鞭。旗手。作樂。俱需熟手。遞相傳授。象所校尉。亦係隨象來京。嫻於餽養。難易生手。無庸停改。其帶養長差。請輦各項一千一百餘名。應請改用包衣閑散。俟缺出。以次補得旨。此項民尉。除應行酌留外。其籍隸大宛兩縣者。遇有缺出。鑒儀衛大臣及順天府送補甚便。不致滋弊。且使輦轂之民不失世業。可仍照舊例行。其籍隸外州縣者。陸續出缺改補。○旌表守正被戕山東單縣民趙來儀妻母氏。陝西安定縣民王寅妻田氏。○戊子。河南巡撫陳輝祖疏報。內鄉縣勸墾水

旱民田三頃八十畝有奇。○已丑諭據鄭大進奏。麻城縣生員李封。年八十三歲。天門縣生員李作朋。年八十一歲。本年文闈應試。精力尚健。三場完卷。榜發均未中式等語。李封。李作朋。俱著加恩賞給舉人。准其一體會試。用昭嘉惠者。年至意。○又諭上年湖北偶被偏災。業經降旨加恩賑恤。並將成災有漕之江夏等各州縣漕糧正耗米石。隨漕水脚銀兩。緩至已亥庚子兩年帶徵。本年通省豐收。

各屬有糧花戶。自應踴躍輸將。第念潛江。江陵。監利。沔陽。荊門。五州縣。俱係上年災重之區。若將緩帶銀米。一併徵收。民力未免拮据。著再加恩。將潛江。江陵。監利。沔陽。荊門。五州縣。上年災歎。今復成災田地。應在本年帶徵銀米。展至庚子年徵收。應分作庚子年帶徵銀米。展至辛丑年徵收。俾民力寬紓。共受盈寧之樂。該部即遵諭行。○又諭據李侍堯等奏雲南迤南道湯雄業。因前在東川府任內。

失察屬員婪贓。部議降一級調用。現在捐復原官。該員在滇年久。於銅運事宜。最為熟悉。請仍留於該省委辦銅務等語。著照所請。湯雄業准其留於雲南。遇有相當缺出。補用。該部知道。○庚寅諭曰。朕此次南巡。所有隨往之大臣侍衛各部院衙門。無幫銀之官員等。以及八旗章京。官員兵丁等。俱著照上次。動用內庫存貯兩淮解來銀兩賞給。著交總理行營事務王大臣等議奏。○壬辰諭曰。巴里。

坤總兵員缺。著佛喜補授。西德布。俟到京時。該部帶領引見。○是日起。

上以冬至祀

天於

圓丘齋戒三日。○癸巳。

聖祖仁皇帝忌辰。遣官祭

景陵。○諭據陳輝祖奏豫省鄉試諸生。於出闈後。覈對學冊齒籍。查有澠池縣增生劉髦。學年八十五歲。准寧縣附生李欽。元。年八十歲。

西華縣附生索止任年八十一歲太康縣附生張龍光年八十三歲俱三場完卷未曾中式等語。劉髦學李欽元索止任張龍光均著加恩賞給舉人准其一體會試用昭嘉惠者年至意。○甲午

上詣

南郊齋宮齋宿。○乙未冬至祀

天於

園丘

上親詣行禮命諸皇子詣

配位分獻歲以為例。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵。○遣官祭

孝賢皇后陵

端慧皇太子園寢。○諭據郝碩奏。江西撫州府知府李嵩於樂安縣民人黃璋公被勒身死一案該縣米錦置正光黃瘦生於不問轉將無辜之楊新仔擬絞該府既不據招審正迨署臬司批飭親提僅委員會訊及經審出同謀致死確情通詳更正又不將該縣揭叅請旨將李嵩交部嚴加議處等語。李嵩前

於徽州府知府任內失察降調嗣經加恩復用知府乃於此等關係罪名出入之命案任意袒護耽延非尋常玩忽可比若僅予嚴處尚覺過輕。李嵩著革職所有本案謀命之正光黃瘦生等及出入人罪之該縣米錦著該撫速即提集犯證嚴審確情分別定擬具奏。○軍機大臣議覆四川成都將軍特成額等奏再籌新疆駐兵事宜。○新疆舊駐兵四千名屯田四載邊境安恬請撤回一千名餘兵

於儋拉分設二營。一美諾營駐總兵遊擊守備各一十把。外委十四員。兵八百名。一底木達營駐守備一十把。外委六員。兵六百名。又於促浸分設三營。一阿爾古營駐遊擊守備各一十把。外委十一員。兵七百名。一噶喇依營駐都司一十把。外委七員。兵六百名。一茹寨營駐守備一十把。外委六員。兵三百名。各處汎塘就近於各營撥兵分駐五營均歸美諾總兵轄將弁果奮勉出力董勸有方三年

以應陞之缺奏補。一派駐將弁於內地簡僻營分裁缺改補請將泰寧敘馬二營遊擊裁歸新疆泰寧營改設都司以永定營都司改補泰寧守備改永定營敘馬營改設都司以維州協右營都司改補敘馬守備改維州協右營至新疆應設都司一裁嘉順營都司改補應設守備四查四鎮右營原係遊擊均有中軍守備後遊擊改都司中軍守備未裁即以此四缺改補以上遊都守俱改為題調缺

其千把外委四十四員於腹地各營內量其差防繁簡酌裁移設至兩金川舊係松潘鎮轄今駐美諾所屬內地營伍仍每年巡查一次內地各本營原扣養廉公費名糧並裁充新疆經費一屯防兵查按內地各營情形均勻攤減汎廣差繁者減半覈裁口外跬步皆山馬不得力應定為馬一步九足資差操裁兵之餉解新疆供支馬乾省補經費雜谷屯練二百名除八戶願留屯外餘各有原籍產

業併徹。一屯防兵應令長駐以省換班各費以二兵合種地一分自耕自食免其交官所有例給口糧明歲秋收可停其額餉內米折一項照阜和協兵十兩八錢例給鎮將備弁鹽糧與兵丁一體停支惟文官員役喇嘛人等每歲需口糧千石現在倉貯尚充屯練降番所餘地畝廣招屯種陸續升科足資接濟一新疆西路由桃關出口自大邑坪至巴朗拉共十五塘係瓦寺土司境無田可種不便

與長駐兵一例辦理。請撥松潘鎮。維州協所屬各營兵安設其南路。自打箭鑪以外。三道橋。至章谷。共十五塘。係明正土司境。請撥阜和協兵安設。應得鹽糧。及換班分例。仍舊均應如所請。再今冬正屆換班期。飭於現駐兵內。將願攜眷。及單身願留者留駐。其內地應撥一千名。亦儘願攜眷。及單身長駐兵撥往。如不敷。隨時募補。抽換足額。從之。

大清高宗法天隆運至誠先覺體元立極敷文奮武孝慈神聖純皇帝實錄卷之一千九十四

大清高宗法天隆運至誠先覺體元立極敷文奮武孝慈神聖純皇帝實錄卷之一千九十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理  
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣  
總裁官經筵講官太子太傅大學士大學士文淵閣領閣事稽察欽奉 上諭事件處管理刑部戶部三庫事務  
世襲騎都尉軍功加十九級隨帶加二級又加二級 董誥內大臣戶部尚書鑲黃旗滿洲都統軍功紀錄五次  
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥十一月丙申諭軍機大

臣曰文綬現在准其陞見已於十月十八日起程計日即可到京國泰與其父文綬睽隔多年著加恩令其來京俾得與伊父相見且東省明春有應辦差務朕亦可面加詢問著傳諭國泰接奉此旨將撫篆交布政使徐恕暫行護理即起程赴京將此由四百里諭令知之○又諭據恒瑞等奏西藏喇嘛支領官茶行至梨樹溝地方遇賊七十餘人劫去千餘兩貨物此輩原係巴塘之人常出為匪現

在帶兵圍住巢穴。迅速剿辦。庶可寧謐地方。等語。前因該處人不靖。已賞給達賴喇嘛。乃猶怙惡不悛。竟敢搶擄歲支官茶。若不痛加懲治。何以昭示炯戒。恒瑞等勇往可嘉。著傳諭伊等。即照所奏辦理。但接應班第達聲勢。亦屬緊要。索琳係經事歷練之人。伊即帶兵前往。此際班第達前至甲木喀。如何辦理。其賊勢若何。即行奏聞。將此旨由六百里馳遞。○烏什辦事大臣申保奏。內地安民之道。以

察吏為先。撫育新疆回衆。亦不外此。查葉爾羌。喀什噶爾。叅贊大臣中。富興有守有為。撫馭回衆。舉動大方。舒泰。瑪興。阿。感激

天恩。棄瑕錄用。亦俱奮勉。敦福為人謹慎。其餘諸臣。皆勤於公事。和闐領隊大臣德風。法靈。阿。頗能辦事。阿奇木伯克鄂斯瑞。能令回衆感戴。再布魯特等游牧。南北兩路。生計近皆豐裕。得旨嘉獎。○豁免奉天錦縣寧遠。廣寧。義州。四州。縣運交通州。在洋遭風。漂沒黑豆

二千二百七十七石有奇。○旌表守正被戕廣西武緣縣苗民章特喬妻章氏。○戊戌。諭曰。富椿前在吉林將軍任內。辦理諸事。不能妥協。朕猶念伊雖年老。不能辦事。尚能謹守。是以調補杭州將軍。伊自當感激朕恩。加意訓練兵丁。如兵丁內有嗜酒聽曲看戲者。伊即嚴加教懲。方為允當。詎伊調任杭州將軍以來。不惟不能教訓兵丁。伊反自求逸樂。每日聽戲。有名其戲為將軍班者。是伊不惟不

能辦事。亦不能謹守。深負朕恩。富椿著革退將軍。所有職銜。盡行革去。將此旨通行傳諭內地各省將軍。以昭炯戒。○又諭曰。蘇凌阿著賞給三等侍衛職銜。前赴英吉沙爾。換噶勒炳阿回京。○諭軍機大臣等。明春南巡江浙。該督撫等。自皆念切迎鑾。越境遠出。各省俱有應辦差務事宜。遠迎轉恐貽誤。亦不必以此為敬。且入疆在即。自可每日扈行。常承指誨。更不在早見數日。薩載。楊魁。閔鶚元。止

須於離江南境一站之山東地方接駕。三寶王宣望止須於蘇州接駕。均毋庸遠迎。將此各傳諭知之。○己亥。諭。安徽省所屬之亳州。蒙城。暨下游鳳陽。泗州。各處低窪地畝。本年秋間被水。前經諭令該撫等。按照災分輕重。分別給賑。各處貧民。自可口食有資。但念本年被水處所。即係上年被災之地。昨歲曾撥運川米十萬石。分給平糶。是以米價不致過昂。今該處仍復被水。恐明歲青黃不接之時。

災地窮黎。究不無拮据。該省賴川。鳳陽。泗州。三屬。及六安。霍山。二州縣。今歲俱多豐熟。與各災地相距最近。著該撫。即於各處應徵漕米內。加恩截留三萬五千石。豫備明春減價平糶。以濟民食。該部即遵諭行。○宗人府奏。綿德子奕純。應封為頭等輔國將軍。得旨。奕純未經考試。著封為三等輔國將軍。○吏部議准。浙江巡撫王宣望奏。地方情形。今昔不同。請改杭州府總捕同知。湖州府屬長興縣。

為衝繁難兼缺。在外揀調。改紹興府屬會稽縣。為衝繁中缺。寧波府屬象山縣。刪去海鹽字。為專難簡缺。歸部選。從之。○旌表守正捐軀江蘇沛縣民丁柱妻耿氏。○庚子。

上御乾清門聽政。○以故扎薩克鎮國公噶勒桑羅壘胞叔。三等台吉濟克默特多爾濟襲爵。○辛丑。

上幸瀛臺。○諭曰。嗣後皇孫等。俱著用紫掣手。紅鞍座。如係特旨賞給金黃轡鞍座者。方准

其使用。著交內務府。武備院。存記。永遠遵行。其綿恩。綿惠。馬上嫺熟。騎射亦屬可觀。著加恩。賞用金黃掣手鞍座。○又諭曰。乾清門藍翎侍衛巴忠。一切蒙古編譯。唐古忒編譯事件。俱係伊承辦。且所繕尚好。著加恩補授三等侍衛。○兵部議覆。陝甘總督勒爾謹奏。西安漢軍。改補綠營。京兵移駐西安事宜。○漢軍既改補綠營。自北城移駐南城。所遺官署兵房。除給移駐京兵外。應給移駐佐領十二

員每員一所作公所。改補兵。自拴馬九百匹。應給價。馬交移駐京兵領。仍補買三百匹。統於庫貯馬價借支。二年後。於應領馬駝銀分三年扣還。京兵在京借支錢糧。分四年扣。其未完庫銀。及借辦家具銀。七年後坐扣。移駐京兵。應領俸餉米石草料。折銀。悉照西安滿營舊例。開支報銷。改補兵軍械什物。與綠營合式者。令帶往。餘鍋帳等估買。留給移陝京兵。不敷。動項買補。俟一切借項扣清。

於月餉折色。分三年扣。未補綠營兵。暫留叅領防禦驍騎校。各一管領。給舊圖記鈐用。俟補滿日銷。餘先送部燬。其由京移駐佐領圖記。由本處鑄給。仍報部。京兵入陝西界。應派滿營舊有官兵。赴潼關一帶。會地方官按站照料進省。撥房安置。均應如所請。從之。

○癸卯。諭曰。索諾木策凌奏。烏魯木齊商民趙世雄。同伊弟趙世桂。賣糧口角。恨其欺凌。立時用小刀扎死趙世桂。請將趙世雄照例

擬絞監候等語。趙世桂。係趙世雄胞弟。因賣糧細故。與伊弟角口。即心存忿恨。登時將伊弟故殺殘虐已極。僅照故殺弟妹常律。擬以絞監候。不惟不足示儆。且明歲又係停勾之年。著交索諾木策凌。將趙世雄。不必監候。即行絞決。以為殘虐者戒。○又諭。明歲。尚書永貴隨皇六子。往迎班禪額爾德尼。即著伊署領侍衛內大臣隨往。且又係阿哥等總詣達著賞穿黃馬褂。○諭軍機大臣等。前據阿桂

等奏。順黃壩工口門。未施工者。止有七丈餘。現在上緊趕鑲。計日可相機堵合。連日盼望甚切。茲據阿桂等奏。自下大埽後。口門止餘四丈有零。正在督令趁勢搶壓。冀可合龍。乃十一日早。水勢猛洶異常。陡將南壩壅塌二十餘丈。懷慚無地。詢之徐建功等。再上又無可移辦之處。惟有上緊接作軟鑲。雖有埽底。仍屬無礙。計工段亦不致過遲等語。覽之深為焦急。然亦實無別法。已於摺內批示矣。因

思向來衝墊俱係北壩。此次則係南壩。其壩身尚非頂溜。不致與水急爭。今補鑲補築。似較北壩施工稍易。或可期迅速歲事。亦惟有全力赴之。一切皆臻妥善。以待

天佑

神助爾。至阿桂等另摺懇請議罪議罰之處。俱可不必。伊等在工。俱實心任事。百計經營。似此次之功虧一簣。信非人力所能施。意計所能及。並非怠玩誤工。不但阿桂不必引為

已咎。即袁守侗、陳輝祖有河工地方之責者。亦不必各請歸罪。若如所見。朕先當引過自訟。然朕自昨秋豫省河工漫口以來。軫念民艱。日夕縈望。前後發帑數百萬。以為工賑之需。復截漕糧十萬。以為賑濟之用。而且蠲緩頻施。凡有關於民瘼者。無不籌辦。實政止不過如此。朕心不可謂不盡。豈有因此而即飾為虛詞。下責躬之詔乎。近因史館進書。偶閱元史河渠志。見賈魯於合龍時所設之法甚

多行之。果有速效。或史冊過於溢美。或今昔情形異宜。自未足盡信。其各法或有現已做用者。或有難以施行者。亦不可知。但史志既有此言。寧可信其有著。將此志節錄一段。寄交阿桂等閱看。詳詢徐建功、李永吉等。或其中有可節取之處。不妨做而行之。如皆不可行。亦不必因此過於拘泥。俗諺所云有病亂投醫。亦無可如何之一法也。至十二月二十日。為皇孫綿億成婚吉期。阿桂若能將合龍之事辦竣。彼時能兼程到京。固善。但所指係阿桂孫女。非必須阿桂一人專辦。況現有伊子在京辦理一切。阿桂即不能趕回。亦屬無礙。轉不必因此著急也。將此由六百里加緊發往。仍即將現辦壩工引河情形。若何及合龍約在何時。迅速覆奏。○兵部議准。山西巡撫覺羅巴延三咨稱。拔補外委之武生弓馬較優。僅食馬糧。與食俸官不同。應准其鄉試學冊已除名。由該營造冊送考。仍取將備切

實印結從之。○賑卹甘肅皋蘭漳縣華亭安化寧州正寧撫彝廳平番靈州崇信鎮原高臺十二廳州縣災民並蠲本年秋禾被雹水霜災地畝額賦緩徵金縣循化伏羌隆德合水鎮番寧夏寧朔平羅大通秦安靈臺肅州等十三廳州縣乾隆三十八年以後未完額賦暨各年民欠籽種口糧。○以故廣西江州土知州黃一鳳弟一鵬襲職。○甲辰。

上幸瀛臺。○諭軍機大臣等據閔鶚元奏各省

郡邑志書內如有登載應銷各書名目及悖妄著書人詩文者請一概俱行剷削等語所奏甚是。錢謙益屈大均金堡等所撰詩文久經飭禁以裨世教而正人心今各省郡邑志書往往於名勝古蹟編入伊等詩文而人物藝文門內並載其生平事實及所著書目自應逐加芟削以杜謬妄至從前各省節次繳到應燬書籍經朕發交館臣覆勘奏定應行燬銷者俱經該館陸續咨行各省自可遵照

辦理著傳諭各督撫將省志及府縣志書悉心查覈其中如有應禁詩文而志內尚復採錄並及其人事實書目者均詳悉查明概從芟節不得草率從事致有疎漏。○又諭曰步軍統領衙門奏據湖北京山縣民人黎以富呈控伊胞弟黎以盛因向黎秩序索欠被黎紹康等十三人攢毆身死該縣止將黎秩序一人擬抵並黎紹康等十三人結拜弟兄自稱十三太保開寶場誘賭各情節請交湖廣

總督查審等語向來問擬開毆案件遇有共毆斃命之案均以以後下手傷重者擬抵此一命一抵定例餘人不過照例發落黎以富所控該縣將黎秩序一人擬抵係遵照定例辦理並未錯謬無可查辦至所稱黎紹康等十三人結拜弟兄稱為十三太保開場誘賭等情是莠民相聚為奸此風斷不可長著傳諭圖思德即行提集本案犯證秉公查審明確按例定擬具奏其原告黎以富交該部迅速

解往候質將此由四百里諭令知之○乙巳諭軍機大臣等前據阿桂等奏本月十一日南壩忽有墊塌二十餘丈之事深為慮念惟因向來衝墊俱係北壩此次則係南壩其壩身尚非頂溜較北壩施工似應稍易隨即馳諭詢問茲據覆奏現在南壩已軟鑲得七丈餘北壩亦軟鑲得二丈餘金門又祇剩十丈餘日內將已做之工加倍填壓務令益得穩實俟兩壩再進兩埽即可為相機堵合之計等語就現在情形而論大有可望惟在阿桂等實力董辦以冀速竣日夕盼合龍喜音矣至所稱南壩日逐鑲壓取用物料甚多而壩身終覺鬆軟不知其初因何受病等語自係填壓未能堅實之故向來下埽惟憑土壓所用之土似不過浮加未能令其到底著實朕意以為如壓土加以夯碾自應堅固得力不知河工下埽曾如此辦過否若從未辦及不妨以此法試行之著傳諭阿桂等即以朕此

旨與徐建功等諳練之人詳悉妥商而行此旨著由六百里加緊傳諭知之仍著迅速覆奏○丙午諭據舒常奏李世傑現已丁憂廣西巡撫員缺著姚成烈補授其廣東布政使員缺著達爾吉善補授○又諭據伍彌泰奏明歲照料班禪額爾德尼來避暑山莊請賞欽差大臣關防以備沿途奏事行文鈐用庶不致遲誤亦免遺漏等語伍彌泰等照料班禪額爾德尼住宿以及來京應辦事件甚多必有印信一切奏咨事件方不至遲誤著照所奏賞給欽差大臣關防一顆發往鈐用○又諭曰工部議覆川省軍需報銷案內採辦鑄礮鐵舢較之軍器則例多用銀六萬一千六百餘兩節經駁查未據刪減請於承辦各員名下照數著追歸款一摺固屬照例覈駁但川省軍需項下民欠專賠分賠各款為數不下千萬餘兩俱經降旨加恩一體豁免所有此項覈減銀六萬一千六百餘兩亦著加

恩准其開銷。○諭軍機大臣等據特成額等奏三芟賊番劫搶達賴喇嘛茶包并傷斃護送人等現派得力弁兵馳往江卡會同西藏所派各員務將首夥各犯全行拏獲從重辦理一摺又膽對賊番焚劫麻塘寺僧一案已據該土司側甲專差頭人勒拏兇賊將前次擄去之小喇嘛七立保獻出一摺除將原奏交文綬閱看并令一面星馳回任一面寄信特成額等妥協辦理矣至摺內所稱噶布倫公班第達帶領夷兵三百名前赴江卡查辦措詞殊屬失當夷人劫搶重案藏地派兵前往查拏何得亦謂夷兵此等最為外省文移惡習特成額於奏摺內何不加檢點若此已令軍機大臣傳知文綬令此後章奏文移嚴行飭禁外並將此諭令特成額等知之。○陞直隸正定府知府黃檢為直隸按察使。○丁未

上幸瀛臺。○戊申諭本日吏部將楊景素奏請

調簡之原署良鄉縣知縣張習引見觀其才具似屬中平已如所請補用矣該員係涿州州判經周元理奏署良鄉縣知縣莅任甫及半載楊景素即以該員循謹有餘肆應不足於衝途驛路辦理日形竭蹶奏請調簡該員係由繁調簡前任保舉督撫未便竟置不問而吏部則例並未定有處分向來辦理原未周密自應另行定議但各省督撫或有與前任不合者有意苛求將從前保薦人員肆行更調以見己之長而形人之短者有之又或接任之督撫心存徇庇雖有才不勝任之員亦一味因循姑息者亦有之於吏治官方均有關係應一併妥協詳議俾督撫不敢濫舉而接任者亦無滋弊著九卿詳悉定議具奏尋議調繁之員係指名特保旋以才不勝任調簡將原保官降三級留任如接任督撫因與前任不合有意苛求肆行更調引見時經聖明鑒察照參奏不實例降二級調用或心存

徇庇因循不効致誤地方。照徇庇例降三級調用。從之。己酉。諭曰。直隸布政使員缺。著黃檢補授。文祿前在臬司任內。獲咎實因初任。觀望周元理所為。尚非行私大過。著加恩補授直隸按察使。仍帶革職留任。五年無過。方准開復。文祿未到之前。其臬司印務。著劉義暫行署理。○諭軍機大臣等。據楊景素奏。直隸布政使單功擢病故一摺。夾片內。另請將尚安。于易簡。二員。簡授一員等語。大屬非是。兩司為各省大員。非督撫所當保薦。况朕御極以來。從無薦舉大臣子弟者。于易簡。為大學士于敏中之弟。誰不知之。雖內舉不避親叔。向曾言及。然在當時或有行者。而在後世。則不能保無流弊。究當以避嫌為正理。楊景素。何遽為此奏耶。况于易簡。從前雖在直隸年久。而自知府運使。用至臬司。遷擢過驟。即就其才具而論。雖尚能辦事。再經數載。授以藩司。亦可勝任。今有此一奏。轉須遲用數年。

是愛之適以害之。即于敏中知之。不但不以為感。自當轉以為恨。至尚安。雖屬能事。然在直隸未久。究為生手。其舉尚安在前者。不過為陪榜秀才。其意在於于易簡也。直省道員內。歷練誠實。與單功擢相仿者。莫如劉義。何以不保劉義。而轉薦尚安。亦為失當。楊景素著傳旨嚴行申飭。○又諭。據王亶望奏。前任浦江縣。勒休知縣薛鼎銘。因縣民張可元。圖姦伊孀。張陳氏未成。經陳氏具控到縣。伊父張邦鑽。稱陳氏索錢起衅。該縣不能究出實情。一任該犯狡供。遷延不結。以致陳氏自縊殞命。請革職究審一摺。已降旨將薛鼎銘革職。交該撫嚴審究擬矣。至張可元。係陳氏小功服姪。竟敢起意圖姦。及被張陳氏揪住。髮辨號救。張可元情急圖脫。復毆傷陳氏。逮具控到縣。又狡供圖賴。以致張陳氏羞忿自縊。其情節甚為可惡。未便照尋常圖姦致本婦自盡例。問擬絞候。應即照服制律定擬。決

不待時。著傳諭王璽等提集案犯。即行究審。按律定擬。迅速具奏辦理。以示懲儆。將此由四百里傳諭知之。○賑直隸青縣本年被水。竈地災民。併蠲緩額賦有差。○庚戌諭曰。賡音素以足疾已愈。懇請留京。情頗懇切。即照依所請。令其在京居住。仍交內務府量其數用。賞給房一所。○是月直隸總督楊景素奏。廣平大名冀州各府州屬。於十月十三日得雪。薊州密雲三河寶坻遵化玉田天津各州

縣。於十八二十等日得雪。均有二三寸至四五寸不等。得旨。惟近京至保定尚未得雪。雖屬可待。未免盼望。○江西巡撫郝碩奏。乾隆四十五年恭值

皇上南巡。江西與江南接壤。且有撥赴辦差員弁。并營驛馬匹。均應臣督辦。懇准於明年正月初旬赴江南一帶跪迎。得旨。汝方陞見而去。此奏不誠矣。○伊犁將軍伊勒圖。陝甘總督勒爾謹。奏本年移駐伊犁眷兵業經全數

出口。查烏魯木齊從前移駐眷兵。於官兵應支俸糧外。另給鹽菜銀。嗣後分晰奏准。原營有欠項。俟抵烏魯木齊扣者。仍給扣完日裁。無者仍支給一年。至次年停。所有本年及明年移駐伊犁官兵。到七日。可否賞給一年。得旨。著賞給。○山東兗州鎮總兵任承恩奏。兗州鎮設字識二十三名。例給步餉一分。臣抵任後。查現食馬糧者十七名。內李澄一名。經前任總兵瑪爾清阿。拔補額外外委。尤屬違

例。臣即將李澄咨革。其餘字識所食馬糧十六分。均改守糧。並通查各營將備衙門字識。有無濫食之處。另裁。得旨。嘉獎。○貴州巡撫舒常奏。丹江營所屬之雞溝汛。向分駐守備千總把總各一。外委二。帶兵二百名防守。乾隆四十二年。經前撫臣裴宗錫奏准。開墾牛皮箐內雷公地等處。撥附近之震威等堡屯軍餘丁赴箐認段試開。改雞溝汛千總一。帶兵五十名。分駐雷公地。今試墾三年。所種苦

收多秀而不實。該地陰翳森寒。四時難逢晴日。四月方斷雪凌。八月即降霜霰。氣候迥殊。難以開荒成熟。請將原撥之千總一兵五十。撤回其雷公地。即責成雞溝守備千把就近。每月帶兵進山巡查一次。並令丹江營叅將。每季親臨菁內查察得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之一千九十五

大清高宗法天隆運至誠先覺體元立極敷文奮武孝慈神聖純皇帝實錄卷之一千九十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十四年己亥十二月辛亥朔諭曰阿

桂等奏壩工復被衝塌情形一摺。內稱原任叅將李永吉親身在工搶鑲。致隨金門之埽落水。幸遇救生船始得登岸。其餘官兵有落水者。俱已撈救無恙等語。李永吉前因委估糶料通同混報。曾經降旨革職。留於工次効力贖罪。茲見南壩門埽漸向後坐。即親身搶護。頗知奮勉。且隨埽落水。遇救得生。其情尤為可憫。李永吉著加恩復還原職。並著賞戴花翎。以示獎勵。其落水遇救得生員弁。並著

查明酌量獎賞。兵丁賞給一月錢糧。○諭軍機大臣等。據阿桂等奏。兩壩趕進大埽後。口門止剩三丈有零。大河水勢漸次蓄高。王家莊引河頭及倒扎洪。進水甚暢。督令加高壩臺。於二十四日一早合龍。奈大河水勢積高至一丈五六尺。漫至堤根。兩壩處處滲水。至二十六日寅刻。頓將金門及北壩所做之埽衝開二十餘丈等語。覽奏甚為煩懣。已於摺內詳悉批示矣。此次垂成復敗。實出意料之外。然事勢如此。自當仍前竭力趲辦。以期歲工集事。至所稱前此所辦十六千八百餘萬觔物料。漸次用完。續購不易之處。現已諭令楊景素國泰各於隣近州縣購辦稽料數千萬觔。以備應用。阿桂等酌量現需物料若干。即一面奏聞。一面飛咨兩省迅速運赴工所備用。無虞遲誤也。至此次合龍後復又衝塌。或係畧有欲速之意。以致壩工不能堅固得力。前經諭令將壩臺及兩壩壓土後加以夯

礮以期堅實。此次壩工曾否夯築。或係發摺時尚未接奉前旨。此後著酌量遵照辦理。其大河水勢積高至一丈五六尺。漫至堤根。衝開後水歸何處。其下游水勢情形若何。引河分得大溜幾分。現在能否通暢。著阿桂等遣員逐一查勘。明白迅速覆奏。阿桂等此時辦理尤須慎重周密。持以鎮靜。不可因此氣餒。惟當仍前軟鑲進埽。俟大溜漸向北趨。口門至一二大深時。徐圖合龍。方為妥善。又閱阿桂覆奏摺內。稱大工久稽堵合。自恨無能。胸膈填結。自本月以來。飲食頓減。肌肉漸消等語。深為廕念。此次堵築漫工。阿桂等籌辦不遺餘力。無奈變生意外。實屬無可如何。祇應設法籌辦。盡人事以祈

天佑

神助。非如打仗可以力勝也。阿桂不必著急。一面辦理。一面安心調養。以副朕懷。現在諭令阿彌達馳驛前往工所省視。並賞給伊等

三人。福字荷包。用示優眷。其原任叅將李永吉。已明降諭旨。賞復原職。并賞給花翎。其餘員弁。酌量獎賞。兵丁等賞給一月錢糧外。即夫役有落水者。亦著一并詳查。酌加賞卹。將此由六百里加緊發往。諭令阿桂等知之。仍即將現辦壩工情形。若何迅速覆奏。○又諭。上年因豫省兩處漫口。需料較多。恐該省尚有額辦歲料。不敷採買。曾經兩次諭令直隸。山東。三省幫辦。運往應用。今該處屢築屢衝。

所費更多。本省所產稽料。購辦自更為竭蹶。著傳諭楊景素。國泰。即於附近豫省地方。速即飭屬。各購稽料數千萬觔。豫備該省取用。楊景素即咨明豫省。俟接到阿桂等需用料觔咨會。一面奏聞。一面派委幹員。迅速解往工次應用。毋稍稽誤。所有採辦稽料價值。楊景素。國泰。俱著照例動支帑項。毋得絲毫派累閭閻。將此由六百里傳諭楊景素。國泰。並諭阿桂等知之。○壬子。吏部議駁。江蘇按察

使龍承祖奏。私罪降革。及加級紀錄。不准抵銷各員。請照因公降革。問擬杖徒等餘罪人。一例加數捐復等語。是公私罪既無區別。且恐劣員有恃。漫不知儆。得旨。部駁。甚是。龍承祖身任臬司。刑名是其專責。捐復事例。本非分所應言。乃欲將私罪降革。及加級紀錄。不准抵銷各員。照革職有餘罪人員。一體准其加數報捐。致私罪人員。與因公降革。均得同邀錄用。非為言利起見。即欲為此等廢員。另

開捷徑。殊屬非是。龍承祖著交部嚴加議處。○癸丑。諭曰。侍郎德成。著馳驛前往河南。商辦河工堵築事宜。所有隨帶司員。並著一體馳驛。○諭軍機大臣等。本日黃檢奏到謝恩摺。文理甚屬不通。已於摺內批示矣。黃檢前因無知高興。妄刻伊祖黃廷桂奏疏。致獲咎戾。經朕加恩。復行錄用。正當深自改悔。實心任事。乃於謝恩摺內。又復掉弄虛文。其如天而更高。如地而彌厚兩語。已屬支離可笑。又

稱緬懷祖武措詞尤為舛謬。繩其祖武乃周雅言三后配天之事。臣下豈宜引用。此等不通之文。非係黃檢無知。即為庸劣幕賓所愚。其謬妄與刊刻伊祖奏疏。如出一轍。黃檢著傳旨申飭。嗣後務痛加悔改。莫再高興。勉之慎之。方能承受朕恩也。將此諭令知之。○甲寅。

上幸瀛臺。○諭。前因豫省黃河漫口。節次撥給部餉。及兩淮鹽課銀三百六十萬兩。以備工

賑之用。現在堵築事宜。業屆歲工。恐需用不敷。著戶部再撥銀二百萬兩。照例迅速解往。以資接濟。該部即遵諭行。○命戶部侍郎董誥在軍機處行走。○戶部議准。廣西布政使朱椿奏修理衙署。所借官項。例於本任分年扣俸。粵西苗疆煙瘴。佐雜官調回內地。與推陞均有一定年分。該員知離任日近。任內扣項無多。率請借項修署。應請分別定限。三年調回者。限到任一年內請修。三年候陞者。限

二年。五年者限三年。並請州縣官及雲貴川廣閩省之苗疆煙瘴缺。均照此例從之。○乙卯。

上御太和殿視朝。文武陞轉各官謝恩。○諭曰。密雲駐防。每年應放兵糧。若全給折色。恐官兵等一時購買維艱。著加恩賞給一半本色。一半折色搭放。其應如何採辦運放之處。著交楊景素詳悉妥議具奏。○又諭曰。兩廣總督桂林才具優長。辦事敏練。簡任封疆。正資倚毗。忽聞溘逝。深為軫惻。桂林著加贈太子太保銜。其任內處分。並著開復。所有應得卹典。該部察例具奏。○又諭曰。桂林現在病故。所有兩廣總督員缺。著已延三補授雅德著補授山西巡撫。其倉場侍郎員缺。著書麟調署。○又諭曰。已延三到任。尚需時日。兩廣總督印務。著李質穎暫行兼署。○又諭曰。申保等奏稱。審出庫車阿奇木伯克阿卜都哩蒂卜奇派所屬回人。並縱放回奴呢雅斯等。赴

各鄉村勒索牛馬羊錢稍不如意即行細打等語從前申保等參奏庫車阿奇木伯克阿卜都哩蒂卜虐使回民該部擬以發往伊犁具奏時朕以阿卜都哩蒂卜苛索物件尚屬無多因特加恩免其發往伊犁僅發烏什充當苦差今申保等復又究出苛索之事甚多著傳諭申保等不必遵前旨辦理將案內人犯確審照例定擬具奏○丙辰

孝惠章皇后忌辰遣官祭

孝東陵○諭軍機大臣等今日兵部將雲貴督標中軍副將吉隆阿帶領引見已照例令其回任矣吉隆阿係督標中軍副將為該省總督辦事之員其為人居官如何將來是否可望出息李侍堯知之必真著李侍堯據實詳悉具奏將此遇便發往傳諭知之○調理藩院侍郎博清額為兵部侍郎以太僕寺卿保泰為理藩院侍郎○旌表守正捐軀四川巴縣民張紹儒妻朱氏○丁巳

上詣

大高殿行禮○諭曰博清額現在出差其未到任之前所有兵部侍郎事務著保泰署理○

戊午

上幸瀛臺○諭曰大學士于敏中品端才練學識兼優久直內廷小心謹慎歷數十年如一日自簡畀綸扉辦理平定金川軍務承旨書諭懋著勤勞因加恩列入功臣特予世職並賜雙眼孔雀翎黃褂以彰優眷恪恭匪懈倚

任方殷前因其喘疾較甚諭令乞假加意調攝即派太醫院堂官前往診視並賜人參俾資培益用冀速痊復屢遣大臣存問昨聞病勢沉劇倍增屢念茲聞溘逝深為悼惜著加恩入祀賢良祠並派皇八子帶領侍衛十員往奠茶酒所有應得卹典仍著該部察例具奏○又諭曰湖廣總督圖思德簡任封疆宣力有年實心任事正資倚任忽聞溘逝深為軫惜所有應得卹典著該部察例具奏○以

工部尚書富勒渾為湖廣總督吏部侍郎綽克托為工部尚書○旌表守正被戕湖北竹溪縣民江文珍妻陳氏○己未諭曰吏部侍郎員缺著惠齡調補所遺工部侍郎員缺著海成補授惠齡海成現俱出差其未到任之前吏部侍郎事務即著綽克托兼署工部侍郎事務仍著福康安署理○諭軍機大臣等據陳輝祖奏豫省本年除儀考十九州縣被水成災之外其餘收成均在八分以上但民間元氣初復戶少蓋藏所有應徵新舊錢糧不能同時並徵請將本年應徵丁地錢糧除被災各屬蠲免外其餘與通省丁地統於乾隆四十五年為始分作三年帶徵歸款等語已於摺內批新正有旨矣豫省自上年辦理堵築事宜已閱十八月通省運料集夫不無藉資民力本年雖登豐稔而民氣未復新舊並徵稍形拮据自屬實情目下距新春頒發諭旨到豫時尚幾一月著傳諭陳輝祖飭令

各該地方官即將本年應徵丁地錢糧先行停止徵收俾通省閭閻均霑實惠○協辦大學士程景伊等奏經書中語句雷同者向無不許命題例但場中易嫌牽混請勅禮部增入條例凡係一樣句法不得命題又現在覆勘試卷見外省謄錄錯誤甚多并有硃色間淡不辨字畫者請并勅各直省監臨提調等官屆期認真督辦從之○命工部尚書嵇璜兼翰林院掌院學士吏部侍郎王杰克武英

殿總裁○庚申諭旨下舊聞考著派梁國治同辦音韻述微著派德保同辦○又諭曰瑞麟身為宗室乃假刻鈐印冒占民租甚屬卑鄙不堪僅照例折罰拘禁不足示懲瑞麟著改為拘禁一年並罰錢糧一年以示儆戒○諭軍機大臣等現在大學士于敏中病故家內諸事須人主持料理伊弟子易簡著即來京為之照料一切到京時不必馳赴宮門可即至伊兄家內安速經理完竣後亦不必赴

宮門請安。即行回任。辦理明春差務。著傳諭國泰詳悉告知于易簡。速行來京。所有山東按察使事務。著國泰簡員署理。將此由六百里諭令知之。○以工部尚書綽克托為鑲黃旗蒙古都統。○辛酉。諭遼史。元史著添派和坤。曹文植同辦。明史著添派王杰。竇光鼐同辦。○諭軍機大臣等。本日明通奏到甄別教職佐雜及屬員並無虧空各摺。俱係該府尹單銜具奏。殊屬非是。奉天府尹事務已令全

魁兼管。則明通奏辦諸事。自應與全魁會銜入告。現在全魁陞見來京。明通所奏各摺。不於全魁起程之先會同辦理。竟以單銜具奏。全魁。明通均屬不曉事體。全魁已令軍機大臣傳旨申飭外。明通並著傳旨申飭。○又諭。本日兵部將年滿副將劉明智帶領引見。已照例令其仍回原任矣。劉明智雖據該督以該員材技優嫻。曉暢營伍。保送到部。但其將來是否堪勝總兵。著傳諭李侍堯即將該員

平日居官為人如何。能否勝任總兵之處。詳悉據實覆奏。○又諭前因阿桂等奏豫省所辦料物漸次用完。續購不易。是以傳諭楊景素國泰各於隣近州縣購辦。稽料數千萬觔。以備應用。本日據阿桂等奏稱。豫省購辦不易之故。止係價值漸增。運腳累重。並非物料短少。現在尚可籌辦。無須隣省協濟等語。豫省應用稽料既無需協助。則直隸山東自可毋庸購買。但楊景素等接奉前旨。業已經旬。

諒所買物料必多。若仍發還民間。令還價值未免轉滋紛擾。著傳諭楊景素國泰酌量情形。如其尚可發還。即妥為辦理。若有不能發還之處。則該二省俱有河務工程。此項已購物料正可留備歲修之用。楊景素等務宜飭屬妥辦。毋使閭閻稍有滋累。將此由六百里發往。仍著將作何辦理情形。據實覆奏。並傳諭阿桂等知之。○命協辦大學士程景伊充三通館正總裁。左副都御史曹文植充副總

裁○壬戌諭曰兵部奏定擬婪索越境之俄羅斯等什物私行釋放之章京達瑪璘等罪名失出請將會同列銜具奏之黑龍江副都統官福革職等語此案將軍傳玉經該部議以革職朕已加恩調補杭州將軍仍帶革職留任官福亦著加恩從寬革職留任○癸亥

上御乾清門聽政○以太常寺卿達敏為內閣學士兼禮部侍郎○以伯都訥協領烏雅爾

達為伯都訥副都統○甲子諭向過年節督撫等原無貢燈之例惟直隸距京甚近從前方觀承曾於年底進燈數對以備賞用此後周元理楊景素相沿呈進尚屬可行其餘遠省從無此事督撫等惟在勤職奉公實心任事前曾屢降諭旨禁止貢獻乃今歲各省頗有貢燈者殊屬無謂現已諭令奏事處凡向來未經進燈之各督撫一概不准接遞如有仍復進獻者當以違制論將此通諭知之○

又諭今日健銳營帶領引見人員內所奏本身名字清語生疎音韻錯謬成何事體清語乃我朝根本自應以滿洲正韻為主豈宜舛謬若不及今嚴行整頓相沿日久更不知何所底止凡引見人員引見以前該管大臣揀選時伊等不稟告履歷乎若有音近漢人語氣者竟不訓飭乎此事殊有關係著交八旗各營大臣等嗣後教訓所屬人等清語務令昭合滿洲正韻斷不可似此舛謬所有引見

人員再有似此具奏者必將該管大臣治罪○諭軍機大臣等據畢沅奏伊母今年七十一歲舊疾復發近更加重自覺心神昏亂恐於公務兼顧維艱請旨簡員赴陝接任等語所奏不必如此已於摺內批示矣伊母年越七旬舊病發作延醫調治尚可就痊著傳諭畢沅速將伊母病症上緊醫治其巡撫事務仍盡心辦理倘伊母病復加重有不能復起之勢即一面將巡撫印務交尚安護理一面

由驛馳奏。至現在伊母病勢如何。並著據實具摺奏聞。○乙丑。諭軍機大臣等。據阿桂等奏。德成於初八日夜間抵工。將面奉諭旨。及硃筆指示河圖形勢。傳諭到工。其南北兩壩。一面遵照諭旨。由南壩向北軟鑲。俟合龍時。始兩壩並進。至挑水壩。可否接注倒扎洪之處。今擬於挑水壩下水。斜向東北。再接做三四十丈。如魚鱗埽式。可得挑溜之益。又硃筆所點。諭令用船動盪。令溜勢趨入引河。法實至善。自當遵照辦理。惟引河上肩一帶。擬將上肩再開寬十九丈。以迎溜勢等語。均祇可如此做去。看若有益。更向前進亦可。已於摺內批示矣。此次河工合龍。辦理實屬非易。昨令德成前往。亦因其畧曉工程。且因伊曾堵築永定河漫口。是以遣令前往。原係無聊之極思。亦於另摺內批諭。德成到彼。甫兩三日。即使在南北兩壩引河各處。詳悉查看。其於河務情形。亦豈能如阿桂等三人。經年累月。

駐工目擊之親切。其所稱將倒扎洪之東。另開河口。寬二十丈。長三百餘丈。接入舊引河。不必俟現挑引河完竣。即得合龍等語。袁守侗因其言甚迫切。商令止將倒扎洪。再向東展寬十餘丈。仍俟引河開完。再行合龍。不必另開一道。亦係將就完事之見。看來德成。於河務竟未諳悉。而高興輕事。其素性原係如此。與其信彼。莫若信阿桂等三人。亦於摺內批示。德成即著回京。不必仍留工次。阿桂等即將所奏辦理各工。督率員弁。竭力上緊趕辦。迅速奏功。昨阿彌達回京。奏稱挑挖引河。須俟正月底完工。計其時猶在挑汎之前。尚不為遲。惟日夜企祝

天佑

神助。早得蕨工耳。將此由六百里加緊傳諭知之。○又諭曰。博清額等奏稱。俄羅斯固畢爾那托爾。遵檄將越境之犯十七名。俱擒向交界處。與天朝人當面治罪矣。其滿濟等案。

內應治罪之俄羅斯人。伊什提納卜。俟拿獲時。再行治罪。籲請遵照從前諭旨。開通貿易。又再四懇求。將伊處人費約托爾放還。咨呈前來等語。前因固畢爾那托爾恭順。懇請貿易。朕曾降旨准行。因尚有未完結之事。暫行停止。今固畢爾那托爾俱遵照完結。再四懇求開通貿易。並請放還費約托爾。著傳諭博清額等。即遵前旨開通貿易。併飭該部。將費約托爾派員護送。由驛站遞交常青。轉送庫倫。交博清額等。其於何時貿易。費約托爾何時交與俄羅斯。著博清額等即行奏聞。再瑪玉爾詐索之馬四匹。昨曾勅部咨行黑龍江將軍。如數發給俄羅斯。併令轉咨博清額。傳玉矣。將此一並傳諭博清額等。馬四匹。如應給。則行文黑龍江將軍給與。如事已完結。無庸給與。亦不必拘泥前旨。其可否給與之處。著博清額等酌定。一面具奏。一面咨行永瑋。併傳諭永瑋。給俄羅斯之馬四匹。惟視博清

額等咨文行止。

大清高宗法天隆運至誠先覺體元立極敷文奮武孝慈神聖純皇帝實錄卷之一千九十六

大清高宗法天隆運至誠先覺體元立極敷文奮武孝慈神聖純皇帝實錄卷之一千九十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂  
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

較修

乾隆四十四年己亥十二月丙寅諭軍機大

臣等貴州安籠鎮總兵彭廷棟來京陛見。看其人尚明白。但未知其平素居官若何。其在總兵任內。是否能教練弁兵。整飭營伍。將來堪勝提督之任與否。著傳諭李侍堯。舒常據實查明覆奏。○丁卯諭曰。畢沅現在丁憂。陝西巡撫員缺緊要。即著劉秉恬前往署理。不必來京請訓。伊曾任封疆。且守制已屆一年。現因一時不得其人。暫令署理。並非開在任守制之例也。○諭軍機大臣曰。畢沅現在丁

憂。即應回籍守制。明春朕南巡。經過蘇州時。伊尚在百日内。未便前來接駕。計回鑾至蘇。正在三月望後。伊百日之期亦滿。爾時在彼伺候接駕。覺為妥協。接到此信。即行遵照。不必覆奏。爾等寄信知之。○加賑湖北沔陽潛江。荊門。江陵。監利。荊州。荊左。七州。縣衛。本年水災飢民。○以故二等男成德子額爾經額。三等男穆爾泰子長庚襲爵。○戊辰諭曰。吏部議駁國泰請將高唐州改為兼三要缺。在外題補一本。所駁甚是。各省應行題補之缺。久經更正。即遇今昔情形實在不同。必須酌改繁缺者。亦經吏部奏明。行令各該督撫。分別缺分大小。即就丞倅牧令等項。相當各缺內。改一簡缺。互相更易。方可准行。今國泰遽請將高唐州改為要缺。在外題補。並不以簡缺更調。殊與定例不符。著該撫查照部議。另行酌議具奏。○又諭曰。王來廷。胡文美。邵珊。因年老告休。曾賞半俸。今已出旗為民。例不

准給。但念其曾經出兵。効力行間。若不給與養贍。殊為可憫。著加恩。仍賞給半俸。以養餘年。○諭軍機大臣等。吏部議處濟南府知府呂爾昌。審擬長清縣民裴志剛。與楊志禮之妻朱氏。通姦敗露。以致本夫姦婦先後自縊身死一案。將應擬軍罪之裴志剛。錯擬斬候。照例將呂爾昌降三級調用一本。失入處分。較失出為重。所以重民命也。此案該府呂爾昌於裴志剛應擬軍罪之處。兩次駁令該縣改擬斬候招解。自行審轉。實屬失入。部議降調。罪所應得。該員係刑部司員出身。前國奏在京陞見時。亦曾奏其尚能辦事。今於裴志剛錯擬罪名之處。即行據實參奏。所辦尚不迴護。但查此案。係由該撫看出情罪不符。駁飭另行妥擬解勘。始行改正。則臬司之未經指駁可知。臬司為通省刑名總匯。乃於此等罪名出入。並不悉心詳覈。遽爾照擬率轉。自有應得處分。何以于易簡辦理此案。轉得免

議。著傳諭國泰。即將本案前後情節。詳悉查明。迅速覆奏。並呂爾昌降調後。仍可用與否。據實奏來。所有吏部議覆本暫存。俟國泰覆奏到日。再行降旨。將此由。四百里諭令知之。尋奏。因姦致本夫姦婦自盡。姦夫罪。例無明文。知府呂爾昌。錯擬斬候。失入處分。自屬應得。但究因例無正條。與承審不實。錯擬罪名者。有間。其平日辦事認真。尚為勤奮妥協之員。至由府審擬解司。係前署臬司羅暹春。照擬轉詳。經臣駁飭。照因事威逼致死一家二命例。改擬近邊充軍。羅暹春已卸臬篆。係臬司于易簡代為改正。臣因拘泥督撫司道。錯擬罪名。前官離任。不及改正。後官代為改正。得邀免議例。未將羅暹春職名開參。得旨。該部議奏。○以左副都御史曹文埴。為刑部侍郎。○已已。諭曰。程景伊。補授大學士。嵇璜。著調補吏部尚書。協辦大學士事務。向來大學士管理部務。每部止一人兼管。所有吏部事

務現係阿桂管理。阿桂未回京以前。著程景伊暫行兼管。阿桂回京後。程景伊即毋庸管理。○又諭曰。朕此次巡幸江浙。於明春正月十二日啟鑾。著誠親王。理郡王。大學士公阿桂。協辦大學士尚書英廉。留京辦事。阿桂現在河南督辦河工。其未到京之前。留京事務。著大學士程景伊暫行辦理。俟阿桂回京後。即毋庸同辦。所有月選之文員內。通判州縣等官。武員內。八旗護軍校。驍騎校。及外省送到之驍騎校。并年滿千總。水手等官。并俱著王大臣照例驗放。至外省督撫提鎮等摺。著齋摺人。前赴行在奏遞。該部通行傳諭知之。○以兵部左侍郎周煌為工部尚書。○以太常寺少卿扎爾漢為太常寺卿。○調江西按察使瑞齡為江蘇按察使。以太僕寺少卿姜晟為江西按察使。○旌表守正捐軀山東聊城縣民楊文成妻張氏。○庚午。命大學士程景伊充國史館正總裁。吏部左侍郎王杰充

副總裁。○辛未

上幸瀛臺。年班庫車阿奇木伯克二等台吉鄂斯瑞等。金川瓦寺土司桑郎榮宗等。瞻覲。○諭曰。直隸總督楊景素老成歷練。宣力有年。簡任封疆。正資倚毗。忽聞溘逝。深為軫惜。著加贈太子太保。其任內處分俱著加恩開復。所有應得卹典。該部察例具奏。○又諭曰。直隸總督員缺。著袁守侗補授。河東河道總督員缺。著陳輝祖補授。其河南巡撫員缺。著榮柱補授。袁守侗接奉諭旨。即速馳赴新任。其未到任以前。所有直隸總督事務。著周元理暫行護理。○諭軍機大臣等。據畢沅奏。前奉諭旨。查拏進勦金川潛逃之綠旗兵丁。悉心設法。嚴切曉諭。懸立賞格。實力緝捕。除節年拏獲四十名正法外。本年又拏獲二名。審明治罪。現在仍將未獲各犯。飭屬嚴拏。務期全獲。以肅軍紀等語。所辦甚好。已於摺內批令告知劉秉恬矣。前此大兵進勦金川。所調各

省綠營兵丁。均有潛行逃回者。情罪甚為可惡。節經降旨。上緊嚴緝。並令各該省督撫。於歲底將一年所獲逃兵多少。具摺彙奏。何以各省奏報。拏獲各犯。審明正法者。甚屬寥寥。非該督撫日久因循。查拏不能實力。即係設法未善。一任漏網稽誅。著將畢沅原摺。鈔寄派兵之各省督撫閱看。令其仿照。上緊實力查辦。將此傳諭知之。○又諭曰。榮桂現已降旨。補授河南巡撫。伊與國泰黃檢素昔俱各高興。朕屢經降旨訓飭。今榮桂新授河南巡撫。正當堵築要工。辦理災賑之時。著傳諭該撫。一切務宜鎮靜妥辦。不可急於見長。方能承受恩眷。若不知悛改。仍復高興。黃檢即其前車也。若因此旨。一切模稜。自以為足。不實力奮勉。則更不可。將此諭令知之。○以左副都御史羅源漢。為兵部侍郎。原任大理寺卿王昶。革任直隸總督三品銜周元理。俱為左副都御史。○壬申。諭曰。大學士行走班次。三

寶著在李侍堯之後。程景伊著在三寶之後。○以太僕寺卿江蘭。為河南布政使。○癸酉。諭據國泰奏。布政使徐恕。因署內失火。延燒住房。徐恕已經趨出。復進房內搶取印信。致受火傷。旋即身故等語。徐恕因搶取印信。其心本屬急公。受傷致斃。情殊可憫。著該部察例議給廕卹具奏。○吏部奏請。大學士程景伊。應授何殿閣及兼銜。得旨。程景伊著授為文淵閣大學士。兼吏部尚書。○以山東按察使于易簡。為布政使。山西河東道葉佩蓀。為山東按察使。○甲戌。諭曰。汪廷璵現在丁憂。工部侍郎員缺。著胡高望補授。○命兵部侍郎羅源漢。提督順天學政。○乙亥。孝莊文皇后忌辰。遣官祭。昭西陵。○諭據福康安等奏。復州城守尉文慶。聽信家人李二。挾嫌妄訴。派人躡緝。驍騎校布特穆珠款跡。李二因聞布特穆珠與王棟熟識。指稱王棟妻陳氏。與布特穆珠有姦。至

使巴彥泰等。誑哄布特穆珠至西街。夥衆毆打。擡往王棟家剝衣誣姦捏稟。該尉聞稟。並不根究虛實。輒行呈報。其中不無知情縱容情弊。請旨革職究審等語。文慶著革職。交與該將軍會同盛京刑部。提同案內人犯一併嚴審明確。定擬具奏。○是日起。

上以歲暮禋祭

太廟。齋戒三日。○丙子。諭軍機大臣等。據畢沅奏。鎮安縣民李生花家被劫。拏獲首夥各盜。

馮老三等。審擬斬決一摺。已批交三法司覈擬速奏矣。此案首盜馮老三。糾夥十餘人。明火執仗。捆毆事主。劫去財物。實屬巨盜。自應立時拏獲。審明辦理。俾要犯不致稍稽顯戮。今李生花於本年九月二十六日被劫。何以遲至十二月。始行審擬具奏。殊屬延緩。畢沅現已丁憂回籍。著傳諭劉秉恬將審辦此案。因何遲延緣由。詳悉覆奏。○丁丑。以歲暮禋祭。遣官祭。

太廟中殿

後殿

上御重華宮。賜年班庫車阿奇木伯克二等台吉鄂斯瑞等及金川瓦寺土司桑郎榮宗等茶賞賚有差。○戶部侍郎署吏部侍郎和珅奏。原任山東濟寧州知州藍應桂。於伊塔潘鷺等冒籍案內。革職問擬軍臺。奏准贖罪。茲復呈請捐復。經大學士尚書程景伊批准先行。該員所得私罪。與捐復例不符。吏部向無堂官一人率批先行者。不敢依樣顛預。得旨。程景伊於藍應桂捐復一事。不與各堂官商酌。竟標先行。准其捐復。辦理實屬錯誤。朕姑不深究。著交都察院議處。但藍應桂係國泰請發東省委用之人。伊未捐復以前。國泰何以稱其已經捐復。先為奏請。以致有此影射先准之事。是此案辦理錯誤之由。實始於國泰。著將國泰一併交部議處。○戊寅。禋祭太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭

孝賢皇后陵。

端慧皇太子園寢。○遣官祭

太歲之神。○諭曰。阿爾薩朗著授為伊犁領

隊大臣。前往更換慶齡。○己卯

上御太和殿。筵宴朝正外藩。左翼科爾沁和碩

親王恭格喇布坦。旺扎勒多爾濟。多羅郡王

和碩額駙齊默特多爾濟。多羅郡王喇什噶

勒當固山貝子班珠爾。和碩額駙敏珠爾多

爾濟。輔國公哈達。納遜巴圖。公品級台吉拉

旺。一等台吉敏珠爾多爾濟。二等台吉錫第。

班珠爾。喀喇沁多羅郡王喇什納錫第。輔國

公拉扎布。和碩額駙永庫爾忠。索諾木巴勒

丹。固山額駙敦珠布色布騰。等塔布囊丹

巴多爾濟。翁牛特多羅郡王旺舒克。鎮國公

恭格喇布坦。四子部落多羅郡王喇什雅木

丕勒。喀爾喀左翼多羅貝勒阿裕爾。喀爾喀

右翼固山貝子車木伯勒。巴林固山貝子薩

木丕勒多爾濟。和碩額駙布顏圖。一等台吉

索特納木多爾濟。教漢固山貝子垂濟扎勒。

和碩額駙密岳特多爾濟。輔國公桑濟扎勒。

二等台吉濟克濟扎布。郭爾多斯固山貝子

色旺喇什。扎魯特鎮國公色稜扎布。郭爾羅

斯輔國公恭格喇布坦。奈曼一等台吉素彌

喇。阿魯科爾沁一等台吉阿爾達錫第。右翼

喀爾喀和碩親王固倫額駙拉旺多爾濟。和

碩親王諾爾布扎布。多羅郡王蘊端多爾濟。

輔國公拉旺多爾濟。德哩克多爾濟。伊什扎木楚。噶爾瑪。貢楚克達什。扎薩克一等台吉。索諾木敦多布。車登扎布。齊巴克扎布。納旺伊什杜爾伯特和碩親王。車凌烏巴什。四等台吉。固爾固木。浩齊特多羅郡王。齊蘇龍多爾濟。教漢多羅郡王。齊默特魯瓦。二等台吉。班珠爾喇布坦。同部郡王。品級貝勒。霍集斯。輔國公和什克。額色尹。託克託。扎魯特多羅貝勒。袞布扎布。茂明安多羅貝勒。袞楚克扎布。阿巴哈納爾固山貝子。達克丹朋素克。綽羅斯固山貝子。納木扎勒。厄魯特公。品級台吉。旺沁班巴爾。吐魯番協理旗務伯克。色依普拉。二等台吉。丕爾敦。及領侍衛內大臣等。召科爾沁和碩親王。恭格喇布坦。旺扎勒多爾濟。多羅郡王。齊默特多爾濟。喇什噶勒當。固山貝子。班珠爾。輔國公。哈達喀爾喀和碩親王。固倫額駙。拉旺多爾濟。和碩親王。諾爾布扎布。輔國公。拉旺多爾濟。伊什扎木楚。杜

爾伯特和碩親王。車凌烏巴什。喀喇沁多羅郡王。喇什納錫第。輔國公。拉扎布。翁牛特多羅郡王。旺舒克。浩齊特多羅郡王。齊蘇龍多爾濟。教漢多羅郡王。齊默特魯瓦。固山貝子。垂濟扎勒。輔國公。桑濟扎勒。同部郡王。品級貝勒。霍集斯。輔國公。和什克。額色尹。扎魯特多羅貝勒。袞布扎布。茂明安多羅貝勒。袞楚克扎布。阿巴哈納爾固山貝子。達克丹朋素克。巴林固山貝子。薩木丕勒多爾濟等。至

御座前。賜酒成禮。○是日。庚子年立春。順天府進土牛春山寶座。○是月。大學士管閩浙總督三寶等奏。錢塘縣知縣唐若瀛。訪獲冒充新選休寧縣知縣王家幹之汪普如。嚴審究擬。唐若瀛可否送部引見。得旨。朕即至杭州。潛江縣長一坑。逼近襄江。連年潰決。積沙深厚。隄根不實。請就地勢較高之董家臺。築月隄一道。又鍾祥縣浪隄觀。殷家灣。劉公菴。三

處亦應築月隄。草廟原隄應修補。均請於公項借給領辦。分年於鍾祥。潛江。及下游之天門。京山等縣。有業民。分別按年徵還。得旨。知道了。○暫署兩廣總督廣東巡撫李質穎奏。安南國王咨稱該國土目黃文祠。懼罪遷延。已令宣光等鎮目。提兵合剿。恐竄入內地等語。臣嚴飭廣西沿邊一帶。及廣東欽州地方員弁。加意防範。如遇黃文祠及其黨羽。立即擒拏。謹將該國王咨文進呈。得旨。知道了。○

是年。追予出師金川陣亡之外委張士倫一員。祭葬卹賞如例。入祀昭忠祠。○旌表孝子安徽等省。文世震等三名。孝女。江蘇等省。姚氏等二口。守節合例。八旗。閒散宗室。伊克唐阿妻那拉氏等四口。滿洲。護軍進保妻那拉氏等九十三口。蒙古。前鋒良德妻王氏等二十一口。漢軍。閒散聶先榮妻何氏等十七口。內務府。副都御史完顏偉繼妻董氏等六口。奉天等省。駐防披甲衣藍保妻烏扎拉氏等

九十六口。直隸等省。民郝雍秀妻王氏等四百三十九口。未婚守志。江蘇等省。民陳基為聘妻貢氏等十四口。夫亡殉節。山東等省。民公肇亨妻秦氏等十四口。百歲壽民。婦。直隸等省。武積儒等十四名口。各給銀建坊如例。○一產三男。山西等省。康玘等六家。○會計天下民數。數各省通共大小男婦。二萬七千五百四萬二千九百一十六名口。各省通共存倉米穀。二千八百八十七萬二千九百五十八石三斗六升六合四勺。

大清高宗法天隆運至誠先覺體元立極敷文奮武孝慈神聖純皇帝實錄卷之一千九十七

實錄卷之一千九十七

七

大清高宗法天隆運至誠先覺體元立極敷文奮武孝慈神聖純皇帝實錄卷之一千九十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣童誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆四十五年庚子春正月庚辰朔

上詣

奉先殿行禮○詣

堂子行禮○御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御太和殿賜王公臣工等宴○御

乾清宮賜皇子皇孫親王等宴○

上以七旬萬壽頒詔天下詔曰朕統御寰區勤求郅

治。茂時育物。畏懼滋深。仰賴

上蒼眷佑。

列聖貽庥。海宇敕寧。輿圖式廓。孜孜夙夜。於今四十五年。春秋正屆七旬。緬維

皇祖聖祖仁皇帝法

天行健。久道化成。我

皇考世宗憲皇帝。丕繼

鴻謨。厚澤深仁。淪肌浹髓。朕祇適寅虔。不敢暇逸。以承

前烈。惟冀實心實政。永底昇平。至如臣工慶賀繁文。槩所弗取。第念中外臣民。企慕瞻依。彌形篤摯。已於乾隆四十三年降旨。普免天下錢糧。並特開鄉會試。恩科以宏樂利之庥。以廣作人之化。今茲履端協慶。率土咸熙。允宜俯愜輿情。溥施大澤。我

皇祖六旬萬壽。曾特頒

恩詔。遐邇均霑。朕惟以

皇祖之心為心。覃敷闡渥。嘉與天下臣民共躋

仁壽。用稱朕敬

天法

祖。加惠黎元之至意。所有應行事宜。開列於後。

一。五嶽四瀆等祀。應遣官致祭。著察例舉行。

一。

歷代帝王陵寢。

先師孔子闕里。應遣官致祭。著察例舉行。

一。自王以下。宗室覺羅十五歲以上者。俱加恩

賜。一。滿漢大臣年六十以上者。俱加恩賜。一。

內外滿漢文武各官。俱加一級。一。內外大小各官。除各以現在品級。已得封贈外。凡陞級改任者。俱照新銜封贈。一。凡試職各員。俱准實授。一。國子監貢監生。及各官學教習。免坐監期一月。一。各省儒學。以正貢作恩貢。以次貢作歲貢。一。滿漢孝子順孫義夫節婦。該管官細加諮訪。確具事實。奏交禮部。覈實旌表。一。滿洲兵丁。原係披甲効力行間。因病年老閒住者。著加恩賜。一。八旗滿洲蒙古漢軍兵

丁及內扎薩克喀爾喀等蒙古年七十。八十。九十以上者。分別賞賚。至百歲者。題明旌表。一。軍民年七十以上者。許一丁侍養。免其雜派差役。八十以上。給與絹一匹。綿一觔。米一石。肉十觔。九十以上者。倍之。至百歲者。題明旌表。一。凡嶽鎮海濱廟宇有傾頽者。該地方官估計工料。具奏修葺。以昭誠敬。一。各省道路橋梁間有損壞者。地方官查明修理。以利行旅。一。直省有坍沒田地。其虛糧仍相沿追

納者。該地方官查明咨部。奏請豁免。一。從前各省偏災地方。所有借給貧民籽種口糧牛具等項。查係實在力不能完者。著予豁免。一。各處養濟院所有鰥寡孤獨及殘疾無告之人。有司留心。以時瞻養。毋致失所。一。內外官員。有因公誥誤降革留任者。該部查明奏請開復。一。各直省軍流以下人犯。俱著減等發落。於戲惠此萬方。俾緝熙於純嘏。欽時五福。用敷錫厥庶民。布告天下。咸使聞知。○辛巳

諭上年豫省儀封考城一帶因漫工堵築未竣。瀕水田禾被災較重。節經降旨蠲賦截漕。以資接濟。又前後撥運兩淮鹽課及戶部課銀五百六十萬兩。交該撫飭屬辦理工賑。第念今春正賑已畢。青黃不接之時。若按例停賑。貧民餬口未免拮据。著再加恩。將被災較重之儀封杞縣商邱寧陵永城鹿邑睢州考城柘城汲縣淇縣濬縣延津等十三州縣。十分災之極貧。加賑兩個月。十分災之次貧。與九分災之極次貧民。加賑一個月。其被災八分以下各州縣。極次貧民。有需借給口糧籽種者。並著該撫查明。分別妥協辦理。務俾均霑愷澤。用溥春祺。該部即遵諭行。○又諭上年因豫省堵築漫工。曾降旨將應徵地丁錢糧緩至秋後開徵。第念該省自儀考數州縣被水成災外。其餘各屬雖獲有收。而元氣初復。戶少蓋藏。若將地丁及舊欠並徵。民力不無拮据。著再加恩。將該省四十四年分應徵

地丁錢糧除被災各屬蠲免外其餘俱自四十五年為始分作三年帶徵歸款用昭體恤窮黎至意該部即遵諭行○壬午

上詣

雍和宮行禮○以正藍旗滿洲副都統額森特為鑲白旗護軍統領○癸未敕諭達賴喇嘛呼畢勒罕朕統御萬邦撫綏天下祇期寰海蒼生共享昇平益宏黃教爾呼畢勒罕仰體朕意振作釋宗精勤經卷意念虔誠如前世之達賴喇嘛闡揚釋教推演宗風以祝三寶朕甚嘉悅茲遣使恭進丹舒克請安具見真誠朕仰荷

天眷禔躬安好諒爾體履自必清吉黃教攸係冀望甚殷爾其勤習諸經恢宏前業普濟羣生廣垂釋氏之鴻慈以副朕優待黃教至意勉之敬之勿怠厥志所有賞賜交來使發去特諭○諭上年江蘇阜寧清河等處因夏雨稍多洪湖水漲兼之上游沂蒙諸水下注致

成一隅偏災節經降旨令該撫實力查勘蠲賑兼施災黎自可不致失所第念東作將興當青黃不接之時正賑將停災民口食維艱著再加恩將災重之阜寧清河桃源安東鹽城宿遷海州沐陽大河等九州縣衛七分災以上極次貧民俱加賑一個月其無庸加賑之五六分災貧民有應行酌借口糧籽種之處並著該撫察看情形分別妥協辦理俾災黎均霑實惠該部即遵諭行○又諭上年安

徽亳州鳳陽等處因上游黃水漲溢尚未斷流以致復有偏災節經降旨令該撫加意撫綏照例給賑以示優恤第念今春正賑已畢青黃不接時民食不無拮据著再加恩將災重之亳州蒙城鳳陽懷遠靈璧宿州泗州盱眙五河九州縣及鳳陽長淮泗州等三衛成災八九十分之極次貧民概行加賑一個月其成災七分以下及勘不成災各地方並著該撫察看情形如有應借給籽種口糧之處

即行分別妥辦。務使窮簷均霑渥澤。該部遵諭即行。又諭上年甘肅皋蘭等廳州縣夏禾間被偏災。業經降旨分別賑恤。小民自不致失所。第念青黃不接之時。正賑已畢。窮黎未免尚形竭蹶。著加恩將皋蘭狄道平番武威肅州安定會寧固原涇州等九州縣災重貧民。加賑一個月。其餘被災較輕地方。並著查明酌借籽種口糧。以資接濟。該部遵諭即行。○又諭據李湖奏零陵縣學附生王繼梁

年九十歲。常德府學附生文人年八十五歲。衡山縣學附生朱瑞年八十二歲。安鄉縣學附生熊士焱年八十二歲。衡陽縣學附生王寅年八十一歲。黔陽縣學附生邱愷年八十一歲。三場完卷。未經中式等語。王繼梁文人朱瑞熊世焱王寅邱愷俱著加恩賞給舉人。准其一體會試。用昭嘉惠。耆年敷錫。春祺至意。○又諭曰。徐天柱上年考差。因詩文平常。未經錄取。此次發和雪詩。又復失粘。不必在

尚書房行走。○諭軍機大臣等。前據郝碩奏到屬員賢否單。所開吉南贛道孫廷槐考語。係明白歷練。謹慎詳細。上年十二月又奏稱。察看該道言動舉止。精神委靡。詢以地方事務。多有舛錯。請旨勒休等語。郝碩到江西任未久。其上次所出孫廷槐考語。相隔不及二年。何以一人而前後迥異。若此。至該撫二次所奏屬員賢否單內。並不提及孫廷槐。而吉南贛道一缺。竟未敘及。尤屬率混。孫廷槐人

本平常。是以前由山東按察使降補道員郝碩前奏該員考語。實屬過優。以此觀之。其節次所奏賢否各單。一任幕賓優敘。為當差之舉。而已從未過目。督撫考察屬員。是其專責。何得任意軒輊。漫無定見。耶。郝碩著傳旨申飭。此殊批旨著郝碩隨便寄各省督撫遞看。○乙酉。享太廟。遣怡親王永琅恭代行禮。遣官祭太歲之神。

上御紫光閣。賜蒙古王公台吉及回部郡王台吉並金川土司等宴。○召大學士及內廷翰林等茶宴。以四庫全書薈要聯句。○丙戌。世祖章皇帝忌辰。遣官祭。

孝陵。○

上詣

奉先殿

壽皇殿行禮。○諭軍機大臣等。前據阿桂等奏調南河文武員弁到工者十六員。內副將徐

建功。熟諳情形。暫留工次。其守備朱一成等五員。暫留差委。餘俱飭令各回本任等語。現在辦理王家莊引河。開寬加深。俟挑竣即可籌辦合龍。無需多員在彼。所有督率人夫。上緊挑濬等事。有先經調往之李永吉等在工足敷差委。至徐建功等在南河。係得力人員。朕現在南巡。正須相度河工。指示一切。該員等各有本任防汎管工事務。自應在彼伺候。著傳諭阿桂等。即飭令徐建功等迅速各回

南河本任。所有工次現辦情形。兩壩接做若干之處。並著隨時迅速覆奏。以慰厯念。將此由六百里諭令知之。○丁亥。

上詣

大高殿行禮。○召見軍機大臣。并直隸總督袁守侗。工部左侍郎德成。於承光殿。指示圖說。諭曰。圖內德成所擬於倒扎洪之東頂衝處所開引河。寬二十丈。長三百丈。接入引河為接溜溝。直達舊河順黃壩。即得合龍等語。所

言尚在情理。若在工籌辦時。阿桂果虛心秉公德成此論。未必盡無可採。至其所擬在十六堡漫口西隄。隨水築順水壩一道。將溜勢逼過口門數十丈。歸入舊引河。則斷不可行。從前十六堡。自前年高晉袁守侗等堵築五次。未能合龍。阿桂等始不得已。公同商酌。移在上游施工。今德成乃欲於屢經決裂處。所做工鑲壩。實屬執謬不通。伊因阿桂素輕其為人。不加禮貌。遂爾意存偏執。甚至朕前奏

對時尚復曉曉瀆辨。至倒扎洪接引溜溝一條。先據德成奏稱。並非自執已見。曾商之袁守侗。今又稱係問之叅將李永吉。及至再加根詢。又稱李永吉並未明向伊言。是其前後語言遁飾。竟似小人行徑。德成此事執謬乖張。朕何難即令福隆安。袁守侗等帶伊赴工。詢問李永吉。然不值辨成大案。朕辦理此事。毫無成見。即德成所擬兩條。一是一非。明白曉諭。爾等所共知共見。因差伊持河圖去問。

阿桂等故賜花翎。今伊一去。即思用小聰明翻成案。甚辜委用之恩。仍革去花翎。著將此旨交軍機處存記。俟阿桂等此番引河辦成後。再降諭旨。○吏部奏。例冊應行增改九條。一。各省試用從九品。不准咨補吏目。一直隸州知州在外題補之缺。准以現任通判曾任知縣之員保題陞用。一。辦差官員。若於既奉恩旨後。完納罰俸。仍不准與無處分者一體加級。一。坐補原缺各員。人文到部後。遇原缺

出。即未滿五十五日限。亦准坐補。一。議敘即用內閣中書。應與正班人員分缺間用。一。考試繙譯生童。應歸禮部辦理。不必由臣部題請欽點考官。一。地方應行緝拏之案。遇有奪犯毆差。未能即時擒獲者。應將州縣官照盜案例題叅。疎防倘有諱匿。照諱盜例革職。一。州縣官失察解役受賄縱脫。斬絞重犯。應於僉差不慎降一級外。再降一級調用。如係軍流人犯於罰俸一年外。議以降一級留任一

失察私鹽。於限內拏獲拒捕人犯過半者。應將降二級調用。舊例酌改降一級留任一。承廕嫡長子孫。雖有科名及別項職銜。如情願承廕。應弗拘不准補廕舊例從之。○戊子。諭曰。福隆安隨往江南。其兵部尚書事務著德福署理。理藩院印鑰不必另派他人。現有侍郎保泰。即令其帶管。永貴隨質郡王前往岱漢。其吏部尚書事務著綽克托署理。○諭軍機大臣曰。特成額等奏拏獲麻塘寺被焚。讎

殺案內兇番。先行審辦。一摺。據稱。因達爾吉之弟。七立汪等。常在熱賽一帶行竊。經裏塘協辦土司阿聰羅布。帶兵堵截。七立汪等拒捕。致被毆死。剝皮懸掛麻塘寺。示衆等語。裏塘因何有協辦土司阿聰羅布。於何時協辦土司事務。著傳諭文綬。即查明覆奏。又摺內所獲人犯。除郎忠噶克二犯。即行正法。梟示外。內有阿孔一名。據稱係聽從隨行。並未入寺。應請免死。給五百里外土司為奴。摺尾又

稱。夥犯阿孔。雖未入寺。但已附和隨行。究屬兇黨。未便照例安插。飭交打箭鑪廳牢固監禁。俟拏獲各犯。訊明從重歸結等語。阿孔一犯。何以摺內聲敘罪名。前後不同。阿孔敢於隨行附和。甚為不法。自應牢固監禁。俟各犯全獲。質明情節後。從重辦理。金川甫經平定。似此不法兇徒。不得不從嚴也。並著傳諭文綬。遵照辦理。至夾片所稱。三父賊刦搶喇嘛茶包傷斃護送人等之各犯。文綬到川後。並

著即飭委員及各頭人。嚴行截拏。務獲毋得。視為具文。致令免脫。稽誅。將此由六百里傳諭知之。○戶部議准。杭州織造徵瑞奏。北新關收稅舊例。煙百觔。稅銀四錢六分。酒十罈。約計二百觔。稅銀二分。今部頒則例。刪併兩項。並每百觔。稅銀四錢。均有窒礙。請照舊例辦理。從之。○步軍統領衙門奏。京城內外寺廟。菴觀碑碣。有文義違礙鄙俚者。應全行磨淨。其有關

### 廟諱

御名者。亦應將字磨去。得旨。所有磨淨碑身。著交工程處刻碑。及各項應用。其磨去數字各碑。著更易妥字重鐫。○命編修吳壽昌。在尚書房行走。以故喀爾喀多羅貝勒丹津子車凌多爾濟襲爵。是日起。

上以祈穀於

上帝。齋戒三日。已丑。諭軍機大臣等。據阿桂等奏。引河工程。日逐催趨。新正以來。夫役到

工更多。所挑土方計有四分。且開凍土鬆挑挖較易。其引河頭上層展寬十九丈者。計長七十餘丈。而於原估挑深丈尺。又添估挑深一尺五寸。自上至下一律相等。至挑水壩工。現在人夫物料晝夜進築。並於北岸立竿對準。以收逼溜之益。而順黃南北兩壩亦仍接做邊埽土。餞俟引河工程過半。再令南壩向北鑲築。則口門收窄時。引河亦可竣工。不致有彼此等候。及壩工著重之慮等語。所辦均合機宜。此時自應如此辦理。惟望

天祐

神助。於凌汎桃汎前迅速完工集事也。此事昨袁守侗來京時。屢經召令與軍機大臣并德成同見。朕再三指示。分晰是非。並令袁守侗。德成繪圖貼說進呈。據德成所擬。於倒扎洪之東。開引河寬二十丈。長三百丈。接入引河。為接溜溝。直達舊河順黃壩。即得合龍等語。所言未為不可。袁守侗以為逼近北壩。恐

北壩受害。則亦不可行。然尚近情理。至所擬於十六堡漫口西隄。隨水築順水壩一道。將溜勢逼過口門數十丈。歸入舊引河。則斷不能行。十六堡自前歲堵築五次。未能合龍。阿桂等始不得已。商移上游施工。今德成乃欲於屢經決裂處所做工鑲壩。并欲將現辦垂成之工棄而不用。是其執謬不通。實出情理之外。伊因阿桂素輕其人。不加禮貌。遂爾意存偏執。欲行翻案。甚至朕前曉曉噴辦。朕於

辦理此事毫無成見。即德成所擬兩條。一是非明白曉諭。亦從未發聲徵色。此軍機大臣與袁守侗等所共知共見。而德成轉肆行妄論。毫無敬謹之意。彼時朕設如阿桂情性早將伊革職。甚且立置重典矣。然德成人雖執謬。究因公事起意。與營私壞法者不同。因僅革去花翎。以示懲儆。俟引河工成後。再降諭旨。阿桂因此亦宜自知留意。時時收斂。莫自恃聰明。貢高矜傲。因德成此事一併明諭。

使阿桂有則改之。無則加勉可也。昨袁守備德成所進圖說。並著另繪一分。寄與阿桂等閱看。至此事土方已經辦有四分。惟冀人夫工料迅速藏功。以邀

天貺。仍將現在添辦各工情形。迅速覆奏。將此由六百里傳諭知之。○烏魯木齊都統索諾木策凌奏。烏魯木齊地方。延袤三千餘里。自改設道府州縣。安駐兵民三萬餘戶以來。繁庶無殊內地。有應行增改事宜。一。距西八站

之庫爾喀喇烏蘇。應酌裁內地同知一員。移駐管理倉庫商民事件。其向派內地佐雜五年更換所管晶河倉糧事務。應改為同知所轄之管糧主簿額缺。一。濟木薩地方。為迪化州屬入境首站。向設縣丞。應改為知縣。一。古城地方。距奇台縣九十里。為烏里雅蘇台巴里坤伊犁等處往來衝要。應增設理事通判一。綏來縣屬之圖古哩克。為綏來景化二城適中之地。應增設巡檢哈喇巴勒噶遜。原有

內地派往五年換班兵丁六百名。應俟班滿後。改撥攜帶家口兵丁一。都統衙門應酌增胥役。得旨軍機大臣會同該部議奏。尋議庫爾喀喇烏蘇移駐同知。應如所請。濟木薩縣丞毋庸改為知縣。古城毋庸增設通判。其餘各事宜。應交陝甘總督酌覆從之。○庚寅

上詣

南郊齋宮齋宿。○辛卯祈穀於

上帝

上親詣行禮。

上南巡。車駕發京師。○賜扈從王公大臣蒙古王公台吉直隸官員及回部郡王台吉並金川土司等茶果。○諭朕巡幸江浙省方觀民。鑾輅所經。宜施渥澤。用溥春祺。所有經過直隸山東地方。本年應徵地丁錢糧。俱著加恩蠲免十分之三。該部即遵諭行。○是日。駐蹕黃新莊行宮。○壬辰。賜扈從王公大臣蒙古王公台吉直隸官員及回部郡王台吉並金

川土司等茶果○諭朕清蹕時巡道經畿輔昨已特沛恩膏將所過地方本年額賦蠲免十分之三直省昨歲豐稔民氣恬熙朕心深為欣慰第念該省尚有積年欠項皆因從前被災較重時出借今若按例催科民力恐不無拮据著再加恩將順德廣平大名天津四府屬所有節年因災出借常平倉穀八萬四千八百餘石折色銀九萬八千七百餘兩屯糧豆穀一千二百四十三石零概予豁免該

督其實力稽察妥協辦理俾閭閻均霑實惠該部即遵諭行○是日駐蹕涿州行宮○癸巳賜扈從王公大臣蒙古王公台吉直隸官員及回部郡王台吉並金川土司等食○諭朕翠華南莅行慶施惠所有經過直隸山東二省凡老民老婦著加恩賞賚用示優老引年至意○又諭此次南巡所有直隸山東派出辦差兵丁著加恩賞給兩月錢糧○是日駐蹕紫泉行宮○甲午賜扈從王公大臣蒙

古王公台吉直隸官員及回部郡王台吉並金川土司等茶果○諭此次南巡經過直隸山東二省所有辦差文武各官住俸罰俸降級之案俱著加恩准其開復如無此等參罰案件者各加一級○又諭曰巴里坤副都統岱星阿年老應行更換著回京以原品休致永安著調補巴里坤副都統所遺古城領隊大臣員缺著巴里坤協領巴林泰補授並加恩賞給副都統職銜○諭軍機大臣等前據

阿桂等奏引河工程業經挑有四分且現在係開凍土鬆挑挖較易等語計阿桂拜發此摺已及一旬未據續有奏報朕因南巡經過雄縣一帶途次積雪未消於行程雖覺和美而天氣甚寒東北風亦大因念豫省距此不遠氣候風色或大畧相同該處是否不致冰凍挑挖施工尚不費力否朕心深為厯念堵築漫口已閱一載有餘此次引河工程務於二月內告歲俾大溜歸槽漫口合龍方為妥

協將此傳諭阿桂等即將工次現在情形若何工程現有幾分約計何日可以完竣之處迅速由驛馳奏此旨著由六百里發往○是日駐蹕趙北口行宮。

乾隆四十五年

主

大清高宗法天隆運至誠先覺體元立極敷文奮武孝慈神聖純皇帝實錄卷之一千九十八

大清高宗法天隆運至誠先覺體元立極敷文奮武孝慈神聖純皇帝實錄卷之一千九十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保都尚書紀錄六次臣曹振鏞等奉

敕修

乾隆四十五年庚子正月乙未諭朕巡幸江

浙道經畿輔

十

長蘆商衆踴躍抒忱用宜一體加恩俾需慶澤著加恩將長蘆商人應徵乾隆四十四年分鹽課銀五十餘萬兩內十分之一分作五年帶徵俾商力益資饒裕該部即遵諭行○又諭朕巡幸江浙上年業經降旨照從前之例於江浙兩省冬兌漕糧內各截留十萬石豫備臨時平糶之用所有此次減歇漕船向例止給一半月糧於該丁等生計未免拮据著加恩於應給月糧外再賞給

十分之二以示體恤該部即遵諭行○是日駐蹕思賢村行宮○丙申駐蹕太平莊行宮○丁酉遣官祭漢儒毛萇墓○諭朕巡幸江浙省方觀民曾降諭旨令沿途地方大吏毋得踵事增華致滋糜費第念蹕路經由直省一切行館悉仍其舊而地方官逐程修葺經理亦未免稍需用度著加恩於長蘆鹽課應解內務府銀兩內賞給銀二萬兩以示體恤○是日駐蹕紅杏園行宮○戊戌賜扈從王公大臣及直隸官員等茶果○諭朕因東南黎庶望幸情殷爰舉舊章五巡江浙所以省方觀民勤求治理清蹕所經各處舊有行宮祇令掃除潔淨以供憩宿毋得踵事增華致滋糜費屢經降旨諄切曉諭封疆大臣自能仰體朕心遵旨辦理第念直省行館近京數程屢經駐蹕即圯墮裱飾為費尚屬無多其自山東以至江浙所有行宮則自乙酉南巡至今未經臨蒞閱時既久不免彫舊剝落地

方官修理葺治不無所費且山東江蘇二省俱有添建座落此項用度聞各省俱係捐廉辦理在地方大吏養廉豐厚分年扣捐以抒忱悃尚屬可行况朕又復加恩賞給庫銀用示體恤伊等辦理儘足敷用若更因此派累閭閻致滋苛擾則斷不可且非朕念切民依行慶施惠之意也第恐不肖有司或有藉辦差為名暗中科歛而窮鄉僻壤未及周知亦有幫貼差費者一經察出必將該督撫等重治其罪以昭儆戒其各凜遵朕旨慎勿自干嚴譴也將此通諭知之○江西巡撫郝碩奏江省幫船在本省例支折色銀兩均須換錢買備蓬纜等物時值歲底奸商市儈先將市錢囤積臨時長價旗丁深以為苦且一月中遽換錢數萬餘千勢難接濟未免稽遲查司庫存錢歲有積滯正須設法疏通請撥出三萬串照官價每銀一兩易錢九百九十之數發給旗丁即將其應領銀內扣還歸款丁民

兩有裨益。報聞。○是日駐蹕絳河行宮。○已亥遣官祭

東嶽。○遣官至曲阜祭

元聖周公。

先師孔子。○諭朕清蹕時巡。道經山左。昨已特沛恩膏。降旨將所過地方。本年額賦蠲免十分之三。茲當入疆伊始。疇咨民瘼。該省尚有未完款項。著再加恩。將山東省乾隆四十二。三。四等年。歷城等二十一州縣。因災緩徵

未完地丁銀。十三萬四千四百餘兩。臨清等七州縣。因災緩徵未完常平穀。二萬六千三百餘石。杜穀二千四百餘石。麥種合穀三千二百餘石。概予豁免。該撫其善體朕意。率屬實力奉行。俾閭閻均霑實惠。副朕惠愛黎元。用普春祺至意。該部即遵諭行。○又諭朕翠華南蒞。問俗省方。道經山左。因念各處舊有行宮。久未臨幸。地方官逐程修葺經理。不免稍需用度。該省又添建座落二處。亦不無所

費。著加恩於山東鹽課內。賞給銀三萬兩。以

示體恤。○是日駐蹕德州行宮。○庚子。西藏

辦事大臣恒瑞。索琳。遵旨奏覆。散演賊匪。阻

路行劫。亟宜懲創。以靖地方。業令公班第達

於十一月初三日。由西藏起程。計至嘉木喀

爾。有千餘里。時值雨雪。勢難速行。亦不敢稽

緩。臣索琳。趕辦烏拉牲隻。令遊擊納其善等

於十二月十八日。帶兵前赴班第達行營。抵

察木多。俟明春草青時。進兵。諸事與班第達

酌辦。以期迅速奏功。得旨。好。知道了。○是日

駐蹕曲陸店行宮。○辛丑。駐蹕李劉莊大營。

翼日如之。○壬寅。

孝聖憲皇后忌辰。遣官祭

泰東陵。○戶部議覆。直隸總督袁守侗議奏。密

雲駐防兵米運放事宜一摺。查豫東二省。每

年停運薊州粟米五萬七千石。前准保定。雄

縣二駐防兵米。於此項撥給。今密雲事例相

符。所需一半本色。應如所奏。即於山東。河南。

各水次應存停運米石內撥運。每年隨漕運通再此米運赴縣倉收放責成該縣。自應專令該縣承辦領運。該督奏令駐防人員同往通州收領之處。毋庸議。至所稱運米徑由陸路查通州至密雲有漕白二河。可以水運較陸運為省。應令酌看情形。如遇早乾及水大時。自應陸運。若河水平順。即應水運。至奏稱本年豫東漕船已行。所有本年夏秋冬并四十六年春季應需米石。請於豫東二省現運四十五年漕糧正供項下截撥之處。查本年豫漕普蠲。應於山東新運漕糧內暫行撥放。次年運補從之。○癸卯。諭據富興奏協理事務領隊大臣舒泰為人輕躁。器小易盈。於一切事件肆意妄行。全不中節。若仍姑容。恐貽誤邊疆。請另簡員更換等語。舒泰前因有罪革去副都統。朕加恩予以自新之路。今在業爾羌領隊大臣上協理事務。今乃不知悔改。仍敢肆意妄行。甚為不堪。著革退領隊大臣。

自備資斧。來京候旨。所遺領隊大臣員缺。著特通額補授。○是日。駐蹕晏子祠行宮。○甲辰。伊犁將軍伊勒圖奏。哈薩克汗阿布賚皇。遞托忒字文。並詢據伊子塞德克素勒坦。稱去年夏間。哈喇克塞克等三鄂拓克之阿哈拉齊。及伯克博羅特等。與我父構兵。後伯克博羅特。領千餘人來。我父叩首引罪。猶未肯休。此三鄂拓克。勇力人多。恐將來復出。請賞借兵五六百名為援。將軍可奏則奏。不可則止等語。臣思此係哈薩克本境之事。我兵不便與聞。因諭云。爾父乃哈薩克之汗。所行順理。屬人自無不服。如有抗違。宜治其罪。今欲借兵於理未協。恐與爾等無裨。不便轉奏。得旨。所辦妥協知道了。○是日。駐蹕潘村大營。○乙巳。諭。現派侍郎和坤喀寧阿。馳驛前往貴州。有查辦事件。所有隨帶司員。著一併馳驛前往。諭軍機大臣等。現派侍郎和坤喀寧阿。馳驛前往貴州省。查辦事件。沿途驛站。

尤應稽查嚴密。以防透漏消息之弊。李湖。人尚結實。該省為貴州必由之路。著傳諭李湖於該省往來經由首站。派委幹員。嚴密稽查。如有私騎驛馬。由北往南者。即係透漏消息之人。該撫即行截拏。審訊來歷。一面據實具奏。將此由六百里加緊傳諭知之。○是日。駐蹕靈巖寺行宮。○丙午。諭軍機大臣等。現派侍郎和坤等。馳往貴州一帶。查辦事件。著傳諭顏希深。即日起程。前赴貴州。俟和坤到日。

有面傳諭旨。並令毋庸馳赴行在。即在京自行束裝。迅速前往。將此由六百里諭令知之。○又諭。據阿桂等奏。自正月二十日以後。天氣晴明。日出後。化凍。挑挖即可施工。通計引河工程。已有八分。并有數處大段已完者。此外亦俱催趨緊急。至挑水壩。以次接做。自當再趕做數十丈。使大溜直向北趨。其順黃壩所澆土。戲現擬加高。并鑲防風。以為外護。俟河水一經蓄高。即可開放引河。以為堵合之

計等語。自應如此趕辦。查此間距開封數百里。昨二十五日。西南風甚大。方幸可以放溜。今二十六日。所發之摺。何以並未提及近日風信。深為廛念。據摺內稱。引河工程。已有八分。計所差不過一二分。兩三日內。料可完竣。此時諒已辦完。何日可以放溜。盼望之至。著傳諭阿桂等。即將近日是否得有西南風。可以乘勢逼溜。其引河工程。是否已辦得十分。何日可以開放引河。堵塞合龍之處。迅速據

實覆奏。將此由六百里傳諭知之。○命署工部右侍郎福長安。在軍機處學習行走。○是日。駐蹕泰安府行宮。○丁未。諭所有行在應行引見官員。著福隆安同行。在吏部堂官帶領引見。○又諭。此次南巡。所有山東青州德州。江寧京口。杭州。乍浦等處。駐防之老人老婦。著加恩一體賞賚。用宣慶澤。○是日。駐蹕魏家莊行宮。○戊申。諭軍機大臣等。朕本日在中水途次。有民人張存道。在道旁持黃紙

呈狀叩聞。隨令軍機大臣會同山東巡撫國泰訊問。據稱伊父張萬綸於乾隆二十六年因河南楊橋漫口。知縣魏映淵令採買蔴觔三百觔。伊父僅買四十觔。照定例該價銀五錢六分。並未給發。轉因短少蔴觔未辦。致將吏員執照追去。含冤莫雪。曾在欽差前告過未准。今若仍在外省控告。仍恐不准。是以叩聞等語。該犯父子均係書吏。乃因漫口採買蔴觔。抗違遲緩。致被追取。吏員執照。今事隔二十年。又復薦赴行在。妄行叩聞。殊為刁詐可惡。豫省現在辦理開挑引河。堵築漫工事宜。著將該犯張存道。令國泰派委妥員嚴行押解赴豫。交與阿桂等永遠枷號工次。以示懲儆。○是日駐蹕中水大營。○已酉。賜扈從王公大臣及山東官員等食。○朝鮮國王李祘奏賀。

七旬萬壽。得旨覽王奏。以本年朕屆七旬。遣使於春正慶賀。具見悃誠。知道了。所有進獻禮

物不必收受。若仍令帶回。未免徒滋往返。著暫行留貯。准作正貢。以示朕柔遠之至意。該部知道。○是日駐蹕泉林寺行宮。○是月。浙江巡撫王宣望奏。仁和海寧二州縣一帶海塘。時屆孟春。潮汐尚屬平緩。西塘章家巷至潮神廟之西。一帶老沙。現長五百四十餘丈。東塘韓家池塘外陰沙。現長八十餘丈。尖山石壩東南面老沙。現寬十五丈。外接陰沙。寬二十餘丈。計斜長一百餘丈。底層中層竹簍各二百。俱係陰沙擁護。上層竹簍顯露二百。再塔山口。從前起有中沙一道。約長三千四百餘丈。今春水稍旺。逐漸刷低九百餘丈。現在水勢南北兩路分行。一切柴土石塘工皆穩固。報聞。○署湖廣總督湖北巡撫鄭大進奏。武昌省城濱臨大江。荆襄之水匯流直瀉。繞城而東。沿江俱砌有石岸。頂衝處兼有護岸。上年五六月間。江水盛漲。汕刷數月。致隄脚多有虛懸。查勘坍塌隙裂之處。刻不可緩。

者。估需銀二萬九千四百四十兩有奇。請動支現貯江工籌備本款銀。及時修築。下部知之。

大清高宗法天隆運至誠先覺體元立極敷文奮武孝慈神聖純皇帝實錄卷之一千九十九

大清高宗法天隆運至誠先覺體元立極敷文奮武孝慈神聖純皇帝實錄卷之一千一百

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 吏部總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部二庫事務世襲騎都尉軍功加十九級隨帶加二級又加二級 臣董誥內大臣戶部尚書錄事兼滿洲都統軍功紀錄五次尋常紀錄四次 臣德瑛經筵講官太子少保工部尚書紀錄六次 臣曹振鏞等奉 敕修

乾隆四十五年庚子二月庚戌朔諭據恒瑞奏稱索琳於正月初三日行抵拉里山忽中風痰於是日申刻病故其靈柩交伊子台費英阿護送來京等語著如恒瑞所請加恩照從前賞給副都統常在例動支帑銀三百兩賞交伊子護送靈柩來京所遺員缺著保泰即速馳驛赴藏協同恒瑞辦理事務○諭軍機大臣等索琳病故所遺員缺已派保泰前往但藏內正在需人之際保泰接奉此旨毋庸前來行在請訓即速馳赴再向來赴藏換

班大臣均攜帶賞賜達賴喇嘛禮物一分。保泰此去甚急。著由大內領大哈達一方。帶往彼處。問訊達賴喇嘛。並曉諭云。向來換班大臣。大皇帝俱交下賞物一分。帶來賞給達賴喇嘛。今因大皇帝巡幸江南。一聞索大人之事。即令我自京迅速前來。未詣行在。是以未帶賞物。惟奉旨問訊達賴喇嘛。帶來大哈達一方。將此傳諭保泰知之。○又諭曰。特成額等奏稱。據派出辦理三暗巴賊匪之遊擊索國璜報稱。駐藏辦事大臣索琳身故。當即派令成德帶領綠營兵。即日起程前往等語。所辦錯謬。伊係彼處將軍。一聞此信。理合親身帶兵迅速前往。辦理三暗巴賊匪。若在文綬未到。伊署理總督之時。尚有辭可說。文綬已回接任將軍。又有何事。而派員帶兵前往。殊屬不知輕重。特成額著傳旨嚴行申飭。此時若成德業將三暗巴賊匪辦竣甚妥。如尚需人著特成額迅即調兵與班第達一同馳往。

加意辦理。○是日駐蹕註經臺行宮。○辛亥伊犁將軍伊勒圖喀什噶爾領隊大臣惠齡奏伊犁兵民戶口漸增至十餘萬人。事務繁多。同知一員管理難周。請將伊犁現有兼管民人理事同知改為撫民同知。管理地方事務。添設理事同知一員。辦理各營刑名案件。又惠遠城惠寧城向設巡檢各一員。今伊犁移駐三千眷兵。散處遼遠。商民亦漸增。添巡檢二員。不敷分管。請添設二員。酌量分轄。下軍機大臣會部議行。○是日駐蹕萬松山行宮。○壬子塔爾巴哈台叅贊大臣慶桂領隊大臣伍岱奏。據土爾扈特親王奇哩布咨稱。欲於入覲時。奏請喇嘛一名。查內外扎薩克尊奉黃教。皆於本游牧喇嘛立廟念經。即土爾扈特和碩特等投誠以來。亦皆令其屬下喇嘛立廟。並無奏請之例。不便開端。因以事屬難行。飭駁一面。知會將軍伊勒圖得旨。是○添建甘肅隆德縣倉廩五十間。安西州倉

厥一百間。從總督勒爾謹請也。○是日駐蹕問官里行宮。○癸丑諭軍機大臣等。前因海寧控告李侍堯在滇各款。已派侍郎和珅。喀寧阿。馳驛前往查辦矣。著傳諭和珅等。於到黔時。傳旨舒常。令其一同馳驛。前赴雲南。將貴州巡撫印務。交顏希深暫行署理。如和珅等到滇。查辦李侍堯各款內。已得有確據。即一面奏聞。一面傳旨將李侍堯解任。其雲貴總督印務。令舒常署理。至顏希深業經降旨。

令其迅速赴貴州。昨據奏報。已於正月二十九日。自京起程。俟其到黔時。和珅等即將此旨宣諭遵辦。○是日駐蹕郊子花園行宮。○

甲寅遣官祭

先醫之神。○諭朕因東南黎庶望幸情殷。爰舉舊章。五巡江浙。茲當入疆伊始。慶澤宜敷。所有江南浙江水陸經過地方。本年應徵地丁錢糧。俱著加恩蠲免十分之三。該部即遵諭行。○又諭朕翠華南幸。慶典時行。蹕路所

經已降旨將直隸山東二省累年積欠銀糧概予蠲除。江省為財賦重地。茲入疆伊始。澤宜覃著。加恩將江寧藩司所屬。自乾隆十一年至四十四年。積欠及災緩共未完銀四十五萬二千餘兩。未完米十七萬三千餘石。蘇州藩司所屬。自乾隆三十九年至四十三年。災緩未完地丁屯折漕項學租銀二萬三千九十六兩。未完災緩漕糧漕項兵糧米十二萬九千八百九十餘石。又安徽藩司所屬

自乾隆四十三年以前。積欠災緩地丁漕項等款。共未完銀四十萬七百餘兩。未完米麥穀九萬七千六百餘石。俱全行豁免。用敷愷澤。副朕行慶施惠之至意。○是日駐蹕龍泉莊行宮。○乙卯諭朕翠華南幸。愷澤覃敷。而優卹高年。恩施宜渥。所有江南浙江二省老民老婦。俱著加恩賞賚。○禮部題。朝鮮國王李祘遣使表賀。

萬壽冬至元旦三大節。及進歲貢方物。賞賚筵

宴如例○又題琉球國中山王尚穆遣使表貢方物賞賚筵宴如例○是日駐蹕順河集行宮○丙辰遣官祭黑龍潭

昭靈沛澤龍王之神玉泉山

惠濟慈佑龍王之神○諭向來江南河務繁於河東近年以來南河安瀾順軌工程穩固豫省自儀封漫口後現有堵築事宜雖開挑引河放溜歸槽合龍在即但一切善後事務均關緊要李奉翰久任河工較之陳輝祖更

為諳習著調補河東河道總督至江南河務現有薩載兼管陳輝祖會同辦理自可漸臻熟悉江南河道總督員缺即著陳輝祖調補○諭軍機大臣曰永貴等奏稱今春氣候較寒南苑積雪未化年小阿哥等演圍馳逐恐有未便阿哥內如何出派請旨等語永貴等均係滿洲世僕又素為阿哥等總諳達理宜教訓阿哥勤習騎射乃以寒雪未融奏請暫停阿哥等前往殊屬非是朕每歲木蘭行圍

多值嚴寒雨雪阿哥等俱隨從行圍南苑非木蘭可比並無山場地勢平坦豈有偶遇寒雪即不可馳騁之理永貴德福著傳諭申飭仍著自十一阿哥至奕純俱赴南苑住宿行圍綿恩所習既嫻且有差使無庸前往永貴等即遵諭行○是日駐蹕林家莊行宮○丁巳祭

先師孔子遣協辦大學士英廉行禮○賜扈從王公大臣及江南官員等食○諭福建臺灣府屬一廳四縣地畝額糧向係徵收粟穀例不編徵銀兩前屆普免各省錢糧曾降旨一體全蠲此次普免直省正供庚子年該省輪免屆期著加恩仍將臺灣府屬一廳四縣本年額徵供粟一十六萬餘石全行蠲免○又諭朕此次南巡勤求民隱翠華所過慶典時行而兩淮電戶僻處海濱生計殊屬艱苦所有乾隆三十九四十四十二四十三等年各場因災帶徵遞緩各未完銀三萬五千六

百二十四兩零著加恩普行豁免以示惠澤  
（諭軍機大臣等頃已降旨加恩將臺灣各屬本年額徵供粟十六萬石全行豁免矣但向來閩省內地各屬均藉臺屬所產粟穀以裕民食今若將此項粟穀俱行蠲免則內地即少此十六萬石之糧未知閩省現在民間米糧是否充盈無須臺粟接濟著傳諭三寶富綱即確查該省實在情形或將臺灣本年額徵粟穀照數徵收按照時值給還價銀俾粟穀仍得流通內地閭閻益資饒裕或可分作兩年免徵以資調劑之處即妥為酌量迅速覆奏總期該省各府及臺灣各屬均霑愷澤副朕加惠羣黎至意○豁除江蘇丹徒縣坍沒公占田地乾隆四十二年以前民欠銀糧（豁免江西南昌衛前幫糧船二隻乾隆四十四年分遭風漂沒額糧）是日駐蹕陳家莊行宮○戊午祭

大社

大稷遣誠親王弘暢恭代行禮○遣官祭

河瀆

淮瀆之神順黃壩

河神廟楊莊

金龍四大王廟○遣官祭故河道總督靳輔齊蘇勒大學士嵇曾筠高斌等祠○諭朕巡幸江浙取道維揚因念兩淮窳戶生計勞苦業經降旨將節年未完應徵積欠銀三萬五千餘兩全行豁免以示惠卹其兩淮商衆踴躍抒忱並應一體加恩俾霑慶澤所有應還川餉項內尚有未繳銀一百二十萬兩著加恩全行豁免又兩淮商人厯綱提引餘利項內庚子年限應完銀二十七萬六千餘兩並著展限遞緩一年俾淮揚商衆益資饒裕該部即遵諭行○是日駐蹕桂家莊行宮○己未

上祭

河神渡河○閱清口東壩隄工○諭朕巡幸

江浙所有該二省辦差文武各官任內罰俸住俸降級之案俱著加恩准其開復其無此等參罰案件者各加一級○又諭朕清蹕時巡恩施宜渥所有江浙二省派出辦差兵丁著加恩賞給兩月錢糧○又諭在京工部滿侍郎現在乏人著金簡暫行署理工部侍郎事務○是日御舟駐蹕直隸廠○庚申

孝康章皇后忌辰遣官祭

孝陵○諭曰李奉翰之母著賞給大緞二匹紹

皮四張○又諭曰河標副將徐建功在工年久熟諳河務前經賞給總兵職銜著再加恩賞食總兵全俸○諭軍機大臣等刑部審訊瘋狂男子王鐵山懷揣布紙字片喧喊擬以斬決一案該犯既係神色恍惚供詞顛倒染患瘋痰屬實已降旨從寬改為應斬監候矣但此案刑部因其供稱乾隆四十四年曾兩次赴豫省河工傭作均經該處官員見其瘋顛解回本籍隨各查河南山西二省今據山

西巡撫將該犯在豫所遞黃紙字片及鼓詞小本咨覆到部覈與在京所獲字片無異等語該犯在豫曾將不法字片呈遞該撫陳輝祖既見有此等狂誕之詞何以並不奏聞嚴辦著傳諭陳輝祖即查明該犯前遞字片究在何衙門投遞或在府州縣遞送未經稟報或陳輝祖明知未辦均屬咎無可辭著陳輝祖據實明白回奏尋奏查此案瘋犯初次係儀考通判拏獲發縣遞回繼又來工次經儀

封縣知縣拏解時值大工緊急該員因係瘋顛不加細究臣亦不令搜查均有應得之咎請一併交部嚴加議處得旨該部議奏○是日御舟駐蹕平橋○辛酉遣官祭

關帝廟○以原任青海辦事大臣福祿為理藩院侍郎○以御前侍衛豐紳濟倫為鑲藍旗漢軍副都統○旌表守正被戕直隸張家口廳民孟建全妻夏氏以休致貴州獨山司土同知蒙永熙子錫命襲職○是日御舟

駐蹕海棠菴○壬戌諭三吳兩浙文風素盛前此清蹕時巡嘉惠膠庠特增試額茲當翠華臨蒞宜循舊典以示渥恩著將江蘇安徽浙江三省本年應試文童府學及州縣大學增取五名中學增取四名小學增取三名各該學政務宜詳悉校閱遴拔真才副朕樂育甄陶至意○吏部議准兩江總督薩載奏縣缺今昔情形不同請將江陰縣改為繁疲難要缺在外揀調句容縣改為繁難中缺歸部選從之○是日御舟駐蹕崇家灣癸亥遣官祭寶應縣

湖神廟○諭朕鑒輅時巡乘春行慶而清理庶獄矜恤尤深用沛德音式敷愷澤所有江蘇安徽浙江三省恩詔後軍流以下人犯俱著加恩各予減等發落用昭肆育施恩至意是日駐蹕天寧寺行宮至乙丑皆如之○甲子春分朝日於東郊遣誠親王弘暢恭代行禮○遣官祭

昭忠祠○賜扈從王公大臣及江南官員等食○諭朕巡幸江浙已降旨將經過地方本年額賦蠲免十分之三而省會駐蹕之地加恩更宜優渥著將江南之江寧蘇州浙江之杭州所有附郭諸縣本年應徵地丁錢糧概予豁免俾近光黎庶無事輸將共享盈寧之福該部即遵諭行

大清高宗法天隆運至誠先覺體元立極敷文奮武孝慈神聖純皇帝實錄卷之一千一百

大清高宗法天隆運至誠先覺體元立極敦文  
奮武孝慈神聖純皇帝實錄卷之一千一百一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十五年庚子二月乙丑賜兩淮鹽政

伊齡阿等食○諭朕清蹕時巡省方觀俗供  
頓盡由公帑昨伊齡阿奏兩淮商人請捐銀  
一百萬兩以効惻忱在辦差經費原無需此  
等捐輸第衆商情詞肫懇且昨已蠲免伊等  
應完銀一百二十萬兩又緩徵銀二十七萬  
餘兩其踴躍樂輸之惻自必倍殷却之轉阻  
其誠意此項銀兩即留為此次各省辦公之  
用著交伊齡阿於此項銀內給還直隸公捐  
養廉銀五萬兩山東公捐養廉銀十三萬八

千五百餘兩江南公捐養廉銀十二萬三千  
七百餘兩又前賞江南辦差銀三十萬兩亦  
著於此項內歸還原款又直隸正定隆興寺  
廟工告竣明春朕當親莅開光又山西五臺  
自乾隆二十六年巡幸後迄今已閱二十年  
亦應於明春前往拈香其直隸山西境內蹕  
路所經有應行修葺舊有行宮四處此外總  
用行營斷不許再行添建並著於此項捐銀  
賞給直隸銀三萬兩山西銀五萬兩以資修  
葺之費毋庸再行捐廉辦理其餘銀三十萬  
餘兩仍即交存兩淮運庫以備將來辦公之  
用○諭軍機大臣曰李奉翰奏據豐碭銅沛  
廳營先後稟報自本月十一二三四等日俱  
有黃水到境隨趕赴徐州見黃河水勢增長  
至六尺八寸現已平槽溜行迅速等語同日  
又據薩載奏稱查探虞城交界黃河內本月  
十一日戌刻清水下注十三日又續長渾水  
共長水五尺六寸寬七八十丈又銅沛廳屬

稟報。十三。四日。先後陸續長水一二尺。水面寬十二三丈等語。覽奏甚為欣慰。已於摺內批示。此次黃水下注。勢甚寬濶。自可仰邀神佑。即日集事。永得安瀾順軌。但自本月初十日。據阿桂等開放引河後。迄今已閱六日。朕日夜盼望。幾於夢寐不寧。此等宵旰焦勞。阿桂素所深知。日內即尚未合龍。亦當仰體朕懷。將現在工次情形。陸續由驛奏聞。何至李奉翰。薩載等。奏報黃水歸注江南境內。始

得稍慰朕心耶。至黃水既到徐州。此時定已合龍。阿桂奏報。亦不過早晚間即到。但十六堡漫口大隄。必須迅速趕築。老壩亦須填壓堅實。始資鞏固。著傳諭阿桂。乘此機會。速將漫口大隄。趕築完竣。並將老壩督修過半。阿桂酌看情形。如實可信。其一勞永逸。更無他慮。再將一切事宜。交李奉翰辦理。如尚未可深恃。阿桂仍須暫留工次。會同督辦。此時功已垂成。轉不必急急也。至此時計算歲功。約

在三月間。可於回鑾時。迎赴行在。復命於工程全局。更為有益。將此由六百里發往。並諭李奉翰等知之。○丙寅。遣官祭江瀆之神。○遣官祭吳季札祠。宋臣宗澤祠。明臣史可法墓。故大學士張玉書祠。劉綸墓。尚書趙申喬。巡撫潘思榘等祠。○旌表守正捐軀江蘇江都縣民丁萬相妻姚氏。○是日駐蹕高旻寺行宮。○丁卯。

上祭

江神渡江。○諭軍機大臣等。本日據阿桂等奏。自初八日後。引河日見暢達。又連值順風。大溜掣至八分以上。因於初九日。南壩又進一埽。金門止寬三丈零。至十一日午刻。兩壩即先自攏合。隨上緊填壓。未逾數刻。金門立見斷流。雖尚有一二處腰漏。而正壩屹立如故。現在儘力加倍鑲壓。並趕添邊埽。以為外護。俟河水大消。壩工穩固。再行奏報等語。儀封此次漫口。堵塞一年有餘。至今始得斷流。

雖據奏尚有腰漏之處。但徐州一帶已據報長水八九尺。溜勢湍激有聲。是大溜已歸故道。再能加倍鑲壓。趕添邊埽外護。自可合龍閉氣。佇待喜信速至。再夾片內。奏李奉翰初到。陳輝祖在工日久。可否暫留豫工。與李奉翰一同酌籌善後事宜。並將用過錢糧大數。趕緊於十數日內覈定。再令趨赴行在等語。所奏甚是。亦於摺內批示。南河雖關緊要。但現有薩載熟手。在此辦理。一切均可放心。陳

輝祖既在工日久。不特善後諸事。公同商酌。胷中已有頭緒。即查覈錢糧。亦資原辦經手之人。稽覈較為親切。陳輝祖自當暫留工次。俟老隄亦補築完竣。善後事宜定局。錢糧查覈清楚之後。或能隨阿桂同來。或俟阿桂起身後。再留數日。與李奉翰公同商酌。諸務交代清晰。再行趨赴行在。亦無不可。此時不必急急也。將此由六百里加緊傳諭知之。○是日。駐蹕金山行宮。翼日如之。○戊辰。

上幸焦山。  
御書金山

江神廟扁曰。德佑安瀾。○己巳。遣官祭故大學士史貽直墓。○是日。御舟駐蹕三義閣。○庚午。山西巡撫雅德奏。本年晉省輪值蠲免所有鹽課攤入地丁。應行分徵之交城。文水。汾陽。平遙。介休。孝義。臨縣。永寧。石樓。寧鄉。壽陽。孟縣。靜樂。代州。五臺。崞縣。保德。河曲。隰州。大寧。永和等。二十一州縣課銀。懇照三十七年之例。緩至次年同徵。報聞。○是日。御舟駐蹕政成橋。○辛未。遣官祭周泰伯祠。先賢言子祠。宋臣范仲淹祠。韓世忠祠。故大學士蔣溥墓。巡撫湯斌。張伯行。總河陳鵬年等祠。○是日。御舟駐蹕十里亭。○壬申。諭據阿桂等奏。豫省河神最著靈驗者。為靈佑襄濟大王。本姓黃。河南偃師縣人。從前已受勅封。擬為修墳種樹。并請於其子孫中。賞給奉祀生一人。又順治年間。總河朱之錫。

功著南豫二省。沒為河神。屢著靈應。可否特賜位號。又銅瓦廂。

風神廟。於開放引河之先。曾申虔禱。因連獲順風掣溜。全黃得歸故道。顯有默相之功。並懇頒發御書扁額。以昭靈蹟等語。著照所請。靈佑裏濟大王。交該撫榮柱。於其子孫內。擇一人作為奉祀生。世傳勿替。前任總河朱之錫。著交禮部。酌擬位號。候朕欽定。其銅瓦廂風神廟御書扁額。另行頒發。用答神貺。○又

諭。據大學士公阿桂等奏報。自本月初六日。開放引河後。日見暢達。又連值順風。全河溜勢掣動八分。因於十一日。趁機堵合。未逾數刻。金門立見斷流。大溜全入新河。其有腰漏挂簾之處。率同帶往司員馮應榴。舒濂。并司道知府等。分頭督催。竭數晝夜之力。金門一帶俱已閉氣。從前水深至十一丈者。均已停淤。止剩四丈餘。所有腰漏等處。亦已填壓堅實。從此黃流順軌。永慶安瀾等語。昨據薩載

奏。徐城誌。橋長水一丈一尺餘。雲梯關長水四尺九寸。溜勢湍急。全黃已復故道。直達歸海。此次儀封決口。辦理幾閱兩載。特命重臣前往經理。發帑五百餘萬兩。近復將引河大展寬深。接做挑水壩。逼溜北趨。始將溜歸正道。荷蒙

天佑

神助。幸得成功。朕感謝之餘。益深虔敬。向來河工漫口合龍。例得邀恩議敘。但亦應計時

日久。暫如三十九年老壩口隄工漫溢。二十日之內。即報合龍。在事大臣。自應加恩議敘。至此次則幾閱二年之久。方克歲事。朕惟感

謝

天恩

神佑。而於朕心。方深愧歎。即在事大臣。如阿桂等。休戚相關。誼均一體。亦不肯仰叨

天功。更邀議敘。至分頭督催之司員馮應榴。舒濂。司道江蘭。王啟緒。朱岐。張有年。沈啟震。康

基田等晝夜催趨。分力宣勞。非大臣可比。著仍交部照例議敘。至前此遣德成前往豫工。閱看原以其畧知工程做法。而其回京覆奏。乃欲仍於十六堡漫口築壩。逼溜歸入舊引河。彼時以德成甫經到工數日。即議更張。乃欲於屢經決口處施工鑲壩。執繆不通。因阿桂等素輕其人。不加禮貌。遂爾意存偏執。甚至奏對朕前。尚復嘵嘵。瀆辨。思用小聰明。故翻成案。且引索守伺為證。而索守伺至京。與

彼面議。原不以彼為是也。朕豈肯因德成一。人偏見。遽爾輕聽。致阿桂等掣肘難辦。因令軍機大臣存記。俟阿桂引河挑成。再降諭旨。今阿桂等引河放溜。金門合龍已成。若爾時輕信德成。遽議更張。豈不貽誤大事。德成著交部嚴加議處。至此次漫工。若照向例糜費工銀。應著落在事大小官員賠補。但此番辦理情形。實非從前漫決可比。阿桂等悉心經理。亦不遺餘力。所有用過工料銀兩。俱著准

其奏銷。毋庸議賠。惟決口究因平時防護不慎所致。從前河臣姚立德。撫臣徐績。實難辭咎。鄭大進到任不久。不必議著。阿桂查明伊二人任內所辦隄工歲修等項。分別著落賠補。以示懲儆。朕辦理庶務。一秉大公。今日因阿桂報到。特令隨營之大學士督撫等。與軍機大臣一同召見。明降諭旨。并將此宣示中外知之。○諭軍機大臣等。據阿桂等奏報。引河放溜。金門合龍一摺。已於摺內批示。并另

行頒發諭旨。阿桂等俱即遵照辦理。此次漫口。屢成復毀。至今始得蒇功。河歸故道。朕心既以為慰。亦以為慙。阿桂等皆當共體此意。現今功已合龍。漫口老隄。最為緊要。阿桂務將老壩隄口。督催堵築堅實。以資鞏固。方可起身。再漫口雖經堵閉。其壩內所存餘水。務令設法除去。使其涸現河底。再行填築實土。方足以資保護。此時朕已駐蹕蘇州。不日即可回鑾。將來阿桂。即於江南途次迎謁。或竟

至山東路上。亦不為遲。總以河工善後。堵築老壩隄工堅實。及壩內積水盡涸為要。不必急急前來也。將此由六百里加緊傳諭阿桂等知之。○又諭。向來兩金川番衆。俱不難。髮但自大功平定以來。沿邊各土司。無不隸我版宇。所有番衆。即與內地民人無異。自應恪遵定制。一例難髮。况現在安營設鎮。屯駐兵丁。而該處番人。若復仍沿舊俗。殊於體制未協。著傳諭文綬。即行明白曉諭各土司。令該

處番衆。概行難髮。並嚴飭駐劄各員。升實力稽查。務使遠徼番民。永遵法守。並諭特成額。明亮。知之。○是日。駐蹕蘇州府行宮。翼日如之。○癸酉。敕諭班禪額爾德尼。昨據伍彌泰奏稱。爾喇嘛因朕南巡。率領諸僧。嘽經虔祝。併呈進佛尊哈達等語。覽奏欣悅。朕自京啟鑾。沿途清吉。渡河渡江。天氣晴和。風恬浪靜。皆爾喇嘛為朕親誦經咒。虔作道場。精誠所致。有此吉祥也。今抵江省。特發去大哈達一

箇。繡僧冠一頂。朕行營佩帶大荷包一對。小荷包二對。西洋鼻烟盒二箇。以達朕意。喇嘛接奉時。即同見朕。歡喜用之。朕欲速見喇嘛。曷勝佇切。特諭。○甲戌。遣官祭賢良祠。○諭軍機大臣等。全簡屢將無關緊要之事具奏。甚屬不曉事體。全簡原係涼州協領。移駐伊犁。洊升至烏魯木齊副都統。從前來京。陸見朕。看其人氣局鄙瑣。嗣因索諾木策凌來京。令伊署理都統事務。數月以來。奏事轉多於

索諾木策凌。時而又均非要務。其意不過以為既攝都統。即儼然以都統自居。諸事不待索諾木策凌。盡行辦理具奏。甚屬好事。不惟不勝都統之任。即副都統亦恐不能稱職。著傳諭索諾木策凌。即將全簡果否能勝副都統之處。秉公奏聞。候朕另降諭旨。○是日。駐蹕靈巖山行宮。至丙子。皆如之。○乙亥。

孝昭仁皇后忌辰。遣官祭景陵。○諭軍機大臣等。據李湖奏。拏獲雲南督

標千總張曜承差尹适訊係李侍堯差伊送銀五千二百餘兩并玉器十件回家並有家人張永受等託帶銀七千餘兩并書信什物同摺差劉鳳翼等自京起程回滇赴府河驛借馬當經委員截留解省審訊一摺所辦甚好此項差弁於正月十七日出京在李侍堯事未發覺以前自可信其非送信之人若此後再有擅借驛馬之人則其為透漏消息無疑自應嚴行根究毋稍疎縱至李侍堯在京

管事家人八十五前據英廉查訊有本年正月初間張永受寄來銀五千兩之供今據李湖奏李侍堯寄銀五千餘兩之外又有張永受託帶銀七千兩從前未據八十五供出必須將張曜等解京與八十五質對始無遁飾著傳諭李湖即速派委妥員將劉鳳翼張曜尹适嚴行管押解京交英廉質訊將此由六百里傳諭李湖知之○又諭曰李湖奏鹽法道紀淑曾等截拏雲貴總督差弁劉鳳翼雲

南巡撫承差尹位等訊係齎摺回差上年十一月內自滇齎摺進京又有千總張曜承差尹适等供稱李侍堯差送銀五千二百餘兩并玉器十件回家又家人張永受託帶銀七千兩又永昌府知府特昇額託帶銀一千兩於正月到京將銀兩玉器各交清等語前據英廉查訊李侍堯家人八十五據供張永受寄銀五千兩今據張曜等供除李侍堯寄銀五十兩外張永受又託帶銀七千兩何以前此八十五止供出五千餘兩而張永受所託帶之七千兩並未供及其中顯有隱匿情事現已諭令李湖將劉鳳翼張曜尹适等派員嚴行押解進京著傳諭英廉詳悉研訊質對明確務使水落石出毋致稍有遁飾又李侍堯久任封疆聞其家人多擁厚貲即如張永受現寄銀七千兩奴隸賤人何以積銀如許之多連國雄是否知情尤不可不徹底根究英廉務將連國雄等嚴加訊詰盡行追出毋

使隱匿。至李湖所奏。永昌府知府特昇額。交張曜帶回銀一千兩。不過所積廉俸。寄為家用之資。業經伊家收領。自可無庸查辦。將此由六百里傳諭英廉知之。○又諭曰。張永受現在雲南。著傳諭和坤等。嚴訊張永受。何以積銀竟有七千餘兩之多。再查該犯如有應行留滇質訊之處。即留候訊。明後解京。若滇省現無應訊該犯之事。即選派妥員。將該犯嚴行押解到京。交與英廉質訊。歸案辦理。○

又諭。本日據陳輝祖奏。山東濟寧一帶。於初五日得雨。自未至戌。入土四寸等語。濟寧離省城不遠。該處有雨。濟南所屬各州縣。亦應得雨。況直隸河間一帶。據袁守侗奏。於初五。六等日。得雨雪二三寸不等。可見二月初間。雨勢頗廣。何以尚未據國泰奏及。著傳諭國泰。即將省城一帶。曾否得雨。及各屬稟報情形。查明迅速覆奏。將此由四百里傳諭知之。尋奏。東省自新正以來。雨雪霑渥。二月初一

日兗沂一帶。得雨三四寸。初五日。濟寧沿河各屬。亦得雨澤。初十。十一。十二等日。濟南省城。又得雨三次。十七日。復得雨一次。登萊所屬州縣。亦於十八日。得雨三寸。二十八日子初起。至丑末止。濟南省城。又得雨二寸。得旨。何故致遲。○丙子。諭軍機大臣曰。勒爾謹奏。鎮番縣戶民。呈請願往新疆墾種者。一百八十六戶。又平番。中衛。靜寧等州縣。願往戶民。一百三十一戶。俱係無業貧民。懇請攜眷前往種地。查乾隆四十二。三。等年。攜眷前往貧民。俱賞給一半盤費銀兩。請循照往例辦理。等語。所奏殊不知事體。從前初次移駐新疆戶民。係官為辦理。因念遠涉維艱。是以格外賞給盤費。今鎮番平番戶民等。因聞知新疆水土肥美。歲獲豐收。呈請攜眷前往墾種。自與前次官為經理者有別。豈宜循照向例。即或念該戶民等口食無資。亦止應照向給一半之數。再減一半賞給。已屬格外優卹。至將

來四五年後。此等閒風願往戶民日多。即此再行減半之數。亦毋庸給發。不過官為查照存案。聽其自行前往而已。若已經給發。不必拘泥追還。即如山東直隸等處貧民。各攜眷屬。出口種地謀生者甚多。俱係自行前往。又何嘗給與盤費耶。勒爾謹何不曉事。若此。可將此傳諭知之。○旌表守正捐軀直隸深州民劉富成女劉氏。○丁丑。

上詣蘇州府

文廟行禮。○遣官祭

歷代帝王廟。○諭。現在豫省大功告竣。黃河順軌。其一切善後工程。並潤出地畝。酌借牛具籽種等項。需用尚多。該省地丁錢糧。乾隆四十三。四。等年。業經加恩分別蠲免。緩徵本年開徵伊始。恐藩庫存項無多。不敷應用。著就近於兩淮運庫內撥銀六十萬兩。照例選派委員。迅速解往。以資接濟。○又諭曰。副都統烏什哈達著授為領隊大臣。前往阿克蘇。

更換景福。駐劄庫車辦理事務。常喜著自備資斧來京。○諭軍機大臣曰。申保等奏稱。庫車回衆。輕視常喜。請派一能清語辦事之大臣。前來更換等語。常喜在庫車。既不足以服衆。著即來京。庫車係回子伯克適中之地。關係緊要。已降旨調景福前往。令烏什哈達補授阿克蘇領隊大臣。但烏什哈達更事未深。阿克蘇距烏什甚近。一切事宜。申保與烏什哈達商酌辦理。惟期於事有裨。將此寄諭申

保。烏什哈達知之。○又諭。據寅著奏。尚有應賠三次未完銀二萬一千三百餘兩。並宿關應賠正項銀七十三百餘兩。屬令伊子舒明阿等。上緊措變完繳等語。寅著身任關差。有年。其短少銀兩。自應如數完繳。但伊素來尚屬出力。現經病故。若將應賠銀兩。令伊子如數交還。或致度日維艱。朕心有所不忍。著傳諭英廉。金簡等。將寅著產業。秉公據實查明。如無力全行完繳。即將其名下應賠銀兩。或

令交還一半。或令交三分之一。仍酌留萬餘兩贖產。贖給伊子衣食。以示優卹。至意。朕如此加恩體卹。若伊子舒明阿等。不知倍加感激。再有欺隱情弊。則是喪心昧良。自取罪戾。并著傳諭伊子舒明阿等知之。○又諭本日戶部議。將特成額原咨川省各屬平糶倉糧。因何逾額。請令該督據實覆奏一摺。已依議行矣。平糶常平倉穀。例以存七糶三為率。遇歲歉價昂。始准逾額平糶。然亦未有過七八

分。及全數出糶者。所以慎重倉儲。今川省素稱產米之鄉。又無災歉。隣水通江。納溪等州縣。亦未被水旱偏災。何以出糶倉穀。自四五分至八九分不等。甚至達州。安縣。井研。秀山等處。竟全數出糶。其中或有藉平糶便私。侵虧彌補情弊。均未可定。著傳諭文綬。即將因何如此辦理緣由。詳悉查明。據實明白回奏。毋得稍有諱飾。尋奏。查上年平糶。實因四十年。川東等處歉收。且下游販運過多。市價

昂貴。是以不拘成例。至有糶至八九分。並全數出糶者。現俱買補。並無情弊。得旨。既有此等情形。著該部議奏。○都察院會同吏部議奏。原任山東濟寧州知州藍應桂捐復一業。應將率標先行之程景伊。降一級留任。豫奏報捐之國泰。降一級調用。俱准抵銷。得旨。此業程景伊。於藍應桂捐復一事。未行詳覈情節。率標先行。准其捐復。國泰。於藍應桂未經捐復之前。即以已經報捐具奏。都察院吏部。

俱議以降級准抵銷。辦理亦祇可如此。至藍應桂縱令兩婿冒籍。實屬私罪。自不應准其復行報捐。前經和坤參奏。業經降旨依議。何以都察院議覆此案。竟未聲敘及此。殊屬疎漏。著都察院吏部堂官。明白回奏。○是日。駐蹕蘇州府行宮。戊寅。諭曰。此次隨來人員。雖俱已施恩賞賚。但行走內地。與邊方不同。用項俱屬稍多。著交總理行營王大臣等。將此次隨來各項人員。及住存王家營各項人

等。如何加恩賞賚之處。分晰定議具奏。其實給銀兩。著於兩淮鹽政庫存款項內動用。○是日。御舟駐蹕南斗圩。○己卯。清明節。遣官祭。

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭。

孝賢皇后陵。

端慧皇太子園寢。○諭。朕展義言巡。順時行慶。浙省輦路所經。本年應徵地丁錢糧。已先降旨。蠲免十分之三。茲入疆伊始。用宜更沛新恩。俾資樂利。所有該省歸安等縣。緩徵未

完地丁漕白各款銀五萬三千九百餘兩零。並歸安等三縣。緩徵未完南米四千七百餘石。仁和等三縣。未完民借穀一萬八千二百餘石。均著加恩一併豁免。以紓民力。該督撫等。其董率各屬。實力奉行。稱朕惠愛黎元至意。○旌表守正捐軀直隸易州民王觀妻李氏。○是日。御舟駐蹕嘉興府北教場。○是月。協辦大學士戶部尚書英廉奏覆。查李侍堯在京家人連國雄八十五。從前以京中無質證之人。難加研訊。所帶銀數。究未確實。今看差官張曜等供。是前供確有隱匿情弊。現在嚴訊。得旨。此事爾所辦過寬矣。何必。○調任河東河道總督李奉翰奏。臣起程赴豫。從銅沛豐碭一帶察看大河水勢。俱由中泓暢注。循軌順流。溜勢並無改移。埽壩均屬穩固。豫境新河。溜勢亦甚暢達。儀工自合龍後。臣阿桂等晝夜督飭搶鑲追壓。業已閉氣。大溜全歸新河。現在商酌善後工程。得旨嘉獎。○巡

視濟寧漕務給事中索興阿奏。自濟寧歷充沂泰濟四府州屬。查勘泉源。有數泉叢聚在跬步以內者。亦有零星錯處。相距各數十里以外者。諸泉中有石泉。有沙泉。有土泉。旺弱情形。亦復不等。緣冬春雨雪頻霑。地脈滋潤。泉源較往年加旺。於漕運有益。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之一千一百一

大清高宗法天隆運至誠先覺體元立極敷文奮武孝慈神聖純皇帝實錄卷之一千一百二

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正嘉旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂  
總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曾振鐸等奉

教修

乾隆四十五年庚子三月庚辰朔遣官祭唐

臣張巡許遠祠陸贄祠故大學士陳元龍陳世倌等墓○諭朕鑾輅時巡凡大學士祠墓在三十里內者例俱遣官致祭已故尚書錢陳羣向在內廷行走人品學問俱優著加恩派達椿前往致祭以示眷念舊臣之意○又諭據李奉翰奏山東鉅嘉主簿李奉瑞係伊親弟河南衛河通判李亨特係伊第二子山東壽東主簿馮堦係伊姑表兄弟俱隸河工例應迴避又直隸布政司黃檢係李亨特妻

兄將來掣補。並請迴避直隸等語。李亨特一員。現據陳輝祖奏。請隨往南河差委。業已准行。其李奉瑞。馮棟。二員。俱著照例迴避。交部另行銓補。○以散秩大臣公觀音保為泰陵總管內務府大臣。○以廣東高廉道奇豐額。為貴州按察使。是日。御舟駐蹕石門鎮。○辛巳。

上幸海寧州觀潮。遣官祭

海神廟。諭軍機大臣等。昨據和珅奏到摺

內有李侍堯家人七十五名字。大約即係八十五。伊係李侍堯得用之人。其私蓄必肥。且伊等每藉家主勢力。積蓄私財。盈千累百。及至家主遇有事故。又復脫然事外。另投一主。甚為可惡。英廉前次審訊時。並未根究。及此殊屬疎漏。即查辦李侍堯家產時。亦未將八十五等財產。一併辦及。著傳諭英廉。即將八十五。嚴行審訊。並將其所有貲財。嚴密查封。又李侍堯家人張永受。前寄銀至七千兩之

多。連國雄。亦係伊家得用家奴。所有伊二人財產。並著一併嚴密查抄。毋任絲毫偷漏。寄頓。○又諭曰。巴圖等奏稱喀爾喀等游牧地方窄狹。欲向西北移展。現與車布登扎布前赴科布多會同明善商辦等語。喀爾喀西北皆係杜爾伯特土爾扈特交界地方。此項地。若果係從前杜爾伯特歸附時。自喀爾喀地內。分給杜爾伯特游牧。今因喀爾喀游牧窄狹。將杜爾伯特向外移展。仍給喀爾喀。令其游牧。自屬可行。如杜爾伯特等現在游牧。本非喀爾喀舊地。今以喀爾喀游牧窄狹。將我軍威所得賞給杜爾伯特之地。給與喀爾喀等游牧。不惟於理未協。恐喀爾喀等向西北移展。而杜爾伯特土爾扈特之地。將俱被占矣。此則斷不可行。著傳諭巴圖等。伊三人惟當籌度於杜爾伯特。喀爾喀生計。有益不致互起爭端。詳議奏聞。是日。駐蹕安瀾園行宮。翼日如之。壬午。

上幸尖山○賜扈從王公大臣及浙江官員等食○諭海寧州石塘工程所以保衛沿海城郭田廬民生攸繫從前四次親臨指授機宜築塘保護連年潮汛安瀾各工俱為穩固今朕巡幸浙江入疆伊始即親往閱視石塘工程尚多完好惟繞海寧城之魚鱗石塘內有工二十餘丈外條條石作牆內填塊石歷年久遠為潮汐衝刷底樁微朽兼有裂縫蹲埕之處又城東八里之將字號至陳文港密字號止有石塘工七段約共長一百五六十丈地當險要塘身單薄亦微有裂縫此塘為全城保障塘下坦水所以捍護塘工皆不可不豫為籌辦著將兩處塘工均改建魚鱗石工俾一律堅穩并添建坦水以垂永久該督撫即派妥員確勘估計具奏又石塘迤上前經築有柴塘四千二百餘丈現尚完整究不如石塘之鞏固雖老鹽倉有不可下樁為石塘之處經朕親見然不可下樁處未必四千餘

丈皆然朕於民瘼所繫從不惜帑省工俾資保護著該督撫即將該工內柴塘可以改建石塘之處一併派委誠妥大員據實逐段勘估奏聞辦理如計今歲秋前可以辦竣即撥帑趕緊興修若秋間不能完竣則竟俟秋後辦理該督撫其董率所屬悉心經畫以期工堅料實無濫無浮務期瀕海羣黎永享安恬之福以副朕先事豫籌至意定邊左副將軍巴圖魯參贊大臣車布登扎布恒山保奏據科布多地方駐班扎薩克圖汗齊旺巴勒齋部落公職銜多岳特呈稱世受國恩復蒙將革去之公職賞還情願在科布多駐班効力行走等語科布多駐班原係兩部落輪差非扎薩克圖汗所應專駐多岳特此請不過希冀實授公爵殊屬取巧斷不可行應加駁飭得旨是知道了以鑲紅旗漢軍都統奎林為烏魯木齊都統○癸未

御書杭州

風神廟扁曰揚和底績遣官祭

禹陵

南鎮之神遣官祭

海潮神廟

江潮神廟並唐臣錢鏐祠宋臣岳飛墓明臣于謙墓故大學士徐本梁詩正尚書徐潮等墓○諭前以庚子年為朕七旬萬壽恐內外臣工欲申祝嘏屢經宣諭飭禁此次南巡回鑾後一俟

北郊禮成即啟程幸避暑山莊各督撫等皆不必前來稱祝更恐外省督撫不能仰體朕懷聞因七旬萬壽有取九九之義購備貢品誇方闕靡甚至力有不逮而隨眾效尤勉為充數尤屬不必各省督撫身任封疆惟當大法小廉奉公勤職副朕委任本不當以進奉見長著再傳諭各督撫今年八月慶辰一切仍照常例若借七旬萬壽為名多事繁文以申媚茲之悃不但為朕所不取且現經降旨令

奏事處屆期遇有多進貢物者一概不准接收諸臣其善體朕意毋得藉詞請覲致增煩費轉滋擾瀆將此通諭各督撫知之○諭軍機大臣曰奎林已授為烏魯木齊都統伊抵任時索諾木策凌將諸事交代即速馳驛來京索諾木策凌接到此信無庸疑懼並非因伊辦事不善令其回京朕欲授為將軍是以令奎林更換著即傳諭知之○又諭曰國泰自二月初六日在順河集送駕後至今一月未見有奏事之摺索守侗等在直隸比山東較遠已經屢次奏報得雨豈東省月餘竟未得雨亦無應行入告之件現當農務方興地方晴雨朕深繫念前奎林自京馳至行在始詢悉山東得雨情形業經傳旨詢問何以國泰尚未奏及且該省藩臬兩司今日俱有請安之摺國泰何以轉未具摺伊為人素不若此朕恐其體本瘦弱近日或因卧疾不能發摺轉為厯念將此由四百里傳諭問之令其

即行明晰覆奏。尋奏。臣自二月初六日以後。共奏事三次。請安三次。因差弁未妥。以致延誤。得旨。總是汝誤。何必巧言。○是日。駐蹕杭州府行宮。翼日如之。○甲申。

上幸秋濤宮。閱水師。祭。

先蠶之神。遣妃行禮。以左都御史申保為鑲紅旗漢軍都統。○調護軍統領永福為右翼前鋒統領。○乙酉。

上閱兵。諭。朕臨蒞浙江。所有該省辦差各兵。業已加恩賞賚。其福建綠營兵丁。調至浙江。並著一體加恩賞給兩月錢糧。○又諭。據三寶奏。上年福建省欽賜舉人郭鍾岳。年一百歲。又陳應騰。年八十八歲。宋耀。年八十五歲。該舉人等情殷感激。現由福建來至浙省。謝恩等語。郭鍾岳等。以海隅寒峻。年臻大耋。茲因翠華南蒞。遠涉迎鑾。著各賞御書墨刻。緞二匹。荷包一對。郭鍾岳壽躋百齡。尤為熙朝人瑞。著加恩賞給進士。以示優眷。耆儒至意。

○諭軍機大臣等。據李侍堯等奏。建水縣屬納樓土司普濟。主使吳義。謀死白易岩。陷害堂弟普清。且在省會地方。貯運重貲。潛圖行賄。該建水令竟毫無見聞。又稱普清致死白易岩是實。其中不能保無彼此交結。夤緣情事。請將土司普濟。並建水縣知縣周恭先。均革職嚴訊等語。普濟。周恭先。俱著革職。至此案犯證既衆。疑竇多端。自應逐一究出實情。以成信讞。此旨到時。如和珅喀寧阿尚在雲南省城。即提集人犯。會同舒常嚴審定擬。如和珅等業已自滇起程。或提集人犯。尚需時日。則和珅馳驛先回。喀寧阿留滇。同舒常審擬具奏。將此由六百里傳諭知之。以禮部左侍郎謝墉為會試知貢舉。禮部尚書德保。曹秀先為正考官。兵部尚書周煌。內閣學士胡高望為副考官。○以兵部侍郎博清額。為理藩院尚書。內閣學士瑪興阿。為兵部侍郎。○以正藍旗蒙古副都統伍岱。為正白旗護

軍統領。是日駐蹕聖因寺行宮。至辛卯。皆如之。丙戌。賜扈從王公大臣等食。○以主事職銜諾穆親為鑲白旗滿洲副都統。丁亥。祭。

先農之神。遣理郡王弘曉行禮。諭。此次浙省辦理差務所用銀兩。內公捐養廉銀五萬四千五百兩。著加恩於鹽道庫項銀兩內。照數賞給。毋庸扣捐養廉。○又諭。朕清蹕時巡。臨蒞江浙。原因厓念河工。海塘親臨閱視。兼以省方問俗。順時行慶。非為遊觀計也。前屢經降旨。所有經過地方。止須掃除蹕路。一切供頓。毋庸踵事增華。今浙省仍有添建屋宇。點綴燈綵之事。兼多華縟。未免徒滋繁費。朕心實所不取。三寶王亶望。均著傳旨申飭。嗣後如再有似此過費者。朕必加以嚴譴。不能寬貸也。○又諭。曰。浙江巡撫王亶望之母鄧氏。年逾八秩。著加恩賞給御書扁額。並大緞二匹。貂皮四張。○諭軍機大臣等。據阿桂奏。

稱。自豫省來浙。復命經過淮徐一帶。查看陶莊引河。兩頭已寬至九十丈。其中段僅寬六十餘丈。河身雖已刷深。但水勢被束。不能大暢。且將來伏秋大汛。水來猛驟。恐一時宣洩不及。若將河身通行開寬四十丈。俾一律深通。汛水便可暢注。等語。所奏自屬應行辦理之事。現在已令阿桂前往該處。會同薩載查勘。後阿桂即行回京。據實面奏。薩載再來。如果應行辦理。並速派委妥員。興工挑挖。務於四月內。全行趕辦完竣。約計朕回鑾經過時。可以辦得幾成。並著薩載據實覆奏。將此由五百里傳諭薩載。並諭陳輝祖知之。尋薩載奏。江南黃河較豫河本窄。自徐州起。已節節被束。不僅陶莊新河一段。然該處河身現較初開時。衝刷寬深。即偶遇盛漲。而上游兩岸有毛城鋪。蘇家山。峯山。閘。祥符。閘。俱可分洩。不患壅遏。今議開寬。南岸逼近清口。惟北岸可以施工。但已屆桃汛。必得寬留埂界。攔禦。

臣即先籌度。俟阿桂到會勘定議得旨。是。不必自行迴護。亦不必迴護阿桂。汝二人皆曉事之人。總期於事有濟可耳。○戊子。

上以儀封河工合龍。

命建碑於陶莊。

河神廟。

御製記文曰。河之復也。以隄合龍。隄之合龍也。以

天佑。

神助。然。

天之佑。廣大精微。不可以一二事舉。亦不可以

一二日期。

神之助。則有可以顯示昭靈。事舉日期者。此義已見於丁酉陶莊。

河神廟之文。而今復有顯示昭靈。聲應底績之。既是不可以不記。儀封決口之築。移金門。開引河。歷以年餘。迄未成功。亦無別法。於舊冬仍為大開引河。圖掣溜歸壑之為。及今春。

二月。阿桂等始有十一日兩壩自行合龍。隨填壓芟土。不逾數刻。金門立見斷流。俟十分穩固。即馳報合龍之奏。未數日而合龍之奏果至。然所謂自行合龍之語。不解何謂。茲阿桂以善後大局已定。來行在復命。細問之。乃稱二月十一日。儀封漫口未合龍以前。金門尚濶三丈。水深十一丈餘。至午時忽報順黃南壩沈墜。驚往勘視。則南壩埽根全勢向北移走。陡與北壩接連。時金門水面深止一二丈。爾時見機可乘。隨將合龍稽料趕緊填壓。不三四刻已見斷流。而埽底亦無翻花過溜。若非南壩向北沈墜移走。則三丈口門下埽合龍。非三兩日不能完竣。今機緣巧合。因敗為功。以兩載之勤。收功片刻。實由至誠感

召

天和

河神默相。非人力所能到。更非在事諸臣所敢望云云。自前歲河決後。予無日不叩。

天禱

神冀速合龍以佑蒼生。昨初十日渡黃於香棚及陶莊。

河神廟更益竭誠默籲而十一日遂有兩壩自行合龍。黃流順歸故道之事。此豈非

天佑

神助。前記所謂適逢其時者歟。予非敢自詡誠之能感。若謂能感則自前歲至今二月初十以前。豈誠之未至耶。而

神之顯示昭靈。實不可以不誌。或謂陶莊在江南。儀封在河南。云一則不可。兩處各有廟。云二則此未必能及彼。夫一佛而千百億化身。姑不必論。即蘇東坡論韓昌黎所謂如水之在地中。無往不在。昌黎不過文宗尚能如是。而福國佑民之

正神。顧當論其在此在彼。是一是二耶。及蒙庇蔭合答。

庶祉予惟虔鞏孜孜。日甚一日。永祈安瀾之

錫儀封合龍處。已命建

廟答貺。當別有記。而此陶莊實予竭誠蒙

佑之所。因命樹碑紀實。親書泐石。一如前建

廟之例。時庚子歲暮春上澣之吉也。已丑

諭。浙江進獻詩冊。考取一等之馬履泰。沈颺

李彤。沈叔埏。著特賜舉人。授為內閣中書學

習行走。與考取候補人員。挨次補用。其二等

之吳純等十三名。俱著賞緞二匹。又諭。此

次在淨慈寺接駕之紳士萬承式等十六員。

均年過古稀。龐眉皓首。矍鑠可嘉。著加恩各

賞緞二匹。其老民內之魯文元。章廣奇。俱壽

屆期。願尤為昇平人瑞。魯文元著賞緞四疋。

章廣奇著賞緞三匹。鄭華玉亦年近九旬。著

賞緞二匹。以示優賚。其王迪清等五名。著各

賞緞一匹。○庚寅。

孝賢皇后忌辰。

上命

皇十五子。顯璫祭。

陵寢○諭軍機大臣曰英廉覆奏審訊李侍堯家人八十五張永受連國雄等供詞一摺所辦甚屬荒唐八十五等不過一奴隸賤人積聚貲財均至數千餘金其平時藉勢貪婪不問可知英廉前日審訊時既不將其家產查封又任聽伊等捏詞支飾直至傳旨詢問始將不實不盡之處復行審奏英廉平日尚屬能事何以辦理此案絕不類其所為殊不可解即此查封之事想亦不無寄頓藏匿之弊日後若發覺是誰之罪耶英廉著傳旨申飭仍遵前旨將八十五等家貲嚴行查封毋任絲毫隱匿偷漏○又諭曰八十五等在京貲財雖經查辦其在滇省亦必尚有囊橐著傳諭和珅等即詳細查抄毋任絲毫隱匿寄頓如此外李侍堯另有得用家人如八十五等者並著一併嚴辦勿任漏網將此由六百里傳諭知之並將英廉原摺鈔寄閱看以浙江糧儲道楊謹為按察使○辛卯諭朕巡幸

江浙臨蒞杭州見西湖花神廟所塑神像及後樓小像牌俱書湖山神位其像大小雖異而面貌相仿聞係李衛在浙江時自塑此像托名立廟是以後樓并有正夫人及左右夫人之像甚為可異李衛於督撫中並非公正純臣其在浙江亦無甚功德於民併聞其仰藉

皇考恩眷較優頗多任性驕縱之處設使此時尚在猶當究治其愆豈可令其托名立廟永享祠祀乎所有廟中原像著該督撫俱即徹毀於前殿另塑湖神之像並於後殿另塑花神花后以昭信祀○諭軍機大臣等據李湖奏委員在澧州首站截拏雲貴總督差弁陳連陞自北來驛借馬訊據供稱二月初四日在郊子花園赴宮門進摺時途遇曾跟按察使汪圻之長隨崔二告知李總督有婪贓各款被叅欽差赴滇查辦并聞京中住屋查封陳連陞聽聞疑懼是日又見提督李奉堯并

李侍堯二子。在宮門免冠叩頭。神色悽慘。該弁益信崔二之言不虛。至二月十九日。因盤費缺乏。赴驛借馬。前行至湖南順林驛。被拏等語。陳連陞以齎摺差弁。膽敢於宮門探聽緊要公務。及知查辦李侍堯之事。既確。又復私借驛馬。馳回。其意欲何為。情節甚為可惡。著傳諭李湖。即派妥員。將陳連陞管押赴京。交英廉嚴行審訊。務得確情。據實具奏。並飭委員沿途小心管押。毋致稍有疎虞。將此由四百里發往。並諭英廉知之。○兩江總督薩

載奏。遵旨查勘黃河。歸復故道。溜勢湍激。趨海之路甚暢。臣將諸事辦畢。星即回至蘇州迎駕。得旨有旨。令汝同阿桂查勘河身。及入海之路。可即詳悉妥辦。不必以扈駕為急。自有楊魁在此也。○壬辰。上自杭州迴鑾。○諭曰。王亶望現在丁憂。浙江巡撫員缺。著李質穎調補。其未到任之前。著三寶兼署。所有廣東巡撫員缺。著李湖調補。

所遺湖南巡撫員缺。著劉墉補授。○又諭曰。本日據軍機大臣代王亶望奏。稱海塘工程緊要。奉旨督辦。今已丁母憂。自應解任回籍。但世受國恩。荷蒙重任。懇恩於治喪百日後。自備資斧。在塘專辦工程。稍盡犬馬之忱等語。所奏甚屬可嘉。著加恩馳驛回籍。料理葬事。百日後。即赴浙江辦理塘工。朕念切民生。不惜數十萬帑金。建築石塘。以資捍衛。必得工程鞏固。以垂永久。庶浙民得霑實惠。今王亶望懇請在工。專心督辦。於工程更為有益。此非王亶望有戀缺之心。亦非朕開在任守制之例。實屬伊具有天良。能以公事為急。大臣居心自應如此。君臣之間。均可以令天下人共曉。至李質穎到任後。專理一切巡撫應辦之事。所有海塘工程。伊初到浙江。未能深悉。不必辦理。庶彼此不致掣肘也。○又諭。今年京察屆期。吏部開列在京各部院三品以上大臣。暨各省督撫等。奏請甄別一本。向來

大學士例不開列第念大學士阿桂等或贊襄機要兼統部務或敷歷封疆勤勞懋著均能敬公稱職宜加優敘以昭恩眷阿桂三寶程景伊俱著交部議敘協辦大學士尚書英廉嵇璜尚書永貴梁國治福隆安德福胡季堂博清額侍郎和坤董誥喀寧阿福長安均勤慎稱職宜加優獎著交部議敘其左都御史崔應階左副都御史耀海大理寺卿袁芳松年力就衰難以供職均予原品休致餘著照舊供職○又諭今年京察屆期吏部將各省督撫開列名單進呈請旨甄別總督袁守侗薩載文綬巡撫鄭大進李湖均宣力封疆克稱厥職著交部議敘餘俱照舊供職旌表守正捐軀浙江平湖縣民汪南谷妻顧氏○是日御舟駐蹕塘棲○癸巳諭左都御史員缺著羅源漢補授都察院堂官現在乏人羅源漢著即回京供職其順天學政著金士松去○又諭朕自三十年南巡以後迄今十

有五年東南土俗民風易趨華靡每勗督撫大吏諄諄化導務期返樸還淳以臻郅治而江南之陶莊清口浙江之海寧塘工其修舉尤關民瘼因允兩省督撫籲請於今春再舉時巡之典乃自啟蹕以來所過直隸江南一切行營供頓不過就舊有規模畧加修葺辦理尚為妥協而從事浮華山東已開其端至浙江為尤甚朕心深所不取現在陶莊及海塘各工經朕親臨指示所有應行修理工程特命頒發帑金交該督撫等悉心妥辦將來工程完竣後朕自當再親蒞閱視恐後任督撫見此次所辦差務已多粉飾未免踵事增華從而加甚勢將伊於何底朕臨御四十五年無日不厪念民依乃以省方問俗之殷懷轉貽口實是誠督撫大吏之不能善體朕心而朕亦將引以為愧矣著再通飭各督撫以後務宜黜奢崇儉於地方諸大政實心經理毋得徒事繁華致滋浮費以稱朕惠愛東南

黎庶之至意。諭軍機大臣曰。閔鶚元奏。拏獲編造匿名揭帖。誣陷叛逆之項珍。審明定擬一摺。已批交軍機大臣。會同行在九卿。覈擬速奏矣。該犯項珍。縱容伊妻與人通姦。被房主及兵役等。屢次驅逐。輒敢挾嫌編造叛逆情事。捏稱霍山十王。及擇日祭旗等語。書寫匿名揭帖。倩人張貼。希圖陷害洩忿。情罪最為可惡。現雖照擬。比依大逆律凌遲處死。尚屬罪浮於法。著傳諭閔鶚元。將該犯項珍。即郭相周。於凌遲處死後。即行剉尸揚灰。以示重懲。○又諭曰。李質穎接奉諭旨。即將巡撫印務。交巴延三兼署。不必俟李湖到粵。即赴浙江新任。李湖。俟劉墉到省交代。再行起程。馳赴廣東巡撫之任。將此并諭巴延三知之。○調浙江學政彭元瑞。為江蘇學政。以吏部侍郎王杰。為浙江學政。○調禮部侍郎謝墉。為吏部侍郎。以內閣學士錢載。為禮部侍郎。○是日。御舟駐蹕石門鎮。○甲午。諭曰。王

杰已簡放浙江學政。本年係庚子正科鄉試。所有科舉錄遺事務。未便稽遲。王杰接奉諭旨。著即馳驛前赴浙江任事。○調刑部侍郎曹文填。為兵部侍郎。以江西按察使姜晟。為刑部侍郎。左副都御史王昶。為江西按察使。○命兵部侍郎曹文填。為武英殿總裁。○是日。御舟駐蹕嘉興府北教場。

大清高宗法天隆運至誠先覺體元立極敷文奮武孝慈神聖純皇帝實錄卷之一千一百二

大清高宗法天隆運至誠先覺體元立極數文  
奮武孝慈神聖純皇帝實錄卷之一千一百三

監修總裁官經筵講官太子太傅文淵閣學士文淵閣領閣事領侍衛內大臣稽察欽奉 上諭事件處管理

吏部理藩院事務兵部滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鎮邊將軍滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十五年庚子三月乙未諭曰王杰叅

奏武英殿提調陸費墀遺失各書底本四五  
百種令騰錄捐書繕寫以為拖延掩飾之計  
請勒限追繳等語所辦甚是辦理四庫全書  
一事表帙浩繁人員冗雜瞻顧私情自所難  
免然以國家辦此大事豈能徹底澄清毫無  
瞻徇至陸費墀專司提調前後數年事出一  
手其從前倚恃大學士于敏中優待假藉聲  
勢朕非不知之是以總司書局三員內紀昀  
陸錫熊均經陞用而陸費墀則久未遷擢現

據王杰查出伊短少底本拖延掩飾緣由則

不可不嚴行查辦陸費墀著解任交與英廉

胡季堂金簡曹文植東公審訊金簡久管武

英殿事務陸費墀所辦雖與金簡無涉自可

毋庸迴護且英廉等會同審訊諒亦不能稍

有徇隱至董誥未及清查底本雖與王杰商

同派員查對但亦有應得處分俟結案時一

併交部議處所請另派提調並著英廉簡派

奏明充補○諭軍機大臣曰英廉奏審出李

侍堯家人連國雄等寄頓財物一摺所辦總

不周到據奏郭全白氏三寶等既有如許寄

頓何以英廉初訊時並不查及且連國雄張

永受及喜兒之父三保係李侍堯在任跟隨

之人其私財尚至盈千累萬八十五係李侍

堯在京管事之人所有家務俱交經理較之

張永受等更為得用其私蓄貲財自必較肥

何以轉無寄頓英廉亦因何並未問及和珅

等現在滇省審辦此案設使滇省供出八十

五在京隱寄情弊奏聞英廉其何以見朕乎至宜安以閒散宗室乃不知自量與無藉小人交往其隱寄財物尤屬不堪除另行傳諭宗人府從重辦理示懲外將此傳諭英廉知之○又諭著傳諭和珅等將李侍堯在任家奴逐一嚴行訊究務使水落石出但和珅等在滇現有應審李侍堯被控正案頭緒已屬紛繁此等牽連情節不直在滇辦理致稽時日和珅等將正案審明并訊問張永受等緊要供情具奏後即派員押帶張永受等沿途訊問陸續詳晰奏聞○又諭刑部議覆直隸省民婦王氏因與劉祥通姦被媳杜氏撞遇誣陷杜氏姦情毆死減口一案照該督所題依故殺者斬律擬斬監候秋後處決並聲明王氏誣姦捆毆杜氏有意致死減口且傷至一百餘處姑媳恩義已絕應照凡人問擬等因所辦自屬平允此等倫理滅絕殘忍已極之人法無可貸至秋審時自應問擬情實即

予勾決以昭儆戒本年秋審原當停勾此案著交刑部存記於秋審時即行具摺聲明依律辦理此外如有似此者亦著一體遵辦於本內聲明秋後即予正法使殘忍害命之犯不致延喘受害者早得伸冤亦情理之正而明歲情實之案亦可少減○行在刑部奏山東壽光縣民婦魏桃氏遣姪控告魏萬年赴京呈控知縣挾嫌嫁禍並藉差科派商民富戶等款得旨此案著派阿揚阿王昶馳驛前往會同秉公審辦其帶往之刑部司員並著馳驛所有控告魏萬年即交阿揚阿就近派員解往質審○是日御舟駐蹕南斗圩○丙申諭曰勒爾謹等奏請調補濟木薩綠營遊擊與烏嚕木齊都統會銜一摺全簡之名開列在前全簡屢以烏嚕木齊無關緊要之事具奏朕即謂其糊塗不曉事務乃一才小瑣屑之人降旨嚴行申飭並令索諾木策凌將全簡能否稱副都統之處查明具奏今全簡

同總督勒爾謹奏事。列名在前。是妄自尊大。儼然以都統自居。伊乃副都統署理都統事務之人。即係正任都統。亦當列名在總督之次。今列名在前。甚屬不堪。果不出朕之所料。似此瑣屑之人。豈勝副都統之任。全簡著革。退副都統。加恩賞給協領職銜。前往伊犁。自備資斧。効力贖罪。如果奮勉。八年無過。方准開復。實授協領。全簡如此僭越。勒爾謹豈不知之。伊乃總督。從前索諾木策凌。曾列名在前。因係欽差大臣。自屬可行。今烏嚕木齊都統。已作為額缺。況各省惟將軍方可列名在總督之前。都統有列名在前之理乎。今伊犁將軍伊勒圖。列名在勒爾謹之前。乃分所當然。且勒爾謹從前在天津道任時。彼處即有都統。同直隸總督奏事。並未列名在前。而烏嚕木齊咨取人員。一切商辦事件。俱係勒爾謹定擬。自應前列。今一任全簡。妄為亦屬非是。著併令勒爾謹知之。以正黃旗蒙古副

都統傳景。為烏嚕木齊領隊大臣。○是日。駐蹕蘇州府行宮。翼日如之。○丁酉。諭朕於五月二十一日。啟鑾。前往避暑山莊。駐蹕秋後進哨。所有應行出派備辦事件。著各該處照例豫備。○又諭曰。李侍堯。由將軍用至總督。歷任各省。二十餘年。因其才具尚優。辦事明幹。在督撫中。最為出色。遂用為大學士。李侍堯具有天良。自應感激朕恩。奉公潔已。以圖報効。乃昨據海寧呈稟。李侍堯貪縱營私。各款。因命侍郎和坤。喀寧阿。前往查辦。今據和坤等查奏。訊據李侍堯家人張永受。并廠員素爾方阿等供。各相符合。隨詰訊李侍堯。據供。收受題陞迤南道莊肇奎銀二千兩。素爾方阿銀三千兩。汪圻銀五千兩。臨安府知府德起銀二千兩。東川府知府張瓏銀四千兩。交與佐雜孫允恭。赴蘇帶往。此內汪圻銀五千兩。因伊從前送過金如意三柄。發還後。又變價送來。又於前年差家人張永受。進京修

屋素爾方阿送銀五千兩。德起送銀五千兩。俱在板橋驛。交張永受收受。又據張永受供。發交珠子二顆。一賣給昆明縣知縣楊奎。勒要銀三千兩。一賣給同知方洛。銀二千兩。各等語。披閱之下。不勝駭異。李侍堯身為大學士。歷任總督。乃負恩婪索。盈千累萬。甚至向屬員變賣珠子。賊私狼藉。如此不堪。實朕夢想所不到。不特朕用人。顏面攸關。即各省督撫聞之。諒無不慚愧痛恨矣。李侍堯著革職。拏問按察使汪圻。迤南道莊肇奎。原署東川府知府張瓏。降調通判素爾方阿。丁憂同知方洛。昆明縣知縣楊奎。俱著革職。交與和坤等。一併嚴審定擬具奏。又諭。本日孫士毅具奏李侍堯一摺。據稱風聞李侍堯納賄勒索等事。因暗中躡訪。難得指證。賴欽差大臣來滇。密提家人員役。隔別嚴鞫。方能水落石出。至李侍堯擲還汪圻私餽一節。未行參劾。實屬糊塗。兼恐屬員畏憚李侍堯。不肯承認。

反自蹈誣讞。請交部從重治罪。以為瞻顧者戒。所奏殊屬欺飾。孫士毅由南巡召試中書。在軍機司員上行。走不次簡用。擢至巡撫。受恩深重。乃目擊李侍堯營求受賄。贓蹟累累。孫士毅竟置若罔聞。隱匿不奏。經朕派員查辦。猶復辯言飾非。巧為諉卸。其罪更不可逭。國家設立督撫。原為互相糾察。以維吏治。而飭官方。即藩臬兩司。均有奏事之責。如敢挾嫌誣奏上司。固有應得之罪。若總督果罔上營私。贓款狼藉。自當據實上陳。況巡撫為封疆大吏。近在同城。並不據實劾參。直待別經發覺。方以一奏塞責。又安用此巡撫為乎。孫士毅在軍機處行走有年。豈不知朕辦理庶政。務期徹底澄清。乃竟畏首畏尾。巧言支飾。甚乃自認瞻顧。其意欲以降調完事。尤屬巧卸。韋員朕恩。孫士毅著革職。發往伊犁自備資斧。効力贖罪。以為欺隱不職者戒。○又諭。雲貴總督職任緊要。現在內外滿漢大臣中。

堪膺此任者。如大學士阿桂。職領綸扉。尚書福隆安。扈從左右。不可遠去。和珅雖可。但往審之人。當避嫌疑。文綬亦可。而四川亦屬要任。其餘實無可勝任之員。奉天將軍福康安。才具明幹。秉性公忠。滇省應辦事務尚多。雲貴總督員缺。即著福康安補授。舒常俟福康安到任後。即馳驛來京。朕另有簡用之處。雲南巡撫員缺。著顏希深。馳驛前往署理。其貴州巡撫員缺。候朕酌量簡補。現在巡撫印務。即著布政使李本。暫行護理。○諭軍機大臣等。本日郝碩奏事各摺。其第一摺內有據饒九道額爾登布稟稱等語。朕始閱之。以為必有地方緊要事件。詳加披閱。則係護送接遞滇省運京銅船過境及赴局兌收緣由一事。而分三摺。已屬過於拘泥。且前摺內並未將何項銅船。先為聲敘。俾披覽之下。一目了然。郝碩久任巡撫。何不曉事。若此。著傳旨申飭。○又諭據和珅等奏。李侍堯於審辦納樓土

司命案。起出金六百兩。銀一千兩。與巡撫會銜具奏摺內。私將金數改寫六十兩。銀數改寫七千五百兩等語。顯係有心吞隱。自應著落根究。又據奏。現存司庫金六百兩。銀一千兩。一併歸官等語。自應如此辦理。李侍堯於查出應行入官金銀實數。膽敢任意改易。增減。即此案審結時。將銀七千五百兩全數實解。而其隱匿金數五百四十兩。合算價值。豈僅止所增銀六千五百兩之數。巧為侵蝕。鬼蜮伎倆。朕早已鑒其隱微。和珅等却未計及此耳。著傳諭和珅等。即將是否如此。向李侍堯嚴行究訊。務得實情。毋令稍有遁飾。將此由六百里諭令知之。○又諭據和珅等奏。嚴訊李侍堯家人張永受。據供。劉鳳翼所帶銀七千兩。係伊主發出。帶京還帳。並非已貲。又供。京中有住房二十餘間。取租住房十八間。地一項有餘。并有木器。此外別無貲產等語。張永受帶回已貲七千兩。前據英廉在京審

訊八十五等供詞已俱有著落。又查出伊有自置房產六處。地畝一處。借出帳目銀四千兩。茲據張永受在滇所供帶回銀兩。並非已貲。及所有京中財產。與英廉查出各項數目不符。不過希圖掩飾藏匿耳。著交英廉再行覈對。現在張永受一犯。滇省並無應訊之處。已據和珅等派委妥員押解至京。俟伊到時。英廉即提集郭全等嚴審確對。無難水落石出。伊不能再有遁飾也。將此由六百里傳諭英廉知之。○以烏魯木齊都統索諾木策凌為盛京將軍。○以一等公景輝為正黃旗蒙古副都統。○戊戌。諭據和珅奏。自李侍堯婪索屬員。賤私狼籍。雲南通省吏治廢壞。聞各府州縣多有虧空之處。必須徹底詳查。清釐積弊等語。朕思李侍堯以大學士兼任總督。倚藉恩眷。任意貪婪。盈千累萬。如按察使汪圻等。仰承意指。爭餽多金。若非侵漁屬員。安所取資。則各府州縣中之虧空。勢所必有。不

可不嚴行根究。以清庫項。而整官方。惟現在尚未發覺。朕不忍窮究。聊開一寬容之路。著俟福康安到任後。將通省各府州縣倉庫錢糧逐一詳加查察。彼時倘仍有虧空之處。立即嚴行叅奏。定當按律究擬。毋謂朕之不教。不恕也。○又諭。前據海寧面稟軍機大臣。所稱李侍堯婪贓。亂法各款。經朕特派大臣前往查辦。現據和珅等審訊屬實。已降旨將李侍堯革職拏問矣。海寧身為滿洲。且係原任總督明山之子。由軍機司員擢至臬司。目擊李侍堯種種貪婪。於回京時。即應據實上陳。如不敢自行具摺。亦應開列款蹟。呈明軍機大臣轉為奏達。乃不過托之私相議論。逮朕有所聞。召伊兩次面詢。海寧始終隱匿。不肯奏出貪婪之蹟。且謂李侍堯能辦事也。待傳旨嚴詢。始據開呈各款。是其面欺之罪。不能以所控非誣。曲為寬貸也。海寧著交部嚴加議處。○又諭。督撫布按身任封疆。理應整躬

率屬潔已奉公。庶羣僚知所觀感。吏治可望振興。小民均受其福。自恒冬良卿蔣洲高積錢度。以贓私敗檢。按律治罪。各督撫等共見共聞。諒無不洗心滌慮。人勵清操矣。乃近日李侍堯復有貪縱營私。汪圻竟有餽送金銀之事。昨據和珅查奏。李侍堯婪索屬員銀兩盈千累萬。甚至賣給屬員珠子。行同市井。較恒文等尤甚。實朕夢想所不到。督撫有考察羣吏之責。布按亦有佐理奏聞之責。如今屬員置辦物件。短發價值之事。不能保其必無。已屬有玷官箴。乃敢明目張膽。如李侍堯之婪索多金。勒賣珠子。實從來所未有。諭語云。不逆詐。不億不信。此等事。豈朕所忍為。逆億然。李侍堯現有此事。則又安保各省之必無似此者乎。督撫養廉豐厚。歲入一二萬金。有何不足。而復貪饕無厭。甘蹈蓋蓋不飭之誡。以致自罹法網。身名俱喪乎。至巡撫與總督近在同域。耳目親切。豈得諉為勿知。匿不具

奏。即藩臬兩司原有奏事之責。果見督撫贓款狼藉。至於如此。亦當據實上陳。今不但緘默不言。且有獻媚餽送者。吏治尚可問乎。朕實憤愧。不知各督撫何以為心也。為此明切訓諭。著各省督撫布按將朕此旨。繕錄一通。懸掛各衙門大堂。入於交代。觸目警心。各知戒懼。凜之母忽。○諭軍機大臣等。原任雲南巡撫裴宗錫。孫士毅。於該省查辦案內。俱有應賠之項。著傳諭三寶雅德。將該二員原籍家產。即嚴密查封。毋任隱匿。寄頓俟滇省查辦虧空完結後。再降諭旨。自當令二人分賠。將此由六百里傳諭知之。○又諭曰。安徽巡撫閔鶚元。前於入江南境時。接駕召見。已面奉訓諭。令其回任辦事。今聞其復欲來江寧。安省路途較遠。往返需時。况豫省黃河南經合龍。該處為黃河下游。一切隄堰宣洩并涸出地畝。催耕播種。無令失時。應行籌辦事務。正多。閔鶚元若復出境遠迎。轉於公務無益。

著即傳諭於何處接此旨。速行回任。又諭前據英廉奏京城鬧市口失火燒燬官房。本日又據奏新街口於十一日失火等語。現在時值春和雨水不至大缺。風日並非燥烈。何以旬日之間失火兩次。此必因福隆安等扈從出京一切巡查疎懈所致。英廉所管事務較多。即不能親身督查。亦當嚴飭左右翼尉官兵等實力巡邏稽查。毋得再有懈弛。將此諭令知之。○又諭刑部審擬王吳氏砍傷七歲幼侄王優子身死圖絕人之後一案。其情節極為殘忍。著交刑部改議。照前次直隸省民婦王氏致死伊媳之案。聲明本年雖遇停勾。仍當屆期請旨。前案並遵旨聲明改議題奏。將此諭令知之。○行在吏部議奏工部侍郎德成前往豫工。欲於屢經決口處築壩。實屬執繆。應革職得旨。吏部議處。德成請照溺職例革職一摺。固伊罪所自取。但其執繆之處。究係因公。尚與營私壞法者有間。德成著

加恩改為革職留任。至其固執已見妄議更張幾誤大事。非尋常錯謬可比。所有革職留任之案。俟八年無過方准開復。以昭平允。○調塔爾巴哈台領隊大臣伊里布。為烏魯木齊領隊大臣。伊犁領隊大臣春寧。為塔爾巴哈台領隊大臣。烏魯木齊領隊大臣傅景。為伊犁領隊大臣。是日御舟駐蹕十里亭。○己亥。欽差大學士公阿桂。兩江總督薩載。奉會勘陶莊。自順黃壩起工處。至壩尾裏頭處。計長一千零六十丈。內外不等。中泓水深二丈餘。至三丈不等。此河雖較初挑之始。衝刷寬深。而北岸土性膠結。現在河身寬止六十丈。內外若能通寬百丈。自屬有益。查河頭北岸迤東。原挑積土之外。臨河縷隄。距河身水面。只有三十丈。該處河面寬六十五丈。若加寬二十五丈。則應挑至此隄之外。另築新隄。此時似可不必擬於此處隄內留土十五丈。挑土十五丈。連有水河身。共寬八十丈。將河

身現寬六十餘丈者挑展十餘丈不足六十丈者挑展二十餘丈。務期四月內竣工。駕臨時約可有四五分工程。再查新河頭迤上北岸舊有灘嘴。曾挑引渠一道。因溜趨南岸。未能刷去淤灘。擬於南岸第三架木龍以上。改建挑水壩一座。長三十丈。寬八丈。將大溜挑逼灘嘴。則北岸嫩灘自可日益刷去。南岸順黃壩一帶。可望漸次停淤。以資外護。似於新河更為有益。得旨。好。如所議行。是日。御舟駐蹕政成橋。○庚子。成都將軍特成額奏。赴辦三暗巴賊番行抵巴塘。查看形勢。控扼三暗巴之東南。雖距賊首安錯巢穴。視江卡畧遠。而處處毗連。可竄之路甚多。則與江卡無異。現今土司分守隘口。據現駐江卡遊擊袁國璜稟稱。前奉差往訂約處所。勒令速獻賊賊之郎卡多爾結。朗金多爾結等。回稱。安錯等稱。願將搶得之澤登格戎二人。并原馬四匹。先交帶回。餘賊照數賠還。以後不敢再擾。

要保我性命。纔敢出來等語。查三暗巴番人素於江卡一帶搶刦頻仍。若再涉輕縱。終為通藏路徑之害。此次辦理。不惟為首之安錯等。必得就擒重懲。即夥黨亦應嚴究。但目下不宜遽露。已密飭鎮將等。即就賊番希圖賄賊卸罪之中。陰行乘機誘擒之策。得旨。所見是。○是日。御舟駐蹕三義閣。○以安徽蕪湖道慶玉為按察使。○辛丑。諭曰。李侍堯所出係漢大學士缺。現在嵇璜甫經協辦。漢尚書中亦未得協辦之人。英廉係內務府人。伊本姓馮。協辦歷年亦久。可補用。漢大學士缺。其戶部尚書員缺。著和坤補授。和坤未到任以前。戶部尚書事務。仍著英廉管理。其戶部左侍郎員缺。著金簡轉補。右侍郎員缺。著福長安補授。福長安未到任以前。錢法堂事務。亦仍著金簡管理。○諭軍機大臣等。本日文綬等奏覆。番眾雜髮一摺。據稱新疆番眾久經雜髮。並半已穿戴內地民人衣帽。至西南北

三路沿邊土司番衆亦均已遵制薙髮並無仍沿舊俗之事等語。所辦未免過當。兩金川等番衆自收服以後。隸我版圖。與屯土練兵一併遵例薙髮。自屬體制當然。至沿邊土司番衆如德爾格霍耳等處。自可聽其各仍舊俗。毋庸飭令一律薙髮。更換衣飾。將來伊等輪班進京朝貢。衣服各別。亦可見職貢來朝之盛。何必令其換衣服以生其怨也。即現在收服之兩金川等番衆。亦止須遵制薙髮。其服飾何妨聽從其舊。又況沿邊土司番衆何必更改服飾耶。文綬辦理此事殊未妥協。可將此傳諭文綬等知之。○又諭據特成額奏稱。據郎卡多爾結等稟稱。三暗巴賊匪安錯情願獻出從前所搶人馬。嗣後斷不敢搶奪等語。三暗巴賊衆膽敢在大路搶奪番子人馬。今見大兵前往。又情願將搶去馬匹獻出。班第達即欲照伊所懇完事。殊屬非是。著寄信特成額作為已意。向班第達云。從前三暗

巴賊衆因搶奪爾等人馬。大皇帝纔派我等帶兵出來。務將賊首安錯等三人拏獲。其餘盡行殄滅。以清道路。使日後不生事端。爾初隨索大人來時。何不將此等情跡說明。今索大人已故。見安錯又情願將爾等人馬獻出。便思將就了事耶。我係成都將軍。成德係總兵。帶領兵衆動支錢糧。正賊並未弋獲。爾等只圖得物件。即行了事可乎。我等如何回奏大皇帝。爾既稱達賴喇嘛愛惜衆生。不忍殺害。意欲不行辦理。則從前即不應帶兵前來。此際必要拏獲安錯等賊首治罪者。亦為爾等耳。爾何反出此言耶。爾如果保得三暗巴賊衆。嗣後斷不敢為匪劫奪。亦可。若再有事。我等不與聞云云。如此訓示後。仍向言此際究竟作何辦理之處。即行作速奏聞殄滅三暗巴賊衆一事。索琳在時尚欲果決辦理。索琳故後。成德即欲將就了事。特成額雖奏稱務將賊首拏獲。以示炯戒。究未果決。亦屬姑

容三暗巴地方係通藏大道。特成額豈亦不知乎。賊衆膽敢在大道搶奪人馬。今勞師動餉。如此了局。成何事體。特成額著飭行。又諭據楊魁將李侍堯差委在蘇。稱辦物件之經歷孫允恭。與史顧廷煊二員拏獲。解交軍機處訊問。據孫允恭供稱。李侍堯委赴蘇州採辦物件。當領九八色銀二千兩。於四十四年正月到蘇。有雲南東川府知府陳孝昇。滙在張源處銀兩。允恭陸續向領九八平銀五千八百七十一兩九錢等語。此二項銀兩。前次和坤等奏到摺內。未據李侍堯供出。著傳諭和坤等。即向李侍堯詳悉研究。此項係屬何項銀兩。並此外有無另行差往他處購買物料之員。務須徹底查明。毋使隱匿。至陳孝昇。現在滇省。何以有此項銀兩。滙在張源處。與孫允恭等為購買物件之用。此等情節。俱應嚴切根究。並著和坤等逐一查明具奏。此旨。著由六百里加緊發往。若李侍堯罪案已

定。和坤等已起身回京。不必復回雲南。於路間訊問。亦可。回京再訊。亦可。其陳孝昇。交舒常令解任。解京可也。○是日。駐蹕金山行宮。○壬寅。

上登陸。幸江寧府。○四川總督文綬。提督明亮。會奏。兩金川各屯降番。定於四十八年輸賦。惟查汗牛二百九十二戶。於三十二年。先已投誠。今大功告成。又經三載。應先令供賦。以益邊儲。下部知之。○以吏部尚書永貴。協辦大學士。○調鑲黃旗漢軍副都統喀寧阿。為鑲黃旗滿洲副都統。以理藩院侍郎福祿。為鑲黃旗漢軍副都統。○是日。駐蹕龍潭行宮。○癸卯。吏部等部奏。外省人員。因公到京。以患病告請回籍者。向例准其回籍。始行咨查。但從中不無規避情弊。請由部飭令在京司坊官。看驗患病屬實。其員缺即行銓選。仍令在京等候。行查任所。平日居官尚好。並無未清事件。規避情弊。然後准其回籍。若係解運

銀兩銅鉛木植等項。事隸戶工兩部者。併查實無虧缺。然後行查。任所再准回籍。得旨。此議是。依議。○是日。駐蹕棲霞行宮。至乙巳。皆如之。○甲辰。諭刑部事務。仍著英廉兼管。其內務府大臣。及伊所管各處事務。俱著照舊兼理。○遣官祭明太祖陵。晉臣卞壺祠。宋臣曹彬祠。明臣徐達墓。常遇春墓。李文忠墓。方孝孺等祠。故兩江總督于成龍祠。傳臘塔祠。○乙巳。諭曰。文綬奏擬新疆營名。並分別留

聖訓卷之三

三

駐改補將備各員一摺。係文綬單銜具奏。摺尾又無會同將軍提督字樣。營伍員弁提督係屬專管。而川省新疆營制。初設一切調度事宜。尤應和衷商酌。又朕特旨。令該省將軍兼轄綠營。與別省專管駐防旗營者不同。此旨文綬不宜不知。且川省軍政。皆責成將軍提督考覈。由總督聲明彙題。該督此次奏請更定章程。自應會同將軍提督酌籌具奏。乃文綬竟專銜入告。殊屬非是。此等關係營制

事宜。俱不令與聞。則該省將軍提督。不竟虛設耶。文綬著交部察議。並令文綬。即與特成額。明亮。公同商議。會奏到日。再交部覈議。○欽差大學士公阿桂。兩江總督薩載。奏復勘雲梯關以外。黃河尾閘入海情形。查二套三套。近年漫口。由北潮河入海之勢。捷近而水深。其現在經行河道海口。行遠而水淺。如果黃河現在經由之四泓以下海口。有淤墊之勢。必須另籌道路。則舍北潮河。別無他途。但現今河流順軌。其通洋海口。落潮水定時。雖比口內較淺。而雲梯關以外。水面比兩岸尚低丈許。海口外灘。比現在水面。又低數尺。寬至三百六十餘丈。是河水歸槽。安流東注。尚無壅遏。自無庸亟籌更易。但或遇大汛盛漲。一時不及暢洩。則從前連次漫口處。所不能保。無復溢。若將漫口隄外。現有衝出河形處。所畧通於滯。俾漫溢之水。自行循途入海。則盛漲可資疏消。於上游各工。不為無補。至已

聖訓卷之三

三

堵漫口既難保無復溢。可否照王營減壩之意添建閘壩以資啟閉宣洩。又查二套隄外從前漫水之東直至海邊均係阜寧、安東、海州等處減則灘地。及葦蕩營產蘆蕩地間有淤沙溝槽形迹並無防護隄堰。漫水之西淤沙較厚舊有之南潮河上段業已淤平。又西則係已涸之馬港河有夾河殘缺舊隄二道。隄之南頭均與黃河北隄相接。其東隄長六里零。西隄長二十九里零。迤下無隄處所長十六里零。下接北潮河西岸民堰。此隄之西俱係安東、海州等處民田。臣等商榷馬港河西舊隄雖在雲梯關外十數里。但其上游即腹裏民田每遇盛漲漫溢時即倒漾至雲梯關以上。且該處只有牌樓一座。鐫刻古雲梯關四字。並無內外界限。若將此隄殘缺處所修復並將無隄之十六里一律補足。下接北潮河西岸民堰。則自雲梯關北隄下逮通海潮河隄堰連為一縷。既可保衛安海等處上

游民田。倘遇盛漲溢出之水不致浸漫。並可作雲梯內外界址。其隄東之海灘減則地畝悉照例聽民隨宜耕種。於河防民生似有裨益。得旨。所奏修復馬港河西隄殘缺之處及接築無隄處所。聯至北潮河西岸民堰以禦倒漾。自應如此辦理。其二套以下由北潮河入海之處既係路捷勢順。設遇漫溢正可分洩盛漲。俾尾閘益得暢達。轉可不必添建閘壩。雲梯關以外原不必與水爭地。今二套以下既為分洩盛漲之區。則馬港河隄東灘地即不能保無漫溢。其應徵減則地畝錢糧著交薩載等查明奏請加恩豁免。○丙午。上至明太祖陵奠酒。○諭軍機大臣等。據英廉奏訪得張永受原係鑲紅旗漢軍人。隨經提訊郭舍究出張永受本姓祝改為張姓。同妻在李侍堯任所服役。現有其母與弟在易州山中居住。當即派員拏獲張永受之母蔣氏及其弟四人。查出住房三十餘間。地四五頃。

現在嚴審等語。張永受既係旗人。因何同妻逃出。甘心在李侍堯處充當長隨。且據伊母蔣氏供稱。張永受係前母張氏所生。於十七歲逃出。並無信息。及乾隆四十三年。伊父祝致清故後。回來殯葬。復行出門等語。則張永受雖非蔣氏所生。其回家殯葬。伊父時斷無不將在外蹤跡。備細問知。此後亦斷無不常通音信之理。且伊既積有貲財鉅萬。其存留母弟之物。當亦不少。不可任其狡飾隱藏。著傳諭英廉。即將蔣氏等再行詳悉審問。務得確情具奏。其有應行查封財物。並即嚴行查抄。毋任稍有隱匿偷漏。○是日。駐蹕江寧府行宮。翼日如之。○丁未。

上閱兵。○諭江蘇安徽進獻詩冊諸生。其考取一等之舉人汪履基。著授為內閣中書。遇缺即補。呂光復。洪梧。趙懷玉。楊揆。董教增。朱文翰。盛惇大。言朝標。金廷訢。江璉。俱著特賜舉人。授為內閣中書。學習行走。與考取候補人

員挨次補用。江西省考試一等之蔣知讓。袁元復。著照直隸山東召試之例。賞給舉人。准一體會試。其江蘇安徽江西三省。考列二等之葉恩綏等二十三名。著各賞緞二匹。○戊申。漕運總督鄂寶奏。請將宿州二幫漂沒二十四船。借帑成造。四十四年冬。應扣銀一千二百九兩有奇。緩至今歲冬底扣還。仍分七年歸款。以紓丁力。又奏。請將長淮衛頭幫三船。被燒米一千九百六十九石八斗七升有奇。自本年為始。在於各丁應得三升八合餘米內。分作兩年抵完。得旨。允行。下部知之。○是日。駐蹕龍潭行宮。○是月。成都將軍特成額奏。查三暗巴境壤。延袤南北五百餘里。東西三百餘里。羣番散布。不下一千數百戶。其間素行夥劫。不過十之一二。餘尚安分。第慮賊首見兵臨勢。煽動餘番。則辦理費手。當乘此賊首倉皇。羣番搖惑之頃。外懾以兵威。內離間以孤其勢。臣飭令鎮將等。各往該賊

番交界要口。分頭帶兵駐劄。各派綠營兵弁。與派出守口土兵。參錯列營。以便督察防維。并派覓素與賊境內熟識之頭目土兵。向三暗巴素未為匪餘番。諭以禍福。令其造冊離興。隨於十八日。據班第達帶領安錯等所差頭目壬青齋投夷稟。據稱。去年西藏喇嘛差人買茶。回走錯路。被三暗巴附近人搶劫。安錯等實不知情。願照數償還茶包。儘力將故夾壩之人拏送等語。查安錯等如一聞臣抵江。即親來謝罪。自當分別查辦。乃僅差人嘗試。無論所稟真偽。不妨藉以啟其倖生之心。業經面諭壬青。如所稟屬實。安錯等尚知懼法。可即著安錯等親來候質。倘敢支延藏匿。即督兵勦捕等語。一面令其回巢。一面催調各土兵密辦得旨。想彼未必肯出。但當嚴辦毋事遲疑。

大清高宗法天隆運至誠先覺體元立極敷文奮武孝慈神聖純皇帝實錄卷之一千一百三

大清高宗法天隆運至誠先覺體元立極敷文奮武孝慈神聖純皇帝實錄卷之一千一百四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次謹此

懋哉官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鎮蓋滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆四十五年庚子夏四月己酉朔享

太廟遣豫親王修齡恭代行禮○

上至徐家莊祭

江神渡江○諭軍機大臣等據袁守侗奏現

在直隸省城并近省地方每銀一兩易錢九

百十文錢價過昂請撥庫錢一萬串發交清

苑縣照搭放兵餉之例每錢一千易庫平紋

銀一兩以平市價等語所辦未為妥協直省

辦理錢務與京城情形不同京城撥放兵餉

每銀一兩搭放錢一千文原因體恤旗人加

恩優給俾資充裕外省原不可援以為例即或因市價昂貴欲為平價亦祇應逐漸加減如目今易錢九百十文先當以易錢九百三四十文為率俟市價畧平再為量加數錢若錢販得因積牟利於小民生計轉屬無益著傳諭袁守侗另行妥酌辦理具奏○禮部以會試中額請得旨這會試滿洲蒙古取中三名漢軍取中一名直隸取中十五名奉天取中一名山東取中十二名山西取中九名河南取中十名陝西取中五名江南取中二十名浙江取中二十四名江西取中十八名湖北取中四名湖南取中四名福建取中九名廣東取中三名廣西取中三名四川取中三名貴州取中三名雲南取中三名○旌表守正捐軀直隸玉田縣民徐經妻閻氏○是日駐蹕金山行宮○庚戌駐蹕天寧寺行宮至壬子皆如之○壬子諭軍機大臣等據吳壇奏近聞有查封原任巡撫孫士毅家產之

事。因思已故巡撫裴宗錫亦與李侍堯先後同事。查有原任雲南吏目余國觀交出畫幅扇面玉器共二十一件俱係裴宗錫之物。因無便未經寄晉。現在收存臣署。謹奏聞以備查覈等語。此事吳壇未免錯會朕意。李侍堯身任總督婪贓不法。款蹟纍纍。其家產自應查抄入官。至裴宗錫孫士毅二人乃因其同為一處巡撫明知李侍堯婪贓不敢據實參奏。罪有應得。又該省現查各屬虧空伊等身任巡撫應行著落分賠。與李侍堯婪贓抄沒者不同。前傳諭三寶雅德等將伊二人家產查封。亦俟將來該省虧空查明實在短少銀數後裴宗錫孫士毅名下應賠若干將伊等家貲抵扣。如尚有餘剩仍應給還。辦理止應如此。今吳壇既有此奏恐三寶雅德等接奉前旨亦誤會朕意。辦理未免過當。現已令軍機大臣面諭吳壇並著由四百里傳諭三寶雅德知之。○又諭山東民風向稱樸愿但各

州縣風氣良莠不同。近年以來如壽張縣有奸民王倫聚眾謀逆。隨經調兵勦捕。方得焚殲渠魁。撲滅餘黨。今壽光縣又有魏塾妄批江統徒戎論。至以今之回教比擬晉之五部。其荒誕悖妄極為不法。現在亦經盡法懲處。看來二縣民風刁橫甚為難治。著傳諭國泰遇有壽張壽光兩縣缺出務擇精明強幹之員奏明補授。以資治理。如此二縣內有部選之缺即著查明奏請改為題缺。○又諭前巴

延三赴任時朕令將原任兩廣總督李侍堯楊景素桂林三人居官操守若何密訪確實專摺具奏。茲據奏到已將原摺留中。楊景素身任總督乃有操守不謹之事。設使其人尚在自當查辦治罪。今已身故毋庸復事。追求以示終始保全。至李侍堯自調蒞滇省後賊私纍纍現在和珅等前往查審罪狀業經敗露朕自不能為之曲貸。巴延三密摺內何以尚為許可耶。朕於督撫功罪刑賞一秉至公。

從不肯為己甚之舉。亦不肯為死法之事。此內外諸臣所共見共聞者也。已延三新任總督。諸事務宜留心整飭。潔已奉公。以李侍堯諸人為前車之鑒。庶不負朕簡任之至意也。將此諭令已延三知之。○癸丑。諭本日三寶奏查辦孫士毅家產摺內。據稱親帶道府。猝至其家。嚴密根追。毫無遺漏。將所封財產。飭司貯庫。併將家信呈覽各等語。所辦未免過當。此案因孫士毅裴宗錫身任巡撫。與李侍堯近在同城。見總督婪贓不法。數至盈千累萬。眾共聞知。乃甘為隱諱。以致不肖劣員公然餽送。相率效尤。併聞庫項或有短缺。督撫同城。原期互相糾正。即如舒常在貴州。與李侍堯並不同城。尚以未經叅奏。具摺認罪。況李侍堯如此蕩檢踰閑。不特同城巡撫。應據實叅奏。即藩臬兩司。尚應具摺直陳。若俱隱匿不言。毫無聞見。國家又安用此巡撫藩臬為耶。前已降旨。將孫士毅革職。發往伊犁効

力贖罪。準之情法。已足蔽辜。至伊屬員如有虧空。亦自應照例分賠。是以令將原籍財產查明存記。俟將來該省查奏實在虧短銀數。應賠若干。將伊家貲扣抵。如有餘剩。仍行給還。此等查封存記。與汪圻莊肇奎等公行賄賂。應行查抄者不同。昨因恐三寶雅德查辦過當。已先令傳旨諭知。乃今日奏到。果不出朕前此所料。可見督撫等平日遇事顛預。並不據實認真。至有交辦之件。又不度事理輕重。往往辦理過當。何以得情法之平耶。朕綜理庶務。一秉大公至正。從無偏倚。諸臣等皆當仰體朕懷。務求允當。毋得稍存意見。以致畸輕畸重。將此通諭中外知之。○諭軍機大臣等。據富綱奏報。閩省平糶倉穀盈餘銀一十四萬五千餘兩。一摺內稱。前任藩司錢琦奏准。以平糶之有餘。補常平之不足。將平糶盈餘銀兩。撥給各屬買補常平缺額。俟各屬買補不敷。通融酌撥等語。閩省常平缺額米

石。自屬因時調劑。為有備無患之善策。閩省糶穀。既積有盈餘。數至十餘萬兩。各省平糶。即多寡不等。均有盈餘。是否亦照此辦理。著傳諭各省督撫。即行查明據實覆奏。○是日御舟駐蹕崇家灣大營。○甲寅。御舟駐蹕海崇菴大營。○乙卯。常雩祀

天於

園丘。遣誠親王弘暢恭代行禮。○諭。朕此次巡幸浙江。由海寧閱視塘工。至杭州老鹽倉一

帶有柴塘四千二百餘丈。雖因其處不可下樁為石塘。然柴塘究不如石塘之堅固。業經降旨。將可以建築石塘之處。一律改建石塘。以資永久保障。茲忽憶及該地方官及沿塘居民。見該處欲建石塘。或視柴塘為可廢之工。不但不加防護。甚或任聽居民折毀竊用。致有損壞。則石塘未歲工之前。於該處城郭田廬甚有關係。且改建石塘。原為保衛地方之計。若留此柴塘。以為重關保障。俾石塘愈

資鞏固。豈不更為有益。況當石工未竣以前。設使潮水大至。而柴塘損壞。無可抵禦。不幾為開門揖盜乎。著該督撫即嚴飭地方文武官。將現有柴塘。仍照前加意保固。勿任居民拆損竊用。將來石工告竣。遲之數年。朕或親臨閱視。爾時柴工倘有損壞。惟該督撫是問。

○緩徵安徽宿州。壽州。鳳陽。靈璧。鳳臺。泗州。盱眙等七州縣。並鳳陽。長淮。泗州。三衛。乾隆四十四年水災舊欠額賦。○旌表守正捐軀

福建德化縣民陳錯女陳氏。○是日御舟駐蹕平橋大營。○丙辰。御舟駐蹕直隸廠大營

○丁巳。

上至武家墩。閱高家堰隄工。○祭

河神。渡河。○諭曰。戶部奏覆山西巡撫雅德咨稱。請將例不應蠲之太原。遼州等府州應徵本色。及清水河。豐寧等廳。和林格爾等處改徵折色地租銀兩。仍全行徵收一摺。固係照例覈議。第念該省本年輪應普免地丁錢

糧。而此項應徵本折銀兩。獨令供輸。未免向隅。可憫。所有太原。遼州等十六府州。并歸化城。應徵本色。及清水河等廳。並太僕寺牧廠地畝。應徵折色銀兩。仍著如恩。照上屆蠲免十分之三。其應徵本色之大同。朔平二府。地處邊瘠。又和林格爾等處新墾地畝。應輸折色。並莊頭退出招種地租銀兩。及豐寧二廳地畝。折色租銀。按田納賦。與內地地丁無異。均著如恩。一體全行蠲免。俾得普霑愷澤。益裕盈寧之慶。該部即遵諭行。○諭軍機大臣。曰。楊魁奏。覆許墅關情形。摺內稱。漏稅罰料一項。向係一正三副。以一正歸正稅。其三副內。一半賞給書役。一半留織造公用等語。罰料雖非正項錢糧可比。但既留作織造衙門公用。即或每年不行報部。亦應將此項作何公用之處。冊報內務府存案。著傳諭全德。即行查明。罰料銀兩。是否每年咨報內務府。並將織造衙門。何項因公動用之處。詳悉開單。

據實覆奏。○伊犁將軍伊勒圖奏。伊犁頭起綠營春兵一千五百戶內情願認地墾種者九十一戶。於伊等居住之綏定城東北。并察罕烏蘇東南。水泉充足之地。每戶給地三十畝。令其墾種。照例六年升科。並將分戶人丁編入民籍。交伊犁同知管束。每戶賞給農具籽種。至每戶應借房價銀二兩。耕牛一隻。作銀八兩。在官廠內撥給。其麥收前所需口糧。亦照戶分別借給。均俟升科時。作三年交還。報聞。○命大學士公阿桂為翰林院掌院學士。並教習庶吉士。○是日。御舟駐蹕徐家渡大營。○戊午。諭軍機大臣。曰。特成額奏。查拏三暗巴夾壩一案。訊據澤登格。戎供稱。在南墩地方。連茶包人馬馱牛。都被江卡營官拏去。寫信告求。退還不聽。因想搶江卡營官之物報仇。不料錯搶了達賴喇嘛茶包馬匹等語。看來安錯未必肯出。但當嚴辦。毋事遲疑。此案特成額等辦理太軟。以致該賊番等遷

延觀望。據所敘供詞內。復有道路崎嶇等語。亦未免有畏難之意。試思兩金川徑路。何等險窄。我兵直擣巢穴。一舉盪平。特成額彼時身在戎行。皆所目擊。何以遂忘之耶。著特成額。即督率將弁。勒兵前進。務將此案夾壩正犯。迅速全行拏獲。審明於軍前正法。俾各該處番衆人等。咸知警惕。毋再遲疑。致該番得以乘間砌築碉樓。為抗拒延喘之計。并令各處番衆。聞風畏懼。各思安分守法。將此由六百里發往。並諭令文綬知之。○以光祿寺卿奇臣。為奉天府府尹。○旌表守正捐軀直隸威縣民陳露妻翟氏。○是日御舟駐蹕陳家道口大營。○己未。諭朕於五月二十一日啟鑾。幸避暑山莊。著派誠親王。理郡王。大學士公阿桂。大學士英廉。留京辦事。所有吏兵二部。應行引見官員。文職知縣以上。武職守備以上。八月以前。該部每月派堂官一員。輪流帶赴熱河引見。其文員內佐雜等官。武員內

八旗護軍校。驍騎校。及外省送到之補放水手官。驍騎校。並年滿千總等官弁。仍著王大臣照例驗放。至八月以後。月選等官。亦照向例辦理。其外省督撫提鎮等官奏摺。朕駐蹕熱河時。著齎摺人赴熱河投遞。至進哨以後。著兵部選派司員二人。住於哨門外。經管臺站。各省齎摺人赴哨門外。即交兵部司員接收。按日由臺馳送。行在批覽。發回後。仍由該司員付各齎摺人領回。該部通行傳諭知之。○諭軍機大臣曰。榮柱奏履勘各屬涸復地畝一摺。據稱有沙壓之地。詢之老農。稱沙性陰寒。地氣難以透達。須俟風日曬颺一二年後。方堪試墾等語。此等地畝。約計共有幾許。何以不行查勘明確。據實奏聞。又據稱柘城等縣地畝。亦竟有全不被沙壓者。掛淤之後。轉成沃壤等語。此淤何以又非停沙。所奏未能明晰。適陳輝祖來至行在。召問。據稱黃河漲水過後。於平地積有淤泥三四寸。及一二

尺不等。名為掛淤。其泥細軟。與田土膠黏。以之耕種莊稼。倍為肥好。若黃水太盛。水過甚速。麤沙停積。田地被壓。名曰沙壓。其沙麤硬。不可耕種。若沙壓深厚。至四尺以上者。民力不能開墾。即成廢地。向例遇有此等沙壓地。畝該地方官查勘確實。將該地畝應完錢糧。奏明豁免等語。著傳諭榮柱。即將此次黃水過後。各屬田地掛淤者。共有若干頃畝。沙壓者。共有若干頃畝。詳晰查勘。據實奏聞。○是日。御舟駐蹕林家莊大營。○庚申。御舟駐蹕順河集大營。○辛酉。諭曰。姚立德。由按察使加恩擢授總河。一切修防堵築。是其專責。理應先事豫籌。俾各處險要工程。有備無患。庶幾無負委任。乃姚立德。於前歲儀封決口一事。平日不能留心查勘。未雨綢繆。以致因循貽誤。屢築屢衝。是以將伊革任。仍留工次。効力贖罪。此等玩誤公事。貽患地方。不得藉口因公。即其平素辦事軟弱。屬員不知警畏。致

工程有名無實。亦復無可憐惜。試思此次決口。耗費工料虛糜國帑。至數百餘萬之多。伊誰之咎。然此尚云糜費帑項。朕亦初不深罪伊。而兩載以來。民田廬舍。均被淹浸。貽害沿河。及下游一帶。姚立德更何以自解耶。此事朕前不加重譴。僅令革任留工効力。已屬法外之仁。今幸天佑神助。壩工告竣。伊復何顏赴行在見朕。若因其為人尚屬謹飭。仍復加恩錄用。將何以為封疆大吏。因循債事者之炯鑒耶。姚立德著勒令回籍。並將此通諭中外知之。○諭軍機大臣等。本日袁守侗奏報直隸三月分糧價清單各摺。係於四月初四日拜發。查前此國泰奏報。四月初三日。東省已刻微雨。至晚漸大。淋漓竟夜。初四日辰刻未止。入土深透。復據留京王大臣奏。四月初三四等日。京師得雨。約入土二寸各等語。直隸去京甚近。其迄

南河間。景州一帶。復與東省毗連。京師山東既經得雨。諒直隸亦應普被雨澤。何以袁守伺。於是日止奏糧價。而於該省曾否得雨並未奏及。著傳諭袁守伺。即將四月初三四等日。直隸有無雨澤及各屬是否望雨之處查明據實覆奏。尋奏順天天津大名宣化承德等府屬得雨止一二寸。永平遵化二府州屬得雨稍多。又非望雨之區。現惟定興縣於三日內共報得雨七寸。較為優渥。餘俟各屬報

實錄卷二百一十

上

齊彙奏報聞。○又諭四庫館書籍當時勅令總纂等將各省解京之書詳加覈定。有應行鈔存者。有僅存名目不必繕寫全書者。英廉等現在查辦短少各底本係發交謄錄繕寫之書。其僅存名目之書亦應於查清後將底本發還各省藏書之家。著傳諭英廉即將此項書籍一併查明發還。仍將如何查辦情形遇便覆奏。○又諭前據國泰奏審擬壽光縣民人魏塾家中搜出所批江統徙戎論詞語

悖妄一案。當交行在九卿覈擬。連奏因魏塾即係魏姚氏之子。伊遣姪魏萬年控告該縣挾嫌嫁禍。藉差科派之事。現派欽差前往審訊。尚須質訊明確。再將該犯正法。今據阿揚阿等奏到查審大概情形。魏萬年所控情節係在魏塾被拏赴省之後。即為此案餘波。著傳諭國泰於接到此旨後即將魏塾改為立新毋庸俟。阿揚阿審結控案再行辦理。將此由四百里發往。並諭阿揚阿王昶知之。○軍

實錄卷二百一十

上

機大臣等議覆葉爾羌辦事大臣復興奏稱從前葉爾羌每年撥運伊犁布綿俱於編起解送時陸續按數奏聞。春秋二季派伯克前往採玉。亦豫具奏。請嗣後每年撥運伊犁之布綿臨運送時先行咨伊犁將軍查收。俟布綿全行起程再開單統奏一次。仍將穀錢布綿細數造冊送部開銷。春秋採玉亦俟解京後再奏。至派官兵咨取喀什噶爾馬匹亦於馬匹解回時再行奏聞。應如所請。從之。○以

左副都御史周元理為兵部左侍郎御史孫永清為左副都御史○調江蘇巡撫楊魁為陝西巡撫署陝西巡撫劉秉恬為署雲南巡撫署雲南巡撫顏希深為貴州巡撫以江蘇布政使吳壇為江蘇巡撫江蘇按察使瑞齡為江蘇布政使調湖南按察使塔琦為江蘇按察使以江蘇常鎮道袁鑒為湖南按察使○是日御舟駐蹕王家莊大營○壬戌諭曰福康安授為雲貴總督劉秉恬授為雲南巡撫已明降諭旨矣舒常現署督篆顏希深現署滇省撫篆總俟福康安劉秉恬到滇接印伊二人始可離滇若因該處督撫均已補放有人伊等視為五日京兆僅為看守印信之計諸事不認真辦理則大不可即如滇省銅務最關緊要近年調劑始漸有起色著傳諭舒常顏希深務須實力整頓俾更較勝上年方為妥協若福康安到後查出銅務或有廢弛滋弊之處朕惟舒常顏希深是問○又諭

曰和坤奏到夾片內稱東川府知府陳孝昇任所家產業經嚴密查封並請飭交三寶將其原籍貲產一併查抄等語所辦可不必陳孝昇將李侍堯交付銀兩代辦物件事經發覺實為有玷官箴但究未饋送銀兩與汪圻莊肇奎等情罪有間予以革職已足蔽辜自可毋庸查封財產至其任所貲財業經查封此時應暫行存記俟福康安到任後查明陳孝昇任內如有虧缺公項即將查封物件變抵如任所貲財尚有不敷再行咨會浙江查抄該員原籍家產陳孝昇現已解京將此傳諭英廉和坤等並諭福康安知之○工部等部議覆調任湖南巡撫李湖疏稱湖南省城西臨大江近北一隅尤為低下考之縣誌從前原有護城土隄一道名成功隄自大西門老礪起至矮子洲止長八九里前明兵燹拆毀隄址漸沒江中惟藉城腳外坡禦水近年江心沙漲漸逼江水東趨城腳土坡汕刷殆

盡。本年春夏。雨多水溢。浸齧城根。風濤衝激。遂至城垣。姓塌。此次修復城身。請於頂衝一帶。外加護岸。自通貨門稍南。接老岸起。至北門城牆轉角止。共長一百一十五丈。又於湖水橋下。建出水石洞。應如所請。從之。○以湖南按察使袁鑒。安徽按察使慶玉對調。○旌表守正捐軀直隸蠡縣民趙祥兒妻王氏。廣東新寧縣民溫俊雲妻何氏。○是日。御舟駐蹕。泖口鎮大營。○癸亥。月食。○諭本日禮部開列考差各員。請點雲貴正副考官一本單。內並未將各員有無事故。及現點會試房考之處。詳悉註明。若非朕細心覈對。則會試分房之員。復得典試外省。邀恩未免過優。嗣後著該部。於請點各省考官時。將點過會試房考各員。於名下開註明晰。毋得再行牽混。著將此次辦理不善之禮部堂官。傳旨申飭。○是日。御舟駐蹕萬年倉大營。

實錄卷一百四

五

實錄卷一百四

五

大清高宗法天隆運至誠先覺體元立極敷文奮武孝慈神聖純皇帝實錄卷之一千一百四

大清高宗法天隆運至誠先覺體元立極敷文奮武孝慈神聖純皇帝實錄卷之一千一百五

藍翎總管經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部工部事務

世襲副都統功加十九級隨帶加二級又加二級臣董誥內大臣戶部尚書錄道滿洲都統軍功紀錄五次

尋常紀錄十四次臣德琰經筵講官太子少保工部尚書紀錄六次臣曹振鏞等奉

教修

乾隆四十五年庚子四月甲子諭軍機大臣

齊東野語卷下

一

等據雅德奏裴宗錫寄籍絳州當委按察使  
索守誠兼程馳赴該州嚴密查封所有在晉  
房產貲財現在加謹封貯等語所辦錯謬裴  
宗錫等與李侍堯近在同城見其婪索多贓  
不敢據實奏罪有應得但與李侍堯婪贓  
應行抄沒者不同該省現在查辦各屬虧空  
裴宗錫曾任巡撫應行著落分賠恐伊家屬  
將現有貲財妄為隱匿花費是以降旨將伊  
家產查明存記俟將來該省虧空銀數查清

齊東野語卷下

二

後裴宗錫名下應賠若干即將伊家產抵補  
如有餘剩仍應給還節次所降諭旨甚明雅  
德接奉後止應將裴宗錫家貲查明存記以  
俟滇省查到再辦至其家屬亦不至禁絕往  
來致日用薪水不得自由乃雅德竟將伊房  
產貲財加謹封貯此與抄沒復何異耶雅德  
初次接到朕旨猶可藉稱錯會今既接奉續  
降之旨豈有不曉朕意乃竟如此辦理何不  
曉事若此雅德著傳旨申飭○又諭昨日榮  
柱至行在具奏二摺其一稱大工物件原派  
各屬領價採買嗣因工程緊急需用過多曾  
經奏明先發司庫銀兩加價購買分年帶徵  
今計各款共加價銀一百二萬九千兩零請  
每年徵解銀六萬兩按照通省錢糧數目均  
勻攤派徵還歸款等語豫省堵築漫口工料  
前經降旨均准開銷毋庸著賠何以榮柱復  
有此奏殊未明晰著傳諭阿桂查明是否即  
係免賠之項詳晰覆奏又一件奏稱大工挑

挖引河。多用土方價值銀兩。計應攤扣歸款銀七十七萬九千餘兩。除丞倅及佐雜汎弁微員。廉餉無多。免其坐扣。請於地方州縣以上。河員廳官以上。每年扣還銀四萬兩等語。微末河員。廉俸無多。免其坐扣。所言似屬情理。但此項銀兩。是否應令地方官分賠。抑或榮柱欲藉此沽名。故為多開年限。阿桂前在豫省。親行督辦。此項攤扣銀兩。究應作何辦理。知之必審。並著傳諭阿桂。據實奏覆。榮柱

實錄卷五十五

三

原摺並鈔寄閱看。○吏部奏請大學士英廉應授何殿閣。及兼銜得旨。英廉著授為東閣大學士。兼戶部尚書。○是日。御舟駐蹕韓莊開大營。○乙丑。

孝端文皇后忌辰。遣官祭

昭陵。○諭各省動支正帑。安設驛站。部頒勘合。以備差務往來。郵傳馳遞。關係最為緊要。近年既有巡道分轄。復令臬司總理稽查。更覺嚴密。各督撫等。遇有緊要奏函。及題本事件。

原准馳驛。定例亦屬周備。其各省陳奏尋常事件。自應專人齎進。不得私借驛騎滋擾郵站。乃昨據李湖查奏。李侍克。孫士毅等。差弁在湖南擅行私借驛馬者。不一而足。滇省如此。各省應亦不免。於郵政所關匪細。著傳旨通行申飭。嗣後各督撫。如有齎摺差弁。私借驛馬者。一經查出。定將各督撫及借給馬匹之該管驛站官員。均照例嚴行治罪。○是日御舟駐蹕常家口大營。○丙寅。諭昨據榮柱

實錄卷五十五

四

奏稱。各屬民借未完籽種口糧牛具等項。雖奉恩詔豁免。但年分近而數目多。請另降特旨。全行豁免等語。因令軍機大臣將各省作何辦理。有無分別年限數目之處。詢問薩載。陳輝祖。楊魁國。奏據僉稱。此等積欠款項。凡在恩詔以前者。均應查明題請豁免。並不論年遠年近。及數目多寡。今榮柱所奏各條款。均與恩詔豁免之例相符。至如何扣截年限數目辦理。俱不知道等語。民借未完各項。既

經恩詔豁免即使數目過多其在頒詔以前者該撫亦應查明一例遵詔全蠲以副朕軫恤窮黎之至意今榮柱復為此請揆其意不過欲在朕前見其慎重錢糧獻勤取巧設准其所請另行降旨豁免通省民人見其前赴行在始有此旨必以為由該撫奏請蠲免並可借此沽名市恩督撫大吏如此存心辦事豈公正大臣之體若非朕明燭其巧必將以所奏為誠心慎帑愛民視榮柱為封疆循吏者豈不墮其術中耶榮柱著交部議處○是日御舟駐蹕新挑河大營○丁卯諭朕觀榮柱自用巡撫以來頗覺器小易盈取巧不知大體難勝河南災後撫民之任楊魁著調補河南巡撫其陝西巡撫員缺著雅德調補山西巡撫員缺著喀寧阿補授其刑部侍郎員缺著穆精阿調補所遺盛京刑部侍郎員缺即著榮柱補授觀其後效楊魁著即赴河南新任不必赴行在請訓榮柱俟楊魁到任後

實錄卷一百五

五

實錄卷一百五

六

再行起程前赴盛京喀寧阿俟回京復命後前赴新任陝西巡撫印務現有尚安護理俟喀寧阿到山西時雅德再行交代前赴陝西巡撫之任○諭軍機大臣曰楊魁現已降旨調補河南巡撫並令即赴新任矣豫省自儀封漫口之後沿河一帶民田廬舍多被淹浸購料辦工一年有餘雖動帑加價發賑蠲租以數百餘萬計而民氣究未展舒今日劉秉恬自陝西來至行在朕詢以豫省情形據稱經過河南地方連日多風大田稍覺乾燥二麥亦較陝西山東稍遜朕深為廛念著傳諭楊魁此番調伊撫豫原因近日該省地方比之陝西較為緊要是以令其前往該撫接到此旨即往莅任務須加意實力撫輯俾濱河黎庶漸次復元通省閭閻益臻充裕以副朕委任至意○陝甘總督勒爾謹等奏稱西寧鎮屬原設孳生馬一千二百匹因廠地不敷牧放在於鎮屬大通川一帶另躉寬廠後因

學生過多。於乾隆三十四年分撥甘州。涼州。肅州。三標營馬一千一百餘匹。尚存馬二千三百餘匹。迄今又十餘年。除兒騾交縣變價。及撥補營缺。驢馬外。尚餘馬三千五百餘匹。該廠地窄。水草不敷。氣又寒冷。請分撥甘州。涼州。肅州。三處馬廠牧放。報聞。○以太常寺卿吳玉綸為左副都御史。○以編修戴聯奎為雲南鄉試正考官。禮部員外郎李翹為副考官。刑部郎中陸有仁為貴州鄉試正考官。

實錄卷一百五

七

御史福保為副考官。○旌表守正捐軀河南伊陽縣民張窩妻董氏。廣東香山縣民楊衛添媳鄧氏。○是日。御舟駐蹕濟寧州大營。○戊辰。諭制藝以清真雅正為主。其在前列者尤為士林模楷。必貴理醇法密。辭語精當之作。方足以式多士。而正文體。今日據磨勘大臣奏到。履勘本科會試中式第三名之鄧朝縉。首藝內有讀鴈鴒在桑之什。而表裏瑩然。咏鶴鳴九皋之篇。而精粗不紊。峻德著協和。

之績。可驗表裏之無違。干羽本文德之數。可見精粗之悉舉。等句。語意粗雜。理題不應有此。應議等語。所奏甚是。此等題文。在士子擇語不精。率意填寫。或所不免。此卷現據指出。而其餘似此。未經磨勘者。當復不少。但即使舍短取長。亦止可在二三十名外。今竟高列第三名。位置殊為失當。近年因文體踏駁。屢經降旨訓飭。凡有衡文之責者。尤應悉心甄拔。以期有醇無疵。使文風日臻淳雅。何至漫

實錄卷一百五

八

無區別。若此。著總裁德保等明白回奏。○諭軍機大臣等。戶部奏到查辦雲南省未完鹽課二摺。一稱乾隆四十一年以前未完墮欠等項銀三十一萬餘兩。現在限期雖未全行屆滿。但墮運墮銷及商民積欠。其初二兩次所完已均不及半。因前此之藉延。不能不慮後此之懸宕。又一摺稱乾隆四十一。二。三等鹽課積欠銀四十五萬餘兩。雖按年亦有補苴。究屬欠多完少。若不及早催交。恐舊欠

日積終無完結之期。請勅交新任督撫查覈妥辦。各等語。已依議行矣。滇省鹽務。歷年均有墮銷墮運。及商民積欠之弊。近經屢降諭旨。飭該督撫等力加整頓。設法清釐。何以迄今未有起色。著將戶部兩摺寄交福康安劉秉恬閱看。伊等到滇後。即悉心查覈。務將積欠各款實力催追完繳。掃數全完。使年清年款。毋再稍有遲逾。至滇省鹽務。歷年籌辦終無調劑得力之處。其弊安在。和坤自滇省北

實錄卷一百一十五

九

來。曾否體察其弊竇。福康安等於途次迎見和坤時。即行詢問明晰。以便到滇辦理。如和坤因在滇未久。未暇查察。福康安等到滇。即遵照此旨。據實妥辦。將此由五百里諭令知之。○又諭曰。英廉奏裴宗錫有如意等件。於上年寄交伊婿方惟甸。又有燈交提塘收貯。已各令照數呈出封貯。一面行文兩江總督傳方惟甸原籍家人。問裴宗錫所存木器什物等語。所辦未免過當。方惟甸係裴宗錫之

婿。為妻父收存物件。亦情理所有。況裴宗錫情節。祇因該省現在查辦虧空。伊曾任巡撫。恐將來或有應行著賠之處。是以降旨。將伊家產查明存記。以抵將來應賠之項。如有餘尚應給還。如裴宗錫等即行查抄。李侍堯又當作何辦理乎。英廉現既查出伊婿方惟甸及提塘處有寄存物件。止須開單存記。俟將來查明滇省虧空實數覈辦。其存在江寧木器等件。亦止須行知兩江總督查明存記。毋庸概行封貯。可將此傳諭英廉薩載知之。節次寄三寶雅德等諭旨。並著鈔寄閱看。○欽

實錄卷一百一十五

十

差協辦大學士吏部尚書嵇璜會同兩江總督薩載查勘徐州河隄。尋奏徐州居江南黃河上游。北岸居民稠密。南岸緊靠府城。河勢至此一束。河面現寬八十餘丈。大汛時甚關緊要。城外舊有石工三段。長九百七十三丈有奇。乾隆二十二年

聖駕親臨閱視。增建石工四段。長一千五百六

十六丈。與舊工相連。徐城一帶深資保障。惟石工迤上至韓家山。尚有空檔四百五十丈。向因外灘尚寬。未曾接築。祇藉隄堰攔禦。近年河勢漸向上隄。大汎漫灘之水。直至隄根。該處在徐城上首。外高內窪。此段石工亟需添建。再舊建石工較二十二年之工原低二三層不等。前年黃水盛漲。舊石工僅出水數寸。亦有與水相平者。應即分別加高。再石工尾段自梓潼閣以下。為溜勢埽灣之處。石工

實錄卷一百五十五

十一

外。本有柳草壩數座挑溜。并有石磯嘴一段。長五十九丈。每年拋填碎石。以資捍護。今碎石漸向外游。亦應加添鞏固。臣等勘明酌估。約需銀九萬二千餘兩。請交臣薩載會同河臣陳輝祖。再加覈實題估。報聞。○調正紅旗漢軍副都統達椿。為鑲黃旗滿洲副都統。以刑部侍郎穆精阿。為正紅旗漢軍副都統。○是日。御舟駐蹕大長溝大營。○己巳。吏部議准。暫署兩廣總督李質穎疏稱。廣西鎮安府

實錄卷一百五十五

十一

屬向武土知州黃徽猷病故。嫡子坤寧年幼。未合襲例。請以原任告休土知州黃煥章協理護印。俟伊子年歲合例。另請承襲。從之。○以吏部侍郎謝墉。為國史館副總裁。○以編修曹錫齡。為四川鄉試正考官。宗人府主事李榮。為副考官。贊善王仲愚。為廣東鄉試正考官。吏部主事陳大文。為副考官。編修邵晉涵。為廣西鄉試正考官。檢討錢澧。為副考官。宗人府府丞寶光。為福建鄉試正考官。御史劉芬。為副考官。吏部主事邵洪。為湖南鄉試正考官。編修周瓊。為副考官。○是日。御舟駐蹕王老口大營。○庚午。成都將軍特成額奏。三月二十六日。據番人壬青稟稱。安錯白馬四郎。達罕綽吉三人。已到交界地方。求漢官一員到彼。容令面訴。親獻贓賊。因即派員前往。密令設計誘擒。隨據叅將張芝元等帶回贖贖贓物。並正賊二名。又稱安錯等願以親屬九人為質。永保三暗巴人不放夾壩。至

達罕綽吉係三暗巴衆番於江卡春明地方  
迎往崇奉並未夥同為匪當即諭令作速回  
巢徧諭各番暨安錯等早自投出因恐絕安  
錯等來投之路故未將伊扣留待質現於拜  
摺後仍馳赴逼近賊巢之春朋藏海一帶密  
率各路鎮將齊臨賊境相機勦捕無任延匿  
稽誅得旨所辦似屬得宜今如何進兵完事  
速奏來○是日御舟駐蹕五里堡大營○辛  
未直隸總督袁守侗奏稱遵旨確查平糶盈

平糶盈

平糶盈

餘銀兩向來直屬平糶倉糧秋後買補有較  
原價節省者亦有仍照原價買補者通計每  
歲盈餘銀四五百兩至一千五六百兩不等  
提解司庫遇有正需報部動用現存司庫平  
糶盈餘銀二萬六千六十兩各屬出糶溢額  
倉穀并屯糧米穀例准糶賣報撥共存銀一  
萬五千七百八兩倘地方偶遇偏災賑貸常  
不敷用未能以平糶盈餘作買補缺額報聞  
○是日御舟駐蹕劉家灣大營○壬申諭朕

平糶盈

平糶盈

此次巡幸江浙蹕途經過直隸山東地方其  
長蘆商人業經加恩緩徵課項所有山東商  
人並著加恩將乾隆四十五年應徵引票鹽  
課銀十八萬餘兩自本年奏銷後起限分作  
六年帶徵以示優卹該部即遵諭行○盛京  
將軍調任雲貴總督福康安會同盛京戶部  
侍郎全魁奏牛莊蓋州熊岳復州金州岫巖  
六城所屬界內官山前准旗民人等放蠶輸  
納稅課試收二年再為定額茲查四十三年  
分共徵山稅繭稅銀七千八百八十五兩有  
奇四十四年分徵銀八千六十二兩有奇係  
屬有增無減現雖已屆二年期滿若即照此  
定額恐地方官見額稅已定不再廣募放蠶  
之人或將續增蠶戶隱匿不報請再試收二  
年查明增減數目覈實辦理下部知之○又  
會同盛京工部侍郎德福奏盛京配造火藥  
事宜查盛京每年應用火藥烘藥一萬二千  
餘觔黑龍江每年應用一萬餘觔向例黑龍

江需用火藥。自盛京動用驛車。由吉林遞送。今吉林既自配造。似可就近運往。但吉林所出之硝。不敷兩省之用。且磺鉛等項。仍由盛京採辦。不如將黑龍江火藥。歸併盛京配造。照例解往。至盛京工部。現貯火藥三萬一千五百餘觔。除盛京黑龍江二處。本年應用。尚屬有餘。惟查盛京礮位八門。應備存火藥一萬二千餘觔。烘藥一百二十觔。此內尚短火藥三千六百餘觔。烘藥一百一十餘觔。今於

實錄卷一百五十五

五

本年春季。添造足數外。仍配造二年火藥貯庫。嗣後按年配造。出陳易新。則常有二年火藥備用。其添演烏鎗。需用鉛子。現查工部庫貯。尚足敷東三省九年之用。暫且無庸鑄造。惟礮位需用鐵子。應照礮口分寸。每位酌鑄存二百箇。又盛京兵丁每年操演。並不演放礮位。竟同虛設。請選用礮四位。於春秋二季。如法演放。其需用鐵子。查將軍衙門舊有存者。先令擇用。俟回殘報銷。另請鑄鑄報聞。

是日。御舟駐蹕朱官屯大營。○癸酉。諭軍機

大臣等。本日內閣呈進通本內。有巴延三謝

恩題本二件。其開列銜名。稱覺羅臣巴延三。

殊屬錯誤。此等事件。雖屬照例題本。然拜發

時。亦宜留心檢點。況巴延三久任巡撫。非不

諳稱名體例者。可比。豈從前伊任山西巡撫

時。亦將覺羅字書於臣字之上乎。抑今仍照

前書銜。而內閣始駁乎。封章題達。專任胥吏

之手。而竟不一寓目。可見外省督撫。漫不經

實錄卷一百五十五

十六

心。若此。著傳諭巴延三。令其明白回奏。○又

諭據李湖奏。截拏李侍堯進摺。回差李朝元

龍連陞。帶有督標中軍吉隆阿。自京寄劉七

十兒信。詞語卑鄙。謹將原信呈覽。等語。吉隆

阿。以副將大員。乃與總督家奴私相結納。甚

至。書信往來。以兄弟相稱。恬不知恥。實為卑

鄙。不堪。著傳諭福康安。到任後。即將吉隆阿

叅奏。照溺職例革職。○又諭。前據三寶奏。浙

江海寧州一缺。係屬海疆。例不准以試用知

州題署。所有試用知州二員。候缺無期。請以知縣缺出。通融借補一摺。爾時頗以三寶所奏為是。隨批該部議奏。並令軍機大臣。俟部覆時提奏。初意原欲准行。本日吏部題駁。朕復詳加披閱。據稱該省雖無選缺知州。而通判共有十缺。儘可通融補用。其佐貳中與知州品職不甚懸殊之布政司經歷。理問等項。均可酌量借補等語。所駁甚是。已降旨依議。該省既有通判理問等缺。與知州品級相近。自可通融借補。不致得缺無期。又何必令借補知縣。始為調劑耶。朕辦理庶務。惟求其是從。不設以成心。即此可見。勿謂朕忘三寶所奏。而率依部議也。將此傳諭三寶知之。○吏部議准。原任大學士管雲貴總督李侍堯疏。稱雲南廣南府土同知儂毓榮病故。嫡子世昌年幼。未合襲例。請以該土同知妻沈氏。管理事務。俟伊子年歲合例。另請承襲從之。○正黃旗蒙古都統拉旺多爾濟奏。頭等子爵

玉魯斯病故。除嗣子博綽諾克外。並無近族。所遺子爵。應否停止承襲。得旨。玉魯斯雖不才。但薩喇勒在日。行走頗多出力。施恩著玉魯斯之嗣子博綽諾克承襲一等子爵。○江西巡撫郝碩疏報。分宜萍鄉萬載廬陵吉水玉山建昌寧都等八州縣開墾老荒及額外新生田地山塘共二頃三十七畝有奇。○福建巡撫富綱疏報。羅源同安龍溪海澄浦城霞浦漳平侯官彰化等九縣。並淡防廳冊報民屯首墾各則田園共三十二頃五十三畝有奇。又浦城縣民報墾田六十畝有奇。○旌表守正捐軀河南鹿邑縣民蔡保玉女蔡氏雲南昆明縣民王國榮妻謝氏。○是日御舟駐蹕新莊大營。○甲戌諭軍機大臣等。前雅德甫到山西巡撫之任。即具摺奏請迎駕。是以批飭何必為此虛詞。緣雅德前次陛辭。業經面奉訓諭。到任不久。又山西尚隔直隸一省。毋庸越境遠迎。批示顯然。乃雅德今日奏

到竟於四月十八日將巡撫關防及鹽政印信交藩司譚尚忠護理並令前往岱漢照看筵宴班禪額爾德尼一切事宜等語更屬非是已於摺內批示雅德此來實屬錯會朕旨況伊既將巡撫鹽政業務交譚尚忠接護何以又令前往岱漢與其令譚尚忠前往何如伊即親身往辦耶雅德現已降旨調為陝西巡撫似此錯謬朕深慮伊不能勝任也雅德著傳旨嚴行申飭並傳諭該撫於何處接奉

實錄卷一百一十五

七

此旨即行速回山西辦理岱漢筵宴之事仍遵前旨俟喀寧阿到晉再赴陝西新任○是日御舟駐蹕朱全屯大營○乙亥御舟駐蹕甲馬營大營○丙子諭據鄂寶等奏三月二十五日未時江西鄱湖星子縣渚溪地方陡起狂風巨浪江西九江前幫內糧船行至湖心人力難施將旗丁余十四等糧船十四隻立時打碎寸板粒米漂沒無存又旗丁劉時盛等十五船亦同時遭風磕碰滲漏或米被

潮濕或刮斷大桅打去舵桿錨纜等件淹斃大小男婦三十四名口空運千總張耀武隨帶部劄鈐記及收貯回空身工銀兩并旗丁何希賢監照二紙俱隨船漂失等語漕船陡遇暴風致遭沉溺所有淹斃人口著查明照例撫卹其沉溺米石雖例應買補但實屬人力難施若再令賠補情殊可憫著即查明確數據實具奏加恩豁免餘著照該督等所議行○命大學士公阿桂以原銜充日講起居

實錄卷一百一十五

七

注官○旌表守正捐軀直隸開州民王林妻趙氏山東滕縣民王克正女王氏○是日御舟駐蹕石屯汎大營○丁丑旌表守正捐軀直隸安平縣民趙著妻陳氏○是日駐蹕德州行宮○戊寅

上登陸○駐蹕景州絳河行宮○是月兩江總督薩載奏報江省各屬麥收豐稔農民待雨插蒔秋禾得旨山東直隸近來望雨看此奏亦畧似望雨今得霑霑甘霖否速奏來南方

五月雨更要也。○山東巡撫國泰奏報德州地方已得透雨得旨欣慰覽之朕所駐景州雖亦得雨乃不及德州今日至河間則云已得大雨且地有積水慰以為慙或者陣雨本屬間斷不可為滿足之言更細察各屬左近如何速行奏來○又奏謝武備院留東餽養駝隻疲瘦寬免議處恩得旨汝所辦何事足見但盡心朕面見過後則忘之若巡撫一切安民察吏之事皆如此其可乎

大清高宗法天隆運至誠先覺體元立極敷文奮武孝慈神聖純皇帝實錄卷之一千一百五

大清高宗法天隆運至誠先覺體元立極敷文奮武孝慈神聖純皇帝實錄卷之一千一百六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十五年庚子五月己卯朔諭據巴圖

等奏請由扎薩克圖汗部落西北界人少旗

分移十一旗於哲爾格沙喇胡魯素地方游

牧將別旗分之人接連挪移其扎薩克圖汗

東頭空地即以賽因諾顏部落扎薩克成衮

扎布一旗之人移駐等語成衮扎布一旗從

前豈無游牧此皆巴圖等以拉旺多爾濟係

固倫額駙意存瞻徇前此車布登扎布在將

軍任內偏袒喀爾喀等因將扎薩克圖汗部

落奏請西展及瑚圖靈阿接任復為含糊具

奏。朕未及深究。即照所請行。後思車布登扎布所辦未妥。特降諭旨。秉公查辦。今已圖等又復如此陳奏。甚屬非是。參贊大臣等所司何事。乃皆聽從附和。車布登扎布已圖。恒山保明善俱交部嚴加議處。此事著派博清額。即赴烏里雅蘇台。仍與已圖秉公辦理。扎薩克圖汗部落之游牧。已展出舊卡至蘇木卡矣。如再任其展占。日復一日。科布多。塔爾巴哈台。哈達青吉勒布。拉罕。青吉勒等處。不將

盡屬喀爾喀乎。若彼借太平日久。牲畜蕃庶。為名遂思占別部游牧。則內扎薩克等。孽生亦多。即令占喀爾喀之游牧。可乎。喀爾喀宜感朕厚恩。乃竟不知止足。當初朕平定準噶爾時。俱係用滿洲索倫兵力所得。喀爾喀等何人出力。其微著勞績者。僅車布登扎布一人。朕已格外施恩。今乃因牲畜微有孽生。即思侵占準部隙地。實屬昧良之極。已圖所請。斷不可行。除明降訓諭外。仍著理藩院存案。

嗣後遇再有如此陳奏者。經由該部駁回。博清額到彼時。不惟杜爾伯特等游牧。不可令其侵占。即扎哈沁所居烏英齊布當齊等處。隙地亦不可令其占據。其扎薩克圖汗等。現在已展之地。如查勘尚無闕礙。即具奏施恩。免其收回。並將各交界之處。勘明繪畫標誌。備查。此旨交與車布登扎布閱看。並令明白具奏。○諭軍機大臣等。朕自江南旋蹕以來。沿途經過山東直隸地方。田土俱覺乾燥。已

令各該地方官虔誠禱雨矣。今日據薩載奏。稱本月十九日。高郵丹徒等處。得雨一二寸。此外各屬。有無得雨。尚未報到。若於麥收後。再得時雨。於田禾更為有益等語。看來江省亦似畧望雨澤。已於摺內批示。又同日陳輝祖奏到。水勢情形。一摺。內稱。現在撥夫撈淺。而於曾否得雨。未經奏及。是江南一帶。近日未必得有透雨。可知江浙水鄉。而田地畏旱。轉甚於畏澇。北省乾燥。而田土畏澇。又甚於

畏旱。此朕臨御四十餘年來所閱歷而得者。目下時屆五月。正當蒔插秧苗之時。若稍缺雨。澤於旱田。尚可無慮。而高阜之區。盼望彌切。著傳諭薩載。即查明近日各屬。曾否得有透雨。速行據實具奏。如尚有缺雨之處。即率屬虔誠設壇祈禱。務得時澤霽霑。足資灌溉。各屬田疇。俱慶有秋。以慰朕念。將此併諭陳輝祖。吳壇。知之。○是日駐蹕紅杏園行宮。○庚辰。諭本日兵部進呈武職大員。應否開復。

一本內徐績海成二員。前於吏部文職本內。業經降旨不准開復。此次兵部進本。閣臣票簽。自應將該二員查照前旨扣除。添寫一徐績。海成已有旨不准開復外。其某某皆准。或不准。請旨。方為允協。乃票簽內竟將徐績海成二員照例開列。僅用夾簽聲明大學士等於票擬本章。何漫不留意。若此。朕數月以來清蹕時巡。際此炎風烈日。望雨甚切。心未嘗稍寧。大學士等當仰體朕躬勞勩。加意檢點。

何但知優養相度。全不以事為事。豈萬幾庶務。朕一身當獨理耶。除協辦大學士嵇璜。扈從行在。免議外。所有阿桂程景伊英廉。此次京察所得議叙。均毋庸給予。其應行開復之處。亦均不准開復。○又諭本日阿桂等議覆德保等奏會試分卷一摺。請仍照舊例。祇令房考迴避本省所有試卷。仍由至公堂均分十八束。送進內簾。分掣。不必將至字公字區分兩項等語。已依議行矣。此摺係大學士九

卿會議查閱銜名。吏部侍郎謝墉亦經列銜具奏。但戊戌庚子兩科俱係謝墉知貢舉。其辦理分卷均照至字公字兩項分辦。即係謝墉以為事屬可行者。即當另行陳奏。不宜隨同畫諾。若以兩項分辦。究於多寡搭配不勻。必須仍循舊例。即應將從前辦理未協之處。自行隨摺聲請議處。乃謝墉既經兩次分辦於前後。隨眾改議。附和於後。其中毫無定見。何前後模稜。若此。著謝墉明白回奏。○諭軍

機大臣等昨迴蹕至山東途次有河南光州民人李偉叩閤控告孫繼賢等邪教一案業經傳諭楊魁將該省有無邪教嚴行查究矣本日復據胡李堂等奏據光州民人張純祖呈稱伊移住光山縣見有李偉出首孫繼賢邪教惑衆縣官僅行責釋逆黨得志猖狂演習不一而足又有商城等縣民趙士智陳璜黃偁等出首邪教及自首邪教圓光等案州官並不詳究等語邪教惑衆滋事最為地方

之害不可不徹底根究李偉張純祖同籍河南先後呈控自必該省實有其事尤宜嚴為查辦著傳諭楊魁於到任後即行提集案內有名人犯詳悉研究如果實有邪教惑衆等事即行按律定擬務俾根株淨盡毋得稍事姑息仍將作何查辦緣由先行覆奏並將胡李堂等摺鈔寄閱看其張純祖呈出邪書圖像符紙鈔案各件一併發往○又諭據國泰奏德州地方於三十日已刻得有大雨至未

刻尚未止歇俟雨止查明入土寸數及各屬報到另行奏聞等語覽之殊為欣慰已於摺內詳晰批示山東直隸境壤毗連今年俱稍覺缺雨昨蹕途經過景州一帶僅得微雨本日行次河間見地有積水詢之袁守伺據稱此間於四月三十日得有透雨至思賢村一帶未獲同時被澤看來夏間陣雨本屬間斷不能一律普霑國泰所奏德州之雨或亦係一隅霑渥未為普徧著傳諭國泰即將德州

左近各屬是否於是日均霑之處迅速查明覆奏以慰厯念○工部議覆廣東巡撫李質穎疏稱陽山縣商民陳嘉潤前經承認開挖縣屬橫基石等處煤山每年輸餉銀四十兩茲因該商病故山煤亦已罄盡請將山場封禁其額徵餉銀豁除應如所請從之○添建江西南豐縣羅坊司巡檢衙署從巡撫郝碩請也○添建烏魯木齊阜康縣知縣濟木薩縣丞衙署從都統索諾木策凌請也○鑄給

廣西桂林府糧捕通判闕防。從巡撫姚成烈請也。○是日駐蹕太平莊行宮。○辛巳。

孝誠仁皇后忌辰。遣官祭。

景陵。○諭軍機大臣等。舒常叅奏保山縣知縣李偉烈典史湯繼業下鄉催追採買穀石。復將社倉鎖封。不容出借。并欲查訪民間藏穀。大量記號。以致百姓齊至縣署。硬求緩比。逐散書役。毆辱親友。復求該縣親立筆據。經提督海祿親詣郡城。彈壓曉示。諭令散去等語。

已降旨將該縣李偉烈典史湯繼業革職嚴審矣。至該處百姓。如果追比負屈難伸。應赴上司衙門控告。乃敢聚眾赴署。紛紛毆鬧。此風斷不可長。自當查明為首倡議之人。即速嚴拏。務獲從重辦理。以警刁風。此皆因李侍堯在滇不能正己。率屬貪黷成風。以致吏治廢弛。民風刁抗。至不可問。今保山既有此事。恐滇省各屬亦有類此者。著傳諭福康安。隨時留心體察。逐漸整頓。如有似此之案。即訪

查確實一體嚴行辦理。毋稍姑息。至查辦時尤須鎮靜妥協。毋涉張皇。○又諭前因薩載奏報高郵等處得雨情形。一招業經降旨。諭令查明。近日各屬有無望雨之處。速行具奏。本日據閔鶚元奏。時屆小滿。安徽省現在大雨。時行池塘充滿。其向不種麥及種麥已獲之地。俱各翻犁布種。秧針偏插。一望青葱等語。看來今歲雨澤應時。秋收可望。覽奏深為欣慰。第江蘇與安徽接壤各屬。現在有無得雨。

未據薩載等奏及諒該省尚未能一律普被。殊深廑念。著再傳諭薩載吳壇。即將各屬近日曾否得雨。普霑之處。查明據實覆奏。倘雨澤稍有愆期。即遵照前旨。率屬虔禱。務祈時澤早降。俾獲有秋。○是日駐蹕思賢村行宮。○壬午。哈薩克汗阿布賚子色德克素勒坦等八人及班禪額爾德尼來使堪布伊什巴爾珠布迎駕瞻觀。各賜冠服有差。○是日駐蹕趙北口行宮。翌日如之。○癸未。賜扈從王

公大臣並哈薩克汗阿布賚子色德克素勒坦等八人及班禪額爾德尼來使堪布伊什巴爾珠布等食○諭本年恩科會試各省士子雲集觀光其中龐眉皓首挾策偕來者多至三十餘人實為熙朝盛事宜加渥澤用廣作人除石震萬邦獻朱鏡已加恩賞給國子監學正銜外所有年八十以上之李實生劉克柔王熊應馬士榮黃鼐俱係鄉試中式舉人著加恩賞給翰林院檢討銜其劉髦學郭

元標馮出佐劉夢華李封索止任張廣基張純仁李遂王景績康鏡李天民許祖健李欽元謝士豪徐常淳李作朋董斌李成章彥俱係上年鄉試未經中式欽賜舉人著與年七十以上之吳兆魁周仲連宋瑞孫凌雲毛肇一體加恩賞給國子監學正銜俾耆儒膺秩各遂夙願以彰推恩引年之至意○甲申諭軍機大臣等前因浙江海塘改建石工恐該處居民或視柴塘為可廢任意拆毀竊用致

有損壞城郭田廬甚有關係曾明降諭旨令該督撫嚴飭地方文武官將現有柴塘照前加意防護以為重關保障將來石工告竣之時柴塘亦可留為外衛此旨尚未據三寶覆奏茲據三寶奏到摺內乃稱與司道等面加籌酌緊靠柴塘之內下椿築砌石工既可以柴塘為外護則桿衛更為得力等語三寶此摺與朕前降諭旨大意適相符合其是否業經接奉前旨何以摺內又無遵旨籌辦字樣

著傳諭三寶即將前旨曾否接到之處據實覆奏以詹事錢士雲為內閣學士兼禮部侍郎旌表守正捐軀山西陽曲縣民張廣妻康氏是日駐蹕紫泉行宮○乙酉諭向來南糧餘米俱准在通州變賣以資日用現在各省糧艘陸續抵通旗丁於兌足正供之外其有多餘米石情願出售者仍著加恩准其就近於通州糶賣在旗丁等既所樂從而近畿地方糧石益充於市價民食均有裨益

該部即遵諭行○又諭大學士九卿覈議尚書和坤等定擬李侍堯貪縱營私各款將原擬斬監候之處改為斬決一摺李侍堯歷任封疆在總督中最高出色是以簡用為大學士數十年來受朕倚任深恩乃不意其貪黷營私婪索財物盈千累萬甚至將珠子賣與屬員勒令繳價復將珠子收回又廠員調回本任勒索銀兩至八千餘兩之多現在直省督撫中令屬員購買物件短發價值及竟不發價者不能保其必無至如李侍堯之贓私累累踰閑蕩檢實朕意想所不到今李侍堯既有此等敗露之案天下督撫又何能使朕深信乎朕因此案實深慚懣近又聞楊景素聲名亦甚狼籍但其人已死若至今存未必不為又一李侍堯也各督撫須痛自猛省毋謂查辦不及倖逃法網輒自以為得計總之有則改之無則加勉觸目警心天良具在人人以李侍堯為炯戒則李侍堯今日之事未

必非各督撫之福也所有此案覈擬原摺即著發交各督撫閱看將和坤照例原擬之斬候及大學士九卿從重改擬斬決之處酌理準情各抒己見定擬具題毋得游移兩可至各省督撫衙門購買物件除家人長隨例應關防不准出署外其各衙門原有設立買辦聞今多有交首縣買辦及中軍買辦之事究以如何辦理方可不致滋弊並著各督撫一併據實具奏將此通諭中外知之○諭軍機

大臣曰和坤奏雲南永昌府屬潞江地方設立隘口禁止攜帶絲紙針綢等項但潞江以外尚有騰越一州龍陵一廳以上貨物在所必需兩處地方遼濶人民繁庶難免偷漏之弊寔屬有名無實應於騰越龍陵以外擇緊要處所改設隘口以收實效又普洱府屬磨黑地方經裴宗錫於該處續添稅口亦不准絲紙針綢等物偷漏查此外尚有思茅一廳與潞江情形相同亦屬有名無實均應查辦

酌改等語永昌普洱所屬地方均與外夷接壤前因綢絲針紙諸物為夷人所需是以議設關隘嚴禁諸貨物出口自應於駐兵處所以外扼要之處嚴立隘口派委專員實力稽查方為妥協若關口設在內地而關外尚有所屬駐兵及廳州如實力嚴禁豈彼處官兵人民竟能置絲綢針紙於不用如禁之不嚴又何必設此關隘所謂有名無實著傳諭福康安即查明騰越龍陵及磨黑等地方以

外銅壁鐵壁等關以內擇沿途扼要處所設立關口派委妥幹員弁實力查察務使應禁之物毫無透漏其應於何處設關之處著即繪圖貼說詳晰具奏○是日駐蹕涿州行宮○丙戌成都將軍特成額奏督率各路鎮將前駐春朋瞰臨賊寨旋據游擊袁國璜稟稱移營戎多後有巴塘頭人汪許帶同三暗巴朗改番目烏金桑珠宗巴番目安却珠多白馬吉等來稱番民皆種牧為生從不偷放夾

壩因安錯刦了達賴喇嘛茶包聞將軍大人帶兵前來勦洗心生憂懼後見達罕綽吉知天朝祇要勦除偷放夾壩及同安錯為匪之人便思同來投生等語因即差書目等隨同前往查造戶口尋據德爾格忒頭人澤旺勞丁上三暗節齒頭人湯旺及大喇嘛罕錯等各率番眾稟懇投誠查知素放夾壩係與江卡一帶毗連之支巴肯本郭木三寨番人此等既未夥同為匪自未便一律翦除至賊境

險要以宗巴為最次則索古壘宗巴四圍石壁峭立僅有一線羊腸盤曲而入索古壘雖有三徑可通亦皆溝深箐密若不先將兩處險要起此番眾皆欲投誠之際設法安撫并乘機派官兵直據其中將來賊酋勢窘恃為遁逃之藪查辦轉需時日因即飛飭總兵成德等遵照密辦一俟措置定局即派副將鄂輝督兵擣其西北成德袁國璜帶兵繞出西南兩面夾擊自可將安錯等一舉就擒得旨

所辦似得機要勉為之○實授寶琳為直隸泰寧鎮總兵○是日駐蹕黃新莊行宮○丁亥

上迴鑒 詰

安佑宮行禮○幸圓明園○定城守尉班次諭昨因和珅差竣回京奏伊經過直隸城守尉出見時立在藩臬兩司之前豫省則在兩司之後等語城守尉一官係駐劄無將軍副都統之城統轄滿兵之大員非地方官可比雖

屬督撫節制亦不過兼轄並非屬員而列藩臬之後殊屬不合理應定例畫一嗣後各省城守尉俱照直隸列在藩司之前著為令○命大學士公阿桂協辦大學士吏部尚書嵇璜內閣學士紀昀吏部侍郎謝墉禮部侍郎阿肅兵部尚書蔡新侍郎曹文植左都御史羅源漢為殿試讀卷官○戊子策試天下貢士汪如洋等一百五十五人於太和殿前制曰朕誕膺寶運今四十有五年幸函夏乂安

廣輪茂豫欽崇永保慎憲省成凜懷無逸之圖式迺延洪之福恒思讜論以贊鴻猷況今佑荷

天申春祺溥電緬惟古義壽考作人棧樸薪樞當必應期而作茲因廷試佇採嘉謨孟子述道統之傳自堯舜以至於孔子蓋謂心法治法同條共貫也然帝王之學與儒者終異保大定功之要其果在觀未發之氣象推太極之動靜歟永嘉學派朱子識為事功真德秀作大學衍義其目自格致誠正至於修齊而止治平之經略不詳焉抑又何歟天下之化理存於民風而民風淳漓由乎吏治賈誼稱俗吏之所為在於刀筆筐篋而不知大體是則然矣然蒲鞭示辱謂之仁心催科政拙謂之循吏其果可理繁治劇歟一道德以同風俗始臻上治乃或以輕財結黨為義俠豪健撓法為氣節以敗俗而負美名為長吏者將何以辨別而誨導之歟積貯之法不出常平

社倉。然常平豐歉而歛散。其制在於出陳易新。但逢穀貴而採買入倉。慮有強派之弊。穀賤而紅陳召糴。恐滋勒買之虞。何道而使倉庾常盈。閭閻不累歟。仰藉社倉者。必皆貧戶。倘所入之息不敵所出之數。則義舉且漸廢。使必按冊而促之償補。則追呼滋擾。善政反成作法之涼。將何以斟酌而歸於實惠歟。書稱刑期無刑辟。以止辟蓋天地之道。溫肅並行帝王之治。恩威交濟固大異乎名法之家。

而亦非徒博寬大之譽也。後世秉憲之吏。不知德禮刑政之同原。其於明罰勅法之道。未能權衡要於至當。豈咸中之治。果難復見歟。將使惟明惟允。無縱無枉。以協於弼教之意。果操何道歟。夫先資自獻官之始也。敷奏以言。古之制也。多士學古入官。於經世之略。講之有素。又新自田間。來於民生利弊。知之必悉。其竭慮以對。毋泛毋隱。朕將親覽焉。○諭此次派往密雲縣駐防之滿兵。所有借支未

完庫銀著加恩豁免。以裕伊等生計。○諭軍機大臣等。前因和珅奏自李侍堯婪索屬員。贓私狼藉。雲南通省吏治廢弛。聞各府州縣多有虧空之處。必須徹底清釐。因不忍即行查辦。寬以一線之路。令其自行籌畫。俟福康安到任後。即將各府州縣倉庫錢糧逐加查察。如有虧空。即行查叅。今自降旨後。業經一月有餘。各屬倉庫諒均有就緒。福康安自行在請訓前赴雲南。亦當已接篆視事。著再傳

諭福康安錢糧關係國帑。定例恭嚴。豈容任意虧短。著即遵前旨。將各屬倉庫逐一嚴查。務令不致虧缺。如有短少。即將該州縣嚴行叅奏。從重治罪。總期庫項咸歸實貯。而官方亦藉得肅清。將此並諭劉秉恬知之。○又諭滇省採辦銅勛。近年以來。屢形竭蹶。節經降旨該督撫等設法調劑。實力籌畫。終無成效。茲據和珅面奏。滇省銅勛官價輕而私價重。小民趨利。往往有偷漏走私。地方官雖設法

嚴禁無如滇地山多路僻耳目難周私銅仍多偷漏所以京銅缺少向來定例九成交官一成通商不若令將官運之銅全數交完後聽其將所剩銅觔儘數交易不必拘定一成或商民知利之所在競相趨赴丁多銅集京運不致仍前缺乏等語銅觔為百姓器用所必需所以除鼓鑄官用外准其一成通商但滇省各廠開採日久硐老山深所費工本較多定價不敷商人無利可圖勢必裹足不前辦理益形竭蹶若許其將開採官銅全數交完外不拘一成之例聽商賈流通貿易間閭既多利便勢必競相趨赴百計籌畫攢湊資本踴勘新礮銅廠可期日旺此亦調劑之一法其是否可行能使此後各運銅觔如數全完源源接濟以供京外各局鼓鑄方為妥善著傳諭福康安等悉心籌覈是否可以永遠無弊據實具奏再前據和坤等查奏滇省私錢盛行每百不盈一掬半係鉛砂攪雜官銅

缺少由私鑄盛行而私鑄盛行皆由官局錢文薄小並將該省所行私錢另包進呈昨和坤至行在復命復經面詢情形據奏請設法查辦整頓等語滇省各局設有鑪座每年所鑄比之他省為數較多現在正當整飭銅務清釐錢法之際豈宜私鑄混行況有私鑄必有私銷制錢改鑄私錢者更不可不加意查察其私鑄之細小錢文急宜收燬將官局制錢按照江廣各省從前收買小錢成例與民間公平收兌改鑄大錢但思滇省官局現在所鑄錢文其分兩自不及京局錢文之重而以之收買小錢原亦不必拘泥每串七觔半重之成例應即以此種局錢收買小錢俟小錢收買將次淨盡時再照定例加足分兩鼓鑄官錢如此逐漸收繳如平糶倉糧漸次減價之例辦理庶錢法漸有起色於銅務有益仍將現在如何設法辦理之處詳悉覆奏將此由五百里傳諭知之○又諭前因金簡至

思賢村接駕見其所穿補服錦鷄旁復繡一小獅子隨降旨詢問今伊將從何得此補樣之處明白回奏茲據奏覆從前李質穎舒文福海俱各送有補子但實不記係何人所送等語補服名器所關其有文武兼銜者止應擇其中職分最大之補服穿用若因身兼武職翻新繡樣以誇榮於衆與體制大有關係今金簡所穿補服既不能指定何人所送著即傳諭李質穎舒文福海即行查明將此種

補樣係何處翻出傳知該處速將此樣徹改○又諭據和坤奏伊赴滇省時經過湖南貴州一帶見該處苗民當差供役極為恭順惟尚沿苗俗不行薙髮體制殊為未協且內地民人見其服色有異未免心存畛域有意欺凌似應准其遵照內地一例薙髮等語滇黔一帶民苗雜處且有苗多於民之處伊等耕鑿自安輸誠服役久與內地民人無別徒以不行薙髮尚循舊俗遂爾顯示區分但已相

沿日久若一旦悉令遵制薙髮未免心生疑懼辦理轉為未協著傳諭該督撫等明白宣導出示曉諭所有各該省苗民其有願薙髮者俱准其與內地民人一例薙髮以昭一視同仁之意○又諭據和坤奏緬匪送還蘇爾相等尚有同來緬子二人現在羈禁永昌似應釋回等語此等羈禁之人並非緬匪緊要頭目前此李侍堯將伊等扣留原為勒取楊重英起見但思平定金川後如緬匪之波一

孟矣等業經解京之犯尚且加恩發還况伴送蘇爾相同來之人原屬無罪拘留且緬性多疑見來人被扣不還轉致心生畏懼莫若將此二人竟行釋遣俾歸本土并著傳諭福康安作為已意檄諭該酋此二人從前扣留時係原任總督李侍堯因汝等不將楊重英送出是以暫行羈候今知此二人在滇多年是以特行放回至楊重英原係天朝無足重輕之人爾等送還固見恭順若不送還亦無

關緊要如此檄諭俾該酋不能揣測端倪又見此二人放歸心生感激將楊重英送出亦未可定福康安接奉此旨即遵照妥辦○又諭曰和坤奏雲南開化府屬設立關口內地民人有前往交趾貿易者由藩司給以印票出口每年稅銀約二千兩委同知經管前因交趾有黃文桐滋事內地民人不從俱各逃回該督李侍堯拏獲有發遣者有因曾在該處娶妻定擬死罪者雲南如此辦理聞粵省關隘亦有通交趾之處辦法又復不同似覺兩歧等語內地民人如有私行出口例禁綦嚴自有應得之罪若由官給票聽其前往貿易者原非偷渡關隘者可比况粵西龍州關歷年飭禁內地民人偷越從前有在安南滋事厥徒據該國王送回內地者均經發遣伊犁原因該犯等係私越出口又滋事端是以如此辦理至開化所屬民人既有官給印票出口在彼又以不從黃文桐滋事逃回內地

尚屬畏法乃李侍堯竟將此案人犯均擬發遣並因其中有在彼娶妻竟擬死罪者辦理未免過當著傳諭福康安查明原案斟酌情理另行定擬具奏○又諭從前因滇省永昌以外在在與緬匪壤地毗連自乾隆三十四年以後每年派委將備帶兵前往各關隘地方分路駐劄皆於秋後出防夏初撤回定例今提督每年秋間到邊巡歷一次總督亦於冬初前赴各邊親行巡察以資整飭但各處雖與緬境相近其實么膺小醜恒怯無能從不敢稍近邊圉况現已徹防減汛而提督大員相沿舊例每歲仍赴永昌騰越一帶巡邊殊屬無謂又提督駐劄大理距邊甚近尚屬可行總督本任應辦事務甚多永昌騰越一帶離省二十餘站每年一次前往徒令沿途州縣多一番酬應於實政仍無裨益著傳諭福康安止須嚴飭沿邊各關口員弁實力稽察毋任偷漏至親往巡查或隔年一次或二

三年一次。先期酌量奏明再行前往。○又諭前據戶部奏查辦雲南省未完鹽課二摺。已有旨寄交福康安劉秉恬閱看。令伊等到滇後。即悉心查覈。至滇省鹽務。墮銷墮運。及商民積欠。節經降旨嚴飭該督撫等實心籌辦。歷年以來。紛紛奏請調劑。至今仍未有起色。昨和坤回京。面奏滇省鹽務情形。實緣川省私鹽不無偷漏。又係白鹽較之滇省所出黑鹽。味好而價廉。所以官鹽難銷。而正課日虧。

惟在川滇二省交界處所。實力禁止偷漏。則小民不能淡食。庶幾官鹽易銷。課項無虧等語。所奏較為切實。私鹽盛行。則官引壅滯難銷。自應實力嚴禁。但川省與雲南接壤。私鹽既易偷漏。小民貪賤買食。勢所不免。即出示嚴行曉諭查禁。仍屬有名無實。若多派兵役巡察查拏。又恐徒滋擾累。總之有治人無治法。應揀選能事地方官。責令妥為籌畫。實力清查。俾閭閻不致食私。而鹽務漸期整頓。所

謂民可使由之。不可使知之者。著傳諭福康安文綬等。即遵照此旨。派委妥幹員弁。於川滇交界處所。稽查嚴禁。毋託空言。再滇省乾隆四十一年以前。墮運墮銷各款。前經該督撫等奏明。分限八年帶銷。而四十一。二。三等年鹽課積欠。又有四十餘萬兩。舊欠未完。新欠又加。累疊增甚。徒有催追之名。究無歸款之實。恐民間又受病日深。辦理愈形竭蹶。朕思該省現在整飭鹽務之時。首應年清年款。

與其催追歷年之舊欠。莫若先清本年之新欸。如本年庚子將應完四十四年課項先行儘數催交。其全完足數之外。再能催出若干。即以補還從前四十三年的舊欠。如此年清年款。如有多餘。遞年向上補還舊欠。俟四十二年舊款已清。即補四十二年之欠。似此逐年追溯清釐。不必定以年限。俾民力稍紓。而地方官亦不致有那新掩舊之弊。可望積欠漸清。鹽務或有起色。將此諭令福康安等。伊

等以為如何○己丑

上詣

恩慕寺行禮○正陽門城樓災○山東巡撫國泰奏遵查東省常平倉盈餘銀兩現存四萬四千八百二十兩有奇額穀二百九十四萬五千三百石現在存倉及糶借未還未買除抵缺額外尚有溢額穀九萬三千八百三十二石有奇無須採買補額報聞○調河南布政使江蘭為雲南布政使安徽布政使農起

為河南布政使以湖北按察使福川為安徽布政使○庚寅諭今年係朕七旬萬壽班禪額爾德尼前來熱河朝覲筵宴於過朕萬壽節後再行進哨未免太遲即曉諭各該處將今歲進哨停止○又諭曰李侍堯名下所有陸續置買田產什物自應概行查明入官毋得稍有漏匿至伊盛京房地及所得老園地畝未便因李侍堯一人獲譴一概籍沒即如伯爵雖現係李侍堯承襲乃李永芳子孫公

共世職朕眷念勛舊亦豈肯遽行褫奪乎著交該旗遵照查明辦理其李永芳勅書並著於齋到時呈覽○諭軍機大臣等據巡漕御史卽庾曾奏重運漕船渡河以後楊莊口門水勢微弱現在檄飭地方官多備剝船隨時起剝並札商河臣於新淺處所量加撈濬等語本年江北一帶自春徂夏雨澤稍覺稀少洪湖清水力弱不能暢刷致楊莊口門淤淺勢所必然前據鄂寶具奏情形亦復相同著傳諭薩載陳輝祖等速飭河員於淤淺處所設法撈挖並令地方官多備剝船隨時起剝務令重運漕船通行無阻再昨據吳壇奏稱江省現在場雨應時收成豐稔等語看來江南各屬尚不致缺雨而江北淮安宿遷一帶究覺雨水短少所以河水微弱著再傳諭薩載等即將各屬近日曾否得雨霑足田禾有無妨礙情形據實由驛覆奏以慰廑念將此由五百里發往並諭鄂寶吳壇知之○以署

直隸按察使劉義為湖北按察使○辛卯。  
上御勤政殿聽政○遣官祭

關帝廟○諭曰裕親王年已老邁不必管理  
旗務所遺鑲藍旗漢軍都統員缺著永貴調  
補永貴所遺鑲藍旗滿洲都統員缺著和坤  
補授○內閣翰林院帶領戊戌科散館修撰  
編修庶吉士引見得旨此次翰林散館之修  
撰戴衢亨編修蔡廷衡業經授職其清書庶  
吉士祁韻士錢棻王天祿俱著授為編修漢

書庶吉士潘廷筠王春煦吳裕德吳省蘭吳  
舒帷胡榮吳鼎雯張九鐸何循顏崇為何西  
泰馮敏昌亦俱著授為編修德生李鼎元錢  
世錫程光璵張位汪景洪其紳俱著授為檢  
討彭翼蒙邵自昌馮培祖之望俱著以部屬  
用劉徵泰毛鳳儀楊煒汪注朱鈴寶汝翼薛  
紹清俱著仍歸進士原班銓選○吏部帶領  
王大臣京察驗看四五品京堂通政使司副  
使李綬等四十四員引見得旨李綬德昌富

炎泰陸錫熊成策多隆武吳省欽朱珪覺羅  
吉善俱准其一等寶雲那澄俱著降二級調  
用觀光張裕榮俱著以原品休致餘依議○  
士辰

上還宮○御養心殿召讀卷官入親閱定進呈  
十卷甲第○諭軍機大臣等今年入夏以來  
雨澤稍稀盼望甚切昨日未刻起京城得雨  
入夜更為優渥入土約有五六寸且西南一  
帶雲勢甚廣想亦同霑渥澤著傳諭袁守伺

即查明是否得有透雨迅速據實具奏以慰  
懸念○命侍郎董誥福長安俱在紫禁城內  
騎馬 癸巳

上詣

奉先殿

大高殿

壽皇殿行禮○御太和殿傳臚賜一甲汪如洋  
江德量程昌期三人進士及第二甲闕槐等  
五十一人進士出身三甲張丙震等一百一

人同進士出身

書錄卷一百六

圭

大清高宗法天隆運至誠先覺體元立極敷文奮武孝慈神聖純皇帝實錄卷之一千一百六

大清高宗法天隆運至誠先覺體元立極敷文奮武孝慈神聖純皇帝實錄卷之一千一百七

較修

乾隆四十五年庚子五月甲午授一甲一名

書錄卷一百七

十

進士汪如洋為翰林院修撰一甲二名江德量一甲三名程昌期為翰林院編修○諭軍機大臣等前據閱鶚元奏查有和州逆犯戴移孝及伊子戴昆所著碧落後人詩約亭遺詩二本閱其書內悖逆之處甚多殊屬可惡已將二書銷燬矣其作序之魯之裕身任道員敢為逆犯作序使其人尚存必當重治其罪今已身故姑免深究但此書刊刻多年留存斷不止二本現據戴昆之孫戴世道供稱

約亭遺詩係乾隆十年在湖廣刻印恐楚省尚有收藏之家著傳諭閩鄂元富勒渾等飭屬嚴查如有此書板片及鈔本刻本即行解京銷燬其餘別省亦恐有流傳之處並著各該督撫等實力查燬俾狂吠詩詞搜燬淨盡以正風俗而厚人心倘有片紙隻字存留將來別經發覺惟該督撫等是問○是日起上以夏至祭地於

方澤齋戒三日○乙未諭本年京察之期除京堂各員業經帶領引見外其各衙門列為一等人員俱著帶至熱河引見至年逾六十五歲之員及填註六法不甘廢棄情願引見者候朕回鑾後再行帶領引見以示體卹○又諭前以各省舉人選用知縣需次至三十餘年因於壬申辛巳丙戌壬辰等科降旨挑選分發各省試用於銓政既無壅積而士子得及鋒而試不致淹滯多年今自乾隆三十七

年壬辰科挑選以後距今又屆九年所有分發一等舉人各省將次用完即二等之教職亦俱陸續補用著該部於明年辛丑科會試榜後請旨特派王大臣再行挑選並照例將近四科舉人扣除俾科分較深者得早乘時自効所有應行辦理事宜並著該部臨期查明具奏○以鑲黃旗滿洲叅領武德理為江寧副都統○丙申諭前經降旨於山海關地方特建

北海神廟該處為

王迹肇興之地茲當崇宇聿新肇修秩祀自應特派宗藩代申誠敬著交太常寺將諸王名單開列具奏請旨○又諭據索守伺奏直隸總督衙門購買食物向設有買辦八名分班供役凡日用所需皆給發現錢今其照依市值平買按十日一次結算再行發錢採辦等語固屬循照舊例但十日結算再行發錢小民供役安得有私錢豫行賄墊勢必賒欠勒

買仍滋流弊。自應於十日前豫先發給錢文。令各役隨時買辦。再行按日結算。事雖瑣屑。然防微杜漸。不可不慎。既經查辦。必須周妥。方可行之。無弊也。並著將素守伺指。行知各督撫。做照辦理。○內閣翰林院帶領新進士引見。得旨。新科進士一甲三名。汪如洋。江德量。程昌期。已經授職。關槐。陸伯焜。初彭齡。吳蔚光。甘立猷。范鰲。謝振定。李銘。吳樹萱。許兆崇。劉汝暮。高棧生。陳有會。柴模。王晟。蔣師煥。

徐鑑。郭在遠。周之适。余德。洋溫。聞源。鐘文。韞。楊嘉材。李奕疇。運昌。徐準。俱著改為翰林院庶吉士。程維岳。劉青。照朱。受徐。瀾。雷純。馮兆岫。張丙。震胡。克家。單稽。曹玉。樹葛。豫章。涂樾。薩彬。圖。包致。和高。三畏。岳興。阿何。愚。劉爾葵。俱著分部學習。陳鴻舉。周拱。李光。時。羅拔。劉具斌。張連。俱著以知縣即用。餘俱著歸班銓選。○戶部奏各省驛站事務已遵旨令各守巡道分管稽查。而以按察使總其成。惟查向

來驛務道員。以一人統轄通省。原定養廉較厚。今既改歸守巡。各道分轄。已無專管郵務之責。則其所得養廉較多者。自當一例酌減。現據各省督撫陸續咨報到部。請將向設各驛道養廉。按照各省情形。並比較各巡道額定之數。分別酌覈。其額設養廉本少者。仍照舊支。食多者。酌中裁減。報聞。○丁酉夏至祭地於

方澤

上親詣行禮。○幸圓明園。○諭曰。福隆安所管事務太多。所有步軍統領事宜。現有和珅辦理。其奉宸院事務。金簡管理二年。亦甚熟練。福隆安均不必兼管。○又諭曰。孫士毅前在雲南巡撫任內。不能叅劾李侍堯革職。發往伊犁。固屬咎所應得。但與本身護誼者。究屬有間。且其學問亦優著。加恩免其發往伊犁。令在四庫全書處自備資斧。効力贖罪。與紀昀。陸錫熊。同辦總纂事務。以贖前愆。○諭軍

機大臣等戶部覈議九江關稅盈餘短少請交江西巡撫秉公查訊據實具奏一摺已依議行矣比較關稅向例無論兩任三任總以一年正額盈餘統計從無按貨物分款覈算之例前額爾登布原奏聲明蘇凌阿靈泰兩任共短收木稅船料銀七萬六千四百餘兩該監督計多盈餘銀三萬七千九百餘兩以所餘抵補前任不足尚短銀三萬二千餘兩等語今戶部按照經徵月日計算則蘇凌阿

在任三個月十二日收銀二十三萬二千兩有奇靈泰署二十四日收銀三萬六千兩有奇該監督額爾登布接任七個月二十四日收銀三十七萬九千五百兩有奇按日計算該監督徵收短少顯然乃額爾登布經徵月日定例不論而僅以木稅船料一項斤斤比較以前任後任兩相牽混界限並未分清又稱江廣兩省米價稍昂木商以飯食過重恐折成本興販較少等情上年江廣並未歉收

即使飯食稍重商賈牟利亦必於價值內取償斷無因此而興販較少之理且從前亦未聞有藉米價為虧缺關稅口實者明係藉詞支飾有心取巧殊屬非是額爾登布著傳旨嚴行申飭並令明白回奏戶部摺並鈔寄閱看○戊戌諭曰尚書和坤之子賜名豐紳殷德指為十公主之額駙賞戴紅絨結頂雙眼孔雀翎穿金線花褂待年及歲時再派結髮大臣舉行婚禮○吏部議覆山東巡撫國

泰疏稱壽張一縣與汶上縣接境汶上又與兗州府城接境自前撫臣楊景素奏將舊隸兗州之濟寧州改為直隸州撥兗屬之汶上魚臺嘉祥三縣歸其管轄以致壽張至府中間轉隔州屬之汶上一縣於文書往來及遞解人犯轉多隔礙查有兗州屬之金鄉縣離濟寧較近請將金鄉縣撥給濟寧以汶上仍歸兗州應如所請從之○浙江巡撫王亶望疏報鳴鶴場開墾沙地一百四十三畝有奇

（已亥）

上幸避暑山莊自圓明園啟鑒○諭朕此次前往熱河所有經過地方著蠲免本年地丁錢糧十分之三○諭軍機大臣等前據原任陝西巡撫畢沅保奏關中書院掌教戴祖啟六年期滿盡心教迪懇請送部引見昨該員到京引見令軍機大臣出題考試不但不能清真雅正其文筆枯澀字跡潦草且有訛錯之字畢沅原奏稱其學術純正於時文致力尤深實能取則前輩等語畢沅係鼎甲出身非不能文者其所出看語不應過優若此戴祖啟業經加恩以學正學錄用著將考試原卷發寄畢沅閱看豈畢沅任巡撫事於文學近亦畧荒疎乎將此傳諭知之○是日駐蹕南石槽行宮○庚子諭據袁守侗奏准吏部咨寄籍人員改歸本籍恐寄籍之處不無親故其改歸在三十年以內者現任各官統限一年內照例報部迴避茲查直隸省有宣化府

知府李浚原等六員從前皆寄籍直隸考試捐納嗣經呈明改歸本籍但均未及三十年應請照例迴避又佐雜各官應行迴避者現在咨部查辦等語所奏自屬照例辦理但李浚原等雖曾寄籍直隸而在該省服官均已多年亦未見有瞻徇親故之弊若遽行改調轉致紛更今李浚原等既遵例報明均無庸令其迴避此後現任各員在限內陸續呈報及咨部佐雜人員並著該部查照一體遵辦至此項人員原限一年內報部今復經降旨明切曉諭如此後各該省仍有逾限隱匿不報者別經發覺將該員照例治罪其嗣後在部候補候選人員改歸在三十年以內者寄籍省分停其銓選將此通諭知之○是日駐蹕密雲縣行宮○辛丑孝恭仁皇后忌辰遣官祭景陵○成都將軍特成額等奏前經奏明派令總兵成德游擊袁國璜安撫衆番即將賊境

要區占據茲已據成德將上三暗巴之節齒番民一百六十戶。索國璜將宗巴朗改兩寨番民一百十四戶。共男婦一千七百九十九名口善加撫馭隨派漢土弁兵駐劄各寨宗巴既為我兵據駐料索古壘轉盼來投所有支巴肯本郭木三盜藪無難迅速搜拏現定即日勒兵前赴達拉藏喜一帶相機督辦報聞○是日駐蹕要亭行宮○壬寅江蘇巡撫吳壇奏遵旨確查平糶餘銀自乾隆二十二年以前統計積存銀十二萬七千餘兩經前督臣尹繼善奏請撥歸差務之用今截至四十年除陸續報部撥用外實存銀九千四百三十五兩有奇江蘇通省常平缺額一萬八千餘石為數無多俟應行買補時酌量發給辦理報聞○是日駐蹕兩間房行宮○癸卯駐蹕常山峪行宮○甲辰烏嚕木齊都統索諾木策凌奏迪化奇台綏來三州縣及濟木薩等處戶民子弟成丁者四百二十四戶

再貿易傭工商民情願認地墾種入於民籍者九十五戶照例每戶撥給地三十畝借給農具籽種牲畜報聞○以侍講學士成策為內閣學士兼禮部侍郎詹事府詹事為通政使太僕寺少卿諾穆渾為太僕寺卿刑部郎中保成為光祿寺卿○以太僕寺少卿尹壯圖為內閣學士兼禮部侍郎順天府府尹吳綬詔為通政使通政司副使李綬為大理寺卿太僕寺卿倪承寬為太常寺卿○是日駐蹕喀喇河屯行宮○乙巳上詣熱河文廟行禮○御製戒得堂記曰孔子三戒之論朱子注謂以理勝之則不為血氣所使又引范氏之言以為養其志氣故不為血氣所動蒙引又引新安陳櫟之語以為志亦定向於理志有善惡理無不善諸說繹釋聖析理各抒所見亦既擇之精而語之詳矣我

皇祖聖壽望七時嘗欲鐫通用小璽命內廷翰臣擬文皆無當

聖意者乃定戒之在得字用之此語聞之張照蓋爾時伊在南書房裏行也然當時

聖意引而未發予今年亦屆七袞於元旦試筆即隳括此語為什茲駐蹕避暑山莊乃

皇祖朝乾夕惕用此璽之處而予受

恩之所也適作書堂於清舒山館之左即以題額而為記以闡

皇祖之義曰帝王之學與佔畢書生有不同則所戒亦當各異未定方剛之戒茲不復論茲所戒者當在得矣而得豈與庶人同乎欲得賢才而用之此可戒乎欲得億萬年永承天眷此可戒乎欲得寰宇安寧萬姓樂業此可戒乎欲得五風十雨屢綏普徧此可戒乎若夫欲得貨財為瓊林大盈金花內帑之私則是剝肉補瘡自速其亡之舉古有明戒而戒及此其亦小矣因敬思

皇祖所云戒得者其在擴土兼遠之為乎擴土兼遠之不已必有窮兵黷武之事我

皇祖雖征朔漠復衛藏非窮兵也不得已也予小子欽承

先志亦既平伊犁定回部靖金川擴土不為不遐兼遠不為不備然非敢恃兵之強將之畧而窮黷以逞已之欲亦惟是不得已而用之耳幸蒙

天助諸事順成今則壽登七旬亦既老矣尚何

所不足敢弗以

皇祖之戒為戒乎如是則先儒所謂志氣血氣胥不外一理然此理實非佔畢儒生所得同而或有合於我

仁祖垂示萬禩之義乎○是日駐蹕避暑山莊至八月癸酉皆如之○丙午諭前因陸費墀經王杰叅奏遺失四庫全書底本及令謄錄捐書繕寫各情節恐其中有私損情弊是以將陸費墀解任交英廉等秉公查審今既據

查明實因書卷浩繁收發不清以致遺失書籍三十餘種尚無別項情弊陸費墀著從寬准其開復仍交部議處所遺各書勒令購覓賠補至幫辦提調劉種之及總裁董誥俱著從寬免其交部○豁除陝西撫標提標被水衝塌馬廐餘地二十六畝額賦○丁未禮部議覆福建巡撫富綱奏稱澎湖一廳孤懸外島所有澎湖童生縣府兩試請歸併該廳就近錄取至該廳現有廩生一名現在廳試即

令認保此後或無廩生即照各省衛學之例責成該廳增附各生互相保送再該處新舊各生府學教官不能就近督課亦即令該廳督率約束均應如所請從之○是月署雲貴總督舒常奏五月初九日據安南國王遞到咨文一件內以逆目黃文桐聚眾滋事前請飭令沿邊文武派委員弁兵役嚴密巡邏今黃文桐窮蹙竄去都竜地面亦稍清帖因以薰香香蠟銀四百兩為敬又有犒錢兵役銀

一千兩並以黃文桐逋竄未獲祈飭沿邊鎮府照前譏察搜拏送回該國究治等語已將該國儀物發還並檄令地方文武悉心察捕得旨是廣東巡撫李湖奏謝調任恩得旨覽廣東腥羶惡習特用汝去整頓一切吏治汝應留心即總督衙門亦宜留心莫為裴宗錫孫士毅自己無能代人受罪慎之此諭非令汝與總督不和彼若清廉公正原當和衷共濟也

大清高宗法天隆運至誠先覺體元立極敷文奮武孝慈神聖純皇帝實錄卷之一千一百七

大清高宗法天隆運至誠先覺體元立極敷文奮武孝慈神聖純皇帝實錄卷之一千一百八

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次 臣曹振鏞等奉

聖旨紀錄十四次 臣德瑛經筵講官太子少保工部尚書紀錄六次 臣曹振鏞等奉

教修

乾隆四十五年庚子六月戊申朔諭軍機大

臣等奉 上諭

十

臣曰國泰奏據雲南委員彌勒縣知縣朱士

鰲領運乾隆四十三年二運二起京銅七十

餘萬觔於本年四月十七日過山東境交與

直隸接催北上等語此項銅觔係四十三年

二運正項乃至今年四月始過山東已壓遲

二年之久其三運四運更不知何時方能解

到滇省現當整飭銅務之時著傳諭福康安

等即上緊設法調劑務使瀘店先有存貯底

銅委員領運迅速起解即目下底銅存貯尚

少亦應陸續催趲運往瀘店將來漸次寬餘即可於次年冬底將上年各運應解之銅掃數運到京局庶望日有起色勿再仍前稽緩致銅運遲至兩年之久尚未到局有誤鼓鑄將此由四百里發往並諭劉秉恬知之仍各將如何設法籌辦以期充裕之處先行據實覆奏○豁除河南孟津縣河北鎮官莊河水衝塌地畝一百一十九頃九十六畝有奇額賦○旌表守正捐軀江蘇山陽縣民蔣玉妻

閻氏山東東平州民徐柱妻陳氏

十

閻氏山東東平州民徐柱妻陳氏○已酉大

學士管閩浙總督暫署浙江巡撫三寶奏浙

省平糶餘銀前經奏准至五萬兩以上即造

冊報部充餉其各屬買補平糶倉穀即將糶

價給發無庸借動別款報聞○庚戌浙江巡

撫李質穎奏日本國難番漢昭祿等十三人

載麥出洋糶賣遇風折裂桅舵於去年十一

月內漂至閩省霞浦縣星澳口經福建撫臣

咨送到浙現已附銅商范清濟等船資送回

國報聞○以江西鹽法道李封為浙江按察使○辛亥護理陝西巡撫尚安奏遵查陝省常平倉糧自乾隆三十九年奏准捐監以來各州縣歲收監穀多寡不等皆歸入常平倉內較之原額穀數有餘即春糶糧石無庸買還所有糶存銀兩提貯司庫遇有州縣動撥額糧將此項發給買補與福建辦理大畧相同報聞○壬子諭近據巴圖奏扎薩克圖汗賽因諾顏二部落牲畜孳生蕃庶請令杜爾

伯特烏梁海等向外遷移空出游牧即令扎薩克圖汗等部落接連移駐等語因此事斷不可行屢經訓諭並令博清額前赴烏里雅蘇台會同巴圖車布登扎布秉公辦理喀爾喀向有博端綽爾在額爾齊斯額濟勒等處游牧者因畏懼噶勒丹前來投誠經皇祖賞給牧地至乾隆二十年始平準夷中間相距五十餘年伊等游牧何以容納今喀爾喀已潛將游牧展至蘇木卡座此等地方即

非伊等所應占踞茲又欲占杜爾伯特地方若任其占踞日久必至科布多塔爾巴哈台等處亦將盡屬喀爾喀矣從前噶勒丹車凌之父策妄阿喇布坦欲將阿爾台迤北等處不令空閒再三籲請終未允許噶勒丹車凌向額駙策凌聲言大皇帝若遣兵前來路遠馬疲口糧不繼必仰給於汝喀爾喀我兵亦惟向喀爾喀索取等語經額駙策凌諭以大皇帝準情酌理將阿爾台等處作為隙地汝

若興兵來犯我惟知捐軀以報大皇帝無謂我生計艱難心懷怨恨也策凌之言深堪嘉悅今拉旺多爾濟等巧借畜牧為名欲將國家兵力攻取之地希圖占據情殊可惡喀爾喀實屬負恩此事與左翼二部落無涉著傳諭博清額將此旨通諭右翼之扎薩克圖汗賽因諾顏二部落衆喀爾喀等知悉俾勿忘乃祖額駙策凌之忠勤也○以廣東春江協副將吳本漢為福建南澳鎮總兵○甲寅諭

軍機大臣曰班禪額爾德尼入覲所有經過各省豫備供頓一切經費自應據實開銷著傳諭各該督撫於耗羨盈餘及各閒款內酌量先行動撥毋庸開支正項錢糧即事竣後亦只須造冊奏交理藩院內務府會同覈銷撥給廣儲司銀兩歸款均毋庸具題報部將此傳諭直隸山西陝西甘肅各督撫知之○禮部議准陝甘總督勒爾謹奏稱烏魯木齊所屬昌吉縣地方請照安西等州縣之例設立廩生增生各二名六年一貢從之○以光祿寺卿虞鳴球為順天府府尹大理寺少卿趙佑為太僕寺卿○以原任詹事金士松補原官○以故雲南鶴慶州屬土通判高萬松子世祿襲職○蠲免湖北沔陽潛江荊門江陵監利等五州縣本年水災額賦有差○旌表守正捐軀直隸肅寧縣民楊進公女楊氏河南閿鄉縣民嵇興盛妻郭氏○乙卯諭軍機大臣等昨據留京王大臣奏報京城於初

三日得雨五寸今日又據剛塔奏報天津一帶於初三日得雨六寸等語保定距京城天津俱屬不遠兩處俱同日得雨省城一帶諒當一律普霑何以未據該督奏報著傳諭袁守侗即查明保定附近各屬日內曾否得有透雨田疇足資霑溉之處迅速覆奏尋奏通省各屬近日得雨無不渥被得旨此後不慮不足又慮或多矣○命大學士三寶來京入閤辦事調湖廣總督富勒渾為閩浙總督以署雲貴總督舒常為湖廣總督○命兵部侍郎曹文植充四庫全書館副總裁○丙辰吏部帶領京察一等內閣侍讀學士穆克登泰等五十員引見得旨穆克登泰善寶俱准其一等崇泰海廣富森覺羅吉慶邱廷澍德克精額查隆額雙保福瑞西精額索寧安廣泰官亮興麟覺羅德克濟那文麟寶諦宋銘王昇憲牛稔文翰圖伊都托銘椿齡員承寧巴星阿塘玠宗室書光宗室宜興宗室僧保佳

宗室書敬宗室祿康宗室慶岱宗室麟文宗室斐靈額覺羅祥鼎正寅齊克慎舒明伍靈阿恒亮保明查克當阿覺羅百善俱准其一等加一級策璘李昭俱准其於郎中任內一等加一級宗室達德宗室成惠俱著改為二等○丁巳諭軍機大臣等據車布登扎布奏前將軍巴圖等奏辦游牧一事並未私侵杜爾伯特土爾扈特烏梁海等地界等語所奏甚屬取巧乾隆二十六年成衮扎布等奏請

令扎哈沁烏梁海喀爾喀等踰阿爾台游牧耕種地畝外展卡座因飭安泰等議定於烏魯木齊較近之烏爾圖布拉克至濟木薩四處派兵設卡徹奈曼明安等十六卡移設蘇伯昂阿至烏拉克沁伯勒齊爾等處此但據卡座而言並未言及開展游牧豈有新得地方而不設立卡座之理如以設卡地方為即係喀爾喀地方豈日久尚將占據烏魯木齊乎杜爾伯特烏梁海係朕兵力所得乃喀爾

喀竟思以漸占據實屬負恩車布登扎布所奏反稱前有諭旨其情尤為可惡著嚴行申飭並將二十六年軍機大臣議摺鈔令閱看又據奏賽因諾顏部落因游牧不能容納而扎薩克圖汗部落之扎薩克等在賽因諾顏西北居住每過冬則外移戈壁以其地界較寬從前原有公貢楚克及扎薩克成衮扎布二旗在於烏里雅蘇台北崆圭地方及扎薩克圖汗部落南界吉齊格納洪郭爾阿濟爾

罕地方居住賽因諾顏因向扎薩克圖汗部落祈請欲令永遠讓居扎薩克圖汗謂其游牧亦不能容不肯給與因將二旗驅逐將軍瑚圖靈阿聞信後欲派司員履勘其境扎薩克圖汗齊旺巴勒齋又不令司員前往並令公貢楚克換領盟長印文扎薩克成衮扎布一旗則驅逐歸於舊游牧翁金地方等語是齊旺巴勒齋不法已極伊游牧果不能容即當聲明緣由呈報該將軍如將軍不為辦理

伊係盟長亦當報院轉奏乃並不出此公然將成衮扎布驅逐此與叛逆何異車布登扎布原摺即發交博清額閱看一併確查秉公具奏博清額俟辦理事畢務將齊旺巴勒齋帶來從重定罪至扎薩克成衮扎布究係何部落與何人相近與何人一輩亦查明遇便奏聞並傳諭車布登扎布知之○吏部帶領京察一等戶部郎中福參泰等七十四員引見得旨福參泰克星額富純評德鄭澂張翹舒濂景安吳元琪劉謹之程世淳遇昌劉文徽劉詔陞新住舒敏慶元伍靈阿果爾敏三音保德溥吳繼善覺羅景祿揚桑阿保住興成白鶴阿克棟阿薩炳阿玉慶釐景盛永和春貴鄂敏巴尼琿恒臨巴海豐仲泰昌誠福景福蘇楞額魏晉錫馬人龍陵雲巴彥寶福彰阿扎爾杭阿那靈阿泰富盛常文福慶蘇楞泰張鴻恩敦森布恩長佐江阿穆克音登額佛永和靜瑛琳覺羅德坤覺羅保寧明善

百慶喜成福興阿俱准其一等加一級德爾炳阿史夢琦准其於郎中任內一等加一級富祥准其於員外郎任內一等加一級尚安准其於筆帖式任內一等加一級○戊午吏部帶領京察一等刑部郎中景祿等九十二員引見得旨梁英佐准其一等景祿文光五格查克慎英善王士榮郎若伊陳朗保年覺羅長麟劉斌廣興韋馱保衡山五泰慶章竣亮德興富廉富明阿覺羅忠德傳爾嵩阿覺羅承福孟蘭保敦泰德興福峻周道隆陸蒼霖薩涵泰丁雲錦永安泰穆克登額恭安哈魯喀圖爾斌先福穆騰額英秀福來明安巴什富增額扎克三全福松筠索佳百興奎舒伸揚海福明崑巴蘭泰多托哩七德古木佈策隣錫麟定柱巴忠滿岱西成雷輪馬和龍福永富爾敏達琳那達齊正泰德奎德文興雲峻鳴達沖阿印憲曾五正額圖薩布需祿永昌保富色克興昌覺羅薩哈爾吉兆英朱

尊傑豐伸俱准其一等加一級胡翹元准其於御史任內一等加一級廣興顧葵准其於員外郎任內一等加一級景如柏准其於主事任內一等加一級策巴准其於筆帖式任內一等加一級覺羅富鼎文祿俱著改為二等○已未吏部帶領京察一等侍講彭冠等五十七員引見得旨彭冠黃良棟曹仁虎俱准其一等王懿修蕭際韶劉種之翁方綱曹城蔣士銓德昌善寶覺羅經德博良明福福均倭什洪額覺羅鳳泰多永武扎拉芬噶勒炳阿永良德齡海棟富精阿舒德善書芳阿伊轍布塘璜蘇隆阿同安林昌炎嵩齡武爾卿額汪錫魁揚桑阿克星額永信劉宗澍鶴齡海常白貴成寧富僧阿士魁赫保和倫諾敏觀慶謝芬訥清額楊以溪福喜納初之朴姚左垣隆興俱准其一等加一級德鄰著改為二等不必補行引見免其交部未經到班之僧額亦著改為二等○盛京戶部侍郎兼

管奉天府府尹全魁等奏遵查承德遼陽鐵嶺海城廣寧等五州縣平糶餘銀為數無幾未能撥給買補常平缺額報聞○庚申諭軍機大臣曰文綬覆奏籌辦川省私鹽偷漏往滇一事現在悉心籌酌專委明幹能事之員於川滇交界隘口會同該地方文武員弁設立卡隘分路盤查等語所辦甚好已於摺內批示令其實力妥辦矣川滇地界毗連自宜一律設卡嚴防方免鹽觔影射夾帶諸弊著傳諭福康安等務一體派委妥員於交界處所嚴密稽查即或非滇引運道所經而壤地毗連路徑可通者亦應加意防範務使私販絕跡於滇省行銷引運方有裨益文綬摺並鈔寄閱看○又諭據文綬奏特成額現帶官兵逼近賊巢番民已皆投順無難即日蒞事等語所辦甚妥三暗巴素不安分是以遣派官兵嚴辦如平定後仍可照常辦理但達賴喇嘛及駐藏大臣皆與彼處隔遠勢難管束

著傳諭特成額文綬等於此事辦竣後急派綠營官兵駐三暗巴就近要隘將彼處番民嚴加約束至伊等每歲應交達賴喇嘛備賞之項即交在彼駐劄官員收存轉送再令德爾格忒土司派一能事頭目協助彈壓如此辦理該番民等既可永享太平之福而達賴喇嘛亦易得備賞之項班第達現在軍營著特成額即當面曉諭俟伊回京時駐藏大臣額爾德尼諾們汗再諭知噶布倫等轉告達賴喇嘛知之○予朝鮮國在洋遭風漂入閩省難民李再晟等十二人撫卹資送回國如例○辛酉吏部等部議覆黑龍江將軍宗室永瑋奏稱齊齊哈爾城至呼倫貝爾所設十臺每臺當差兵十名俱由呼倫貝爾攜眷移駐索倫巴爾呼等不甚識字又無專管官員雖由呼倫貝爾派員輪查因非專責遇事不免草率完結查呼倫貝爾與俄羅斯連界地關重要向有額設筆帖式四員又有戴頂委

署筆帖式六員請將委署六員內裁汰二缺亦作為四缺遇有經制筆帖式缺出坐補其所裁二缺仍准戴虛頂食原錢糧令駐十臺兩界專管事務如果當差勤慎俟五年期滿遇有本旗驍騎校缺出與領催等一體揀選如陞授驍騎校仍於識字領催披甲內揀選委署筆帖式毋庸由呼倫貝爾出派旗員應如所請從之○命大學士公阿桂協辦大學士吏部尚書嵇璜教習庶吉士○以左都御史羅源漢為浙江鄉試正考官檢討溫常綬為副考官編修王懿修為江西鄉試正考官中書宋銘為副考官編修繆晉為湖北鄉試正考官中書姚天成為副考官○旌表守正捐軀山東嶧縣民孫大溺妻王氏○壬戌禮部議覆四川總督文綬等奏稱嘉定府屬之捷為縣學潼川府屬之中江縣學原額取進各八名綿州所屬之德陽縣學原額七名現在文風日盛人浮於額其嘉定府屬之樂山

縣學原額二十名潼川府屬之鹽亭縣學原額十二名綿州屬之梓潼縣學原額十名現在應試人少文風亦屬中平應將樂山縣學原額內酌減四名鹽亭梓潼二縣學原額內各酌減二名共減額八名即以四名撥入犍為縣學二名撥入中江縣學二名撥入德陽縣學以後均照此定額再夔州府學自上年撥庫增額缺十四名歸入石砭廳學其庫缺僅存二十名應將出貢年限改為二年一貢

均應如所請從之○江西巡撫郝碩奏江西各營操演所用黑鉛向在湖南購備現聞楚省產鉛不敷撥應據長寧縣報所屬土名大磑楊梅坑並附近之鐵絲壘雲屯尖等處甚有鉛苗無礙田園廬墓有商人揭兆慶呈請開採經贛南道往勘屬實應令試採半年俟礦砂旺盛設廠抽課報聞

大清高宗法天隆運至誠先覺體元立極敷文奮武孝慈神聖純皇帝實錄卷之一千一百八

大清高宗法天隆運至誠先覺體元立極敷文奮武孝慈神聖純皇帝實錄卷之一千一百九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 戶部

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級重誥內大臣戶部尚書鑲藍旗滿洲都統軍功紀錄五次

尋常紀錄十四次 臣德瑛經筵講官李少保工部尚書紀錄六次 臣曹振鏞等奉

敕修

乾隆四十五年庚子六月癸亥諭軍機大臣

等據特成額等奏攻燬三暗巴賊巢全獲安錯等首夥辦理情形一摺已於摺內批示此案始經發覺時特成額等即辦理過緩弱現在雖已全獲首夥各犯將安錯正法梟傳懸示而白馬四郎達罕綽吉二人均係同謀合夥之犯即不概予駢誅豈可復令歸巢辦理殊為錯謬著特成額等即傳諭該犯爾等本屬罪應正法今蒙大皇帝宥爾不死實為格外殊恩現在尚有傳諭之旨即當赴省聽

候俟其到成都時將該二犯嚴行監禁毋稍疎懈致令脫逃至三暗巴地方既有此次搶劫之事今經官兵勦捕完結自應派駐綠營官兵如現在金川等處安設流官之例稽查彈壓並令德爾格忒土司酌派大頭人協同管束其三暗巴番人止可聽其仍留小頭人零星分管地方毋許復有大頭人在彼管理事務方為妥善前次所降清字諭旨甚明特成額等接到即遵照查辦若如伊等所辦何

以完此案乎又此次辦理迅速竣事自因前此金川用兵未久德威所播該番等俱懷畏懾而將弁官兵亦皆係曾經出兵打仗之人是以各知奮勉易於集事其副將鄂輝參將張芝元遊擊納奇善尤為出力甚屬可嘉著特成額等酌量獎賞並隨便送部引見將此由六百里加緊發往並諭文綬知之○甲子諭軍機大臣等連日熱河雨水甚多昨據袁守伺奏報口內各屬俱得大雨但未將日內

永定河曾否長水及現在情形若何詳晰奏報甚為厯念著傳諭袁守伺即查明迅速具奏又向例直隸總督應赴長安城一帶駐劄防汛現當各處河道水勢長發之時袁守伺於何日起身前往亦未據奏及並著傳諭該督一併奏覆尋奏永定河水勢隨長隨消南岸水深三尺八寸北岸水深三尺二寸向例水小之年督臣於中伏內赴長安城駐劄巡防現定二十四日前往報聞○烏魯木齊都

統索諾木策凌奏上年各屬願往新疆墾種戶民三百一十三戶已分撥昌吉縣九十四戶綏來縣二百一十九戶派員酌擇水沃地廣處所勘定地畝搭蓋房屋並給與農具籽種口糧馬匹報聞○乙丑諭曰巴延三奏拏獲肆劫多案拒捕殺傷官兵之海洋盜犯胡友南等審擬分別斬決梟示一摺已批交三法司覈擬速奏海洋大盜雖常有未若此案盜犯於洋面肆行搶劫及至官兵往捕盜犯

韓廣石竟敢用鎗抵拒將把總譚瑞昌鎗傷墮海兵丁陳元秀等截傷落水淹溺情罪重大非尋常江洋大盜搶劫傷人者可比此等為首盜犯竟應從重問擬凌遲其親屬亦應發遣以昭懲儆至把總譚瑞昌兵丁陳元秀等奮勇捕賊受傷淹斃應照出兵陣亡例賞卹以示鼓勵著該督查明辦理至該犯等先在沙灣河面見有雙桅舊船即起意糾買修理偷越出口已屬人所共見而摺內復稱原

籍牌頭甲保無從覺察均毋庸議辦理尤為未協至失察私藏軍器及偷漏出口疎防文武各員雖據聲明照例查叅究係該督提等平時不能整飭弁兵實力巡查所致除此案拏獲各犯出力之弁兵仍著酌加獎賞外巴延三到任未久此次姑免其處分章紳著交部嚴加議處其未獲各犯著該督撫等嚴飭躡緝剋期務獲歸案嚴辦其沿海省分並著各該督撫等實力稽查遇有此等案件即照

此辦理。並將此通行各省沿海地方。出示曉諭。俾匪徒咸知警惕。而出力官兵有所勸勉。再此案係本年二三月間之事。且糾衆至八十七人之多。又復拒傷官兵。不法已極。何以李質穎署總督時。僅飭查拏。並不據實奏報。著李質穎明白回奏。○兵部議覆。密雲副都統宗室都爾嘉奏。稱蒙古佐領四十九遺缺。如按翼揀選補放。則本翼祇有防禦二員。請嗣後毋庸論翼。於蒙古八旗內揀選補授。應

如所請。從之。○丙寅。江西巡撫郝碩奏。遵查司庫平糶餘銀。歷經撥充京餉。及收養老民。借支生息外。現止收貯銀二萬六千二百一十七兩。應專留為撥補倉穀缺額之需。不得移充他用。報聞。○丁卯。諭軍機大臣等。據博清額奏。土謝圖汗車登多爾濟告稱。賽因諾顏部落。將伊部落游牧占據。前喀爾喀投誠時。

皇祖賞給游牧後於

皇考時。因畏準噶爾之逼。曾將游牧遷移。及乾隆二十年。朕平定準夷。復將舊地賞還。並未令其占據杜爾伯特烏梁海地方。今喀爾喀已將游牧展至蘇木卡座。復藉口牲畜蕃滋。又占據左翼部落甚屬不法。著傳諭博清額。秉公查辦。其占據土謝圖汗部落之事。係成衆扎布在時所為。抑係拉旺多爾濟錯謬之處。一併查明。據實奏聞。並於查明後。將何部落游牧。仍給何部落。勿使稍有侵占。○又諭

曰。李奉堯奏。閱過外海繒船水操情形。一摺。據稱各船行陣整齊。戲駛利便。鎗礮聯絡。施放噴筒。火箭。皆能有準等語。演習水操。一切俱能熟練。自屬妥善。但必須實力整飭。毋僅托諸空言。方有裨益。現據巴延三奏。粵東盜犯胡友南等。在洋面屢行肆劫。甚至糾衆至八十餘人。傷官拒捕。此皆督提等平時不能認真整頓所致。已降旨嚴行辦理。並傳諭沿海各省。留心整飭矣。江省雖係內地。但各

處海洋亦關緊要該督提務宜嚴飭弁兵認真操練於內外洋尤須加意巡緝務令匪徒歛跡俾洋面肅清乃為稱職將此諭令李奉堯知之○以戶部尚書和珅為正白旗領侍衛內大臣○戊辰諭所有李侍堯入官中一所房屋著賞給和珅作為十公主府第○諭軍機大臣等前因滇省採辦銅觔近年屢形竭蹶曾降旨傳諭福康安等將商人開採官銅全數交完後其所剩銅觔聽商賈流通貿易之處熟籌具奏此時諒已接奉矣本日復據舒常等奏該省行用錢文薄小蓋由奸民開鑪私鑄私銅易售官銅益難如額現飭地方官查拏治罪等語已於摺內批示著傳諭福康安等酌量該處情形妥協籌辦如有奸徒私鑄販賣務須實力查拏從重治罪又據奏除省城錢局親赴盤察其餘責成各道就近稽查等語各省鼓鑄錢文鑪座俱安設省城惟滇省則各府俱有鑪座此即私鑄弊源

鑪座散安各府稽查本難周密且私鑄必有私銷諸弊易於叢生何如照各省之例將滇省各府所有鑪座俱歸省城辦理稽查較易是否可行著福康安等悉心籌酌妥議具奏務使積弊永除銅政有裨舒常等摺著鈔寄閱看○又諭曰軍機大臣奏據原任大學士于敏中之孫于德裕稟稱伊堂叔于時和自于敏中歿後即挾制家產不令與聞於本年三月擁貲回籍復留族姪于錫榮及家人趙喜在京於六月初五日自海澱進城搶奪貢件業將趙喜呈送順天府在案又稱伊庶祖母抱養內姪張招官于時和欲令承祧于氏等語于時和於于敏中身後既有挾制伊姪把持家產情節今復先行回籍自必更有覬覦于敏中原籍貲財侵吞隱占之事著傳諭吳壇即親身前赴金壇將于時和所占于敏中所有原籍貲產逐一查明毋令伊家不肖族衆致有隱匿並查訊于時和如果有侵欺

鑪座散安各府稽查本難周密且私鑄必有私銷諸弊易於叢生何如照各省之例將滇省各府所有鑪座俱歸省城辦理稽查較易是否可行著福康安等悉心籌酌妥議具奏務使積弊永除銅政有裨舒常等摺著鈔寄閱看○又諭曰軍機大臣奏據原任大學士于敏中之孫于德裕稟稱伊堂叔于時和自于敏中歿後即挾制家產不令與聞於本年三月擁貲回籍復留族姪于錫榮及家人趙喜在京於六月初五日自海澱進城搶奪貢件業將趙喜呈送順天府在案又稱伊庶祖母抱養內姪張招官于時和欲令承祧于氏等語于時和於于敏中身後既有挾制伊姪把持家產情節今復先行回籍自必更有覬覦于敏中原籍貲財侵吞隱占之事著傳諭吳壇即親身前赴金壇將于時和所占于敏中所有原籍貲產逐一查明毋令伊家不肖族衆致有隱匿並查訊于時和如果有侵欺

族衆致有隱匿並查訊于時和如果有侵欺

家產及欲令張招官承祧于氏情事。即據實  
叅奏。交部從重治罪。于德裕原稟。並著發寄  
閱看。吳壇素稱曉事。如何分給于德裕之處。  
自能妥協辦理也。至于錫榮趙喜等。如何搶  
奪貢件。據稱業經呈明順天府查辦。著傳諭  
阿桂。英廉。即行嚴訊明確。辦理具奏。○湖廣  
總督富勒渾等奏。遵查湖北各屬乾隆三十  
五年賑缺未買之穀。積至四十八萬餘石。經  
前督臣吳達善等請撥司庫銀二十萬兩。分  
發各屬購買。又以糶價盈餘撥補。尚不敷銀  
二萬五千三百九十餘兩。借三十六年秋撥  
銀兩支給。復因平糶無多。正項久懸。又經前  
撫臣陳輝祖。於耗羨銀內。改撥歸款。現收貯  
司庫餘銀一千八百五十餘兩。尚不敷歸還  
耗羨之數。不能遽照閩省辦理。報聞。○己巳。  
以編修錢樾為陝西鄉試正考官。編修裴謙  
為副考官。內閣學士錢載。為江南鄉試正考  
官。編修戴均元。為副考官。○調福建臺灣鎮

總兵董果為海壇鎮總兵。以浙江瑞安協副  
將張繼勳。為臺灣鎮總兵。○補行乾隆四十  
三年大計。福建省罷軟官二員。年老官六員。  
有疾官五員。才力不及官五員。分別處分如  
例。○旌表逼嫁捐軀湖北黃陂縣民黃士沅  
妻高氏。○庚午遣官祭  
火神廟。○諭曰。特成額等奏。叅將張芝元素  
通番語。諳練番情。此次攻捕三暗巴賊。番安  
錯等首夥。實心出力。不避險難等語。張芝元  
著加恩賞給副將職銜。遇有相當缺出。酌量  
補用。以示獎勵。又據稱巴塘德爾格忒土司。  
派帶土兵之大頭目朗金多爾結。俄木三珠。  
二人。遵奉調度。深入賊境。招徠番眾。甚為出  
力等語。朗金多爾結。俄木三珠。俱著加恩賞  
給土守備職銜。並著賞戴花翎。○諭軍機大  
臣等。據陳輝祖奏。邱睢屬黃河。因上游水  
發。於六月十五。六七等日。水勢加長。誌椿上  
長至一丈三尺七寸。邱睢南岸大隄溜往南

趨更兼東北大風。河浪撞擊。水高隄頂。隨搶隨塌。人力難施。於十七日丑時。睢寧縣地方。郭家渡隄工。漫塌二十餘丈。水由沈家河入五湖。歸洪澤湖等語。現在曾否合龍。大溜未致奪河否。已於摺內批詢。此時薩載諒已馳赴工次。其郭家渡大隄。現被漫溢。曾否奪動大溜。最關緊要。朕心深為廕念。著傳諭薩載。即行查明奏覆。並會同陳輝祖。督率文武員弁。迅速搶護。立即合龍。毋令奪動溜頭。致再

有刷塌寬深之事。至陶莊一帶。今春經朕親臨閱視。令將北岸開寬。以備漲水暢流。著將現在一切情形。一併迅速由驛奏覆。將此由六百里加緊發往。並傳諭陳輝祖知之。○又諭。據特成額等奏。籌辦三暗巴江卡善後事宜。一摺。已批交軍機大臣。速行議覆矣。其摺內所稱。將三暗巴附近寨落。撥令該土司。及營官等。分為管束。至支巴。肯本。郭木。三處。即准該番衆所延之白馬汪結。及達罕。綽吉。白

馬四郎。在彼經理等語。所辦非是三暗巴賊番。既經官兵捕勒完結。自應如金川等處。安設流官之例。移駐綠營官兵。稽查彈壓。並令德爾格忒土司。酌派大頭人。協同管束。如三暗巴番人。止許留小頭人。零星分管地方。毋得仍留大頭人在彼。復致滋事。方為一勞永逸之計。節次所降諭旨。甚明。特成額等接到後。即應遵照辦理。若如特成額等所議。仍令各土司分管。則江卡一帶。經官兵勒定。而土

地仍屬之三暗巴之土司喇嘛。殊為非理。至欲令安設喇嘛經管。無論其人未必妥協。即或現在派來之喇嘛。尚屬可用。而該喇嘛或有事故。又安能必其更換者。均能妥協耶。所請斷不可行。又據稱。每歲有恩賞。已遮喇嘛銀二百四十兩。應給達罕。綽吉。并白馬汪吉。兩喇嘛查收。如遇夾塌。責令緝拏等語。更屬不成事體。從前江卡一帶。原係該土司地方。是以設有此項銀兩。今該處已經官兵勒

定歸入版圖設營分駐即遇有夾壩賊番官兵自應緝拏嚴辦並無須該喇嘛等出力之處何用復有賞需此項銀兩應行裁去非惜些須銀兩國家斷無買人捕盜之理至白馬四郎達罕綽吉三人係同謀濟惡之犯豈可轉令回巢聽該番衆迎奉并將賞需轉給收領前已降旨令將該二犯傳喚到省嚴行監禁著特成額即遵旨速行妥辦毋致該二犯聞信藏匿復滋事端又特成額另摺奏請陞

見一節其意以三暗巴之事業經辦竣是以回至成都奏請入覲但該處善後一切正須籌酌妥辦豈可遽離該省著特成額自行酌量如有必須親赴該處相機籌辦之事即親往辦理方為妥協所請陞見之處不必行將此由六百里加緊傳諭知之○軍機大臣等議覆成都將軍特成額等奏籌辦江卡地方善後事宜一江卡地方業經勘定自應酌派弁兵分防駐守從前察木多因控制西藏設

立游擊一員千把外委六員駐兵三百三十一名今西藏救寧已久無庸安設多兵應抽出兵一百名把總外委各一員撥歸江卡守備管理駐防彈壓一江卡既添兵防駐自宜相地築碉以資棲止一千總胡世傑熟練番情派令經理番地事宜移駐江卡營官東納錯截茶包致滋事端應徹帶回藏其江卡營官令郎卡多爾結充補一鑪廳米石起運在途自應分別遠近酌運收貯其江卡支剩米

麪無多即令該駐防守備收存以供支領均應如所請辦理至每歲賞銀遵例裁汰又三暗巴一帶已設守備各員分駐並令德爾格忒土司酌派大頭人協同管束其三暗巴番人止許留小頭人零星分管該將軍所請分派土司及令喇嘛經管之處均無庸議從之

○辛未諭朕惟歷代

寶璽所以展禮

神祇式彰

符命我國家承

天眷佑自

太祖

太宗創業盛京肇膺大寶逮我

世祖正位凝命奄有萬方我

聖祖六十一年篤祐延祚深仁淪浹我

皇考世宗勵精圖治繼序

前徽罔不欽崇

天道勤恤民隱夙夜勤求治理不敢康寧用克

協於

天心俾中外蒙和壹之休臣庶享昇平之福暨

於朕躬服嗣兢兢業業祈

天永命恒切於懷惟是

太廟尊藏

列朝寶冊金繩玉檢

靈輿式憑然以次第鐫造未免玉質大小長短

不能一律荷

天之休承

列祖

列宗之餘慶平伊犁定回部和闐良玉歲有恒

貢用是特命有司選良工卜吉日敬造

列朝寶冊一律從同以奉

太室念今年為朕七旬萬壽自古帝王受

天純佑

錫福延洪實無有過於朕者朕用是益不敢不

敬

天益不敢不勤民惟有朝乾夕惕思日孜孜以

敬迓億萬年無疆之

寶命所有換出

太廟尊藏

列朝寶冊敬諏吉日簡派皇子恭送盛京

太廟尊藏以昭

祖宗功德之成於萬代嗣後凡有舉行寶冊事

皆以是為例必為二分一奉

太廟一送盛京朕之此意欲我子孫世世知

天命之難諶敬

天勤民永存無疆之恤以保無疆之休可將此旨恭錄二通一存尚書房一存內閣敬承無斁欽哉特諭○調杭州將軍傅王為廣州將軍以正黃旗漢軍都統王進泰為杭州將軍○壬申以理藩院尚書傅清額為正黃旗漢軍都統○癸酉諭前曾降旨皇孫輩未得品級者俱賞戴紅絨結頂帽至曾孫輩數較遠停止戴用此指已往者而言今朕已見曾孫奕純踰二三年奕純婚娶後朕便得見元孫伊等皆育養宮中一時五代並見亦誠罕有此皆

上天垂庥伊古未有之盛瑞如曾元輩當朕在位時俱不得戴紅絨結頂帽又無品級朕心不忍且於體制未協嗣後凡在位時現有之曾元俱准戴用我大清億萬斯年皆當遵此將此繕寫二分分貯宗人府尚書房敬謹奉行○軍機大臣等議覆涼州副都統博成奏稱涼州城左右翼及莊浪八旗各設學舍由

兵丁內考取熟練清語三四人授為教習以訓年幼閒散餘丁三年期滿咨部陞用其膏火紙筆之費由鋪房租內撥給應如所請從之○甲戌旌表守正捐軀河南汝陽縣民徐甲女徐氏○乙亥吏部議覆廣西布政使朱椿奏稱士民告官之案定例彙入命盜月報冊內咨部統限四個月完結但告官之事不外刑名錢穀與雜案無異亦有牽涉命盜重案及貪贓枉法等事若非情急上控定係逞

刁妄瀆必須早得確情實則叅革嚴究虛則按擬反坐俱不容遲延日久今於正限滿日並不接扣二叅承審之員難保無瞻徇同官任意延擱請嗣後承審告官之案照例四個月完結如逾限不結照命盜雜案例接扣二叅如再不結即照易結不結例革職應如所請從之○以翰林院侍讀學士陸錫熊為光祿寺卿○以廣西新泰協副將郭元凱為河南南陽鎮總兵○丙子兩江總督蔭載等奏

江蘇吳縣地方向有公田一萬二千五百餘畝原係前明本地富民捐置其承種民戶除完納地漕等項銀米外歲收租息以為添補運漕之費迨入本朝民間此項租息久未完納乾隆三十一年經前撫臣明德據知縣介玉濤查出碑據奏將此項應徵餘租米二千二百二十七石遞年抵補吳縣逃亡無著錢糧歲餘米一千數百石留為該縣地方公用因此項餘租並非正賦不入報銷倘遇歉年

實錄卷一百九

元

悉照定額催徵亦不按照災分辦理以致歲有逋欠每遇恩旨亦從未援請蠲豁計自乾隆三十一年起至四十三年止共積欠銀一萬九百八十九兩有奇現在江省歷年災緩正項錢糧俱沐恩普行豁免此項公田餘租積欠應請一體恩蠲嗣後如遇歉收之年勘明災分照例蠲緩得旨允行○是月江蘇巡撫吳壇奏長江舊設救生船五十六隻又康熙四十七年奏准於京口輪雇漁船六隻每

船月給工食銀三兩當即買置丹陽縣民田五百畝名曰普生莊歲收租息除納正項錢糧外即以供添雇漁船及救人得生加賞之用嗣經前撫臣雅爾哈善奏裁救生船三十四隻祇存二十八隻分撥上元江寧江都丹徒儀徵江陰靖江山陽清河寶山等十縣京口僅存救生官船一隻漁船六隻不敷救濟查普生莊租息除動用外歲有盈餘請再添雇漁船四隻得旨嘉獎○陝甘總督勒爾謹

實錄卷一百九

辛

奏報通省雨水情形得旨其有應撫卹妥協為之母致小民失所

大清高宗法天隆運至誠先覺體元立極敷文奮武孝慈神聖純皇帝實錄卷之一千一百九

實錄卷一千一百九

至

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次 戶部

總裁官經筵講官太子太傅入華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 戶部尚書領侍衛內大臣戶部尚書領侍衛內大臣戶部尚書領侍衛內大臣

尋常紀錄十四次 臣德麟等謹奏 太子少保工部尚書紀錄六次 臣德麟等謹奏

較修

乾隆四十五年庚子秋七月丁丑朔享

太廟遣誠親王弘暢恭代行禮○諭曰孫士毅

著加恩賞給翰林院編修所有四庫全書處

進呈書籍著與紀昀陸錫熊陸費墀等一同

列名○諭軍機大臣等前據尚安奏覈擬李

侍堯罪名一摺甚屬非是尚安係藩司暫護

撫篆雅德到任在即此案自應聽雅德議覆

何該護撫急於具摺陳奏李侍堯雖於總督

任內負恩獲罪但伊以大學士管理總督事

務究屬朝廷大臣非兩司所當覈擬況尚安

所議不過仍照大學士九卿所擬辦理。其如閔鶚元、陳輝祖、自抒已見。以和坤原議為是者。能有幾人。尚安有何獨出之見。而迫不及待如此耶。昨李本亦由藩司護理巡撫。亦係照大學士九卿所擬奏覆。但伊本李侍堯族叔。意在避嫌。不得不為此奏。其是否出自本心。朕亦姑置勿論。至尚安由部院司員。不數年間。用至藩司。將來加恩遷擢。正未可量。伊祇當循分自勉。候朕加恩。豈可如此熱中欲速。竟思躡遷督撫乎。朕因尚安尚有出息。是以諄切訓諭。俾知益加謹飭。毋負成全至意。學黃檢榮柱等所為。將此傳諭知之。○又諭前曾傳諭吳壇。令其親身前往金壇。將于時和所占于敏中原籍貲財。逐一查明。毋令伊家不肖族衆隱匿。并查于時和。如果有侵欺家產。及欲令張招官承桃于氏情事。即令據實叅奏。交部從重治罪。所降諭旨甚明。該撫自能仰體朕意。妥協查辦。茲據大學士阿桂

等查奏。于時和留京族姪于錫榮。并家人趙喜供稱。于時和回南起身前。先後裝車九輛。約有大小箱四十餘隻等語。又據于錫榮供。于時和在京時。曾向說將來要令張招官改姓于氏承桃。是于時和覬覦財產。托病擁貲回南屬實。請旨將于時和革職等語。于時和著革職。于錫榮、趙喜等。交部監禁。再行查訊。外著將此鈔寄吳壇閱看。將摺內所取供詞情節。逐一研訊。于時和如何擁貲回籍。覬覦財產。捏病告假各緣由。秉公詳悉確審。定擬具奏。至于時和所有侵占于敏中財物。著吳壇分晰開單進呈。仍酌量分給于德裕銀二萬兩。以資養贍。將此密諭吳壇。一一遵照妥辦。并令由驛奏覆。○山西巡撫喀寧阿。遵旨覆奏。晉省常平倉穀。從前積存平糶盈餘銀兩。曾於雍正八年題准。增買穀石入倉。嗣後各屬糶穀盈餘。隨時解司。報撥充餉。並無存留。而通省倉貯充足。亦無需動項買補。再

查各屬尚有存貯歷年出糶溢額穀價。如有必須買補之處。可於此項動支報聞。○戊寅諭。據明善奏。請將科布多地方。扎死商民王思理之民人王廷相。引不論金及他物。並絞監候律。照例送刑部辦理等語。明善將此等兇犯。擬送京城刑部辦理。雖相沿舊例。但道路遙遠。倘致兔脫。復煩緝捕。反覺於事無益。如伊犁新疆等處。遇有此等案件。皆於本處辦理。科布多地方雖小。亦應送烏里雅蘇台

將軍處辦理。該處現有部員在彼。遇有此等案件。即可照伊犁新疆等處。在本地審訊定罪。著將該犯王廷相。即由科布多委派官員解送烏里雅蘇台將軍處。除照明善所引律擬絞監候外。該將軍查覈。即入秋審彙奏。嗣後烏里雅蘇台科布多。遇有此等案件。俱照此辦理。著為令。○諭軍機大臣等。前於六月二十三日。據陳輝祖奏。睢寧地方郭家渡壩工。於六月十七日。漫塌二十餘丈。水由沈家

河入五湖。歸洪澤湖等語。當即傳諭薩載。會同陳輝祖。查明曾否奪動大溜。並督率弁員。加緊搶護。迅即合龍。將情形速行覆奏。嗣薩載奏到。亦於摺內批詢。現屆七月初旬。距前奏已及十日。何以未據該督等續行奏聞。朕心深為廕念。著傳諭薩載。陳輝祖。即將現在是否已經合龍情形。迅速由驛奏覆。○又諭曰。文綬奏。拏獲膽對所屬擦馬所。焚殺麻塘寺喇嘛各兇犯一摺。辦理仍屬姑息。據稱兇

犯阿雍。達爾結二名。已據該土司將首級獻出等語。阿雍達爾結二犯。係此案為首兇番。情罪最為重大。必須拏獲到案。明正典刑。梟示各番。方足以肅刑章。而懲兇暴。乃僅據該土司等。獻出首級二顆。並無無人認識真偽。亦無人目睹殺死。且該土司。因何將此二犯自行殺戮。又既肯將首級獻出。何不即生擒獻送。種種疑竇。全未根究的確。遽信以為實。豈不思從前慶復辦理膽對刦殺之案。先據奏

稱班滾業經焚斃。既班滾復出。慶復因此獲罪正法。文綬寧不知之。該番等情性狡詐。最難輕信。設使阿雍等二犯尚在。文綬其能當此重戾乎。再噶馬林津一犯。既據審明係焚燒寺屋。捆縛喇嘛正犯。自應一面與特成額會銜具奏。一面即行正法。梟示。又何必俟特成額回省覆訊。再行辦理。以致兇番久稽顯戮。至四郎達結。阿撒二犯。雖訊係被誘隨行。並未入寺。但既經隨往。即係助惡之犯。豈可

輕縱該二犯。著即發遣雲南烟瘴地方。以示懲儆。川省地界各番。全在該督等駕馭得宜。俾各番衆畏威懾服。邊徼始得永遠敕寧。從前兩金川之事。即由阿爾泰因循姑息。辦理軟弱。釀成事端。致用兵數年。始行勦定。今文綬辦理此等案件。又復似此姑息。不當以阿爾泰為前車之鑒耶。文綬著傳旨嚴行申飭。○又諭。本日吳壇奏到睢寧河工漫口情形。一摺。據稱。當即兼程前往。親勘籌辦。俾被水

人民。不致失所等語。睢寧漫口。前經陳輝祖奏報時。已傳諭薩載。令其前往工所。會辦堵築合龍各事宜。此時吳壇現有交辦于時和。侵占財產一案。自應一手迅速妥辦。不必亟亟前往工所。至籌辦水災賑卹諸務。此時薩載可以先行料理。吳壇俟于時和一案查辦完結。再往未遲。至大學士于敏中所遺財產。若伊生前營私不法之事。已顯露。即將伊正法。查抄入官。皆所應得。今既完名而沒。朕亦

惟始終保全。以存大體。本無庸究治其生前之罪。至于敏中財產若干。昨已傳諭吳壇。令其開列清單具奏。並酌分銀二三萬兩。給予德裕。以資養贍。即于德裕亦本非的確敏中之孫。在伊得此。以奉其祀。亦足矣。其餘存貲財。即係于時和與張氏侵占隱匿。應行歸公之件。且亦非得之以正者。吳壇到金壇時。即行詳查該縣有無應行辦理水利。隄田。城子義學等地方公務。即將此項撥辦。酌派妥

員經理其事。覈實摺奏報銷。俾于敏中所存遺產。仍為本籍地方正用。不致他人侵飽私索。亦甚平允也。其奏摺內。亦無庸聲稱入官字樣。以副朕始終保全至意。將此傳諭吳壇知之。○旌表守正捐軀江蘇溧陽縣民虞彥清妻陳氏。○己卯。諭軍機大臣等。工部奏駁南河淮揚淮徐二道屬各工奏銷銀兩一摺。已依議行矣。河工關係民生。如遇緊要工程。朕從不靳惜帑項。南河歲搶各工。前經高斌

奏定。每年奏銷。總在四十萬上下。當不出此範圍。非新工搶修可比。但乾隆四十四年。豫省上游漫決。南河各屬黃水斷流。並無緊要搶修工程。朕所知也。其題銷銀兩。應有節省。何以較用銀最多。年分轉有浮溢。其中顯有侵冒情弊。陳輝祖係新任南河總督。著傳諭薩載。會同陳輝祖。將四十四年分該兩道屬奏銷銀兩。確實查覈。毋令不肖承辦之員。得以從中侵冒。任意開報。務使各工銀兩實用。

實銷。另行造冊具奏。將此傳諭薩載。陳輝祖知之。工部摺著發寄閱看。○又諭。前因刑部議覆直隸省民婦王氏毆死伊媳一案。朕閱其情節。可惡。特交刑部存記。本年雖遇停勾。秋審時。仍具摺聲請辦理。此外如有似此者。並著於本內聲明。一體遵辦。今日披閱刑部事件。於題覆李湖審擬歐精一等。搶刦穀石。奪犯毆差一案。問擬絞候。并夾片聲明秋審時。另摺具奏。而於議覆鄭大進審擬岳添貴

等。奪犯傷差一案。刑部固有紅簽。遂擬以絞決。所辦殊覺過當。用紅簽之意。原恐該部照例議歸今年停勾之意也。此案著交刑部。仍遵前旨。歸今年一例辦理。並將此傳諭知之。○又諭。昨據福康安奏。到滇省銅鹽等務。大概情形之摺。因令刑部堂官。發交李侍堯閱看。訊其何以辦理如此錯謬。今據訊稱。雲南銅觔。緣官價不敷成本。商丁多有偷漏。兼有私鑄。以致辦理竭蹶。採訪輿論。總以加價始

可辦理當經悉心籌畫若動項加增則私商亦必增價是私商散之各處零星就賣民間不覺增價之昂奸商仍可獲利而於帑項徒至虛糜究與銅政無益等語福康安現在滇省整飭銅務著將李侍堯所供情節鈔寄閱看令其留心經理俾一切張弛務於銅政實有裨益將此諭令知之○吏部奏請本年散館庶吉士內有奉旨歸班銓選之毛鳳儀寶汝翼原係候補中書請照現任七品以下京

官中式進士歸班仍留原任之例歸中書班選用停其銓選知縣嗣後此等人員並請照此辦理得旨毛鳳儀寶汝翼俱准其仍留中書班銓選○庚辰諭曰廣東提督員缺緊要寶璜尚屬結實現在丁憂將屆服闋著即前往署理廣東提督印務俟服滿後再行實授○辛巳諭前據陳輝祖奏邛崃廳屬黃河因上游水發於六月十五六等日水勢加長邛崃南岸溜往南趨更兼東北大風河浪撞擊

水高隄頂隨搶隨塌人力難施於十七日丑時睢寧縣郭家渡隄工漫溢二十餘丈自陳輝祖奏聞後至今十餘日朕日夜望信茲薩載等奏稱該處漫口現已塌定約計口門寬九十餘丈並掣動大溜十之七八等語黃河自前年豫省漫決堵築年餘未能集事今春朕親蒞陶莊默禱

河祠仰荷

天佑神助遂得合龍以此朕心稍慰而南河諸

臣亦未免稍存大意以為數年之內黃河可冀安瀾一切巡防不無稍懈以致此次復有漫溢之事薩載陳輝祖均難辭咎即李奉翰雖經新調河東但伊前在南河究未能先事豫防亦難諉卸薩載陳輝祖李奉翰均著交部議處其該管文武員弁並著查明叅奏其漫決口門薩載等即督率道將廳營上緊堵築剋期合龍以慰廑念至被水各屬村莊雖據稱先期豫備並未受累但田廬猝被淹浸

殊可憫惻。著該督撫逐細查明。照例撫卹。毋致一夫失所。副朕軫念災黎至意。○諭軍機大臣等。據薩載等查奏。睢寧縣郭家渡漫口。現已塌定。測量口門。寬九十七丈。水深一丈八九尺。至二丈一二尺。掣動大溜十之七八。其漫溢之水。三股分流下注。統歸洪澤湖。伊來工時。經過淮揚一帶。查看運河。及高寶諸河。水勢俱小。洪澤湖底水亦小。高堰誌椿存水八尺餘。均可容納。已飭淮揚河庫二道。督率廳員。將清口東西壩。大加拆展。如湖水再長。即將山盱五壩。酌開一兩壩。騰空湖面。容納漫水。其高寶迤下歸江之金灣等閘壩。亦督令先後開放。使運河之水。暢洩歸江。高寶之水。次第入運。不使驟漲為患等語。所奏籌辦情形。尚屬妥協。但奏到過於遲緩。至此次漫溢。實非意料所及。或因今年春間。朕親謁陶莊神祠。籲禱祈佑。儀封漫口。即於次日合龍。因

此朕心稍慰。而督臣河臣。及文武道將以下。均以儀封甫經合龍。下游自可無恙。不復慮及伏秋汛漲。仍有意外之慮。因此稍存自滿。此即我君臣之過。自後惟當益加敬慎。并明降諭旨。將該督等。交部議處。至所稱開放金灣等閘壩。使運河水暢洩歸江。并大加拆展清口東西兩壩。若湖水再長。即將山盱五壩。酌開一兩壩。騰空湖面。亦不得不如此辦理。但下河關係民田。設遇盛漲。亦當慎之又慎。不得已始歸放下河。總之少放一分。則下河少受一分之累。薩載等當慎重妥辦。又據稱各廳存工舊料。仍須酌留。以備搶護。斷難多撥。必俟新料登場。趲辦運工。再行進埽堵築。此時先將附近各工舊料酌撥。并收買民間舊料。裹護壩頭。築做壩臺等語。計徐屬新料登場。最早亦須七月內。如此則趲運做埽。竟須至八月。後將何時合龍。然亦不得不為各工留存料物。以為保護之計。不可稍有遲緩。

亦不得草率從事。至漫口經過地方。雖據稱計程不過九十餘里。但田廬猝被淹浸。殊堪憫惻。著該督撫。逐細查明。照例撫卹。毋致一夫失所。一面督率道將員弁。趕做壩臺。豫為購料。上緊趕辦。一俟料物到工。即速晝夜進埽。剋期合龍。總以盡人事為主。不可稍存觀望。將來秋汛。更宜慎防各工。不得稍有疎懈。再查閱漫工圖內。有峯山四閘。可以洩水歸孟山湖。若至將次合龍以前。可否開放此閘。

或將毛城鋪酌量開放。以期金門水勢稍殺。易於合龍之處。並著交薩載等。臨期詳慎妥酌辦理具奏。近日工次情形若何。並著由驛速奏。尋奏。郭家渡上游之毛城鋪蘇家山。及邳睢廳汎內峯山頭。二。三。四閘。並天然閘。已全行開放。而黃河來源旺盛。水勢未見消落。又邳睢廳屬北岸之宋家灣七壩埽工。復報墊塌。該工料物。已節次用完。現飛飭將弁府州。趕緊收買舊料。搶築險工。其下游洪湖因

宣洩不及。將清口東西壩。儘數拆展。以資暢洩。得旨。實在無善策。祇可盡人力以祈

天佑耳。勉力撫卹災民。以補過可也。○免江蘇青浦縣。乾隆四十一年分。坍沒占廢民田。學田。額賦有差。○壬午。四川總督文綬等奏。永寧營額兵四百五十名。除駐防塘汛。調派臺藏。及裁撥新疆外。存營兵止七十七名。又赤水營額兵一百九十名。存營兵止四十三名。該二營俱當滇黔孔道。差遣不敷。查永寧所

轄之建武營額兵三百七十七名。實存營一百七十名。該營地僻差簡。兵數尚屬寬餘。請以二十名撥添永寧。二十名撥添赤水。報聞。○甲申。旌表守正捐軀河南南臨縣民宋更銀妻陳氏。○乙酉。諭曰。楊魁奏。光山縣知縣胡元琢。於縣民黃偕。呈首黃佐等。演習邪教一案。率以枷責了事。並未通詳根究。知州朱家濂。擊獲丁致才。梅俱賢等。雖經詳究擬流。於呈出書本。並不即時呈繳。均屬寬縱。請將

朱家濂胡元琢革審等語。朕向來於失察邪教案件。該部照例議處者。無不加恩從寬。令其留任。此中外所共知者。乃朱家濂等業經審明。丁致才等邪教屬實。並不徹底根究。將呈出書本。隨案呈繳。顯係有心規避處分。情節尤為可惡。朱家濂胡元琢均著革職。交該撫提集案內人犯。將有無賄縱別情。據實一併嚴審。定擬具奏。其該犯丁致才等所編妄誕書本。著盡行搜查。繳進銷燬。○諭軍機大

臣等。前日據薩載等奏。睢寧縣郭家渡漫口。摺到後。迄今又閱數日。未據續有奏到之摺。未知日內該漫工處所情形若何。朕心深為軫念。前據奏稱。新料俟刈獲登場。方可辦運。而各工所貯舊料。又均須存留防險。未便動撥等語。但郭家渡現當漫決。掣動大溜。必須迅速搶堵合龍。茲已屆七月中旬。在地稽料。當可陸續登場。著傳諭薩載等。即飭查明各處稽料。究竟何時可以刈割。一俟登場。即派

委員弁分頭及早趨運。以便即日開工。加緊堵築。再前據奏稱。掣動大溜。已至七八分。正河尚未至斷流等語。計該處自六月十七日漫決。迄今已越兩旬。該督等應即相度形勢。是否可以就近將溜頭設法引至陶莊新河。俾漸次順軌暢注之處。似於漫口下埽搶築事宜。較為易為力。著將此由六百里發往。諭令迅速籌辦。仍將日內河水情形。并作何辦理之處。一併由驛速行奏覆。以慰朕念。尋奏。郭

家渡漫口。外高內窪。現在大溜直注口門。從南岸上首挑溜。既無著力之處。而北岸嫩灘亦未能抽挑引渠。查漫口緊靠正河。若於進埽後堵築過半。則溜頭可逐漸逼歸正河。勢近而順。合龍亦易。批。先從西壩進埽如何。又稱。工次需料。早經發價。各州縣莊戶定辦。今早種秫稻。漸次成熟。先行催割。俟集有成數。即開工進埽。趨堵。批。是勉為之。又稱。宋家灣險工業已鞏固。豐碭銅沛三廳各工。亦搶護

平穩。大河水勢近日有消無長。下游分洩甚暢。批以手加額。覽之又稱。四十四年分。淮揚淮徐兩道屬奏銷銀項。現遵旨確實查覈。俟查明後另行具奏。批。汝等當盡心現辦要工。此非所急。徐徐詳查可也。○河南巡撫楊魁。遵旨覆奏。豫省常平倉穀。向年平糶盈餘銀兩。節經奉文解部。現存剩無多。請嗣後留貯司道二庫。遇各州縣倉穀缺額。即撥此項買補。報聞。○湖北巡撫鄭大進奏。稱各省鼓鑄

向撥點鉛應用。嗣因黔省供運不敷。令粵西酌撥鉛觔接濟。今查漢口節年運到點鉛。合計已有五百五十餘萬觔。足供各省二三年採買之需。而舊存粵鉛一百二十萬餘觔。各省委員。以其色低質濁。不願採買。久貯在局。歸價無期。且散寄民房。亦難監驗。請按照時價出售。酌留六十萬觔備用。俟日後點鉛暢運。存積益多。再行變價報撥。得旨。覽。○免江蘇靖江縣乾隆四十四年分新冊折實平田

五千四百十八頃二十四畝。額賦有差。○丙戌。

孝懿仁皇后忌辰。遣官祭。

景陵。○諭曰。李侍堯雖經獲罪。其先世李永芳已願俱著有勲績。其在盛京所遺之房產。及老園地畝。俱著加恩賞給。免其入官。○諭軍機大臣曰。李奉翰奏。儀封壩工鞏固情形。一摺。據稱。挑水壩為全河大溜擁注之處。從前水勢極深。三月以來。日漸停淤。灘已高出水

面。若再長水一二次。即可淤平。其潘家場引溝。日刷寬深。行溜迅暢。儀封極險壩工。已化為平。日益鞏固等語。覽奏深為欣慰。惟日增統惕。不敢以此稍存大意。可將原摺鈔寄阿桂閱看。至所進圖內。止簽貼新淤嫩灘。及引溝形勢。而於從前儀封漫口合龍處。所未經貼出。殊不明晰。著將原圖并發交阿桂看明。從前漫工合龍處所。是否在順黃頭壩地面。抑係在二壩及十堡壩工之處。覈對詳悉。簽

貼明確。隨報覆奏。○丁亥。江西巡撫郝碩奏。江西各營需用黑鉛。向在湖南購備。而該省產鉛不旺。日後亦難撥應。今查贛州府長寧縣所屬大磜。揚梅坑。鐵絲壘。雲屯尖等處。現據勘明。產有鉛砂。請准試採半年。如果礦砂旺盛。即照例設廠抽課報聞。○以編修于鼎為河南鄉試正考官。戶部主事陳本忠為副考官。太僕寺卿趙佑為山東鄉試正考官。編修羅修源為副考官。御史陳桂森為山西鄉試正考官。編修王嘉曾為副考官。○旌表守正捐軀直隸磁州民董鎖子妻周氏。河南郊縣民趙廣女趙氏。○戊子。諭軍機大臣等。現在熱河夜雨連日。雖勢不甚大。於禾稼亦無妨礙。而西南一帶。雲氣濃厚。恐保定等處。並宣化一帶。雨水較大。此日永定河正當防汛之時。雖前據袁守侗奏。長安城一帶。並不長水。永定河大溜。悉由中泓。循軌安流。隄工穩固等語。但迄今又聞一句。未知近日永定河

水勢。是否不致漲盛。大溜是否仍由中泓。朕心深為廕念。著傳諭袁守侗。即將該處現在情形。迅速據實覆奏。尋奏。本月十一十二等日。連得大雨。河水驟長一尺。旋即消落。現在底水止深三尺九寸。大溜仍由中泓。不至漲溢。得旨覽奏稍慰。○又諭曰。薩載等奏。督辦睢寧縣郭家渡漫口情形一摺。據稱。該工自漫溢之後。上游連報長水。又兼七月初二日大雨如注。水勢盛長。溜亦湍急。徐城誌橋。長水至一丈四尺餘寸。徐州兩廳屬工程處處危險。已將毛城鋪蘇家山。及峯山各閘。并上游之天然閘。俱全行啟放。以冀水落工平。民心安帖等語。所辦俱是。披閱摺內情形。兩廳各工。既處處緊要。則徐城一帶。亦勢在危險。尤宜上緊防護。茲又越數日。未知該處水勢曾否消落。各工隄岸能否穩固。朕心深為懸切。著傳諭薩載等。迅速查明。據實奏覆。以慰廕念。又據稱。洪湖東岸桃源地方。舊有祥符

五瑞二閘原係分洩上游歸仁隄一帶來水歸入黃河之路等語。既係歷來洩水之處。現今水勢既盛。自應一併開放。以資宣洩。惟桃源縣似應在洪湖之西。今據稱在桃源東岸。是否另有村集。名為桃源。抑即指桃源縣治而言。又歸仁隄亦似應在洪湖之西。摺內所敘俱未明晰。著即詳細繪圖貼說具奏。至該處漫口寬至九十餘丈。而現在物料又尚未齊全。看來合龍竟須至八月二十日以外。現

屈七月中旬各屬稻料當可陸續刈割。一俟登場該督等務即派委員弁分頭趕運齊集。剋日開工。上緊晝夜堵築。俾得及早合龍。將此傳諭問之。仍速即奏來。尋奏桃源縣在洪湖之西。該縣境內祥符五瑞二閘亦在洪湖之西。臣等前稱洪湖東岸實屬錯誤。謹再繪圖呈覽。批。如何。洪湖大概情形。日在朕心。豈有不知之理。又稱黃河水勢漸已消落。各廳工程亦搶護穩固。惟中河廳屬因上游運河

水長。楊莊口門宣洩不及。今重運糧艘已全數入山東境北。上開放鹽河閘溜仍湍急。臣等現將李家莊新河尾啟放。使分洩入黃。俟水勢稍落。仍行堵閉。至所需新稻。民間已次第刈獲。現派委員弁分頭催趲起運。以便開工進埽。剋日合龍。得旨覽奏欣慰。○又諭據吳璽奏前往金壇查辦于時和盜占于敏中原籍資產一案。內稱據于時和家人杜喜等供稱。于時和於本年四月抵家。住於伊父于

文駿家。於六月二十八日進京。其自京運回貨物另貯一室。自行封鎖。俱不許伊父開看。亦無銀兩衣服。給與伊父。當將封鎖之房開看。內有銀四萬六千兩。并如意銅鏡畫片各件。及田房契券。是于時和吞占于敏中資產。已屬顯然。至伊父于文駿房內。俱係破舊衣服。並無絲毫銀兩等語。是于時和串通張氏。隱占于敏中資產。帶回銀兩衣物。不許伊父開看。亦無絲毫給與伊父于文駿。其負恩昧

良不孝已極。伊父于文駿之物。不必查辦。仍行給予。至于時和前已降旨革職。茲據吳壇奏稱。派員沿途截拏。將來途次拏獲。確審定案時。竟將于時和發往伊犁充當苦差。以為不孝昧良者戒。至太監蘇姓。據稱尚未到金壇。已知會許墅揚州淮安各關。留心截拏。將來拏獲時。訊明押帶財物屬實。亦應解交內務府。著總管內務府大臣嚴行治罪。以為太監托病告歸。生事不法者戒。又據另摺內開。于敏中自治新房一所。用銀一萬兩。別有花園。現作義學。並未修葺等語。朕從前即風聞該縣有為于敏中益造花園之事。何未留心究出。並聞有道員為之料理。此大有關係吏治。吳壇不應放過此事。原籍地方官。於本地顯宦。竟敢公然為之修葺房屋花園。此於吏治官方所關甚大。設使江蘇紳士。現任山東道府州縣者。即於吳壇原籍。為之修葺房屋可乎。此事吳壇何以不行查明。據實具奏。乃

佯為不知。欲輕描淡寫。希圖完案。實屬不知朕恩舊習未改。吳壇著傳旨申飭。至另摺所稱于敏中前後置買義田一千一百餘畝。用價八千餘兩。養贍貧族。報官有案。此係義舉。不宜動。其餘分給于德裕貲財二三萬兩。及于時和侵占銀兩。留充該地方公用之處。俱著遵照節次所降諭旨。妥協辦理。將此傳諭知之。○己丑諭曰。申保於賽哩木。沙雅爾兩處所遺阿奇木伯克員缺。並未揀人奏請補授。阿奇木乃統理一城事務之人。一經缺出。即當揀人奏請補授。如內地府道。朕尚知其賢否。有記名者。若回部伯克之賢否。朕安得知之。向來阿奇木缺出。該城大臣。於衆伯克內揀選數人。奏請補授。其中開註誰優。朕即將誰補授。回部各城駐防大臣。當擇其好者保奏。不可稍有瞻徇。若將不肖之人。瞻徇妄保。日久滋事。較內地妄保道府者。加倍治罪。著將此通諭駐防烏什。葉爾羌。喀什噶爾。哈

喇沙爾庫車。哈密等大臣。遵旨辦理。再從前申保奏請補放沙雅爾阿奇木伯克。開列回部伯克名單內。尚有伯克六名。若從此內補放二人。又不知其賢否何如。將此單一併交申保等。揀定請旨。○庚寅。諭據伊勒圖等奏稱。自京告假前往伊犁。接取家眷之候補筆帖式菩薩保。因伊母年近七旬。身有殘疾。呈懇留伊犁養親。請留在伊犁。以驍騎校補用等語。菩薩保乃駐防兵丁。因在回疆辦事。陞

實錄卷一百一

庚

用部院筆帖式。年滿來京之時。如果伊母年邁。理合聲明。即從彼回伊犁候用。今乃於來京引見。告假接取家眷之後。始行具呈。顯係欲圖奏留伊犁。占該處筆帖式之缺。行走數年。復可得主事同知。此等惡習。斷不可長。將此飭諭回疆將軍大臣等。遇有筆帖式年滿來京之時。問明情願來京。即咨送來京。以筆帖式補用。倘有親老。或生計窮乏。不能自備資斧來京等情。即著回伊犁。以驍騎校補用。

母任來京後。始以親老具呈。著為令。○又諭。據伊勒圖等奏稱。金川潰散兵丁。發遣湖北。改發伊犁。給厄魯特為奴之沈登魁。於四月初三日脫逃。逾數日自行投回。請將沈登魁枷號。從重懲責。如再脫逃。即行正法等語。所辦殊屬錯誤。沈登魁前在軍營。不隨將軍大臣行走。私自逃竄。彼時即應正法。曾蒙寬宥。改發伊犁為奴。此乃格外之恩。理合畏罪安居。今乃私自脫逃。情甚可惡。即當一面正法。

實錄卷一百一

庚

一面奏聞。今伊勒圖等僅擬枷號。甚屬姑息。不曉事體。沈登魁脫逃數日。因迷於山徑。無路可逃。始自行投回。此等情節。伊勒圖何意思不到。著傳旨嚴行申飭。沈登魁著即行正法。示眾。嗣後如有此等逃犯。於捕獲時。即行正法。毋得姑息。○辛卯。中元節。遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢

實錄卷一百一

十一

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加一級軍功紀錄一次直隸

總裁官經筵講官太子太傅大學士文淵閣領閣事稽察欽奉 上諭事件處管理刑部戶部主事

世襲騎都尉軍功加九級隨帶加二級又加二級直隸內大臣戶部尚書兼藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十五年庚子七月癸巳杜爾伯特親

王車凌烏巴什土爾扈特貝子沙喇扣肯及

年班回部葉爾羌三品阿奇木伯克貝子色

提巴爾第等十一人喀什噶爾四品噶西納

齊伯克愛達爾之子烏魯克等三人入覲○

諭軍機大臣曰勒爾謹奏到甘省得雨情形

一摺殊未明晰摺內稱五月二十四至六月初一二得雨於各處之農田均為有益又稱

除被有偏災之皋蘭等十三廳州縣現在履

畝查勘等語及閱得兩分寸單內所開皋蘭

等十五州縣得雨三四五寸。而會寧等十八處得雨二三寸。皋蘭等處既得雨四五寸。則雨澤尚不為過小。何以摺內稱為被有偏災。而會寧等處僅得雨二三寸。實未深透。轉稱可冀其有收。更屬難解。且其所稱十三州縣亦未分晰開明某州某縣。以甘肅通省各州縣計之。究屬十分之幾。著傳諭勒爾謹即行查明分晰開單呈覽。並將何處實在被有偏災分數及現在作何撫卹緣由迅速據實奏

覆。尋奉臣前奏被有偏災之皋蘭等十三縣。州縣內皋蘭。金縣。狄道。河州。平番。涇州。六處自四月初旬至五月中旬雨澤稀少。雖於五月二十後得雨三四寸。而夏禾黃萎者不能復望結實。是以仍須履畝查勘。至會寧等十八處除伏羌。寧遠。鎮番。秦安。徽縣。禮縣。兩當。成縣。高臺。安西。玉門。敦煌十二處陸續得雨可冀有收外。其會寧。安定。洮州。廳。華亭。武威。肅州。六處續據道府勘明成災。查甘屬共七

十三廳州縣。本年奏報成災者皋蘭。金縣。狄道。河州。平番。涇州。會寧。安定。洮州。廳。華亭。武威。肅州。隴西。靖遠。山丹。西寧。文縣。漳縣。共十八廳州縣。以通省州縣計之。不過十分之二。其各州縣境中又止一隅。以通省戶口地畝計之。尚不及十分之一。應行撫卹事宜。已飭地方官妥協辦理。報聞。○旌表守正捐軀河南泌陽縣民宋學女宋氏。山西虞鄉縣民韓維葉妻侯氏。守正被戕。湖北公安縣民周道

鳴聘妻葉氏。貴州荔波縣苗民阿禮妻阿氏。○甲午。金川木坪宣慰司嘉勒燦囊康。及土司土舍頭目等四十四人入覲。○丙申。諭軍機大臣等。前據袁守侗奏。覆永定河一帶。立秋前後得雨情形。及水勢平穩。工程鞏固。緣由。迄今又越數日。而熱河於十七。八。九等日。雨水頗多。遙望雲氣。似從西北而來。恐長安城上游雨勢較大。未知近日永定河水。是否不致盛漲。工程是否安穩。朕心深為廕念。著

傳諭袁守侗。即將該處現在情形若何。迅速由驛奏覆。○旌表守正捐軀直隸安肅縣民高托妻王氏。守正被戕。江西萍鄉縣民羅受易妻彭氏。○丁酉。班禪額爾德尼自後藏入覲。

上御依清曠殿召見。賜坐慰問。賜茶。○戊戌。諭據袁守侗奏。永定河因本月十七。八。九等日。上游各處大雨。河水長發。幾與隄平。隨同道廳等。分頭搶護。詎水勢益漲。盧溝橋西岸。漫溢出槽。北頭工水過隄。頂洶湧異常。人力難施。衝寬七十餘丈。由良鄉縣屬前官營。散溢求賢村減河。仍歸黃花店鳳河等語。永定河因上游連日大雨。河水盛漲。人力難施。漫溢隄工。亦屬無可如何。著該督即董率文武員弁。上緊堵築。以期迅速合龍。至漫口下游各處。猝被水漫。恐民田廬舍。不無傷損。著即派委妥員。分頭確勘。如有被淹傷損之處。即查明實力撫卹。毋致一夫失所。以副朕軫念災

黎至意。○又諭曰。六阿哥之子綿聰。病故。伊福晉係三寶之女。尚在未婚。即來持服。實屬可嘉。滿洲大學士之女。如此守志。固理所當然。但綿聰並無子嗣。情殊可憫。著加恩以綿恩次子。給綿聰為嗣。將此旨寄與英廉轉傳。諭綿聰福晉知之。○己亥。諭。昨據諾穆親奏。七月十三日。有趙姓太監。牽羊進城。自稱係綿億府中官用羊隻。不肯納稅。反將書吏毆打。撕毀告示。阿桂遣家人說情。私行完結等語。綿億業經來至熱河。其府中太監。如此滋事。阿桂係總諧達。且為綿億福晉之祖父。聞此情節。即應先行具奏。乃反使家人代為關說。實屬錯謬。著傳諭弘暢。弘曉。英廉等。將應訊人犯。嚴行審辦。並將諾穆親原摺。鈔寄阿桂閱看。令其明白回奏。○諭軍機大臣曰。袁守侗奏。永定河因上游各處大雨。河水長發。盧溝橋西岸。漫溢出槽。北頭工水過隄。頂洶寬七十餘丈。由良鄉縣屬前官營。散溢求賢

村減河。仍歸黃花店鳳河等語。覽奏深為厯念。然此亦無可如何。惟有趕緊堵築。以期安流順軌。無礙田廬。查閱圖內。河身自頭工至六工。原係歸入鳳河。今漫口處歸入減河。仍歸黃花店鳳河等處。自應設法挑溜。使大溜仍歸正河。一面上緊堵築。趕進埽箇。永定河來源不大。此時驟長之水。想晴霽數日。即可消落。合龍自易為力。著傳諭袁守侗。督率員弁。竭力趕辦。其有成災者。妥加撫卹。毋致一

夫失所。該處有此漫工。袁守侗須晝夜在工督催。不宜舍此而來。至所請交部議處之處。將來勘明成災分數。自應題本。於疏內照例聲敘。此時毋庸亟請交部也。尋奏。臣督率道廳等。將漫口兩頭壩臺。上緊趕築。並設法挑溜。引河仍歸正河。俾得及早合龍。至漫水經過地方。現在委員查勘。如有成災者。妥加撫卹。得旨。覽奏俱悉。近又復有陣雨。不知彼處如何。甚厯念。速奏來。又奏永定河一帶。於二

十四日。得陣雨一次。未久即止。河水僅長三寸。並無妨礙。得旨。覽。○江蘇巡撫吳壇奏。臣於追獲于時和到案時。即將應行質問之親戚家人。一併詳細研訊。所有前在蘇州金壇。查獲現銀五萬餘兩。及器物衣服等項。悉係于敏中遺賫。于時和乘其身故。侵占屬實。臣遵旨酌給于德裕兄弟田房衣物。計可值銀三萬餘兩。以資其養贍。當差餘留為地方公用。查金壇地居腹裏。距運河將及百里。每年

所徵漕糧。不能到次兌運。由小河運送丹陽交兌。河身窄狹。從未疏濬。一遇水淺。浮送維艱。再由金壇之三里橋迤西。河道尚可通行數十里。至句容地方。有分水脊陸路一段。不能通舟。過此則係上元縣屬之三岔河。西通秦淮河。直達江寧府城。但陸路計七十餘里。人夫挑運物件。一日不能往還。是以商民向不由此河行走。臣於五月內。親履察勘。時當水勢充滿。見水路不通者。止三四十里。若就

現有河形。加以挑濬。則陸路無多。商民往來。儘可盤壩而過。請將于時和所占于敏中銀五萬七千餘兩。即作挑濬金壇上下漕河。及向容以西河道之用。不敷。另行籌款辦理。得旨。好。知道了。又奏于時和係于敏中堂姪。其父于文駿。曾與于敏中同嗣于枋為子。受于敏中教養多年。又為捐官入仕。恩義已深。乃於于敏中故後。輒與張氏串謀。據貨回籍。又欲以異姓之張招官。改嗣于氏。實屬負義昧

良。請將于時和發往伊犁充當苦差。得旨。該部議奏。○諭軍機大臣曰。吳壇奏查辦于時和侵占于敏中貨產一摺。所辦甚是。夾片所稱。請將于時和侵占于敏中名下銀五萬七千餘兩。留為金壇開河之用。所辦亦好。均於摺內批示。至另奏請將于時和定擬充發伊犁一摺。所有聲敘于時和罪狀。尚未允妥。于時和身受于敏中教養成。人為之捐官入仕。恩義已深。乃敢占其貨產。圖歸己橐。並欲令

張招官改嗣于氏。已屬毫無天良。且將所占財物。運回家後。全行另貯一室。惟交家人收管。不許伊父開看。其銀兩衣服。亦絲毫。不。分給伊父。其昧良不孝。實為于時和此案緊要情罪。何以摺內並不聲敘。業令軍機大臣將此意添改入摺發鈔。並著傳諭吳壇知之。○又諭曰。特成額奏。審辦三暗巴焚劫麻塘寺一案。番犯將同行之色楞達結阿撒二犯。照例發給明正土司為奴一摺。所辦又屬錯

誤。色楞達結阿撒二犯。雖未同噶馬林津等入寺焚殺。但既被誘同行。即為同惡相濟。係此案為從之犯。自應從重問擬。發往廣西等省烟瘴地方。方足以示懲儆。乃特成額等。僅將該二犯發明正土司管束。辦理實屬寬縱。特成額大縱。著傳旨嚴行申飭。其色楞達結等二犯。著另行定擬具奏。○刑部議覆。山西巡撫喀寧阿奏稱。山西大同朔平寧武前因安置軍流人犯過多。改發平定忻代沁保德。

五州屬安置。近查人犯壅積。覓食維艱。且恐稽察難周。脫逃滋事。請將改發五州屬軍流。暫停分發。仍照道里表原發府分酌撥安置。應如所請。報聞。○庚子。

上御萬樹園大幄次。賜班禪額爾德尼。及扈從王公。大臣。蒙古王公。貝勒。額駙。台吉。杜爾伯特親王。車凌烏巴什。土爾扈特貝子。沙喇扣肯。及回部阿奇木伯克。貝子。色提巴爾第等十一人。喀什噶爾四品噶匝納齊伯克。愛達

爾之子烏魯克等三人。金川木坪宣慰司嘉勒傑囊康等四十四人。宴賞。賚冠服金銀緞匹有差。○兵部奏。營衛各官。於屬員有錢糧盜案。考覈賢否之責。如係兒女姻親。例令官小者迴避。然專指結親在前。陞任在後者而言。若現任上司屬員。彼此結親。則難保無規避之弊。請嗣後同在一省之上司屬員。概不得於現任內結親。違者。照違令律議處。從之。○辛丑。杜爾伯特汗瑪克蘇爾扎布等四人。

土爾扈特郡王色楞等二人。入覲。

上御卷阿勝境召見。並同班禪額爾德尼。及扈從王公。大臣。蒙古王公。貝勒。額駙。台吉。杜爾伯特親王。車凌烏巴什。土爾扈特貝子。沙喇扣肯。及回部阿奇木伯克。貝子。色提巴爾第等十一人。喀什噶爾四品噶匝納齊伯克。愛達爾之子烏魯克等三人。金川木坪宣慰司嘉勒傑囊康等四十四人。賜食。○諭軍機大臣等。熱河一帶。自夏秋來。雨水霑足。秋收田

禾。可望豐稔。而南望雲氣。頗覺濃厚。廣遠恐口內各地方。得雨較大。低窪地畝。或有成災處所。朕心深為軫念。著傳諭素守伺。即行派委妥員。於雨水較多各州縣。確行履勘。其低窪處所。是否成災。合計通省內。約有十分之幾。即行具奏。照例撫卹。該督務董率各屬。詳晰確勘。據實奏報。毋致稍有諱飾。至永定河目下情形。若何。現在是否已經堵築完竣。並著迅速履奏。尋奏直隸一百五十一州縣。

今稟報被水者三十一處計有十分之二。已委員分勘。已未成災地畝酌籌賑卹蠲緩事宜。不敢諱飾。至永定河隄工。東壩水勢湍激。尚不能下大埽。西壩仍用軟鑲。臣親督員弁趕辦。一面挑挖引河導溜歸槽。俾得及早堵築完竣。得旨知道了。究於何時可合龍。○又諭據李奉翰奏。豫東黃河交秋以後。節據上游各處稟報發水。本月十八日。曹縣安陵汛地方。因連日晝夜大雨。長水益盛。蔡家莊一帶隄工漫溢二處。各二十餘丈。又考城縣五堡地方。同日亦平漫四十餘丈。均離大河尚遠。未致掣動大溜等語。黃河上游發水。致平漫過隄。亦屬無可如何。幸未掣動大溜。堵築自當較易。且現屆處暑。盛漲諒可日就消退。著傳諭李奉翰。即派委員弁分頭購集料物。並董率文武上緊堵築。以期河流順軌。毋致漫水淹浸田廬。設有淹浸處。速通知楊魁。妥為撫卹。照例辦理。至該督奏請交議之處。此

時且無庸辦理。俟漫口堵合後。具本題奏。時照例聲請。將此傳諭知之。並著將現在該處情形若何。及作何辦理之處。迅速由驛據實覆奏。尋奏安陵汛漫口二處業經掛淤斷流。現在趕補原隄。可即日完竣。考城五堡漫口。灘內西首溝槽一道。水勢稍深。亦經堵閉結實。先於溝口趕築挑水壩。河水倒漾入溝之勢。較前稍緩。一面趲築攔水壩。料物源源到工。足敷應用。約計八月初十前後。即可堵竣。得旨覽奏稍慰。○壬寅。烏梁海散秩大臣伊素特等三人入覲。上御卷阿勝境召見。並同扈從王公大臣。蒙古王公貝勒額駙台吉杜爾伯特汗瑪克蘇爾扎布等五人。土爾扈特郡王色楞等三人。及同部阿奇木伯克貝子色提巴爾第等十一人。喀什噶爾四品噶西納齊伯克愛達爾之子烏魯克等三人。金川木坪宣慰司嘉勒燂囊康等四十四人。賜食。至乙巳皆如之。○諭

軍機大臣等。前因永定河北頭工漫水過隄。衝寬七十餘丈。曾諭令袁守侗督率屬員趕緊堵築。以期剋日合龍。昨復經傳旨詢問。令將現在各處工程。是否完竣之處。迅速具奏。諒袁守侗俱經接奉。何以尚未據奏覆。朕心深為廕念。著傳諭袁守侗。即將該處現在水勢情形。若何。是否成災。其漫口曾否堵築完竣。由驛速行覆奏。尋奏水勢情形。臣已節次奏報。現在東西兩壩已築成四十餘丈。引溝亦挑挖八百餘丈。計有得半工程。臣晝夜嚴催。期於次月初十日內合龍。得旨好。勉為之。但不可欲速。以致工不堅固也。○又諭曰。國泰奏東省汶河。因今年雨水過多。水勢陡長。七月十七日。又值大雨。東平州戴村壩民埝。被水衝漫。流入大清河。民田廬舍。均無妨礙。現在督飭道府廳州。修築民埝。加椿培厚。以期鞏固等語。所辦均屬妥協。但閱進呈圖內。所畫汶水流入大清河之處。殊未明晰。據貼

說內稱。大清河由東平州。經東阿等州縣。至利津縣入海。計長六百餘里。自屬該處大河。而圖內所繪大清河。並無來源。僅汶河戴壩分流一股。遂如河源。豈有六百餘里之大河。如此而已。著傳諭國泰。即另行詳晰繪圖。將大清河從何發源之處。貼說呈覽。仍將該處現辦情形。據實奏聞。尋奏大清河上游來源。即係汶河。古時汶水。至東平之戴村。即北流。與大清河會合入海。自明人導汶濟運。始於戴村築壩。使汶水西南流。至分水口入運。如汶水漲溢。則聽其由壩上分洩。入大清河。使運河不至漲漫。而大清河下游。兼受蘆泉浪溪。八里堂。三空橋。五空橋。錦河。柳木溝。沙河。中川。豐齊。漂水。消水。減水。土河。等十四河之水。是以蜿蜒六百餘里。成為大河。至汶河漫口。趕緊鑲築。現止有口門十餘丈。四五日內即可完工。得旨覽。○又諭。據吳壇奏。江蘇糧道章攀桂。請將本身妻室。應得封典。貤封兄

嫂一摺。照例原可准行。但前次傳諭吳壇有金壇縣為于敏中蓋造花園之事。並聞有道員為之料理。此事聞即係章攀桂所為。則伊本身尚應治罪。未便遽准馳封。著將此傳諭吳壇。俟審明後再奏。○軍機大臣等議覆吉林將軍和隆武奏稱。三姓地方。原立官莊十三處。每歲納穀三千石入倉。積至三萬石。為應貯定數。除供給雜項口糧米石外。餘穀二千餘石。於青黃不接之時。糶與兵丁。甚有裨

益。但現在新駐寧古塔。及三姓地方。貢納貂皮人等。二千三百餘戶。均需賞給口糧。原糶穀石不敷。請增設官莊五處。自明年為始。每丁令其交穀三十石。共收穀一千五百石。以資接濟兵丁口糧。應如所請。交該副都統明葵派員妥協辦理。從之。○湖南巡撫劉墉遵旨覆奏。湖南通省常平倉穀。現在並無缺額。而歷年平糶盈餘銀。實存二萬八千餘兩。將來按年續收。漸有增多。如遇常平缺額之時。

即將此項撥給。以充買補之需。其各屬倉廩朽壞者。仍請於此項內。動支興修。報聞。○以貴州布政使李本為貴州巡撫。○癸卯。諭據薩載奏。江西鄱湖營都司朱文元。於上年冬月推陞遊擊。嗣經調取來江南考驗。茲據南昌鎮張兆璠稱。該員半載以來。齒牙脫落。精力衰頹。請勒令休致。查該都司患病衰頹。該鎮並不早為查察。直待調驗。始請勒休。請將推陞都司朱文元。勒令休致。不早揭報之南

昌鎮總兵張兆璠。交部嚴加議處等語。所奏甚是。張兆璠。於朕春間南巡時。隨營當差。尚屬奮勉。是以加恩賞給花翎。但專閫大員。稽察營伍。是其專責。從前因部推營員。年齒衰邁。該管上司。不早為查察。直待推陞。始行劾奏。曾經降旨通行申飭。乃張兆璠。於朱文元衰頹患病之處。仍不早行參揭。至該督調驗。始請勒休。殊屬怠玩。若總鎮等置營伍於不問。而惟以奔走獻勤為事。誰則不能。張兆璠

著革去花翎。仍交部嚴加議處。朱文元。即著革職。以為綠營哀庸懲儆者戒。餘著該部議奏。○兩江總督薩載等奏。洪澤湖自高堰武家墩起。至山盱蔣家壩止。凡石工卑矮段落。應行加高。其磚工均改用石料。但工段綿長。若同時興修。不但購運石料維艱。且工程亦易草率。擬將已經朽壞。應先拆改磚工。及正當湖心卑矮處。應加石工。並隄身卑薄。加高幫戢之土工。均列為急修。即於本年購料動

辦。至磚工內。雖間有虧朽。而根腳尚未搖動。及卑矮石工之不甚犯風者。列為次修。留於明年動辦。其餘應行改石。尚未朽壞之磚工。及石工稍矮。應一律加高者。統俟後年修砌。臣等俟開工後。督同各道查催。得旨。好。知道了。尋諭軍機大臣曰。薩載等奏辦堰盱二廳。加高改建石工。酌量緩急。分作三年辦理。情形一摺。所辦好。已於摺內批示。薩載等務即督飭各員。認真修砌。以期工程堅固。俾得永

資捍衛。至披閱圖內。洪澤湖水。由張福口。天然。張家莊。裴家場。太平等。五處引河。歸入清口。上年及今年湖水漲盛。清口暢注。各該處引河。自宜汕刷較前益加深通。何以外間每有洪澤湖引河淤淺之說。若引河果淤。清口又如何暢出。即嵇璜今春亦有添設船隻。疏濬湖底之奏。其引河是否果有淺淤。該督等摺內既未奏及。而圖內貼說亦未明晰。即如太平河。今年朕經閱時。又實無水。已於圖內

圈出。著發交薩載等。將各該處每年是否尚有淤淺之處。詳悉據實奏聞。並著將現在睢寧漫口水勢。及辦理工程情形若何。一併速行覆奏。尋奏。張福口等五道引河。從前黃水倒漾時。每有淤墊。節經挑濬。又兼近年湖水漲盛。大展清口。暢洩入海。各引河汕刷益深。至太平引河河頭。自

聖駕閱視後。臣等已將淺窄處。逐一挑濬。總之當湖水漲發時。引河已在水底。原不專藉其

分洩。及水落歸槽。始由引河洩出。惟於霜降水落後。察看情形。酌量挑濬。自不致有淤阻之虞。其睢寧漫工。現在另摺具奏。報聞。○以左副都御史孫永清。為貴州布政使。○以湖廣督標中軍副將托賓泰。為直隸宣化鎮總兵。○甲辰。諭曰。諾穆親奏。綿億之太監。帶領羊隻進城。不肯納稅。反將書吏等毆打。撕破告示。阿桂差人說情。私行完結等語。當經降旨。令阿桂明白回奏。茲據奏稱。差人說情之處。實有其事。殊屬非是。阿桂在軍機行走多年。朕辦理庶務。伊所深知。豈遇此等事件。朕能曲為寬宥耶。伊係滿洲首輔。為綿億福晉之祖父。何可如此瞻徇。阿桂應得公爵。及寶石頂。雙眼花翎。四團龍褂。金黃帶。本應徹回。但伊於籌辦金川一事。頗著勞績。朕念此施恩。不從重治罪。著罰公俸十年。並不必在總詣達上行走。○廣東巡撫李湖。遵旨覆奏。粵東各屬常平倉穀。並無缺額。無需動項採買。

所有積存平糶盈餘銀。俟數至十萬兩以上。除酌留一萬兩。備撥買補不敷外。餘報部充餉。下部知之。○乙巳。諭據申保等奏。庫車之阿奇木。伊什罕員缺。擬定人員。奏請補授等語。著照所請。庫車三品阿奇木伯克員缺。以沙雅爾之三品阿奇木伯克穆喇特伯格調補。沙雅爾三品阿奇木伯克員缺。以葉爾羌之四品噶匝納齊伯克摩羅鄂圖克補授。庫車所遺伊什罕伯克員缺。著葉爾羌所屬英額奇盤山舒克蘇之五品小阿奇木額依穆爾補授。前申保等但以庫車沙雅爾所出員缺具奏。並未揀選人員。奏請補授。該處各城伯克優劣。朕何由知。著交申保等。嗣後各城伯克缺出。即擬定人員。奏請補授。○諭軍機大臣等。本日李國梁奏。沅州熟坪汛。及武岡州汛。會龍九團等處地方。於五月十九等日。大雨。山水陡發。衝塌汛房田畝。并民居共二百餘間。淹斃男婦九十名口。並淹浸淤田三

百餘畝等語。前據劉墉奏報。武岡州等處。雨後發水。有衝坍營房民居。並漂溺人口之事。現在查明給發銀兩。修葺埋葬。其被淹地畝。酌借籽種一摺。業經批發。此時諒已接到。何未續行明白速奏。救災濟民之事。不可延緩也。著再傳諭劉墉。務行詳悉查明各處被災確實戶口。照例撫卹。其被淹地畝。有可以補種。應借籽種者。即行及時借給。該撫務宜督率屬員。實心妥辦。俾各均霑實惠。以副朕軫

念災黎至意。仍著將如何撫卹情形。速行覆奏。尋奏。被災各處。前已查明照例撫卹。淹傷地畝。酌借籽種工本。今復委員覆勘。續查出被淹人口房屋田地。俱補行撫卹借給。本年各屬秋成大稔。此等被水民戶。已淹田畝。尚可補種有收。且各有未淹之田。收成合計九分。民間不虞拮据。報聞。○丙午。諭。前次普免天下錢糧。曾將廣東省廣韶等府州屬。應徵官租。及屯田曠軍餘羨等項銀錢米石。及應

徵學租銀兩。蠲免十分之一。今普免直省正供。本年值該省輪免之期。著加恩仍照上次。將應徵官租等項。蠲免十分之一。俾邊海農民。均霑愷澤。該部遵諭速行。○是月。欽差工部侍郎德成等奏。奉天海城縣。巨流河。二處城工。原估裏皮包築灰土。今查該二處土性。浮面純實。下帶沙性。難以築打。請改用山石。較為堅固。約計工價。亦有減無增。得旨。知道。○直隸布政使黃檢奏。臣自熱河進口。

遵旨查明沿途水勢。事竣回省。於經過地方。留心察看。大路水退。無礙行旅。所報被水各州縣。通飭上緊疏消。並委員確勘被淹輕重情形。臣擬於八月初。馳赴熱河。恭祝萬壽。得旨。覽。何必又來。即回省辦一切賑卹事宜。豈少汝一人行禮乎。又奏。臣因沿途照料。班禪額爾德尼。蒙賞翎枝。恭摺謝恩。得旨。不可自滿高興。○兩江總督薩載等奏。堵築郭家渡漫工。因溜勢日趨東壩。遵旨先從西壩

進埽實為萬安。得旨。此不特安固。亦逼流北行之一策也。○江南提督李奉堯奏。江省洋面緊要。向來蘇松狼山兩鎮分汛督巡。各營將備。接替輪巡。均知上緊。茲復咨行兩鎮。及沿海各營。加意整飭。仍密委明幹弁員。偵查探緝。現屆秋季水操。俟調集兵船。即詣吳淞洋面督飭訓練。並親自嚴查。以為鎮將表率。得旨。實力行之。毋為虛言。○安徽巡撫閔鶚元奏。本年睢寧漫口。黃水旁注泗州。該州西

北東北一帶被水之赤山等堡貧民。請無分極次。先行撫卹一月口糧。再勘明成災輕重。照例給賑。其東南鄉洪澤湖邊之古浪集等堡。被水甚輕。毋庸撫卹。俟水勢大定。確勘成災與否。分別辦理。至宿州靈璧被水村堡。下游驟難消退。應查明災分給賑。得旨。著照所請。速行。該部知道。○浙江巡撫李質穎奏。仁和海寧二州縣海塘。當大雨時行之後。上游山水旺發。潮溜湍激。逼近范家埠一帶。所有

署字號柴工之尾。護沙日漸刷卸。請自署字號至宿字號。接築柴塘一百丈。又藏字號篁工迤西柴塘之外。護沙亦多刷卸。請自藏字號至往字號。接築竹篁六十五丈。得旨。知道了。安固為之。又奏。調字號起至藏字號止。柴塘長一百五十三丈零。前經總督三寶請建竹篁。以為外護。嗣因水大溜急。不能施工。柴塘亦有挫折。臣屢勘情形。須用大樁簽釘入土。方有關鍵。即飭員趕辦。每根約長三丈。內外不等。於柴塘邊口內。密排深釘。將底柴壓實。隨於上面加鑲柴薪。不致挫折。俟秋汛一過。再為鑲砌竹篁。得旨。好了。○署廣東提督寶璽具摺謝恩。兼請陛見。得旨。不必來。即赴新任。一切海防拏賊。勉力為之。以章紳為戒也。

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十一

實錄卷之一千一百十一

十一

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十二

纂修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務兵部刑部吏部都察院經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書領侍衛內大臣稽察欽奉 上諭事件處管理

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十五年庚子八月丁未朔祭

先師孔子遣大學士英廉行禮諭軍機大

臣等據勒爾謹奏本年哈薩克售賣牲畜較

往年倍多現在庫貯各色綢緞雖尚有八十

餘匹而哈薩克最喜之荊花絹所存無幾應

趕辦荊花絹二十匹以資應用請敕下江寧

蘇州杭州織造即為織辦解送以便轉解備

用等語著傳諭穆騰額全德西德即照勒爾

謹單開所需絹匹如式分辨務使質地厚實

顏色鮮明不得稍有麤糙輕減致滋挑駁并

著遵委妥員小心護解毋致稍有微汚所有勒爾謹原摺清單一併鈔寄○戊申祭大社

大稷遣誠親王弘暢恭代行禮○

上御卷阿勝境賜扈從王公大臣蒙古王公貝勒額駙台吉杜爾伯特汗瑪克蘇爾扎布等五人土爾扈特郡王色楞等三人烏梁海散秩大臣伊素特等三人回部郡王霍集斯等及阿奇木伯克貝子色提巴爾第等十一人

喀什噶爾四品噶匝納齊伯克愛達爾之子烏魯克等三人金川木坪宣慰司嘉勒燦業康等四十四人食至辛亥皆如之○諭據德隆條奏各省府州縣坐省家人宜嚴行革除一款已批交該部議奏此等名目自屬外省惡習各該督撫必當嚴行查禁以肅政紀何聽其所為以自恣傲也又聞外省督撫兩司等遇有慶典年節宴會及欽差過境往往開宴演戲俱令首府首縣承辦此事尤屬不可

督撫等間有酬酢宴會自所不免但總應出貲自辦何得派委屬員承值以致該府縣等藉端要結甚且賠累滋擾民間於吏治官方大有關係該督撫等務宜肅除積習正已率屬將派委屬員承值筵席等事概行禁革以期大法小廉使屬員無所藉口倘不實力革除仍前派委或科道叅奏一經發覺朕必重治其罪嗣後著將有無此事各督撫於年終奏聞將此通諭中外知之○又諭據德隆奏黔省書院學宮從前止領過御製詩文初集二集未經請領全集請將御製詩文續刻全集頒賜書院等語所奏殊可不必該省前經頒賜御製詩文初集二集多士等如果留心學問已可領畧大概若弃度高閣即再發續刻全部雖多亦奚以為又何必為此漬請況德隆以糧道兼署藩臬兩司各任內自有應辦政務即書院膳田等事亦應聽巡撫藩司辦理何庸急於陳奏德隆係內務府舉人出

身。乃欲強附文人。為此沽名俗儒之舉。實屬鄙陋。又另摺條奏。調補州縣。應令兩司會同糧道。聯銜覈詳一款。州縣調補。係督撫兩司專責。糧道何得干與。德隆雖現署司篆。糧道即其本任。今自請聯銜覈詳。顯欲侵兩司之權。尤屬乖謬。德隆係德保之弟。朕看其人。尚有出息。是以加恩擢用道員。乃甫署兩司。即干譽侵權。妄行陳奏。若不知悛改。必當重治其罪。德隆著傳旨嚴行申飭。至所奏題達案件。改擬罪名。應請隨本聲敘。及各府州縣坐省家人。並嚴行革除兩條。尚屬可行。已批交該部議奏。朕不肯以人廢言也。將此傳諭中外。知之以為道員等署兩司者之戒。○又諭曰。福康安奏。同知穆靖安。都司英偉。俱係共曾祖堂兄。例應迴避。已飭令交代。給咨赴部候補一摺。已批交該部知道。外省微員。赴部另行銓補。資斧頗為不易。至滇省則離京更遠。且旗人親族甚多。若微末員弁。以共曾祖

之兄弟。概令迴避。未免轉滋煩擾。該督係朕簡用之人。自能秉公約束屬員。不致稍有瞻徇。除穆靖安。英偉。二員。業經該督照例給咨。應聽其赴部候補。嗣後各省。如有以此微末旗員。親誼較疎者。止須奏明存案。俱毋庸令其迴避。○吏部議覆。四川總督文綬。廣西巡撫姚成烈。各奏稱。督撫等衙門。需買物件。原俱設有買辦。先期按值給價。不容絲毫剋扣。短欠。應將交首縣。中軍。買辦之處。永行禁止。並嚴定處分。均應如所請。嗣後各省督撫等。倘有仍交首縣。中軍。購買物件者。即將該督撫等。照違制杖一百。私罪律。革職。首縣。中軍。照溺職例。革職。其有勒令屬員買送物件。及短發價值。或屬員藉此短領。繳回。逢迎餽送者。請旨革職治罪。此外各省將軍。提鎮。都統。副都統。藩臬。以下各官。不遵功令者。亦照此例辦理。從之。○已酉。諭軍機大臣等。步軍統領衙門奏。四川資州鹽商宋柳安呈控。向來

資州與富順縣兩處鹽餉俱運至納谿縣江門鎮銷售。豫備接濟貴州鹽餉短少之用。嗣經犍為縣加添鹽引。運至永寧縣售賣。以致江門鎮鹽引不行。查江津縣狗腳灣地方。路通貴州。若從此運販。可獲重利。願加添鹽引一千三十五張。每年多交稅銀等語。前因川省私鹽偷漏往滇。以致滇省官鹽壅滯。節經降旨。令將川滇二省鹽餉實力調劑。並令於交界處所。設人嚴查防範。今宋柳安乃欲於狗腳灣地方。運販加引。以備貴州接濟鹽餉之用。而貴州即係通滇大路。其意不過欲借此偷漏雲南。以便其營私射利之計。况狗腳灣地方。加引運賣。則犍為運往永寧之鹽。又將何以售銷。是其意專在肥己。而於鹽政。終無實在裨益。著傳諭文綬等。即將宋柳安所呈各情節。詳悉查明。據實覆奏。如宋柳安圖利營私屬實。即行按例治罪。以示懲儆。將此並諭福康安。李本知之。尋福康安等奏。查得

宋柳安本名宋可達。原係川省鹽道革書。改名頂充商缺。屢圖爭奪行黔水引。經川商汪超羣等先後具控。審明詳結。宋柳安又赴黔省。呈請加增川鹽水引。改由川屬江津縣狗腳灣。運至黔屬仁懷縣兩路口。設店售銷。經藩司查明兩路口距茅臺村甚近。該處現係川商承運川鹽行銷。未便任其撓越。致妨正引。當即飭縣查拘宋柳安。解籍收管。今該商復隱匿案情。赴京呈控。妄圖罔利。應請交四川督臣。將該犯從重治罪。至兩路口。雖距滇境尚遠。但恐有奸民偷漏私售。現飭嚴密緝查。以期滇引暢銷。下部知之。○庚戌。諭軍機大臣曰。楊魁奏查勘考城漫水被淹地方情形一摺。據稱漫口下注之水。由沙河渦河下達亳州。經過寧陵商邱鹿邑永城各縣境。被淹村莊。淹損秋禾之處。考城較重。商邱次之。寧陵儀封較輕。鹿邑永城係平鋪之水。一漫而過。旋即消退等語。上年儀考漫工。甫經合

龍而考城五堡近復有漫溢之事。各該處民人連歲被災甚為可憫。尤當加意撫卹。著傳諭楊魁務宜董率屬員查明被災戶口分別輕重實力撫綏。務俾災黎均霑實惠。毋致一夫失所。○又諭據楊魁奏查辦漫水經過地方情形摺內稱七月二十一日江南碭山縣三岔河口衝開。水由永城南下。經過田禾亦有淹浸。現在確查撫卹等語。前據薩載等奏豐碭等廳稟報該處於七月十八日長水起

至二十二日。徐城誌椿長至一丈四尺八寸。各工危險。旋即搶護平穩。於二十三日復消落六寸。察看河心平窪。由此可望漸消等語。而於碭山縣河口衝開之處未據奏及。三岔河水既由永城南下。自係徐城一帶水勢漲盛。以致漫溢下游。該處究於何時開口。現在果否河水消落。搶護平穩。抑尚未堵築完竣。著傳諭該督等即將碭山縣三岔河實在情形迅速覆奏。尋奏三岔河在碭山縣與永城

連界之處。為毛城鋪下游。承受上游減洩黃流。及本境雨水。匯歸洪澤湖。河之兩岸悉係民堰。本年七月內河水漲發。漫缺民堰。並非黃河隄工開口。所漫之水東南流入永城境內。西歸碭山之減水河。被淹民田僅止三四區。圖情形甚輕。毋庸撫卹。至睢寧郭家渡漫工。臣現在催趲堵築。務期工程早竣。得旨覽奏俱悉。○辛亥遣官祭

關帝廟。○諭曰李化龍奏自調補山東登州鎮總兵。上年已歷三載。奏請陞見。未蒙俞允。迄今又屆一年。遵例奏請陞見等語。所奏殊不曉事。該鎮上年奏請陞見。所以未允准者。即以今歲南巡道經東省。李化龍自應接駕。隨營當差也。今春南巡既經召見。面為訓示。令其回任矣。自應以今春接算。俟隔三年後再行循例奏請。方見據實陳情。乃今甫經數月。即為此奏。其所稱犬馬戀主等語。可見並非中誠。不過習為具文。一奏了事。實為外省

惡習。李化龍著傳旨嚴行申飭。外省提鎮三年陞見。原藉以考驗人材。察其能否。乃年力就邁者。惟恐於朕前露其衰頹。而吝惜者。又或計圖省費。往往於未應奏請之時。不過虛文陳奏。皆非出自本心。此等虛陋之習。實屬可鄙。既為提鎮大員。不應出此也。嗣後凡曾經因事召見人員。俱著扣準三年。奏請陞見。其文職大員。亦著照此遵行。將此通諭中外知之。○旌表守正捐軀河南魯山縣民吳洛

妻栗氏。○士子遣官祭昭忠祠。○刑部尚書管順天府府尹事胡季堂等奏。通倉貯備運京平糶麥五萬石。前經倉場侍郎書麟等奏請照歷年發五城糶賣之例。飭交通州知州按依市價出糶在案。臣等查大宛兩縣現報麥價較通州昂貴。兼以夏秋雨水過多。附近州縣收成歉薄。與其補救於事後。莫如籌度於事前。請將通倉現貯麥石運京。令五城司坊官查明穩實鋪戶認買。先交麥價。由戶部

給與執照。聽其自赴通倉支領。並令倉場侍郎委員監放。同在通巡漕御史嚴查斗級花戶。撓易勒索之弊。其各鋪戶在京發賣時。仍令步軍統領五城御史及臣衙門訪查。如有以貴價出糶漁利者。即嚴拏究治。再各鋪戶前往通倉領買。自需腳費。應照現在市價酌為平減。以免賠累。報聞。○順天鄉試。以刑部尚書管順天府府尹事胡季堂為監臨官。兵部尚書管國子監事務蔡新為正考官。內閣

學士兼禮部侍郎嵩貴。刑部左侍郎杜玉林為副考官。○甲寅。諭曰。富勒渾等奏。滇省運銅知州李治管運銅船十二隻。在東湖縣地方。經巡防兵弁於船內起獲私鹽八百十七包。訊係船頭蔡大玉所買。其為販私無疑。當批飭嚴訊。運員李治前既漫無覺察。及經盤獲。始稱移縣查辦。殊屬巧詐。顯有知情故縱情弊。請將李治革職嚴審等語。販運私鹽。例有明條。且以運銅官船裝載販私。尤干例禁。

此風斷不可長。况販運至三萬餘觔之多。自非一時所能私買。何至運員毫無覺察。及湖北弁役等盤獲後。始行移縣查辦。其為知情故縱。分肥入己。情弊顯然。尤不可不徹底審究。李治著革職拏問。交該督等提集案內有名人犯。一併嚴審定擬。毋使稍有支飾。其能盤查之文武員弁著酌予議敘。至所稱銅鉛船隻。自帶食鹽。應請定例。每船許帶四十觔之處。並著該部議奏。尋議。銅鉛船隻。向例祇准裝載八分。原取其運行便捷。若每船准帶食鹽四十觔。恐不肖官員。及船戶家人等。藉此影射多帶。勢必遲誤鑄務。該督所請准帶食鹽之處。應毋庸議。仍令各該運員沿途嚴查船戶家人。毋許多買。並令產鹽處所。及地方文武各官。遇此等船隻到境。不時稽查。如有前項夾帶情弊。別經發覺。除將運員船戶叅究外。其管理鹽務。及地方文武各官。照失察漕船夾帶之例。分別議處。從之。○諭軍機

大臣曰。富勒渾等奏。安陸府城外。有久塞支流。舊名富民河。經前督臣德沛奏請開濬。通舟奉旨停緩。前署藩司福川。復因順道勘估。請借帑挑挖。茲據該府縣稟報。該處沙停淤塞。難以照估開濬。隨委道府等勘查。請停等語。此事德沛好名於前。福川接踵於後。既非緊要工程。自可無庸辦理。福川不過署藩司。順道勘估。即請借帑開濬。其為沽名顯然。不惟虛糜帑項。且徒勞民力。著福川明白回奏。富勒渾等摺。並著鈔寄閱看。尋福川奏。臣從前奏請時。適遇該處偶有偏災。據知府沈樹聲。轉據士民等呈稱。富民河久經淤塞。農商未便。請捐項開濬。臣於查災之日。順道勘明情形。允准具奏。即為以工代賑。後因雨多水漲。不能施工。曾稟明督臣請停。但未自行陳奏。實屬錯謬。請交部嚴加議處。得旨。該部議奏。○乙卯

太宗文皇帝忌辰。遣官祭

昭陵○諭曰大學士程景伊品行端醇老成練達歷膺部務懋著勤勞簡任綸扉正資倚畀昨因其抱恙未痊特命加意調理並屢次存問方冀速就痊愈茲聞溘逝深為軫卹著派散秩大臣帶同侍衛十員前往奠醊所有應得卹典並著該部察例具奏○又諭曰喀爾喀郡王德木楚克病故著加恩賞銀五百兩以資喪費並派散秩大臣一員前往祭奠○丁巳

太祖高皇帝忌辰遣官祭

福陵○

上御避暑山莊宮門土爾扈特汗策凌納木扎勒等七人及朝鮮使臣錦城尉朴明源等三人入覲○諭本日兵部進呈引見武職人員履歷內有廣東守備王騰鳳係因洋盜未獲部議降調送部引見之員已飭令該部將名籤掣扣不准引見本年粵省盜犯韓廣石等糾夥多人肆劫洋面各員弁如果留心盤詰

於該盜犯等初次下洋潛行上岸時嚴查密訪緝獲無難何致海洋有屢行肆劫之事乃該員等平時既不能實力查緝及至盜案發覺部議降調該督撫復為出具中上考語給咨送部引見是適啟其僥倖之心於海疆營伍大有關係王騰鳳著即照部議降調嗣後廣東福建等省凡有外海水師營分各該員弁如有以此失察洋面盜案者俱著照部議實降內閣票擬時毋庸雙簽進呈○又諭據袁守侗奏永定河漫口督率道廳等趕緊堵築加工下掃該道蘭第錫等駐工趕辦不遺餘力於初九日酉刻合龍等語今夏永定河因上游漲盛致隄工漫溢文武各員本有應得疎防處分今該督袁守侗於一月內督率道廳趕緊堵築剋期合龍其辦理迅速亦應甄敘所有在工員弁功過各不相掩著加恩仍行交部議敘以示分別勸懲並行不悖之至意○又諭前經禮部奏各省緣事降革人

員請建經壇。共申慶祝。業經降旨不准。但該廢員等已跋涉遠來。亦宜量加恩澤。所有李友棠等一百十員。著交吏兵二部。詳悉查明緣事案由。照查辦南巡接駕各員之例。酌其情節稍輕者。奏明。或帶領引見。或分別賞給職銜。用昭恩錫。其案情較重者。毋庸辦理。○諭軍機大臣等。各省督撫。每遇歲節。呈進貢物。節經明降諭旨。諄切曉諭。凡金珠等件。毋許進呈。今歲朕七旬萬壽。外省藩臬間有進獻物件者。業經傳旨。奏事處不准接收。其各省督撫進獻抒忱。亦不過照向年常例。以聯上下之情。乃本日鄭大進所進貢物內。金器甚多。已為非是。且復有備賞金錠一千兩。更屬不成事體。除將金器酌留一件。給班禪額爾德尼。為佛前供奉之用。其餘金器。金錠俱著發還鄭大進。並著傳旨申飭。○又諭。昨伊齡阿呈進貢物。朕意其自行備進。及閱今日進單內。復有該鹽政之名。隨經傳旨詢問。始

知本日係伊齡阿自進。而昨日則係為兩淮商人代進者。此事伊齡阿又屬取巧。今歲兩浙商人因萬壽備進貢物。經該撫李質穎具摺奏明。并派專員率同該商等四人。照料齎送。伊齡阿自應如此辦理。今乃於該商人等備物呈貢之處。並未據實具奏。覺兩次進單。皆該鹽政自進者。然殊為朦混。從前因兩淮鹽政等往往令商人代辦貢件。曾經降旨嚴禁。並將節省銀兩。分別清釐。務令鹽政商人。不相牽混。乃伊齡阿尚思掠美見好。實屬舊習未除。著傳旨嚴行申飭。若再不思悔改。必當重治其罪。至該鹽政及商人等。因萬壽慶節。備物申祝。固屬臣下悃忱。若踵事增華。惟知以多為貴。亦屬不成事體。將此一併諭令知之。○以江南河標左營副將張景烈。為江西南昌鎮總兵。○旌表守正捐軀山西長治縣民李照妻郭氏。○戊午。上御卷阿勝境。賜班禪額爾德尼。及扈從王。公

大臣蒙古王公貝勒額駙台吉杜爾伯特汗瑪克蘇爾扎布等五人土爾扈特汗策凌納木扎勒等九人烏梁海散秩大臣伊素特等三人回部郡王霍集斯等及阿奇木伯克貝子色提巴爾第等十一人喀什噶爾四品噶匝納齊伯克愛達爾之子烏魯克等三人朝鮮使臣錦城尉朴明源等三人金川木坪宣慰土司嘉勒燦囊康等四十四人宴○諭曰朝鮮國王世守藩封素稱恭順歲時職貢祇慎可嘉間遇特頒勅諭及資送歸國等事如琉球等國亦俱奉章陳謝惟朝鮮國王必備具土物附表呈進藉達悃忱向因專使遠來若令齎回徒滋跋涉是以歷次例准留作正貢以示優卹而該國王恪共職守屈應正貢時仍復備物呈獻往來煩複轉覺多一儀文我君臣推誠孚信中外一體又何必為此繁縟之節耶今歲朕七旬萬壽該國王具表稱賀業已宣命來使前赴行在隨朝臣一體行

禮宴賚其隨表貢物此次即行收受以伸該國王慶祝之誠嗣後除歲時慶節正貢仍聽其照例備進外其餘陳謝表章所有隨表貢物概行停止毋庸備進副朕柔惠遠人以實不以文之至意著禮部傳諭該國王知之○已未

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵○遣官祭

顯佑宮

東嶽廟。

城隍廟。

上御澹泊敬誠殿。扈從王。公。大臣。官員。及蒙古王。公。貝勒。額駙。台吉。杜爾伯特。汗。瑪克蘇爾。扎布等五人。土爾扈特。汗。策凌。納木扎勒等九人。烏梁海。散秩大臣。伊素特等三人。回部郡王。霍集斯等。並阿奇木伯克。貝子。色提巴爾第等十一人。喀什噶爾。四品噶匝納齊伯克。愛達爾之子。烏魯克等三人。朝鮮使臣。錦城尉。朴明源等三人。金川木坪宣慰司。嘉勒燦。囊康等四十四人。行慶賀禮。命隨至卷阿勝境。賜宴。至壬戌。皆如之。○江蘇學政。彭元瑞。以恭遇

上七旬萬壽。

御刻古稀天子之寶。撰進頌冊。獎賚有加。御製古稀說曰。余以今年登七袞。因用杜甫句。刻古稀天子之寶。其次章即繼之曰。猶日孜孜。蓋予宿志。有年至八旬。有六即歸政。而頤

志於寧壽宮。其未歸政以前。不敢弛乾惕。猶日孜孜。所以答

天庥而勵已躬也。正壽之慶。羣臣例當進獻辭賦。於是彭元瑞有古稀之九頌。既以文房等件賜之。以旌其用意新而遣辭雅。顧一再翻閱。頗有不得不為之說。以申予意者。其詞曰。古人有言。頌不忘規。茲元瑞之九頌。徒見其頌。而未見其規。在元瑞為得半而失半。然使予觀其頌。洋洋自滿。遂以為誠若此。則不但失半。又且失全。予何肯如是。夫由斯不自滿。歉然若有所不足之意。充之。以是為敬天之本。必益凜旦明。無敢或渝也。以是為法祖之規。必思繼前烈。而慎聰聽也。以是勤民。庶無始終之變耳。以是典學為實學。以是奮武非蹟武。以是籌邊非鑿空。以是制作非虛飾。若夫用人行政。盱食宵衣。孰不以是為慎修。思永之樞機乎。如是而觀元瑞之九頌。方且益深予臨深履薄之戒。則其頌也。即規也。更

懷思之。三代以上弗論矣。三代以下。為天子而壽登古稀者。纔得六人。已見之近作矣。至夫得國之正。擴土之廣。臣服之普。民庶之安。雖非大當。可謂小康。且前代所以亡國者。曰強藩。曰外患。曰權臣。曰外戚。曰女謁。曰宦寺。曰奸臣。曰佞倖。今皆無一彷彿者。即所謂得古稀之六帝。元明二祖。為創業之君。禮樂政刑。有未遑焉。其餘四帝。予所不足為法。而其時其政。亦豈有若今日哉。是誠古稀而已矣。

夫值此古稀者。非

上天所賜乎。

天賜古稀於予。而予設弗以敬承之。弗勵慎終如始之志。以竭力敬

天法

祖。勤政愛民。古云適百里者半九十。里。慄慄危懼。誠恐耄荒而有所隕越。將孤

天恩。予又何敢如是。然則元瑞九頌。有裨於予者大焉。故為之說如右。羣臣獻辭賦者甚夥。

大約不出於元瑞之九頌。予將以是說概之。則所為有頌而鮮規者。亦畢視之。為進規而非啻頌矣。○庚申。諭。本年直隸雨水頗多。各州縣間有淹浸之處。現雖漸次涸出。而被水地畝。收成不無歉薄。朕心深為軫念。著加恩於天津水次。截留漕糧十萬石。存貯北倉。以備直屬分運賑卹之用。俾貧民口食。不致拮据。以副朕軫恤窮簷至意。該部即遵諭行。○又諭。曰。國泰泰。東省被水窪地。借給麥本一

摺。據稱曹縣。定陶。城武。三縣被災地畝。按每畝五分。借給麥本銀兩。於明歲秋收後。徵收歸款等語。該處因黃河北岸漫溢。民舍田廬。間有被淹。現雖漫工堵築完竣。而無力貧民。情殊可憫。若將此項銀兩。於明秋仍行徵收。民力究不免拮据。著加恩將曹縣。定陶。城武三縣。現在借出麥本銀六千七百八十餘兩。即行賞給。毋庸徵還歸款。並著將該三縣本年應徵錢糧。及今春借出倉穀。俱緩至明年

秋收後再行啟徵俾民氣益紓以副朕嘉惠災黎之至意該部即遵諭行○諭軍機大臣曰伊齡阿前奏淮揚雨水情形一摺內稱高堰五壩為鹽運經由要道現在派員豫行開壩以備及時暢消等語曾批諭汝何不親往踏看安坐衙門受用乎此摺係前月十一日批發計伊齡阿早經接奉自應遵旨即親往勘辦並將何日前往之處先行具奏乃今已月餘尚未奏覆而本日奏到場窺情形摺內

又止稱高堰壩減水有通江各閘足資宣洩現在下河水勢平穩等語於該處曾否啟壩之處復不詳悉聲敘可見伊齡阿前摺派員開壩不過欲在朕前見伊留心地方徒以一奏了事所辦總屬取巧伊齡阿著傳旨申飭並將該鹽政曾否親往該處督同委員啟壩之處即行據實覆奏尋奏洪澤湖高堰五壩蓄洩機宜向係河臣衙門管理惟揚州金灣閘壁虎橋迤東之運鹽河南岸有人字壩為

運河下游歸江要道係鹽政衙門管理水小之年常行堵閉水大即將壩開放以防淹灌下河各場臣前奏派員豫行開放即指人字壩而言但聲敘未明又未親往踏看實屬錯誤至人字壩自啟放後河流暢洩歸江水勢平穩報聞○又諭兩淮鹽務事宜俱係鹽政經理運司事務頗少其每年養廉支用四千兩為數未免過多況各省事簡道員養廉不過二千餘兩運司不宜獨優著將兩淮運司

養廉裁去二千兩將此傳諭伊齡阿知之

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十二

實錄卷一千一百十二

三

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十三

監修總裁官經筵講官太子太傅文淵閣學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅奉直殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣富綱內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十五年庚子八月壬戌諭各省吏治

自

皇考時嚴行整飭綱紀肅清至地方官與中朝  
顯貴交結往來尤干例禁亦曾屢降諭旨訓  
飭再三乃昨聞得蘇松糧道章攀桂有為原  
任大學士于敏中修造房屋花園之事隨經  
傳諭吳壇查明覆奏茲據奏到章攀桂曾為  
覓匠經理尚未出貲幫助請將章攀桂革職  
發往軍臺効力等語于敏中受朕深恩乃聽  
本省地方官逢迎為之雇匠蓋屋若在前

必當重治其罪。今既完名而沒姑，不深究以  
示朕始終保全之意。至章攀桂逢迎鄉宦，罔  
顧官箴，即問發往軍臺，亦所應得。但此事尚  
未定出貲幫助，亦姑不加深究。著將章攀桂  
革職，免其發往軍臺。至吳壇身任巡撫，於屬  
員中此等營私趨勢之事，不行查奏。經朕聞  
知，飭諭始行據實劾參，可見官官相護。習以  
成風，不可不加懲儆。吳壇著交部嚴加議處。  
此後外省如尚有此等情事，一經發覺，必當

嚴行治罪，斷不能復如此。次邀恩末減，母謂  
朕教之不早也。將此通諭中外知之。又諭  
曰：巴延三等奏搜捕沙灣、茭塘等處大夥劇  
盜，一摺。據稱派委知府李天培密探各盜散  
處沙灣、茭塘各鄉村內，有凌大頭、蓉等陸續  
歸家，派撥附近各縣及弁員等帶領兵役分  
路堵截海口，進村搜捕。前後緝獲盜犯共一  
百四十七名。現在督同司道審訊，將審明盜  
首巨惡先行正法，其未獲首夥各盜購線搜

拏，務期淨盡等語。此案海洋大盜糾夥百餘  
人肆行劫掠，貽害地方，非尋常盜案可比。巴  
延三等李湖到任未久，即能留心躡訪，派委員  
弁兵役堵截搜拏，不動聲色，辦理甚屬可嘉。  
緝盜安民，實副朕用為督撫之意。巴延三等、李  
湖俱著交部議敘。其在事出力員弁並著巴  
延三等查明奏聞請旨。諭軍機大臣曰：巴  
延三等奏搜捕沙灣、茭塘等處夥盜，拏獲凌  
大頭、蓉等一百四十餘名，將現獲各犯審明

後，凡巨魁首惡及行劫多次、持械傷人者，俱  
請即行正法。其夥盜內情重犯亦請一併  
先辦。所奏甚屬可嘉，已交部議敘。其竄逸各  
犯即著嚴飭員弁等留心躡緝，務行速獲，以  
期盡絕根株。至首惡兇犯家屬將來緣坐發  
遣時，亦不當仍發雲貴等省內地。著即定擬  
分別發往黑龍江給索倫為奴，及伊犁給厄  
魯特為奴，以示懲儆。此等海洋巨盜糾夥多  
人潛居肆劫，沙灣、茭塘等處竟成淵藪，自係

盤踞有年。必非起自近日。從前李侍堯、楊景素、桂林李質穎等。各任內。何以俱未查辦。著傳諭巴延三等。即將凌大頭、蓉各犯。潛住沙茨等處。糾夥肆劫。起自何年月日。係何人任內之事。即行查明。據實速奏。毋得稍有迴護。○又諭。本日巴延三等奏。搜捕沙灣、茨塘大夥。劇盜一摺。所辦甚屬可嘉。督撫身任地方。緝盜安民。是其專責。巴延三等。到任未久。即能選派文武。躡線尋蹤。嚴密搜捕。辦理井井

有條。已降旨。交部議敘。該盜犯等。潛住沙灣、茨塘等處。糾集多人。肆行搶劫。決非一日。何以巴延三甫到。即能查辦。而李質穎。前在廣東正署督撫任內。已閱數年。乃竟毫無見聞。可見伊平日持祿養尊。並不以事為事。該地方有此等重大案件。尚不留心辦理。其餘諸事。怠玩可知。徒以貢獻為務。即能博朕喜乎。巴延三摺。著鈔寄李質穎閱看。令其據實明白。回奏。尋奏。臣前在廣東正署督撫任內。查

看報獲盜案。每有沙灣、茨塘之犯。本年春間。曾密傳廣州府知府李天培。面詢情形。商酌緝拿。訪得該處有梁亞香、莫紹開等。俱係盜首。在外糾眾行劫。正在設法擒拏。旋即調任赴浙。是以未經奏辦。得旨且俟之。○又諭。曰。新授廣東提督寶瓚。前赴行在請訓。業於十四日起程。由京赴任。本日據巴延三等奏。該省現有查辦沙灣、茨塘等處巨盜。凌大頭、蓉等。一百四十餘名。所有搜捕一切事宜。均係

該提督專責。著即傳諭寶瓚。速行馳赴新任。督同營員。實力嚴行捕緝。毋得稍有疎縱。並將巴延三摺。鈔寄閱看。○癸亥。諭軍機大臣等。前經降旨。令各省督撫。將李侍堯議罪之處。各行所見。具題覆奏。現據陸續奏到。至雲貴省。雖前據署督舒常。署撫顏希深。擬具奏。但福康安、劉秉恬。係正任督撫。又係該省事件。到任後。自應遵旨。據實題覆。何以至今未見奏到。况福康安。與李侍堯。又屬親誼。更

應引嫌確擬具題。何竟緘默不言耶。著傳諭福康安。劉秉恬。各將李侍堯議罪之處。悉心確覈。即行題奏。○又諭曰。李質穎奏。昌化縣監犯王仲。汪德朋。脫逃一摺。已將疎防之典史羅恩深。革職。知縣趙登甲。交部嚴加議處。至摺內所稱軍犯王仲。係在配脫逃就獲。改發黑龍江之犯。與流犯汪德朋。同鎖木籠內。乘夜換開鑰鑰。扳斷木柵。踰牆而逸。該縣選差緝拏。隨將該二犯拏獲。現在飭提從重定

擬辦理等語。所奏殊未明晰。王仲。係軍犯在配脫逃。拏獲監候改發。乃敢復行逃竄。非尋常脫逃軍流人犯可比。今既經就獲。該撫自應即於摺內。將該犯從重另行定擬。明晰具奏。乃僅稱現在飭提。竟視同尋常。案犯殊屬非是。著傳諭李質穎。即將王仲。另行從重定擬。並汪德朋。應擬罪名。一併速行具奏。○直隸總督袁守侗。奏泰寧鎮屬紫荊易州二營官弁。遇有陞調考拔。前經題准。歸泰寧鎮總

兵查覈轉報。而應劾官弁。仍由各該營徑詳總督覈辦。舉劾事同一例。辦理未免兩歧。請嗣後此二營應劾官弁。亦一體由該鎮覈報。至應需紅白賞項。向係該鎮中軍代領分發。有費周折。請照馬水口沿河口二營例。各按季自行具文。赴司請領。得旨。如所議行。○甲子。諭軍機大臣等。前據巴延三等奏。拏獲沙灣茨塘等處劇盜凌大頭。蓉等一案。已降旨傳諭該督等。將該犯等糾夥肆劫。起自何年

月日之處。查明具奏。此等盜犯。若於初次糾夥行劫時。該督撫等。即能搜查巢穴。嚴行緝捕。何至聚集多人。致沙灣等處。竟成淵藪。自係從前該督撫等。姑息養奸。不早查辦所致。巴延三等。務須將此案盜犯。潛居該處。及糾衆肆劫。起自何年月日。逐名訊究。徹底清查。係何人任內之事。據實速奏。如稍存袒護。或將各犯供詞。另為改換。年月。經朕察出。巴延三等。不能當其咎也。至現獲各犯。訊明確供。

後應正法者即行遵照前旨一面辦理一面奏聞毋得遲緩致別生事端尋奏此案盜犯起事年月審據盜首梁亞香供稱於乾隆三十七年正月跟隨另案盜犯胡江連屢次行劫事發潛逃四十二年十一月始糾合凌大頭蓉等分領夥盜刦掠查三十七年係總督李侍堯巡撫德保任內之事四十二年係總督楊景素巡撫李質穎任內之事臣據實陳奏不敢迴護至已獲盜犯現在趕緊究審數

日內即可定案報聞○乙丑

上御萬樹園大幄次賜扈從王公大臣蒙古王公貝勒額駙台吉等宴○丙寅諭前因直隸雨水過多被淹地畝收成不無歉薄曾降旨截留漕糧十萬石以備賑卹之用今據鄂寶等奏漕運遲到著再截留二十萬石存貯北倉既可令其早回受運即以備接濟直隸各屬賑卹或補州縣倉貯亦屬兩便該部即遵諭行○丁卯諭軍機大臣等今歲順天鄉試

三場士子經弘暢等奏聞有懷挾傳遞等弊現在交部辦理德福胡季堂俱係點派進場自有稽查之責而胡季堂又係監臨士子等既有此情弊豈竟毫無見聞何以節次奏摺內俱稱無事可見辦理全不認真德福胡季堂著傳旨申飭至傳遞各犯現在是否審出實情將來結案時德福胡季堂應有失察處分若仍令審辦此事其承辦司員恐不免迴護著傳諭英廉即同穆精阿姜晟將此案徹底嚴訊按律定擬並此外有無別項情弊一併嚴查據實具奏德福胡季堂二人毋庸同辦○戊辰遣官祭黑龍潭

昭靈沛澤龍王之神玉泉山

惠濟慈佑龍王之神○戶部議覆陝甘總督勒爾謹奏稱甘省皋蘭金縣狄道靖遠河州華亭安定會寧漳縣洮州廳文縣西寧武威平番山丹涇州肅州等廳州縣夏田被旱成災隴西縣被雹成災應分別賑恤緩徵新舊

正借錢糧其循化廳紅水縣丞鹽茶廳固原  
靜寧隆德張掖永昌等廳州縣雖勘不成災  
收成未免歉薄亦一體緩徵應如所請得旨  
依議速行○已已

世宗憲皇帝忌辰遣官祭

泰陵○諭朕於本月二十八日自熱河啟鑾恭  
謁

東陵回由南苑恭詣

西陵展謁所有應行典禮各該衙門照例敬謹

豫備○又諭各省學政現屆差滿應行更換  
之期除順天學政金士松江蘇學政彭元瑞  
浙江學政王杰俱係本年簡放毋庸更換外  
安徽學政著徐立綱去江西學政著胡高望  
去福建學政著朱珪去湖北學政著吳省欽  
去湖南學政著祝雲棟去山東學政著程世  
淳去山西學政著劉種之去河南學政著張  
虎拜去陝西學政著汪鏞去四川學政著劉  
斌去廣東學政著史夢琦去廣西學政著查

瑩去雲南學政著王士棻去貴州學政著潘  
曾起去○又諭曰薩哈岱在內廷行走多年  
尚屬勤勉今聞溘逝殊堪憫惻著加恩賞給  
都統職銜○又諭曰薩載現丁父憂兩江總  
督員缺著陳輝祖暫行署理江南河道總督  
員缺著李奉翰速行前往署理河東河道總  
督員缺著國泰暫行兼署各省督撫向無在  
任守制之例即旗員間有一二年後令其署  
任者亦俟服滿方准實授但薩載在江南年  
久實為南河不可少之人薩載接奉此旨著  
即速來京仍於百日滿後前往署理兩江總  
督此因一時不得其人並非令其在任守制  
也李奉翰著即馳赴南河辦理一切堵築事  
宜其東河事務亦關緊要李奉翰俟薩載到  
任後即回河東河道總督之任○諭軍機大  
臣曰薩載現丁父憂已降旨令陳輝祖暫署  
兩江總督李奉翰調署江南河道總督其河  
東河道總督即令國泰兼署矣河南考城漫

口正在趕緊堵築一切事宜最關緊要著傳諭國泰接奉此旨即行馳赴河南督率在工員弁迅速籌辦以期剋日合龍李奉翰回任以前一切河務慎重為之母誤明春之運將此諭令知之○庚午秋分夕

月於西郊遣誠親王弘暢行禮○辛未諭據巴延三等奏查審沙灣芡塘劇盜一案訊據各犯供出石碁汛水陸弁兵向有得受盜賊縱容出入情事現在嚴拏審究等語聞之不勝駭異已傳諭該督等嚴行審訊從重辦理矣

營汛設立弁兵原為緝盜防奸今不但不行查緝轉致坐地分贓殃民縱盜不法已極該提督章紳前於洋盜胡友南等一案已照部議革職今所管營伍廢弛若此其平日所司何事僅予革職不足示懲章紳著拏問交部俟該督等審結此案後再降諭旨其沙灣等處該管總兵官及該營將備等並著巴延三等查明叅奏該部知道○諭軍機大臣曰巴

延三等奏查審沙灣芡塘劇盜供情一摺據稱連日嚴訊各犯供出沙灣之石碁汛水陸弁兵向有得受盜賊縱容出入情事現在嚴查拏究等語豈有此理營汛弁兵原為查拏盜賊而設乃竟敢與各盜通同往來分受贓物縱容出入幾至藉寇兵而齎盜糧實屬從來未有之事斷難稍為輕貸著即速嚴行審究其得受盜賊起自何時及此外有無供資盜用往來通信之事一一審明將坐地得贓

之水陸弁兵即照強盜律定擬以示懲儆至該省武職大員一任兵丁等與盜賊往來毫無覺察營伍至不可問如此其平日所司何事現已另降諭旨將章紳拏問其管轄沙灣等處之總兵副叅遊守等俱著查明嚴行叅奏至凌大頭蓉等竟敢糾集至二百餘人盤踞沙灣等處恐不止於洋面劫掠或竟有如前宋之宋江等糾集黨與橫行不法情事亦未可定巴延三等務宜實力根究徹底嚴辦

毋使該犯等稍有支飾審明後仍遵照前旨一面辦理一面奏聞毋得遲緩以致別生事端其或有誤拏誤扳之犯亦即分別辦理一面省釋一面奏明至此案盜犯據奏係派委知府李天培查辦該員朕亦素知其能事但從前曾經李侍堯保薦雖不同旗均係漢軍又與李侍堯同姓若李天培查辦此案為李侍堯出脫地步則是自取罪戾已延三李湖辦理此案尚屬認真若因查詢起事年月稍

有瞻顧亦必不能逃朕洞鑒也其現在獲犯審辦緣由並著迅速具奏調正白旗漢軍副都統惠齡為鑲藍旗滿洲副都統以內閣侍讀學士署理藩院右侍郎賽音伯爾格圖為正白旗漢軍副都統○壬申旌表守正捐軀四川樂山縣民胡世祿妻古氏○癸酉遣官祭賢良祠河東河道總督李奉翰奏本年河水較往歲大汛之時更為旺盛臣督辦考城芝麻莊壩工正在下埽堵築間適河水

驟漲灘地全漫幸料物人夫有備各工搶護平穩漫水已消十分之六現在堵築各灘進水溝槽將壩工剋期堵閉補還五堡原隄得旨以手加額覽之俟汝報秋汛平穩時交部議敘今薩載丁憂不得已仍令汝暫往睢寧堵築漫口將一切防守備悉告之國泰茲漫水已消想幸無事若此處不可離則俟國泰到豫汝再起身速往可也○諭軍機大臣等前令國泰兼署河東河道總督並傳諭該撫

即日馳赴河南趕辦堵築事宜茲據李奉翰奏本年河水較往年旺盛現在加緊堵築各灘進水溝槽將壩工剋期堵閉補還原隄各等語已於李奉翰摺內批示令其將一切防守事宜備悉告知國泰若李奉翰未可即離該處則俟國泰到豫再赴睢寧此時李奉翰尚在豫省工次所有睢寧兩壩埽工固關緊要而豫省黃河水勢旺盛雖現已消落其堵築隄工亦須加緊辦理著傳諭國泰即速馳

往河南俟李奉翰將該處事宜面為詳悉告  
知後李奉翰即日前赴睢寧辦理南河要工  
將此由六百里諭令知之○大學士管刑部  
事務英廉等奏本年順天鄉試拏獲傳遞文  
字之陳七等各犯現在逐一查審從嚴究辦  
得旨此案包攬傳遞俱陳七一人乃當監臨  
拏獲訊供時僅據供出徐瀛選一犯而於入  
場作弊之薛灝等匿不供吐且捏稱係場外  
之史韶均代作遞進以致薛灝儲椿年華振  
聲方大中等均於場後聞風逃遁陳七居心  
狡詐情罪甚為可惡著交英廉等將陳七嚴  
行夾訊令其供出逃犯籍貫並將因何不即  
供出薛灝等之處逐一審訊明確從重辦理  
其在逃之薛灝儲椿年華振聲方大中等四  
犯著一面嚴行躡緝一面飛速行知各原籍  
督撫查緝務獲解交刑部按律治罪毋致倖  
逃法網○調安徽巡撫閔鶚元為江蘇巡撫  
以河南布政使農起為安徽巡撫調四川布

政使李承鄴為河南布政使以四川按察使  
查禮為四川布政使○甲戌  
上自避暑山莊迴鑾謁

東陵

西陵○諭朕此次恭謁

兩陵所有沿途經過地方著加恩蠲免本年地  
丁錢糧十分之三○又諭今聞理郡王溘逝  
朕心甚為軫念著遣皇孫綿恩往奠茶酒○  
敕諭班禪額爾德尼曰爾以朕七旬萬壽來

京祝嘏朕詢及達賴喇嘛呼畢勒罕學業爾  
奏稱呼畢勒罕年現長成深明經典朕聞不  
勝欣喜特派大臣呼圖克圖齎持金冊往封  
茲以爾教訓呼畢勒罕學習經典奉持清戒  
廣揚釋教使番民蒙福朕甚嘉焉故特頒賞  
幣物爾其祇受嗣後宜仰體朕心扶持達賴  
喇嘛大興黃教為天朝億萬年延洪稱慶特  
諭○軍機大臣等議覆密雲副都統都爾嘉  
咨稱已故馬甲伊福泰之母及伊妻子一併

送京請照健銳營例給與半分錢糧等語查密雲縣駐防兵丁雖非健銳營可比但係初往駐防一切未能服習且該地距京城較近未便照別省駐防兵丁例辦理請嗣後密雲縣故兵之婦有子嗣者該副都統酌給養育兵缺仍留彼處如無子嗣者送京該旗照例辦理至現在馬甲伊福泰之母及其妻子業已送京即由京城該旗安插可也得旨此等有子嗣之孀婦應仍留彼處將其子挑補養育兵缺以資養贍今乃令其回京殊覺滋擾都爾嘉辦理甚屬錯誤著交部察議餘依議○以廣東肇羅道孫嘉樂為四川按察使○是日駐蹕喀喇河屯行宮○乙亥駐蹕常山峪行宮○是月漕運總督鄂寶等奏本年重運糧船尾幫於八月十一日全數催出臨清至三進各幫現多行抵津關得旨覽今年漕運遲到究係何故汝亦不必來速催回次毋誤明年之運可也○浙江巡撫李質穎奏諸

暨縣山水驟發淹損民田廬舍現飭府縣查明先給一月口糧並予葺屋銀兩其應行賑濟及本年錢糧分別緩免之處另行查辦又蕭山嵎縣新昌東陽浦汭義烏六縣雖被水較輕亦逐一查明酌辦得旨應賑卹者妥協料理俾受實惠○又奏仁和海寧二州縣一帶海塘目下大汛已過工程穩固查西塘調宇等號柴塘前因潮溜湍激間有姓墊現飭備貯料物俟霜降後將竹簔趕砌又前請接建暑宇等號柴塘所有底柴腰柴已經鑲砌發樁現在加鑲面柴其藏宇等號接建竹簔工程該處底沙尚高亦陸續下簔簽釘關樁八月內俱可完竣得旨覽三寶所稱漲沙之法汝等試行否何總未奏及○湖廣總督富勒渾等奏上年鍾祥縣民隄被水潰決經臣等奏請賞借公項興修於本縣及下游協濟之天門京山潛江等縣分年徵還內查天門縣協修隄費銀九千八百八十五兩較京山

潛江獨多。原限二年完納。民力未免拮据。請展作三年歸款。得旨。如所請行。該部知道。

實錄卷一百一十三

三

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十三

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十四

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十五年庚子九月丙子朔戶部等部

議覆吉林將軍和隆武奏稱。赫哲費雅哈人等每年進貢貂皮及領賞伊等幣物。向無收貯庫座。不免潮濕朽壞。請於三姓地方建設庫樓三間。應如所請。從之。○是日駐蹕兩間房行宮。○丁丑諭。從前古北口官兵祇係該處四品協領管轄。並無大員。故特命熱河副都統兼管。今密雲縣現設有駐防副都統。古北口相距甚近。所有該處官兵。即著密雲副都統兼管。○又諭。古城係獨任之缺。著伊里

布調補烏魯木齊領隊大臣。著巴林泰調補。  
○軍機大臣等奏。據革任河東河道總督姚立德呈請據情代奏。願於南河。河東等處。自備資斧。効力贖罪。得旨。姚立德著發往南河。交與薩載等。以河工同知差遣委用。効力贖罪。○刑部議奏。凡分賞為奴回犯。及軍營帶來回子。俱令本主呈明各該旗。分別入冊。如有轉賣他戶。及分送親戚者。亦令受主呈明入冊。不得私相輾轉易主。違者將本主均照違令律議處。再此等為奴人犯。伊主應嚴加管束。如有在外行兇為匪情事。將不行約束之伊主。照例罰俸一年。至回子人等有設立佐領。驍騎校。屬內務府管轄者。有屬理藩院管轄者。如回眾等在外滋事。其失察之該管官。亦分別議處。從之。○是日駐蹕要亭行宮。  
○戊寅諭。今夏雨水較多。京城房屋。間有坍塌。八旗兵丁。生計不無拮据。著加恩普賞給一月錢糧。以示優賚。該部知道。○又諭。今年

秋審情實各犯。著停其勾決。○以協辦大學士吏部尚書嵇璜為大學士。兵部尚書蔡新為吏部尚書。協辦大學士。調工部尚書周煌為兵部尚書。以兵部左侍郎周元理為工部尚書。原任禮部右侍郎沈初為兵部右侍郎。○是日駐蹕密雲縣行宮。○己卯諭。前據李奉翰奏。豫省黃河水勢疊長。考城芝麻莊壩門刷深。工程吃緊。該河督等飭委該地方官協力搶辦。據報險工俱各保護平穩。本日復

據李奉翰楊魁奏。考城五堡外灘芝麻莊壩工。自八月二十二日後。溜勢稍緩。隨董率在工各員弁。實力趕辦。於二十九日掛纜合龍。堵閉穩實等語。覽奏欣慰。此次考城漫口。雖未經掣動大溜。但值此河水陡長。溝槽漫溢之時。該河督等董率道廳備弁。晝夜趕鑲。分壩堵築。剋期合龍。辦理尚為迅速。李奉翰。楊魁均著交部議敘。所有在工文武員弁。並著該河督等查明。一併交部。照例議敘。以示獎

勵該部知道。○諭軍機大臣曰。李奉翰等奏芝麻莊壩工合龍一摺。覽奏欣慰。已降旨交部議敘矣。又另摺奏。張家油房新刷溝槽。其西首一道。係兩股進逼大河。二十四日夜。北風甚大。河勢由西北坐灣。斜向東南。將嫩灘塌去。致迴溜兜入溝內。水歸順隄河。仍由考城五堡下注。現在酌籌趕築挑水壩。挑禦回溜。以免掣溜之虞。伊與撫臣督率趨辦。俟國泰到工。再行馳赴南河等語。考城在江南上游。工程亦為緊要。李奉翰仍在考城督辦。俟水勢稍定。再往南河所辦。甚是。目下時過秋分。該處水勢是否消落。所做挑水壩。是否得力。不致掣動大溜。國泰此時應已到豫。該河督交卸明白。於何日起程。著速行覆奏。至李奉翰到睢寧後。彼處水勢若何。并如何籌辦。以期剋日合龍之處。著一併迅速由驛覆奏。尋李奉翰奏。臣前因張家油房新刷溝槽。掣溜已有三分。當即趕緊堵築。旋於初二。兩

日。西北大風。將西首嫩灘。又刷塌十餘丈。以致不能築壩挑水。現已掣動大溜。水勢汹涌。大約俟霜降後。水性方能漸綿。臣等疎防之咎。請勅部將議敘扣除。得旨。不必辭。但盡心速成。此工可也。○免江蘇上海縣乾隆三十七年分。坍沒田地二十九頃二十三畝。額賦有差。○是日。駐蹕大新莊行宮。○庚辰。諭軍機大臣等。本日薩載等奏。郭家渡漫工。東西兩壩。現在軟鑲進埽。已做過二十餘丈。口門僅寬六十餘丈。九月二十內外。即可合龍等語。前已諭令李奉翰。俟國泰到豫。即行馳赴睢寧。督同籌辦。此時國泰應已到河南。李奉翰究於何日自豫起程。郭家渡漫口。此日正在吃緊。李奉翰即應迅速前赴南河。會同陳輝祖。趨運料物。督率道將等員。相機堵築。並即將秋分後。該處水勢情形。若何及的。於何日可以合龍之處。速即由驛覆奏。將此並諭陳輝祖知之。薩載等摺。並著鈔寄李奉翰閱。

看。尋李奉翰奏。睢寧郭工。臣前詢之陳輝祖。來豫差弁。據稱該處口門。止剩三十八丈。水深三丈餘尺。中泓溜勢平緩。每日進埽四五丈。約計望前必可合龍等語。臣查考城張家油房。已分河溜十之六七。正河下注之水無多。該處水落溜緩。自可剋期竣事。而此處工程。正關緊要。伏乞留臣在豫督辦。以期迅速。藏工。得旨。未去者甚是。但合龍後。仍宜速往。陳輝祖一人。豈能兼顧。○又諭。本日刑部將

川省秋審緩決人犯本進呈。內曾子開致死胞弟曾保開一案。刑部因曾子開。忽伊弟作賊。起意致死。尚無圖謀財產情事。擬以緩決。所辦非是。曾保開屢次行竊。不聽教管。反被出言頂撞。曾子開原可鳴官究治。或自行管束鎖禁。俱無不可。及該犯因有代伊弟賠償行竊錢文。恐嗣後復犯。再行賠累。心懷忿恨。登時斃命。實為殘忍。該部自應照例問擬情實。將伊弟行竊緣由。加片聲明。自可免勾。即

該部不行加片。此等案情。朕無不留心綜覈。持平辦理。乃竟依該督原擬。予以緩決。將來數年後。與常犯一體減等。未免失之寬縱。著傳諭刑部堂官。將此案另行問擬。嗣後遇有此等案件。均著照此案辦理。○又諭。曰。哲成額奏。任內經徵錢糧。因連年以來。商販稀少。是以盈餘數目。比較乾隆四十三。四。兩年。均有短少。懇請分年寬限。陸續措繳等語。關稅盈餘。比較虧短。自係該監督辦理不善所致。

若實因商販稀少。亦不妨量寬其賠補也。哲成額所奏各情節。如果屬實。尚可酌予展限。若竟徵多報少。復以賠償無力。分年請繳。則名為認賠。轉復因緣為利。此風斷不可長。著傳諭舒常。即將該監督任內經徵各數。逐款秉公詳晰查覈。并將伊所奏情節。是否的確之處。據實一併具奏。尋奏。荊州關稅。全賴川省木簾。絡繹到關。收稅始能充足。近因四十三。四。兩年。川省歲歉糧貴。兼以汎水甚大。船

載艱於往來以致商販到關者少虧短盈餘該監督尚無徵多報少情弊報聞○以福建汀漳龍道馮光熊為江西按察使○是日駐蹕白澗行宮○辛巳諭本年雨水過多京城兵丁等俱經賞給一月錢糧所有古北口兵丁著加恩一體賞給其熱河兵丁雖已經賞給一次恐食用仍形拮据著再賞給半月錢糧○是日駐蹕隆福寺行宮○壬午

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員

隨行禮○至

孝賢皇后陵奠酒○諭曰

東陵修養子樹綠營之千把總著各賞官用緞

一匹外委兵丁等各賞給一月錢糧○是日駐蹕桃花寺行宮○癸未諭曰公允初前因辦理

陵寢事務未能妥協由貝子降授公爵今著加恩仍封授貝子○軍機大臣等議覆密雲副都統都爾嘉奏請於懷柔縣北陰背山開採煤窰一摺查陰背山舊有出煤蹤跡如果無礙民間田廬墳墓產煤旺盛不惟滿兵生計有益即懷密一帶商民均霑其利事屬可行應令地方官招商試採逾年照例升課倘試採無效仍請封禁從之○是日駐蹕白澗行宮○甲申諭本年順天鄉試諸生中三場完卷年屆八十者孟盼等九名榜發俱未中式念其踴躍觀光至老弗衰宜沛渥恩以廣化澤著加恩將孟盼郭青壇李宗鐸杜子甫鄭其德梁丙璿韓庚申高本亮李允寶等俱賞給舉人准其一體會試俾皓首寒儒得償夙願用昭嘉惠士林至意○又諭曰刑部審訊

鄉場傳遞文字之謄錄陳七等一案。將陳七擬絞監候。其代倩作弊之恒泰春泰。范葵。陶雲鶴。發往烏魯木齊。不能禁約子弟之勒善陶淑。交部嚴加議處等語。此案科場傳遞積弊。聞之已久。但總未經發覺。姑未深究。今陳七等既經拏獲。若不力為整頓。使之懲儆。則舞弊營私。將何底止。此案陳七一犯。包攬得贓。藐法無忌。實為罪魁。問擬絞候。自屬法無可貸。恒泰春泰著削去旗籍。與范葵。陶雲鶴。

一併發往伊犁。給種地兵丁為奴。其勒善。陶淑。均即著革職。以為科場舞弊玩法者戒。至續獲之薛灝。華振聲。二犯著嚴行究訊。從重辦理。其在逃之儲椿年。方大中。二犯並著速行查緝。毋使漏網。拏獲後。一併嚴審。從重定擬具奏。餘依議。○又諭曰。戶部議覆鳳陽關徵收四十五年贏餘銀兩。比較上屆短收六萬五千六百餘兩。請著落該監督照數賠補等語。自屬照例辦理。但據稱。今歲黃河漫口。

過關糧載。較前年短少懸殊。以致額數有虧。尚屬實情。此項虧短銀兩。令其賠繳二萬兩。其餘四萬五千六百餘兩。著加恩免其賠補。○又諭曰。雅德奏。本年在山西巡撫兼提督印務任內。恭逢恩詔。懇照提督兼銜請封等語。雅德准其照提督兼銜給予封典。該部知道。○諭軍機大臣曰。雅德奏。請照提督兼銜賞給封典一摺。已降旨准行矣。今歲覃恩。臣工陳請貤封。多有允准。原以錫類推恩。若巡

撫之與提督。品級初不相懸。乃雅德亦為此請。此不過見小圖榮。是以姑准所請。至雅德原係西安駐防。今為陝西巡撫。伊族眾親戚。現在該處者不少。若因此稍涉偏袒迴護。則大不可。伊調任西安時。朕早經計及。即欲降旨訓諭。今閱此奏。看來該撫於見小徇情之事。恐所不免。著傳諭雅德。此後諸事務須秉公持正。時以瞻徇為戒。毋得稍涉偏私。致負委任。雅德經此番訓飭。若不知警惕。一經察

出。必當重治其罪。○又諭。據陳輝祖奏。郭家渡漫工。東西兩壩。趕緊一同進埽。現在晝夜併力趲鑲。追壓堅實。自前月二十八日至今。又做成埽工二十七丈。口門寬三十餘丈。就目下情形水勢。擬於本月十五以前。即行趕堵。合龍等語。所辦甚好。惟在該督董率道將等。勉力為之。昨因郭家渡埽工緊要。原諭李奉翰。俟國泰到豫。起身速往南河。今閱陳輝祖奏。郭家渡水勢漸消。趕緊鑲埽。及酌擬合

龍日期。則南河似可不日藏工。而同日李奉翰所奏。考城外灘張家油房挑水壩基。初一日。初二。兩晝夜。西北大風。溜隨風湧。致將西首灘面復塌十餘丈。水深一丈。至一丈八九尺不等。歸入順隄河內。將五堡漫口之東。復刷寬四十餘丈。現與國泰督同築壩盤頭。收束水勢。以便進埽堵築等語。據此。則考城工程。比南河較為緊要。李奉翰當努力勉為之。莫以水勢綿弱。而弛其敬謹之心。李奉翰竟應

仍駐考城工次。會同國泰並楊魁等。相機逐一妥辦。至張家油房。至芝麻莊等處溝口。約寬百餘丈。俟大溜歸河後。應一律堵築。為是李奉翰。接到此旨後。即安心在工。妥商趕辦。施工堵築。俟合龍後。再往南河。至陳輝祖。亦即督率在工人員。晝夜盡力趲堵。務於本月十五以前。趕堵合龍。總之早一日。即地方早受一日之益。實不勝盼望之至。將此傳諭陳輝祖。李奉翰等。知之。並即著由驛迅速覆奏。

尋李奉翰奏。現今河溜由東岸埽灣。斜注西岸。連日趲築東西壩臺。口門僅寬八十八丈。東壩外水深一丈六尺。西壩外水深二丈九尺。現在一面趕用軟鑲。一面兼做護壩邊埽。辛料物齊全。挑水壩已築長三十丈。俟築至著溜處。即可得挑禦之力。所估引河工程。遴派州縣。各於本境雇夫興挑。勒限二十日完竣。至河灘溝槽。雖經築壩堵截。恐來歲長水漫灘。未能鞏固。應於壩工竣後。再行挑築。報

聞○又諭前於六月內諭令特成額文綬將三暗巴地方所有每年應繳達賴喇嘛商上銀兩即令該處現設綠營官員查照往例收明解交達賴喇嘛較為省便並著該將軍等查明覆奏至今已及三月何以特成額文綬屢次奏辦摺內於此一條總未奏及如果特成額等有辦理不便之處自應將確切情形據實陳奏若接奉前旨遵照辦理亦應將如何交辦緣由詳晰覆奏乃全不提及竟欲朦

混了事是何意見著傳諭特成額文綬令其即速查明由驛奏聞○又諭曰刑部審擬傳遞文字之陳七等一案已降旨從重辦理矣至此案陳七一犯包攬得贓實為罪首問擬絞候自屬法無可貸著入於本年秋審情實內同情罪重大各案一併另摺彙奏即予勾決俾玩法營私者知所炯戒將此諭令知之○琉球國貢使蔡煥事竣歸國在閩病故賜卹如例○是日駐蹕烟郊行宮○乙酉予故

大學士程景伊祭葬如例諡文恭○是日駐蹕舊衙門行宮○丙戌諭本日內閣進呈山西鄉試題名錄經朕繙閱見第三題彊而後可彊字書作彊字錯誤顯然該省主試及監臨提調等官率行呈進所司何事通政司既未經揭出內閣亦未稟擬申飭豈此錄均未寓目耶所有內閣及通政司併該省主試監臨提調等官並著交部察議○諭軍機大臣等據姚成烈奏准湖廣督臣富勒渾等咨拏

魯之裕之孫魯恕傑隨委員於全州將魯恕傑拏獲嚴搜止有隨身行李並無別項不法書籍已將該犯押解赴楚收審等語魯之裕身任道員膽敢為逆犯戴移孝父子逆詩作序使其身尚在自當寘之重典今其人已故姑免深究至其子孫若將前項悖逆詩集翻刻流傳其罪自難輕宥著傳諭舒常等即將魯恕傑有無另行翻刻傳布之處嚴加詰訊如有翻刻傳布即從重究擬仍將原書盡行

搜繳銷燬。並將審明緣由。據實覆奏。○又諭。前據搜檢王大臣奏。拏獲順天鄉試傳遞作弊之陳七。供出薛灝。儲椿年。華振聲。方大中。四犯。俱係頂名代倩。通同舞弊。薛灝。華振聲。現經拏獲。其儲椿年。方大中。二犯。業已聞信。遠颺。未據弋獲。此等科場作弊要犯。自應立時拏到。從重辦理。方足以示懲儆。儲椿年。係宜興人。方大中。係桐城人。該二犯脫逃後。必潛回原籍。著傳諭陳輝祖等。即速嚴密查拏。解京審辦。毋致倖逃。法網。尋奏。臣現飭各臬司。及該二犯原籍。並沿途各府州。慎密查緝。務期必獲。解京。得旨。今就獲否。爾等外省於通緝之案。往往漠不關心。甚不可也。○河東河道總督李奉翰奏。臣等會勘張家油房口門。分溜南趨。其口門東岸灘嘴。為溜勢頂衝分流之處。現將彼處速為裹護。即修做壩臺。相機進埽。對面就西溝新築柴土壩一道。接築壩臺。軟鑲前進。其西岸灘嘴一處。逼溜趨

向東南。於此處設挑水壩數十丈。使溜勢未到口門之先。即挑禦開行。趨往東北。歸入正河。設東岸溜勢緊逼。難以進埽。即將壩根裹護。於口門迤裏。土性堅實處。趕築壩基。興工堵築。得旨。所辦皆合機宜。勉為之。今將合龍否。○命大學士嵇璜。充文淵閣領閣事。並充國史館正總裁。○是日。駐蹕新衙門行宮。○丁亥。諭。鄉試為抡才大典。欲拔真才。先清弊竇。本年順天鄉試。經搜檢王大臣奏。拏獲懷挾傳遞。及頂名代倩。不一而足。各犯已交部從重辦理。用昭炯戒。順天科場。特派王大臣等於磚門龍門。逐次嚴查。尚有此等弊竇。何況外省稽察搜查。斷不能如京師之嚴密。該巡撫等職任監臨。摘弊防奸。是其專責。乃歷年披閱各該撫奏摺。惟今年富綱奏稱。先於場前訪查積習。出示禁諭。併增築夾牆。另開更道。於擡運人夫。逐加搜檢。印用號戳。並不假手吏胥等語。辦理較屬認真。此外則均以

三場無弊。一奏塞責。並未見有查出懷挾傳遞頂冒之事。豈作奸犯科者。惟順天有之。而各省竟俱弊絕風清如此乎。實因各撫臣。模稜市譽。不肯認真任怨耳。夫取怨於作奸犯科之人。亦何妨乎。嗣後各省巡撫。凡遇大比之期。必須實力稽察。慎密防閑。如有前項弊端。即當立時查獲。嚴加究治。從重覈辦。務令閭閻中積弊肅清。士子懷刑自愛。庶足以甄別人材。振興士習。將此通諭知之。並令於每科

乾隆四十五年九月

上

引此旨覆奏。著為例。○是日駐蹕黃新莊行宮。○戊子。理藩院奏。喀爾喀扎薩克輔國公三都布多爾濟病故。所有虧短俸餉緞匹。應著落伊子賠繳。得旨。三都布多爾濟虧短俸餉緞匹。著加恩寬免。嗣後遇有因公罰項。俱不必著落伊等子孫追賠。著為例。○以兵部右侍郎曹文填。知武舉。內閣學士兼禮部侍郎錢士雲。為武會試正考官。翰林院侍讀學士褚廷璋。為副考官。○是日駐蹕半壁店行

宮。○己丑。諭軍機大臣曰。國泰奏。據沂水縣知縣褚廷琛。查出劉遶等宗譜。凡例內。開載卓爾源本。衍漢維新等。不經字樣。殊屬狂悖。現飭兗州府嚴搜劉遶家中板片。並所印譜本。及有無不法字跡。嚴審定擬等語。劉遶等修輯宗譜。於凡例內。遠引漢裔。妄自誇耀。甚屬不合。但漢人積習相沿。每有此等陋見。其實可鄙。如搜查該犯家中。果實有別項不法形跡。自應從重辦理。以昭炯戒。若止於支譜

乾隆四十五年九月

上

內。妄相援引。以為宗族榮寵。亦不過照例擬以不應重律。將所有板片。及印存家譜。盡行銷燬。已足示懲。並令地方官。曉諭百姓。務各安分守法。毋得再蹈此等陋習。致涉不經。自干罪戾。將此傳諭知之。○河東河道總督李奉翰等奏。張家油房河勢。由東岸迴溜而入。口內溜勢。較前稍覺平緩。且該處本係老灘。足資保護。其西首灘尖。所建挑水壩。現在趨築。以資挑分溜勢。使歸大河。至東岸溜勢。兜

灣頗緊。必得減洩分導。庶易進埽堵合。擬挑挖引河一道。由西南斜向東北。計長二百七十丈。上口寬四十丈。下口寬二十八丈。深一丈五六尺。形勢建瓴。甚屬順利。已派諳練州縣。分段承辦。得旨覽奏俱悉。竭力穩妥為之。約於何時可合龍。又批。引河當寬深。應以前此為戒也。○是日。駐蹕秋瀾行宮。○庚寅。駐蹕梁格莊行宮。

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十四

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十五

監修總纂官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理地吏部理藩院事務正黃旗滿洲都統世襲副都統軍功加七級隨帶加一級尋常加一級軍功紀錄一次 慶桂總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務世襲副都統軍功加十九級隨帶加一級又加二級臣重誥內大臣戶部尚書張鑑滿洲都統軍功紀錄五次尋常紀錄四次臣德瑛經筵講官太子少保工部尚書紀錄六次臣曹振鏞奉 敕修

乾隆四十五年庚子九月辛卯

上謁

泰陵

泰東陵俱未至碑亭。即降輿慟哭。步入

隆恩門。詣

寶城前行禮。躬奠哀慟。王以下文武大臣官員

隨行禮。○諭曰。陳輝祖奏。睢寧縣郭家渡漫

口。於本月十三日。督率道將等奮力趨辦。於

是日黎明趕合龍口。水勢全歸正河。順流下

注等語。覽奏欣慰。此次郭家渡因上游漲盛。

以致漫溢隄工。疎防各員。自有應得處分。今該河督陳輝祖。督率道廳將弁等。悉心籌辦。趕緊搶築。剋期合龍。其辦理尚屬出力。功過自不相掩。亦應甄敘。陳輝祖及在工各員。升並著交部議敘。該部知道。○諭軍機大臣曰。陳輝祖奏。睢寧郭家渡漫口。於本月十三日。堵築合龍。已降旨交部議敘。又另摺奏。大工甫畢。尚須加幫厚餼。添做越隄。其用過料物錢糧。及估修工段。亦須確覈。李奉翰現在堵

築油房漫口。來江未定遲早。擬將撫篆交閔鶚元接收。並移會順便考試武闈等語。所辦甚好。應如是酌輕重為之。陳輝祖此時自當留駐睢寧。料理一切。俟李奉翰考城工竣。到江南後。再往任事。至張家油房溝槽。前日據李奉翰奏。挑挖引河一道。現在曾否開挖。寬深剋期完竣。開放後。能否減洩掣溜。直達大河。築堵龍口。是否已辦有就緒。何時可以合龍。此時李奉翰自應協同國泰等。督率員弁。

悉心籌辦。俟堵築合龍。溜歸正河後。再赴南河。接辦善後事宜。以便陳輝祖前赴署督之任。將此傳諭李奉翰。并將陳輝祖摺。鈔寄閱看。並諭國泰。陳輝祖知之。其現在工次情形。著李奉翰。即速由驛覆奏。○是日。駐蹕秋瀾行宮。○壬辰。命纂脩代職官表。諭國初設官分職。不殊周官法制。及定鼎中原。參稽前代。不繁不簡。最為詳備。其間因革損益。名異實同。稽古唐虞。建官惟百。內有四岳百揆。外有

州牧侯伯。奮庸熙載。亮采惠疇。周則監於二代。立三公三孤。秦漢以後。為丞相。為中書門下平章。知政事。明洪武因胡維庸之故。改丞相為大學士。其實官名雖異。職守無殊。惟在人主太阿不移。簡用得人。則雖名丞相。不過承命奉行。即改稱大學士。而所任非人。竊弄威福。嚴嵩之流。非仍名大學士者乎。蓋有是君。方有是臣。惟后克艱厥后。庶臣克艱厥臣。昔人言天下之安危。係乎宰相。其言實似是

而非也。至六官。即今之六部。周禮典制。纂詳要亦本於唐虞司徒秩宗諸職。外而督撫。自秦漢以來。所稱守牧節度行省。即唐虞十二牧之遺。歷朝改革。建置紛如。難以縷數。我國家文武內外官職品級。載在大清會典。本自秩然。至於援古證今。今之某官。即前某代某官。又或古有今無。或古無今有。允宜勒定成書。昭垂永久。俾覽者一目了然。現在編列四庫全書。遺文畢集。著即派總纂總校之紀昀。

實錄卷一百一十五

四

陸錫熊。陸費墀。孫士毅等。悉心校覈。將本朝文武內外官職階級。與歷代沿襲異同之處。詳稽正史。博參羣籍。分晰序說。簡明精審。毋冗毋遺。其議政大臣。領侍衛內大臣。八旗都統。護軍統領。健銳火器營內務府。併駐防將軍。及新疆增置各官。亦一體詳晰考證。分門別類。纂成歷代職官表一書。由總裁覆覈。陸續進呈。候朕閱定。書成後。即以此旨冠於卷首。不必請序。列入四庫全書。刊布頒行。以昭

中外一統。古今美備之盛。因首論丞相一官。餘可類推。覽是編者。其各顧名思義。凜於天工人代。兢兢業業。夙夜靖共。以庶幾克艱無曠之意。欽哉特諭。○兵部以武會試中額請得旨。這考試漢軍取中二名。直隸取中八名。陝西取中六名。廣東取中六名。河南取中二名。山東取中五名。江南取中二名。山西取中三名。湖北取中二名。湖南取中一名。四川取中一名。廣西取中一名。福建取中三名。浙江取中

實錄卷一百一十五

五

二名。江西取中一名。雲南取中一名。貴州取中一名。○是日。駐蹕半壁店行宮。○癸巳。兩廣總督覺羅巴延三等覆奏。臣等查審沙灣。焚塘劇盜一案。據盜首梁亞香供稱。乾隆四十二年十一月以前。原在沙灣之大沙地方。造船出洋。因該地附近鄉民。不容灣泊。遂移船至石碁小龍浦口。該處水陸弁兵。先猶出入盤查。後因收受規禮。縱容不問。復據各盜犯。供出沙灣司弓役。及地保等。分得贓物。通

同隱匿。此外尚無供資盜用。往來通信之人。查四十二年。係在楊景素李質穎任內之事。至各盜劫掠情形。亦不至如前代劇盜宋江等之跳梁無忌。現在堵截搜拏。俱各俯首受縛。間有竄逸之犯。四路跟捕。亦十獲八九。再臣等籌辦此案之初。知府李天培。面受方畧。即前赴沙灣等處。駐劄調度。搜捕事宜。省中訊取犯供。係另委司道府縣查審。李天培並未承辦。得旨。已有旨了。諭前據巴延三等奏

搜捕沙灣芡塘等處夥盜。拏獲凌大頭荅等。訊據供出沙灣之石碁汎水陸弁兵。向有得受盜賊縱容出入情節。實屬從來未有之事。已降旨將該提督章紳。革職。拏問。總兵。副。各員。嚴行叅奏。併令將此案各盜犯。從重辦理矣。此等海洋巨盜。糾夥肆劫。自必盤踞有年。因傳諭巴延三等。查明此案得受盜賊起自何時。係何人任內之事。詳晰據實覆奏。茲據巴延三等覆奏稱。訊據各犯糾夥肆劫。賄

通弁兵。地保。弓役。縱庇各情節。俱在楊景素李質穎任內等語。楊景素前任直隸總督時。已聞其簞簞不飭。與李侍堯無異。甫欲查辦。而彼業已身故。倖逃法網。姑免深究。今沙灣等處劇盜。盤踞肆惡。至於如此。總督之責。不在刑名錢穀。而在緝盜安民。乃楊景素竟置若罔聞。貽害地方。若不嚴加懲儆。則凡任封疆者。於地方諸務廢弛。一經身故。即可脫然事外。其何以共知炯戒乎。著交薩載。於回任

後。查明江南有河隄城垣等項工程。應需修葺辦理之處。即罰令楊景素家屬承修。以為貪婪弛縱者戒。至李質穎前覆奏摺內稱。本年春間。在廣東任內。曾密傳李天培。面詢情形。商酌緝拏之法。嗣因調任。即赴浙江等語。李質穎既查有此等盜犯。並未速行擒拏。據實具奏。其咎自無可辭。但所稱今春密令李天培設法緝拏。因調任未及辦理。如果屬實。其咎尚屬有間。若彼時既不嚴行查辦。經朕

傳詢。又復為此飾說。則其罪更大。著已延三等。將李質穎所奏各情節。詳悉確查。果否有實據。可憑。即行據實具奏。候朕另降諭旨。交部議處。朕於臣工功過。一秉大公。至正。從不設時重時輕之意。已延三等。查辦此案。務須徹底根究。毋得稍有瞻徇。李質穎摺併發。○諭軍機大臣等。前諭令特成額等。將三暗巴地方。每年應交達賴喇嘛商上銀兩。令設立之綠營官員。查照往例收明。解交達賴喇嘛。以省遣人來取。酌議覆奏。特成額文綬。總未見奏到。又經傳旨詢問。至今亦尚未據覆奏。今據恒瑞保泰等奏。業經將此項銀兩。代為收解之處。告知達賴喇嘛。達賴喇嘛已經叩謝天恩等語。此事亦毋庸查辦。著傳諭特成額等。即遵照前旨。將每年應行解交之項。如數收清。即於該處官員解銀赴藏之便。帶往交與駐藏大臣轉行交收可也。○添建陝西畧陽縣獄。從護理陝西巡撫尚安請也。○是

日。駐蹕黃新莊行宮。○甲午。總管內務府奏。太監蘇常。捏疾告退。復敢為于敏中之姪。于時和。押帶財物南歸。殊屬目無法紀。應從重枷責發遣。得旨。蘇常著於枷號滿日。重責六十板。再行發往伊犁。給與厄魯特為奴。○諭曰。總管內務府奏。訊據太監蘇常供稱。向在圓明園司房當差。因患目疾痰濕等症。告退為民等語。蘇常已降旨枷號重責。發往伊犁。給厄魯特為奴矣。看來蘇常病廢。必非實情。不過積有微貲。不願當差。捏稱患病。彼時總管太監李玉看顧情面。遂聽其告退。今李玉業經身故。姑免深究。若使尚在。必重治其罪。著傳諭各處總管太監等。嗣後遇有太監告退者。必須詳晰驗明。病廢屬實。方准告退。如有指稱事故。希圖退閒。該總管太監等不行據實查出。徇情准退。代為奏請者。一經發覺。將該總管一併嚴行治罪。○又諭曰。戶部議覆淮安關徵收本年關稅盈餘銀兩。比較乾

隆四十二年分。短收銀四萬五千八百餘兩。請著落該監督等。前後正署四任。照數分賠等語。自屬照例辦理。但今夏郭家渡隄工漫溢。商貨較少。以致比較不敷。其虧短尚屬有因。著該監督等。攤繳銀一萬兩。其餘三萬五千八百餘兩。加恩免其賠補。○是日。駐蹕靜宜園。○乙未。

上迴鑾詣

安佑宮行禮。○幸圓明園。○命內大臣西安將

軍伍彌泰。正黃旗蒙古副都統留保住。在紫

禁城內騎馬。○丙申。

上詣

恩慕寺行禮。○遣官祭

歷代帝王廟。○遣官祭

都城隍之神。○命大學士三寶在紫禁城內

騎馬。○丁酉。諭。前以督撫等呈進貢物。漸覺

踵事增華。屢經宣諭飭禁。不啻至再至三。本

年萬壽節前。即慮及王公大臣。及外省督撫

等。不能仰體朕懷。購備多品。以伸慶祝。因復降旨通行曉諭。以期黜華崇實。乃諸臣等。仍不免有誇多鬬靡之習。但朕七旬慶節。非常年可比。且因其遠道誠殷。不得不酌留數件。其餘概行發還。並有諭奏事處。不准接遞者。諸臣等。諒亦共見共聞。知朕意之所在矣。夫內外大臣。果心存忠愛。惟當實心任事。為國家抒蓋宣猷。豈藉貢獻。以為報効。在督撫等。各就地方所產土物。如荔枝茶葉之類。呈備賞賚。尚屬任土作貢。乃競以金玉銅磁。紛紛羅列。朕實厭之。即如琺瑯一種。必需銅製造而成。耗費銅觔亦日甚。目下錢價漸昂。安知非此項無益之費所致。且進獻不已。各督撫中。甚或有藉詞巧取。以為婪索之端。則流弊何所底止。其所關於吏治民生。甚大。尤不可不力為防禁。嗣後除各省應進土貢。及各鹽政。關差。織造等。例有官項採辦物件外。其內而王公大臣。外而督撫。毋得再有呈進。如謂

祝釐伸悃。上下聯情。俟將來朕八旬萬壽。尚可俯從其常時一概不得再有煩瀆。諸臣其共勵寅清。各勤職業。毋更存進奉見長之念。將此通諭中外知之。○吏部議覆伊犁將軍伊勒圖奏稱。伊犁十數年來。兵民商賈較前數倍。兼以移駐綠營兵丁。其隨帶子弟俱歸民籍。戶口益多。原設理事同知一員。管理難周。請添置撫民同知一員。分司地方事務。再伊犁所屬之霍爾果斯東察罕烏蘇烏可爾博爾蘇克巴彥岱等處。相距甚遠。雖有巡檢二員分管。亦屬鞭長莫及。並請於數城遠近適中之地。添設巡檢二員。分駐管轄。應如所請。從之。○戊戌。諭本日正黃旗漢軍呈進家譜。將業經削出旗檔之王家相繕入。殊屬錯誤。此等身獲重罪之人。削除旗籍。所以警戒旗人。使知各安本分。今乃顧惜情面。仍行繕入家譜。日後難保其不生妄想。且旗人亦因此肆行無忌。嗣後此等削去旗籍之人。不可

率行繕入。著通諭八旗及各省將軍等知之。○吏部議覆署貴州按察使糧道德隆奏稱。州縣解審命盜案件。定例情罪未符。上司隨招駁飭。其有解審頂限不及駁審者。代為改擬咨部。如所議罪名。或有出入。部臣駁令督撫再議。止查取原審官及各上司職名議處。究未知為何衙門錯誤。請嗣後州縣解審之案。或徑由上司改定。或駁回另議者。於咨題文內聲明。俟刑部覈定後。若係原審州縣官錯誤。即將原審官分別降調罰俸。如原審官定擬已協。該上司更改失當者。將上司照例議處。又各省州縣距省寫遠。每撥家人長住省垣。名曰坐省。招搖交結。弊竇滋多。雖久經例禁。而積習相沿。終未裁革。嗣後如有陽奉陰違。別經發覺。將本官降級調用。不准抵銷。該管上司降級留任。並令該督撫將有無此等坐省家人名目。於年終彙奏查覈。均應如所請。從之。○以故奉恩將軍祿哈布禮子薩

炳額襲職○已亥諭曰。素守伺奏。請將文安縣知縣資原庚。改教一摺。已批交該部矣。向來各省教職。俸滿經督撫保舉。選用知縣。後經別省督撫。復行改教者。將原保人員議處。定例綦嚴。今資原庚。雖係教職任內。由舉人本班截取。與曾經保薦者不同。然亦由該省督撫驗看給咨。如果年力衰庸。難膺民社。即應據實奏明。或仍留教職。或送部引見。方為實心任事。且各省進士舉人。於督撫截取驗

看時。尚有改教勒休者。豈現任教職。轉可因循姑息。率行給咨耶。吏部則例。向未定有處分。原未周密。至該員得缺時。九卿驗看。未經奏改。亦有不合。其應如何酌定處分。著交吏部一併詳悉妥議具奏。○又諭。據特成額等。奏奏建昌鎮總兵靈山。營私任性。剋扣兵餉。又以小過。將書識羅成龍。酷責致斃。抑勒諱報。實屬貪鄙乖張。請旨革審等語。靈山著革職。交該督提集案內人證。嚴審定擬具奏。該

部知道。○又諭。據鄭大進奏。襄陽縣民趙先寅。年一百一十一歲。曾元五世。實屬昇平人瑞。照例請旌等語。趙先寅著照所請。准其旌表。並於例賞外。著加恩多賞一倍。再行加賞御筆扁額。用昭嘉獎。○湖廣總督富勒渾等奏。湖北施南協襄陽鎮左營宜昌鎮左營後營。遠安營等五協營。因坐落地方。向無額徵米石。又水險山崇。難於撥運。兵米俱係折支。近來生齒日繁。穀價昂貴。每屆青黃不接。兵丁

買食維艱。雖例得借支州縣倉穀。秋成扣還。但覈計此五協營坐落之恩施等十一州縣。常平額穀止七萬餘石。兵借過多。則存給民買者無幾。於民食不無相妨。臣等查武昌漢陽。沔陽黃岡。蘄水蘄州。六州縣。現有積存漕南餘耗米一萬三千餘石。原係應行出易之項。可酌撥變價。分交施南等五協營坐落之恩施等十一州縣。乘此秋成價平。照數買穀分貯。於青黃不接時。由營員詳明。飭該州縣

碾米每兵一名按月借米三斗共准借一石二斗為止即於秋季兵餉內照時價扣收移交州縣買穀還倉報聞○廣西巡撫姚成烈議准布政使朱椿奏稱廣西永福等七縣每年額收變價官租如遇採買倉穀之年請即劃抵歸倉等語查永福興安容縣岑溪藤縣來賓馬平等七縣每年徵收官租變價解司遇補還倉穀轉赴市採買徒多運費嗣後除無需採買年分仍變價解司如需採買將官

租劃抵常平不敷再行買補得旨允行○添設伊犁撫民同知一員霍爾果斯綏定城巡檢二員從將軍伊勒圖請也○庚子

上詔

大高殿

壽皇殿行禮○還宮○諭軍機大臣等據福川奏亳州蒙城等處續報於八月二十三等日因豫省考城漫口黃水下注田廬被淹現已星馳前往親加履勘等語亳州蒙城等處

前經被水淹浸今因張家油房漫口未能合龍黃水下注田廬復有損傷殊堪憫惻此時農起諒已到任著傳諭該撫即速將被災處所逐細查明妥速籌辦照例撫卹毋致一夫失所又據福川奏稱壽州鳳臺各屬稟報七八月間雨水過大加以上游水發下注淮渦等河泛漲洪湖不能容消等語從前郭家渡漫溢時朕即慮及洪湖水勢不能容納屢經傳諭該督等廣籌去路庶不致壅遏為患嗣

據陳輝祖等陸續奏報酌開五壩并折展壩工足資宣洩毋虞盛漲等語目今水已消落何以福川又有洪湖不能容消之語況上年儀封十堡漫工河已斷流一年有餘全黃水勢皆由渦河淮河下注洪湖彼時尚未聞有不能容消之慮此番並未掣動大溜何以轉盛於前致有壅遏而有福川此奏其故殊不可解著傳諭陳輝祖即行詳悉查明洪湖實在情形妥協籌辦現在郭家渡已經合龍善

後事宜。辦理亦將完竣。洪湖本係南河專責。陳輝祖著即親往詳悉查勘。並將湖身是否實有淤墊。及如何設法辦理之處。據實由驛速奏。以慰厯念。福川摺著鈔寄陳輝祖。農起閱看。尋陳輝祖奏。洪澤湖於七八月間。淮水長發。并郭家渡漫水匯注之時。曾將山圩五壩內智義二壩啟放。并折展清口東西壩。水勢旋即平定。是以仁。禮。信三壩並未開放。此湖水尚能容消之明驗。今考城縣張家油房。

溝槽刷寬。分溜下注。臣恐上游來水。自淮達湖。勢必盛大。酌開高郵之車邏壩。邵伯之昭關壩。亦豫為騰空湖面起見。非目下洪湖竟不能容納也。臣現赴高堰山圩一帶察看。湖水止存一大一尺八寸。臨湖大隄石工。高出水面四五六尺不等。即再長水二三尺。儘可容納。湖身周圍三百餘里。水勢寬深。並無急應籌辦之處。其太平等處引河。接連湖邊處所。間有深沙停積。已逐一挑深展寬。此時湖

水汪洋一片。引河俱在水底。如尚有淤墊。俟冬令水消後。再行確勘辦理。得旨覽奏。稍慰。○又諭。據李奉翰等奏。張家油房正河。現在通流。引河挑長二百七十丈。相距大河甚近。吸溜自必較易。引河頭估寬四十丈。深一丈五六尺。與大河底相平。將來開放。足資暢達。計十月初十前後。可以一律挑竣。現在東西兩壩。進占軟鑲。口門寬七十六丈。一遇深水。即須進埽。俟口門剩二十餘丈。束水蓄高。即

可開放引河。約計十月下旬。可以歲事等語。所辦俱好。勉為之。已於摺內批示矣。張家油房工程。至十月內始行合龍。此亦無可如何。惟在李奉翰等實力妥速辦理。此時工料雲集。水勢又漸消落。正宜上緊趕築。以期迅速合龍。至正河內現在通流。自是極好之事。但漫口內分溜幾分。正河尚剩幾分。摺內未據敘及。著傳諭李奉翰等。即速查明。據實覆奏。並將續辦得壩工引河各情形。一併迅速馳

奏尋奉張家油房漫口。日前掣溜有七八分。正河正剩二三分。兩旬以來。水勢漸消。正河下注之溜。更覺微弱。水深止三四尺。迤下深五六尺。至九尺不等。西岸所築挑水壩。現已著溜。挑禦亦漸得力。仍在趕鑲前進。逼溜歸入正河口。門現寬五十九丈。水勢未經刷深。易於施工。趙辦得旨。覽奏俱悉。佇聽好音。○予故多羅理郡王弘曉祭葬如例。諡曰恪。○以四川將軍標中軍副將鄂輝為建昌鎮總

兵。○辛丑。

上詣

雍和宮行禮。○詣

壽康宮行禮。○諭。昨因索守伺奏。請將文安縣知縣資原庚改教一摺。朕閱該員出身。係在教職任內。由舉人本班截取。經該撫給咨赴選。得缺後。又經特派大臣驗看。何以復行改教。因令軍機大臣詳查原驗之督撫大臣。並降旨交吏部酌定處分。隨據查明資原庚甫

於本年二月。經巡撫李湖驗看。給咨。四月。選授文安縣。後係派出之綽克托等驗看。則資原庚係屬近日之事。其年力衰壯。可以一望而知。何至到任甫經數月。遽即被劾。可見交部酌定處分。必應如此辦理。以示懲儆。然驗看之遠近。材力之衰壯。原自不一。或有驗看時年力尚健。及數年後漸覺衰頹。始請改教者。若一概議處。亦無以示區別。嗣後教職截取。選授知縣人員。其到任五年後。督撫以衰

老甄別者。則原驗之督撫大臣。竟無庸置議。若未屆五年。即以衰老被劾。則距原驗時甚近。何至遽形衰邁。其察驗時之不實。可知。即將該督撫及派出驗看之大臣。均照例議處。著為令。○士寅。

孝慈高皇后忌辰。遣官祭

福陵。○諭軍機大臣等。前因廣東劇盜凌大頭。蓉等一案。盤踞沙灣茨塘。肆行搶劫。事非一日。何以李質穎前在該省。毫無見聞。降旨令

其據實回奏。嗣據李質穎奏稱。今年春間。曾密傳李天培。面訊情形。商酌緝拏之法。嗣因調任。即赴浙江等語。如果屬實。其咎尚屬有間。若經朕傳詢。復為此飾說。則其罪更大。因復明降諭旨。令已延三等。再行查明。據實覆奏。茲閱已延三等奏到摺內。有本年七月籌辦之初。該府李天培。面受方畧後。即前赴沙灣等處。駐劄調度。搜捕事宜等語。此案既係今年七月。已延三等。始行籌辦。何以李質穎

又稱春間。即密傳李天培商辦。或係李質穎曾有此語。而李天培因其已經調任。不復上緊。或竟係李質穎本無此言。經朕飭詢。捏詞卸罪。不可不徹底根究。著再傳諭已延三等。即速查明確實情節。并面詢李天培。令其指出實在憑據。迅速覆奏。李天培昨因其搜捕出力。已加恩擢任道員。諒不敢稍有隱飾。自取重戾。至所奏受賄縱容之弁兵。弓役。地保。俱照強盜律定擬。玩縱文武各員。分別嚴叅之

處。自應如此奏辦。理將此傳諭知之。○緩徵兩淮耕茶場。乾隆四十三年分水災未完折價銀兩。○癸卯諭軍機大臣等。滇省納樓土司普濟。誣陷堂弟普清致死。白易岩一案。經尚書和坤等在滇提集各犯。審訊明確。因普濟之子普維坦。有賄求知縣周恭先一節。要犯普維坦。業已脫逃。奏交接任督撫查辦。嗣據署總督舒常等奏稱。該州盛林基。已將普維坦拏獲解省。此案要犯既經就獲。其行賄

虛實。無難立辨。何以至今尚未審結。雖前據福康安奏稱。普維坦。又供出張悅串商宣世濤之子宣杰。行賄之事。抵任後嚴加鞠訊。宣杰因張悅在逃。堅不承認。現已嚴飭各屬。迅速查拏。一俟張悅到案。即行審辦等語。迄今又已數月。何以未見該督等續行奏及。現在張悅曾否拏獲。如該犯籍隸滇省。此時自應早已就獲。如係別省人。即著福康安等一面飛速行文沿途及各該省督撫。嚴行躡緝。一

面奏聞。候朕傳諭嚴鞫速解。總期要犯務獲。即行審明定案。迅速覆奏。毋令各犯狡展。捏供。致重案久稽時日。此案關鍵。總在普維坦有無行賄。即可得誣陷確情。至白易岩生死下落。原可續行訪緝。不必俟此事查明。始行定案也。將此諭令知之。○又諭曰。戶部奏駁喀寧阿咨請將原任雲南巡撫裴宗錫應賠平糶多減價銀一萬六千六百餘兩。俟查明滇省虧空。應賠若干。再將伊家貲一併覈明抵補之處。未免遲逾。請令先行變繳一摺。所奏甚是。已依議行矣。裴宗錫家產貲財。從前降旨查明存記。原為抵補滇省虧空之用。但其有無多少。尚未查明。即果有虧空。亦係裴宗錫分賠代賠之項。至此案平糶多減銀兩。則係裴宗錫本身應賠之項。自應於封存家產內。先將此項全數扣完。其餘留存候抵。方為正辦。乃喀寧阿轉請俟滇省虧空查覆之日。一併覈抵。其意不過借此緩為追扣。俾得

多取租息。此乃外省官官相護惡習。喀寧阿甫經朕加恩復任巡撫。尤不應出此。著傳旨嚴行申飭。○是日起。

上以孟冬享

太廟。齋戒三日。○甲辰。

孝敬憲皇后忌辰。遣官祭

泰陵。○諭。向來武鄉會試。考試技勇。內硬弓一項。原以十二力為頭號。如果從容滿引。已可中式。即力量較優。亦不過多加二三力。足以見長。乃近來士子。每多熱中競勝。且得失之念太重。輒填注十七八力。及至校試時。類皆勉強從事。併竟有不能者。殊屬無謂。嗣後考試武場硬弓。務以滿足八穀為度。其注考冊內。即有能過頭號弓十二力以上者。亦不得過十五力。著為令。○又諭。從前奏事處。皆挑取內務府官員行走。後朕特降諭旨。著於各部院司官。一併挑取。但奏事處共六缺。內務府官暨部院司官。各應分為幾缺之處。尚未

分別擬定。嗣後所有六缺。著分給部院司官。二缺。內務府官員四缺。出缺時。若係部院之缺。即揀選部院人員。係內務府之缺。即揀選內務府人員。帶領引見。八年期滿。即行更換。至更換時。該堂官等。務須詳慎。計其年深者。互相更換。若有行走平常者。該堂官等查出。不必俟至八年。即著更換。著為令。○乙巳。賑長蘆屬滄州青縣。二州縣嚴鎮。與國。富國。豐財。蘆台。五場。水災。竈民。○賑吉林。琿春。地方。水災。飢民。並予葺屋銀兩。○是月。直隸馬蘭鎮總兵保寧奏。向來恭遇

聖駕謁

陵園牆內外各處橋道。俱係綠營弁兵修搭。惟西便門內盤龍嶺。迤北有河二道。因河身寬濶。令石門工部搭橋。然河水消長無常。而石門工部拘泥舊例。不論水之大小。俱按一定長寬高大尺寸修搭。需料甚多。人夫車輛進內踐軋。在所難免。請嗣後此二河橋座。令弁

兵一併修搭。不拘丈尺。隨時酌辦。以省糜費。再圍牆乃防衛攸關。每遇夏雨。間多坍塌。而定例必俟年終彙奏。後經工部大臣查勘。次年春間始派員辦料修理。敞曠經年。大礙觀瞻。請隨時查明坍塌之處。咨行工部。轉飭本年承辦歲修司員。先行勘修。得旨。好。如所議行。○新授安徽巡撫農起奏。安省鳳泗一帶。因下江之睢寧漫灘。以致淹浸。而豫省考城下注之水。直達安省毫蒙。現在張家油房。又

復漫溢。水勢較大。臣蒙恩補授安徽巡撫。不敢拘泥常例。遽請陛見。就近先赴毫蒙。察看情形。仍赴鳳泗一帶。查勘撫卹災賑事宜。俟辦有端緒。再行請覲。得旨。如此方見實心。一切勉為之。○原任浙江巡撫留辦海塘工程。王亶望奏。海塘需用木石。購辦敷用。擇於八月二十八日開工。臣督同監工各員。按照分定界址。自辰字號起。遞行建築。但大工經始。惟底樁為最重。亦惟打樁為最難。查潮神廟

翁家埠一帶多係沙土。下椿微覺澁滯。必須加工簽釘。倘稍有苟簡。則雖築砌緊嚴。鈎灌整密。而根底鬆浮。塘身總難堅固。此斷不可慎之。若實有浮沙。不能下椿。亦不可迴護前旨。將實情奏來。又稱現在到工椿木。雖必照原估徑圍尺寸。方准量收。而釘椿之時。或匠役希圖省力。或工員防範稍疎。致有私行削截之弊。臣嚴加查察。諄飭監委各員。親身量記點驗。入槽目覩如式簽釘。俾寸木必皆入土。百密總無一疎。實料實工。在在堅好。庶塘身永遠鞏固。得旨。總以親身往來查看為要。莫圖安逸。且汝今更有何別事耶。

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十五

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十六

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次 慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣董誥內大臣戶部尚書鑲黃旗滿洲都統軍功紀錄一次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十五年庚子冬十月丙午朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○頒乾隆四十六年時憲

書○丁未

上御乾清門聽政○諭軍機大臣曰陳輝祖奏

亳州蒙城等處因黃水下注田廬被淹情形

一摺所奏已遲早於摺內批示矣亳州蒙城

等處因張家油房新刷溝槽較寬漫水下注

田廬復有損傷前經福川奏報業已傳諭農

起妥為撫卹何以陳輝祖至今始行奏及所

稱先行撫卹一月口糧並飛飭該州縣多雇

船隻濟渡搭蓋棚廠安頓之處自應如此速

籌撫卹務使災黎均霑實惠毋致一夫失所

至漫下之水前因福川奏有洪湖不能容消

之語亦經傳諭該督詳悉查勘妥協籌辦茲

據陳輝祖奏稱現在啟放高郵之車邏壩邵

伯之昭關壩所有減下之水俱循支河由范

隄各開入海等語。洪湖水勢盛大。自應開放車邏二壩。以資宣洩。自不致有不能容納之虞。至下河民田。此時收割已畢。其減下之水。諒亦無礙也。但現在水勢若何。及湖身是否實有淤墊之處。並著陳輝祖詳悉查明。實在情形。迅速覆奏。將此傳諭知之。尋奏。各處湖河水勢。有消無長。洪澤湖內。又消水一尺六寸。高堰誌椿現存水一丈。高郵寶應邵伯湖河。亦消水一尺一二寸不等。一切工程穩固。得旨覽奏俱悉。該部知道。○禮部議覆福建巡撫富綱奏。鄉試違式試卷。定例頭場二場貼出貢院門外。惟三場則以場事已畢。但令扣除不謄。暗貼場內。士子無由得知。因思科場貼例。草茅多未深悉。若三場違式卷。僅於場內貼示。恐該生竟至終身茫然。不知其因何犯貼之故。殊非鼓勵人材之意。請通飭各督撫。照頭二場例。一體發貼門外。從之。○戊申。

上御保和殿。賜班禪額爾德尼等宴。賞賚有差。○安徽巡撫閔鶚元奏。遵旨覈議李侍堯罪名。查李侍堯以大學士辦總督事。貪黷營私。罪無可逭。惟是李侍堯歷任封疆。勤幹有為。久為中外推服。可否援照八議條內。議勤議能之文。稍寬一綫。不予立決。出自聖恩。得旨該部知道。尋諭各省督撫。覈擬李侍堯罪名一案。俱已到齊。李侍堯以大學士兼管總督。受恩最深。乃敢營私敗檢。驕縱妄行。實出意料之外。覈其情罪。非僅如彰寶之因病縱性。致家人勒索供應者可比。較之從前恒文。良卿貪婪。飢法致罹刑憲。情節實約畧相等。惟恒文等甫任督撫。即肆意婪贓。平日又無出力辦事之處。李侍堯則身任總督。二十餘年。如辦理暹羅。頗合機宜。緝拏盜案等事。亦尚認真出力。且其先世李永芳於定鼎之初。歸誠宣力。載在旂常。尤非他人所可援比。是以前於尚書和珅。照例定擬斬候。大學

士九卿請改立決時。朕復降旨令督撫等各抒己見。確議具題。原欲以準情法之平。茲各督撫大率以身在局中。多請照大學士九卿所擬。而閔鶚元則以李侍堯歷任封疆。勤幹有為。為中外所推服。請援議勤議能之文。稍寬一綫。具奏。是李侍堯一生之功罪。原屬衆所共知。諸臣中既有仍請從寬者。則罪疑惟輕。朕亦不肯為己甚之事。李侍堯著即定為應斬監候。秋後處決。餘著照大學士九卿原

擬行。朕詳慎庶獄。一秉大公至正。從不存畸重畸輕之見。若各省督撫以李侍堯暫緩刑誅。輒萌徼倖苟免之見。亦斷不能逃朕洞鑒也。將此通諭中外知之。○又諭曰。李侍堯貪縱營私各款。從前查審奏到時。適富勒渾前往江南行在。召見朕。詳加詢問。據稱李侍堯歷任封疆。實心體國。認真辦事。為督撫中所罕見。其意以為雖晚節不飭。尚可棄瑕錄用。及令各督撫覈擬罪名。則富勒渾又照大學

士九卿所議。以即請正法具題。如果富勒渾見李侍堯平日勤幹有為。應寬一綫。何妨如閔鶚元直抒所見。乃於朕前既已為之乞恩。及具題時。又復隨衆從重定擬。封疆大臣受朕委任深恩。宜宜前後兩歧。若此。彼時不即降旨交部者。恐各督撫謂朕有意從寬。心存迎合。至陳輝祖於李侍堯罪名。請仍交尚書和珅與大學士九卿覆議。揆其意。亦主監候。但並不據見直陳。作游移兩可之詞。彼時閣

臣。即請交部察議。朕以各省題奏尚未到齊。恐督撫等揣摩意旨。又謂朕有意從嚴。不敢各抒所見。非朕降旨詢問本意。是以俱批該部知道。今此案罪名已定。則兩人均有應得之咎。不可不明白宣示。富勒渾自異其說。著交部嚴加議處。陳輝祖游移其辭。著交部察議。○己酉。諭荆關滿任監督。哲成額奏應分賠接徵前任短少贏餘銀六千三百餘兩。又本任內比較上兩屆短少贏餘銀一萬四百

餘兩請將房產盡數折變先交並應得一切俸廉公費儘數陸續坐扣一摺各關缺少贏餘稅項定例令其按數賠繳原所以杜侵蝕之弊。但如潞野淮揚長蘆等關監督養廉本優又多留任接管則以其贏積墊補缺少尚可不致賠累然其中有實因商販稀少並非經徵不力者朕尚為加恩令其減數酌賠至一年報滿之小差養廉本屬無多所值又豐歉不一若以贏餘短少輒令折變房產既非所以示體恤將來差員轉不免視為畏途甚或有豫慮賠墊更別生病商累民之事流弊亦不可不防即以其經理不善量示懲儆亦止須將其任內養廉按數追出不得賞給亦足以蔽其辜何必令將房產交官朕辦理庶務無不斟酌情理從不肯有意從苛所有哲成額名下應賠銀兩除將伊任內得過養廉覈明扣抵外餘著加恩豁免嗣後此等一年稅差並俱照此辦理倘監督等恃有此旨輒

敢徵多報少則督撫等具有耳目即當據實嚴叅從重治罪○又諭曰楊魁現在丁憂河南巡撫員缺著雅德調補該省現有災賑事宜雅德著速赴新任其巡撫印務交尚安暫行護理陝西巡撫員缺緊要畢沅前在西安最久熟悉該處情形且守制將屆一年現在一時不得其人著前往署理並非開在任守制之例此朕用人不得已之苦衷亦天下臣民所共諒也畢沅不必來京請訓著即速馳赴新任○又諭據理藩院奏因罪革退喀喇沁濟克濟特扎布之扎薩克員缺請著貝勒扎拉豐阿兼管照例添寫冊封查濟克濟特扎布所襲之鎮國公乃伊高祖喀喇沁色楞所立可否准其承襲之處請旨等語濟克濟特扎布有罪朕施恩將扎薩克賞與扎拉豐阿兼管貝勒職分較大鎮國公爵原不應承襲但從前喀喇沁色楞塔布囊帶領伊兄弟等出兵奮勉故晉封公爵今著扎拉豐阿一

併承襲。所有色楞勞績。俱著添寫冊封。將來恩封貝勒。雖應減等。鎮國公不可遞降。著永遠承襲。○庚戌

上御太和殿視朝。文武陞轉各官謝恩。○諭京城廣寧門外普濟堂。冬間貧民較多。所有經費米石。恐不敷用。著加恩將京倉內之小米。賞給三百石。以資接濟。○諭軍機大臣等。本年各直省被有偏災地方。如直隸夏秋雨水較多。武清房山等州縣。及各鹽場低窪地畝。

田禾被淹。江蘇之睢寧等處。因郭家渡漫口。各村莊猝遇水災。殊堪憫惻。豫省因張家油房漫口。考城商邱等處。成災較重。下游一帶。均有被淹處所。安徽之亳州蒙城等處。現因黃水匯注。田廬禾稼。致受損傷。又甘肅皋蘭隴西靖遠等廳州縣。夏禾受旱。兼有被雹。暨黃姜不及改種者。皆不可不加以意綏輯。雖直隸地方。業經降旨截漕三十萬石。以備賑濟倉儲之用。並因豫省考城各該處民人連歲

被災。尤堪軫念。諭令該撫查明災口。實力撫綏。江安甘肅等省。亦經屢諭該督撫等。統率各屬。切實查勘。妥協賑卹。俾災黎毋致失所。但明春正賑已畢。尚屆青黃不接之時。民食不無拮据。是否尚需加賑。以資接濟。著傳諭該督撫等。即行查明覆奏。候朕於新正降旨。至山東省。因黃河北岸衝溢。曹縣定陶城武三處被淹。已賞給麥本銀兩。續據該撫奏稱。涸出地畝。尚能補種。湖南武岡邵陽黔陽三

州縣。因溪水泛漲。損及民居。亦據該撫題報。均經照例撫卹。此二省雖成災。不過一隅。第漫淹之後。民力恐不能驟紓。應否量予加恩。或酌借口糧籽種牛具之處。並著該撫等據實具奏。○辛亥。諭據巴延三奏。沙灣等處巨盜梁亞香等。糾夥肆劫。及弁兵受賊縱盜一案。除提督章紳已遵旨拏問外。其左翼鎮總兵鄭天濬。廣州協副將朱秋魁。在任最久。漫無覺察。實屬昏庸不職。請革職拏問。把總張

閭閻係專管之員亦請革職拏問統轄之署都司事守備曾君錫兼轄之守備韋漢允平時不能督率查拏又失察弁兵得贓縱盜請一併革職兼轄之守備姚元謨雖本年四月到任隨同緝拏但失察之咎亦所難辭請交部議處等語鄭天濬朱秋魁張閻開均著革職拏問曾君錫韋漢允均著革職姚元謨著交部議處其歷任專管兼轄各員並著該督查明分別叅處該部知道○又諭據已延三

等奏審辦沙灣等處劇盜一案將因循縱盜殃民之印佐雜職各員並該管臬司道府叅奏分別拏問革職交部議處併自請議處一摺已批交該部速奏矣此內廣州府知府李天培糧道兼轄廣州府陳繩祖於所屬首縣村莊窩盜並不早為訪緝以致釀成巨案即革職亦不為過但李天培於此案首先出力設法搜捕擒獲多盜已加恩擢授肇羅道陳繩祖調任未久且隨同審辦亦屬認真功過

各不相掩李天培陳繩祖俱著革職從寬留任俟十年無過方准開復○以侍講學士劉躍雲侍講張燾俱充日講起居注官○壬子諭川省各土司自金川底定後令其每年輪班入覲俾伸瞻就悃忱本年為朕七旬萬壽伊等情願來京隨班叩祝經提督明亮帶領前至熱河各加賞賚仍令明亮帶領分起回川茲據明亮奏稱土司等均已行抵西安天氣晴和沿途寧帖無不歡呼感悅等語此國家柔遠綏遐之道伊等目覩內地幅員之廣潤人民之富饒回歸土境自必轉相告語同心向化乃昨據嵇璜奏稱土司等此來見天朝恩賞優渥班秩尊嚴視本處地方官漸生玩忽此雖慮及國家體統乎或者隱為地方官護送有賠累乎何不明言然總所謂知其一未知其二也中國撫馭遠人全在恩威並用令其感而知畏方為良法若如明季漢官當外藩恭順則藐忽而虐侮之或且勒索滋

弊及其有事。則又畏懼而調停之。往往激變。率由於此。各土司原屬內地管轄。雖有曾賞一二品頂戴者。其謁見地方官儀節。自有一定體制。即如西藏班第達。雖係公爵。見駐藏大臣。亦當跪見致敬。此則中外之體。分所宜然。不容紊越。該將軍督提等。務宜隨事留心。飭諭各屬。於該土司等體卹固宜。周至而等威亦不可凌替。又不可蹈明季漢官陋習。以期經久無弊。至於護送賠累。則地方大吏所

司何事。不宜查辦乎。歷觀往代中國籌邊。所以釀釁。未有不由邊吏凌傲姑息。綏馭失宜者。此實綏靖邊隅。撫馭外人之要務。不特川省為然。即直隸。山陝。雲貴。閩粵等省。凡與邊境毗連之處。各該督撫等。均宜時刻留心。督率文武。體朕此旨。永遠遵奉。以昭我國家中外同仁之治。將此通諭知之。○諭軍機大臣等。前已降旨。令雅德調任河南巡撫。並令其速赴新任矣。河南現有災賑事宜。辦理最關

緊要。且藩司李承鄴到任尚需時日。雅德接奉諭旨後。即將印務交與尚安護理。速行兼程馳赴豫省。悉心查辦。將此諭令知之。○癸丑。以福建臺灣水師副將陳宗溥為廣東左翼鎮總兵。○緩徵浙江蕭山諸暨新昌嵊縣東陽義烏浦江七縣本年水災地畝額賦。並賑卹諸暨縣飢民。○甲寅。諭昨因嵇璜奏稱川省土司入覲。見天朝恩賞優渥。班秩尊嚴。恐視本處地方官。漸生玩忽。殊未喻朕柔遠

綏遐之道。已明降諭旨矣。揆嵇璜之意。或因地方官應付賠累起見。果爾。何不直言。且該土司等。由伊土境起身。前至省城。一切俱係已力。地方官本無應付之事。若由成都至京沿途又有額設驛站。其支給分例。俱准開銷官項。况又分起行走。並不至用逾定額。該地方官有何賠累。若伊等支應供給。有心糜費。並任聽家人胥役浮冒開銷。亦其自取。督撫等何難據實查辦。而轉以賠累為辭乎。因思

土爾扈特及回城伯克來京。亦未必無此等浮議。亦當一概令其不來朝謁乎。蓋此皆由各驛站馬匹本不敷定額。並多疲瘦不堪應用者。一遇差務稍多。即形支絀。轉藉口於供應賠累。以飾其尅減驛站馬乾之咎。實為外省惡習。朕屢降諭旨。嚴切飭禁。但恐地方官視為具文。不知悛改。著再明切申諭各督撫。嚴飭管驛大小各員。務期馬匹足額。臚壯。如有短少疲瘦。立即嚴叅示儆。若二三年後。朕

特派大臣往查。仍有此等情弊。惟該督撫是問。且必重治管驛官之罪。不能稍為寬貸也。將此通諭知之。○吏部議奏請酌改舊例事宜。一盜案疎防議處定例。該督撫題叅到部。臣部將各官停其陞轉。俟兵部覈明武職具題。日照例議處。以免參差。查覈計彙題。必須相隔數月。應議各員。反得藉緩時日。請嗣後按月彙題。毋庸轉候兵部。一命盜等案。委審限期定例。原問官審斷未當。必應改委。即將

改委改限聲明咨部。恐輾轉相承。竟有藉為寬限之地者。請嗣後改委各員。照例扣半給限。原限兩月者。一月三月者。一月半逾限叅處。一議敘議處。向例行查轉折。必需時日。自應明立限期。請嗣後除堂畫小稿。及繕本各限。仍照舊例外。其行文查覈各事宜。限以三十日辦竣。繕本具題。一命盜失物承緝處分例。載地方命案除毫無失物者。仍照舊例辦理外。倘有疎失情形。無論多寡。即照盜案扣限題叅。查舊例有盜田野穀麥。無人看守之物。至拒捕傷人致死。照命案例按限叅處者。恐外省率行援引。易滋避重就輕之弊。請將舊例刪除。以歸畫一。一衙役滋事例。載捕役誘竊分贓及革捕窩匪不法。地方官降二級調用。查皂快保甲鄉約等役。均屬在官。遇有滋事。自應明定科條。請嗣後有前項犯案者。將該管官降一級調用。已革之役。該管官罰俸一年。得旨各省辦理地方公事。向多推諉。

遲延而官官相護。積習已深。輒思代為避重就輕。自應明定例限。以隨時整飭。此次吏部所奏酌議盜案疎防等處分。不得謂有意從嚴也。俱著依議行。○乙卯諭達賴喇嘛呼畢勒罕曰。班禪額爾德尼。因朕七旬萬壽。祝嘏來京。經朕問及。據奏爾年漸長成。深明經典。可與黃教聞奏不勝欣喜。朕俯臨億兆中外。視為一體。爾能奉持法律。普度羣生。宜加優獎。爾前世荷蒙

聖祖仁皇帝厚恩。賞給金印勅封。今爾勤習經典。亦宜錫以金印勅封。俾大興黃教。祝國裕民。以綿我大清億萬年無疆之景運。其都伯特事宜。仍照前世率領屬下。妥協辦理。爾宜仰體朕心。始終勿怠。所有金冊銀緞等物。俱交副都統烏爾圖納遜等。前往賞賚。○刑部奏請定幫同殺姦之例。凡例許捉姦之親屬。起意殺姦。糾約他人幫同下手者。此等人犯向未明立專條。辦理未能畫一。請嗣後凡姦

情確鑿。起意殺姦。無論案內應許捉姦之親屬。及不應捉姦之外人。均係激於義忿。悉照共毆餘人律杖一百。如有挾嫌別情。照舊問擬從之。○以刑部郎中景祿為廣東按察使。丙辰策試天下中式武舉黃瑞等四十二人於太和殿前。諭軍機大臣等。據勒爾謹奏乾隆四十七年新疆應需綢緞。按照舊定章程。開明顏色丈尺數目清單。請勅交山東山西巡撫江寧蘇州杭州各織造。照數織辦。

解送來甘。以便分送各該處備用等語。著傳諭國泰喀寧阿穆騰額全德四德。即照勒爾謹單開各項綢緞。如式妥協製辦。務使質地堅實。顏色鮮明。並著遴委妥員沿途小心護解。毋得稍有微污。致滋駁換。所有勒爾謹原摺清單。著鈔寄該撫等閱看。至此項緞匹。解到甘省時。即著該督詳細點驗。派員轉解各該處。並飭接解之員一體小心照料。以專責成。將此傳諭國泰等。并勒爾謹知之。○丁巳

諭軍機大臣等據基厚奏經徵鳳陽關乾隆四十五年稅銀比較上屆短少銀六萬五千餘兩荷蒙恩旨僅令賠繳二萬兩但現有著賠之項分年完解懇將此次應繳銀二萬兩於乾隆五十年起分作四年解部一摺所奏非是西寧基厚父子受朕深恩俱任鹽政關差且又年久計其所得養廉甚為優厚力量並非不能完交何至遽請展限前荆關監督哲成額奏請將應賠銀兩變產完交朕念其

一年報滿所得養廉無多即加恩豁免以示體恤若基厚父子之歷任好差豈哲成額可比乎此皆由於西寧平日鄙吝性成基厚守其家教以至如此況基厚此奏西寧亦不得諉為不知除基厚名下前兩次應賠銀兩仍令按年完交外其此次應繳之二萬兩即著西寧賠交將此諭令知之○戊午

上御紫光閣閱中式武舉騎射○諭據喀寧阿奏太原府教授梁鴻奉部籤陞福建安溪縣

知縣但驗看該員才識迂緩難膺民社不敢因其已經推陞率行送部請將梁鴻仍留教授原任一摺已批該部知道矣前因袁守伺奏請將文安縣知縣資原庚改教朕因資原庚係在教職任內由本班截取經該撫給咨赴選得缺何至到任甫經數月即被劾劾是以降旨勒部按照年限酌定處分所以慎重民社而又各量其年力也但慮督撫等因有此旨認真辦理或有意從嚴亦未可知而熱

中者轉不足以服其心嗣後此等截取教職如有經督撫奏明不勝民社而該員不甘廢棄情願送部引見者俱著照大計八法之例准其給咨送部引見庶督撫等不致屈抑人材而教職等亦無從藉口著為令○諭軍機大臣等據喀寧阿奏太原營參將德成於派委監視武備箭靶漫不經心一聽鼓手任意虛擲因派令候補通判高杞前往監靶該鼓手仍前混報並將家人揪扭德成並不管

束雖嚴訊鼓手並無受賄別項情弊但該叅將怠玩公事庇護兵丁未便寬假請交部嚴加議處等語所言未得真情已於摺內詳悉批示矣武闡外場較閱弓箭鼓手等虛摺捏報乃向有之事如此案果無別項情弊何以高杞令家人攔阻勿擣鼓手尚敢扭結喧鬧情節顯然况京師鄉會試朕特派王大臣監視稽查尚有鼓手受賄不法等弊豈外省轉無此事喀寧阿不應為姑息了事若此著傳

諭喀寧阿即將此案嚴切審究務得確情以懲積弊其叅將德成俟喀寧阿審訊明確具奏時再降諭旨○己未

上御紫光閣閱中式武舉技勇○諭據劉墉奏滇省委解汪圻之試用從九品徐勉行至武陵稱病落後迨汪圻解到澧州交替時徐勉尚未趕到應將徐勉截留訊其因何落後有無情弊照例究辦一面另委妥員接解赴京等語所辦是已於摺內批示矣徐

勉係委解官犯之人沿途理宜小心管押迅速行走乃稱病落後與汪圻擅自相離路隔兩站顯有捏病玩延情弊徐勉著革職拏交刑部嚴審具奏所有汪圻一犯即著該督撫等另委妥員解京該部知道○吏部議奏奉旨開復人員定例造冊送部到齊彙題查各省遠近不一未能同時覈辦遇有題請陞調該部以未經彙題概行議駁未免員缺久懸請嗣後除督撫藩臬大員仍照例具題其四

五品以下官員陸續送到者歸入議敘議處本內開復未經造冊到部者隨本聲敘開復載入條例報聞 庚申

上御太和殿傳臚賜中式武舉一甲黃瑞闓變和金殿安三人武進士及第二甲何定江等五人武進士出身三甲董文珍等三十四人同武進士出身 幸圓明園 諭海澱官園一所著賞給嵇璜蔡新照劉綸于敏中之例分住 以戶部尚書和坤充四庫館正總裁

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十六

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十七

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務內閣學士文淵閣領閣事領侍衛內大臣稽察欽奉 上諭事件處管理

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 董福內大臣戶部尚書鑲黃旗滿洲都統軍功紀錄五次

尋著紀錄十四次臣德瑛經筵講官太子少保工部尚書紀錄六次臣費振鐸等奉

校修

乾隆四十五年庚子十月辛酉蠲免河南儀

封商邱寧陵永城鹿邑考城六縣本年被水

田地額賦○旌表守正被戕湖北荊門州民

陳永輝妻李氏守正捐軀河南宜陽縣民董

收成妻崔氏 壬戌

上幸靜宜園駐蹕翌日如之○蠲免直隸霸州

保定文安大城涿州房山良鄉固安永清東

安香河宛平大興昌平順義懷柔密雲平谷

通州三河武清寶坻薊州寧河遷安清苑安

肅定興新城望都蠡縣雄縣安州高陽新安

河間獻縣肅寧任邱交河天津青縣靜海滄州津軍廳南和任縣永年邯鄲成安曲周廣平維澤磁州延慶保安蔚州懷來獨石口廳豐潤玉田易州武強六十三州縣本年被水災田額賦○蠲免江蘇清河桃源蕭縣碭山海州沐陽大河徐州八州縣衛本年水旱災地額賦○蠲免甘肅皋蘭河州狄道渭源金縣靖遠紅水縣丞隴西安定會寧岷州通渭洮州廳平涼靜寧隆德固原鹽茶廳環縣張掖山丹東樂縣丞武威永昌古浪平番中衛西寧碾伯秦州清水涇州肅州安西玉門三十五廳州縣並靈州屬之下馬關營乾隆四十四年水災地畝額賦○癸亥諭軍機大臣等據海成奏閱京報內有尚書和坤等將李侍堯照侵盜錢糧例定擬斬候而大學士九卿從重改擬斬決摺內擅將鄂善恒文良卿等成案混行牽引係屬違例忝列卿班不敢以出差在外徇隱不言等語所奏殊不知恥

海成係因獲罪出差之人越職言此為何心且又無定論已於摺內批示並交部嚴察議奏矣此案大學士九卿覈奏內所引比照鄂善恒文良卿情罪原係從前諭旨內指出並非牽引成案其從前改為斬決之處朕又令各督撫等酌理準情各抒已見定擬具奏矣朕於此案詳慎再三一秉至公並無成見乃海成以獲罪奉差之人既非在京九卿又非現任巡撫竟敢越職妄言且自稱忝列卿班凡有見聞自當直陳何敢畏避衆議等語實屬可鄙可笑其意似欲照尚書和坤原議而又依違遷就其詞至如何擬罪之處迄無定論是誠何心豈海成曾任巡撫以為因此一奏即可見長冀加恩復用為巡撫乎抑伊向任巡撫家道寬裕今遠差在外思家念切冀因此奏獲譴罷斥回京轉得安閒坐享乎二者必居一於此海成著傳旨嚴行申飭仍令明白回奏 甲子

上巡圓明園。祭山海關。

北海神廟。遣誠親王弘暢行禮。

御書扁曰滙溟寧晏。乙丑諭軍機大臣等。從前。

皇考遇

聖祖仁皇帝忌辰。俱服青袍青褂。進素膳。遇

列位仁皇后忌辰。則止服青褂。不進素膳。是以朕於

皇考暨

孝敬憲皇后忌辰。俱敬謹遵行。本年正月二十

三日。

孝敬憲皇后忌辰。雖在二十七個月外。但甫及

三週年。是以仍服青袍青褂。并進素膳。至明

年正月二十三日。自當恭照。

孝敬憲皇后忌辰之例。一體止服青褂。不進素

膳。所謂心無窮而禮不敢過。至每年十一月

二十五日。恭逢

孝聖憲皇后誕辰。亦恭照。

孝敬憲皇后誕辰之例。遵行著將此旨一錄交敬事房一錄交尚書房存記。俾永遠遵奉。又諭曰。楊景素在直隸總督任內。有簞簋不飭之事。而其在廣東。於沙灣茨塘。劇盜凌大頭荅等一案。並不嚴密緝拏。以致盜犯肆劫。貽害地方。使其尚在。必當明正其罪。今已身故。亦不應使其子孫坐擁厚貲。因降旨。於薩載回任後。查明江南有河隄城垣等工。應需修葺之處。罰令楊景素家屬承修。以為貪婪縱弛者戒。楊景素歷任督撫。操守又甚平常。家中所積貲財。當不止一二十萬。但前降諭旨。係屬明發。伊家得信後。不免有隱匿寄頓之事。楊景素家住揚州。若有代為藏匿寄頓。自不出該處。商人中與伊有戚誼交好者。此時薩載尚未即回任。著傳諭伊齡阿。即行實力查察。登記檔案。並於商人內嚴密留心訪查。毋令絲毫隱寄。倘稍存瞻徇。查辦不實。致有隱匿別經發覺。惟伊齡阿是問。除仍就近

傳知薩載外將此諭令伊齡阿知之○旌表  
守正捐軀江蘇睢寧縣民鮑某女鮑氏河南  
淇縣民趙貴妻劉氏○丙寅

上臨九公主第視疾○還宮○丁卯

上詣

雍和宮行禮○戊辰諭據博清額等奏查喀爾  
喀四部落游牧係將軍成衮扎布稱面奉諭  
旨是以開展游牧至於蘇木邊卡請將開展  
地方仍賞給扎薩克圖汗部落與迤東之賽

因諾顏土謝圖汗二部並酌定游牧界址繪  
圖進呈該管各官應議處者請旨議處扎薩  
克圖汗齊旺巴勒齋遵旨帶京質訊等語此  
案皆成衮扎布希圖有益於賽因諾顏部落  
故捏稱諭旨與扎薩克圖汗巴勒達爾關說  
將扎薩克圖汗屬下移至蘇木邊卡巴圖又  
復瞻徇情面據呈轉奏巧為嘗試經朕派博  
清額前往查辦喀爾喀等畏懼堅不承認因  
思成衮扎布巴勒達爾俱已身故成衮扎布

之子拉旺多爾濟又復治罪加恩不必深究  
矣至齊旺巴勒齋從前疑與拉旺多爾濟同  
向巴圖關說是以降旨令其來京與拉旺多  
爾濟質訊今既加恩不究應令仍歸牧地此  
案巴圖因係伊原奏自不願究辦而博清額  
附和巴圖姑息從事俱屬非是著傳旨申飭  
至喀爾喀年來占據實由該將軍等瞻顧本  
處情面所致即自京簡放者亦顛預從事如  
現在博清額所奏扎薩克圖汗部落扎薩克  
巴哈圖爾侵占科布多杜爾伯特等游牧尚  
未交還該將軍亦未實力催辦非心存袒護  
而何看來將軍叅贊等斷不可辦理游牧事  
務遇有喀爾喀四部落之事該扎薩克呈報  
該盟長判斷應報理藩院者聽候院示不能  
候該院辦理者由該院請派大臣查辦將軍  
叅贊不必管理著為令諭軍機大臣等據  
勒爾謹奏准塔爾巴哈台叅贊等咨調廟布  
所開長寬丈尺色樣陝省不能織辦請勅交

湖北巡撫如式織辦。以便轉解該處備用等語。著傳諭鄭大進即照勒爾謹單開長寬丈尺色樣如式妥協製辦。遴委妥員速行解赴甘省轉發備用。所有勒爾謹原摺清單俱著鈔寄閱看。○又諭前據李奉翰等奏張家油房工程因河底仍未刷深。趕緊辦理一日可得兩日之工。現存口門三十五丈引河亦挑有七分工程約在望後即可相機開放。掣溜歸入正河等語。該處工程既止剩三十餘丈。

望後可放引河。則此引河自己開放可望掣回大溜。何以許久未見李奉翰等奏報。朕心懸盼。彌切目下水勢消落。正當乘機堵合。迅速藏工。著傳諭該總河等督率上緊趲辦。並將壩工續進若干丈尺。何日啟放引河。是否已得掣溜歸入正河。合龍確在何日。即行由驛馳奏。以慰廑念。尋奏引河於十九日啟放。掣溜十分之四。現在加意趕辦。口門止剩八丈五尺。約計十一月初間堵合藏事。報聞。

又諭京師於十八日得雪三寸二麥正藉滋培。近畿一帶得雪分寸約畧相同。而古北口等處於十八九等日兩次共得雪六寸較為優渥。至畿南各屬曾否同霑。未據袁守侗奏報。或此次雪勢東北較大。而西南稍微。或保定等處僅得微雨。未經成雪。亦未可定。著傳諭袁守侗查明迅速覆奏。尋奏保定連日微陰。未經成雪。其京東京北州縣業已得雪。報聞。○又諭前因楊景素在直隸總督任內有

簠簋不飭之事。降旨令薩載回任後查明江南省河隄城垣等工。應需修葺之處。罰令楊景素家屬承修。以為貪婪弛縱者戒。但前降諭旨係屬明發。伊家得信後不免有隱匿寄頓之事。已傳諭伊齡阿實力查察矣。楊景素在直隸總督任內病故。現在直省各州縣皆其舊屬。恐其中有交好者。代為藏匿寄頓。或竟於保定等處置有產業。均未可定。著傳諭袁守侗嚴密留心訪查。毋令絲毫隱寄。刑

部奏各省搶奪偷竊滿貫賊犯擬絞緩決一次者。發往伊犁等處為奴。查此項人犯每年部文到時。各該省照例辦理。並不入奏。不足以昭慎重。請嗣後秋審事竣。臣部覈明人數。請旨通行從之。○已已。

上御乾清門聽政。諭據舒常等奏滇省解京官犯汪圻委員徐勉稱病落後。汪圻行至荊州地方。不由陸路正站行走。因與漢口較近。即託病違例船行。探視家屬。實為猥鄙不堪。

請交部嚴行查辦等語。汪圻曾任臬司大員。非不諳定例者。乃知法犯法。不由陸路正站進行。竟敢雇船由水路前赴漢口。探視家屬。殊屬膽大可惡。汪圻因餽送李侍堯銀兩。其罪固所應得。但此案究係李侍堯婪索營私所致。即如孫士毅已加恩用為編修。汪圻若安靜到京。朕本欲寬其一綫。加恩未減。乃竟毫無忌憚。任意妄行。若此。則是伊自取重戾。不能稍為曲貸矣。汪圻著沿途督撫截等鎖。

解刑部。嚴審治罪。解員徐勉仍遵前旨。一併

解京審辦。以大學士三寶兵部侍郎曹文

植俱充經筵講官。庚午諭軍機大臣等據

李湖奏廣州府知府李天培於搜捕沙莖盜

窩首夥各犯實心經理不辭勞瘁兩月以來

親歷各村掩捕懋著勤勞共計先後拏獲盜

首併盜犯二百五十餘名。現在又陸續拏解

逸犯陳德運等五名。實為通省傑出之員。請

將李天培權留廣州。暫免開缺等語。前因李

天培辦理此案。尚能出力。已加恩擢用為肇

羅道。茲該員於搜捕事務既屬認真。所有未

獲逸盜。自應責令辦清。如該道任內於緝拏

餘黨。一切擒捕事務呼應尚靈。即令其在省

協同辦理。倘肇羅道地方距廣州稍遠。隔屬

不能兼顧。即將李天培暫留廣州府任。其肇

羅道印務。另委幹員署理。或即與陳繩祖調

署之處。酌定奏聞。該處查辦餘黨。不過數月

即當搜捕完竣。再令李天培遵照前旨。回肇

羅道任事可也將此諭令已延三李湖知之  
又諭據伊齡阿奏接奉諭旨令楊景素家  
屬承修河隄城垣等事督臣薩載回任尚需  
時日恐伊子聞信隱寄豫滋弊竇當即委員  
會同總商詳確訪查正在查辦間現據伊子  
楊炤將在籍金銀等項一應房屋田地及在  
京各處所存產業并出借銀兩連鹽引窩價  
約共值銀三十三萬餘兩一并另行開單稟  
呈等語前因恐楊景素家屬有隱匿寄頓之  
事已傳諭伊齡阿留心查察伊齡阿尚未接  
奉此旨即能嚴密訪查所辦具見實心任事  
但楊景素前在總督任內雖有簠簋不飭情  
事係伊身後漸次昭著亦無贓款實跡與貪  
黷營私敗露於生前者情罪尚屬有間且伊  
子楊炤聞信後即將所有產業據實和盤托  
出尚屬具有天良著加恩將伊家產內酌量  
撥給三四萬兩俾資養贍其餘呈出之項著  
交陳輝祖伊齡阿分別估變以備高家堰等

處工程之用其有應行解京者即著解京並  
已就近諭知薩載矣將此由四百里諭令知  
之○辛未兵部議准前任兩江總督薩載奏  
稱壽春鎮標七營袤延三千餘里墩汛相距  
遙遠請於合肥縣之石梁鎮壽州之下塘眾  
興集宿州之石弓山阜陽縣之劉家集六安  
州之丁家集霍山縣之西界嶺亳州之十字  
河鳳臺縣之蚌埠集泗州之半城盱眙縣之  
蔣家壩各建營房三間通共工料銀一千九  
百兩所需兵丁在於裁汰塘兵改歸實操內  
添撥防守從之○豁除直隸平谷縣水衝沙  
壓地四頃三十六畝有奇額賦○壬申諭軍  
機大臣等據袁守侗奏請修密雲縣護城石  
子壩工一摺內稱今秋白河盛漲大溜東趨  
壩根現被水占難以施工必須於上游水分  
東西兩股處將西股河身挑展寬深另挖引  
水溝一道計長三百一十丈並築攔水壩三  
道將河水改由新河直下使壩根乾涸以便

興築等語自應如此辦理。但閱圖內所繪新挑引河溝一道祇面寬十丈。形勢尚覺窄狹。似應向東再加展寬。俾河流暢順。方可直達舊河。已於圖內硃筆標記。至第一道攔水壩。自可仍照原擬修築。其第二第三攔水壩兩道。溝身既已展寬。則壩根亦應移東。並於圖內硃筆記出。著將原圖發往交袁守侗詳悉閱看。遵照辦理。將此諭令知之。禮部奏冬至節次日慶賀禮儀。得旨。今年冬至次日著

停止行禮。○癸酉諭軍機大臣等。據倪承寬奏請於新建北海神廟內添樹碑二道。恭紀建廟諭旨。及初祭祝文等語。事屬可行。著傳諭袁守侗。即於該處酌定地方丈尺。并選購碑石。奏請辦理。○江南河道總督陳輝祖奏。河工歲修料物定例。十二月底全數到工。貯備春初趲辦。中間為日無多。河臣統轄徐揚地方遼濶。查驗難周。恐滋短少。牽混之弊。請飭該管道員分飭所屬稽察督催。仍照十二

月底清交。例毋得絲毫欠貯。並將該道印結送部存查。以專責成。違者叅處。工程既免遲誤。料物亦歸實用。得旨。如所議行。旌表守正被戕四川邛州民劉三元妻楊氏。甲戌上詣

奉先殿

壽皇殿行禮。諭曰。博清額回京後。著以理藩院尚書署都察院左都御史。事德福毋庸兼署。和坤仍兼署理藩院尚書事務。其博清額未到京以前。都察院左都御史仍著德福暫行兼署。○定吐魯番新建城名曰廣安。東曰朗曦。南曰宣義。西曰殷阜。北曰利成。是月河東河道總督李奉翰奏挑挖張家油房引河工竣。乘機啟放水勢。暢達正河。東西兩壩溜勢漸緩。慎重趲辦。月內定可合龍。得旨。覽奏欣慰。佇俟佳音。又奏張家油房壩工東壩已進埽三十二丈。西壩軟鑲五十一丈。口門尚寬三十五丈。慎重趲辦。以期早為集事。

得旨。總以慎重為之將近成功。反不可欲速矣。○原任浙江巡撫王亶望等奏。試行漲沙之法。依方購辦藥料。擇日配合。並無成效。得旨。早應奏聞。究屬不經心。而疑信各半也。夫此為民之事。即畧屬偏方。何妨行之。○又奏。浙省商人呈稱。現在辦理塘工。情願捐銀二十萬兩。稍佐工用。得旨。知道了。此係有益彼桑梓之事。可行耳。○兩廣總督覺羅巴延三等奏。會勘沙灣茭塘各村情形。業已盜氛淨盡。村宇救寧。惟查沙茭二司。係附省海濱大鎮。向設文武員弁巡防。恐微末呼應不靈。似應移駐叅游丞倅等員。始足以資彈壓。其應由何營調撥員弁。何郡移駐。同知通判之處。當周詳籌畫具奏。得旨。好。詳妥為之。以期永久無弊。

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十七

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十八

監林總裁官經提議官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲將軍都統功加七級隨帶加一級尋常加二級軍功紀錄一次臣慶桂

總裁官經提議官太子太傅文華殿大學士文淵閣領閣事稽察欽奉 上諭事件處管理刑部三庫事務

世襲將軍都統軍功加十九級隨帶加二級又加二級臣董誥內大臣戶部尚書兼藍旗滿洲都統軍功紀錄五次

尋常紀錄十四次臣德瑛經提議官太子少保工部尚書紀錄六次臣曹振鏞等奉

敕修

乾隆四十五年庚子十一月乙亥朔

上詣

大高殿行禮○臨九公主第視疾○丙子旌表

守正捐軀山東汶上縣民柏有林妻徐氏守

正被戕陝西興平縣民張士敬妻張氏○丁

丑廣東巡撫李湖疏報肇慶羅定嘉應三府

州屬開墾額外水田三十七頃有奇○旌表

守正捐軀河南南陽縣民尹全妻高氏 戊

寅諭軍機大臣等據巴延三等奏詢據李天

培稱前撫李質穎署總督任內曾經面稟各

屬地方洋面盜劫頻聞應請行文沿海營鎮

一體嚴拏蒙諭允行李前撫又委外委伍龍

光給發盤費令其緝拏盜犯後因香山縣詳

報鄭時當舖被劫拏獲洋盜胡友南等一案

李前撫並無密傳卑府面詢沙灣情形亦無

令查明各盜歸家日期回稟之語又查伍龍

光呈出稟覆原稿與原奏內曾差外委訪查

係屬曾有其事但訊據伍龍光供稱當日止

奉差訪拏梁亞香一犯並無差令密探沙芟

首夥各盜蹤跡回稟撥兵擒拏之語覈與李

質穎原奏情節互異等語此案李質穎奏稱

今年春間曾密傳李天培面詢情形商酌緝

獲之法而李天培堅不承認此等面商言語

本無實在憑據或李天培因所奉諭旨嚴切

李質穎現已調任別省欲卸已過而巴延三

等恐涉迴護前官遂謂李質穎並無是語亦

未可定若欲徹底根究必須將李天培及李

質穎一併解任來京交軍機大臣嚴切審訊

令伊等三面質對。方能水落石出。但此事不值如此深究。况玩縱之文武員弁。已分別拏問革職。出力之李天培。已擢用道員。此案賞罰已明。至李質穎任內。曾差外委伍龍光。改裝易服。購線緝拏。並通行各協營弁。令無分疆界。協拏積匪巨窩。不得以地非所轄。彼此推諉。是李質穎尚非全不查辦者。可比其失於查察。亦與歷任督撫約畧相同。所有應得處分。俟已延三查奏到日。交部議處。至李天

培初次於李質穎前稟稱。梁亞香等兇橫狡獪。頗難弋獲。府縣差役無多。非撥弁兵協拏。不能擒捕。李質穎諭稱。此係爾等府縣的事。當設法上緊查拏。若輕易發兵。萬一激出事來。誰擔得起等語。若李質穎果有此語。則大不是。緝盜安民。係督撫專責。况李質穎兼署總督。地方既有劇盜。理應撥兵協拏。乃不肯發兵。畏難推諉。不幾養癰貽患乎。此語虛實未定。姑不深究。但李質穎現任巡撫。膺封疆

重寄。此後諸事。益當認真督辦。方能承受朕恩。莫自以為傲倖得計。倘再遇事諉卸。存此姑息之見。則是大負委任。必當重治其罪。決不再為寬貸也。將此諭令李質穎。並諭已延三等知之。已卯諭曰。汪圻前於餽送李侍堯銀兩案內。擬發新疆。朕本意以其究因李侍堯婪索營私所致。若果安靜到京。尚可如孫士毅之加恩寬其遠發之罪。乃伊曾任臬司大員。押解進京。不遵定例。私自船行探視家口。實屬知法犯法。經刑部擬以絞候。自係罪所應得。但覈其情。罪明年秋審時。九卿固必列入情實。亦尚不至予勾。伊轉得安坐京城。囹圄免致遠發。雖曰罪之其實惠之。汪圻著竟照原擬發往伊犁。自備資斧。永遠充當苦差。庚辰諭本日吏部將烟瘴未經俸滿服闋。仍發原省之原任廣西鎮安府知府舒世泰帶領引見。固係照例辦理。但滿洲道府等官。丁憂回旗。每年十月帶領引見。如才堪

外任者仍予記名錄用原不必再照漢員之例嗣後烟瘴未經俸滿丁憂回旗之滿員毋庸仍發原省至烟瘴苗疆等項人員未經俸滿遇有事故離任仍發原省本係給事中何曰珮條奏俾得積算前俸仍予即陞既不沒其前勞兼以杜其規避但其中事故亦有不同如告病終養等項恐有規避惡缺情節是以定例俱應坐補原缺至丁憂人員事非得已服闋後自不必仍發原省候補嗣後各邊省烟瘴苗疆歷俸未滿離任各漢員除告病終養者仍照舊例坐補外其丁憂服闋各員著歸入起復應補班內由部照例銓補所有仍發原省交該督撫酌量題補之例著停止○又諭刑部議駁原任江蘇巡撫吳壇審題倪顧氏逼迫伊夫倪玉自縊身死一案該撫將倪顧氏照逼夫致死例擬絞監候與律不符應將倪顧氏依毆夫至篤疾絞決律擬絞立決一本部駁甚是已如所議行矣婦之於

夫猶臣之於君子之於父同列三綱所關綦重律載人子違犯教令致父母自盡者皆處以立絞豈婦之於夫竟可從輕今乃逼迫其夫致令自盡此等潑悍之婦尚可令其偷生人世乎此案倪顧氏薄待倪玉前妻之子致相吵鬧已失婦道嗣倪玉見伊子常受單寒欲給錢營生顧氏又與爭毆以致倪玉氣忿情極自縊殞命兇悍如此該撫僅擬絞候豈明刑弼教之意乎律既載妻毆夫至篤疾者絞決本屬允當乃例又載妻妾逼迫夫致死

者比依妻毆夫至篤疾律擬絞奏請定奪之條以致引用牽混殊未妥協著交刑部將此例另行妥議改正通行此案係吳壇審擬具題吳壇在刑部司員任內辦理案件最為諳練不應援引失當若此使其尚在必將伊交部嚴加議處至臬司為刑名總匯塔琦亦由刑部出色司員簡放審擬此案失於寬縱殊屬非是塔琦著傳旨嚴行申飭並將此通諭

知之○又諭今派博清額於明年護送班禪額爾德尼金塔前往穆魯烏蘇地方伍彌泰即將欽差大臣關防移交博清額博清額至穆魯烏蘇時將關防移交福祿至藏俟恒瑞來京之便帶回伍彌泰帶來兵十名一併賞給馳驛○辛巳以故多羅理恪郡王弘瞻子永璦照例襲封多羅貝勒○以故奉恩將軍寬誠子武爾袞襲職○壬午諭朕從前有旨將直隸旗租銀仍賞給八旗兵丁經部議挑選八旗兵丁中差使勤慎者賞給兩月錢糧以示鼓勵今思一人得兩月錢糧亦不能立家產不過隨手花費而不得賞者未免向隅且分別挑選該管官員不無瞻徇出入之弊殊非朕普惠八旗兵丁之意此後著將直督解到銀兩足數普行賞給八旗兵丁一月錢糧時該部即奏聞普賞一次○又諭向來補放王貝勒等長史司儀長俱於各門上官員內挑選補放嗣經朕以本門上官員補放

長史司儀長不免畏懼所屬王公貝勒務為迎合因特降諭旨毋庸由本門揀選於下五旗官員內選補但下五旗官員亦係王貝勒屬下人員仍與本門上官員無異斷不能奮勉任事嗣後補放長史司儀長著由上三旗頭二等侍衛鑾儀衛冠軍雲麾使前鋒叅領侍衛護軍叅領副叅領并各旗叅領副叅領世職官佐領內揀選補放其揀選時不必會同該王貝勒揀選著領侍衛內大臣會同兵部揀選帶領引見補放○又諭喀爾喀等游牧之事已圖辦理袒護博清額又復苟且完結均難免罪已圖著革退烏里雅蘇台將軍博清額著革退都統○又諭烏里雅蘇台將軍員缺著慶桂補授仍兼正黃旗漢軍都統慶桂即由彼前往烏里雅蘇台接將軍印辦理事務已圖交印畢仍在彼候明春出青時於喀爾喀游牧邊境處所堆立鄂博等事與慶桂等同往踏勘辦竣再回游牧塔爾巴哈

台叅贊大臣著惠齡補授。○又諭曰慶桂已補放烏里雅蘇台將軍。阿肅著調補吏部侍郎。不必兼署兵部。其禮部侍郎員缺著德明補授。德成現已回京。伊係本部侍郎。可以兼管錢法堂事務。福長安不必兼署工部。至胡高望現在出差。工部漢侍郎乏人。著曹文植兼署。○諭軍機大臣等。前據伊齡阿奏到。楊景素之子楊焄呈出家產清單。內有在京城揚州會館存貯之木箱中物件。原單內開約

值銀一萬餘兩。及和珅親往點驗。較原報所值價銀甚多。經軍機大臣以在本籍呈報者。亦恐不實。不盡奏請交伊齡阿再行確查。分別辦理。毋得私行估變。今據伊齡阿奏到。照依楊焄呈報家貲。逐一估計。所有原籍家產。共值銀二十八萬八千八百餘兩。又京城保定。山東各項並借出銀約五萬一千八百餘兩等語。除保定。山東所存物件。業經軍機大臣奏明。交袁守侗。國泰分別查辦外。至京城

所存物件既據查出。較原報數目多至數倍。則伊齡阿所估之數亦必不止於此。著再傳諭伊齡阿。仍照軍機大臣原奏。將應解京者派員解京。應估變者。確實估變。毋得稍有隱飾減少。○癸未。諭曰。博清額於明年護送班禪額爾德尼金塔。至扎什倫布地方事竣。即往前藏更換恒瑞來京。保泰係新到之人。博清額辦事歷練。所有印務交博清額掌管。凡事俱統率辦理。○又諭曰。瑪興阿在回疆年

久。著景福前往喀什噶爾。更換瑪興阿來京。福祿前往庫車辦事。庫車現止一人。俟福祿到時。景福再行前往喀什噶爾。○又諭纂辦開國方略。著添派尚書梁國治與大學士公阿桂同辦。○又諭曰。博清額現在派往駐藏。所有都察院左都御史事務著綽克托兼署。○諭軍機大臣等。據王亶望奏海塘下橋之後。即須砌石。浙省產石之山陰等四縣。先後據報採就石料二萬餘丈。運抵工所者止三千

餘丈。僅敷二千丈塘工之用。若先行儘力開槽。石料未能應手。浙省陰雨較多。倘槽底積水泥濘。轉多未便等語。石料為塘工所急需。自應上緊購辦。剋期趲運。以濟要工。何以運抵工所者。止三千餘丈。以致未能應手。王亶望並非現任巡撫。不過令其在工督辦。是以呼應不靈。李質穎現任巡撫。所有一切購料趲運。皆其專責。豈可稍存諉卸之見。著傳諭李質穎。即嚴催各屬。將採就石料。迅速運工。

以備急需。李質穎如已起程來京。陛見。即著富勒渾。遵照速辦。其在江蘇洞庭等山。分辦太湖石料。十一萬三千七百餘丈。並著傳諭閔鶚元。速飭各屬。毋分畛域。趕緊辦運。浙省備用。俾石料充裕。以濟鉅工。將此諭令李質穎等。並諭王亶望知之。○又諭。據王亶望。李質穎奏。將三寶錄交漲沙之法。擇日配藥。釘樁試辦。總未見有漲沙。或係河流順溜之處。可以試行有驗。若浙省沿海潮汛往來衝激。

試行並無效驗等語。不知此法前因三寶面奏。得自王顯緒。隨令軍機大臣傳詢。據稱。曾聽伊父王柔說。前任浙江海防道時。隨總督嵇曾筠。辦理海塘。試過也曾有效等語。果爾。此法正用於海塘。並非用之內河順溜處所也。何以現在並無效驗。大抵此等如治病偏方。必信為有用。虔誠配試。或可奏效。若疑信參半。先有一未必然之見。則配試時。自必不能盡誠如法。更何以望其靈驗。看來此事。伊

等未免豫存成見矣。至現在辦理塘工。原以督率員役。購採石料。多集人夫。上緊修築。為正辦。其配藥繫樁之法。亦可並行不悖。總在伊等盡誠試配。冀其於公事有濟。安見偏方不可以治病乎。將此傳諭王亶望。李質穎。並諭富勒渾知之。○江南河道總督陳輝祖奏。勘辦徐屬黃河兩岸善後各工。查豐碭銅沛邳睢之黃河大隄。本年黃水盛漲。隄工俱形單薄。急宜加培高厚。以資抵禦。今估豐碭廳

屬需土方銀二萬九千餘兩銅沛廳屬一萬八千餘兩邳睢廳屬一萬九千餘兩照估興修又豐碭廳屬之天然閘本年啟放保護徐城該閘上下引河查明淤墊者應行疏濬北岸大谷山以上舊有順隄河形汎水漫灘下注之水甚為洶湧應築壩挑護又徐城石工之外向年修做護石埽工今歲塌卸石工之外所填碎石甚為得濟已有明驗嗣後徐城一帶未做護石埽工之處如遇溜勢趨逼即

拋填碎石不必加添柴埽以資擁護而省錢糧得旨知道了○調正黃旗蒙古副都統留保住為鑲紅旗滿洲副都統以內閣學士成策為正黃旗蒙古副都統○旌表守正被戕廣東南海縣民呂爵鈴妻陳氏○甲申遣官祭

先醫之神○諭烏里雅蘇台將軍原為征討準噶爾設立彼時將軍係公富爾丹順承郡王錫保平郡王福彭其後軍務停止以六額

駙原屬副將軍即令為左副將軍至成衮扎布車布登扎布等或以人材去得勞績可嘉節次補授並非世襲之職也今烏里雅蘇台將軍員缺業已補放慶桂但思將軍新易而朕又特降諭旨令將軍叅贊不必辦理喀爾喀游牧事務則將軍叅贊及四部落盟長各有專辦事件其如何分別擬定條例俾不至瞻顧誤事亦不至越畔營私久遠奉行之處著軍機大臣會同該部議奏尋議一烏里雅

蘇台將軍係辦理邊疆巡察四部落臺卡之職除尋常事件聽喀爾喀盟長自行辦理外至事關緊要及調發兵馬諸務該盟長副將軍扎薩克應統遵將軍節制違則叅究一四部落副將軍及王公扎薩克等每年輪班駐劄烏里雅蘇台向例副將軍承辦四部落事件呈報將軍叅贊今將軍叅贊既不管游牧事務其四部落輪派駐劄之王公扎薩克除照舊派駐外所有駐劄之副將軍應仍聽

烏里雅蘇台將軍。參贊調撥兵馬。及巡察部落。接設臺卡等務。不必辦理游牧。一四部落盟長。向例會盟辦事。屬下科派馬匹牲畜餼糧等項。種種浮費。請嗣後如有必須會盟者。俱先報理藩院由院示覆。餘則概令停止。一賊盜人命等案。該扎薩克呈該盟長報院定奪。如有不秉公辦理。或被人控告。或經將軍等參奏。照例治罪。至扎薩克亦請交四部落盟長。善為約束。倘有擾累。該盟長亦據實奏辦。以示懲儆。得旨依議。著通行喀爾喀四部落盟長。副將軍閱看。將所定是否。伊等意見。若何之處。各報院轉奏。○諭軍機大臣等。據李奉翰等奏。現在考城壩工。口門止剩四丈。大河水勢。蓄高七尺五寸。異常湧激。跌成深塘。西壩時有遊蟄之處。趕緊鑲壓。初三日風雨竟夜。至初四日辰刻。尚未止息。西壩下首。隨鑲隨蟄。至巳刻壩頭陡蟄入水。在壩員弁兵夫。搶護不住。塌去埽長十四丈。請交部嚴

加議處。並將西壩專辦進埽之都司銜候補守備張位。守備崔見龍。革職留工効力。河北道朱岐。候補通判洪世儀。請一併嚴加議處。此係無可奈何之事。已於摺內批示矣。現在西壩外水深。既止三丈二尺。埽底未經全走。正可趕辦軟鑲。且現寬口門不過十八丈。李奉翰等。即當督率弁兵。晝夜趨築。即本月初旬內。不能竣事。亦應於今冬臘月前。堵築合龍。若交春之後。桃汛將屆。辦理更覺費力。惟在該總河等。妥速為之。至摺內所稱壩蟄之處。係屬西壩。但其情形若何。引河是否。仍然暢流。何以不行繪進圖說。著傳諭李奉翰等。即將壩工實在形勢。詳悉繪圖貼說呈覽。至李奉翰等所請同道員通判。交部嚴加議處。固屬引咎不安之意。但此時正在趕辦要工。合龍轉可毋庸交部。至做工守備處。分本所應得。但既仍請留工効力。亦可不交部。祇須傳旨。將伊等革職之處存記。俟合龍後。覈

其功過。如果奮勉。再行奏請開復。將此由六百里發往。並著將現辦情形若何。迅速由驛覆奏。尋奏。西壩自塌埽後。消水二尺五寸。溜勢頓減。日來又長回水八寸。尚分河流十之二三。俟壩門收窄。自必仍前湍迅。東注前摺。未經聲敘。實屬疎忽。現在底坯未走。水深僅三丈二尺。就底坯上軟鑲。料物省而合龍速。擬於西壩頭。裹護觀平後。即就外首邊埽幫寬六尺。改作正壩。壩北水未跌深。溜亦稍平。

仍可軟鑲前進。根底既免高窪之礙。益可越過水塘。東壩亦加寬邊埽。兩壩一律捆鑲寬厚。土壓堅固。約計旬餘。方可竣事。得旨。覽奏俱悉。勉為之。○乙酉。諭軍機大臣等。前令各省將違礙字句書籍。實力查繳。解京銷燬。現據各督撫等陸續解到者甚多。因思演戲曲本內。亦未必無違礙之處。如明季國初之事。有關涉本朝字句。自當一體飭查。至南宋與金朝。關涉詞曲。外間劇本。往往有扮演過當。

以致失實者。流傳久遠。無識之徒。或至轉以劇本為真。殊有關係。亦當一體飭查。此等劇本。大約聚於蘇揚等處。著傳諭伊齡阿。全德。留心查察。有應刪改及抽掣者。務為斟酌妥辦。並將查出原本。暨刪改抽掣之篇。一併黏籤。解京呈覽。但須不動聲色。不可稍涉張皇。全德。向不通曉漢文。恐交伊專辦。未能妥協。所有蘇州一帶。應查禁者。并著伊齡阿。幫同辦理。○禮部議准。四川總督文綬奏。稱梓潼

縣學原額。廩增各二十。德陽縣學各十。前梓潼進額。奏請減撥。德陽二應將梓潼各裁廩增五。歸入德陽。武童進額。如之。出貢年限。並請改作三年。以昭平允。從之。○以署兵部侍郎諾穆親為工部侍郎。○丙戌。諭。哈喇沙爾之土爾扈特。和碩特。游牧事務紛繁。福祿係熟手。著前往哈喇沙爾。辦理事務。福祿至哈喇沙爾。與海成交代訖。再行前往庫車。○緩徵安徽泗州。宿州。靈璧。鳳陽。五河。壽州。鳳臺。

盱眙亳州等九州縣并泗州鳳陽長淮三衛  
本年水災地畝額賦○以故貴州黎平府屬  
湖耳長官司正長官楊勝槐子秀達襲職○  
丁亥

聖祖仁皇帝忌辰遣官祭

景陵○

上詣

奉先殿。

壽皇殿行禮○諭軍機大臣等據劉墉奏覆湖

南武岡邵陽黔陽三州縣於本年夏間猝被  
水災業經照例撫卹旋值秋成仍獲稔收堪  
資接濟訪察民情實已得所茲接奉諭旨詢  
問明春應否加恩已飛飭該州縣將被淹各  
戶再加體察如應酌量借給以紓民力俟查  
覆到日另行奏聞等語前經傳諭被有偏災  
各省督撫詢問明春應否加恩者原恐災民  
正賑之後時屈青黃不接民力不無拮据或  
有應需加展賑濟之處令該督撫酌量情形

奏聞以備新正降旨加恩如果民情得所無  
需接濟即應以毋庸加賑奏覆至酌借口糧  
籽種等事只須該撫酌量情形自行查辦不  
值因此特降諭旨今該撫摺內既稱災民已  
需實惠堪資接濟又稱來歲春耕有無缺乏  
如應酌量借給籽種另行查奏殊未明晰本  
日勒爾謹閱鄂元俱經奏到著將原摺錄交  
劉墉閱看似此方為合式劉墉係新任巡撫  
或未能諳習或存書生之見以為既經奉旨  
詢問不肯直言毋庸加賑不知朕軫念災黎  
方降旨垂詢有何不可據實直陳乎此雖觀  
過知仁究亦不可將此諭令知之○山西巡  
撫喀寧阿疏報豐鎮廳開墾荒地四頃四十  
五畝有奇○以散秩大臣公隆興為正黃旗  
漢軍副都統○戊子諭軍機大臣等明春二  
月朕啟鑒巡幸五臺蹕路所經止就舊有行  
宮量加修葺不許再行添建至北臺地境高  
寒山路崎嶇朕不復親往所有北臺一切豫

備之處俱毋庸辦理將此傳諭喀寧阿知之  
○已丑諭據伊勒圖等奏今年屯田綠營兵  
丁每人收穫細糧各二十八石餘請賞給兵  
丁鹽菜銀兩官員等交部從優議敘等語著  
照所請管理屯田事務總兵銜李杰龍等著  
交該部從優議敘兵丁等各賞給兩個月鹽  
菜銀兩

實錄卷一百一十八

主

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十八

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百十九

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加一級又加二級尋常加二級軍功紀錄五次

尋常紀錄十四次 日德謀經筵講官太子少保都尚書紀錄六次 臣曹振鏞等奉

校修

乾隆四十五年庚子十一月庚寅諭前因僧

道中有頭陀行脚遊方等類蓄髮披垂恐匪  
徒假裝潛匿其中於風俗人心大有關係自  
應飭令難去不准混留至實係全真道士習  
業焚修本未蓄髮其服飾原可照舊毋庸一  
體飭禁○又諭據佛德等奏哈密郡王銜貝  
勒伊薩克出痘身故伊薩克老成謹慎素能  
約束所屬回人今聞溘逝深為軫念著加恩  
賞銀三百兩俾辦喪事即交佛德等於彼處  
庫貯銀兩支給○辛卯

上御乾清門聽政。○諭本年各直省鄉試。據該督撫等奏。應試士子內。有年八十九十以上者。三場完竣。榜發未經中式。念其踴躍觀光。至老弗衰。宜沛渥恩。以廣化澤。所有江南省之吳球。蔡綱。杜琦。劉行芳。汪自强。胡承球。夏之璜。江西省之鄭忠亮。皮金綬。鄭定猷。胡北省之沈聚奎。廣東省之張衍說。潘焄。饒鳴陽。林成彬。林懋烈。併中式副榜之楊最德。雲南省之錢兆基。周世德。俱著加恩賞給舉人。一體會試。俾皓首寒儒。得償夙願。用昭嘉惠士林之至意。○又諭向來各部院司員。保送三庫稅差。錢局坐糧廳等項。每有將曾經得差人員。未隔數年。復行保送者。不知在京滿漢司員。人數本多。此等得項較優之差。自應令其均霑普及。若出差未久。復予保送。則從未得差者。未免多有向隅。嗣後保送此等差使之員。其已經派過者。著於十年後。方准再送。如堂官等。違例朦混保送。經朕查出。及被人

叅奏者。即照徇庇例議處。著為令。○壬辰。諭從前內府摹刻蘭亭八柱帖。流傳名蹟。頒示臣工。久為藝苑楷模。茲復得端石摹刻蘭亭。及圖畫詩跋各種。命內廷翰林等詳檢。並將內府舊搨本。逐一比對。則此搨係明永樂時周王有燬所摹。至神宗時。益王翊鉞及其子常遷。又行補刻者。但歷年久遠。石刻缺畧不全。著內廷翰林等。詳查內府所藏舊搨蘭亭圖跋。交御書處。補行摹刻。以臻完善。其圖畫著賈全摹補。刻成後。仍將流傳原委。并缺畧摹補緣由。詳晰題識。附刻於後。以昭嘉惠藝林至意。○癸巳。上幸瀛臺。○諭軍機大臣等。據王亶望奏。十月下旬。潮勢漸減。各工穩固。惟章家菴一帶。對面新漲陰沙。日漸寬濶。距塘僅二里有餘。迤西頭圍地方。又新漲陰沙一塊。以致潮水轉成灣勢。直射塘身。回溜搜刷根腳。所有黃宇等字號。竟屬頂衝。水深二丈有餘。木樁恐難

穩固。現擬先從天字號柴塘以內先行趕辦石工。并於天字號以西酌量添建石塘數十丈。以備險工等語。所辦甚是。海塘工程從前該撫等原奏請辰字號辦起。今章家巷一帶既成頂衝。則自應先從天字號一帶起。所謂急則治標之法。該撫等務須迅集石料。晝夜趕築。以防春汛將臨。至閘園內章家巷對面新漲陰沙。離塘僅二里有餘。則或竟可望其再向北長。與塘相連。逼溜南行。誠為不幸中之幸。此則全賴

海神嘉佑。非人力所能勉強。若果陰沙北漲。則溜勢可望改趨。朕意或從南岸港邊一帶漲沙施工。概行切去沙頭。使溜勢得從此南瀉。未始非引溜之一法。但其事是否能行。朕亦不能懸定。已於圖中點出。著傳諭富勒渾王。宜望即公同悉心籌畫。據實迅速覆奏。亦不必因奉此旨。有心遷就也。仍具圖貼說奏來。尋奏現在勘定天字號迤西築石工一百

丈。迤東二百丈。以作柴塘後護。務於春汛前報竣。至新漲陰沙嫩軟浮膩。既難施工。兼之潮挾沙行。隨切隨淤。即多費帑金。恐難取效。此時惟有內築石工外護柴塘。於頂衝處所添作柴工盤頭一座。以挑水勢。使大溜稍遠塘根。防護較為周密。得旨。勉力堅築。石塘目今要務也。妥為之。○甲午。諭本年直隸夏秋雨水稍多。武清房山等四十一州縣田禾被淹。業經降旨。截漕三十萬石。以備賑濟之用。

但念其中有被災情形較重者。明春尚應加恩展賑。恐該省現貯銀兩不敷動撥。著再加恩賞撥通倉米三十萬石。部庫銀三十萬兩。以資應用。該部即遵諭行。○諭軍機大臣等。昨因各省進到遺書有應鈔沈鍊之青霞集一種。篇中凡違礙字樣俱行空格。已交阿桂和珅查覈填補矣。此外各省坊行刻本如青霞集之空格者。諒復不少。俱應酌量填補。但各督撫自行查填。恐未妥協。亦難畫一。著傳

諭各省督撫詳查各種書籍內有不應銷燬而印本留有空格者概行簽出解京後交館臣查明酌量填補仍行發還所有板片即著各督撫遵照所填字樣補行填刻以歸畫一○乙未

上幸瀛臺○諭四川阜和協副將馬詔蛟前在軍營曾經出力本日兵部將該員帶領引見詢知伊母年逾百齡實為昇平人瑞著加恩賞給御書扁額並上用緞四匹貂皮六張用示優獎仍令該員即速回任侍養以昭朕嘉惠耆年之至意○又諭據伊勒圖奏現在伊犁管理攜眷綠營兵丁之官員等僅足分派各屯城管理種地事務其出派創採鉛場官員不敷委用請將都司呼克申暫留管理移咨勒爾謹於內地遊擊都司內派一員三年一次更換等語都司呼克申此際如滿五年即派員更換若尚未年滿俟五年後勒爾謹再照伊勒圖所奏派員更換嗣後五年滿時

派員更換之處著為令○又諭據伊勒圖等奏今年伊犁種地回子等應交米糧俱已全數納交請賞給阿奇木伯克鄂羅木咱卜等緞匹等物等語著照所請賞給鄂羅木咱卜等以示鼓勵○又諭據伊勒圖奏稱明歲應遣來之第四班土爾扈特和碩特等請仍照舊例於八月初間前至熱河等語從前土爾扈特台吉等分為四班輪流行走此內有入覲者有未獲入覲者此次應仍將未入覲者遣來其已入覲者過十年再行輪班入覲○又諭近來善撲等屢次皆勝蒙古揆厥所由自因管理善撲營之拉旺多爾濟扎拉豐阿均係蒙古伊等授意各該處不將好善撲挑來現在滿洲因蒙古中無好善撲自為滿足不肯學習保無日久偷安之漸應派出滿洲大臣一員管理所有拉旺多爾濟之缺即著豐紳濟倫補授將此交理藩院通諭各蒙古知之○丙申諭申保著調補伊犁叅贊大臣

綽克托著授為叅贊大臣。前往烏什總理各回城事務。綽克托到彼時。申保再前往伊犁。○諭軍機大臣等。本日據富勒渾王。王亶望。李質穎會奏海塘工程情形一摺。與本月十四日由驛遞到之摺相同。現在海塘水勢既較前又深丈餘。且成頂衝形勢。關係甚為緊要。自應上緊趲築條塊石塘。以期迅速完竣。至道員王燧。蔣全迪及工員等。現既委令督辦工程。如果實心出力。工竣後自可加恩鼓勵。

倘因意存急功之見。止圖草率完事。以致日後不能鞏固。則惟富勒渾王。王亶望。李質穎是問。恐伊等不能當此重咎也。再海塘工程所關甚大。該督撫等自應協力同心。不宜稍存成見。乃前閱十一月初二日王亶望拜發摺內。止稱與富勒渾會同履勘意見相同。而不及李質穎。朕尚意李質穎必已啟程。陛見來京。是以未經敘及。乃今日奏到之摺。係十一月初四日拜發。在前摺之後。又係三人一同

列銜。是李質穎尚未起身。何以前摺並不會奏。可見王亶望與李質穎竟有意見不和之處。封疆大吏同為國家督辦大工。原當和衷共濟。況又際險要之候。若如此各存畛域。又將何以集事。著傳旨嚴行申飭。嗣後倘再不知悔改。亦不能稍為曲貸也。將此由六百里傳諭該督撫等知之。並令迅速覆奏。尋奏。現在趕辦石塘。率員隨時查勘。不敢絲毫草率。至籌辦章程。均與臣李質穎會同妥商。俱不

敢稍存歧視。自取重譴。得旨覽。有則改之。無則加勉可也。丁酉。諭綽克托。現在出差工部事務。有福隆安兼管。無庸派人署理。其都察院左都御史事務。著德保兼署。吏部奏酌改銓選則例事宜。一佐貳首領題陞州縣定例。佐雜陞補本班要缺。必須卓異保薦。及俸滿人員。而佐貳首領題陞州縣尤為緊要。近年各省題陞不少。均係俸資最淺。與例不符。自應示以限制。請嗣後除應調及應陞河

員仍照舊辦理外餘則務令查明前項資俸如無即將現任歷俸五年以上者題陞一投供人員告病定例不論久暫一經病痊本月到班仍准銓選難免意存趨避請嗣後臨時患病者病痊日另扣投供限期一議敘即用人員與選班正班間用查舊例各項即用人員列入班次先儘選用至修書捐餉優叙即用各員人數較多未免有礙正班請照新進士即用知縣例與正班人員分缺間用一佐雜補缺定例揀發試用不扣年限准其遇缺咨補部選者扣除與分發佐雜咨補之例辦理未免過優請嗣後指缺咨補時查未經具題者扣除部選餘即照州縣以上例概不准咨補一滿洲蒙古報捐職銜定例滿洲蒙古人員外用止應州縣通判以上等官其六品以下佐貳概不補用應請將不應選補之職銜亦停止報捐以符體例報聞○是日起上以冬至祀

天於園丘齋戒三日戊戌諭據磨勘試卷大臣奏江南省第一名顧問卷頭場四書文三篇純用排偶於文體有關且首藝未經點題請將該考官及本生交部查議等語制藝代聖賢立言原以清真雅正為宗朕屢經訓諭不啻至再至三何得又將駢體錄取且拔冠榜首所謂釐正文風者安在況三藝俱用排偶場中易於辨識併不必再用字眼關通更易滋別項情弊殊屬不合除將該舉子交部照例查議外所有江南正考官錢載副考官戴均元均著交部議處並將此通諭知之○吏部議覆福建巡撫富綱奏閩縣南臺地方稅口商艘如織向設海防同知一員遇有差遣五虎門巡檢通融改駐未免有顧此失彼之處查福州府現設經歷照磨司獄三員其照磨一員儘可裁汰請即於南臺添設主簿一員分駐辦理所需衙署即將照磨署移建應如

所請從之○已亥

上詣

南郊齋宮齋宿○諭今歲五城內外粥廠貧民就食者較多所有例給米石恐不敷用著加恩每廠每日再增給米一石以資煮賑副朕軫念貧黎至意該部即遵諭行○又諭本年南巡接駕廢員經吏兵二部查明情節較輕者帶領引見除加恩錄用外其賞給職銜者業經朕親加甄別不得再准捐復至慶祝萬壽賞給職銜各員及此外緣事降革人員內如有在部呈請捐復者該部覈明情節無論應准應駁均著具奏請旨准捐人員並著該部帶領引見候朕欽定○諭軍機大臣等軍機大臣會同戶部議駁申保請於伊犁等處照南路烏什之例行使普爾錢文之處毋庸議一摺所駁是已依議行矣伊犁鼓鑄清錢回部則沿用普爾原以順俗從宜各因其便如果葉爾羌喀什噶爾二城庫貯普爾壅積

一時難以疏通何妨暫行停鑄將年獲銅觔解送伊犁俾該處多鑄以期流通乃申保轉欲使伊犁等處亦從回俗改用普爾無論一以當十多寡懸殊兵民未便且亦不成事體申保於此事並未通盤籌畫而徒張皇其詞以圖見長殊屬非是申保著傳旨申飭其摺內稱葉爾羌喀什噶爾為葉喀二城乃書吏省文惡習最為可厭早屢有旨申保豈不知之已令軍機大臣改正矣並將此諭令知之

○庚子冬至祀

天於

圜丘

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵 遣官祭

孝賢皇后陵

端慧皇太子園寢○諭據李奉翰等奏張家油房工程於本月二十一日掛纜合龍漫口立見斷流水勢全歸正河下注勢甚暢達等語以手加額欣慰覽之此次該總河等辦理

尚屬迅速著將李奉翰國泰雅德及在工出力各員并均交部議敘其都司銜候補守備張位守備崔見龍從前存記議處之處並著加恩開復俾功過各不相掩該部知道○又諭據喀寧阿奏審擬太原營鼓手於武闡鄉試捏報中箭一案究出武生劉際昌等賄囑情弊將該犯等依例問擬發遣失察各員分別交部議處並自請嚴加議處一摺此案前經喀寧阿具奏嚴訊鼓手並無別項情弊朕

知武闡外場虛摺捏報乃向有之事因傳諭該撫嚴切審究始訊得賄囑確情自應照例治罪以示懲儆叅將德成監視箭靶漫不經心於擗鼓兵丁受賄舞弊又無覺察著交部嚴加議處其失察之提調監試道員費淳方應清叅將韓正國著一併交部議處喀寧阿著交部嚴加議處至此案一經嚴訊所有武生賄囑鼓手捏報實情即行敗露可見外省此等情弊總未能剔除各省督撫等嗣後辦理武闡務須留心查察不得存姑息了事之見將此通諭知之○諭據李奉翰奏報合龍摺內稱籌酌事定即於二十六日起身馳往南河等語現在雖已合龍大工告歲尚有善後事宜正須籌辦若交與國泰雅德伊等俱有地方應辦事務難以分顧况薩載將屆百日期滿即可前往江南總督之任陳輝祖亦可回南河本任李奉翰此去徒勞往返於事無益著傳諭李奉翰毋庸前往南河如已起

程即遵旨回至工所。接印籌辦善後事務。國泰亦即回山東巡撫本任。○又諭據李奉翰等奏籌辦緊要隄工一摺。內稱擬於五堡九堡四進處築越隄一道。長一千五百五十餘丈。築高八尺。與兩頭隄工一律相平。兼得重門保障。又擬於十八堡至三十四堡築圈隄一道。長五千一百二十餘丈。共估銀五萬餘兩。自屬應行辦理之事。李奉翰等即派明練州縣分段承築。委本管道府來往督催。應營駐工監辦。依限早竣。務使工歸實用。俱著照所奏辦理。至張家油房從前所建挑水壩六十丈。在彼時挑溜北趨。自為得力。今已經合龍。大溜直下。覺留此壩根轉於全河暢注之勢有礙。朕觀所進河圖。自儀封三十四堡起至考城四堡。隄外灘寬。毋庸築隄處所。恐明春汎水發時。挑水壩根逼緊。或轉致溜勢南趨。正當李奉翰等所築東西兩隄之間。無重隄之處。或近刷隄根。尤不可不豫為籌及。今

將此處并挑水壩處所。俱用硃筆圈出。或將挑水壩量行拆短。并將自西至東硃筆橫畫出處。展寬河身。俾全河足資暢注。且免汎水長發時漫灘之患。如何。李奉翰等即悉心酌妥辦理。將此由六百里傳諭知之。○辛丑上幸瀛臺。諭據六阿哥綿恩阿哥奏稱。巡撫喀寧阿平日並無往來。忽呈遞請安片子。並送魚數尾。未便收受等語。阿哥等駁回。甚是喀寧阿身為巡撫。與阿哥等毫無瓜葛。何必饋送。雖係微物。恐漸染成風。外省大臣與諸達太監等串通滋事。喀寧阿著傳旨申飭。○壬寅。諭昨據雅德奏。考城縣知縣王金成來京引見。以同知用。理應回任。遇缺題補。乃因漫口尚未堵合。在部告病。懇請回籍經吏部行查。到豫顯有託病規避情事。請旨將王金成革職。勒部押發。來豫自備資斧。在工効力等語。已批照所議行。交該部矣。王金成因上年籌辦撫卹事宜。著有微勞。加恩令送部

引見以同知用該員稍有天良自應及早回任悉心料理乃因本年漫口尚未合龍輒思託病規避在部具呈此風斷不可長雅德所叅甚是嗣後吏兵二部於文武員弁在部具呈告病者查明該省如遇緊要事務顯有託病規避情節即行具摺叅奏不必行查該督撫又諭據富綱奏本年閩省鄉試有侯官縣廩生林朝綱現年八十六歲連江縣附生黃建洛現年八十二歲三場完竣俱未中式等語林朝綱黃建洛俱著加恩賞給舉人一體會試○諭軍機大臣等前因外間流傳劇本如明季國初之事有關涉本朝字句亦未必無違礙之處傳諭伊齡阿全德留心查察斟酌妥辦茲據伊齡阿覆奏派員慎密搜訪查明應刪改者刪改應抽掣者抽掣陸續黏簽呈覽併請勅各督撫查辦等語自應如此辦理著將伊齡阿原摺鈔寄各督撫閱看留心查察但須不動聲色不可稍涉張皇將此

遇各督撫奏事之便傳諭知之又諭據閔鶚元奏江蘇省分辨浙省海塘石料十一萬三千七百五十丈先經太湖廳吳縣稟報按日計算一年止可出石五萬餘丈不及辦數之半當同陳輝祖商酌於江省凡有產石之區委員博採廣收今太湖石料已經鑿成運至水次者七十餘丈此後源源濟運不致有誤至常州府屬之宜興荆溪二縣山石石質鬆脆線紋碎裂難以見方成丈未能適用等語所奏未見實心不過虛應故事已於摺內批示矣海塘工程自朕南巡降旨修築後在江蘇分辨石料已有成議彼時接准浙省來文即當豫為籌辦乃直至九月內陳輝祖接署督篆始行奏明催辦可見薩載等在任時已不免於遲緩閔鶚元又復虛文塞責殊屬非是至宜興荆溪石質雖鬆脆不能供用而此外附近產石地方尚多即如朕南巡經臨無錫時望見惠山北首一帶俱有採石舊窩

則其餘朕所未見者。正不知凡幾。何以並未籌及。一處可見外省於承辦隔省事件。總不肯實心實力。閱鶚元著傳旨申飭海塘關係民生甚鉅。倘再不上緊辦運。致誤要工。恐不能當其咎也。將此傳諭閱鶚元。並令陳輝祖知之。○癸卯。

上幸瀛臺。諭向來各部院司員。有陞調別處者。有准留原衙門行走之例。因為熟練事務起見。但部院人材不乏。斷無少此一二人。即不能辦事之理。況司員中簡用外任者。又未見該堂官等奏留。可見此事原可不。必所有現在各部院奏留人員。俱不准仍兼行走。至刑部為刑名總匯。必得諳悉律例之員。理藩院有外藩事件。必係蒙古人員。能習蒙古文語者。奏留之例。尚屬可行。然亦必帶領引見。候朕欽定。方可准其仍兼行走。著為令。○旌表守正捐軀江蘇上海縣民朱忝林妻薛氏。○甲辰。諭軍機大臣等。據李奉翰等奏。張家

油房壩工。自二十三日堵閉穩實。後引河長水八尺七寸。匯歸正河。溜勢甚暢。二十四日未刻。西壩尾陡蟄一丈三尺。長六丈。至亥刻搶護甫穩。後身壩臺又復行蟄。陡然裂縫。壩臺登時陷塌。過水外高。內窪。掣溜湧急。計寬二十三大。深二丈五六尺。趕緊軟鑲。尚易辦理。引河溜勢。尚分十之三四等語。此次合而復開。覽奏深為屛念。然亦無可如何之事。現既將西壩幫寬。仍用軟鑲。東壩於外首邊埽。

掛纜捆鑲。斜向西北挑溜前進。作兜袖合龍之法。自應如此。上緊趕辦。務於迅速之中。存步步慎重之意。至李奉翰前奏擬於二十六日前往江南。業經傳旨令其仍回河東本任。今口門既於二十四日復開。則該總河自尚未起程。此時李奉翰竟不必前赴江南。即當接印督同在工員弁。專心堵築。俾年內即得告竣。斷不可遲至年外。以致辦理費事。至李奉翰等請治罪之處。目下且不必交部統俟。

合龍後覈定功過再降諭旨將此由六百里傳諭知之仍令將現在籌辦情形迅速覆奏

是月山西巡撫客寧阿奏查閱運城黑河鹽池傳集該商飭令時加挑濬勿使淤廢即將所挑沙泥就近加高於攔水土埂上以資蓄水並巡歷各驛站點驗馬匹加意餵養又嚴飭所屬稽查保甲緝盜詰奸實力奉行得旨一切實力妥為之母為空言○原任浙江巡撫王亶望等奏海塘黃字字號等處已成頂衝議於柴塘以後趕辦搶險條塊石塘三百丈以備春汛奏聞在案茲將石塘圖說并趕辦搶險情形繕摺進呈得旨諸凡用心為之以實可也○署雲南巡撫劉秉恬奏遵旨各省估變物料隨時估變毋得任意遷延仍於年終彙奏查滇省嶠峨縣巡檢衙署及白石谷井大使昆陽州海口州同衙署均經先後裁汰日久尚未估變徒有應變之名終無變價之實現在派員查勘確估歸公嗣後

如有稽遲日久物料朽壞價值不及定例應變之數即著落歷任地方官賠補並交部議處得旨知道了

大清高宗法天隆運至誠先覺體元立極敷文奮武孝慈神聖純皇帝實錄卷之一千一百十九

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百二十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次慶撫

總裁官經筵講官太子太傅文華殿大學士文淵閣領閣事稽察欽奉 上諭事件處管理理刑部戶部三庫事務

世襲騎都尉軍功加十九級隨帶加二級又加二級軍功紀錄五次又加二級尋常加二級軍功紀錄一次慶撫

尋常紀錄十次臣德瑛經筵講官太子太傅南書院總纂官臣曹振鏞等奉

校修

乾隆四十五年庚子十二月乙巳朔

上詣

大高殿行禮○幸瀛臺○丙午諭向來荆關打  
箭鑪兩處徵收稅務俱派部院司員前往管  
理一年報滿更換但派往之員人地生疎又  
或經理不善往往易致缺少按例既不可不  
令其賠補而該員等因一二年小差以致折  
變房產賠繳官項非所以示體恤雖該員等  
賠項每加恩豁免而於帑項公務究屬無濟  
所有此兩處稅務由京派員前往之處竟可

不必其業經派往者俱著掣回嗣後著交該  
督撫照臨清等關之例派委委員奏明管理  
其應行裁改各事宜著該督撫妥議具奏○  
以福建按察使楊廷樺為福建布政使○旌  
表守正捐軀河南寶豐縣民孟西平妻郝氏  
○丁未。

上幸瀛臺○諭吏部議覆直隸總督袁守侗題  
請滄州知州汪大鏞實授之處查該員任內  
有降職二級戴罪徵收等案尚未查銷與實  
授之例不符該督業經聲明應毋庸議一本  
所辦尚未周密各省督撫題奏陞調人員有  
與例未符者經部議駁朕特降旨允准原因  
其人地相需難拘成例若已經陞署即係在  
本任辦事之員有何迫不及待而必為之違  
例奏請實授乎此皆上司瞻徇屬員欲題請  
實授為陞轉地步最為陋習從前曾經降旨  
將未滿年限題請實授之該督撫定以處分  
至題請實授有降罰案件與例不符者亦應

將該督撫一併議處。乃該部又因有業經聲敘應得免議之例。未將該督議處。夫既知聲敘。何不可待之。有以致辦理不能畫一。轉易啟該部高下其手之弊。嗣後各督撫題請實授人員。有與例不符者。吏部議駁外。即將該督撫議處。所有汪大鏞一案。即照新例行。諭軍機大臣等。前據閔鶚元奏。宜興荆溪三縣山石。石質鬆脆。難以見方成丈。未能適用等語。所奏未見實心。已傳旨申飭。並面諭薩

載。回任實力督辦矣。海塘工程所用石料。原有裏外層之分。所謂背後石料也。若不能多購堅細石料。原可酌量於頂衝處所用堅細石料。以禦潮汐衝激。其潮平水緩之處。將裏層酌量間用宜興荆溪石料。未始不可。且即閔鶚元在吳縣太湖所採。及王亶望在浙所購石料。亦豈無一二石性鬆脆者。乃閔鶚元竟以宜興荆溪石質線文破裂。未能適用。一奏塞責。此總因鄰省事務。漠不關心。如越人

視秦人之肥瘠。實屬非是。著再傳諭閔鶚元。務須痛改積習。實力督率屬員。認真採辦。迅速趕運浙江。以備海塘要工之用。至王亶望等接收石料時。亦當酌量情形。撓搭配用。使要工速竣。而辦理不致掣肘。將此由五百里發往。並令富勒渾王亶望知之。以福建汀漳龍道李慶茶為福建按察使。浙江巡撫兼管鹽政李質穎疏報仁和場開墾沙地七千六百三十七畝有奇。戊申吏部議覆禮

部尚書兼管太常寺事德保等奏。稱學習贊禮郎等官。俱係行走有年。諳習典禮。請照各衙門學習行走筆帖式例。年滿奏留。遇有缺出。先儘補用等語。應令該寺將現在學習之員。帶領引見。如聲音洪亮。即准其留寺。若唱贊平常。即行黜退。三年報滿。一例甄別。從之。○己酉。

上幸瀛臺。諭軍機大臣等。據富勒渾等奏。現在趕辦海塘。將黃宇字號頂衝處所於柴土

塘後趨砌石土外用條石內填石塊加高培厚每丈用椿木八十根可減魚鱗石塘之半一面嚴飭於杭嘉湖寧紹五府委派員役多雇人夫添安椿架上緊趕辦以防春汛並嚴催承辦石料各縣分頭趕辦勒限運工備用等語自應如此辦理至需用石料屢經降旨傳諭閔鶚元督率屬員認真採辦迅速趕運赴浙並因石料有裏層外層之分其頂衝處所自應用堅細石料以禦潮汐至潮平水緩之處不妨以宜興荆溪等處山石間用已諭知閔鶚元實力採辦並諭王亶望等於接收石料時酌量情形撓搭配用但浙省亦須就近設法採辦不可專恃江蘇一省購運著傳諭富勒渾王亶望等務須通盤籌畫實心經理以期要工速竣不可稍存觀望之見○吏部等部議覆山東巡撫國泰奏壽張縣改為題缺汶上縣仍隸兗州金鄉縣仍隸濟寧分轄各事宜○壽張縣政務紛繁並有督率隄

工開壩實為水陸衝衢請改為衝繁難三要缺在外題補一刑名事件例由府州覈詳今汶上仍隸兗州金鄉仍隸濟寧應將一切案件及倉穀錢糧由該府州申詳盤查以符體制一歲科兩試進數向例設有定額今汶上金鄉二縣既經改屬應仍照舊考取毋庸另議其汶上縣之撥入濟寧州學金鄉縣之撥入兗州府學者應令各歸縣學廩增各缺即與本縣生員挨次間補較其食餼年分一體

出貢文武童進額如之一汶上縣之宋家窪向資洩水灌田濟運今既仍隸兗州自應就近督率挑濬一督緝督徵應歸該府州查辦其未經改歸以前所有任內處分聲明照離任官例議結餘則照例議處以專責成應如所請從之 庚戌

孝惠章皇后忌辰遣官祭

孝東陵○諭朕恭閱

實錄見鰲拜以從征屢立戰功歷封公爵

聖祖仁皇帝嗣統與內大臣蘇克薩哈等為輔政大臣並加太師是時

皇祖冲齡踐阼鰲拜受事以後即專權自恣擅作威福因與內大臣費揚古有隙坐伊子倭赫並侍衛西住折克圖覺羅塞爾弼等以擅乘

御馬及取

御用弓矢射鹿罪俱棄市並坐費揚古怨望亦棄市並殺其子尼侃薩哈連籍其家以與其

弟穆里瑪又蘇克薩哈係鰲拜姻姪亦以論事齟齬積而成讐因蘇克薩哈籍隸正白旗鰲拜欲以薊州遵化遷安諸屯莊改撥隸黃旗而別園民地給正白旗

詔遣大學士管戶部尚書蘇納海與直隸總督朱昌祚巡撫王登聯丈量酌易經昌祚等勘明奏請停止圈換鰲拜即坐蘇納海以撥地遲誤昌祚等以紛更妄奏悉逮治棄市且以蘇納海族人英俄爾岱為睿親王私黨令部

臣盡削世職以洩其忿並以蘇克薩哈疏稱往守

陵寢得以生全之語即誣坐以懷抱奸詐存蓄異心二十四大罪應予磔死

皇祖鑒其枉堅不允所請鰲拜攘臂强奏累日竟予絞決並誅其族屬又入

對時輒請申禁言官不得上書陳奏時有竊鰲拜馬者即捕斬之並殺

御馬羣牧長

皇祖以鰲拜黨權不法怙惡弗俊用行政專恣妄為文武各官欲盡出伊門下與穆里瑪等結成羽黨凡事在家定議然後施行倚仗兇惡毀棄國典

特降諭旨嚴拏勘審並

親加鞠問情罪俱實諸王大臣擬請正法皇祖念其効力年久不忍加誅從寬革職籍沒同其子那摩佛一併拘禁迨伊死後仍念其舊勲追賜一等男令其弟孫相繼承襲

皇考世宗憲皇帝御極後

賜鰲拜祭葬。復一等公。世襲罔替。是鰲拜一身之功罪。載在冊籍。昭然不爽。朕惟大臣為國宣勤。功銘鐘鼎。尤當深自斂抑。律已奉公。以保全終始。況以輔臣躬承顧命。翊贊機務。更宜小心謙謹。不可稍涉縱恣。乃鰲拜當日自恃政柄在握。輒敢擅權亂法。邀結黨羽。殘害大臣。罪蹟多端。難以枚舉。若非

皇祖英明剛斷。立予殛究。漸將跋扈難馴。而政事亦不可問。至圍地一案。相持不決。百姓環訴失業。幾致釀成大事。

皇祖不即加誅。僅予褫奪。並仍給以男爵。已屬格外之仁。至

皇考復還公爵時。因念鰲拜舊勞。伊孫達福才具又尚可用。是以仍予

施恩。蓋於鰲拜擅權縱恣。固所熟聞。至其不法款蹟。如

實錄所載。景景若此。未必一一臚悉也。今朕備

稽事實蹟。狀顯然若不覈其功罪。明示創懲。在鰲拜一家之僥倖。所關猶小。而後之秉鈞執政者。無復知所顧忌。將何以肅綱紀而杜貪邪乎。所有現襲鰲拜公爵之德生。本身既無過犯。且令承襲。俟出缺時。即行停襲。公爵仍照

皇祖所降諭旨。給予一等男爵。世襲罔替。已足以示國家法外施恩。舊勲之意矣。至鰲拜當時所殘害諸臣。中有曾以戰功得受世職。為鰲拜所枉。復行褫革者。著各該旗詳悉查明。並現在有無子孫。奏聞請旨。候朕酌量加恩。朕辦理庶務。一秉大公。至正。雖於已往臣工之功罪。亦必追論。嚴明懲姦。回於既死。以為萬世子孫。有大臣擅權不法者戒。並將此通諭中外知之。又諭據國泰奏。新授西寧府知府秦震鈞。呈稱父母年老。向俱迎養東省。今同赴新任。恐跋涉維艱。可否准其改留近省等語。秦震鈞既因親老。道遠難以迎養。呈

請改留近省。若不允所請。非朕孝治天下之道。秦震鈞著仍留平度州之任。其西寧府知府員缺。著巴海補授。至國泰摺內所稱可否准其改近之處。其意冀於准行後。遇有東省知府缺出。即可仍將該員補用。秦震鈞本係知州。經朕加恩擢用知府。今因親老請留。止應將該員情節奏明。不得徑請改近。使該員既邀陞擢之恩。復為自便之計。君臣父子各有大義。為臣子者。不應以此居心。督撫等亦不應如此代為陳請。將此通諭中外知之。○又諭曰。綽克托前已授為叅贊大臣。前往烏什總理回城事務。著加恩賞戴花翎。○諭軍機大臣等。據李奉翰等覆奏。將挑水壩拆短三十餘丈。汎水長發時。不致逼溜。留壩尾二十餘丈。為護灘之用等語。前經傳諭該督等將挑水壩量行拆短。本為合龍之後。籌畫善後機宜。為思患豫防之計。今西壩壩根既復有墊陷之事。則此時挑水壩尚應存留。拆短

已可緩辦。李奉翰等自應上緊將軟鑲工程趕做。并將現在口門尚剩若干。及日今辦理情形。若何何時可以合龍之處。迅速覆奏。以慰廑注。乃李奉翰等奏到各摺。僅言拆短壩工及交印謝恩等事。而於堵築要工。竟未提及。豈該督於復經墊陷之後。心存畏懼。竟於事體緩急輕重。不甚明曉耶。惟閱國泰摺內稱壩工墊陷處所。水不甚深。慎重趲辦。每日可得二丈。約計旬日。可以補築完竣等語。該督等此摺。係初二日拜發。迄今又閱五日。計算此月望前。可以蒞工。著傳諭李奉翰等。即將籌辦情形。若何及是否補築就竣。何日可以合龍之處。迅速由驛覆奏。以慰廑念。尋奏現經進埽趲辦。追壓堅實。口門止剩五丈二尺。再進兩埽即可掛纜堵合。得旨覽奏俱悉。佇俟佳音。○禮部奏請嚴順天鄉試磨勘例。查應試舉子。係順天籍貫。即南北四員。亦皆久住京師。依親託故。熟識編檢各員。保無豫

為囑託情弊請照會試例先派各員發榜次日即行磨勘并飭各省亦將試卷於榜發後封解毋得遲延以昭慎重報聞○辛亥

上幸瀛臺○諭軍機大臣等據姚成烈奏甄別教職佐雜千總一摺摘敘事由內竟稱俸滿教雜千總殊不成語此等字樣最為外省書吏省文惡習形之章奏殊非臣子對揚之道屢經降旨飭諭姚成烈寧不知之乃於陳奏事件一任幕友書吏率行書寫豈伊全未寓目耶除原摺改正發鈔外姚成烈著傳旨申飭○實授李國標為湖廣提督○壬子

上幸瀛臺○諭向來科道及部院郎中員外郎等官俱兼旗下叅領及佐領此乃舊例而公中佐領亦有著文武大員兼管者非科道等官兼部院司員可比現在兼正白旗印務叅領之給事中西成著照常兼銜不必開缺嗣後八旗俱照此辦理○諭軍機大臣等據李奉翰等奏張家油房工程西壩已進五占東

壩頭溜勢稍緊因將壩頭追壓堅實掛纜捆鑲挑溜進占務使十分穩固步步實在每占長二丈追壓兩日即可到底現在口門止寬十六丈水深仍不過二丈五六尺約初十外可以堵築完竣等語該處工程既尚餘十數丈計期自須至初十以外方能辦竣如果依期堵合尚不為遲此時該總河等轉不可存過於欲速之見惟當加倍慎重填壓堅實俾所做之工十分穩固以免他虞朕盼望合龍

晝夜懇切而於垂成之際尤不敢不期穩實李奉翰等務須仰體朕意妥速慎重為之將此由六百里發往仍令將現在辦理情形迅速馳奏尋奏兩壩現在趕緊加高壩身填壓十分堅穩於十三日堵合事在垂成臣等惟有加倍慎重以期妥竣一俟補築完固另行奏報得旨日夜盼望之至據奏五百里馳遞即為之心快開摺知覆旨然後心定也○吏部議准陝甘總督勒爾謹奏稱伊犁添設撫

民同知及駐劄巡檢各事宜。查同知一缺。該處戶口殷繁。有刑名案件之責。應定為邊遠緊要滿缺。每遇缺出。即於陝甘二省滿員同知內揀選調補。三年俸滿。照苗疆例陞用。無則奏請部選。至新設巡檢二員。一駐霍爾果斯。兼管東察罕烏蘇。一駐綏定城。兼管塔爾奇城。烏可爾博爾蘇克城。均定為邊缺。責令稽查彈壓。由內地揀補。同舊設巡檢統歸撫民同知管轄。亦三年俸滿。陞用。其新疆巴顏岱城。即令惠寧城巡檢兼管。養廉公費。照理事同知及惠寧巡檢例支撥。同知書吏四門子二皂快八件。作二禁卒。十巡檢。攢典一皂隸二馬夫一弓兵四。所需工食亦照例支給。改鑄伊犁理事同知關防。新設之同知巡檢關防印信。擬定由部頒發。並各建衙署一所。以資棲止。從之。○癸丑。上御乾清門聽政。江南河道總督陳輝祖奏遵旨挑通引河。查引河頭接連湖邊之處。間

段探丈。水深止一尺五六寸。及八九寸不等。均須一律挑濬。又太平河二堡迤下湖身較窄。應行展寬。當即督令河員切實估計。太平引河需銀七千五百餘兩。裴家場張家莊引河頭需銀六千三百餘兩。天然引河頭需銀二千五百餘兩。分別疏濬報聞。以太僕寺少卿勒保為內閣學士。兼禮部侍郎。甲寅。都察院左副都御史吳玉綸奏。向例各衙門事件。司員具稿呈堂。畫題。或有意見不合。即令司員轉回各堂。往來商辦。因思各堂官所以異同之處。必須各就所見。公同面商。方能酌歸妥協。若僅令司員轉達。恐有瞻顧囁嚅。及依回迎合之弊。請嗣後於相見公所。面商酌定。毋得令司員輾轉傳述。致稽時日。而滋紛擾。違則議處。得旨。此奏是依議行。○以綽羅斯扎薩克固山貝子納木扎勒為鑲白旗蒙古副都統。○乙卯。吏部議准。廣西巡撫姚成烈奏。稱思恩一府向為苗疆要缺。查該府

事簡民淳。所轄徭獠與齊民無異。請刪去苗疆字樣。改為腹俸部選。所屬經歷司獄如之。至百色同知巡檢二缺與右江鎮總兵同城。烟瘴頗重。應請仍舊從之。丙辰諭軍機大臣等。前經降旨將慶桂授為烏里雅蘇台將軍。令其由彼前往。但慶桂在外年久。伊母年高。慶桂至烏里雅蘇台將游牧事務與巴圖辦完時。令巴圖暫署將軍印務。伊即來京。陛見。俾得奉養伊母數日。俟慶桂回任後。巴圖

再回游牧。著傳諭慶桂。巴圖知之。○又諭曰。車布登扎布奏稱伊年已老。且已至張家口外三臺額。請陛見。甚屬可憫。著加恩准其來京。陛見。於本月二十三日以前到京。將此諭令知之。○以左庶子童鳳三左贊善王仲愚俱充日講起居注官。○豁除甘肅平番碾伯二縣水衝地三十三頃有奇額賦。○賑卹甘肅皋蘭河州狄道金縣靖遠會寧隴西安定漳縣洮州廳華亭山丹武威平番西寧文縣

涇州肅州等十八廳州縣。本年水災飢民。丁巳諭軍機大臣等。據閔鶚元奏辦理浙江海塘石料情形一摺。所奏辭支而費已於摺內批示矣。其所稱移匠鳩工費省事速之處。辦理尚是。至稱現在飛飭藩司瑞齡馳赴惠山北首一帶察看舊採石塘。并就近各處是否有石可採。堪供塘工之用。一律籌辦等語。海塘工料關係鉅工。需用甚急。閔鶚元到任後。即當豫為籌辦。多方試採。江蘇等處產石

地方尚多。即如惠山北首一帶俱有採石舊塘。朕南巡經臨。無錫時尚然。望見閔鶚元身任地方。豈竟毫無見聞。乃必待朕降旨飭諭。始飭瑞齡前往察看。以為塞責之地。則其從前未經實心辦理。可知。若其石不可用。即當據實奏聞。乃閔鶚元並不切實引咎。徒以文筆支辭。掩飾其過。以當覆奏。此等虛文。豈能於朕前嘗試乎。閔鶚元平日辦事尚屬認真。不應若此。著傳旨申飭。至宜興荆溪石料可

備裏層塘工之用不妨酌量搭配屢經傳諭  
閱鶚元應遵照前旨速行籌畫覆奏此後務  
須督率屬員採辦迅速趕運以濟鉅工將此  
諭令知之尋奏無錫惠山北首勘明沙石零  
星無可採用祇因土色帶黃居民挖土以培  
工作是以遙望似係舊開石塘查該縣之西  
洋山石與荆宜二處相仿亦可採為裏石之  
用並令一體開採報聞戊午諭朕於明年  
二月二十二日啟鑾巡幸五臺所有應行豫

備事宜各該衙門照例豫備至蹕路所經已  
降旨止就舊有行宮量加修葺毋許再行添  
建該督撫等務宜妥協辦理不得踵事增華  
致滋糜費以副朕省方觀民之至意又諭  
曰和珅等奏請將內務府現任筆帖式歸併  
八旗應考現任筆帖式內屆期統由吏部請  
派大臣一體考試等語固屬酌歸簡易自應  
如此辦理但各部院衙門筆帖式甚多內務  
府筆帖式較少若一體考試勢必內務府人

員考居下等者多此亦如鄉會試士子不能  
不分別南北省分因地取材也嗣後內務府  
筆帖式著歸併各部院筆帖式一體考試并  
仿照鄉會試之例分別字號另列等第以昭  
平允旌表守正捐軀廣東番禺縣民周賢  
江妻鍾氏貴州廣順州民蔡世維妻周氏  
已未吏部等部議覆陝甘總督勒爾謹疏稱  
遵旨覆議陞任烏魯木齊都統索諾木策凌  
奏庫爾喀喇烏蘇駐劄辦事大臣及屯差兵  
丁並未設有文員地方倉庫自應專員管理  
請添設同知一員又喀喇巴爾噶遜南通回  
疆西通伊犁塔爾巴哈台等處請派春兵三  
百前往駐守巡防即於內地簡僻營分酌裁  
守備千總更換駐劄分管原派之隻身兵六  
百撤回應如所請從之工部議准前任奉  
天將軍宗室弘昫奏稱錦州屬之松嶺子邊  
門界十三莊煤窑六座開採日久煤線斷絕  
應請封閉從之

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百二十

實錄卷之一千一百二十

三

大清高宗法天隆運至誠先覺體元立極敷文  
奮武孝慈神聖純皇帝實錄卷之一千一百二十一

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保部尚書紀錄六次臣曹振鏞等奉

校修

乾隆四十五年庚子十二月庚申諭會同四

譯館係給朝貢外藩居住之所雖派委郎中  
大使通官等專管而禮部堂官實有統轄之  
責自應繕葺整齊如有坍塌即當早為修理  
俾得寧居以副柔遠之意何至屋宇頽塌致  
高麗從人被壓傷斃實屬不成事體禮部堂  
官所司何事著同該司員等一併交部嚴加  
議處其會同館所有牆垣房屋並著該堂司  
官等出貲一律修整完固至被壓人役著豐  
裕料理並著賞伊家屬銀兩交與正副使帶

回轉給。亦令該堂司官出貲。以示罰懲。諭軍機大臣等。據富勒渾奏。拏獲福建寧縣邪教人犯沈本源等。現飭究擬一摺。奸民倡立邪教。轉相傳習。煽惑鄉愚。最為人心風俗之患。自應嚴速查辦。以淨根株。富勒渾現在浙省。接據該縣冷震金稟報一面。奏聞一面。札知富綱飭臬司酌派大員。馳赴該犯原籍逐一搜查。根究夥黨。查拏解省。嚴行究擬。富綱近在福建。該縣諒早已稟知。自當就近查

拏辦理。何以未據該撫奏到。殊屬遲延。著傳諭富綱。即將此案邪教人犯。曾否盡獲。現在作何查辦。及因何遲延。緣由迅速覆奏。○二等昭信伯李侍堯緣事革職。以其弟奉堯襲爵。以故一等子文慶弟七十一一等男百順子七十一二等男噶魯弟子蘇隆阿各襲爵。○辛酉以故三等伯李境子慶壽一等子博敦子博爾忠額二等子班達哈子特通阿一等男金文奎子菩薩保二等男福通阿子

咸中三等男音登額叔六十三各襲爵。○壬戌諭軍機大臣等。據哈寧阿奏河東乏商。現在尚餘五家。應入來歲更替其四十一二兩年新充之商。明歲亦屆五載應替而留辦各商統計引數甚重。若一時更退未免勢有所難。因查留商王元興等辦理竭蹶。應准其更退。其郭順昌等十一家准其酌減引數以節商力等語。該處商人現在情形如此。自不得不為調劑。但辦理鹽務全在該撫及運司等

加意體恤。地方官嚴緝私販。暢銷官引。商運始能日有起色。向因河東鹽務辦理竭蹶。經巴延三奏明開挑河渠修築圩堰并淘濬鹽池為之多方籌畫。所出鹽觔必較前豐旺。即今歲喀寧阿到任後。奏查勘鹽池工程亦並無產鹽不旺之語。何致現在乏商。尚有如此之多。此必該處迤北口外鄂爾多斯阿拉善一帶所產之鹽有私販匪徒偷運內地售賣。以致引課不能多銷。商力仍前疲乏。不可不

留心查察著傳諭喀寧阿飭屬實力稽查嚴禁行販毋令絲毫偷入庶官引暢消商力日漸充裕○癸亥禮部議准四川總督文綬奏稱馬邊廳距屏山五百餘里生童赴試跋涉維艱且設廳以來應考生童均有三百餘名文風日盛請將屏山縣學額十五名內裁五名撥歸馬邊每遇歲科試由廳送府學臣照額取進廩增原缺亦酌撥四名並將越嵩廳學訓導改為馬邊廳學鑄給學記從之○以

故四川建昌道屬之松林地土千戶王珠子朝相松茂道屬之川柘寨土千戶折巴克嘉布子惡布折論下包坐竹當寨土千戶魯布木嘉爾子出物蚌阿壩阿強寨土千戶策凌嘉爾子扎舍卜郭羅克土百戶巴特瑪布木子折論扎什丟骨寨土千戶龍布革子查得孝永寧道屬之阿招土百戶山子六固湖廣麻蔡所鎮撫司把總李國相子泰龍各襲職○甲子諭軍機大臣等據李奉翰等奏張

家油房壩工於十三日丑刻究纜堵合晝夜鑲填至十五日戌刻搶辦穩固保護無虞現在加做邊埽戲壩李奉翰仍駐工防護料理未盡事宜等語以手加額欣慰覽之該處工程前此奏報合龍業已降旨分別議敘此次補築完竣無庸再行明降諭旨至壩工究係新工其外做邊埽內幫戲壩加高壩土之處正須加意鑲築務期堅實不可稍存懈怠著傳諭李奉翰仍遵前旨在工督率文武員弁

務將一切善後事宜趕辦完竣以資永固將此由五百里發往並令雅德知之○乙丑

上詣

雍和宮行禮諭粵海關經徵課稅向來原視洋船之多少貨物之粗細以定盈絀非許暨等關徵收內地貨物者可比所有圖明阿短少銀三萬二千二百餘兩據稱係船小貨粗尚屬有因著加恩免其賠補嗣後該部查覈粵海關徵收課稅即以該年之船隻貨物覈

實考察毋庸照各關例將上三居比較 丙寅諭軍機大臣等前據李奉翰等奏報張家油房壩工於十三日合龍當經傳諭該督以壩工究係新工務須加意鑲築以資鞏固連日以來未知該處壩工是否堅實甚為廕念該處壩工係就隄內灘面堵築距老隄尚遠若干丈尺此次合龍後大溜已歸中泓距新壩及老隄約有若干丈尺均應詳悉奏聞著李奉翰即速繪圖貼說呈覽至現在兩壩內

是否尚有積水茲距合龍之期已屆十日壩前曾否淤高並著李奉翰查明迅速由驛覆奏尋奏壩工堵合後引河溜勢甚暢壩上蓄高水漸次消退壩高水面一丈五六尺壩前水深處亦淤墊一丈有餘挑汛候更可淤高壩內積水深自三四尺至一丈二三尺迤下俱已乾涸新壩距老隄一千一百八十丈大河中泓大溜距新壩三百六十丈距老隄一千五百四十丈形勢遙遠通體堅穩無虞得

旨欣慰覽之 軍機大臣等議覆管理善撲營大臣扎拉豐阿等奏頭等善撲藍翎侍衛四內虛銜翎頂二與衆善撲同食護軍馬甲錢糧不足以資養贍請改為藍翎實缺即將虛銜之善撲補授其二等以下善撲人等亦請賞給公費又八旗金頂之善撲教習十六騙馬教習四請於年滿時以各旗護軍校驍騎校升補等語查頭等善撲四俱作為實缺藍翎侍衛未免過優請增一缺所增公費即

由八旗滿洲房租銀兩內每旗月出四兩該管大臣量能給賞其金頂教習五年期滿遇缺升補應如所請從之 刑部議覆湖南巡撫劉墉奏秋審未經勾決人犯定例次年提省會勘而奉文停止勾決者可否亦照例解審等語查停勾各犯案情業已審定並非量從末減自與尋常監候不同請飭各督撫照擬於次年具題毋庸解審用昭慎重從之 丁卯諭浙江海寧改建石塘以王亶望曾為

浙撫且肯擔當其事因命在工督辦但伊在服中不令與地方之務此朕用人不得已之苦心屢經降旨中外共知近因王亶望與李質穎有意見不合之處茲李質穎來京召對時奏及改建石塘後柴塘土塘仍須歲修以資保護等語朕從前親閱塘工老鹽倉一帶難以下橋素所深悉但思難以下橋處所其長不過數里非數十里之柴塘皆不可下橋改石也其餘可以下橋處所若一律改石塘

豈不為一勞永逸之計乃李質穎今有是奏此事關係重大朕亦不能懸斷著大學士阿桂同李質穎馳驛前往會同富勒渾將李質穎王亶望所見不同之處秉公確勘據實覆奏至王亶望實丁憂之人朕因一時不得其人是以前令其馳驛回籍治喪事畢即至浙辦理塘工原為公務起見其家屬自應即回本籍守制以盡私情乃據李質穎奏伊家屬仍住杭州安然聚處朕聞之為之心動王亶望

並非無力令眷屬回籍之人似此忘親越禮實於大節有虧為大臣者如此何以表率屬員維持風教從前伊父王師品行甚正無負讀書不應有此等忘親越禮之子養心殿暖閣恭懸

皇祖聖訓有孝為百行之首不孝之人斷不可用朕每日敬仰

天語煌煌實為萬世準則王亶望著革職仍留塘工自備資斧効力贖罪若再不知自咎心

懷怨望不肯實心自効圖贖前愆朕必重治其罪矣至三寶以大學士管理總督為維持風化之首今日當面問彼乃稱實知其事亦不以為怪富勒渾現為總督於此等有乖名義之事何不據實奏均著交部嚴加議處李質穎到浙已久亦並未奏及直待降旨詢問始據實具陳亦著一併交部議處至科道於尋常細故往往撚拾具奏似此為大臣之人於名教攸關者轉更緘默不言設如有貪

酷擅權者亦將寒蟬矣。國家又何藉此言官為乎。其籍隸浙省之科道尤不應毫無見聞。何以並無一人入告。斯豈風聞所弗聞乎。著令該省科道等明白回奏。戊辰諭海塘工程關係重大。必得廣集衆思。以期經理妥善。陳輝祖於此等事務尚能留心講習。現在薩載已回兩江總督之任。所有南河總河印信暫交薩載兼署。陳輝祖俟大學士公阿桂經過清江浦時。即會同前往海塘。與富勒渾等

公同履勘。籌酌詳悉。妥議具奏。諭軍機大臣等。浙江辦理海塘石工。朕因王亶望與李質穎有意見不合之處。節經降旨申飭。令其和衷辦理。今李質穎來京。面加詢問。據奏王亶望有家眷不回原籍等事。已明降諭旨。將王亶望革職留工。効力並著大學士阿桂前赴海塘。詳勘奏辦矣。海塘工程緊要。富勒渾現在兼署巡撫。自宜加意督辦。不可意存歧視。致有貽誤。所有李質穎具奏王亶望欲將

留工各員派署地方印務及欲令商人造辦海船二事。一摺並明發諭旨一道。阿桂等議摺一件。一併鈔寄富勒渾閱看。富勒渾接奉此旨。於阿桂未到以前。務須留心嚴密查察。毋致有掩飾彌縫諸弊。俟阿桂到浙。會同辦理。若彼時阿桂查出有掩飾彌縫之弊。富勒渾之罪不可問矣。慎之。將此由六百里諭令知之。己巳孝莊文皇后忌辰。遣官祭昭西陵。勅封句驪河。

河神曰靈源涵潤之神渾河

河神曰崇源協應之神

御書句驪河新建

河神廟名曰演慶扁曰惠澤鍾祥渾河

河神廟名曰順應扁曰靈脈精裡○諭所

擬盛京新建句驪河渾河

河神廟名神牌扁額俱著用單內首擬字樣至建廟神牌扁額均係褒崇神祀沿用勅賜二字未協敬謹之意嗣後遇有建廟封神等

事擬請欽定者。廟名著寫勅建其神牌扁額。俱著寫勅封字樣。○又諭前據錢載奏考證帝堯陵應在平陽不應在濮州。經大學士九卿議駁。該侍郎又具摺辨奏。朕因復交原議大臣再議。今大學士九卿等奏請將該侍郎所奏濮州屬虛平陽屬實之處。仍毋庸議。已降旨依議矣。經生論古反覆辨證。原所不禁。但既形之奏牘。並經廷臣集議。即不當再執成見。況該侍郎奏稱黜呂不韋門下客浮說之訛。夫呂不韋即無足取。亦尚不可以人廢言。况其門下客所著之書。所謂懸之國門。千金不能易一字者。豈皆毫無足據乎。且其時去古未遠。或尚有所承述。今乃欲以數千年後虛揣之詞。遽行翻駁。有是理乎。至其覆奏大要以酈道元水經注證濮州堯陵之虛。不知水經注所稱今成陽城西有堯陵者。實道元當時所親見。該侍郎轉據為辨證。尤屬自相矛盾。至其覆奏內有原奏祇辨堯陵之有

無。未嘗敢一字涉及改祀之語。該侍郎兩次具摺之意。既欲考證虛實。即為改祀起見。否則又何庸如此喋喋為耶。錢載本係晚達。且其事祇係考古。是以不加深咎。若遇朝廷政治。亦似此嘵嘵不已。朕必重治其罪。即如明李諸臣。每因遇事紛呶。盈廷聚訟。假公濟私。始則各成門戶。繼且分樹黨援。以至無益於國政。而國事日非。不可不引為炯戒。錢載著傳旨申飭。並將此通諭中外知之。○諭曰。圖

明阿。現在來京陛見。念其年力就衰。回任道遠。著調補兩淮鹽政。所有粵海關監督。即著伊齡阿調補。圖明阿到任後。將粵海關任內事宜。詳悉向伊齡阿告知。伊齡阿亦將鹽政事宜。詳悉告知圖明阿。俟交代清楚。伊齡阿即赴粵海關之任。不必來京請訓。○工部議覆署雲南巡撫劉秉恬奏。遵旨年終彙報通省城垣。查普寧元江。岷峨他郎等處城垣。節年彙奏。因地處江濱。旋修旋壞。或工作必須

大興或形勢另須移建現在委員確實估計又城垣非尋常工程可比請於年終彙奏案內報明如需費無多即著落地方官自行粘補否則動項興修不得頻年列入應修項下致成具文等語查地方城垣如係邊陲要隘自應修整以壯觀瞻不得因需費浩繁致有遲延至移建城垣則一切衙署倉庫亦應那就新城殊非易事應令該督確查妥議再城垣修理原有緩急不同自宜分別酌辦請嗣後於年終彙奏將急修緩修逐一分報如係應行急修即令確估具奏臣部按年覈對遲延議處得旨所駁是依議又諭軍機大臣等工部議駁劉秉恬奏請改建元江岷峨他郎等處城垣一摺所駁甚是已依議行矣城垣移建所關重大不特工費浩繁其一切衙署倉庫及居民廬舍皆須一律那徙非萬不得已不得輕議更張從前如江南之邳州四川之綿州等處城垣實因江河水勢衝激勢難

存立是以量為移徙若滇省元江等處城垣因從前因循未經估修此時祇應確查情形設法辦理何得遽請移改且工程錢糧等項雖係巡撫專責至事關移建城垣重務自應與督臣詳悉熟籌會銜具奏劉秉恬尚係曉事之人何以僅據已見徑行入奏將此傳諭劉秉恬並令福康安知之是日起

上以歲暮禋祭

太廟齋戒三日庚午浙江巡撫兼理鹽政李

質穎疏報鳴鶴場開墾沙地二百九畝有奇

○辛未以歲暮禋祭遣官祭

太廟中殿

後殿諭曰英廉和坤奏正陽門新建箭樓改用磚石發券因劬兩沉重致有閃裂各請賠項重修等語箭樓改用石工本係朕意但仍用原舊基址並未新築以致石劬較重有閃裂之處英廉及監督等自不能辭其責所有此次重修之項准其開銷一半其餘一半著

英廉賠十分之七。監督等賠十分之三。至和  
珅彼時隨從熱河。並未在工督辦。且此事乃  
自和珅奏出者。所請議處之處俱著加恩寬  
免。○諭軍機大臣等。據富勒渾等奏范家埠  
對面水底陰沙漸闊。大溜日逐移西。由天字  
號以上數十丈。刷成兜灣。逼塘而下。所有添  
築柴塘業已數十丈。臨水沿塘溜勢俱屬湍  
激。現將柴塘加意保護。其趕築之搶險石塘  
於擬築三百丈外。東西各添築一百丈。方與

塘外水勢情形。足備捍禦等語。該處既成兜  
灣。形勢大溜湍激。西趨所有搶險石工。自應  
酌量添築。富勒渾務須督率在工各員。上緊  
趕辦。毋稍弛懈。草率。至目下刷溜光景。頗為  
險要。何不以此實在情形。繪圖貼說呈覽。著  
傳諭富勒渾即行詳悉繪圖貼說具奏。至所  
稱石塘必須豫留坦地。步庶緩急有備。現  
築石工塘腳離柴塘土餞二三丈不等。該處  
即偶有民居。不過板屋土房。亦可給費遷移。

其納糧民地。俟工竣照例分別辦理等語。朕  
思現在柴塘比坦水更為得力。何必又多留  
地。步轉將柴塘置之無用。況該處民居。雖稱  
僅係板屋土房。但小民安土重遷。即量給移  
費。亦未必盡皆樂從。此事尚非刻不可緩。俟  
阿桂等到彼後。與富勒渾詳悉履勘。公同酌  
議再行辦理。將此由六百里傳諭知之。並令  
將現在情形繪圖貼說。迅速由驛覆奏。○又  
諭據李奉翰德爾炳阿奏挑濬運河摺內。稱

德爾炳阿自濟寧南至臺莊一路。運河道沈  
啟震自濟寧北至臨清一路。將淤淺應挑之  
處。趕緊興挑等語。李奉翰現在河南。所有東  
省運河挑挖工程。自係德爾炳阿與李奉翰  
札商辦理。或係德爾炳阿與沈啟震商定後  
知會李奉翰會銜具奏。即應於摺內聲敘。何  
以李奉翰首列銜名。而於如何商辦之處。竟  
未敘及。殊不明晰。再豫省新工善後事宜。現  
在如何辦理。李奉翰既具摺入奏。亦應將該

處情形隨摺附陳以慰懸注何亦並未提及著將此傳諭知之并令將現在豫工善後情形迅速具奏以散秩大臣公慶麟為京口副都統壬申禘祭

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○遣官祭

太歲之神○諭前以王亶望留辦浙江海塘

工程不令家眷回籍守制而籍隸浙省之科道並無一人入告因傳旨令其明白回奏今據該科道等奏稱王亶望於制中眷屬聚處一事實無所聞殊屬巧辯巡撫家屬留住省城本屬人所共知本省科道何至毫無聞見昨以三寶李質穎知有此事經朕面詢即據實具奏但其不知大義視為故常不以為怪已非情理若似該科道等於傳旨詢問時猶復託詞巧辯並不各自引咎其不是更大該

科道等俱著交部嚴加議處○又諭據瑪興阿等奏英吉沙爾之遊擊朱越賒取商民戴金典綢緞等物並未償價被告一案經蘇凌阿訊明呈報請將朱越革退遊擊發往烏魯木齊充當苦差効力贖罪所欠銀兩追出交還其並不知情之千總馬應隆等毋庸置議等語朱越身係遊擊任意賒取民人貨物並未償價甚屬不堪似此溺職之員若不重加懲戒日久難免索取回子之物著將輕議之

瑪興阿等嚴行申飭。朱越即著在英吉沙爾本城。枷號三箇月。並在喀什噶爾葉爾羌和闐。烏什。阿克蘇庫車。哈喇沙爾等城。各枷號三箇月。以示衆戒。俟由各城枷號滿月。再行請旨。○諭軍機大臣等。前令各直省。將僧道中有頭陀行。腳遊方等類。蓄髮披垂者。留心查辦飭禁。本日據國泰奏。泰安縣知縣黃鈴並不查辦。齊河縣知縣許保瓌。面詢時亦茫無以對。請旨革職。並請將該管知府交部議處等語。所辦殊屬過當。此事本係寄信諭旨。令該督撫等。不動聲色。留心查辦。今國泰即以此事見之章奏。實屬誤會朕意。即該員等果應叅處。亦當另為查辦。不必明指此事。且該管知府。更不應一體附叅。國泰何張皇若此。至齊河縣知縣許保瓌。迎接該撫往返八百餘里。此則有乖功令。著傳諭國泰。另行具摺叅奏。將此諭令知之。○癸酉。

上御保和殿筵宴朝正外藩左翼科爾沁和碩

親王恭格喇布坦。旺扎勒多爾濟多羅郡王齊默特多爾濟。鄂勒哲特穆爾額爾克巴拜。桑對扎布喇什噶勒當多羅貝勒。三音察袞。固山貝子班珠爾。鎮國公薩木丕勒扎木蘇。輔國公色當噶瑪勒。公品級一等台吉拉旺。一等台吉色楞丹巴。敏珠爾多爾濟。四等台吉端多布喀爾喀和碩親王固倫額駙拉旺多爾濟喀喇沁多羅郡王喇特納錫第多羅貝勒扎拉豐阿和碩額駙納木扎布。一等塔布囊丹巴多爾濟奈曼多羅郡王拉旺喇布坦。一等台吉素彌喇翁牛特固山貝子圖們巴顏。二等台吉三濟扎布巴顏巴圖爾。哈斯巴圖爾。巴林輔國公德勒克多羅額駙丹津。一等台吉索特納木多爾濟。二等台吉索諾木蘇尼特。輔國公羅布藏車凌敦漢和碩額駙朋蘇克喇錫固山額駙巴顏巴圖爾克什克騰扎薩克一等台吉囊濟特扎布根敦達爾扎。扎魯特一等台吉朋蘇克右翼烏珠穆


沁和碩親王瑪哈索哈教漢多羅郡王齊默特魯瓦固山貝子垂濟扎勒二等台吉色布騰多爾濟阿巴噶多羅郡王喇特納什第輔國公齊巴克扎布喀爾喀多羅郡王車布登扎布蘊端多爾濟齊旺多爾濟多羅貝勒拉旺多爾濟衮布多爾濟輔國公德勒克多爾濟車登扎布達什朋楚克拉沁蘇龍扎薩克一等台吉扎木巴勒多爾濟三丕勒多爾濟回部郡王品級貝勒霍集斯輔國公和什克額色尹土默特多羅貝勒索諾木巴勒珠爾綽羅斯多羅貝勒富塔喜固山貝子納木扎勒三等台吉三達克四等台吉瑚勒哈齊懇則杜爾伯特固山貝子博第輔國公扎納巴克鄂爾多斯固山貝子丹巴達爾濟喇什達爾濟青海固山貝子羅布藏色布騰烏喇特鎮國公濟克默特多爾濟喀喇沁和碩額駙衮楚克扎木素垂巴勒瓦爾歸化城土默特四等台吉巴勒丹多爾濟及領侍衛內大臣

等召左翼科爾沁和碩親王恭格喇布坦旺扎勒多爾濟多羅郡王齊默特多爾濟桑對扎布喇什噶勒當固山貝子班珠爾喀爾喀和碩親王固倫額駙拉旺多爾濟喀喇沁多羅郡王喇特納錫第多羅貝勒扎拉豐阿奈曼郡王拉旺喇布坦巴林輔國公德勒克右翼烏珠穆沁和碩親王瑪哈索哈教漢多羅郡王齊默特魯瓦固山貝子垂濟扎勒阿巴噶多羅郡王喇特納什第喀爾喀多羅郡王車布登扎布齊旺多爾濟多羅貝勒拉旺多爾濟回部郡王品級貝勒霍集斯土默特多羅貝勒索諾木巴勒珠爾青海固山貝子羅布藏色布騰杜爾伯特輔國公扎納巴克等至御座前賜酒成禮是月河東河道總督李奉翰等奏張家油房壩工堵合後遵旨駐工督率文武員弁加意巡防保護俟一切妥竣再回濟寧查驗運河挑工至壩工動用物料夫

土等項。逐一確覈。前後共用銀五十一萬四百餘兩。照例銷賠。另行具題。得旨。知道了。○是年。追予金川出師陣亡之雲南昭通鎮把總袁天麟一員。外委陳國枚一員。贈卹如例。入祀昭忠祠。旌表孝子浙江等省祁起元等三名。守節合例八旗宗室廣雲妻薩克達氏等三口。覺羅同保妻寶氏等四口。滿洲前鋒烏爾喜素妻劉氏等一百一口。蒙古馬甲三達色妻張氏等二十九口。漢軍閒散吳進賢妻張氏等十六口。內務府包衣護軍索柱妻耿氏等三口。奉天等省駐防領催姜誼妻馬氏等一百二十二口。直隸等省民吳紹京妻張氏等三百二十二口。夫亡殉節山西等省民張永春妻姜氏等十二口。未婚守志江蘇等省民張元璐聘妻馮氏等十一口。百歲壽民婦直隸等省民謝卓琳等二十六名口。各給銀建坊如例。一產三男直隸等省民梁功等六家。會計天下民穀數。各省通共

大小男婦二萬七千七百五十五萬四千四百三十一名口。各省通共存倉米穀三千七百七十二萬五千五百六十九石七斗四合八勺。

大清高宗法天隆運至誠先覺體元立極敷文奮武孝慈神聖純皇帝實錄卷之一千一百二十一



統一書號: 11018·1355—17

定 價: 51.00 元